


# A Xuxubus Maxat



The New Testament in the Usen dialect of the Barok language  
of Papua New Guinea

**A Xuxubus Maxat**  
**The New Testament in the Usen dialect of the Barok**  
**language of Papua New Guinea**  
**Nupela Testamen long tokples Borok long Niugini**

copyright © 2016 Wycliffe Bible Translators, Inc.

Language: Barok

Dialect: Usen

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-05-04

---

PDF generated using Haiola and XeLaTeX on 18 Apr 2025 from source files dated 13 Dec 2023

df27a9a4-44d7-523c-ae62-1f882291dab0

## Contents

MATIU . . . . .	1
MAK . . . . .	84
LUK . . . . .	136
JON . . . . .	222
APOSOL . . . . .	286
ROM . . . . .	367
1 KORIN . . . . .	409
2 KORIN . . . . .	447
GALESIA . . . . .	473
EPESES . . . . .	488
PILIPAI . . . . .	502
KOLOSİ . . . . .	512
1 TESALONİKA . . . . .	522
2 TESALONİKA . . . . .	530
1 TIMOTİ . . . . .	535
2 TIMOTİ . . . . .	547
TAİTUS . . . . .	555
PİLİMON . . . . .	561
İBRU . . . . .	564
JEMS . . . . .	594
1 PİTA . . . . .	605
2 PİTA . . . . .	616
1 JON . . . . .	623
2 JON . . . . .	633
3 JON . . . . .	635
JUT . . . . .	637
WİNAWARA . . . . .	641

## A Tinenge Deek ke Matiu

A nit ne Atöngösen Deek idi xirip te paraa pii ulamunon a to ma minet ma tinaru kaa baling kö minet te Jisas. A narun ne Atöngösen Deek ke Matiu me Mak me Luk te eöt sik mon kö oleleng ne pii ulamun e Jisas. A oleleng ne pii nang te pere kölöme xö Matiu, tabo pere bölök kölöme xö Mak me Luk. Ma lamun a Atöngösen Deek ke Jon i xabise, ma dauleng ne pii ulamun e Jisas kölöme re Jon, takarabo pere kölöme re Matiu me Mak me Luk. Ma lamun Matiu me Mak me Luk, idiet te xabise aulik bölök. Matiu ixo geet a pii ulamun e Jisas sua gene idi abo Judeia. Matiu ixo mamaa rua osen öturunonin bere Jisas ine a "Mesaia" (nang toxo tengen bölök bara ine e Krais), ina tödi nang e God ixo xuxubus mesila bara irabo wanot ma irabo öro a marakörö re ine ma irabo kure idi xö axana bung möxö xakawam. Ma ina Atöngösen Deek ke Matiu i wöwö ma oleleng ne tinenge re God toxo geet mesila, bara abo Judeia tabo perexulen bere Jisas ixo pet eörin inabo tinenge, io niang, ine a Mesaia, ina king ewe nang abo Judeia toxobo xisixis xiset bara irabo ölanglanga rewe idi. Me Matiu ixo geet bölök a oleleng ne ausu re Jisas. I wawara bara pitnö ne ausu raxin kölöme re Matiu (pere Matiu 5-7; 10; 13; 18; 24-25), ma abo pii ulamun a to re Jisas i kis kö boxönö xabise.

### *Abo untubuno e Jisas (Luk 3.23-38)*

<sup>1</sup> Ina na abo ese xöbo untubune Jisas nang a barok tubuno e Dewit, me Dewit ine a barok tubuno e Abaram.

<sup>2</sup> Abaram ine a tamana e Aisak,  
me Aisak ine a tamana e Jekop,  
me Jekop ine a tamana e Juda arixe mabo tönö.

<sup>3</sup> Juda ine a tamana e Peres me Sira, nago re idu iang e  
Tamar,

me Peres ine a tamana e Esron,  
me Esron ine a tamana e Ram.

<sup>4</sup> Ram ine a tamana e Aminadab,  
me Aminadab ine a tamana e Nason,  
me Nason ine a tamana e Salom.

<sup>5</sup> Salom ine a tamana e Boas ma a nago re ine iang e Rap.  
Boas ine ixo a tamana e Obet, ma nago re ine iang e Rut,  
me Obet ine a tamana e Jesi.

<sup>6</sup> Jesi ine a tamana e King Dewit.

Me Dewit ine a tamana e Solomon, me nago re Solomon ixo  
une bang ke Uria.

<sup>7</sup> Solomon ine a tamana e Reobam,  
me Reobam ine a tamana e Abiya,  
me Abiya ine a tamana e Asa.

<sup>8</sup> Asa ine a tamana e Josapat,  
me Josapat ine a tamana e Jeoram,  
me Jeoram ine a tamana e Usia.

<sup>9</sup> Usia ine a tamana e Jotam,  
me Jotam ine a tamana e Aas,  
me Aas ine a tamana e Esekia.

<sup>10</sup> Esekia ine a tamana e Manase,  
me Manase ine a tamana e Amon,  
me Amon ine a tamana e Josaia.

<sup>11</sup> Me Josaia a tamana e Jekonia mabo tönö xö ina axana  
bung nang toxo lamus inabo Israel uruo Babilon bara  
idi tabo kis singan xarnang abo osee.

<sup>12</sup> Melamu idi toxoro kis xarnang abo osee ro Babilon,  
Jekonia ine ixo tamana e Salatiel,  
me Salatiel ine a tamana e Serubabel.

<sup>13</sup> Serubabel ine a tamana e Abiud,  
me Abiud ine a tamana e Eliakim,  
me Eliakim ine a tamana e Asor.

<sup>14</sup> Asor ine a tamana e Sadok,  
me Sadok ine a tamana e Akim,  
me Akim ine a tamana e Eluid.

<sup>15</sup> Eluid ine a tamana e Eleasor,  
me Eleasor ine a tamana e Matan,  
me Matan ine a tamana e Jekop.

<sup>16</sup> Jekop ine a tamana e Josep, a tödi re Maria nang ixo kip  
e Jisas, nang toxobo rengrengen ine me Kraiss.

<sup>17</sup> Io, a sangaun ma nit ne mexubu meringan te Abaram  
urungan te Dewit, ma a sangaun ma nit meringan te Dewit  
urungan kö bung toxo lamus a bung Israel urungan Babilon  
ma toxo kis ee xarnang abo osee. Ma sangaun ma nit bölök  
meringan urungan kö bung nang toxo kip a Mesaia.

*Maria ixo kip e Jisas*

*(Luk 2.1-7)*

<sup>18</sup> A pii möxö bung nang toxo kip e Jisas Kraiss ixo urulo  
bira: A nago re ine e Maria toxoro tengen pi sik ine bara  
irabo ot tue Josep, ma lamun nang kaim bang idu ra kinis  
arixe, toxo pere bere ine ma tinen nang a Töxödös ne  
Tanono ixo isik ot e Jisas Kraiss kö balana e Maria.

<sup>19</sup> Ma a tödi re ine e Josep, ine a tödi töxödös ma i koxobo  
maa bara irabo ömenge ine xö wawara xö marakörö bara  
irabo wan kalik ine. Io, ixo maaaa bara irabo pet ödödöin  
mon.

<sup>20</sup> Ma nang e Josep ixo dödödöm lamun ina laa na, a önga angelo ixo ot te ine xö wöpönöbö ma ixo tengen, “Josep, a barok ke Dewit, u bele buut ta lamus lo im e Maria xarnang a usuom, möxösa, a barok niang i kip sik, ine i ot meriso xö Töxödös ne Tanono.

<sup>21</sup> Ine irabo kip a bak suxuruno, ma örobo tengen a esene me Jisas, möxösa, irabo öro a nangadi re ine xalik a magingin saban te idi.”

<sup>22</sup> Inabo laa xirip na ixo ot tua wewet eörin a lasanene nang a Orong ixoro tengen sik kö propet bira:

<sup>23</sup> “*A une nang kaim bang ine ra minaru arixe mere tödi irabo tienen ma irabo kip a önga barok ma tabo tengen ine me Imanuel.*” A unine möxö ina tinenge niang bira, “God irabo kis arixe me ire.”

<sup>24</sup> Io, nang e Josep ixo laran ixo pet eörin iat xarnang a angelo xö Orong ixo töngösen ine bie, ma ixo lamus lo im e Maria.

<sup>25</sup> Ma lamun kaim idu ra minaru arixe ot nang e Maria ixo kip a bak suxuruno. Ma ixo tengen a esene me Jisas.

## 2

### *Abo tene nanase toxo wanot ta werwere e Jisas*

<sup>1</sup> Nang toxoro kip e Jisas suso Betliem kö xönö raxin Judeia xöbo bung ke king Erot, abo duöng nanase mero xö tunamat toxo wanot urungan Jerusalem

<sup>2</sup> ma toxo ose, “Ina barok maxat nang toxoro kip ine bara irabo king köbo Judeia, ine ule? Mem moxo pere a tii rine ro xö tunamat me mem me ot tua lotu wösöt ine.”

<sup>3</sup> Ma nang e King Erot mabo marakörö xirip mee Jerusalem toxo ölangen ina na, idi toxo kölö.

<sup>4</sup> Io, Erot ixo kuwe etok lo xirip abo pris tataxin mabo tene ausu möxöbo warkurai te Moses, ma ixo ose idi bara xö xönö sa iang tabo kip a Mesaia e.

<sup>5</sup> Me idi toxo balu ine bira, “Ro Betliem kölöme Judeia, xarnang a propet ixo geet sik bie:

<sup>6</sup> *‘Mum abo Betliem, kö xönö pu mee Judeia, mum kobo lik köba sik köbo lagunon niang ma ese raxin tiso Judeia,*

*möxö meringan te mum a önga sisila irabo wanot nang irabo silien abo Israel, a marakörö re e.’ ”*

<sup>7</sup> Io, Erot ixo kuwe suxume lo inabo duöng nanase mero xö tunamat ma ixo ösöxö lo meringan te idiet a axana bung niang a tii ixo ot.

<sup>8</sup> Io, ixo tile idiet urso Betliem ma ixo tengen, “Mum moro wan ma moro wawara deek lamun ina bak niang. Nang

bara mum mo pere ine, mum morobo tōngösen e min, io, e bölök arabo wan ma arabo lotu wösöt ine.”

<sup>9</sup> Nang idiet toxoro ölangen e king, idiet toxo urulo a nuan te idiet ma ina tii niang idiet toxo pere ro xö tunamat, ine ixo silien idiet ot niang ixo ot kina xönö nang a barok ixo kisisik ee.

<sup>10</sup> Idiet toxo axanan köba nang idiet toxo pere a tii.

<sup>11</sup> Ma nang idiet toxo laxa xö gunon, idiet toxo pere ina bak lik arixe ma nago re ine, e Maria. Me idiet toxo subun kexe xö pu ma toxo lotu wösöt ine. Ma melamu idiet toxo sawang abo bubulus se idiet ma toxo isik abo arabaa urungan te ine, a gol ma sada ma paura nang a lak sixine deek.

<sup>12</sup> Me God ixo ötumarang idiet kö wöpönöbö bere idiet tebele baling urungan te Erot. Me idiet toxo muu a ngas kabise urungan baling kö kantri re idiet.

### *Josep di barama toxo ulo rup uruo Isip*

<sup>13</sup> Ma melamu mon, niang idiet toxoro wan, a angelo xö Orong ixo ot pösöt e Josep kö wöpönöbö ma ixo tengen, “Örö taru ma örö kip lo a barok lik arixe ma nago re ine ma örö ulo rup me idu uruo Isip. Me muot morobo kis singan ot nang e rabo tile tinenge re muot, möxösa, e Erot irabo wawara siwin ina barok lik kua sesexomet ine.”

<sup>14</sup> Io, Josep ixo taru ma ixo lamus a barok lik arixe ma nago re ine xö dömön ma toxo wan lo uruo Isip.

<sup>15</sup> Idiet toxo xisixis e ot kö minet te Erot. Ina na ixo ot tua eörin a lasanene niang a Orong ixo tengen kö propet: “*Me e xo kuwe ösu lo a barok ke e mero Isip.*”

<sup>16</sup> Ma nang e Erot ixo ösöxö lo bara abo tödi nanase mero xö tunamat toxo ömamang ine, ixo bala kadik köba ma ixo uguran abo umri rua sesexomet abo barok suxurno xirip mee Betliem ma abo lagunon lörörö xönan nang ma nine awat ma xö pu, mumuu a bung niang abo tödi nanase mero xö tunamat toxo tengen bara a tii ixo wanot wösö.

<sup>17</sup> Ma abo laa niang e propet Jeremaia ixo tengen ixo ot turunon:

<sup>18</sup> “*A ginee raxin toxo ölangen kö lagunon Rama, a ginee ma kinis ne tapunuk taxin.*

*Abo nago mee Israel te gegee lamun a bung baroxorok ke idi me idi tokobo mamaa bara tabo ömanan idi möxösa, a bung baroxorok ke idi tere met.*”

### *Di barama toxo wan uri Nasaret*

<sup>19</sup> Melamu nang e Erot ixo met, a angelo xö Orong ixo ot te Josep kö wöpönöbö ro Isip

<sup>20</sup> ma ixo tengen, “Örö taru, moro lamus lo a barok lik arixe ma nago re ine, me muot moro wan urso Israel,

möxösa, idi niang toxo eka sesexomet ina barok lik tere met."

<sup>21</sup> Io, Josep ixo taru ma ixo lamus lo a bak lik arixe ma nago re ine, me idiet toxo wan baling urungan Israel.

<sup>22</sup> Ma lamun nang ixo ölangen bara Akeleas ixoro kulas a tamana e Erot, ixo buut ta nuan uxe. I koxobo wan im uxe, möxösa, God ixoro ögele sik ine xö wöpönöbö, io, ixo baling urungan kö distrik Galili.

<sup>23</sup> Ma ixo wan ma ixo xisixis kö lagunon Nasaret. Io, ixo eörin abo lasanene niang abo propet toxoro tengen sik, "*Ma tabo rengrengen ine ma tee mee Nasaret.*"

### 3

*Jon ixo tagure a ngas*

*(Mak 1.1-8; Luk 3.1-18; Jon 1.19-28)*

<sup>1</sup> Xö inabo bung niang Jon a tene baptais ixo ot ma ixo palas tinenge xö xönö tataun mee Judeia

<sup>2</sup> ma ixo tengen, "Mum moro dödöm puxus, möxösa a kingdom möxö watmaep iri lörörö."

<sup>3</sup> Jon ina tödi na nang e propet Aisaia ixo etöngösen ulamun ine bira,

*"A inöno öng i xukup kö xönö tataun,*

*'Tagure a nuan möxö Orong,*

*ötöxödös a ngas sö ine.' "*

<sup>4</sup> A man te Jon, toxo pet ma bebene kamel, ma ixo kie ine ma lewene bulmakau. A nien te ine a kö ma musien.

<sup>5</sup> A nangadi mee Jerusalem me idi nang möxö xönö xirip mee Judeia ma möxö boxönö xirip me Ari Jordan, idi toxo wan lo urungan te Jon.

<sup>6</sup> Idi toxo tengen ösu bara idi abo duöng saban, ma ixo baptais idi xö Ari Jordan.

<sup>7</sup> Ma lamun nang ixo pere a oleleng ne Parasi ma Sadiusi toxo orot kö xönö nang ine xö baptais ee, ixo tengen te idi, "Mum abo tene röxröxö! Ewe ixo panak e mum pa ulo rup kalik ina kinadik nang God i lörörö ra isik?

<sup>8</sup> Mum morobo mana pet abo lalaa nang irabo osen bara mum moxoro dödöm puxus.

<sup>9</sup> Me mum iat mum bele döxömen bara mum morobo rengrengen kaluluonin e mum bie: 'Ire te eöt tua ulo rewe xalik a ömokrat te God, möxösa, e Abaram a tubuno ire.' E tengen te mum bara God i öt sik ka öraru abo tubuno e Abaram meringan kinabo wat.

<sup>10</sup> A matau tuar iang kö unine iaa, mabo iaa xirip nang tekara o abo pasuno deek, tabo tee ösu ma tabo tewe urungan kö könönö ia sösöt.



<sup>11</sup> “E baptais e mum ma ari ra osen bara mum muru dödöm puxus. Ma lamun önga tödi irabo wanot melamu re e, i taxin köba re e. E kobo töxödös eöt tua xikip a nine sandel te ine. Ine irabo baptais e mum ma Töxödös ne Tanono ma ia sösöt bölök.

<sup>12</sup> Me ine i tön sik a sawol te ine ra tewe öxaa abo irine wit kö xiki nang irabo paxat tewe abo lewene xalik abo irine. Lamun abo kölömene irine wit deek nang ixo tiip ma i subu, ine irabo iögun arixin tingan kö öra ne nien. Me ine irabo tewe rewe abo lewene irine wit urungan kölöme xö ia sösöt nang idi tekebeöt ta pus ömet.”

*Jon ixo baptais e Jisas*  
(Mak 1.9-11; Luk 3.21-22)

<sup>13</sup> Io, Jisas ixo wanot meruso Galili uri xö Ari Jordan tua kip a baptais xalik e Jon.

<sup>14</sup> Ma lamun Jon ixo eka tenge wi ine, ma ixo tengen, “I töxödös bara nöngön öro baptais e. Ruasa u wanot ura rö e?”

<sup>15</sup> Jisas ixo balu, “Öro ömaraxen mon bang ina na. I deek bara ire tabo pet eörin abo lalaa nang e God ixoro bulus bara i töxödös.” Io, Jon ixo ömaraxen lo.

<sup>16</sup> Ma nang e Jon ixo baptais e Jisas, Jisas ixo wan kaa xalik a ari. Saxit mon niang a balana kubu ixo tamasawang ma ixo pere a Tanono God ixo wan su xarnang a bunu ma ixo kis lömö rine.

<sup>17</sup> Io, a inöno öng meruso xö balana kubu ixo tenge bira, “Ine ano Barok ke e. E maaaa lamun ine me e axanan köba re ine.”

## 4

*Satan ixo könönöin e Jisas*  
(Mak 1.12-13; Luk 4.1-13)

<sup>1</sup> Io, a Tanono ixo lamus lo e Jisas urungan kö xönö tataun bere e Satan irabo könönöin ine.

<sup>2</sup> Nang e Jisas ixoro ölölö xö nit ne sangaun ne bung ma xö nit ne sangaun ne dömön, ixo irilöng.

<sup>3</sup> A tene ölelewen ixo wanot pösöt ine ma ixo tengen, “Nang bara nöngön ano Barok ke God, öro tengen köbo warawat ta tawuxus urungan kö beret.”

<sup>4</sup> Jisas ixo tengen, “Abo tinenge re God toxoro geet i tengen bira: ‘A nangadi tekobo to xalik mon kö beret, ma lamun köbo tinenge xirip nang i ot meringan kö ngalna e God.’ ”

<sup>5</sup> Melamu, Satan ixo lamus lo ine urungan Jerusalem, a lagunon madakdak taxin ma ixo uru e Jisas lömö saxit kö öxöno ngusuno möxö gunon lotu raxin.

<sup>6</sup> Ma ixo tengen, "Nang bara ano Barok kö God nöngön, örobo kos su, möxösa, abo tinenge re God toxo geet i tengen bira,

*'Irabo isik a tinenge lölös urungan köbo angelo re ine ulamun nöngön,*

*me idi tabo tön uru nöngön mabo limine idi,*

*bara ökorobo segen parange abo sisixine xexem köbo warawat.' "*

<sup>7</sup> Jisas ixo tengen te ine, "Abo tinenge re God toxoro geet i tengen bölök bira, *'Ganim bara mum mo könönöin a Orong, a God te mum.' "*

<sup>8</sup> Io, Satan ixo lamus lo öbaling ine urso lömö saxit kö maii raxin ma ixo osen ine mabo kantri kirip möxö öxöno lagunon arixe mabo mariris se idi.

<sup>9</sup> Ma ixo tengen, "Nang bara örobo subun kexe ma örobo lotu wösöt e, e rabo tabaa nöngön mabo lalaa xirip na."

<sup>10</sup> Jisas ixo tengen te ine, "Satan, örö wan lie e! Möxö abo tinenge re God toxoro geet i tengen bira, *'Mum moro lotu xö Orong, a God te mum, me ine xalik mon mum morobo ii ölik e mum pe ine.' "*

<sup>11</sup> Io, Satan ixo wan lie ine, ma abo angelo toxo wanot ma toxo top ine.

*Jisas ixo urulo ra palas tinenge*

*(Mak 1.14-15; Luk 4.14-15)*

<sup>12</sup> Nang e Jisas ixo ölangen bara toxoro öxös lo e Jon ma toxo öläxa ine xö gunon ne aömokorot, ine ixo wan baling uruso Galili.

<sup>13</sup> Jisas kaim kö kinis Nasaret. Ine ixo wan uruso xö lagunon Kaprenaum, nang ixo lörörö xö tu Galili xö xönö möxöbo Sebulon ma Naptali,

<sup>14</sup> rua öturunon abo tinenge re God nang e propet Asaia ixo tengen bie,

<sup>15</sup> *"Mum möxö xönö pu me Sebulon ma Naptali,*

*mum meringan kö ngas susu urungan kö tu raxin, xö lawana Ari Jordan,*

*mum mee Galili ewe nang kaim bara abo Judeia e mum,*

<sup>16</sup> *mum a nangadi nang mum bo kisisik kö ködö,*

*mum muru pere a bibio raxin.*

*Me mum nang mum bo örörö ra minet xarnang a xödxödö ne minet i kait pi e mum,*

*a bibio iri ömaras e mum."*

<sup>17</sup> Xö ina bung niang Jisas ixo urulo ra palas tinenge ma ixo tengen bira, "Moro dödöm puxus, möxösa, a kingdom möxö watmaep iri lörörö."

*Jisas ixo kuwe abo bak ne ausu*

*(Mak 1.16-20; Luk 5.1-11)*

<sup>18</sup> Nang e Jisas ixo önan kö gegene tu Galili, ixo pere a nine narön, Saimon, tobo rengrengen bölök ine me Pita, ma tönö rine e Endru. Idu toxo retewe eben kö ari, möxösa, idu a nine tene kip inan.

<sup>19</sup> Me Jisas ixo tengen tidu, “Mu moro miang ma moro muu e, e rabo usu e mu ma ngas möxö xikip a nangadi.”

<sup>20</sup> Io, saxit mon, idu toxo wan lie abo eben te idu ma toxo muu ine.

<sup>21</sup> Nang idiet toxo wan lo meringan, ine ixo pere a nine narön kabise, e Jems a barok ke Sebedi, arixe ma tönö e Jon. Idu toxo kisisik kölöme xö mön arixe me Sebedi a tamadu, idiet toxo marangas bulus abo eben. Jisas ixo kuwe bölök idu ra mumuu ine,

<sup>22</sup> ma saxit mon idu toxo wan lie ina mön arixe ma tamadu, me idu toxo muu ine.

*Jisas ixo ölanglanga abo miniset*

*(Luk 6.17-19)*

<sup>23</sup> Jisas ixo wan kö boxönö xirip kina xönö Galili, ma ixobo usu a nangadi xöbo gunon ne sineseng ke idi, ixobo palas tinenge ma tinenge deek kö kingdom kö God, ma ixobo ölanglanga a nangadi ma mangana miniset kirip.

<sup>24</sup> A tinenge ixo wan kirip kö inabo lagunon Siria lamun e Jisas, ma a nangadi toxo kip ot abo mangana miniset kirip urungan te ine. Dauleng a kinadik taxin ibo uban idi, dauleng abo tano saban toxoro tup pe idi, dauleng abo gögöng, ma dauleng abo pengpeng, me ine ixo ölanglanga idi.

<sup>25</sup> Marakörö raxin mee Galili, Dekapolis, Jerusalem, Judeia, ma xina xönö lawana Ari Jordan, toxo muu ine.

## 5

*A mangana tödi nang e God irabo wadöane*

*(Luk 6.20-23)*

<sup>1</sup> Io, nang ixo pere a marakörö, ixo wan kaa urso xö lawana maii ma ixo kis kö pu. Abo bak ne ausu rine toxo wanot pösöt ine,

<sup>2</sup> ma ixo urulo ra usu idi, ma ixo tengen bira,

<sup>3</sup> “Irabo deek kö idi ewe midi nang idi te sasaxan köba xöbo lalaa xirip merso re God, möxö idi tabo laxa xö kingdom möxö watmaep.

<sup>4</sup> Irabo deek kö idi ewe nang te gee ne tapunuk, möxö God irabo öbala idi.

<sup>5</sup> Irabo deek köbo tödi ödödö,

möxö God irabo tabaa idi arixe mabo lalaa deek nang ixoro tagur sik ke idi.

<sup>6</sup> Irabo deek kö idi niang te irilöng ma te minauu xöba lamun a tatalien töxödös,

möxö God irabo eörin abo mamaa re idi.

<sup>7</sup> Irabo deek kö idi ewe nang te marase a nangadi xabise, möxö God irabo marase idi.

<sup>8</sup> Irabo deek kö idi ewe nang te madakdak kö kat te idi, möxö idi tabo pere e God.

<sup>9</sup> Irabo deek kö idi ewe nang te isik a malum, möxö God irabo tengen bara idi abo barok ke ine.

<sup>10</sup> Irabo deek kö idi nang bara a nangadi te eler tö idi möxö idi te pet abo tatalien töxödös,

möxösa, idi tabo laxa xö kingdom möxö watmaep.

<sup>11</sup> "Irabo deek kö mum nang bara a nangadi te tengen ögarin e mum ma nang bara te eler e mum ma nang bara te töxö ögarin e mum arixe mabo mangana lalaa saban lamun mon a eseke.

<sup>12</sup> Me mum morobo mana axanan, möxösa, a xinuxun taxin te mum nangen nuso xö watmaep, möxö toxoro eler sik bira mabo propet nang toxo sila re mum.

### *A sol ma bibio*

*(Mak 9.50; Luk 14.34-35)*

<sup>13</sup> "Mum mo xarnang a sol möxö nangadi mera xö öxöno lagunon. Ma nang bara a nanamien möxönan iri kawam, a nanamien möxönan irabo ot baling bule? Ina sol i karabo deek ma irabo laa tataun, i eöt bara tabo tewe rewe ma tabo wawas kaa xönan.

<sup>14</sup> "Mum a bibio möxö nangadi xö öxöno lagunon. Kaim pe lagunon lömö xö mai irabo mun.

<sup>15</sup> Kaim pe öng ibo usumot a laam ma ibo bulus kö ene bile. Kawaim, idi tobo uxis lömö xö xönö iat möxönan, ma ibo isik a maras kö nangadi xirip kö gunon.

<sup>16</sup> Xarnang mon, a bibio re mum irabo mararang kö wawara xö nangadi bara idi tabo pere abo tatalien deek ke mum me idi tabo ölet a Tamana e mum nuso xö watmaep.

### *Jisas ixo öturunon abo warkurai*

<sup>17</sup> "Ganim a döxömen bara e wanot ta xikip tewe abo warkurai te Moses bara abo inausu möxöbo propet. E kobo ot tua xikip tewe idi, lamun tua öturunon idi.

<sup>18</sup> Turunon saxit, nang bara a watmaep ma öxöno lagunon idu te malaa sik iat, kaim pe ulik ne xönö möxöbo warkurai te Moses nang i lik köba irabo kawam ot abo lalaa xirip irabo wanot.

<sup>19</sup> Ewe niang i lexe re ulik möxöbo warkurai ma i usu a nangadi xabise rua lexele bölok, tabo tengen ine bara i

lik köba xö kingdom möxö watmaep. Inexalik ewe niang i muu inabo warkurai na ma i usu a nangadi xabise min, tabo tengen ine bara i taxin kö kingdom möxö watmaep.

<sup>20</sup> Mum mo döxömen bara abo tene ausu möxöbo warkurai te Moses mabo Parasi, idi te töxödös. Ma lamun e tengen te mum bara mum korobo eöt ta nilaxa xö kingdom möxö watmaep nang bara abo tatalien töxödös se mum i kobo deek köba xöbo tatalien töxödös se idi.

*Ganim a inarsexomet*

<sup>21</sup> "Mum moxoro ölangen bara ina warkurai te Moses ixoro tengen kö nangadi mesila, '*Ganim a sexomet tödi*. Ewenene niang i eresexomet tataun, ine irabo tuu xö warkurai.'

<sup>22</sup> Ma lamun e iat, e tengen te mum bara ewenene niang i laie arixe ma tönö, idi tabo bulus ine xö warkurai ne komiti. Me ine irabo tuu xö warkurai. Ma nang bara ewenene i tengen ögat a tönö bara, '*Ine a baulang!*', irabo deek bara tabo isik ine mesila xö warkurai ne kansel. Nang bara ewenene i tengen bara, '*Nöngön u baulang köba*', irabo eöt bara ine irabo wan urungan kö ia sösöt.

<sup>23</sup> "Möxö ina na, niang bara u eka isik a arabaa re nöngön te God kö xönö möxö bulus arabaa, ma u döxömen lo a bala saban kö töm niang ixo pet te nöngön,

<sup>24</sup> örö ganim sik bang a arabaa re nöngön mesila xö xönö möxö bulus arabaa. Me mu morobo ötöxödös bang e mu. Io, melamu örobo isik a arabaa re nöngön.

<sup>25</sup> "Nang bara a öng i lamus nöngön kö warkurai, nöngön örobo ötöxödös pasaxirin arixe mine nang bara mu mo önan kö ngas, xalik ibo isik nöngön kö tene warkurai, ma tene warkurai irabo isik nöngön kö duöng möxö balaure nangadi nang tobo kubus pi idi kölöme xö gunon ne aömokorot, ma irabo bulus nöngön könan.

<sup>26</sup> Turunon saxit, nöngön ökorobo wan su ot nang örobo isik abo xinuxun kirip pe nöngön.

*A magingin ne ögarin alolo*

<sup>27</sup> "Mum moxoro ölangen bölök bara ina warkurai te Moses ixo tengen bira, '*Ganim pe öng nang i elolo ra minaru arixe ma öng nang kaim bara re ine.*'

<sup>28</sup> Ma lamun e iat, e tengen te mum bara ewe nang i neek a une, ine iri pet a saban, möxösa, ine iri maru arixe ma önga une xabise kölöme xö to rine.

<sup>29</sup> Ma nang bara a lawana maram i engin nöngön ta pet magingin saban, örö luok tewe ma örö tewe rewe. I deek ke nöngön bara tabo tee rewe re uk möxö lewene aim, xalik a lewene aim kirip tabo tewe urungan kö ia sösöt.

<sup>30</sup> Nang bara a lime tuun i engin nöngön ta pet magingin saban, örobo tee xöröp ma örobo tewe rewe ine. I deek kö nöngön bara tabo irewese önga lawana aim, xalik a aim kirip irabo wan laxa xö ia sösöt.

*A unine bara a usuono i ögarin a alolo  
(Matiu 19.9; Mak 10.11-12; Luk 16.18)*

<sup>31</sup> “Ma ina warkurai te Moses ixo tengen bira, ‘Ewe re öng niang i köröp alolo ma une re ine, irabo mana geet te tinenge maras möxö köröp alolo ma irabo mana isik ina ginigeet urungan kö une re ine.’

<sup>32</sup> Ma lamun e iat, e tengen te mum bara ewe re öng niang i köröp alolo ma une re ine nang i kala ilawa, io, ina tödi i engin ine rua minaru arixe ma öng kabise ra pet sasaban. Ma ewe re öng i elolo ina une nang ina tödi iri köröp a alolo re idu, i pet a tatalien saban, möxösa, ine i maru ma une kaim bara re ine.

*Ganim a sugurno*

<sup>33</sup> “Mum moxoro ölangen bölök bara ina warkurai te Moses ixo tengen köbo tubu mum bira, ‘Ganim bara u pörök a usugurno. Inexalik bara örobo tön sik a usugurno re nöngön u xoro pet urungan kö Orong.’

<sup>34</sup> Ma lamun e iat, e tengen te mum, ganim bara mum mo sugurno ra ölölös a tinenge re mum. Ganim a sugurno urso lömö, möxö e God ibo wewet warkurai tingan lömö.

<sup>35</sup> Ma ganim a sugurno ma öxöno lagunon, möxösa, e God ibo bulbulus a xexene xönan. Ma ganim a sugurno urungan Jerusalem, möxö ina xönö ine a lagunon kö King Taxin.

<sup>36</sup> Ma ganim a sugurno ma öxöm iat, möxö u kebeöt tua wewet arixin te bebene öxöno öng irabo pidien bara irabo kong.

<sup>37</sup> Inexalik i öt bara örobo tengen mon bara u maraxa bara u mölök. Lamun nang bara u tengen te mangana lalaa rua wewet ölölös a tinenge re nöngön, örobo ösöxö bara i ot meringan kalik ina tene sasaban.

*U bele balu a sasaban urungan kö sasaban  
(Luk 6.29-30)*

<sup>38</sup> “Mum moxoro ölangen bölök ina warkurai te Moses ixo tengen bira, ‘Nang bara u luok tewe a kalait marna öng, idi bölök tabo luok tewe re önga kalait maram. Ma nang bara u pit tewe a ngisine öng, idi bölök tabo pit tewe re önga ngisem.’

<sup>39</sup> Ma lamun e iat, e tengen te mum, ganim a babalu a sasaban urungan kö tödi saban. Nang bara re öng i

was a nōngōn kō lawana wales tuun, isik bōlōk a lawa kes urungan te ine.

<sup>40</sup> Ma nang bara re ōng i maaaa ra isik nōngōn kō warkurai rua xikip lo a man te nōngōn, ōmaraxa lo ine rua ilo bōlōk a siot te nōngōn.

<sup>41</sup> Nang bara re ōng i ōlōlōs nōngōn ta xikip abo lalaa re ine urungan lōrōrō mon, ma ngas a lak ōmat bang, io, ōrobo kip ōxase a ulik bōlōk inabo lalaa re ine.

<sup>42</sup> Ma nang bara re ōng i seng nōngōn mere laa, ōrobo mana tabaa ine. Ma nang bara re ōng i ka seseng lo bang ke lalaa re nōngōn, tabaa bang ine min.

*Mamaa lamun a iuo re nōngōn*

*(Luk 6.27-28, 32-36)*

<sup>43</sup> “Mum moxoro ōlangen bōlōk ina warkurai te Moses ixo tengen bira, ‘Mum morobo mana bala malum kō ōng kabise ma morobo melentexin abo iuo re mum.’

<sup>44</sup> Ma lamun e iat, e tengen te mum, mum morobo mana maaaa lamun abo iuo re mum ma morobo seseng ke ewenene me idi nang te ōgarin e mum,

<sup>45</sup> bara mum morobo abo bak kō Tama mum niso lōmō xō watmaep. Ma ibo tile a xaken tine rue idi nang abo tene sasaban me idi nang a lak deek. Ma ibo tile a baraa urungan te idi ewe te tōxōdōs me idi ewe nang tekobo tōxōdōs.

<sup>46</sup> Lamun nang bara mum mo maaaa lamun ewe midi niang te maaaa lamun e mum, God i karabo balu ōbaling e mum mere lalaa deek. Me idi bōlōk abo tene kip takis tobo wewet ina na.

<sup>47</sup> Ma nang bara mum mo wōwōrō xalik mabo tōm mum ewe mum bo maaaa ulamun idi, io, a lasanene i deek bōlōk mum mo wewet kōbo duōng kabise? Inexalik ewe idi nang tekobo nunu re God, idi bōlōk tobo wewet ina na.

<sup>48</sup> Io, mum morobo mana tōxōdōs kōba saxit bie xarnang a Tama mum niso lōmō i tōxōdōs kōba sik.

## 6

*Pet suxume abo tatalien deek*

<sup>1</sup> “Tumarang e mum ma ganim bara mum mo pet tebo tatalien deek kō wawara xō nangadi rue idi tabo pere e mum. Nang bara mum mo pet bie, mum mo korobo kip lo a xinuxun meriso xō Tama mum niso lōmō xō watmaep.

<sup>2</sup> “Io, nang bara u tabaa re tōdi sasaxan, ganim bara u osen kō wawara xō nangadi. Idi nang tobo rōxrōxō bara idi a nangadi deek, tobo wewet bie kōlōme xōbo gunon ne sineseng ma xōbo ngas bōlōk. Idi tobo wewet bie rua nangadi tabo ii ōraxin idi. Turunon saxit, idi toxoro kip lo xirip abo xinuxun te idi.

<sup>3</sup> Lamun nang bara u isik a arabaa urungan kö tödi sasaxan, ganim bara lime kes i ösöxö a mangana lasa a lime tuun i wewet.

<sup>4</sup> Lamun ina arabaa re nöngön irabo mana kis suxume sik iat. Io, a Tamana e nöngön nang ibo werwere abo lalaa deek te pet suxume, ine irabo isik a inone xinuxun te nöngön.

*A tatalien ne sineseng*

*(Luk 11.2-4)*

<sup>5</sup> "Nang bara mum mo seseseng, ganim bara mum mo xarnang idi nang tobo röxröxö mon bara idi a lak deek, möxö idi tobo maaaa mon tua tinuu ma sineseng kölöme xöbo gunon ne sineseng ma xö boxönö nang a nangadi tobo oretok ee rua duöng ka werwere idi tobo seseseng. Turunon saxit, idi toxoro kip lo abo xinuxun kirip pe idi.

<sup>6</sup> Lamun nang u seseseng, örobo mana wan laxa xö gunon, baxut a marama ma örobo seseng urungan kö Tamana e nöngön, ewe nang ke öng i kebeöt ta werwere ine. Io, a Tamana e nöngön, ewe ibo werwere a lasa toxobo wewet suxume, ine irabo isik a xinuxun te nöngön.

<sup>7</sup> Ma nang u seseseng, ganim bara u pet ömarin a sineseng ke nöngön, möxö kaim pe unine möxönan xarnang idi ewe tekobo nunu xö God. Io, idi tobo döxömen bara God irabo ölangen mon idi xöbo oleleng ne boxönö tinenge xö ina sineseng ke idi.

<sup>8</sup> Inexalik bara ganim e mum pa xarnang idi, möxö a Tamana e nöngön iri ösöxö tuar a lasa u maaaa ulamun, nang bang u kala seng ine.

<sup>9</sup> "Io, mum morobo mana seseng bira:  
 'A Tama mem niso lömö xö watmaep,  
 mem me maaaa bere mem marabo bulus kabisein a esem  
 pua osen bere nöngön u madakdak saxit,  
<sup>10</sup> me mem me maaaa bara a kingdom pe nöngön irabo  
 wanot,  
 ma bara tabo pet eörin a maaaa re nöngön ta xö öxöno  
 lagunon  
 xarnang tobo wewet tiso xö watmaep.

<sup>11</sup> Tabaa e mem nixinen ma nien te mem nang i eöt ma önga  
 bung.

<sup>12</sup> Ma örö döxömen taun tewe abo magingin saban te mem,  
 xarnang bölök e mem marabo döxömen taun tewe abo  
 magingin saban toxoro pet tö mem.

<sup>13</sup> Me mem me maaaa bölök bara örobo balaure wi e mem  
 kalik abo ölelewen,  
 ma örö kip puxus e mem kalik a tene saban.

[Möxö re nöngön iat a kingdom, ma a lölös, me mem  
 marabo ölet nöngön ulorexe. Amen.]'



<sup>14</sup> Io, nang bara mum mo dōxōmen taun a magingin saban kōbo duōng nang te pet tō mum, a Tama mum niso xō watmaep, ine bōlōk irabo dōxōmen taun abo magingin saban te mum.

<sup>15</sup> Ma lamun nang bara mum mo kōbo dōxōmen taun a magingin saban kere ōng kabise i pet tō mum, a Tama mum bōlōk i karabo dōxōmen taun a magingin saban te mum.

*A tatalien ne ōlōlō*

<sup>16</sup> "Ma nang bara mum mo ōlōlō urungan te God, ganim e mum pa winara meles xarnang idi tobo wewet nang tobo rōxrōxō mon bara idi a lak deek, mōxōsa, idi tobo osen a mamaran te idi xō nangadi bara idi te ōlōlō. Turunon saxit, idi tere kip lo abo xinixun kirip pe idi.

<sup>17-18</sup> Lamun nang bara u ōlōlō urungan te God, ōrobo magan tua nangadi tekebeöt tua werwere xulen nōngön bara u ōlōlō, inexalik irabo maras urungan kalik mon kō Tamam ewe nang tekara pere ine. Ma a Tamam ewe nang ibo werwere a laa u bo wewet suxume, ine irabo isik a xinixun urungan te nōngön.

*Mamaa xōba ulamun abo lalaa meriso xō watmaep  
(Luk 12.33-36; 16.13)*

<sup>19</sup> "Ganim e mum pa bulbulus ōgun abo tabarikik ke mum pa xō ōxōno lagunon nang a iwis irabo perōgat ma irabo maut tewe. Ma ganim e mum pa bulbulus inabo lalaa na xō boxōnō nang a duōng pililo tobo wōrwōrōk a gunon ma tabo pulo.

<sup>20</sup> Lamun bara mum morobo bulus ōgun a tabarikik ke mum puso xō watmaep, nang abo iwis tekebeöt ta wewet ōgat ma i karabo kawam, ma a nangadi pililo tekebeöt ta nilaxa xōnan ma tabo pulo.

<sup>21</sup> Mōxō a tabarikik ke nōngön i kis singan ee, ma a to xirip pe nōngön i kis singan bōlōk.

<sup>22</sup> "A nini kalait maram, idu te xarnang a bibio re nōngön. Nang bara a nine kalait maram a lak deek, io, a aim kirip irabo maras.

<sup>23</sup> Lamun nang bara a nine kalait maram i kobo deek, io, a to xirip pe nōngön irabo wōwō ma xōdxōdō. Inexalik bara ina maras nang i kis kōlōme re nōngön iri kōdō, ina xōdxōdō irabo taxin kōba!

<sup>24</sup> "Kaim pe ōng i öt tua ōlangen a nini orong. Mōxō ine irabo kasen a ōng ma irabo mamaa ulamun a ōng kabise, ma bara irabo araröt sik kō ōng ma irabo melentexin a ōng kabise. Io, mum kebeöt tua ōlangen e God ma a tuluwok bōlōk.

*U bele dödöm oleleng*  
(Luk 12.22-31)

<sup>25</sup> “Möxö ina na, e tengen te mum, ganim a dinödöm oleleng lamun a to re mum bara a lasa morobo en ma a lasa morobo inim, ma a lasa morobo sige xö aimum. A to re mum i laa raxin köba xö nien, ma a aimum i taxin köba xö man.

<sup>26</sup> Mum moro pere a bung pun merso lömö. Idi tekara susulo. Ma tekara kin öxaa nien. Ma tekara iiögun ödeek kö gunon mataxen. Ma lamun a Tamana e mum niso xö watmaep ibo tabaa idi ma nien. Mum morobo maras bara xö mamaa re God, mum mo taxin sik ke idi.

<sup>27</sup> Me ewenene mere mum i dödöm oleleng ulamun abo tiip pe ine, i eöt tua öxase a to re ine ulik baling? Kaim turunon.

<sup>28</sup> “Ma rösanene mum mo tapunuk lamun a man? Mum moro pere abo pasuno iaa te das bule. Idi tekara ösöxö ra tiñörön me idi tekara ösöxö ra söxsöxö a man.

<sup>29</sup> Inexalik e tengen te mum bere e Solomon kaim ine xo sisige rebo man deek xarnang a öng mere idi.

<sup>30</sup> Io, God i balaure a pirixö nang i to nixinen, ma maxalik tabo tewe öxaa xö ia sösöt. Nang bere God i pet bie xö pirixö, turunon saxit ine irabo tawi nöngön bölök ma man te nöngön. Maris, a nunu re mum i wuruwut köba.

<sup>31</sup> Mum ganim a tapunuk, ma morobo tengen bara, ‘Ire tabo en a sa?’ ma, ‘Ire tabo inim a sa?’ bara, ‘A lasa tabo sige?’

<sup>32</sup> Ewe midi nang tekobo nunu re God, idi tobo wawara siwin inabo lalaa na, ma Tata re mum nuso xö watmaep i ösöxö bara mum mo sasaxan.

<sup>33</sup> Mesila xöbo lalaa xirip, mum morobo parasiwin a tatalien töxödös se God ma abo lalaa i eöt ma kingdom pe ine. Me ine irabo tabaa e mum minabo lalaa xirip bölök.

<sup>34</sup> Inexalik, ganim a tapunuk lamun abo lalaa möxö maxalik. Abo tiip möxö maxalik, mum moro gan sik kua maxalik. Ire mabo tiip iat köbo öngöng a bung.

## 7

*U bele kure a nangadi xabise*  
(Luk 6.37-38, 41-42)

<sup>1</sup> “Nöngön u bele kure öng kabise bara i pet a saban, xalik e God irabo kure nöngön bölök bira.

<sup>2</sup> God irabo kure nöngön xarnang mon u kure a nangadi xabise. Ma abo mangana warkurai nang u pet kö nangadi xabise, God irabo pet bölök kö nöngön.

<sup>3</sup> “Ruasa nōngön u pere abo perne iaa kölöme xö marana e töm, ma u kobo döxömen lo im ina pönö iaa kölöme xö marana e nōngön iat?

<sup>4</sup> Nōngön u bele tengen urungan kö töm bara, ‘E rabo kip tewe a perne iaa xö maram.’ Nōngön ökorobo pet bie, möxösa, nōngön iat angen ma pönö iaa xö maram.

<sup>5</sup> Nōngön nang u bo röxröxö mon bara nōngön a lak deek, örö luok tewe bang ina pönö iaa xö maram iat, melamu nōngön örobo wawara deek kua xikip tewe abo perne iaa xö marana e töm.

<sup>6</sup> “Ma ganim a tewe örup abo lalaa nang a lak deek urungan köbo wuluwun ma urungan köbo bo, xalik idi tabo pas mabo xexene idi me idi tabo baling me idi tabo kat didis nōngön.

*Seng e God ulamun abo lalaa*

*(Luk 11.9-13)*

<sup>7</sup> “Nōngön örobo seseng ma örobo kip lo a laa. Nang bara u wawara siwin, örobo pere wösöt lo. Ma nang bara u wiwidin kö marame, God irabo sawang lo nōngön.

<sup>8</sup> Möxö ewe i seseseng, irabo kip lo a lasa ine i ose lamun. Ewe i wawara siwin, irabo pere wösöt lo a laa niang ine i wawara siwin. Me ewe niang i wiwidin, God irabo sawang lo ine.

<sup>9</sup> “Ewe re mum ibo tabaa a barok ke ine ma warawat niang bara i seng ine ma nien?

<sup>10</sup> Ma nang bara i seng a inan, irabo tabaa ine ma si?

<sup>11</sup> Nang bara mum abo tene sasaban, mum mo ösöxö ra tabaa abo barok ke mum ma abo lalaa deek, io, i osen bara a Tata re mum nuso xö watmaep i ösöxö ra isik abo lalaa deek kö idi ewe niang te seng ine.

<sup>12</sup> Io, mum morobo pet kö nangadi xabise xarnang e mum mo maaaa lamun idi tabo pet te mum. Ina tinenge na, ine a unine möxöbo warkurai te Moses mabo inausu möxöbo propet.

*A nine mangana ngas*

*(Luk 13.24)*

<sup>13</sup> “Mum morobo mana laxa xö marame lik, möxösa, a marame ma a ngas a lak taweweng i silien a nangadi urungan kö minet, ma oleleng ne nangadi te laxa xönan.

<sup>14</sup> Lamun a marame lik ma a ngas lik ibo silien a nangadi urungan kö to, ma dauleng mon tobo pere wösöt lo.

*Tumarang köbo propet töxö*

*(Luk 6.43-44; 13.25-27)*

15 “Mum morobo tumarang köbo propet töxö. Idi tabo ömamang e mum bara idi abo sipsip. Lamun idi te xarnang abo wuluwun axe tobo ekat.

16 Mum morobo perexulen idi xöbo tatalien te idi, xarnang mon mum bo perexulen abo uno iaa xö inone idi. Mum kara ösöxö ra dik gamat kö pirixö gargaras. Me mum kara ösöxö rua kip pöxö xalik a pirixö tataun.

17 Xarnang mon ina niang, a iaa deek ibo oo a pasuno iaa deek, lamun a iaa saban ibo oo a pasuno iaa saban.

18 A iaa deek i kebeöt ta o a pasuno iaa saban, ma iaa saban i kebeöt ta o a pasuno iaa deek.

19 Abo uno iaa xirip nang tekara ösöxö ra o a pasuno iaa deek, idi tabo tee ösu ma tabo tewe urungan kölöme xö ia söst.

20 Io, mum morobo perexulen idi xöbo inone idi.

21 “Kaim bara nangadi xirip tobo rengrengen e, ‘Orong, Orong,’ tabo laxa xö kingdom möxö watmaep, lamun idi xalik mon idi tobo wewet eörin a maaaa re Tata re e nuso xö watmaep.

22 A oleleng tabo tengen te e xina bung, ‘Orong, Orong! Bule im pe mem? Mem moxo rengrengre propet kö lölös se nöngön. Me mem moxo irewe abo tano saban kö lölös se nöngön. Ma arixe ma lölös se nöngön mem moxo pet a oleleng ne lalaa lölös ne auwuwus.’

23 Io, e rabo tengen te idi bara, ‘E kobo ösöxö runon e mum. Moro wan kalik e, mum abo tödi saban!’

*A tödi nanase ma tödi baulang  
(Luk 6.47-49)*

24 “Io, ewe nang i ölangen ina tinenge re e ma i pet muu xö to rine, i xarnang a tödi nanase ewe nang ixo sulo ösu a gunon te ine uri lawu xö xönö warawat.

25 A baraa ixo su, ma a ari ixo lölös, ma xiki ixo taru ma ixo paxat ina gunon. Inexalik ina gunon kaim kö sinubu, möxösa, ine ixoro uru ösu abo xösöng uri lawu xö xönö warawat.

26 Lamun ewenene nang i kobo ölangen inabo tinenge re e, ma i kobo pet muu, ine i xarnang a tödi baulang ewe niang ixo uru a gunon te ine xö önö.

27 A baraa ixo su, ma ari ixo lölös, ma a xiki ixo taru ma ixo paxat ina gunon, ma gunon ixo tawörök ma ixo tamaöbeng saban.”

28 Nang e Jisas ixo öxawam a tinenge xinabo lalaa, a nangadi toxo wuwus kö ausu re ine,

29 möxö ixo usu idi xarnang a tödi iri kip lo a lölös sua inausu, ma kaim xarnang abo tene ausu möxöbo warkurai te Moses.

## 8

*A tödi ma lepra**(Mak 1.40-45; Luk 5.12-16)*

<sup>1</sup> Nang ine ixo wanot meruso xö lawana maii, a marakörö raxin toxo muu ine.

<sup>2</sup> A tödi ma miniset lepra ixo ot ma ixo subun kexe mesila re ine ma ixo tengen, "Orong, nang bara u mamaa, nöngön u eöt ta öxawam a miniset lepra xalik e bara e ra madakdak."

<sup>3</sup> Me Jisas ixo sasanga ma limine ma ixo tön ine. Ma ixo tengen te ine, "E mamaa. Örö deek." Ma saxit iat mon ina miniset lepra ixo kawam kalik ine.

<sup>4</sup> Io, Jisas ixo tengen te ine, "Ganim bara u tengen osen kere öng. Inexalik örö wan ma örö osen nöngön kö pris ma örö isik a arabaa ne söngsöngöt eöt ma warkurai te Moses. Ma irabo xarnang a atöngösen maras sö idi bara a turunon bere u xoro langlanga."

*A nunu raxin kö umri**(Luk 7.1-10)*

<sup>5</sup> Io, nang e Jisas ixo wan laxa tuar kö xönö Kaprenaum, a umri raxin möxöbo duöng inarse ixo wanot pösöt ine, ma ixo ose lamun a rorop.

<sup>6</sup> Ma ixo tengen, "Örong, a tene tinörön te e i maru sik kö gunon te e. Ma i örasen a kinadik taxin, ma i kebeöt ta ömagi a aine."

<sup>7</sup> Jisas ixo tengen te ine, "E rabo wan me e rabo ölanglanga ine."

<sup>8</sup> Ina umri raxin ixo tengen, "Orong, e kobo tödi deek köba bara örobo wan laxa xö gunon te e. Inexalik bara örö tengen mon a tinenge re nöngön, ma ina tene tinörön te e irabo langlanga.

<sup>9</sup> E tengen bira, möxösa, e bölök e kisisik kö ene warkurai, mabo umri bölök te kisisik kö ene e. Me e bo tengen kö öng, 'Wan', io, ibo wan. Me e bo tengen kö öng niang, 'Miang', ma ibo wanot. Me e bo tengen kö tene tinörön te e, 'Örö pet a na', ma ibo pet bie."

<sup>10</sup> Jisas ixo wuwus saban nang ixo ölangen ina na, ma ixo tengen te idi nang toxo mumuu ine, "Turunon saxit, e kala parasiwin te öng ka Israel ma mangana nunu raxin bira.

<sup>11</sup> E tengen tö mum, a oleleng tabo wanot mero xö tunamat ma meriso xö labur, ma tabo kis kö pet nien te Abaram, Aisak me Jekop kö kingdom möxö watmaep.

<sup>12</sup> Inexalik ewe idi nang sila e God ixo pere kos idi rua kinis kö kingdom, tabo tewe ösu idi urungan kö ködö lamin, nang kingan idi tabo gegee ma tabo engiren abo ngisine idi."

13 Io, Jisas ixo tengen kö ina umri raxin, “Örö wan! Ma irabo ot xarnang u nunu sik bie.” Ma a tene tinörön te ine ixo langlanga baling kö ina axana bung iat mon.

*Jisas ixo ölanglanga a oleleng*  
(Mak 1.29-34; Luk 4.38-41)

14 Ma nang e Jisas ixo wan laxa xö gunon te Pita, ixo pere a taön te Pita ixo maru sik ma malao xö öra.

15 Ine ixo tön a limine ina une ma a malao ixo kawam kalik ine me ine ixo taru kaa ma ixo urulo ra tabaa ine ma nien.

16 Io, nang ixoro aien im, toxo kip ot a oleleng nang abo tano saban toxoro tup pe idi urungan te Jisas, ma ixo irewese abo tano saban ma a tinenge, ma ixo ölanglanga abo duöng miniset kirip.

17 Abo laa na ixo ot tua öturunon abo tinenge re propet Aisaia bira,

*“Ine iat ixo kip lo inabo miniset te ire  
ma ixo sölök lo inabo kinadik ke ire.”*

*A tatalien ne mumuu e Jisas*  
(Luk 9.57-62)

18 Nang e Jisas ixo pere ina marakörö xirip köbo lawana ine, ixo isik a tinenge lölös sö idi abo bak ne ausu ra lilies köröp urungan kö lawa xabise möxö tu.

19 Io, önga tene ausu möxöbo warkurai te Moses ixo wanot pösöt ine ma ixo tengen, “Tene Ausu, e rabo muu nöngön köbo nuan kirip pe nöngön.”

20 Jisas ixo balu, “A bung puluwun axe idi ma mara, ma bung pun möxö maop idi ma wöwösö, nexalik a Barok kö Tödi kaim ine mere xönö rua ömarin a öxöno.”

21 Önga bak ne ausu xabise ixo tengen te ine, “Orong, örö öbala bang e ma ara wan ara pömös e tata re e.”

22 Ma lamun Jisas ixo tengen te ine, “Örö muu e, ma ganim abo minet tabo pömös abo minet te idi.”

*Jisas ixo ömalile a dalun*  
(Mak 4.35-41; Luk 8.22-25)

23 Io, ine ixo kakaa xö mön ma abo bak ne ausu re ine toxo muu ine.

24 Ma a dalun taxin ixo taru lölös kö tu. A dalun ixo tawit laxa xö mön. Inexalik Jisas ixo paluso sik.

25 Abo bak ne ausu toxo wan, ma toxo ölaran ine ma toxo tengen, “Orong, örobo öro ire! Ire te eka köngö!”

26 Io, ixo tengen, “A nunu re mum i lik köba. Mum mo bubuut köba ruasa?” Io, ine ixo taru kaa ma ixo tenge köö a xiki ma dalun, ma ina tu raxin ixo malile esexere.

<sup>27</sup> Abo duöng toxo wuwus saban ma toxo ose bara, “A mangana tödi sanene ia? Nang a xiki ma dalun iat te tame ine!”

*Jisas ixo ölanglanga a nini tödi ma tano saban*  
(Mak 5.1-20; Luk 8.26-39)

<sup>28</sup> Nang ine ixo ot kö lawa xabise möxö ina xönö pu Gadara, a nine tödi ma tano saban, toxo wan su xalik abo lieng kö nangadi minet ma toxo esuo me Jisas. Kawaim arixe re öng ibo önan saxit kina ngas, möxösa, idu toxoro axe xöba.

<sup>29</sup> Idu toxo kup bira, “A Barok kö God, u mamaa lamun a lasanene xalik e maa? Nöngön u wanot ta ra öxadik köbanin e maa, ma axana bung nang e God irabo isik a kinadik ke maa i kala ot bang?”

<sup>30</sup> Kaim a palaa ulik kalik idiet, a oleleng ne bung bo toxo aan.

<sup>31</sup> Abo tano saban toxo seng e Jisas, “Nang bara u irewese e mem, tile e mem urungan kö bung bo.”

<sup>32</sup> Jisas ixo tengen te idi, “Mum moro wan su!” Io, idi toxo wan su ma toxo laxa rup kö bung bo, ma ina bung bo xirip toxo ewasak su xö gegene maii urungan kölöme xö ari ma toxo met kö könönö ari.

<sup>33</sup> Io, a nangadi möxö balaure a bung bo, toxo ulo rup, ma toxo wan laxa xö lagunon taxin ma toxo tengen osen inabo laa xirip, arixe ma a lasa nang ixo ot kö nine tödi nang a tano saban ixo laxa rup pe idu.

<sup>34</sup> Io, a nangadi xirip möxö ina lagunon taxin idi toxo wan su rua asuo me Jisas. Ma nang idi toxo pere ine, toxo tenge marmaris se ine ra nuan pes xalik ina xönö re idi.

## 9

*Jisas ixo ölanglanga a pengpeng*  
(Mak 2.1-12; Luk 5.17-26)

<sup>1</sup> Jisas ixo kakaa laxa xö mön, ma ixo lies köröp kö ari ma ixo wanot urungan kö lagunon te ine iat.

<sup>2</sup> Dauleng ne duöng toxo kip ot a pengpeng kö ben urungan te Jisas. Ma nang e Jisas ixo pere a nunu re idi, ixo tengen kö pengpeng, “Barok, örö balawapat. Na iat mon a magingin saban te nöngön iri kawam.”

<sup>3</sup> Ma nang a dauleng ne tene ausu möxöbo warkurai te Moses toxo ölangen ina na, idi toxo etöngösen kaluluonin idi iat bara, “Ina tödi na i tengen ögarin e God!”

<sup>4</sup> Jisas ixo ösöxö sik abo dinödöm pe idi ma ixo tengen, “Rösa mum mo döxömen lo abo dinödöm saban kö kat te mum?”

<sup>5</sup> Nangang sa re idu i malus sa rengrengen? I malus se e ra tengen bira, 'A magingin saban te nōngōn iri kawam'? Bara i malus se e ra tengen, 'Tuu lōmō, ma örō wan'?

<sup>6</sup> Ma lamun eka osen e mum bara a Barok kö Tōdi ine ma lōlōs kö öxōno lagunon tua irewese a magingin saban." Io, ixo tengen kö pengpeng, "Tuu lōmō ma örō kip lo a ben te nōngōn ma örō wan urungan kö ngasiem."

<sup>7</sup> Ma ina tōdi ixo taru kaa ma ixo wan urungan kö gunon te ine.

<sup>8</sup> Ma nang a marakörō toxo pere bira, idi toxo ii e God ma binuut. Me idi toxo ölet e God, ewe ixoro isik a mangana lōlōs bira urungan kö nangadi.

*Jisas ixo kuwe e Matiu*  
(Mak 2.13-17; Luk 5.27-32)

<sup>9</sup> Ma nang e Jisas ixo wan lo meringan, ine ixo pere a tōdi, a esene e Matiu, ixo kisisik kö xōnō möxō kip takis. Me Jisas ixo tengen te ine, "Muu e!" Me Matiu ixo taru ma ixo muu ine.

<sup>10</sup> Melamu, nang e Jisas mabo bak ne ausu re ine toxo an kö gunon te Matiu, a oleleng ne tene kip takis mabo 'duōng saban' toxo wanot ma toxo an arixe mine mabo bak ne ausu re ine.

<sup>11</sup> Ma nang abo Parasi toxo pere bira, idi toxo ose abo bak ne ausu re ine bira, "Ruasa ina tene ausu re mum i aan arixe mabo tene kip takis mabo 'duōng saban'?"

<sup>12</sup> Jisas ixo ölengen abo Parasi, io, ixo tengen te idi bira, "A nangadi nang kaim a miniset, idi tekara sasaxan ulamun a tene aule, nexalik idi xalik mon nang a lak miniset.

<sup>13</sup> Inexalik mum moro wan ma moro parasiwin ina unine tinge re God nang i tengen bira, '*I maaaa bere mum morobo marase a nangadi, me e kobo maaaa lamun abo arabaa nang mum bo wewet.*' Me e kobo ot ta xukuwe abo tene tōxödös. Kawaim. E ot lamun a nangadi saban".

*Abo lalaa maxat te Jisas*  
(Mak 2.18-22; Luk 5.33-39)

<sup>14</sup> Io, abo bak ne ausu re Jon toxo wanot ma toxo ose ine bere, "Ruasa mem mabo Parasi bo ölölö, ma lamun abo bak ne ausu re nōngōn tekara ölölö?"

<sup>15</sup> Jisas ixo balu idi, "Bule bara a bung osee möxō tōdi alolo maxat, idi tabo mana tapunuk nang bara ine angen arixe me idi? Kaim. A axana bung irabo wanot nang tabo kip lo ina alolo maxat kalik idi. Kö ina axana bung na, idi tabo ölölö im.

<sup>16</sup> "Kaim pe öng ibo sösöxō a xōnō sewene man maxat lōmō xō man maut, möxōsa, a xōnō sewene man maxat



irabo tamaliling lo xalik ina man, ma irabo pet ötamadidi ma irabo saban arixe.

<sup>17</sup> Kaim pebo duöng tobo linglinge a wain maxat nang i kobola ebobot bang kölöme xö önga laa mo kuluwo ari nang toxo pet ma lewene meme maut i lelet sik. Nang bara idi te pet, a lewene meme irabo tamadidi, a wain irabo su xirip ma lewene meme irabo saban. Kawaim bie, tobo riri sik a wain maxat kö lewene meme maxat, me idu tabo malaa deek sik."

*A balik minet ma a une miniset*  
(Mak 5.21-43; Luk 8.40-56)

<sup>18</sup> Nang ine ixo rengrengen ina na, a tene warkurai ixo wanot ma ixo subun kexe mesila re ine ma ixo tengen, "A balik ke e iri met na mon. Ma lamun örö miang ma örö bulus a limem lömö re ine me ine irabo to baling."

<sup>19</sup> Jisas ixo tuu kaa ma ixo wan arixe me ine, ma abo bak ne ausu re ine bölök.

<sup>20</sup> Io, i kobo ömat mon ma önga une nang a dee ixobo önan kalik ine xö sangaun ma ninöng ne awat, ine ixo wan melamu re Jisas ma ixo sigi a ngusuno man te ine.

<sup>21</sup> Ma ixo tengen tö ine iat, "Nang bara e sigi a man te ine mon, e rabo deek."

<sup>22</sup> Jisas ixo tawuxus ma ixo pere ine, ma ixo tengen, "A balik ke e, örö balawapat. A nunu re nöngön iri öro nöngön." Ma ina une ixo deek baling kö ina axana bung mon niang.

<sup>23</sup> Nang e Jisas ixo wan laxa xö gunon kö ina tene warkurai ma ixo pere a nangadi toxo sese a koo ma marakörö toxo ees nana,

<sup>24</sup> ma ixo tengen, "Moro wan pes. A balik i kobo met. Inexalik i paliso mon." Me idi toxo isis belek ine.

<sup>25</sup> Malamu nang a marakörö toxoro wan su im, ixo wan laxa ma ixo tön a limine, ma a balik ixo tuu kaa.

<sup>26</sup> A tinenge möxö ina na ixo wan kirip kö ina xönö lagunon.

*A nini marapulo ma ngalaböt*

<sup>27</sup> Nang e Jisas ixo wan lo im meringan, a nini tödi marapulo toxo muu ine, ma toxo xukup, "Barok kö marapun te Dewit,\* örö marase e maa!"

<sup>28</sup> Ma nang e Jisas ixo wan laxa xö ina gunon, a nini tödi marapulo toxo wanot pösöt ine ma ixo ose idu, "E mu mo nunu bara e rabo eöt ta wewet a na?"

Idu toxo balu ine, "Orong, maa me nunu."

\* 9:27 Abo Judeia toxo ösöxö sik bara ina Mesaia ewe nang irabo öro a nangadi, irabo ot ta marapun te Dewit. Ma a nine marapulo toxo nunu bara Jisas ina tödi.

<sup>29</sup> Io, ine ixo sigi abo marna idu ma ixo tengen, “Xarnang iat mon mu mo nunu bie, irabo wanot te mu.”

<sup>30</sup> Ma abo kalait marana idu ixo tamasawang. Jisas ixo isik a tinenge lölös sö idu bira, “Ganim e muu ra rengrengeng osen a na xere öng.”

<sup>31</sup> Inexalik bara idu toxo wan elixilik ma toxo isik esexerein a pii re ine xöbo lagunon kirip pe idi.

<sup>32</sup> Nang idu toxo önan su, a tödi ewe nang ine ma tano saban ma a ngalaböt ine, toxo kiwot ine urungan te Jisas.

<sup>33</sup> Ma nang e Jisas ixo xikip tewe ina tano saban, ina tödi ewe i kara tenge, ixo tenge wök. A marakörö toxo wuwus saban ma toxo tengen, “Kawaim pe laa bira toxoro pere ra kölöme Israel.”

<sup>34</sup> Inexalik abo Parasi toxo tengen, “Ina sisila möxöbo tano saban ibo tabaa ine ma lölös sa xikip tewe abo tano saban.”

### *Abo tene tinörön tokobo oleleng*

<sup>35</sup> Jisas ixo wan laxa xirip köbo lagunon taxin mabo lagunon, ixobo eusu xöbo gunon ne sineseng ke idi, ixobo palas tinenge ma tinenge deek möxö kingdom ma ixobo ölanglanga abo mangana miniset kirip.

<sup>36</sup> Nang ine ixo pere a marakörö, ixo marase idi, möxösa, idi toxoro meles ma kawaim pe öng ka rorop idi, xarnang a bung sipsip te tup ma kaim idi ma tene walbalaurai.

<sup>37</sup> Io, ixo tengen köbo bak ne ausu re ine, “A nien iri maruxo xirip ma iri oleleng, nexalik a nausen mon idi abo tene tinörön.

<sup>38</sup> Io, mum morobo seng a Tamana ina nien maruxo bara irabo tile rebo tene tinörön urungan kö komo re ine.”

## 10

### *Jisas ixo tile ösu abo bak ne ausu*

*(Mak 3.13-19; 6.7-13; Luk 6.12-16; 9.1-6)*

<sup>1</sup> Jisas ixo kuwe ot abo sangaun ma ninöng ne bak ne ausu rine urungan te ine ma ixo tabaa idi ma lölös sua tile ösu abo tano saban ma rua ölanglanga abo mangana miniset kirip.

<sup>2</sup> Abo esene idi a sangaun ma ninöng ne aposol i bira: a sisila, e Saimon (nang tobo tengen ine me Pita) ma tönö re ine e Endru, e Jems a bak ke Sebedi ma tönö ine e Jon,

<sup>3</sup> e Pilip me Batolomiu, e Tomas me Matiu a tene kip takis, Jems a barok ke Alpius, me Tadius,

<sup>4</sup> Saimon nang toxo tengen bara ine ina Silot, me Judas Iskariot, a tödi nang ixo isik tewe e Jisas kö limine nangadi.

<sup>5</sup> Inabo sangaun ma ninöng na, Jisas ixo tile rewe idi arixe mabo tinenge bira: “Ganim a nuan urungan te idi nang

kaim bara abo Judeia, ma ganim e mum pa nilaxa xere lagunon te idi abo Samaria.

<sup>6</sup> Inexalik, moro wan urungan köbo sipsip mee Israel niang toxo tup.

<sup>7</sup> Nang mum mo wan, morobo tenge mina tinenge na: 'A kingdom möxö watmaep iri lörörö.'

<sup>8</sup> Mum morobo ölanglanga abo miniset, mum morobo öraru abo minet, mum morobo ömadakdak ewe idi ma lepra, me mum morobo tile ösu abo tano saban. Mum mere kip tataunin ina lölös na xalik e. Me mum kobo kun. Io, mum morobo mana erabaa tataun bölök min. Ma takarabo kun e mum.

<sup>9</sup> Ganim e mum pa xikip pe tuluwok arixe me mum kö kie re mum.

<sup>10</sup> Ganim a xikip pe rat, ma önga man kabise, ma sandel, ma buxo xö nuan te mum, möxösa, ewe i rörön, idi tabo tabaa ine ma lasa nang i sasaxan ulamun.

<sup>11</sup> "Nang bara mum mo wan laxa xö önga lagunon bara önga lagunon taxin, mum morobo wawara xö önga tödi deek. Ma morobo kis arixe mine ot nang mum morobo wan lo baling.

<sup>12</sup> Nang bara mum mo wan laxa xö gunon kina tödi, mum morobo seng e God bara a malum irabo kis arixe ma ina tödi.

<sup>13</sup> Ma bara a lagunon i balaure ödeek e mum, a malum pe mum irabo mana kis deek ee. Ma nang bara tokobo balaure ödeek e mum, mum morobo kip lo öbaling a malum pe mum.

<sup>14</sup> Nang bara re öng i kobo öga e mum bara i kobo ölangen abo tinenge re mum, ma nang bara mum ka nuan kalik ina lagunon bara lagunon taxin niang, mum morobo se rewe a kabus kalik abo xexe mum.

<sup>15</sup> God irabo ömokorot köba e Sodom me Gomora xö axana bung möxö warkurai. Inexalik a ömokorot möxö ina lagunon nang kaim kö öga lo e mum, irabo taxin köba xö ömokorot te idu.

<sup>16</sup> E tile rewe e mum xarnang a bung sipsip urungan kaluluon köbo wuluwun axe. Möxö ina na, mum morobo mana nanase deek bara morobo önan bule, xarnang a si ibo önan. Ma xarnang a bunu i kebeöt tua ögarin te laa, mum morobo mana talien bie bölök.

<sup>17</sup> "Mum morobo balaure ödeek e mum. Idi tabo isik e mum köbo limedi abo tene warkurai, tabo se e mum kölöme xöbo gunon ne sineseng.

<sup>18</sup> Idi tabo lamus e mum pa tinuu mesila xö warkurai xöbo duöng sisila mabo king kua gene e. Me mum morobo tenge maras se idi, arixe ma a nangadi nang kaim bara abo Judeia, lamun a tinenge deek.

19 Nang bara idi tabo öxös e mum, ganim bere mum mo dödöm ne binuut bara mum morobo pet te tinenge sa, bara mum morobo tengen bule, möxösa, xö ina bung tabo tabaa e mum ma lasa nang mum morobo tengen.

20 Möxö ina na, i kaim im bara mum mo wöwörö, inexalik bara a Töxödös ne Tanono xö Tamana e mum irabo wöwörö kölöme re mum.

21 "A nangadi tabo isik abo tönö idi xö minet, ma a tata irabo pet bölök bie xö barok kine. A bung barok tabo baba urungan köbo tamadi mabo nenedi ma tabo tengen ta sesexomet idi.

22 A nangadi xirip tabo melentexin e mum, möxösa, xö eseke. Lamun ewe i tuu lölös sik urungan kö xakawöm, God irabo öro ine.

23 Nang bara te ögarin e mum kö önga xönö, mum morobo ulo urungan kere xönö xabise. Turunon saxit, mum korobo kawam kalik a nilaxa xö boxönö kölöme Israel ma a Barok kö Tödi irabo ot.

24 "Re bak ne ausu i kobo lömö sik kö tene ausu re ine. Ma kaim pe tene auguran i lömö sik kö orong ke ine.

25 Na iri eöt tua abo bak ne ausu rua xarnang a tene ausu re idi, ma a tultul tabo xarnang a orong ke idi. Nang bara a tödi raxin möxö marapun ma tobo tengen ine me Belsebul, ina tano saban, io, tabo tenge ögarin köbanin abo subun te ine!

26 "Io, ganim e mum pa buburin idi. Möxö a lasa nang te kait pi, irabo tamasawang. Ma a lasa nang i mun sik, irabo ot kö malmalan.

27 A lasa e tengen te mum kö ködö, mum morobo tengen osen kö maras. A lasa te ngunungun min kö talinge mum, mum morobo kup wösö min meriso xö öxöno gunon.

28 Ganim e mum pa buburin ewe idi nang tabo sexomet a tödi mon, ma lamun tekebeöt tua sexomet abo tanono mum. Inexalik mum morobo mana buburin e nangang nang i eöt tua sexomet a tanono ma tödi bölök kö ia sösöt.

29 Ma a ulik ne tuluwok mon i eöt ta xukun te nine sigie? Inexalik bara kaim pe öng mere idi irabo subu xö pu xalik abo maaa xö Tamana e mum.

30 Turunon saxit, ma ixoro kos kirip bölök abo bebene öxöno e mum.

31 Io, ganim e mum pa binuut, möxösa, a to re mum i taxin sik köbo sigie.

32 "Ewenene niang i tenge maras kö wawara xö nangadi lamun e, e rabo ömaras bölök ine xö wawara xö Tata niso lömö.

33 Lamun ewe niang i öös tewe e xö wawara xö nangadi, e rabo öös tewe bölök ine xö wawara xö Tata niso lömö.

<sup>34</sup> “Mum bele nunu bere e ot ta uxis a malum kö öxöno lagunon. Kaim. E kobo ot ta uxis a malum. Inexalik e ot tua isik a use möxö inarse.

<sup>35</sup> E ot bara

“ ‘a barok irabo tuu talu a tata,  
a balik kalik a nene,

ma bara a nine une tamasik tabo tuu talu idu iat.

<sup>36</sup> *Ma abo iuo xö önga tödi, idi möxö ina barama re ine iat.’*

<sup>37</sup> “Ewenene re öng niang i mamaa xöba lamun a tata ma nago re ine, i kebeöt ta mumuu e. Ewenene re öng niang i mamaa xöba lamun a barok ma balik ke ine, i kebeöt ta mumuu e.

<sup>38</sup> Me ewenene re öng niang i kobo sölök a sölöxöröp pe ine ma i kobo mumuu e, ine i kebeöt ta ais se e.

<sup>39</sup> Ewe nang i parasiwin a to rine, irabo ömalim tewe, ma ewe nang i ömalim tewe a to re ine rua gene e, irabo pere wösöt lo a to runon.

<sup>40</sup> “Me ewe niang i ömaraxen lo e mum, i ömaraxen lo e, me ine ewe niang i ömaraxen lo e, i ömaraxen lo a öng niang ixo tile e.

<sup>41</sup> Ewenene niang i ömaraxen lo a propet, möxö ine a propet, irabo ömaraxen lo a xinixun möxö propet. Me ewenene niang i ömaraxen lo a tödi töxödös, möxösa, ine a tödi töxödös, ma irabo ömaraxen lo a xinixun möxö tödi töxödös.

<sup>42</sup> Ma niang bere re öng i isik ke ari sisiü urungan kere önga maris na, möxösa, ine a tene tinörön te e, turunon saxit, irabo kip a xinixun möxönan.”

## 11

*Jisas me Jon a tene baptais*

*(Luk 7.18-35)*

<sup>1</sup> Melamu Jisas ixo öxawam abo tinenge urungan köbo sangaun ma ninöng ne bak ne ausu rine, ine ixo wan lo meringan tua usu ma palas tinenge xöbo lagunon mee Galili.

<sup>2</sup> Io, niang Jon a tene baptais ixo ölangen kö gunon ne aömokorot a lasa niang e Kraiss ixo wewet, ixo tile abo bak ne ausu rine

<sup>3</sup> rua ose ine bira: “E nöngön mon ina tödi nang mem me xixiset bara irabo wanot, bere mem marabo kis xiset te öng kabise?”

<sup>4</sup> Jisas ixo balu, “Mum moro baling, ma moro ömaras e Jon ma lasanene nang mum mo ölangen ma mo pere,

<sup>5</sup> baraabo pulo tere wawara, ma abo pengpeng tere önan, idi nang ma lepra idi tere deek, idi nang abo talinge baa tere

ölöngö, ma abo minet tere taru baling, *ma a tinenge deek iri maras sö idi nang a lak maris.*

<sup>6</sup> A tödi a nunu re ine i kobo tawes xalik e, irabo deek kö ine."

<sup>7</sup> Nang abo bak ne ausu re Jon toxo önan, io, Jisas ixo urulo ra tinenge xö marakörö lamun e Jon bira, "Mum moxo wan su urso xö xönö tataun tua werwere a lasa? I xarniang a puru niang a xiki ibo wawaxat elin nanin ine?"

<sup>8</sup> Nang bara kawaim, ma lasa mum moxo wan su rua werwere? A tödi niang ixo sige sik a man mamaran? Kawaim. Idi nang ewe tobo sige sik abo man mamaran, idi tobo xisixis kö gunon ne orong.

<sup>9</sup> Ma a lasa mum moxo wan su rua werwere? A propet? Turunon saxit, me ine i taxin sik köbo propet.

<sup>10</sup> Ine mon ina öng niang toxoro geet ulamun:

*'E rabo tile re tene kip tinenge re e mesila re nöngön, ewe nang irabo tagure a ngas se nöngön mesila re nöngön.'*

<sup>11</sup> Turunon saxit, kaluluonin idi nang abo nene idi te kip idi, kaim pe öng iri wanot nang i taxin köba re Jon. Inexalik ewe a öng i lik köba kölöme xö kingdom möxö watmaep, ine i taxin köba re Jon.

<sup>12</sup> Meringan köbo bung ke Jon a tene baptais, ot nixinen, a kingdom möxö watmaep ixo wanot ma lölös taxin, mabo tene ngangaran idi tabo uruoxe lo ine.

<sup>13</sup> Möxö abo propet kirip mabo warkurai te Moses toxo rengrengen osen lamun ina kingdom ot kö ina axana bung ke Jon.

<sup>14</sup> Ma nang bara mum mo maaa rua ömaraxen lo ine, ine e Elaija niang toxo tengen bara irabo ot.

<sup>15</sup> Ewe nang ine ma talingine, ine irabo ölangen.

<sup>16</sup> "Ma a lasanene nang arabo öt ma marakörö mee nixinen? Idi te xarnang abo barok lixilik niang te kisisik kölöme xö xönö möxö misik ma te xukuwe abo ais se idi:

<sup>17</sup> 'Mem me maas a koo rö mum, ma lamun mum kobo ririe.

Mem me sö ma sinö marmaris, ma lamun mum kobo gegee.'

<sup>18</sup> Möxö Jon ixo ot ma ixo ölölo ma kaim ine ra ininim pe wain, me idi toxo tengen bara, 'A tano saban iri tup pe ine.'

<sup>19</sup> A Barok kö Tödi ixo ot ma ixo an ma ixo inim, me idi toxo tengen bira, 'Ina tödi na a an sasaxa ma a tene ininim, me ine ibo ais arixe mabo tene kip takis ma "nangadi saban." ' Idi tobo rengrengen bira, ma lamun a inone nanase re God i öturunon bara i töxödös ina nanase na."

*Idi nang kaim kö dinödöm puxus  
(Luk 10.13-15)*

20 Io, Jisas ixo urulo ra lalaie xöbo lagunon taxin niang ixoro pet a oleleng ne lalaa lölös ne auwuwus könän, möxösa, kaim idi xo dinödöm puxus.

21 "A maris se mum mee Korasin! A maris se mum mee Betsaida! Niang bara abo lalaa lölös ne auwuwus nang e xo pet tö mum, texere pet bölök ki Tair ma Saidon, idi texere sige abo xönö man biling ma texere urup idi ma xako rua osen bere idi tere dödöm puxus.

22 Ma lamun e tengen te mum, God irabo pet a warkurai taxin kö nangadi mee Tair me Saidon kö axana bung möxö warkurai. Ma lamun irabo pet a warkurai nang i taxin köba re mum abo Betsaida mabo Korasin.

23 Me mum mee Kaprenaum, mum bele dökömen bara tabo ii öxaa e mum urso lömö. Kaim, mum morobo wan su arixe uri xö pu xö xönö möxö minet. Nang bara abo lalaa lölös ne auwuwus niang e xo pet te mum, texere pet bölök ki Sodom, io, a nangadi mee Sodom texere xisixis iat ot kö ina bung.

24 Ma lamun e tengen te mum, God irabo pet a warkurai taxin kö nangadi mee Sodom kö axana bung möxö warkurai. Ma lamun irabo pet a warkurai nang i taxin saxit tö mum."

*Idi nang a xinixip i uban idi*  
(Luk 10.21-22)

25 Xö ina axana bung niang Jisas ixo tengen, "E ölet nöngön, Mama, a Orong möxö balana kubu ma öxöno lagunon, möxösa, nöngön u xo umungen abo lalaa na xalik a nangadi nanase ma u xo osen öwösö re idi nang kaim idi ma nanase.

26 Mee, Mama. U xo pet bie, möxö i mumuu a mamaa re nöngön.

27 "A Tamake ixo tabaa e mabo lalaa xirip. Kaim pe öng i ösöxö a Barok, ma lamun a Tamake xalik mon, ma kaim pe öng i ösöxö a Tamake, ma lamun a Barok kalik mon arixe me idi ewe nang a Barok ixo pere kos lo rua öwösö e Tamana urungan te idi.

28 "Mum kirip niang a xinixip i uban e mum, mum moro ot pösöt e, me e rabo ömamas e mum.

29 Mum moro sösölök lo xö anaxip pe e, me mum moro kip eusu mere e, möxösa, a balake a lak malum me e bo ii ösu e iat bölök, me mum moro kip mamas kö to re mum,

30 möxösa, a anaxip pe e i malus ma a xinixip pe e i wawaxan."

## 12

### *Jisas i taxin sik kö bung Sabat*

*(Mak 2.23—3.6; Luk 6.1-11)*

<sup>1</sup> Kö ina axana bung nang, Jisas arixe mabo bak ne ausu rine toxo wan kaluluonin a komo wit kö bung Sabat. Abo bak ne ausu rine toxo irilöng ma toxo pit köröp lo a xurxurno wit ma toxo en.

<sup>2</sup> Nang abo Parasi toxo pere biringan, toxo tengen te ine, “Pere bang! Abo bak ne ausu re nöngön, idi te pet bira, idi tokobo mumuu a warkurai möxö bung Sabat.”

<sup>3</sup> Io, Jisas ixo balu, “Mum moxoro kos abo laa mesila nang e Dewit ixo pet nang ine ixo irilöng arixe mabo duöng nang toxo wan arixe mine.

<sup>4</sup> E Dewit ixo wan laxa xö gunon te God, me ine ma nangadi re ine idi toxo en a beret nang tobo tabaa e God min. Mabo warkurai te Moses i tengen bara i kobo töxödös sö idi ra wewet, abo pris kalik mon.

<sup>5</sup> Me mum moxoro kos kölöme xö warkurai te Moses bara xö Sabat abo pris tobo rörörön kölöme xö gunon lotu raxin me idi tobo lexe a bung Sabat me idi te langlanga sik kalik abo warkurai te Moses.

<sup>6</sup> Na e tengen te mum, a öng nang i taxin saxit kalik a gunon lotu raxin ine na.

<sup>7</sup> A tinenge re God i tengen bira, *‘E maaa bara mum morobo marse a nangadi, me e kobo maaa lamun abo arabaa nang mum bo wewet.’* Nang bere mum moxoro ösöxö sik a unine ina tinenge na, mum korobo ömaso idi ewe nang kaim idi xo wewet te magingin saban.

<sup>8</sup> Möxö a Barok kö Tödi i kure sik a bung Sabat.”

<sup>9</sup> Jisas ixo wan lo xalik ina xönö, ma ixo wan laxa kölöme xö gunon ne sineseng ke idi,

<sup>10</sup> a önga tödi ma lime met nangen nang. Ma toxo wawara siwin te unine laa ra wupuk e Jisas, idi toxo ose ine, “I töxödös bara tabo ölanglanga a tödi miniset kö Sabat bara kaim?”

<sup>11</sup> Ixo tengen te idi, “Nang bara nöngön mere önga sipsip ma i subu su xö mara xö Sabat, a turunon bara örobo tön öxaa ine xalik a mara.

<sup>12</sup> Mum mo maras kö dinödöm pe God, bara mum mo taxin sik kö sipsip! Io, i töxödös bara ire tabo pet a tinörön deek kö Sabat.”

<sup>13</sup> Io, ixo tengen kö tödi, “Sasanga kaa ma limem.” Io, ine ixo sasanga kaa ma limine, ma a limine ixo deek baling xarnang a limene xabise.

<sup>14</sup> Lamun abo Parasi toxo wan lo ma toxo wingwingit tua wewet te ngas sa sesexomet e Jisas.



*Jisas a tultul te God*

<sup>15</sup> Jisas ixo ösöxö xöröp ina na, ixo tawes möxö ina xönö. Ma oleleng toxo muu ine, me ine ixo ölanglanga a nangadi miniset kirip pe idi.

<sup>16</sup> Ixo tengge wanak idi rua ganim a rengrengen osen bara ewenene ine.

<sup>17</sup> Ina na rua öturunon a lasa God ixo tengge min kö propet Aisaia bira:

<sup>18</sup> *“Ine na a tultul te e, ewe nang e xoro pere kos lo ine, a öng e maaaa lamun, ma irabo öaxanan e.*

*E rabo uxis a Tanoke re ine,*

*me ine irabo osen a ngas töxödös se e urungan kö nangadi möxö öxöno lagunon kirip.*

<sup>19</sup> *Ine i karabo tengge samuk mere öng ma i karabo eöt tua kinup.*

*Kaim pe öng irabo ölangen a inöno kölöme xöbo ngas lixilik.*

<sup>20</sup> *I karabo dulok ke xurxuruno iaa i tamado sik,*

*ma i karabo mas ömet a laam i xeka minet,*

*ot nang irabo silien a warkurai töxödös sua wawas ösu a sasaban.*

<sup>21</sup> *Abo marapun kirip kö öxöno lagunon tabo bulus a dinödöm pe idi xö esene, bara irabo tabaa idi ma kinis deek.”*

*Jisas ma tano saban Belsebul*

*(Mak 3.20-30; Luk 11.14-23)*

<sup>22</sup> Io, idi toxo isik ot a tödi, ine ma tano saban ma ixo marapulo ma a ngalaböt ine, me Jisas ixo ölanglanga ine, ma ixo eöt tine rua tinenge ma rua winawara baling.

<sup>23</sup> A nangadi xirip toxo wuwus saban ma toxo tengen, “Xalik ine gut a Barok kö marapun te Dewit?”

<sup>24</sup> Ma lamun nang abo Parasi toxo ölangen bira, toxo tengen, “Ine e Belsebul, a sisila möxöbo tano saban mon, ewe nang ibo tabaa ina tödi na ma lölös sa xikip tewe abo tano saban.”

<sup>25</sup> Jisas ixo ösöxö abo dinödöm pe idi ma ixo tengen te idi, “Nang bara re kantri i kobo tuu arixe me idi iat, a dauleng mere idi tabo pet ögarin kirip ina kantri. Ma nang bara a lagunon, bara a barama, tekobo tuu arixe, idi kebeöt ta kinis deek.

<sup>26</sup> Nang bara a nangadi re Satan te kip tewe öbaling idi iat, tabo subu. Idi tekebeöt tua tinuu lölös.

<sup>27</sup> Mum iat mo köbo döxömen bara a nangadi re mum tobo xikip tewe abo tano saban kö lölös se Belsebul. Möxö ina na, mum mo köbo eöt tua tengen bere e bo xikip tewe abo tano saban kö lölös se Belsebul. Io, a nangadi iat te mum, tabo osen bere abo tinenge re mum i kobo turunon.

28 Kaim. Ma lamun e bo xikip tewe abo tano saban ma lölös möxö Tanono e God. Ma ina na i öturunon bara a kingdom kö God ixoro wan pösöt e mum.

29 “Ma bara, irabo ot bule nang ke önga tödi i eöt ta wörwörök ölaxa re gunon kere önga tödi lölös ma irabo pulo rewe abo lalaa re ine nang bara i kala kut dik bang ina tödi lölös? Ma melamu irabo wuwulo xö ina gunon te ine.

30 “Me ewe nang i kobo ais me e, i mölök kalik e. Ma ewe nang i kobo rörön arixe me e ra lalamus etok a nangadi, ine ibo waswasak a nangadi.

31 Möxö ina na, e tengen tö mum, God irabo kip tewe abo magingin saban möxö nangadi, ma nang bara te töxö ögarin önga tödi, irabo döxömen taun ine bölök, ma lamun ewe nang i tengen ögarin a Töxödös ne Tanono, God i karabo döxömen taun ine.

32 Ewe a öng i tengen ögarin a Barok kö Tödi, God irabo döxömen taun a magingin tine, ma lamun ewe a öng nang i tengen ögarin a Töxödös ne Tanono, God i karabo döxömen taun a magingin tine xö ina to na ma melamu bölök.

33 “Nang bara a uno iaa i deek, a pasuno irabo deek. Ma bara a uno iaa i saban, a pasuno irabo saban, möxösa, tabo perexulen a uno iaa xö inone.

34 Mum mo xarnang abo si saban. Mum abo tene saban, morobo eöt ta tengen tebo lalaa deek bara bule? Mum kebeöt, möxösa, a tödi ibo tengen ösu abo lalaa i wöwö sik kö balana.

35 A tödi deek ibo isik ot a lalaa deek nang i wöwö sik kö to rine. Ma a tödi saban ibo isik ot a lalaa saban nang i wöwö sik kö to re ine.

36 Lamun e tengen te mum bara xö bung möxö warkurai, a nangadi tabo mana tengen osen abo tinenge saban idi toxoro tengen.

37 Io, God irabo kure nöngön köbo tinenge xirip pe nöngön, ma irabo tengen te nöngön bara örobo langlanga bara örobo kip a kinadik ke nöngön kö warkurai.”

### *A uxileng ke Jona*

*(Mak 8.11-12; Luk 11.24-26, 29-32)*

38 Io, dauleng ne Parasi arixe mabo tene ausu möxöbo warkurai te Moses toxo tengen te ine, “Tene Ausu, mem me mamaa rua werwere a mangana auxileng meringan te nöngön.”

39 Ine ixo balu idi, “Xöbo bung nixinen a marakörö te mamaa bara e rabo pet te uxileng lölös, möxösa, idi tobo ruruu rewe xalik e God ma tobo saban esexere! Ma lamun e rabo isik a auxileng kö propet Jona xalik mon urungan te idi.

40 Mōxō Jona ixo kis kō narun ne bung ma narun ne dōmōn kō balana en taxin, ma xarnang mon bōlōk, a Barok kō Tōdi irabo kis narun ne bung ma narun ne dōmōn bōlōk kōlōme xō balana öxōno lagunon.

41 Ma xō bung mōxō warkurai, a nangadi mee Niniwe idi tabo puk e mum, mōxōsa, idi toxo dōdōm puxus nang e Jona ixo palas tinenge urungan te idi. Ma na, a öng nang i taxin sik kidu me Jona i nangen na.

42 Ma xina bung mōxō warkurai, a kwin mee Siba, irabo puk e mum, mōxōsa, ixo wanot mero xō ngusuno öxōno lagunon tua ölangen a nanase re Solomon. Ma na, a öng nang i taxin sik ke idu me Solomon i nangen na.

43 “Nang bara re tano saban i wan su xalik a tōdi, ibo önan eli xirip kō boxōnō masa, bara rua mamas, nexalik bara i kara parasiwin te xōnō.

44 Io, ibo tengen bira, ‘E rabo tawuxus baling urungan kō ngasiene e niang e xo wan lie.’ Ma nang i wanot uxe, irabo pere bara kaim pe öng kōnan, ma toxoro soso ma toxoro tagur bulus sik.

45 Ma irabo wan lo ma irabo lamus öbaling a pitnō ma ninöng ne tano saban kabise arixe mine, me idi te saban kōba re ine. Me idi tabo wan laxa ma tabo kis im ee. Ma to xina tōdi irabo saban kōba xō nang sila. Ma irabo xarnang bie xō marakörō saban mōxō axana bung nixinen.”

*Jisas ixo tengen ösu a nago mabo tönō ine runon  
(Mak 3.31-35; Luk 8.19-21)*

46 Nang e Jisas angen ixo wōwōrō urungan kō marakörō, a nago mabo tönō rine toxoro tuu sik kō araman, ma toxo maaa rua tinenge rō ine.

47 Io, önga tōdi ixo tengen te ine, “A nago re nōngön mabo tōm te tuu sik ni xō araman, te maaa rua tinenge me nōngön.”

48 Jisas ixo balu ine, “E rabo tengen ösu bara ewe a nago re e, ma ewe abo tōke.”

49 Ixo susulut urungan kōbo bak ne ausu rine, ma ixo tengen, “Idi na abo nago mabo tōke.

50 Mōxō ewenene i mumuu abo lasanene nang a Tamake niso xō watmaep i maaa bara irabo pet, ine a tōke, a saxake ma a nago re e.”

## 13

*A tene susulo  
(Mak 4.1-9; Luk 8.4-8)*

<sup>1</sup> Xō ina bung iat niang e Jisas ixo wan kalik a gunon ma ixo kis kō gegene tu Galili.

<sup>2</sup> A marakörö raxin toxo ot etok elulurwein ine, io, ine ixo kakaa laxa xö mön nang kö tu, ma marakörö toxo tuu lömö xö marna bisbise.

<sup>3</sup> Me ine ixo tönngösen idi ma oleleng ne lalaa xö tinenge öwuo. Ixo tengen bara, "A önga tödi ixo wan tua retewe abo irine wit kö komo.

<sup>4</sup> Ma nang ine ixo retewe nanin abo irine wit, a dauleng toxo subu melamu xö ngas, ma bung pun toxo wanot ma toxo en idi.

<sup>5</sup> Ma dauleng ne irine wit toxo subu xö öxöno wat nang kaim pe pu oleleng könan. A irine wit ixo das kaa pasaxit mon, möxösa, a pu ixo wöwöt.

<sup>6</sup> Ma xaken ixo tuu, ixo dek abo wit ma ixo mölös ma ixo met, möxösa, abo buon kaim kö sinu xöba uri xö pu.

<sup>7</sup> Dauleng ne irine wit toxo subu kaluluonin abo gargaras. Ma abo gargaras toxo pari abo wit nang i dadas kaa.

<sup>8</sup> Lamun a uleng ne irine wit toxo subu xö pu deek. Dauleng toxo taxin ma toxo o eöt ma önga mar ne irine, dauleng toxo pitnö ma öng ne sangaun, ma dauleng toxo eöt ma narun ne sangaun ne irine wit.

<sup>9</sup> Ewe nang ine ma talingine, ine irabo mana ölangen."

*A unine bere e Jisas ibo rengrengen abo tinenge öwuo  
(Mak 4.10-20; Luk 8.9-15)*

<sup>10</sup> Abo bak ne ausu toxo wanot pösöt ine ma toxo ose ine, "Ruasa u bo rengreng rö idi xö tinenge öwuo?"

<sup>11</sup> Ixo balu, "God ixoro tabaa e mum ma nanase möxöbo pidik möxö kingdom möxö watmaep, ma kaim bere re idi.

<sup>12</sup> Ewenene midi nang idi ma lalaa, God irabo tabaa idi ma oleleng, me idi tabo kip a oleleng bölök. Me ewenene midi nang kawaim idi mere lalaa, God irabo kip tewe bölök kirip abo lalaa xalik idi.

<sup>13</sup> E bo rengreng rö idi xö tinenge öwuo, möxösa,

'Idi tabo wawara, lamun idi tekebeöt ta werwere xulen te  
laa,

me idi tabo ölöngö, ma lamun idi tekebeöt ta ölangen  
kulen.

<sup>14</sup> Idi te öturunon a tinenge re propet Aisaia ixo tengen bira:  
"Mum morobo ölangen ma ölangen, ma lamun mum korobo  
ölangen kulen te laa,

me mum morobo wawara ma wawara, lamun mum korobo  
perexulen te laa,

<sup>15</sup> möxösa, ina nangadi na te ölölös a baladi.

Me idi te mölök ka ölöngö ma talingine idi,

me idi te baxut abo maradi,

xalik idi texere perexulen mabo maradi,

*ma texere ölangen kulen mabo talingedi,  
ma texere ösöxö xulen kölöme xö baladi,  
ma texere dödöm puxus, me e xere öro idi.” ’*

<sup>16</sup> Ma lamun irabo deek kö mum, möxösa, abo mara mum tobo wawara xulen me mum bo ölangen kulen ma talingine mum.

<sup>17</sup> Möxö i turunon saxit, oleleng ne propet ma nangadi töxödös toxo maaaa rua werwere a lasa mum mo werwere, ma lamun idi kaim kö werwere. Me idi toxo maaaa rua ölangen a lasa mum mo ölangen, ma lamun kaim idi xo ölangen.

<sup>18</sup> “Ölöngö deek, kö lasa a tinenge öwuo möxö tene susulo i tengen bie:

<sup>19</sup> Bara ewe nang i ölangen a tinenge lamun a kingdom ma i kobo nanase xönan, a tene sasaban ibo ot ma ibo irewe a nang toxoro sulo kölöme xö balana ine. Ma na ina irine iaa nang te retewe nanin kö ngas.

<sup>20</sup> Ma öng ewe nang i kip lo a irine iaa nang ixo subu lömö xö pu warawat, ine ina tödi nang i ölangen a tinenge ma pasaxit mon i axanan tua xikip lo.

<sup>21</sup> Ma lamun ixo tuu ulik mon, möxösa, kaim ine ma buon. Nang bara tiip bara sasaban i ot möxö ine i kip sik ina tinenge, ma saxit mon irabo wan tewe.

<sup>22</sup> Ma ewe nang i kip lo a irine wit i subu kaluluon köbo gargaras, ine a tödi ewe i ölengen a tinenge, ma lamun i döxömen köbanin abo lalaa möxö öxöno lagunon, ma i maaaa lamun a kinis ne orong nang ibo röxröxö rewe ine. Inabo lalaa ibo wewet pi a tinenge re God, ma i kobo eöt ta o re pasuno iaa.

<sup>23</sup> Lamun ewe a öng nang i kip lo a irine wit i subu xö pu deek, ine a tödi ewe i ölengen a tinenge ma i xikip a nanase xönan. I o a pasuno. Dauleng tabo o a önga mar ne irine wit, dauleng ma pitnö ma öng ne sangaun ne irine wit, ma dauleng ma narun ne sangaun ne irine wit.”

#### *A pirixö lixilik*

<sup>24</sup> Jisas ixo töngösen idi ma önga tinenge öwuo xabise: “A kingdom möxö watmaep i xarnang a tödi nang ixo sulo a irine iaa deek kö komo re ine.

<sup>25</sup> Ma lamun nang idi xirip toxo paliso, a iuo re ine ixo ot ma ixo sulo a pirixö lixilik kaluluonin abo irine iaa deek, ma ixo wan.

<sup>26</sup> Nang abo irine iaa deek ixo das ma ixo o a irine, a pirixö bölök ixo das.

<sup>27</sup> “Abo tene tinörön möxö tamana komo toxo wanot urungan te ine ma toxo ose ine, ‘Asuono orong, nöngön u xo sulo a irine iaa deek kö komo re nöngön. Mabo pirixö na te wanot mole?’

<sup>28</sup> “Ixo balu, ‘A iuo i pet a na.’

“Abo tene tinörön toxo ose ine, ‘Ma u maaaa bara mem mara wan ma mara xaxat tewe?’

<sup>29</sup> “Ine ixo balu, ‘Kaim, möxösa, xalik e mum bo xaxat arixe ma irine iaa deek.

<sup>30</sup> Ganim idu tabo das arixe mon ot nang a iaa deek irabo maruxo. Io, xö ina axana bung niang, arabo tengen kö tene kip nien bara idi tabo arun tua ii lo abo pirixö ma tabo kubus köbo wöxön tua söngsöngöt. Ma nang a irine iaa deek tabo iioḡun kirip ma tabo bulus idi uri xö gunon mataxen te e.’ ”

*A irine iaa ma is  
(Mak 4.30-34; Luk 13.18-21)*

<sup>31</sup> Io, ixo töngösen idi ma önga tinenge öwuo xabise: “A kingdom möxö watmaep i xarnang a irine iaa nang a tödi i kip lo ma ixo sulo xö komo re ine.

<sup>32</sup> Turunon, i lik köba xöbo irine iaa xirip pe mum, nexalik nang ibo das kaa, ibo taxin köba ma ibo saxit kirip abo iaa kölöme xö komo, io, abo pun meriso lömö xö mango te ot ma te pet abo wöwösö re idi xöbo axana.”

<sup>33</sup> Ixo töngösen idi ma önga tinenge öwuo xabise bölök: “A kingdom möxö watmaep i xarnang a is nang önga une ixo kip lo ma ixo bulus arixin ma plawa oleleng ot nang irabo ebobot.”

<sup>34</sup> Jisas ixo tenge mabo lalaa xirip urungan kö marakörö xö tinenge öwuo. Ine ixobo wöwörö xö marakörö mabo tinenge öwuo xalik mon.

<sup>35</sup> Io, a na rua öturunon a lasa abo propet toxo etöngösen min:

*“E rabo sawang a ngalake xöbo tinenge öwuo,  
me e rabo tengen ösu abo lalaa nang ixo mun sik meringan  
kö urulo möxö öxöno lagunon.”*

*A tinenge maras ulamun a pirixö*

<sup>36</sup> Io, Jisas ixo wan lie a marakörö ma ixo wan laxa xö gunon. Abo bak ne ausu rine toxo ot urungan tine ma toxo tengen, “Örö palas ina tinenge öwuo möxö pirixö kölöme xö komo ura re mem.”

<sup>37</sup> Ixo balu idi, “Ewe nang i sulo a irine iaa deek, ine a Barok kö Tödi.

<sup>38</sup> A komo, ine a öxöno lagunon. Ma irine iaa deek, i eöt mabo baroxorok möxö kingdom. Ma pirixö, idi abo baroxorok möxö tene sasaban.

<sup>39</sup> Ma iuo ridi, ewe niang ixo sulo idi, e Satan. A bung möxö xaxaxat, ine a axana bung möxö xakawöm. Ma nangadi nang tabo xaxat, abo angelo.

40 “A axana bung möxö xakawöm, irabo xarnang nang tabo xaxat inabo pirixö ma tabo söngöt kö ia söstöt.

41 A Barok kö Tödi irabo tile abo angelo rine, me idi tabo xaxat tewe abo tene sasaban arixe mabo lalaa xirip möxö kingdom niang a nangadi tobo susubu xönan.

42 Idi tabo tewe idi urungan kö ia söstöt niang i lelewi, ma ringan ee idi tabo gegee ma tabo engiren abo ngisine idi.

43 Io, xina axana bung abo tene töxödös tabo bio xarnang a xaken tiso xö kingdom kö Tamana idi. Me ewe ine ma talingine, ine irabo mana ölangen.

*A laa deek nang toxo umingen ma a karalo ne kalang*

44 “A kingdom möxö watmaep i xarnang a önga laa deek niang toxo umingen kö önga komo. Ma nang a önga tödi ixo pere wösöt lo, ine ixo umingen öbaling, ma xö axanan tine ixo wan ma ixo misik tewe mabo lalaa rine ma ixo kun ina xönö komo.

45 “Io, a kingdom möxö watmaep i eöt ma önga tödi, a tene xinixun, i wawara siwin abo karalo ne kalang niang a lak deek.

46 Io, nang bara ine i pere lo re öng niang i deek köba, ine ibo wan lo ma ibo misik tewe mabo lalaa xirip pine ma ibo kun lo ina karalo ne kalang.

*A eben*

47 “Ma a kingdom möxö watmaep i eöt ma eben niang toxo öriiri ösu uri xö könönö rasi ma abo mangana inan kirip tobo tamake xönan.

48 Io, niang bara i wöwö, abo tene öxönöm tobo sat öxaa urungan kö löxön. Io, idi tobo kis kö pu ma tobo ilo xirip niang abo inan deek urungan köbo rat, nexalik niang a lak saban tabo tewe rewe.

49 Ma irabo xarna na bölök kö axana bung möxö xakawöm. Abo angelo tabo wanot ma tabo palang tewe abo tene sasaban kalik abo tene töxödös.

50 Ma tabo tewe idi urungan kö könönö ia söstöt. Ma ringan ee idi tabo gegee ma tabo engiren abo ngisine idi.”

51 Me Jisas ixo ose idi, “Mum mo maras ulamun abo lalaa xirip na?”

Me idi toxo balu ine, “Mee.”

52 Io, ine ixo tengen tö idi, “Io, abo tene ausu xirip möxöbo warkurai te Moses ewe idi toxoro eusu ulamun a kingdom möxö watmaep i eöt ma a tamana gunon ewe ibo ikip ösu abo lalaa deek meringan kö bubulus se ine, niang a lak maxat ma niang a lak maut bölök.”

*Idi möxö lagunon te Jisas kaim kö ii ine  
(Mak 6.1-6; Luk 4.16-30)*

<sup>53</sup> Io, niang bere Jisas ixoro öxöwöm inabo tinenge öwuo, ine ixo wan kalik ina xönö.

<sup>54</sup> Ine ixo wanot urungan kö lagunon tine, ma ixo urulo ra usu a nangadi kölöme xö gunon ne sineseng ke idi, me idi toxo wuwus saban. Me idi toxo ose bira, “Ina tödi na i kip lo ina nanase ma lölös na mole?”

<sup>55</sup> Ine mon ina bak kö tene pet gunon. Ma a nago rine a esene e Maria, ma abo tönö rine e Jems, Josep, Saimon me Judas.

<sup>56</sup> Mabo saxana ine nangen na me ire. Io, ine i kip lo inabo lalaa xirip mole?”

<sup>57</sup> Me idi toxo mölök kalik ine.

Ma lamun e Jisas ixo tengen tö idi, “Xöbo lagunon kabise a nangadi tobo ii öraxin a propet. Inexalik kö lagunon iat tine ma kölöme xö gunon tine ina propet niang tokobo ii ine.”

<sup>58</sup> Me ine kaim a wewet te oleleng ne lalaa lölös ne auwuwus singan, möxösa, kaim idi xo nunu.

## 14

### *Erot ixo döxö e Jon*

*(Mak 6.14-29; Luk 9.7-9)*

<sup>1</sup> Xö ina axana bung e Erot a tödi raxin mee Galili ixo ölangen abo lalaa ulamun e Jisas,

<sup>2</sup> me ine ixo tengen köbo tene tinörön te ine bara, “E Jon a tene baptais ine mon e Jisas. Ine ma lölös taxin tua wewet abo lalaa ne winiwus lölös, möxösa, ine iri taru baling kalik a minet.”

<sup>3</sup> Io, Erot ixoro tile tuar a dauleng ne nangadi ra öxös lo e Jon bara tabo bulus ine xö gunon ne aömokorot tua gene e Erodias a une re tönö ine, nang e Pilip,

<sup>4</sup> möxösa, Jon ixobo rengrengen te Erot bara, “I kobo töxödös bara örobo elolo lamun ine.”

<sup>5</sup> Io, Erot ixo maaaa ra sesexomet e Jon, ma lamun ine ixo buburin a nangadi, möxösa, idi toxo pere ine bara a propet.

<sup>6</sup> Xö ina bung ka uxileng a bung nang a nago re Erot ixo kip ine, a balik ke Erodias ixo tie re idi ma ixo öaxanan köbanin e Erot,

<sup>7</sup> io, ixo eusugurno bara irabo tabaa ine mabo lalaa xirip niang i ose ulamun.

<sup>8</sup> Io, Erodias, a nago xö ina balik, ixo tengen kö balik bara irabo seng ke lasanene xalik e Erot. Io, a balik ixo tengen bara, “Örö tabaa e ma öxöno e Jon a tene baptais kö bile.”

<sup>9</sup> Me Erot ixo tapunuk, ma lamun ine ixo tengen bara tabo pet eörin, möxösa, ixoro usugurno sila xö ölöngö xöbo osee.



10 Ma toxo tee xöröp lo a öxöno e Jon kölöme xö gunon ne aömokorot.

11 A öxöno toxo kip ölaxa xö bile ma toxo isik urungan kö balik, me ine ixo kip urungan kö nago re ine.

12 Abo bak ne ausu re Jon idi toxo wanot, ma toxo kip lo a lewene aine e Jon ma toxo bulus kö maöt. Io, idi toxo wan ma toxo tengen te Jisas.

*Jisas ixo tabaa a pitnö ne arip*

*(Mak 6.30-44; Luk 9.10-17; Jon 6.1-14)*

13 Ma nang e Jisas ixo ölangen bere Jon ixoro met, ine ixo wan lo meringan kö mön arixe mabo bak ne ausu re ine me idi xalik mon toxo wan urungan kö xönö tataun. Nang a nangadi toxo ölangen a na, a marakörö raxin toxo muu ine möxöbo lagunon taxin.

14 Ma nang e Jisas ixo ösö, ixo pere a marakörö raxin, ma ixo marase idi ma ixo ölanglanga abo miniset te idi.

15 Ma nang ixoro aien, abo bak ne ausu toxo wanot pösöt ine ma toxo tengen, "Ina xönö na a xönö tataun ma iri aien sumara xoxo. Öro tile rewe a marakörö na. Me idi ta wan urungan köbo lagunon, ma ta kun nien te idi."

16 Jisas ixo tengen, "Idi takarabo wan. Mum iat, mum moro tabaa idi merebo lalaa rua enen."

17 Idi toxo tengen, "Mem angen ma pitnö ne beret ma nini inan."

18 Io, ine ixo tengen, "Mum moro kip ura re e."

19 Ma ixo tengen kö nangadi rua kinis su xö pasle. Io, Jisas ixo tön lo ina pitnö ne beret ma nini inan ma ixo wawara kaa xö balana kubu, ma ixo tengen deek ke God ma ixo pidik a beret. Ma ixo tabaa abo bak ne ausu min ma abo bak ne ausu toxo tabaa ina marakörö min.

20 Me idi xirip toxo an ma toxo masii. Io, abo bak ne ausu toxo tuxo a sangaun ma ninöng ne kölöt mabo subana nien nang idi toxo en paling.

21 Mabo duöng nang toxo an, ixo eöt ma pitnö ne arip. Ma kaim im kö xokos lo abo une ma bung barok lixilik.

*Jisas ixo wan lömö xö ari*

*(Mak 6.45-56; Jon 6.15-21)*

22 Ma saxit mon, Jisas ixo tile öxaa abo bak ne ausu xö mön, bara idi tabo sila re ine uruo xö lawa xabise, me ine bang, irabo tile ebasin a marakörö.

23 Ma nang ine ixo uguran tewe xirip idi, ine xalik mon ixo wan kaa rewe uruso xö maii rua sineseng. Ma nang ixoro sumaraxoxo, ine ixo xisixis ine xalik kingan ee,

24 ma lamun ina mön ixoro böxö rewe xö palaa xalik a mesmese, ma rasi ixo raru, möxösa, idi toxo esuo ma xiki.

25 Xö lörörö xö pitnö ne axana bung kö puxu bubung, e Jisas ixo önan lömö xö rasi urungan te idi.

26 Nang abo bak ne ausu toxo pere ine ixo önan lömö xö rasi, idi toxo buat saban. Me idi toxo tengen, "A tano ine." Me idi toxo kup wösö ma binuut.

27 Ma lamun saxit iat mon, e Jisas ixo tengen, "Mum moro balamasa. E mon. Ganim a binuut."

28 Pita ixo tengen, "Orong, nang bara i turunon bere nöngön mon, örö tengen te e ara wan urungan te nöngön lömö xö ari."

29 Jisas ixo tengen, "Örö miang."

Io, Pita ixo tuu su xalik a mön, ma ixo wan lömö xö ari urungan te Jisas.

30 Ma lamun nang ixo pere a xiki, ixo buat, ma ixo eka riririi, ma ixo kup, "Orong, örobo öro e!"

31 Ma saxit mon, Jisas ixo sanga ot ma limine ma ixo tön lo ine. Ixo tengen, "A nunu re nöngön i lik köba. U bele nine dinödöm."

32 Ma nang idu toxo kaa xö mön, a xiki ixo kawam.

33 Io, idi nang toxo xisixis kölöme xö mön toxo lotu wösöt ine, ma toxo tengen, "Turunon saxit, nöngön a Barok kö God."

34 Nang idi toxo köröp kö tu, toxo ösö Genesaret.

35 Ma nang a duöng möxö ina xönö toxo perexulen e Jisas, idi toxo tile tinenge xöbo lagunon kirip löröröin idi. A nangadi toxo ot mabo miniset kirip pe idi urungan te ine,

36 me idi toxo tenge marmaris se ine re idi ra rörön mon a ngusuno man te ine, me ewenene idi nang toxo sigi ine toxo langlanga.

## 15

*Abo lalaa nang irabo ögarin a öng  
(Mak 7.1-23)*

1 Io, dauleng ne Parasi mabo tene ausu möxöbo warkurai te Moses toxo wanot meriso Jerusalem urungan te Jisas ma toxo ose ine,

2 "Ruasa abo bak ne ausu re nöngön tokobo muu a ausu möxöbo tubuno ire? Idi tekara gilime sila xö nien!"

3 Jisas ixo balu, "Ma ruasa mum bo wörwörök a warkurai te God, muu a inausu xöbo tubu mum iat?"

4 Na e tengen, i eöt iat ma lasa nang e God ixo tengen bira, '*Nöngön örobo ii a tata ma nago re nöngön,*' me, '*Ewenene nang i tenge saban kö tamana bere nene, mum morobo sexomet ine.*'

5 Ma lamun mum bölök bo rengrengen bira: Ewe nang ma önga laa rua rorop e tamana bere nene, io, i öt bölök

bara ine irabo tengen, 'E xoro tagur sik kua tabaa e God min. E kebeöt ta tabaa nöngön min tua rorop nöngön.' Ma nang bara mum mo döxömen bira,

<sup>6</sup> Io, ine i kebeöt ta 'ii a tata re ine' arixe min. Möxö ina na, mum bo döxömen taun a tinenge re God möxö gene inabo inausu re mum nang mum bo xikip kalik abo untubu mum.

<sup>7</sup> Mum a nangadi röxröxö! E propet Aisaia i tengen a turunon lamun e mum, me God ixo tengen bira,

*<sup>8</sup> 'Ina nangadi na, tobo ii öxaa e mabo ngaladi, ma lamun abo kat tidi i kis kö palaa xalik e.*

*<sup>9</sup> Idi tobo lolotu tataun te e, möxösa, abo ausu ridi i ot mon möxö nangadi.' "*

<sup>10</sup> Io, e Jisas ixo kuwe a marakörö urungan tine ma ixo tengen, "Mum kirip moro ölangen e, me e mamaa bara mum moro maras.

<sup>11</sup> Kaim bara lalaa nang ibo önan laxa xö ngalana tödi ibo ösaban ine, nexalik a lasa nang ibo önan su xalik a ngalana ine, ibo ösaban a tödi."

<sup>12</sup> Io, abo bak ne ausu toxo wanot pösöt ine ma toxo ose ine, "Nöngön u ösöxö bara abo Parasi te bala saban niang idi te ölangen ina na u tengen?"

<sup>13</sup> Me Jisas ixo balu idi bira, "Idi te eöt mabo iaa nang a Tamake meriso xö watmaep i kara sulo, ma irabo xaxat öxaa idi ma buon tidi.

<sup>14</sup> Ganim idi! Idi te eöt ma pulo ewe i ka osen a ngas kö dauleng ne pulo xabise. Niang bara önga tödi pulo i silien a tödi pulo, idu xirip tabo subu laxa xö mara."

<sup>15</sup> Pita ixo tengen, "Örö tengen palas ina tinenge öwuo na urö mem."

<sup>16</sup> Io, Jisas ixo tengen te idi, "Mum kobola maras bang, a?"

<sup>17</sup> Mum kobo maras kö lasa nang ibo önan laxa xö ngalana tödi ma ibo önan laxa xö balana ire, ma ibo önan su baling?

<sup>18</sup> Inexalik, abo lalaa nang ibo önan su xalik abo ngalana ire ibo önan su xalik a kat, ma ibo ösaban a tödi.

<sup>19</sup> I turunon, möxösa, meringan kölöme xö könönö tödi ibo önan su abo dinödöm saban, a tatalien möxö inarsexomet, a tatalien ne ilawa ma önga tödi alolo, a tatalien pinilo, ma a tatalien ne rengrengen ösu a tinenge röxröxö lamun önga tödi i tuu xö warkurai, ma a tinenge ra ögarin önga tödi.

<sup>20</sup> Inabo lalaa na ibo wewet ösaban a tödi, nexalik bara nang u an ma limem ma u kobo gilime, i kebeöt ta wewet ösaban nöngön."

*A nunu xö önga une*  
(Mak 7.24-30)

<sup>21</sup> Ma nang e Jisas ixo wan lo xalik ina xönö, ine ixo wan lo urungan kö xönö mee Tair ma Saidon.

<sup>22</sup> Önga une meringan kö bung marapun te Kena ixo wanot pösöt ine, ma ixo kup bira, "Orong, a Barok kö bung marapun te Dewit, örö marase e! A balik lik ke e i esek saban arixe, möxö a tano saban i kis kölöme rine."

<sup>23</sup> Jisas kawaim a babalu re tinenge. Io, abo bak ne ausu rine toxo wanot pösöt ine ma toxo ose öbaling ine, "Örö uguran tewe ine, möxö ine angen i xukup muu nanin ire."

<sup>24</sup> Ixo tengen, "E karabo top nöngön. E Mama ixo uguran e urungan kalik mon köbo sipsip mee Israel niang te tup."

<sup>25</sup> Ma ina une ixo wanot, ma ixo subun kexe mesila re Jisas ma ixo tengen, "Orong, örö top e!"

<sup>26</sup> Jisas ixo tengen, "I kobo töxödös bara ire tabo kip lo a nien kö bung barok ma tabo tewe rabaa a bung puluwun min."

<sup>27</sup> Ma ina une ixo tengen, "A turunon saxit, Orong, ma lamun a bung wuluwun idi tobo enen abo perene nien köbo tamadi nang ibo susubu su xö ene öra."

<sup>28</sup> Io, Jisas ixo tengen, "Balik, nöngön ma nunu raxin saxit! E re ömaraxen lo a sineseng ke nöngön." Ma a balik kine ixo langlanga baling kina axana bung iat mon.

*Jisas ixo tabaa a nit ne arip*  
(Mak 8.1-10)

<sup>29</sup> Jisas ixo wan lie a xönö niang ma ixo wan kö gegene tu Galili. Io, ine ixo wan kaa xö önga lawana maii ma ixo kis su ee.

<sup>30</sup> A marakörö raxin toxo wanot pösöt ine, me idi toxo orot arixe mabo marapulo mabo lime met mabo pengpeng mabo ngalaböt ma oleleng kabise, ma toxo ömarin idi xö xexene ine, ma ixo ölanglanga idi.

<sup>31</sup> Ma nangadi toxo wuwus saban, möxösa, idi toxo pere abo ngalaböt toxo tenge, mabo lime met toxo deek, mabo pengpeng toxo önan, mabo marapulo toxo wawara. Me idi toxo tenge ölet e God möxöbo Israel.

<sup>32</sup> Jisas ixo kuwe abo bak ne ausu re ine urungan te ine ma ixo tengen, "E marase a nangadi na idi te kis arixe me e xö narun ne bung tuar ma kaim idi ma nien. E kobo maa ra uguran tewe idi ma te irilöng, xalik idi tobo met saxit kö ngas."

<sup>33</sup> Mabo bak ne ausu rine toxo tengen te ine, "Ire tekebeöt tua parasiwin tebo beret tua tabaa ina marakörö raxin min, a xönö na a xönö tataun."

<sup>34</sup> Jisas ixo tengen, “A nausen ne xönö beret nangen me mum?”

Me idi toxo balu ine bira, “Pitnö ma ninöng, ma ulek ne inan lixilik.”

<sup>35</sup> Ine ixo tengen kö marakörö ra kinis kö pu.

<sup>36</sup> Io, ixo kip lo a pitnö ma ninöng ne beret mabo inan. Ma nang ixo tengen deek kö God ulamun, ixo pidik ma ixo isik köbo bak ne ausu, me idi toxo tabaa a nangadi min.

<sup>37</sup> Idi xirip toxo an ma toxo masii. Melamu im abo bak ne ausu toxo kip lo a pitnö ma ninöng ne kölöt subana nien nang ixo kis.

<sup>38</sup> A nangadi niang toxo an i eöt ma nit ne arip, kaim a xokos abo une mabo barok lixilik.

<sup>39</sup> Jisas ixoro uguran tewe a marakörö ma ixo kakaa xö mön ma ixo lies urungan kö xönö möxö Magadan.

## 16

### *Toxo seseng ulamun a auxilieng*

*(Mak 8.11-13; Luk 12.54-56)*

<sup>1</sup> Abo Parasi mabo Sadiusi toxo ot pösöt e Jisas ma toxo könönöin ine bira. Toxo ose bara irabo pet te önga mangana auxilieng lölös sua osen bara abo tinörön te ine meriso re God.

<sup>2</sup> Ixo tengen, “Niang bara aien ibo ot, mum bo tengen bara, ‘Irabo axana bung deek maxalik, möxö a balana kubu i wawara deek,’

<sup>3</sup> ma xö puxu mum bo tengen bara, ‘Irabo baraa, möxösa, a balana kubu i ködö.’ Mum bo ösöxö rua werwere xulen a xuxulas möxö balana kubu, lamun mum kobo eöt tua werwere xulen abo uxileng möxöbo lalaa e wewet nang i orot köbo axana bung nixinen.

<sup>4</sup> Xöbo bung nixinen a marakörö te wawara lamun a uxileng lölös, möxösa, idi tobo ruruu rewe xalik e God ma tobo sasaban esexere, ma lamun e rabo isik a auxilieng ke Jona xalik mon urungan te idi.” Io, Jisas ixo wan kalik idi.

### *A tumarang köbo inausu möxöbo Parasi ma abo Sadiusi*

*(Mak 8.14-21)*

<sup>5</sup> Niang idi toxo wan lies ina tu, abo bak ne ausu toxo döxömen taun tua kip beret.

<sup>6</sup> Jisas ixo tengen te idi, “Tumarang e mum, lamun a is köbo Parasi mabo Sadiusi.”

<sup>7</sup> Idi toxo rengrenge nana min kaluluon iat tidi ma toxo tengen, “Ine i tengen bira, möxösa, ire tokobo kip pe dauleng ne beret.”

<sup>8</sup> Jisas ixoro ösöxö ina tingenge ridi, ma ixo ose idi, “A nunu re mum i wuruwut. Ruasa mum mo wöwörö kaluluon iat te mum bara kaim pebo beret?”

<sup>9</sup> Mum kala maras bang? Me mum kobo dödöxömen lo a pitnö ne xönö beret nang a pitnö ne arip toxo en, ma nausen ne kölöt ixo wöwö ma subana nien niang e mum moxo iiögun?”

<sup>10</sup> Ma bara a pitnö ma ninöng ne beret lamun a nit ne arip, a nausen ne kölöt wöwö ma subana nien nang mum moxo kip etok?

<sup>11</sup> Bara bule mum kala maras? E kaim kö rengrengen te mum lamun a beret. Inexalik, mum moro tumarang lamun a is köbo Parasi mabo Sadiusi.”

<sup>12</sup> Io, idi toxo maras bara i kobo ötumarang idi lamun a is möxö bulbulus kö beret, nexalik lamun a inausu möxöbo Parasi mabo Sadiusi.

*Pita ixo tengen osen bere Jisas a Mesaia  
(Mak 8.27-30; Luk 9.18-21)*

<sup>13</sup> Nang e Jisas ixo wanot kö xönö möxö Kaisaria Pilipai, ine ixo ose abo bak ne ausu rine, “A nangadi tobo rengrengen a Barok kö Tödi me we?”

<sup>14</sup> Io, idi toxo balu ine, “Dauleng te tengen bere nöngön e Jon a tene baptais, dauleng te tengen bere nöngön e Elaija, ma lamun dauleng te tengen bere nöngön e Jeremaia bara nöngön a öng möxöbo propet.”

<sup>15</sup> Me ine ixo ose, “Me mum, mum bo rengrengen e me we?”

<sup>16</sup> Io, Saimon Pita ixo balu ine ma ixo tengen, “Nöngön a Mesaia, a Barok kö God niang a lak to.”

<sup>17</sup> Jisas ixo balu, “Saimon, barok ke Jona, irabo deek kö nöngön, möxösa, kaim pe tödi mon i osen sik a na re nöngön, ma lamun a Tamake niso xö watmaep.”

<sup>18</sup> Me e tengen te nöngön bara nöngön e Pita, ma lömö xö wat na e rabo uru xönan a lotu re e, ma minet i kebeöt ta kawönö ine.

<sup>19</sup> E rabo isik ke nöngön abo ki möxö kingdom möxö watmaep. Abo lasa u baxut kö öxöno lagunon, God irabo baxut bölök kiso xö watmaep, ma abo lasa u palas ösu ra xö öxöno lagunon, God irabo palas ösu bölök kiso xö watmaep.”

<sup>20</sup> Io, ixo panak abo bak ne ausu rine bere idi tebele tengen osen kere öng bara a Mesaia ine.

*Jisas ixo tengen osen bara irabo met  
(Mak 8.31—9.1; Luk 9.22-27)*

<sup>21</sup> Xinabo axana bung im Jisas ixo urulo ra rengrengen köbo bak ne ausu rine bara ine irabo mana wan uruso

Jerusalem ma irabo kip a tiip möxö oleleng ne lalaa xöbo limine abo sisila mabo pris tataxin mabo tene ausu möxöbo warkurai te Moses, ma bara a nangadi tabo mana sexomet ine ma xö narun ne bung melamu, irabo taru baling.

<sup>22</sup> Pita ixo lamus pes lo ine xalik idi ma ixo urulo ra xöxöö ine lamun a tinenge nang ixo tengen ma ixo tengen, "Kaim, Orong! Ina na i bele ot tö nöngön!"

<sup>23</sup> Jisas ixo talingen ma ixo tengen te Pita, "Satan, wan pes kalik e! U eka wewet pi a ngas se e. A dinödöm pe nöngön i kobo muu sik abo dinödöm pe God, ma lamun nöngön u mumuu a dinödöm kö nangadi."

<sup>24</sup> Io, Jisas ixo tengen köbo bak ne ausu rine, "Nang bara re tödi i maaaa ra mumuu e, ine irabo mana döxömen taun ine iat ma irabo sölök a sölöxöröp pe ine ma irabo muu e.

<sup>25</sup> Möxö ewe nang i maaaa rua töndik sik iat a to re ine irabo ömalim tewe, ma lamun ewe niang i ömalim tewe a to re ine rua gene e, irabo pere wösöt lo a to runon.

<sup>26</sup> Nang bara tödi i kip lo xirip abo lalaa möxö öxöno lagunon, ma i ömalim tewe a to runon te ine, io, a lasa i deek möxö inabo lalaa irabo top ine? Kawaim. Ma a tödi irabo isik a xunuxun sa rua xukun puxus lo a to re ine?

<sup>27</sup> Möxö a Barok kö Tödi irabo wanot ma lölös kö Tamana arixe mabo angelo re ine, ma irabo isik kö öngöng eöt ma lasa ine ixoro pet eörin.

<sup>28</sup> Turunon saxit, dauleng nang te tuu sik na takarabo met ot nang idi tabo pere a Barok kö Tödi irabo ot ma a kingdom pe ine."

## 17

*Jisas ixo xuxulas lömö xö maii*

*(Mak 9.2-13; Luk 9.28-36)*

<sup>1</sup> Melamu xö pitnö ma öng ne bung ixo saxit, Jisas ixo lamus lo e Pita, Jems me Jon arixe mine urso lömö xö maii raxin, idiet kalik mon.

<sup>2</sup> Me Jisas ixo xuxulas kö mamaran tidi. A wawara re ine ixo mararang xarnang a xaken ma abo man te ine ixo ot pidien xarnang a bibio.

<sup>3</sup> Io, e Elaija me Moses toxo wösö ridi ma toxo wöwörö me Jisas.

<sup>4</sup> Io, Pita ixo tengen te Jisas, "Orong, i deek bara e met mara xisixis sa. Nang bara u maaaa, e rabo uru re narun ne walpali, öng ke nöngön, öng ke Moses ma öng ke Elaija."

<sup>5</sup> Nang ine ixo wöwörö xudun, a kubu pidien ixo wösö ot ma ixo tawi idi, ma inöno öng kö kubu ixo tengen, "Ine ano Barok ke e. E maaaa lamun ine ma ibo isik a axanan taxin te e. Muot morobo ölangen ine!"

<sup>6</sup> Nang abo bak ne ausu toxo ölangen bira, toxo subu ma wawara re idiet kö pu ma toxo buut köba.

<sup>7</sup> Ma lamun e Jisas ixo wanot ma ixo sigi idiet. Ixo tengen, "Muot moro tuu lömö. Ganim a binuut."

<sup>8</sup> Nang idiet toxo wawara kaa, toxo pere xalik mon e Jisas, ma kaim im idiet ta werwere re öng.

<sup>9</sup> Ma nang idi toxo önan su baling kalik a öxöno maii, Jisas ixo isik a tinenge lölös bere, "Muot bele tengen osen kere öng a lasa nang muot muru pere sik ot kö axana bung a Barok kö Tödi irabo taru baling kalik a minet."

<sup>10</sup> Ma abo bak ne ausu toxo ose ine, "Ruasa abo tene ausu möxöbo warkurai te Moses tobo rengrengen bere Elaija irabo wanot sila?"

<sup>11</sup> Jisas ixo balu, "I turunon bara Elaija irabo wanot ma irabo bulus ödeek öbaling abo lalaa.

<sup>12</sup> E tengen te muot, Elaija ixoro ot, me idi kawaim pa werwere xulen ine, lamun idi toxoro pet eörin abo lalaa urungan tine nang idi toxo maaa lamun. Xarna bölöök, idi tabo isik a kinadik kö Barok kö Tödi."

<sup>13</sup> Io, abo bak ne ausu toxo maras bere ixo rengrengen tö idi lamun e Jon a tene baptais.

*A barok ine ma tano saban*  
(Mak 9.14-32; Luk 9.37-45)

<sup>14</sup> Ma nang idi toxo ot pösöt a marakörö, önga tödi ixo wanot pösöt e Jisas ma ixo subun kexe mesilain ine.

<sup>15</sup> Ma ixo tengen, "Orong, örö marase a barok ke e. Ine ibo memet saxit ma ibo esek köba arixe. Ine ibo susubu laxa xö ia sösöt ma xö ari.

<sup>16</sup> E xoro kiwot ine urungan köbo bak ne ausu re nöngön, ma lamun idi kaim pa eöt ta ölanglanga ine."

<sup>17</sup> Jisas ixo balu, "Mum a marakörö mee nixinen nang mum kara nunu me mum bo tawuxus kalik abo tatalien töxödös, e kebeöt ta kinis arixe me mum kö axana bung ömat. Ma nausen ne bung e rabo kip abo tiip pe mum? Kip ot a barok ura re e."

<sup>18</sup> Jisas ixo tenge köö ina tano saban, ma ixo wan su xalik a barok, ma ixo deek baling saxit iat mon.

<sup>19</sup> Io, abo bak ne ausu toxo ose suxume ine, "Ruasa me mem kobo eöt ta irewe ina tano saban?"

<sup>20</sup> Ixo balu idi, "Möxösa a nunu re mum i lik köba. Turunon saxit, nang bara a nunu re mum i lik köba xarnang a irine sie, mum mo eöt ta tengen kö puot na bira, 'Örö taxase mera', ma ina puot irabo taxase mera. Kaim pe laa nang mum mo kebeöt tua wewet."

<sup>21</sup> [A sineseng kalik mon ma ölölo i eöt bara irabo irewese abo mangana tano saban biringan.]



<sup>22</sup> Nang idi toxo wanot arixe uruo Galili, ixo tengen te idi, "Tabo bulus a Barok kö Tödi xö limine a nangadi, me idi tabo sexomet ine.

<sup>23</sup> Ma xö narun ne bung irabo taru baling kalik a minet." Ma abo bak ne ausu toxo tapunuk köba.

*A takis kö gunon lotu raxin*

<sup>24</sup> Nang e Jisas mabo bak ne ausu rine toxoro wanot Kaprenaum, abo tene kip tuluwok möxö gunon lotu raxin, toxo wanot pösöt e Pita ma toxo ose ine, "A tene ausu re mum ibo tewe takis kö gunon lotu raxin?"

<sup>25</sup> Io, ixo balu idi, "Turunon, ine ibo wewet."

Nang e Pita ixo wan laxa xö gunon, Jisas ixo arun ta winörö. Ixo ose ine, "Saimon, u döxömen bara bule? A king möxö öxöno lagunon niang ibo xikip takis kalik ewe midi? Xalik abo baroxorok iat tine, bara a nangadi xabise?"

<sup>26</sup> Pita ixo balu ine, "Xalik a nangadi xabise."

Jisas ixo tengen te ine, "Möxö ina na, abo baroxorok iat te ine tabo langlanga xalik a tewe takis.

<sup>27</sup> Ma xalik iraa tobo engin idi me idi tobo laie. Örö wan urungan kö tu ma örö tewe ösu a öxönöm. Kip lo a sinila ne en u öxönöm. Sawang a ngalana ma örobo pere lo a tuluwok. Kip lo ma örö tabaa idi min tö e me nöngön."

## 18

*Ewe runon i taxin?*

(Mak 9.33-48; Luk 9.46-48; 17.1-2)

<sup>1</sup> Kö ina axana bung, abo bak ne ausu toxo wanot pösöt e Jisas ma toxo ose ine, "Ewe i taxin tiso xö kingdom möxö watmaep?"

<sup>2</sup> Io, ixo kuwe a bak lik ma ixo uru ine kaluluonin idi.

<sup>3</sup> Ma ixo tengen, "Turunon saxit, niang bere mum korobo xuxulas ma xarnang a bung bak lixilik, mum korobo laxa xö kingdom möxö watmaep.

<sup>4</sup> Inexalik, ewe niang i ii ölik ine iat xarnang a barok lik, ine i taxin saxit kö kingdom möxö watmaep.

<sup>5</sup> "Me ewe niang irabo öga a barok lik bira xö esene e, ine i öga e.

<sup>6</sup> Nang bara ewenene i pet a öng mere inabo barok lixilik na ewe idi te nunu re e rua pet magingin saban, irabo kip a warkurai taxin melamu. Io, ixere deek kö ine bara texere kut te xönö wat taxin kö inöno ma texere öriri ösu ine xö lamin möxö rasi, xalik ibo engin lo re öng kua pet magingin saban.

<sup>7</sup> "Io, maris kö öxöno lagunon, möxösa, lamun abo lalaa niang ibo engin a nangadi rua wewet abo sasaban. A turunon saxit bara abo sasaban na irabo wanot, inexalik

ina tödi nang i engin idi rua wewet a sasaban, irabo tuu xö warkurai taxin!

<sup>8</sup> Nang bara a limem bara xexem i engin nöngön tua pet magingin saban, örobo tee xöröp tewe ine ma örö tewe rewe. I deek ke nöngön ta nilaxa xö to runon ma lime mut ma xexe mut, xalik tabo tewe nöngön arixe ma nine limem ma nine xexem urungan kö ia sösöt taxin kaim pe öxawam.

<sup>9</sup> Ma nang bara a maram i engin nöngön ta pet magingin saban, örobo luok tewe ma örö tewe rewe. I deek ke nöngön ta nilaxa xö to runon arixe ma önga kalait maram, xalik tabo tewe nöngön arixe ma nine kalait maram urungan kö ia sösöt taxin.

*A Tamana ire i kobo mamaa bara ire tabo tup*  
(Luk 15.3-7)

<sup>10</sup> "Tumarang, ganim e mum pa pere ölik ke öng mere inabo barok lixilik. E tengen te mum, abo angelo re idi niso xö watmaep tobo werwere a mamaran kö Tata re e.\*

<sup>12</sup> "Mum mo döxömen bule? Nang bara a tödi ine ma önga mar ne sipsip, ma öng ixo tup, ine irabo wan lie a pitnö ma nit ne sangaun ma pitnö ma nit lömö xö maii ma irabo wan ta winara xö öng kalik nang ixo tup.

<sup>13</sup> Ma nang bara ine i pere wösöt lo ine, turunon saxit, ine irabo axanan köba lamun a önga sipsip kö ina pitnö ma nit ne sangaun ma pitnö ma nit nang idi kaim a tinup.

<sup>14</sup> Ma i xarnang mon, a Tama mum niso xö watmaep i kara mamaa arixe bara re öng kidi abo barok lixilik irabo mana tup.

*Lamus puxus a öng nang i subu*

<sup>15</sup> "Nang bara a töm i pet te sasaban urö nöngön, wan ma örö osten ine ma sinibu rine, kaluluonin e mu iat. Ma nang bara i ölangen nöngön, nöngön uru lamus puxus a töm.

<sup>16</sup> Ma lamun niang bara ine i kobo ölangen, io, örobo lamus lo re öng bara ninöng kabise rua werwere ine xarnang a tingenge re God i tengen, bara '*re ninöng bara re narun ne tödi idi tabo etöngösen maras sua öturunon önga laa.*'

<sup>17</sup> Ma bara ine i kobo mamaa rua ölangen e mum, io, mum morobo mana töngösen a marakörö möxö lotu min. Ma nang bara ine i kobo mamaa rua ölangen a tingenge ridi bölök, mum morobo perexulen ine urungan tö mum xarnang bere ine a tödi saban bara a tödi kaim ine ma nunu xö God.

\* **18:10** A dauleng ne ginigeet me lorexe toxo bulus öläxa rina **11** i tengen bira: *A Barok kö Tödi ixo wanot tua öro ewe idi nang toxo tup.*

18 “E tengen a turunon te mum, abo lasa nang e mum mo baxut kö öxöno lagunon, e God irabo baxut bölök kiso xö watmaep, ma abo lasa nang mum mo palas sa xö öxöno lagunon, ine irabo palas bölök kiso xö watmaep.

19 “E tengen öbaling ke mum, nang bara re ninöng mere mum pa xö pu i aut lamun te lalaa nang mum mo seng, io, e Tata re e niso lömö xö watmaep irabo tabaa e mum min.

20 Möxösa, nang bara re ninöng bara re narun te wanot etok kölöme xö eseke, io, e rabo kis kaluluonin idi.”

*Ire tabo döxömen taun abo sasaban nang a öng i pet tö ire*

21 Io, Pita ixo ot pösöt e Jisas ma ixo ose, “Orong, a nausen ne axan nang arabo döxömen taun a töke nang i pet abo sasaban tö e? I eöt ma pitnö ma ninöng ne axan?”

22 Me Jisas ixo balu, “E tengen te nöngön, kaim bara pitnö ma ninöng ne axan, ma lamun irabo pitnö ma ninöng ne sangaun ma pitnö ma ninöng.

23 “Möxö ina na, a kingdom möxö watmaep i xarnang a king nang ixo mamaa bara abo tultul te ine tabo ot tua balu dinau arixe mine.

24 Io, ine ixo urulo ra ötöxödös abo dinau, ma toxo lamus ot a önga tödi mere idi urungan te ine, möxösa, ina tödi ixo dinau eöt ma sangaun ne arip ne tuluwok.

25 Ma lamun ina tödi kaim ine xo eöt tua babalu öbaling ina tuluwok. Io, a king ixo tengen, ‘Mum morobo mana misik mina tödi arixe ma baninen te ine bara idi tabo xarnang abo tultul tataun. Ma abo lalaa xirip pe ine mum morobo misik min tua babalu öbaling abo tuluwok.’

26 “Ma a tultul ixo subu su xö nini busuno xexene mesila re ine, ma ixo seseng ömarmaris ine bara, ‘E mamaa bara örö balawapat mon bang kö e. E rabo balu wuxus kirip abo tuluwok ke nöngön.’

27 Io, a orong ixo marase ine, ma ixo döxömen taun abo dinau pe ine, ma ixo öbala rewe ine.

28 “Ma nang ina tultul ixo wan lo ma ixo pere wösöt a önga ais se ine nang ixo kip lo a mar ne tuluwok ke ine. Ine ixo töndik ine ma ixo urulo rua wupus dik ine. Ma ixo tengen tö ine, ‘Örö balu wuxus a lasa nang u xo kip lo xalik e!’

29 “A ais se ine ixo subu su xö nini busuno xexene ma ixo seng ömarmaris ine bara, ‘E mamaa bara örö balawapat mon bang kö e. E rabo balu wuxus inabo tuluwok ke nöngön.’

30 “Inexalik bara, ine ixo mölök, ma ixo wan ma ixo tewe öläxa ina tödi xö gunon ne aömokorot ot nang ine irabo balu wuxus kirip abo dinau pe ine.

<sup>31</sup> Ma nang a dauleng ne tultul kabise toxo pere a lasa ixo wanot, idi toxo bala kadik ma toxo wan ta rengrengen kö orong ke idi ulamun a lasa xirip nang ixo wanot.

<sup>32</sup> "Io, a orong ixo kuwe ölaxa ina tultul. Ma ixo tengen tö ine, 'Nöngön a tultul saban! E xo döxömen taun abo dinau xirip pe nöngön, möxösa, nöngön u xo seng ömarmaris e ulamun.

<sup>33</sup> I kobo eöt mon bara örobo marase a ais se nöngön xarnang mon e xo pet tö nöngön?"

<sup>34</sup> Ma a orong ixo laie xöba re ine, ma ixo isik ine urungan te idi nang tobo isik kinadik kingan kö gunon ne aömokorot, ot nang ine irabo balu xirip abo dinau pe ine.

<sup>35</sup> "Ma bie bölök mon, a Tamake niso lömö xö watmaep irabo pet tö mum öngöng, nang bara mum koxobo döxömen taun tewe xirip a sasaban nang abo tönö mum idi te pet tö mum."

## 19

### *A magingin ne palas alolo (Mak 10.1-16)*

<sup>1</sup> Nang e Jisas ixo kawam pa rengrengen inabo lalaa na, ixo wan lie e Galili ma ixo wan laxa xö xönö pu mee Judeia urungan kö lawa xabise möxö Ari Jordan.

<sup>2</sup> A marakörö raxin toxo muu ine ma ixo ölanglanga idi ringan ee.

<sup>3</sup> Ma dauleng ne Parasi toxo wanot pösöt ine rua walwalar ine. Idi toxo ose ine bira, "I töxödös sik kö warkurai te ire bara a tödi irabo palas alolo xö une re ine eöt ma a lasanene nang ine i maaa lamun?"

<sup>4</sup> Jisas ixo balu idi, "Me mum moxoro kos bara xö urulo möxö uxixis möxö öxöno lagunon a Tene Uxis '*ixo pet idu a körö ma une,*'

<sup>5</sup> ma ixo tengen, '*Möxö ina na, a tödi irabo wan lie a tata ma nago rine ma irabo kis arixe ma une re ine. Me idu tabo öng.*'

<sup>6</sup> Io, idu tekarabo ninöng im, ma lamun idu tabo öng. Nang bara ixoro bie, ganim pe tödi ra walwalas a lasa nang e God ixoro bulus arixin sik."

<sup>7</sup> Io, idi toxo ose ine, "Ruasa belek bere Moses ixo tenge lölös bara a tödi irabo geet te tinenge maras sua palas alolo ma irabo isik ina ginigeet tua tile rewe ina une?"

<sup>8</sup> Jisas ixo balu, "Moses ixo ömaraxen e mum pa palas alolo ma une re mum, möxösa, abo bala mum ixo lölös köba. Ma lamun kaim bara ixo ot biringan xarnang mee mesila xö urulo.

<sup>9</sup> E tengen te mum, nang ewe re öng nang i köröp alolo ma une re ine nang i kala ilawa, ma i elolo a une xabise, ine i pet a tatalien saban, möxösa, ine i maru ma une kaim bara re ine.”

<sup>10</sup> Abo bak ne ausu toxo tengen te ine, “Nang bara ina mangana kinis na kaluluonin a tödi ma une i bira, i deek ka ganim a alolo.”

<sup>11</sup> Jisas ixo balu, “Kaim bara nangadi xirip tabo ömaraxen lo ina tinenge na, nexalik ke idi mon ewe God ixoro isik kö idi.

<sup>12</sup> Abo unine niang a tödi i kara elolo. Dauleng tekara elolo, möxösa, toxo kip iat idi bie. Ma uleng toxo kuru idi bara idi tekebeöt tua elolo. Ma uleng niang tekara elolo, möxö tobo dödödöm oleleng lamun a kingdom möxö watmaep. Ewe nang i eöt tua ömaraxen lo ina inausu, i deek bara irabo ömaraxen lo ine.”

<sup>13</sup> Io, toxo xikip ot abo barok lixilik ura re Jisas sö ine rua bulbulus a limine lömö ridi ma rua sineseng kö idi. Inexalik abo bak ne ausu toxo töö rewe idi ewe toxo xikip ot idi.

<sup>14</sup> Jisas ixo tengen, “Moro ganim a bung bak lixilik ta ot ura re e, ma ganim a wanwanak idi, möxösa, a kingdom möxö watmaep, ine möxö inabo mangana bak lixilik bira.”

<sup>15</sup> Ma nang ine ixoro bulus a nine limine lömö re idi, ine ixo wan lo meringan.

### *Önga orong*

*(Mak 10.17-31; Luk 18.18-30)*

<sup>16</sup> Io, önga tödi ixo wanot pösöt e Jisas ma ixo ose, “Tene Ausu, a laa deek sa niang e rabo mana pet tua xikip ina to ulorexe saxit?”

<sup>17</sup> Jisas ixo balu, “Ruasa u ose e lamun a lasa niang i deek? A Öng kalik mon nang i deek. Nang bara u mamaa rua nuan laxa xö to runon, örö muu abo warkurai te God.”

<sup>18</sup> Ina tödi ixo ose, “Nangang sa?”

Jisas ixo balu, “*Ganim a arsexomet tataun, ganim a pet a tatalien ne ilawa ma önga tödi alolo, ganim a wuwulo, ganim a tengen töxö lamun a önga tödi,*

*19 örö ii ölik nöngön te tata me nago,’ ma ‘Örobo mamaa lamun a öng kabise xarnang u mamaa lamun nöngön iat.’ ”*

<sup>20</sup> Ina tödi maxat ixo tengen te Jisas, “E xobo mumuu inabo warkurai. A lasa bang e kela pet?”

<sup>21</sup> Jisas ixo balu ine, “Nang bara u mamaa bara örobo töxödös kirip, örö wan, ma örö misik mabo laa xirip nang nöngön min ma örö tabaa a nangadi maris, io nang, nöngön örobo kip abo arabaa deek saxit tiso xö watmaep. Ma örö miang ma örö muu e.”

<sup>22</sup> Nang ina tödi maxat ixo ölangen bira, ixo wan lo ma tawunuk, möxösa, ine a tödi orong.

<sup>23</sup> Io, Jisas ixo tengen köbo bak ne ausu rine bira, "Turunon saxit, i lölös kö önga tödi orong kua nilaxa xö kingdom möxö watmaep.

<sup>24</sup> E maa ra ölölös öbaling e mum, nang bara önga kamel i ka nuan laxa xö mara möxö nil möxö sinöxö, i kobo lölös köba xarnang a tödi orong i ka nilaxa xö kingdom kö God."

<sup>25</sup> Nang abo bak ne ausu toxo ölangen bira, toxo wuwus köba im ma toxo tengen, "Nang bara bie, ewe im pe öng irabo eöt ta xikip a to ulorexe?"

<sup>26</sup> Jisas ixo pere idi ma ixo tengen, "Xö nangadi mon, idi tekebeöt. Ma lamun e God i öt ta wewet eörin kirip abo lalaa."

<sup>27</sup> Io, e Pita ixo tengen te ine, "Mem mere wan lie xirip abo lalaa re mem rua mumuu e nöngön! A lasa im nang e mem marabo kip lo?"

<sup>28</sup> Io, Jisas ixo tengen tö idi, "Turunon saxit, xö axana bung nang abo lalaa tabo ot maxat baling, a Barok kö Tödi irabo kis kö kinis taxin ne mariris. Me ewe mum nang moro muu e, mum morobo kis bölök kö ina sangaun ma ninöng ne kinis taxin, ma morobo kure a sangaun ma ninöng ne marapun mee Israel.

<sup>29</sup> Me ewe nang iri wan lie a gunon tine, abo tönö, abo saxana, a tata, a nago, a bung baroxorok, bara abo komo rine rua gene e, ine irabo kip a oleleng saxit möxö inabo mangana lalaa nang ixo wan lie, ma irabo kip a to ulorexe saxit bölök.

<sup>30</sup> Ma lamun a oleleng ewe nang te sila, tabo muu, ma oleleng ewe nang te muu, tabo sila."

## 20

### *Abo tultul kö komo wain*

<sup>1</sup> "A kingdom möxö watmaep i xarnang a tödi ine ma önga komo. Ma xö puxu bubung ine ixo wan ta lalamus sebo duöng kua tinörön kö komo wain te ine.

<sup>2</sup> Ma ixo tengen köbo duöng tinörön bara irabo kun idi mon ma önga tuluwok kö önga bung kudun. Io, ine ixo tile rewe idi urungan kö komo wain.

<sup>3</sup> "Ma bara ixo pitnö ma nit ne axana bung ine ixo wan lo ma ixo pere a dauleng toxobo tuu tataun sik kölöme xö xönö möxö misik mabo lalaa.

<sup>4</sup> Me ine ixo tengen tö idi, 'Mum bölök moro wan ma moro rörön kö komo wain te e, me e rabo kun ötöxödös e mum.'

<sup>5</sup> Io, idi toxo wan.

“Me ine ixo baling kö luono xaken. Ma lörörö xö narun ne axana bung ixo baling ma ixo pet bie bölök.

<sup>6</sup> Ma bara ixo lörörö xö pitnö ne axana bung kö aien, ine ixo wan ma ixo pere a dauleng bölök angen toxo ruruu nana. Ine ixo ose idi bara, ‘Ruasa me mum mo ruruu nana ra me mum koxobo wewet te lalaa?’

<sup>7</sup> “Idi toxo balu ine, ‘Ma, möxösa, kaim pe tödi i tabaa e mem mere tinörön.’

“Io, ine ixo tengen tö idi, ‘Mum bölök moro rörön kö komo wain te e.’

<sup>8</sup> “Nang ixoro dömön, a tamana komo wain ixo tengen kö tödi nang ibo werwere muu a komo wain bira, ‘Kuwe abo duöng tinörön ma örö kun idi. Urulo xöbo duöng nang toxo ot melamu, ma öxawam pe ewe midi nang toxo sila.’

<sup>9</sup> “Io, abo tene tinörön nang toxo lamus ot idi xö pitnö ne axana bung kö aien, idi toxo wanot. Me idi toxo kip lo önga tuluwok ke idi öngöng.

<sup>10</sup> Ma bara abo duöng tinörön nang toxo arun ta lamus idi toxo wanot, idi toxo döxömen bara idi tabo kip a xinuxun taxin. Ma lamun idi öngöng bölök toxo kip a önga tuluwok.

<sup>11</sup> Nang idi toxo kip lo, idi toxo wöwörö oleleng kö tödi nang ixobo unan sik a komo wain.

<sup>12</sup> Me idi toxo tengen bara, ‘Abo duöng nang u xo lamus idi melamu, idi te rörön önga axana bung mon, me nöngön u xo kun eörin kirip e mem. Mem moxo örasen a kinadik möxö ina tinörön me mem moxo malawang bölök kö xaken.’

<sup>13</sup> “Inexalik ixo balu öng ke idi, ma ixo tengen, ‘Töke, e kobo saban te nöngön. U ösöxö bara iraa toxo aut bara tabo kip a önga tuluwok mon.

<sup>14</sup> Örö kip lo a xinuxun te nöngön ma örö wan. E maaaa rua ukun abo duöng nang e xo lamus idi melamu xarnang mon nöngön.

<sup>15</sup> E iat e kure sik a tuluwok ke e bara arabo pet bule. Nöngön u dödöm saban sik ke idi ewe nang toxo muu, möxösa, e a tödi möxö inerabaa?’ ”

<sup>16</sup> Io, Jisas ixo tengen bira, “Ewe midi nang te muu, idi tabo sila, ma ewe midi nang te sila, idi tabo muu.”

*Jisas ixo tengen bara irabo met  
(Mak 10.32-34; Luk 18.31-34)*

<sup>17</sup> Ma niang e Jisas ixo önan uruso Jerusalem, ixo lamus öbaling a sangaun ma ninöng ne bak ne ausu urungan kö lawana ma ixo tengen te idi,

<sup>18</sup> “Ire tabo wan kaa uruso Jerusalem, ma Barok kö Tödi, tabo isik ine xö limine abo pris tataxin mabo tene ausu

möxöbo warkurai te Moses. Idi tabo bulus warkurai ra sesexomet ine.

<sup>19</sup> Ma tabo isik ine xö limine a nangadi kaim bara abo Judeia rö idi rua eösaxit saban me ine ma tabo dangat ine ma tabo tut ine xö sölöxöröp. Narun ne bung irabo saxit, ine irabo taru baling kalik a minet!”

*Ewe nang i maaaa rua tinuu sila, irabo tultul mon  
(Mak 10.35-45)*

<sup>20</sup> Io, a nago xö nine barok ke Sebedi ixo wan urungan te Jisas arixe ma nine barok ke ine, ma ixo subun kexe mesila re Jisas ma ixo seng e Jisas lamun önga laa.

<sup>21</sup> Io, Jisas ixo ose ine, “U maaaa lamun a lasa?”

Ma ixo tengen, “Örobo ömaraxen lo a nine barok ke e, bara idu tabo kis arixe me nöngön kölöme xö kingdom pe nöngön. Öng irabo kis kö lime tuun ma öng kö lime kes se nöngön.”

<sup>22</sup> Me Jisas ixo tengen te idiet, “Muot mo köbo ösöxö a lasa niang muot mo eka ose ulamun. I eöt bere mu morobo inim kö tubon möxö kinadik niang e rabo inim könan?”

Idu toxo balu ine bira, “Maa me eöt.”

<sup>23</sup> Jisas ixo tengen te idu, “I turunon, mu morobo kip a kinadik nang e rabo kip, ma lamun tua kinis kö lime tuun bara xö lime kes, kaim bara laa re e ra inerabaa min. Ina laa na a laa re Tata re e. Ine iat irabo isik inabo kinis kö nangadi niang ixoro tagur sik inabo kinis se idi.”

<sup>24</sup> Io, nang a sangaun ne bak ne ausu xabise toxo ölangen bira, idi toxo bala kadik kö idu narön.

<sup>25</sup> Io, Jisas ixo kuwe arixin idi ma ixo tengen te idi, “Mum mo ösöxö sik bara ewe me idi niang kaim bara abo Judeia, abo sisila re idi tobo ii öraxin idi iat ma tobo pere ösu a nangadi xabise. Mabo orong ke idi tobo kure xöbanin idi.

<sup>26</sup> Ina mangana magingin na i bele kis kaluluonin e mum, ma lamun ewe niang i maaaa ra ii öraxin ine iat kaluluonin e mum, ine irabo tultul te mum.

<sup>27</sup> Me ewe niang i maaaa rua tinuu sila, ine irabo tödi tinörön tataun mon te mum,

<sup>28</sup> xarnang a Barok kö Tödi bölök ine i kobo wanot bara a nangadi tabo tultul te ine. Kaim. Ine ixo wanot tua tultul te idi, ma bara irabo isik a to re ine ra xukun puxus a oleleng ne nangadi.”

*A nine marapulo toxo wawara  
(Mak 10.46-52; Luk 18.35-43)*

<sup>29</sup> Nang e Jisas mabo bak ne ausu re ine toxo wan lie e Jeriko, a marakörö raxin toxo muu ine.



<sup>30</sup> A nine tödi marapulo toxo kisisik kö lawana ngas, ma niang idu toxo ölangen bere Jisas ixo önan saxit, idu toxo kup, "Orong, Barok kö marapun te Dewit, örö marase e maa!"

<sup>31</sup> A marakörö niang toxo tenge laie re idu ma toxo tengen te idu rua ödödö, nexalik bere idu toxo kup taxin belexim, "Orong, Barok kö marapun te Dewit, örö marase e maa!"

<sup>32</sup> Io, e Jisas ixo tuu ma ixo kuwe idu. Jisas ixo ose idu, "Mu mo maaaa bara e ra pet te lasa re mu?"

<sup>33</sup> Idu toxo balu ine, "Orong, maa me maaaa ra winawara baling."

<sup>34</sup> Jisas ixo marase idu ma ixo tön a nine marana idu. Saxit mon, idu toxo öt ta winara me idu toxo muu ine.

## 21

*Jisas ixo laxa Jerusalem xarnang a king  
(Mak 11.1-11; Luk 19.28-40; Jon 12.12-19)*

<sup>1</sup> Nang e Jisas mabo bak ne ausu re ine toxo wanot lörörö Jerusalem, idi toxo ot to Betepage me Betani xö Maii Olip. Io, Jisas ixo tile a nine bak ne ausu,

<sup>2</sup> ma ixo tengen tidu bara, "Mu moro wan urungan kö lagunon mesila re mu, ma saxit mon mu morobo pere a önga dongki te kubus sik ine e, arixe ma barok ke ine. Mu morobo palas tewe idu ma morobo lamus ot idu ura re e.

<sup>3</sup> Niang bara önga tödi i ose ulamunon, mu morobo tengen te ine bara, 'A Orong i maaaa ulamun idu.' Io, saxit mon irabo isik tewe idu."

<sup>4</sup> Io, a na ixo ot tua öturunon abo tinenge xö propet:

<sup>5</sup> *"Tengen kö balik ke Saion,*

*'Pere, a king ke mum i önan pösöt e mum,*

*a tödi ödödö i xisxisin nanin önga dongki.*

*I kisisik kö dongki lik, a barok kö önga dongki.' "*

<sup>6</sup> Me idu toxo wan lo ma toxo pet xarnang e Jisas ixoro tengen te idu.

<sup>7</sup> Io, idu toxo lamus ot ina dongki arixe ma dongki lik, me idu toxo parawe abo man ömat te idu lömö xönan, me Jisas ixo kis kaa xönan.

<sup>8</sup> A marakörö raxin saxit toxo kip tewe abo xinaxain te idi ma toxo parawe xö ngas, ma dauleng toxo tee abo axana iaa xöbo uno iaa ma toxo parawe nanin kö ngas.

<sup>9</sup> Abo marakörö nang toxo wan sila re ine ma ewe midi nang toxo muu toxo xukup bira,

*"Axabe a Barok kö marapun te Dewit!"*

*"God irabo wadöane a öng nang i wanot tua wewet eörin a maaaa xö Orong!"*

*"Axabe e God uruso lömö saxit!"*

<sup>10</sup> Nang e Jisas ixo laxa Jerusalem, a marakörö xirip kina xönö lagunon taxin toxo kup ma toxo ose, "Ewe ine?"

<sup>11</sup> Abo marakörö toxo balu, "Ine e Jisas, a propet mee Nasaret kölöme Galili."

*A gunon lotu re God*

*(Mak 11.15-19; Luk 19.45-48; Jon 2.13-22)*

<sup>12</sup> Jisas ixo laxa xö xönö möxö gunon lotu raxin ma ixo bat ösu xirip ewe midi nang toxo xuxuxun ma toxo mismisik kölöme. Ine ixo puxus lubeng abo öra xö nangadi nang tobo kulas tuluwok mabo öra möxö kinis se nangadi nang tobo mismisik ma bunu.

<sup>13</sup> Ixo tengen te idi, "A tingenge re God nang toxo geet i tengen bira, 'A gunon te e tabo tengen ine ma gunon ne sineseng.' Inexalik bara mum iat mum mo pet ine xarnang 'a gunon ne minun möxö nangadi pinilo.' "

<sup>14</sup> Abo marapulo ma abo xexe saban toxo wanot urungan kö gunon lotu raxin, ma ixo ölanglanga idi.

<sup>15</sup> Ma lamun abo pris tataxin mabo tene ausu möxöbo warkurai te Moses, toxo bala kadik sik kine nang toxo pere abo lalaa deek arixe ine ixo pet, ma a bung baroxorok toxo xukup kö ina xönö möxö gunon lotu raxin, "Axabe a Barok kö marapun te Dewit."

<sup>16</sup> Idi toxo ose ine, "Nöngön u ölangen a lasa nang a bung baroxorok te rengrengen?"

Jisas ixo balu idi, "Maa. Bule, mum kobola kos ina tingenge re God? I tengen bira, 'U tagur sik a bung baroxorok lixilik me idi ewe angen te rutus, bara idi tabo ii öraxin nöngön.'

<sup>17</sup> Ma ixo wan lie idi ma ixo wan tewe xalik a lagunon taxin uri Betani, nang ke ine ra pinaluso.

*Jisas ixo köö a uno löwö*

*(Mak 11.12-14, 20-24)*

<sup>18</sup> Xö puxu bubung, nang ixo önan baling uruso xö lagunon taxin, ixo irilöng.

<sup>19</sup> Nang ixo pere a uno löwö xö lawana ngas, ixo wanot lörörö xina uno iaa me ine ixo parasiwin bara kaim a pasuno, a labana xalik mon. Io, ixo tengen te ine, "Me nöngön ökorobo o baling ke pasuno iaa!" Saxit mon, ina uno iaa ixo manga.

<sup>20</sup> Nang abo bak ne ausu toxo pere bira, toxo wuwus saban. Idi toxo ose, "Bule a uno iaa na i manga saxit mon?"

<sup>21</sup> Jisas ixo balu idi, "Turunon saxit, nang bara mum ma nunu ma mo köbo nini dinödöm, mum morobo pet a lasa te pet kö ina uno iaa, lamun mum morobo eöt bölök ka

rengrengen kö puot na bira, 'Örö taru mera ma örö wan su uruo xö rasi,' io, God irabo tabaa e mum min.

<sup>22</sup> Nang bara mum morobo nunu, mum morobo kip lo a lasanene mum mo seseng ulamun."

*Jisas ixo kip lo a lölös se ine mole  
(Mak 11.27-33; Luk 20.1-8)*

<sup>23</sup> Io, Jisas ixo wan laxa xö xönö möxö gunon lotu raxin. Nang abo pris tataxin mabo sisila toxo ot pösöt ine, idi toxo ose ine bira, "U kip lo ina ese raxin na mole nang nöngön u döxömen bere i töxödös se nöngön ta wewet inabo lalaa na? Me ewe i tabaa nöngön mina lölös na?"

<sup>24</sup> Jisas ixo balu idi ma ixo tengen, "E rabo ose e mum ma önga ineose bölök. Nang bara mum morobo balu e, io, e rabo tengen te mum a lölös sa nang e wewet inabo lalaa na min.

<sup>25</sup> A baptais se Jon, ine i wanot mole? Meriso lömö re God, bara mera xö nangadi mon?" Idi toxo wöwörö min kaluluonin idi iat ma toxo tengen, "Nang bara ire te tengen bara, 'Meriso re God,' me ine irabo ose ire bara, 'Ma ruasa me mum koxobo nunu re ine?"

<sup>26</sup> Me ire takarabo tengen, 'Möxö nangadi mon'. Ire te burin a nangadi, möxösa, idi te nunu bere Jon a propet."

<sup>27</sup> Io, idi toxo balu e Jisas, "Mem kobo ösöxö."

Jisas ixo tengen te idi bara, "E bölök e karabo tengen te mum ewe i isik ina lölös na re e ra wewet inabo lalaa na."

*A nine barok*

<sup>28</sup> "Mum mo dökömen bule? A önga tödi ewe ine ma nine barok. Ine ixo wan urungan kö sisila ma ixo tengen, 'Barok ke e, wan ma örö rörörön nixinen kö komo wain.'

<sup>29</sup> "A barok ixo tengen, 'E mölök.' Lamun melamu ine ixo puxus a dinödöm pine ma ixo wan.

<sup>30</sup> "Io, a tamadu ixo wan urungan kö önga barok kabise rine ma ixo tengen bölök kine. Ine ixo tengen, 'E rabo rörön,' lamun ine kaim kö nuan.

<sup>31</sup> "Ewe ridu i pet eörin a lasa a tamadu i tengen?"

Idi toxo balu, "A sisila ne barok."

Jisas ixo tengen te idi, "Turunon saxit, abo tene kip takis mabo ilawa te önan laxa sila xö kingdom kö God kalik e mum.

<sup>32</sup> Möxö, e Jon a tene baptais ixo wanot tua osten e mum ma ngas ne kinis töxödös, ma kaim e mum pa nunu re ine, ma lamun abo tene kip takis mabo ilawa toxo nunu. Ma turunon bara mum moxo pere bölök idi, ma kaim iat e mum pua dinödöm puxus ma nunu re ine."

*Abo tene balaure komo wain  
(Mak 12.1-12; Luk 20.9-19)*

<sup>33</sup> Jisas ixo tengen tö idi bira, “Mum moro ölangen a önga tingenge öwuo bölök. A önga tödi ine a tamana pu ewe ixo sulo a komo wain, ine ixo kut pi ma tabörö. Ma ixo kin a mara möxö wawas ömeme a pasuno wain, ma ixo timet öxaa a warawat ma ixo pet a walpali rua werwere muu a komo wain. Io, ine ixo isik ina komo wain urungan köbo duöng kua tinörön könan ma ixo wan lo bang kö nuan ömat saxit.

<sup>34</sup> Ma nang a axana bung möxö dixidik a pasuno wain ixo wanot, ine ixo tile abo tene tinörön tine urso xöbo tene werwere muu wain ta xikip lo rebo pasuno wain tine.

<sup>35</sup> “Abo tene werwere muu möxö komo wain toxo töndik abo tene tinörön te ine, me idi toxo dangat a öng, ma toxo sexomet a öng kabise, ma toxo teng a öng nang ixo narun mine.

<sup>36</sup> Melamu, ine ixo tile öbaling a öngabo tene tinörön kabise urso ridi, a oleleng belek ke idi nang toxo sila. Ma abo tene werwere muu a komo wain toxo pet biringanin idi bölök.

<sup>37</sup> Ma melamu re idi xirip im, ine ixo tile a barok kine urungan tidi. Ine ixo tengen bira, ‘Idi tabo ii a barok ke e.’

<sup>38</sup> “Lamun nang abo tene werwere muu a komo wain toxo pere a barok, idi toxo tengen kö öngöng kaluluonin idi iat bara, ‘Ina tödi niang i öt ta unan lo ina komo wain te tamana umelamu. Go, ire ta sexomet ine, ma ta kip lo abo lalaa re tamana.’

<sup>39</sup> Io, idi toxo lamus lo ine ma toxo tewé ösu ine xalik a komo wain, ma toxo sexomet ine.

<sup>40</sup> “Io, niang a tamana komo irabo wanot, ine irabo pet a lasa urungan köbo tene balbalaure möxö komo wain?”

<sup>41</sup> Idi toxo tengen, “Ine irabo se ögarin inabo duöng saban na, me ine irabo isik a komo wain köbo tene balbalaure xabise rua werwere muu, ma bara a axana bung möxö dixidik a pasuno wain irabo wanot, idi tabo isik öbaling kebo pasuno wain maruxo urungan tine.”

<sup>42</sup> Jisas ixo tengen te idi, “I deek bara mum morobo döxömen abo tingenge re God niang toxo geet bara,  
*‘A wat nang abo tene pet gunon toxo kumamaa lamun,  
 möxösa, idi toxo döxömen bara a laa tataun,  
 i wawara bara ine belek im a lölös möxö unine gunon kirip.  
 A Orong iat i pet ot ina laa na,  
 me ire te pere ma lak deek saxit kö winara re ire.’*

<sup>43</sup> “Io, na e tengen te mum bara a kingdom kö God irabo wan pes xalik e mum ma irabo isik kö nangadi ewe idi tobo rörörön eöt ma maaaa re God.

<sup>44</sup> Me ewe nang i subu xö ina wat irabo tawörök lixilik, nexalik ine irabo pörök ke öng nang bara i subu lömö rine.”

<sup>45</sup> Nang abo pris tataxin mabo Parasi toxo ölangen ina tingenge öwuo re Jisas, idi toxo ösöxö sik bara ixo wöwörö lamun idi.

<sup>46</sup> Idi toxo wawara siwin te ngas sua rörön dik e Jisas, ma lamun idi toxo burin a marakörö, möxösa, a nangadi toxo nunu sik bara ine a propet.

## 22

*A nien möxö alolo maxat*  
(Luk 14.15-24)

<sup>1</sup> Jisas ixo tengen öbaling kidi xö tingenge öwuo, ma ixo tengen bara,

<sup>2</sup> "A kingdom möxö watmaep i xarnang a önga king nang ixo tagur sik a nien taxin ne alolo lamun a barok ke ine.

<sup>3</sup> Ixo tile abo tene tinörön te ine urungan tidi ewe ixoro pixe sik ka inot kö nien taxin ta rengrengen tidi ra nuanot, lamun idi kaim a nuanot.

<sup>4</sup> "Melamu, ixo tile a dauleng ne tene tinörön ma ixo tengen, "Tengen te idi nang ewe e xoro seng idi ra nuanot bara e xoro tagure a nien te e. E re sewe abo bulmakau ebobot nang e xo tabaa öraxin idi, ma abo laa xirip iri tagur sik. Mum moro miang ura xö nien taxin ne alolo."

<sup>5</sup> "Lamun idi toxo kaes tewe ma toxo wan elixilik. A önga tödi ixo wan urungan kö komo re ine, ma öng kabise ixo wan urungan köbo tinörön te ine.

<sup>6</sup> Me idi a uleng kabise toxo tödik abo tene tinörön te ine, ma toxo eler idi ma toxo sexomet idi.

<sup>7</sup> Ina king ixo laie. Ma ixo ugunan abo umri re ine ma toxo sexomet tewe idi abo tene inarsexomet ma toxo söngöt a lagunon taxin te idi.

<sup>8</sup> "Io, ixo tengen köbo tene tinörön te ine, 'A nien taxin ne alolo i tagur sik, nexalik ewe midi e xo seng idi tekobo maaa ra nuanot.

<sup>9</sup> Moro wan urungan köbo ngusuno ngas lixilik ma moro seng idi abo subana nangadi me ewe midi bölök mo esuo midi.'

<sup>10</sup> Io, abo tene tinörön toxo wan su xöbo ngas ma toxo lamus etok a nangadi nang toxo pere lo idi xö ngas, idi abo a lak deek ma abo a lak saban bölök, ma ina gunon möxö alolo ixo wöwö xöbo osee.

<sup>11</sup> "Ma lamun nang ina king ixo wan laxa rua werwere abo osee, ine ixo pere a önga tödi kölöme ewe ixo kaim a sisige a man möxö alolo.

<sup>12</sup> Io, ixo ose ine, 'Töke, u laxa bule ra, ma u kobo sige re man möxö alolo?' A tödi kaim kö babalu ine.

<sup>13</sup> "Io, ina king ixo tengen köbo tene tinörön te ine, 'Kut dik abo limine mabo xexene ine, ma moro tewe ine uri xö

araman kö xödxödö. Ma ringan idi tabo gegee ma tabo engiren abo ngisine idi.'

14 "Möxö a oleleng e God ixo seng idi, lamun a dauleng mon irabo pere kos lo idi."

*A tatalien ne kun takis*  
(Mak 12.13-17; Luk 20.20-26)

15 Io, abo Parasi toxo wan tewe ma toxo wöwörö arixe ra uxun ine xöbo tinenge re ine.

16 Idi toxo tile abo bak ne ausu re idi arixe mabo nangadi nang toxobo mumuu e Erot urungan te Jisas. Idi toxo tengen, "Tene Ausu, mem me ösöxö sik nöngön a tödi möxö rengrengen a turunon me nöngön u bo usu a nangadi ma turunon ulamun a ngas nang e God i maaaa bara ire tabo muu. Me nöngön u kobo ösöxö ra tinuu arixe mere önga tödi xalik mon, möxösa, nöngön u kobo dödöm köba lamun abo mangana duöng sa idi.

17 Töngösen e mem ma dinödöm pe nöngön. I töxödös se ire bara tabo kun takis kö king taxin mee Rom bara kaim?"

18 Ma lamun e Jisas ixo ösöxö sik abo dinödöm saban te idi ma ixo tengen, "Mum nang mum bo röxröxö mon bara mum a lak deek, ruasa mum mu maaaa ra uxun e?"

19 Mum moro osen a tuluwok niang mum bo ukun takis min." Me idi toxo kip ot ina önga tuluwok urungan te ine,

20 me ine ixo ose idi, "Re we ina wawara na ma ese na?"

21 Me idi toxo balu bere, "Re king taxin mee Rom."

Io, ixo tengen te idi, "Mum morobo isik ke king taxin a lasa nang ke king taxin. Ma a lasa nang ke God, mum morobo isik ke God iat."

22 Niang idi toxo ölangen bira, idi toxo wuwus saban. Io, idi toxo wan kalik ine ma toxo wan lo.

*Abo minet tabo to baling*  
(Mak 12.18-27; Luk 20.27-40)

23 Xina bung iat nang a dauleng ne Sadiusi niang tobo nunu bara kaim pe tinaru baling kalik a minet, toxo ot pösöt e Jisas ma toxo ose ine bara,

24 "Tene Ausu, Moses ixo tengen te ire bira, nang bara önga tödi i met, me ine kaim ine mere barok, io, a tönö ina tödi irabo ot lamun ina möxösö ma irabo kip barok kö tönö.

25 Io, a pitnö ma ninöng ne barön kaluluonin e mem na. A sisila ixo elolo ma ixo met, ma, möxösa, kaim ine ma barok, ixo gan sik a une re ine xö tönö.

26 Ma xarnang bölök urungan kö tönö mumuu lo ine ma bie uri ot kö barok pitnö ma ninöng ke idi barön.

27 Ma melamu im, a une bölök ixo met.

28 Io, xö axana bung nang bara abo minet tabo taru baling, ine irabo une re we xö ina pitnö ma ninöng? Möxö idi xirip toxo ot lamun ine."

29 Jisas ixo tengen te idi bara, "A dinödöm pe mum i kobo töxödös, möxösa, mum kobo ösöxö sik abo tinenge re God niang toxo geet ösu, me mum kobo ösöxö sik bölök a lölös se God."

30 Xö axana bung möxö tinaru baling möxö minet, a nangadi tekarabo eöt ta inalolo. Idi tabo xarnang abo angelo meriso xö watmaep.

31 Na e rabo wöwörö lamun abo minet, nang bara idi tabo taru baling, bara kaim. I deek bara mum morobo döxömen lo a lasa niang e God ixo tengen te mum bie,

32 *'E a God te Abaram, a God te Aisak ma bara a God te Jekop.'* Ine kaim bara a God möxö nangadi minet. Kaim! Inexalik ine a God möxö nangadi to."

33 Niang a marakörö toxo ölangen bira, idi toxo wuwus saban kö ina inausu re ine.

*A warkurai nang i taxin saxit*

*(Mak 12.28-34; Luk 10.25-28)*

34 Abo Parasi toxo ot etok niang toxo ölangen bara e Jisas ixo baxut abo ngalana abo Sadiusi.

35 Öng mere idi ixobo ösöxö ödeek sik abo warkurai te Moses, ixo könönöin ine ma ina ineose na:

36 "Tene Ausu, a warkurai sa i lömö sik köbo warkurai te God?"

37 Jisas ixo balu ine, "Örobo maaaa ulamun a Orong, a God te nöngön, kö kat kirip pe nöngön, ma xö tanono e nöngön, ma xö dinödöm pe nöngön."

38 Ina warkurai na i taxin sik ma i sila xöbo warkurai kirip.

39 Ma sese öninöng i xarna na: *'Örobo maaaa lamun a öng kabise xarnang u maaaa lamun nöngön iat.'*

40 Me idu a nine unine abo warkurai kirip mabo tinenge möxöbo propet."

*A Mesaia ine a bak ke Dewit*

*(Mak 12.35-37; Luk 20.41-44)*

41 Niang abo Parasi toxo ot etok arixe, Jisas ixo ose idi,

42 "Mum mo dödöm bule lamun ina Mesaia? Ma a barok kewe ine?"

Idi toxo balu ine, "A barok tubuno e Dewit."

43 Ma ixo tengen te idi, "Bara bule im bere Dewit ixo kip lo abo tinenge möxö Töxödös ne Tanono ma ixo tengen ina Mesaia bara 'Orong'? Möxö ixo tengen bira,

44 *'God a Orong ixo tengen kö Orong ke e bara:*

*"Nöngön örö kis kö lawa tuun te e*

*ot nang e rabo bulus abo iuo re nōngön kö ene xexem.” ’*

<sup>45</sup> Io, nang bara i tengen ine me ‘Orong,’ bule nang bara ine a Mesaia ma irabo tubuno e Dewit bölök?”

<sup>46</sup> Kaim pe öng ka eöt tua tengen te tinenge ne babalu. Ma urulo xina bung na, abo tödi xabise toxo buut tua ose öbaling ine merebo ineose bölök.

## 23

*Jisas ixo öbulubun abo sisila ne lotu*

*(Mak 12.38-40; Luk 11.39-44, 46, 52; Luk 20.45-47)*

<sup>1</sup> Io, Jisas ixo tengen kö marakörö mabo bak ne ausu rine:

<sup>2</sup> “Abo tene ausu möxöbo warkurai te Moses mabo Parasi, idi iat tobo palas ömaras abo warkurai te Moses.

<sup>3</sup> Io, mum morobo mana tame idi me mum morobo mumuu abo lalaa xirip nang idi tobo rengrengen te mum. Lamun, mum bele pet te laa niang idi te pet, möxösa, idi tekobo wewet eörin a lasa idi te etöngösen min.

<sup>4</sup> Io, idi te kubus öxaa abo lalaa tiip ma te bulbulus idi xö inöno nangadi, lamun idi iat tekebeöt ta mamaa rua ii öxaa re önga sixsixine limine idi rua sölsölök inabo tiip.

<sup>5</sup> “Abo lalaa xirip idi te pet, idi te mamaa bara ire a nangadi tabo pere bara tabo ii idi. Mum mo maras köbo tatalien te ire xöbo xanaxait lixilik. Ire tobo bulbulus a dauleng ne warkurai te God kölöme xönan. Me ire tobo xuxut dik inabo xanaxait köbo piniene ire. Ma lamun abo xanaxait te idi i taxin köba. Me ire tobo bulbulus bölök abo uno kililöng köbo man te ire rua ödöxömen ire rua mumuu inabo warkurai. Ma lamun abo kililöng ke idi iat i ömat köba.

<sup>6</sup> Idi tobo mamaa rua xikip lo a kinis deek kö axana bung möxö nien tataxin ma tobo werwere kos lo abo kinis deek kölöme xö gunon ne siniseng.

<sup>7</sup> Tobo mamaa bara tabo xukuwange idi xö boxönö möxö mismicik, ma bara nangadi tabo kuwe idi ‘Tene ausu.’

<sup>8</sup> “Inexalik bara i kobo deek ka rengrengen e mum bara a ‘Tene ausu’, möxösa, öng mon a Tene Ausu re mum, me mum kirip abo barön.

<sup>9</sup> Me mum bele tengen ‘Mama’ xere öng kö öxöno lagunon, möxösa, ine xalik mon a Mama re mum, me ine i xisixis siso xö watmaep.

<sup>10</sup> Ma i kobo deek ka rengrengen te öng ke mum bara a ‘Tene sisila’, möxösa, öng mon a Sisila re mum, a Mesaia.

<sup>11</sup> A tödi raxin kaluluonin e mum, ine irabo tultul kö pu re mum.

<sup>12</sup> Ewenene niang i ii öraxin ine iat, God irabo ii ösu ine. Me ewenene niang i ii ösu ine iat, God irabo ii öraxin ine.



13 “A maris se mum, abo tene ausu möxöbo warkurai te Moses mabo Parasi, mum nang mum bo röxröxö mon bara mum a lak deek, irabo saban te mum! Mum bo babaxut pi a nangadi niang idi te mamaa rua nilaxa xö kingdom möxö watmaep. Me mum iat, mum kala laxa, ma lamun niang bara a nangadi te eka nilaxa, mum bo wewet pi a ngas se idi.

14 [A maris se mum, abo tene ausu möxöbo warkurai te Moses mabo Parasi, mum nang mum bo röxröxö mon bara mum a lak deek! Mum bo ilo abo lalaa möxöbo möxösö me mum bo osesen mabo sineseng ömat te mum. Möxö ina na, God irabo ömokorot xöba e mum.]

15 “A maris se mum, abo tene ausu möxöbo warkurai te Moses mabo Parasi, mum nang mum bo röxröxö mon bara mum a lak deek! Mum bo önan eli xö rasi ma xö boxönö xirip pua xikip lo a öng kalik mon bara irabo muu a inausu re mum. Me mum mo eöt tua nilaxa xö ia sösöt. Ma lamun nang bara ine a bak ne ausu re mum im, irabo eöt tunon tua nilaxa xönan, möxösa, ibo mumuu e mum.

16 “A maris se mum, mum abo marapulo! Mum bo rengrengan bara, ‘Niang bere re öng i ösugurno xö gunon lotu raxin, ina niang i laa tataun mon. Ma lamun niang bara re öng i ösugurno xö gol möxö gunon lotu raxin, ina niang ine irabo mana pet a lasa ixoro sugurno min.’

17 Mum abo marapulo wawao! Nangang sa i taxin sik, a gol bara a gunon lotu raxin mon niang i pet a gol i madakdak urungan kö God?

18 Mum mo tengen bölök bira, ‘Niang bere ewenene re öng i ösugurno xö alta, ina niang i laa tataun mon, ma lamun bere ewenene re öng niang i ösugurno ma arabaa xönan, ine irabo pet eörin kirip abo ösugurno re ine.’

19 Mum abo duöng pulo! Nangang sa i taxin sik, a arabaa bara a alta niang ibo wewet a arabaa i madakdak urungan kö God?

20 Inexalik, ewe niang i ösugurno xö alta, i ösugurno bölök köbo lalaa xirip lömö xönan.

21 Me ewenene niang i ösugurno xö gunon lotu raxin, i ösugurno bölök könan ma xö ewe a öng niang i kisisik könan.

22 Me ewenene niang i ösugurno xö watmaep, i ösugurno urso xö kinis se God ma xö öng niang i kisisik könan.

23 “Maris, irabo saban te mum abo tene ausu möxöbo warkurai te Moses mabo Parasi, mum nang mum bo röxröxö mon bara mum a lak deek! Mum bo susulo abo lalaa möxö pet önamien a nien, xarniang a lobo, laie ma a kari. Ma xarniang a warkurai te Moses i tengen, mum bo erimine xö sangaun ne xönö me mum bo isik a öng urungan

te God. Ma lamun mum kobo muu abo warkurai nang a lak taxin. Mum kobo muu a tatalien töxödös kö nangadi, ma kaim e mum ma a abalamu, ma kaim pe turunon kö to re mum. Io, irabo töxödös niang bara mum moxoro isik abo lalaa urso re God, me mum kobo lön bölök kua mumuu a tatalien deek.

<sup>24</sup> Mum abo tene sisila, abo marapulo e mum! Mum bo dödöm köba lamun abo warkurai lixilik me mum bo talu abo warkurai taxin. Mum mo xarniang a önga tödi i kuluwo rua ininim. I döxömen im bara a nölnöl ma i kip tewe xalik a ari. Ma lamun i könöm kas baling im a önga bulmakau!

<sup>25</sup> “A maris se mum, abo tene ausu möxöbo warkurai te Moses mabo Parasi, mum nang mum bo röxröxö mon bara mum a lak deek! Mum morobo gis ömaras a araman möxö kap ma dis, ma lamun a könönö idi i wöwö ma tatalien ne mamaa lamun a oleleng ne lalaa ma a mamaa möxö aneek.

<sup>26</sup> Mum abo Parasi abo marapulo! Sila morobo ömaras a könönö kap ma dis, ma melamu a araman bölök irabo maras.

<sup>27</sup> “A maris se mum, abo tene ausu möxöbo warkurai te Moses mabo Parasi, mum nang mum bo röxröxö mon bara mum a lak deek, irabo saban te mum! Mum mo xarniang a lieng möxöbo minet niang te tos öpidien niang i wawara mariris kö araman ma lamun kö könönö i wöwö ma siine nangadi minet mabo lalaa xirip a lak biling.

<sup>28</sup> Xarna na mon te mum, mum mo osen bara mum mo töxödös kö wawara xö nangadi. Inexalik bara kölöme re mum i wöwö ma tatalien möxö atöxö ma tabuno tame warkurai.

<sup>29</sup> “A maris se mum, abo tene ausu möxöbo warkurai te Moses mabo Parasi, mum nang mum bo röxröxö mon bara mum a lak deek, irabo saban te mum! Mum bo ömar ödeek abo midi möxöbo propet ma mobo ögigilien inabo maöt möxöbo tene töxödös.

<sup>30</sup> Me mum bo rengrengan bara, ‘Nang bere ire toxoro to xöbo axana bung möxöbo untubuno ire, io, ire tekebeöt tua top pa sesexomet abo propet.’

<sup>31</sup> Io, mum mo tengen ömaras baling im pe mum bara mum abo tubuno idi ewe niang idi toxo sexomet abo propet.

<sup>32</sup> Io, i wawara sik bara turunon bara mum morobo öxawam abo sasaban nang abo untubuno mum toxo ösubanain sik!

<sup>33</sup> “Mum abo tene atöxö! Mabo untubuno e mum bölök bie! Mum kebeöt turunon iat bara mum morobo pas ina ömokorot taxin niang kölöme xina ia sösöt.

<sup>34</sup> Inexalik, e rabo tile rebo propet, dauleng abo tene nanase, ma dauleng abo tene ausu. Ma dauleng mere idi, mum morobo sexomet lömö xö öxöno sölöxöröp, ma

dauleng mum morobo dangat idi kölöme xöbo gunon ne sineseng. Me mum morobo mumuu nanin idi rua wewet ökinadik idi xöbo lagunon öngöng.

<sup>35</sup> Io, niang mum morobo sexomet idi xirip nang abo tene töxödös möxö ina öxöno lagunon, a aömokorot irabo kip e mum. Me mum moxo sexomet abo tene töxödös, urulo re Abel urungan te Sekaraia, a barok ke Berekia, ewe niang mum moxo sexomet ine kaluluon kö gunon lotu raxin ma xö alta.

<sup>36</sup> Turunon saxit, a xunuxun möxöbo tatalien saban kirip na irabo wanot pösöt ina marakörö mee nixinen.

*Jisas ixo marse xöbanin idi mee Jerusalem  
(Luk 13.34-35)*

<sup>37</sup> Jisas ixo tengen, "Mum mee Jerusalem, maris se mum! Mum bo sesexomet abo propet me mum bo reteng idi nang e God ibo tile idi ura re mum. A oleleng ne axana bung e bo maaaa bara e rabo töndik lo e mum xarnang a nene xixök ibo böböng pi a bung barok kine ma nine wawono. Inexalik mum kobo maaaa bie.

<sup>38</sup> Pere bang! Ina lagunon te mum irabo saban ma irabo malaa tataun, ma morobo pet bule?

<sup>39</sup> Io, e tengen te mum, mum mo kebeöt ta pere öbaling e ot kö axana bung niang mum morobo tengen bara, 'God irabo pet ödeek ina tödi niang ewe irabo wanot ta wewet eörin a maaaa xö Orong.' "

## 24

*Abo uxileng kö axana bung möxö xakawöm  
(Mak 13.1-31; Luk 21.5-36)*

<sup>1</sup> Jisas ixo önan kalik a gunon lotu raxin ma abo bak ne ausu rine toxo wan pösöt ine ma toxo maaaa ra osen ine ma mangana winara möxöbo gunon.

<sup>2</sup> Ixo ose, "Mum moro pere xirip abo lalaa na? Turunon saxit, kaim pe önga wat ta irabo kis lömö xö önga wat kabise. Idi tabo öbeng ösu xirip."

<sup>3</sup> Ma nang bere Jisas ixo kisisik kiso xö Maii Olip, abo bak ne ausu xalik mon toxo ot pösöt ine. Idi toxo tengen tö ine, "Örö tengen te mem bara lause inabo lalaa na tabo ot kö inabo gunon, ma sa irabo ot ta uxileng e mem kö nuanot baling ke nöngön ma xö axana bung möxö xakawöm?"

<sup>4</sup> Me Jisas ixo balu idi bira, "Mum morobo balaure e mum, kalik ke öng ibo töxö lo e mum.

<sup>5</sup> Möxö a oleleng tabo wanot ma tabo tengen bara idi te wanot kö esene e, ma bere, 'E mon ina Mesaia.' Me idi tabo töxö lo a oleleng.

<sup>6</sup> Mum morobo ölangen ulamun abo inarse rataxin ma ulamun abo tinenge lamun abo inarse rataxin, nexalik mum bele buut. Abo mangana lalaa na irabo ot, lamun a xakawöm angen i kala ot bang.

<sup>7</sup> Abo kantri tabo erese ma abo kantri. Mabo kingdom tabo erese mabo kingdom. Ma xöbo dauleng ne boxönö, a irilöng taxin irabo ot, mabo gie bölök.

<sup>8</sup> Inabo lalaa xirip na abo urulo möxö kinadik kö une ibo eka kip barok.

<sup>9</sup> "Io, idi tabo isik e mum kö limedi rua eler e mum ma ra sesexomet e mum, ma abo kantri xirip tabo samuk e mum, möxösa, xö eseke.

<sup>10</sup> Xinabo axana bung a oleleng tabo tawuxus tewe xalik a nunu ma tabo bulus idi xöbo limine abo iuo ma tabo esamuk kaluluonin idi iat.

<sup>11</sup> Ma oleleng ne propet röxröxö tabo wösö ot ma tabo töxö lo a oleleng.

<sup>12</sup> Ma a maaa xöbo oleleng ne nangadi saxit irabo kaim, möxösa, a tatalien saban irabo wan kaa.

<sup>13</sup> Lamun ewe nang i tuu lölös sik urungan kö xakawöm, God irabo öro ine.

<sup>14</sup> Ma tabo tengen osen a tinenge deek möxö kingdom kö boxönö lagunon kirip pua ömaras abo kantri xirip. Bara abo laa xirip irabo kawam, melamu a xakawöm kö ina to na irabo wanot.

<sup>15</sup> "Mum morobo pere *ine nang i saban köba, nang ibo ögat lagunon*, i tuu sik kö xönö madakdak. Ina na nang e propet Daniel ixoro wöwörö sik min. (Me ewe i kos ina ginigeet na, irabo maras kö unine möxö ina na.)

<sup>16</sup> I deek bara a nangadi nang te xisixis Judeia xina bung, tabo ulo urso xöbo maii.

<sup>17</sup> Ewe a öng nang i kisisik lömö xö öxöno gunon te ine, ganim bara i kaa su ra xikip ösu rewe rebo mangana lalaa xalik a gunon.

<sup>18</sup> Me ewenene nang i xisixis siso xö komo, ganim bara i su uri xö gunon ta xikip lo re xönö man te ine.

<sup>19</sup> Irabo laa ne maris köbo une nang te tienen, me idi nang te urus barok kö inabo bung na.

<sup>20</sup> Mum morobo seseng bara a nuan te mum i bele ot kö axana bung möxö labur bara xö bung Sabat.

<sup>21</sup> Möxösa, niang im irabo önga purpuruan taxin, i karabo eöt ma nang möxö urulo möxö öxöno lagunon ot na. Ma melamu, kaim pe tiip bira irabo wanot baling.

<sup>22</sup> Ma nang bara Orong i kobo se öwuruwut inabo bung niang, kawaim pe öng irabo to. Ma lamun ine irabo se öwuruwut abo bung kua rorop idi nang ixo pere kos lo.

<sup>23</sup> Kö ina bung niang, nang bara öng i tengen te mum, 'Moro pere, a Mesaia ine na,' bara, 'A Mesaia ine niang,' ganim e mum pa nunu xönan.

<sup>24</sup> Möxö idi abo mesaia röxröxö mabo propet röxröxö, idi tabo wanot. Ma tabo pet ot abo uxileng tataxin mabo mangana lalaa lölös ne auwuwus sua röxröxö lo a nangadi niang God ixoro pere kos lo, nang bara idi te eöt tua röxröxö lo idi bira.

<sup>25</sup> Pere bang, e xoro tengen ösila sik ke mum köbo lasanene nang irabo ot te mum.

<sup>26</sup> "Io, nang bara re öng i tengen te mum, 'Ine niang iri ot no xö xönö tataun,' me mum bele wan uxe. Ma nang bara re öng i tengen te mum, 'Ine iang kölöme xö könönö gunon,' ganim e mum pa nunu xönan.

<sup>27</sup> Ma xarnang a siek nang i ot merso lömö ma urungan bölök kö xaken ibo susu e, a Barok kö Tödi irabo wanot bölök bira.

<sup>28</sup> Xöbo xönö sa nang abo minet könan, abo tago tabo oretok ee.

<sup>29</sup> "Kebeöt ta ömat mon melamu xinabo bung ne purpu-ruan,

*'a xaken irabo ködö,*

*ma texe i kebeöt ta bibio,*

*ma abo tii tabo subu meriso xö balana kubu,*

*ma abo lalaa lölös meriso xö mango irabo mamagi.'*

<sup>30</sup> "Kö ina axana bung niang im, a uxileng kö Barok kö Tödi irabo wösö ruso xö balana kubu, ma abo kantri möxö öxöno lagunon tabo gee. Idi tabo pere *a Barok kö Tödi irabo wanot kö kubu möxö mango,* arixe ma lölös ma a mariris taxin.

<sup>31</sup> Ma irabo tile abo angelo arixe ma *tauu raxin ta kinup,* me idi tabo lamus etok a nangadi rine nang ixo pere kos lo. Abo angelo tabo lamus etok idi möxö nit ne marana xiki, möxö önga ngusuno xönö merso xö balana kubu urungan kö öng kabise.

<sup>32</sup> "Io na, mum morobo kip inausu xalik a uno fik. Nang bara abo labana te subun kaa ma i tawalas, mum morobo ösöxö bara a axana bung möxö xaken iri lörörö rua inot.

<sup>33</sup> Xarnang iat mon, nang e mum mo pere inabo lalaa na te orot, mum morobo ösöxö bara ina axana bung iri lörörö rua inot, nang mon kö marame möxö nuan laxa.

<sup>34</sup> Turunon saxit, ina nangadi nang tabo pere inabo lalaa na, tekebeöt ta minet bang, ot nang abo lalaa na xirip irabo ot.

<sup>35</sup> A balana kubu ma öxöno lagunon irabo wan tup, nexalik bara a tinenge re e, i kebeöt ta xakawöm.

*Kaim pe öng i ösöxö bara lause e Jisas irabo baling  
(Mak 13.32-37; Luk 17.26-30, 34-35)*

<sup>36</sup> “Ma kawaim pe öng i ösöxö sik ina bung, bara a axana bung tunon, nang abo lalaa irabo wanot. Abo angelo niso xö watmaep tokobo ösöxö, ma a Barok iat bölök, i kobo ösöxö. Lamun e Mama xalik mon i ösöxö.

<sup>37</sup> A nuanot kö Barok kö Tödi irabo xarnang abo bung ke Noa.

<sup>38</sup> Xöbo bung nang kaim bang kö tait taxin, a nangadi toxobo aan, toxobo ininim, ma toxobo laxlaxa xöbo alolo ot kö bung nang e Noa ixo wan laxa xö mön taxin.

<sup>39</sup> Me idi kaim a ösöxö lamun te lalaa bara irabo wanot ot kö tait taxin ixo ot ma ixo kip tewe idi xirip. Irabo bie bölök nang a Barok kö Tödi irabo wanot.

<sup>40</sup> A nini tödi idu tabo rörörön kölöme xö komo. Tabo kip lo a öng ma tabo gan sik a öng.

<sup>41</sup> A nini une idu tabo xuxu abo irine wit. Tabo kip lo a öng ma tabo gan sik a öng uxe.

<sup>42</sup> “Io, mum morobo mana tagur sik, möxösa, mum kobo ösöxö xö bung sa a Orong ke mum irabo ot.

<sup>43</sup> Ma lamun e mum moro dökömen ödeek a na. Nang bara tamana gunon ixere ösöxö bara xö axana bung sa xö dömön a tödi pinilo irabo wanot, io, ine irabo mana werwere muu sik a gunon te ine ma i kebeöt ta ömaraxen a gunon te ine bara tabo pörök ölaxa.

<sup>44</sup> Io, mum morobo mana tumarang, möxösa, a Barok kö Tödi irabo wanot kö axana bung nang mum kobo dökömen bara irabo wanot könan.

*Tabo kis töxödös sik öt nang Jisas irabo baling  
(Luk 12.41-48)*

<sup>45</sup> “Me ewe iat im ina öng nang a tene nanase ma a tultul turunon ine? Ine nang a orong ixoro bulus ine bara irabo balaure abo tene tinörön kabise kölöme xö gunon tine rua tabaa ödeek idi ma nien.

<sup>46</sup> Irabo deek kö ina tultul ewe nang a orong ke ine i wanot ma i pere bara i wewet bira.

<sup>47</sup> Turunon saxit, ine irabo bulus ine rua balbalaure xirip abo lalaa re ine.

<sup>48</sup> Ma lamun nang bara ina tultul a lak lön, irabo tengen öbaling ke ine iat, ‘A orong ke e irabo kis tewe xö axana bung ömat,’

<sup>49</sup> io, irabo urulo ra sese abo tene tinörön kabise ma irabo aan ma ininim arixe mabo tene ininim.

<sup>50</sup> Io, a orong ke ine irabo wanot kö bung nang ine i kobo dökömen sik bara irabo ot könan ma xö axana bung nang i kobo ösöxö bara irabo wanot.

<sup>51</sup> Ina orong ke ine irabo tee ölixilik ine ma irabo tewe ine urungan kö xönö möxö kinadik arixe mabo tene röxröxö, nang kingan idi tabo gegee ma tabo engiren abo ngisine idi.”

## 25

### *A sangaun ne une*

<sup>1</sup> “Io, xina bung na a kingdom möxö watmaep irabo xarnang a pii möxö sangaun ne une ewe nang toxo kip lo abo bibio ridi ma toxo wan ta susuo ma tödi inalolo maxat.

<sup>2</sup> A pitnö ridi a lak baulang, ma pitnö a lak nanase.

<sup>3</sup> Idi nang a lak baulang, idi toxo kip abo bibio ma lamun kaim idi ra xikip pebo wel arixe midi.

<sup>4</sup> Me idi nang a lak nanase, idi toxo kip abo bibio ridi arixe bölök iat ma wel.

<sup>5</sup> A tödi inalolo maxat kaim kö nuanot pasaxit, me idi toxo mara pinaluso, io, idi toxo paluso.

<sup>6</sup> “Xö luono dömön a kinup ixo ot bira, ‘A tödi inalolo maxat ine na! Moro miang, moro esuo mine!’

<sup>7</sup> “Io, abo une xirip toxo laran ma toxo tagure bulus abo bibio ridi.

<sup>8</sup> A pitnö ne une baulang toxo tengen köbo une nanase, ‘Moro tabaa e mem merebo wel te mum. Abo bibio re mem i eka minet.’

<sup>9</sup> “Inexalik abo une nanase toxo balu ma toxo tengen, ‘Kaim! A na i kebeöt te ire xirip. Mum moro wan lamun idi nang te misik ma wel ma moro kun te dauleng ke mum iat.’

<sup>10</sup> “Ma nang idi toxo wan lo ra kun wel, a tödi inalolo maxat ixo wanot. A pitnö ne une nang toxo tagur bulus, toxo wan laxa arixe mine urungan kö nien taxin möxö kubus alolo. Ma marama ixo tamabaxut.

<sup>11</sup> “Inabo une xabise toxo ot belek melamu ma toxo tengen, ‘Orong! Orong! Örö sawang a marama rö mem.’

<sup>12</sup> “Ma lamun ixo tengen, ‘Turunon saxit, e kobo ösöxö e mum.’

<sup>13</sup> “Ma na im, mum morobo mana tagur sik, möxösa, mum mo köbo ösöxö a axana bung niang.”

### *A narun ne tultul* (Luk 19.11-27)

<sup>14</sup> Jisas ixo tengen öbaling, “Irabo xarnang a tödi i xeka nuan kö ngas ömat, nang ine ixo kuwe abo tultul te ine ma ixo isik tewe abo lalaa rine urungan tidi rua balaure.

<sup>15</sup> Ixo tabaa a öng ma pitnö ne arip ne tuluwok, ixo tabaa a öng kabise ma nini arip ne tuluwok, ma ixo tabaa a öng kabise ma önga arip ne tuluwok. Ixo erimine idi eöt ma lölös sidi. Io, ixo wan lo xö nuan te ine.

16 A tödi nang ixo kip lo abo pitnö ne arip ne tuluwok, saxit mon ixo wan ma ixo rörön ma pitnö ne arip ma ixo kip a önga pitnö ne arip baling.

17 Io, nangang bölök ma nini arip ne tuluwok, ixo kip a nini arip ne tuluwok baling.

18 Ma lamun a tödi nang ixo kip lo a önga arip ne tuluwok, ixo wan lo ma ixo kin a mara xö pu ma ixo pömös ina tuluwok kö orong kine.

19 “Melamu xö axana bung ömat a orong möxö inabo tultul ixo wanot baling, ma ixo ötöxödös me idiet lamun abo tuluwok.

20 Ina tödi nang ixo kip lo a pitnö ne arip ne tuluwok, ixo kiwot bölök a önga pitnö xabise. Ixo tengen, ‘Orong ke e, nöngön u xo isik a pitnö ne arip ne tuluwok ke e. Öro pere. E kip lo önga pitnö ne arip baling lömö xönan.’

21 “A orong ke ine ixo tengen, ‘A tinörön deek u pet. Tödi deek ma a tultul turunon nöngön! Nöngön u xobo rörön deek ma turunon köbo dauleng ne lalaa mon. E rabo bulus nöngön tua werwere muu a oleleng ne lalaa. Miang, ma öro axanan arixe ma orong ke nöngön!’

22 “Ina tödi nang ixo kip lo a nini arip ne tuluwok, ixo wanot bölök. Ixo tengen, ‘Orong ke e, nöngön u xo isik a nini arip ne tuluwok ke e. Öro pere. E kip lo önga nini arip baling lömö xönan.’

23 “A orong ke ine ixo tengen, ‘A tinörön deek u pet. Tödi deek ma a tultul turunon nöngön! Nöngön u xobo rörön deek ma turunon köbo dauleng ne lalaa mon. E rabo bulus nöngön tua werwere muu a oleleng ne lalaa. Miang, ma öro axanan arixe ma orong ke nöngön!’

24 “Io, ina tödi nang ixo kip lo a önga arip ne tuluwok, ixo wanot. Ixo tengen, ‘Orong ke e, e xo ösöxö bara nöngön kaim bara a tödi malus. E ösöxö bara e nöngön u bo xikip kö xönö nöngön u kara sulo ma u bo dixidik ögun kö xönö u kara retewe a irine iaa.

25 Io, e xo buut me e xo wan tewe me e xo pömös kö pu a tuluwok ke nöngön. Öro pere. A na ina lasa nang ke nöngön.’

26 “A orong ke ine ixo tengen, ‘Nöngön a tödi saban, a tödi lön! Me nöngön u ösöxö sik bara e bo xikip kö xönö e kara sulo me e bo dik ögun kö xönö e kara retewe a irine iaa?

27 Xarnang bie, nöngön u xere mana bulus a tuluwok ke e xö gunon ne bulus tuluwok, io, nang bara arabo baling ot, e xere kip lo arixe ma nang bölök lömö.’



28 “Io, ixo tengen te idi bira, ‘Mum moro mana kip tewe ina tuluwok kalik ine ma morobo isik ine xö tultul nang i kip lo a sangau ne tuluwok.

29 Möxö, ewenene midi nang idi ma lalaa, God irabo tabaa idi ma oleleng, ma irabo kip lo a oleleng. Me ewenene midi nang kawaim idi mere lalaa, God irabo kip tewe bölök kirip abo lalaa xalik idi.

30 Me mum morobo mana tewe ösu ina tultul lön niang kö araman urungan kö ködö lamin, nang kingan idi tabo gegee ma tabo engiren abo ngisine idi.’

*A bung ne warkurai*

31 Me Jisas ixo tengen öbaling bira, “Nang bara a Barok kö Tödi irabo wanot ma mariris se ine arixe mabo angelo xirip pe ine, irabo kis kö kinis ne warkurai taxin te ine.

32 A nangadi möxöbo kantri xirip tabo ot etok kö wawara re ine ma irabo palang ebasin idi xarnang a tene walbalaurai möxöbo sipsip nang ibo palang ebasin abo sipsip kalik abo me.

33 Ine irabo bulus abo sipsip kö lime tuun te ine, mabo me xö lime kes sine.

34 “Io, a king irabo tengen kö marakörö niang toxo kis kö lime tuun te ine bira, ‘Mum moro miang, mum niang a Tata re e ixoro wadöane sik e mum. Mum morobo kip lo a kingdom nang ixoro tagur sik kua gene mum meringan kö nang ixo uxis a öxöno lagunon,

35 möxö mesila e xo irilöng me mum moxo tabaa e ma nien, e xo minauu me mum moxo tabaa e ma ari, e a osee me mum moxo lamus öläxa lo e xö gunon,

36 e xo sasaxan lamun a man me mum moxo öläulawa e, e xo meset me mum moxo balaure e, e xo kis kölöme xö gunon ne aömokorot me mum moxo wanot ta uxileng e.’

37 “Io, abo tene töxödös tabo balu ine bira, ‘Orong, lause mem moxo pere nöngön, u xo irilöng ma moxo tabaa nöngön ma nien, ma bara u xo minauu, ma moxo tabaa nöngön ma ari?

38 Ma lause nöngön u xo wanot xarnang a osee me mem moxo ömaraxen öläxa lo nöngön, ma bara kaim nöngön ma man ta sisige me mem moxo öläulawa nöngön?

39 Ma lause mem moxo pere nöngön u xo meset, ma bara nöngön u xo kis kölöme xö gunon ne aömokorot me mem moxo uxileng nöngön?’

40 “Ma a king ixo balu, ‘E tengen tunin te mum, a lasanene nang mum moxo pet ulamun önga tödi tanaa meringan köbo töke, i xarnang mum moxo pet tö e.’

41 “Melamu ine irabo tengen te idi xö lime kes bira, ‘Mum nang mo kis kö ene ömokorot te God, moro tuwes xalik e,

ma moro wan urungan kö ia sösöt nang i kara met ma i tagur sik ke Satan mabo angelo re ine.

<sup>42</sup> Möxö nang e xo irilöng, mum kaim kö tabaa e mere nien tua enen. Me e xo minauu me mum kaim kö tabaa e ma ari ra ininim.

<sup>43</sup> E xo önga osee me mum kaim kö ömaraxen lo e. Me e xo sasaxan lamun tebo man ma kaim e mum kö ölaulawa e. Me e xo meset me e xo kis kö gunon ne aömokorot, me mum kaim kö balaure e.'

<sup>44</sup> "Me idi bölök tabo balu bara, 'Orong, lause mem moxo pere nöngön u xo irilöng bara u xo minauu, u xo meset ma u xo önga osee, bara u xo sasaxan lamun a man ma bara u xo kis kö gunon ne aömokorot, ma kaim e mem pa rorop nöngön?'

<sup>45</sup> "Me ine irabo balu idi bira, 'E tengen tunin te mum, a lasanene mum kaim kö wewet kö önga tödi tanaa meringan köbo töke, i xarnang mum kaim kö wewet tö e.'

<sup>46</sup> "Me idi niang tabo wan urungan kö xönö möxö kinadik nang i kis ulorexe saxit. Ma lamun abo tene töxödös tabo wan urungan kö to ulorexe saxit."

## 26

*Toxo wawara siwin te ngas sua sesexomet e Jisas*  
(Mak 14.1-2; Luk 22.1-2; Jon 11.45-53)

<sup>1</sup> Niang bara e Jisas ixoro öxawam a tinenge xöbo lalaa na, ixo tengen köbo bak ne ausu rine,

<sup>2</sup> "Mum mo ösöxö sik bara a Luxa ne Nuan Lexe, a nine bung kalik mon könan. Ma tabo isik tewe a Barok kö Tödi xö limine nangadi ma tabo tut ine xö sölöxöröp."

<sup>3</sup> Io, abo pris tataxin mabo sisila möxö nangadi toxo ot etok kölöme xö gunon taxin kö sisila raxin möxöbo pris, a esene e Kaiapas,

<sup>4</sup> me idi toxo wöwörö lamun te ngas sua öxös suxume e Jisas sua sesexomet ine.

<sup>5</sup> Ma lamun idi toxo tengen, "Ire takarabo pet biringan kö bung ne Luxa, xalik a nangadi tabo eöngat ma tabo öpurpuruan ire."

*Önga une ixo linge a sada xö öxöno e Jisas*  
(Mak 14.3-9; Jon 12.1-8)

<sup>6</sup> Io, nang e Jisas ixo xisixis siso Betani xö gunon te Saimon, nang mesila ine ma miniset lepra,

<sup>7</sup> me Jisas ixo kisisik ma ixo aan, io, önga une ixo wanot arixe ma botol deek ne sada nang a xinxun möxönan a lak taxin, me ine ixo linge xö öxöno e Jisas.

<sup>8</sup> Nang abo bak ne ausu toxo pere bira, toxo bala saban me idi toxo ose öbaling idi iat, "Ruasa ine i ösek tataunin ina sada na?"

<sup>9</sup> Ina sada na, toxoro eöt ta xikip pe xinuxun taxin möxönan, ma toxoro eöt tua isik abo tuluwok kö nangadi maris."

<sup>10</sup> Jisas ixo ösöxö sik bira ma ixo tengen te idi, "Moro ganim ine! Ruasa bara mum mo ögat köbanin ina une na? I kobo laa re mum! Ine iri pet a tatalien deek kö e.

<sup>11</sup> A nangadi maris angen tobo xisixis arixe me mum köbo bungbung kirip. Ma lamun e karabo kis ömat arixe me mum kö bungbung kirip.

<sup>12</sup> Nang ine i linge a sada nang lak sixine deek kö aike, rua tagur sik e ra minet.

<sup>13</sup> Turunon saxit, kö boxönö xirip kö öxöno lagunon nang tabo etöngösen ma tinenge deek, a lasanene niang a une na ixo pet, tabo etöngösen min, ma a nangadi tabo döxömen bölök ine."

### *Judas ixo aut ta isik tewe e Jisas*

*(Mak 14.10-11; Luk 22.3-6)*

<sup>14</sup> Io, a öng möxö ina sangaun ma ninöng, a esene e Judas Iskariot, ixo wan pösöt abo pris tataxin.

<sup>15</sup> Ma ixo ose, "A lasa runon mum morobo tabaa e nang bara e rabo isik e Jisas kö limine mum?" Io, idi toxo kos sik kö ine a narun ne sangaun ne tuluwok ne siliwa.

<sup>16</sup> Urulo im kö inabo bung, Judas ixo wawara siwin te mangana ngas mamaran tua isik e Jisas kö limedi.

### *A Luxa ne Nuan Lexe xö Orong*

*(Mak 14.12-26; Luk 22.7-23; Jon 13.21-30; 1 Korin 11.23-25)*

<sup>17</sup> Xö sila ne bung möxö Luxa möxö Beret Kaim a Is Könan, abo bak ne ausu toxo wanot pösöt e Jisas ma toxo ose ine, "Ule ina xönö nang nöngön u maaaa bara e mem pa tagure a nien ne Nuan Lexe re nöngön tua enen?"

<sup>18</sup> Ixo balu idi, "Mu niang, mu moro wan laxa xö lagunon taxin urungan kö önga tödi me mu moro tengen te ine, 'A Tene Ausu i tengen bara, 'A axana bung ke e iri wanot. E arixe mabo bak ne ausu re e, mem marabo en ina nien ne Nuan Lexe ruso xö gunon te nöngön.'", "

<sup>19</sup> Io, a nine bak ne ausu toxo pet inabo lalaa xarnang Jisas ixoro tengen sik kidu bie, me idu toxo tagure a nien möxö Luxa ne Nuan Lexe.

<sup>20</sup> Ixoro aien, Jisas ixo kisisik kiso xö öra arixe mabo sangaun ma ninöng ne bak ne ausu.

21 Ma nang idi toxo an, Jisas ixo tengen te idi, "Turunon saxit, öng mere mum irabo isik e xö limine nangadi."

22 Idi toxo tapunuk saban, me idi öngöng toxo ose ine bara, "Turunon saxit, Orong, kaim bere e, goo?"

23 Io, Jisas ixo balu idi, "Ine a öng nang i öwösö a beret kölöme xö bile arixe me e, ine irabo isik e xö limine nangadi."

24 A Barok kö Tödi irabo wan urungan kö minet xarnang abo propet toxoro geet lamun ine. Ma maris belek kö tödi nang irabo isik a Barok kö Tödi xö limine a nangadi. Ixoro deek köba rö ine nang bara kaim e nago xö xikip ine."

25 Io, Judas, ine nang irabo isik e Jisas kö limine nangadi, ixo tengen, "Turunon saxit, Tene Ausu, kaim bere e, goo?"

Jisas ixo balu ine, "Nöngön iat mon."

26 Ma nang idi angen toxo aan, Jisas ixo kip lo a beret ma ixo tengen deek kö God, io, ixo pidik, ma ixo tabaa nanin abo bak ne ausu re ine min, ma ixo tengen te idi, "Mum moro kip lo ma moro en. Ina na a aike."

27 Io, ixo kip lo a kap wain, ma ixo tengen deek kö God ma ixo örarabaa idi min, ma ixo tengen, "Mum kirip moro inim könan."

28 Ina na a dee re e rua öturunonin a kunubus meriso re God, nang e rabo linge rua xikip tewe a magingin saban köbo oleleng ne marakörö.

29 E tengen te mum, e karabo inim ina wain mee nixinen na ot kö bung niang arabo inim öbaling ine xarnang a wain maxat arixe me mum puso xö kingdom pe Tata re e."

30 Io, idi toxo ii önga sinö me idi toxo wan lo urso xö Maii Olip.

*Jisas ixo tengen bara Pita irabo öös sö ine  
(Mak 14.27-31; Luk 22.31-34; Jon 13.36-38)*

31 Io, Jisas ixo tengen te idi, "Xö ina dömön bölök, nang e mum morobo pere a lasa tabo pet tö e, mum kirip morobo buut ma morobo ulo lie e, möxö abo tinenge re God toxoro geet i tengen bira,

*'E rabo sexomet a tene werwere muu sipsip,  
ma a bung sipsip tabo ulo rup elixilik.'*

32 Ma lamun melamu e rabo taru kaa baling kalik a minet ma arabo sila re mum urso Galili."

33 Pita ixo tengen te ine, "Niang bara a nangadi xirip te wan lie nöngön nang bara idi te pere a lasa te pet te nöngön, lamun e iat, kaim."

34 Me Jisas ixo tengen te ine bara, "Turunon saxit, nixinen kö dömön iat, mesila xö xixök irabo tenge, nöngön örobo öös kelen e xö narun ne axan."

<sup>35</sup> Lamun e Pita ixo tengen, “Nang bara e rabo met bölök arixe me nöngön, e karabo öös kelen nöngön.” Me idi xirip abo bak ne ausu toxo tengen bölök bie.

### *Getsemani*

*(Mak 14.32-42; Luk 22.39-46)*

<sup>36</sup> Io, Jisas ixo wan arixe ma abo bak ne ausu rine urso xö önga xönö tobo rengrengen me Getsemani, ma ixo tengen te idi bara, “Mum moro xisixis sa me e ra wan uruo mara seseng.”

<sup>37</sup> Ine ixo lamus e Pita ma a nini barok ke Sebedi arixe mine. Ma ixo tapunuk ma balana ixo örasen ögat ine.

<sup>38</sup> Io, ine ixo tengen te idi bara, “Balake iri tiip köba me e örasen bara lörörö e rabo met. Mum moro kis sa ma moro wawara deek arixe me e.”

<sup>39</sup> Me ine ixo wan ulik ma ixo subu ma wawara rine uri xö pu ma ixo seseng bara, “Mama re e, nang bara i öt, e maaa bara örobo irewe ina tiip na xalik e, ma lamun u bele muu a maaa re e. Kaim. Örobo muu eörin a maaa re nöngön iat.”

<sup>40</sup> Io, Jisas ixo wan pösöt öbaling idiet narun ne bak ne ausu re ine ma ixo pere wösöt lo idiet toxo paliso sik. Me ine ixo ose e Pita bara, “Muot mo kebeöt tua kinis ma winara arixe me e xere önga awa?”

<sup>41</sup> Muot morobo mana wawara ma sineseng kalik a laa ne aöwalam irabo ot pösöt e muot, me muot bo subu xö magingin saban. A turunon, a bala muot i maaa ra wewet abo tatalien deek, ma lamun a aimuot i kobo lölös.”

<sup>42</sup> Io, Jisas ixo wan tewe xö nini axana baling ma ixo seseng bara, “Mama re e, nang bara ina tiip na i karabo wan tewe ot iat bara e rabo laxa xönan, io, e rabo muu öt ina maaa re nöngön.”

<sup>43</sup> Ma nang ixo baling, ixo pere abo bak ne ausu toxo paliso, möxösa, a maradi ixo tiip köba ra pinaliso.

<sup>44</sup> Io, ixo wan lie idi ma ixo wan tewe baling ma ixo seseng kö narun ne axan baling, ma ixo pet önga sineseng xarnang ine ixoro pet sik.

<sup>45</sup> Io, ixo tawuxus baling köbo bak ne ausu ma ixo tengen te idiet, “Muot angen mo wupaliso ma mo mamas? Pere bang, ina axana bung iri ot. Na tabo isik a Barok kö Tödi xö limine abo duöng saban.

<sup>46</sup> Taru me ire ta wan! Iri lörörö a tödi nang irabo isik tewe e!”

### *Judas ixo isik tewe e Jisas*

*(Mak 14.43-50; Luk 22.47-53; Jon 18.3-12)*

<sup>47</sup> Ma nang e Jisas angen ixo rengreng, e Judas, öng möxö ina sangau ma ninöng, ixo ot. A marakörö raxin toxo ot

arixe mine mabo sele mabo amu. Abo pris tataxin mabo sisila möxö nangadi toxoro tile idi.

<sup>48</sup> Ma ina tödi nang ixo maaaa ra isik e Jisas kö limine nangadi, ine ixoro tagure önga mangana uxileng bira, “A öng nang e rabo muum, ine mon ina tödi. Mum morobo tödik ine.”

<sup>49</sup> Saxit mon, e Judas ixo wan pösöt e Jisas ma ixo tengen, “Dömön, Tene Ausu!” Ma ixo muum ine.

<sup>50</sup> Jisas ixo balu, “Eis, pet a laa niang nöngön u ot lamun.”

Io, idi toxo wanot pösöt e Jisas ma toxo tödik ine.

<sup>51</sup> Io, öng ke idi nang toxo tuu sik arixe me Jisas, ixo sat lo ina sele ömat te ine, ma ixo se a tödi tene tinörön möxö sisila raxin möxöbo pris, ma use ixo tee xöröp a talingine.

<sup>52</sup> Io, Jisas ixo tengen te ine, “Bulus öbaling a use re nöngön kö xönö möxönan, möxö ewe me idi niang te tön a use tabo met kö use re idi xabise.

<sup>53</sup> Mum kobo ösöxö bara e öt bara e ra seng e Tata re e, ma saxit mon irabo tile ösu a oleleng ne angelo saxit tua rorop e?

<sup>54</sup> Ma lamun nang bara e xebe seseng bira, io, abo tinenge re God toxo geet takarabo ot eöt, möxösa, abo tinenge na i tengen bara abo lalaa na irabo mana ot bira rö e.”

<sup>55</sup> Kö ina axana bung na, Jisas ixo tengen kö marakörö, “Mum mo wanot mabo sele mabo amu rua rörödik e, xarnang arixe bere e a tödi baba? Ma xöbo bungbung kirip e xobo xisixis kölöme xö xönö möxö gunon ne lotu raxin me e xobo eusu, me mum kara töndik e.

<sup>56</sup> Ma lamun abo lalaa na i ot bara abo tinenge möxöbo propet irabo ot eöt.” Io, abo bak ne ausu xirip toxo wan lie e Jisas ma toxo ulo rup.

*Abo sisila toxo kure e Jisas*

*(Mak 14.53-65; Luk 22.54-55, 63-71; Jon 18.13-14, 19-24)*

<sup>57</sup> Idi nang toxo öxös lo e Jisas, toxo lamus lo ine urungan te Kaiapas, a sisila raxin möxöbo pris, ma ringan abo tene ausu möxöbo warkurai te Moses mabo sisila toxoro wan etok.

<sup>58</sup> Ma lamun Pita ixo mumuu e Jisas kö nuan a lak palaa ulik ot nang ine ixo wanot kö ina xönö xö lawana ngasiene a sisila raxin möxöbo pris. Ixo wan laxa ma ixo kis arixe mabo tene walbalaurai ra werwere bara tabo pet a lasa re Jisas.

<sup>59</sup> Abo pris tataxin mabo kansel kirip toxo wawara siwin te mangana unine tinenge röxröxö ra wupuk e Jisas min tua sesexomet ine.

<sup>60</sup> A oleleng toxo wanot tua rengrengen ösu toxo lamun ine, ma lamun kaim idi xo werwere wösöt lo re mangana ngas sua wupuk ine.

Melamu ulik, a nine tödi toxo wanot.

<sup>61</sup> Ma toxo tengen, "Ina tödi na ixo tengen bere, 'E öt tua öbeng ina gunon lotu raxin te God, me e öt ta uru öbaling ine xö narun ne bung.' "

<sup>62</sup> Ma a sisila raxin möxöbo pris ixo tuu kaa ma ixo tengen te Jisas bara, "Nöngön ökorobo balu re tinenge? A lasa ina tinenge na nang abo duöng na te wupuk nöngön min?"

<sup>63</sup> Ma lamun e Jisas ixo kis ödödö sik mon.

A sisila raxin möxöbo pris ixo tengen te ine, "E usugurno nöngön me God nang i to, bara örö tengen te mem nang bara nöngön a Mesaia, a Barok kö God, bara kaim."

<sup>64</sup> Me Jisas ixo tengen, "Maa, i xarnang u tengen. Ma lamun e tengen te mum kirip, melamu im mum morobo pere *a Barok kö Tödi irabo kisisik kö kinis taxin kö lime tuun te God nang a lak lölös ine, ma irabo ot kö kubu ne watmaep.*"

<sup>65</sup> Io, a sisila raxin möxöbo pris ixo laie ma ixo didii a man te ine, ma ixo tengen bara, "Iri tengen ögarin e God! Tinenge re ine eöt. Ire tebele ose öbaling kebo duöng kua rengrengen ot tebo tinenge bölök kö ina tödi. Pere na, mum moxoro ölangen bere ine i tengen ögarin e God.

<sup>66</sup> Mum mo dökömen bara tabo pet bulungin ine?"

Me idi xirip toxo balu ine bara, "I töxödös bere e Jisas irabo mana met."

<sup>67</sup> Io, idi toxo gisip ine xö wawara rine ma toxo tut ine mabo limedi. Idi xabise toxo wasa ine

<sup>68</sup> ma toxo tengen te ine bara, "Mesaia, örö tengen te tinenge propet im na re mem. Ewe i tut nöngön?"

### *Pita ixo öös kelen e Jisas*

*(Mak 14.66-72; Luk 22.56-62; Jon 18.15-18, 25-27)*

<sup>69</sup> Io, e Pita ixo kisisik kingan kö xönö lawana gunon, ma önga une tultul ixo wanot pösöt ine. Ixo tengen, "Nöngön mon nang u xo arixe me Jisas meri Galili."

<sup>70</sup> Ma lamun e Pita ixo öös kö mamaran tidi xirip bara, "Kaim. E kobo ösöxö lamun ina tinenge na nang u rengrengen."

<sup>71</sup> Io, ixo wan urungan kö marama möxö nilaxa. Ma önga balik kabise ixo pere ine ringan ma ixo tengen kö nangadi niang, "Ina tödi na ibo önan arixe me Jisas mee Nasaret."

<sup>72</sup> Me ine ixo öös baling ma ixo tengen, "Sugurno bang mon e tengen a turunon, e kobo ösöxö ina tödi!"

<sup>73</sup> A ulik mon melamu, a nangadi niang toxo ruruu ringan toxo wanot pösöt e Pita ma toxo tengen, “Turunon bara nöngön mon a öng mere idi, möxö mem me ölangen kulen kö tinenge re nöngön.”

<sup>74</sup> Me Pita ixo tengen ölölös bara, “Sugurno bang mon e tengen a turunon te mum, e kobo ösöxö ina tödi! Nang bara e töxö, io, e mamaa bara God irabo ömokorot köbanin e.”

Ma saxit mon a xixök ixo tenge.

<sup>75</sup> Io, Pita ixo döxömen lo a tinenge niang e Jisas ixo tengen bara, “Nang a xixök i kobola tenge bang, nöngön örobo öös kelen e xö narun ne axan.” Me Pita ixo wan su ma ixo gee saban arixe.

## 27

*Judas ixo kut öxuxut ine iat*  
(Aposol 1.18-19)

<sup>1</sup> Xö puxu bubung arixe, abo pris tataxin kirip mabo sisila möxö nangadi toxo etöngösen ma toxo ot kö önga dinödöm bara tabo sexomet e Jisas.

<sup>2</sup> Idi toxo kubus a nini limine ma toxo lamus ine urungan te Pailat, a tene warkurai taxin mee Rom.

<sup>3</sup> Nang e Judas ewe niang ixo isik tewe e Jisas, ixo pere bara toxo kure ösaban e Jisas, ine ixo dödöm puxus ma ixo isik puxus ina narun ne sangaun ne tuluwok ne siliwa urungan köbo pris tataxin mabo sisila möxö nangadi.

<sup>4</sup> Ma ixo tengen, “E re pet a magingin saban, möxösa, e re isik kas a tödi nang i kobo pet te sasaban urungan kö minet.”

Idi toxo tengen, “Mem marabo moro belek? Nöngön iat im.”

<sup>5</sup> Io, Judas ixo tewe abo tuluwok urungan kölöme xö gunon lotu raxin ma ixo wan lo. Io, ixo wan tewe ma ixo kut öxuxut ine iat.

<sup>6</sup> Abo pris tataxin toxo kip lo abo tuluwok ma toxo tengen, “I kobo eöt köbo warkurai te Moses sa bulbuluş inabo tuluwok kölöme xö xönö möxö bulbuluş arabaa xö gunon lotu raxin, möxösa, a xinuxun möxö minet.”

<sup>7</sup> Io, idi toxo muu önga dinödöm pa xukun lo ina xönö möxö tene pet sosopen min, bara tabo pömös nangadi osee ringan.

<sup>8</sup> Ma toxo isik a ese xina lagunon bara Xönö möxö Dee i ot nixinen.

<sup>9</sup> Io, abo tinenge re propet Jeremaia ixo ot eörin bira, “*Idi toxo kip lo inabo narun ne sangaun ne tuluwok ne siliwa, ina marana xinixun niang a nangadi mee Israel toxo isiksik ke ine.*”



<sup>10</sup> *Me idi toxo kip lo ina tuluwok ma toxo kun a xönö möxö tene pet sosopen min, xarnang a Orong ixoro tengen sik ke e bie."*

*Jisas ixo tuu mesila re Pailat*  
(Mak 15.2-5; Luk 23.3-5; Jon 18.33-38)

<sup>11</sup> Io, Jisas ixo tuu xö mamaran möxö sisila raxin mee Rom, ma ina sisila raxin ixo ose ine, "Nöngön a king möxöbo Judeia?"

Jisas ixo balu ine bara, "Ine mon xarnang u tengen."

<sup>12</sup> Nang abo pris tataxin mabo sisila toxo wupuk ine, Jisas kaim kö balu re tinenge.

<sup>13</sup> Io, Pailat ixo ose ine, "U kobo ölangen gut abo tinenge niang te wupuk nöngön min?"

<sup>14</sup> Inexalik Jisas kaim kö babalu re tinenge ulamun abo tinenge toxo wupuk ine min. Io, ina sisila raxin ixo wuwus saban.

*Pailat ixo kure e Jisas*  
(Mak 15.6-15; Luk 23.13-25; Jon 18.39—19.16)

<sup>15</sup> Io, xö Luxa ne Nuan Lexe, Pailat ixobo walwalas ösu a önga tödi xalik a gunon ne aömokorot, a tödi nang ina marakörö toxo pere kos ine.

<sup>16</sup> Kö ina axana bung na, önga tödi a esene e Barabas nang idi toxo bulus ine xö gunon ne aömokorot. A nangadi toxo ösöxö ödeek sik ine möxöbo tatalien te ine.

<sup>17</sup> Io, nang ina marakörö toxo ot etok, Pailat ixo ose idi, "Ewenene re idu niang mum mo mamaa bara ara ii ösu urungan te mum: Barabas bere Jisas nang tobo rengrengen ine me Krais?"

<sup>18</sup> Ixo tengen bira, möxö ine ixo ösöxö bara inabo pris tataxin mabo sisila toxo bala saban te Jisas, io, idi toxo isik ot e Jisas urungan te ine.

<sup>19</sup> Nang e Pailat ixo kisisik kö kinis ne warkurai te ine, a une re ine ixo tile ina tinenge na urungan te ine bira, "Ganim pa pet te laa xina tödi na, möxö kaim ine mere sasaban, möxösa, e xoro örasen a tiip taxin arixe nixinen kö wöpönöbö lamun ine."

<sup>20</sup> Ma lamun abo pris tataxin mabo sisila toxo öraru a balna marakörö rua ose bara Barabas irabo langlanga ma bara Jisas irabo met.

<sup>21</sup> A sisila raxin ixo ose idi, "Ewenene re idu niang mum mo mamaa bara ara ii ösu urungan te mum?"

Io, idi toxo balu ine, "Barabas."

<sup>22</sup> E Pailat ixo ose idi bara, "A lasa nang e rabo pet kö Jisas nang mum bo ukuwe ine a Mesaia?"

Me idi xirip toxo balu ine bara, "Tut ine xö sölöxöröp!"

23 Me Pailat ixo ose idi, "Ruasa? A mangana sasaban sa ine ixo pet?"

Ma lamun idi toxo xukup nöngösö lömö iat bara, "Tut ine xö sölöxöröp!"

24 Nang e Pailat ixo pere bara tinenge re ine ixo laa tataun, ma a purpuruan ixo urulo ra nuanot, ine ixo kip lo a ari ma ixo tos a limine mesila xö marakörö xirip. Ma ixo tengen, "E langlanga sik kalik a dee xina tödi na. A laa im pe mum iang!"

25 A nangadi toxo tengen te ine, "Ganim sik a dee re ine lömö re mem ma lömö xö bung baroxorok ke mem!"

26 Io, e Pailat ixo ii ösu e Barabas urungan te idi ma ixo tengen köbo umri ma toxo dangat e Jisas ma buso, ma melamu e Pailat ixo isik ine urungan te idi ra rutut ine xö sölöxöröp.

*Toxo eösaxit me Jisas*

*(Mak 15.16-20; Jon 19.2-3)*

27 Io, abo tene inarse möxö sisila raxin mee Rom, toxo lamus öläxa e Jisas urungan kö gunon taxin te Pailat ma toxo kuwe etoxin kirip a nangadi arse.

28 Idi toxo luwes abo man te ine ma toxo öläulawa e Jisas ma man dadan xarnang a king ibo sisige,

29 io, idi toxo kip lo a uno gargaras ma toxo pet xarnang a bubuan, ma toxo usige xö öxöno e Jisas. Idi toxo bulus a buxo xö lime tuun tine ma toxo subun kexe mesila rine ma toxo eösaxit saban tine bira, "Mem me ölet nöngön, king köbo Judeia."

30 Idi toxo gisgisip ine ma toxo ilo ina buxo ma toxo dangdangat a öxöno.

31 Melamu idi toxoro eösaxit mine, idi toxo irewe ina man dadan kalik ine ma toxo öläulawa öbaling ine ma man iat te ine. Io, idi toxo lamus ösu ine ra taba ine xö sölöxöröp.

*Toxo tut e Jisas kö sölöxöröp*

*(Mak 15.21-32; Luk 23.26-43; Jon 19.17-27)*

32 Nang idi toxo önan lo, toxo esuo ma önga tödi mee Sairin, a esene e Saimon, me idi toxo ölölös lo ine rua xikip a sölöxöröp pe Jisas.

33 Idi toxo ot tiso xö xönö tobo rengrengen me Golgota. (Unine ese na bara Xönö möxö Siine Öxöno Tödi).

34 Ma nang idi toxo isik a wain toxo arixin ma laa melmele bara re Jisas sa ininim. Inexalik ixo dem kulen, ma ixo mölök ka ininim.

35 Nang idi a nangadi arase toxoro taba ine xö sölöxöröp, toxo egulös satu rua erimine abo man te ine re idi iat.

36 Idi toxo kisisik ma toxo balaure ödeek ine ringan.

37 Ma lömö xö öxöno, idi toxo bulus a xönö ginigeet nang toxo puk ine min bira, "Ine e Jisas, a king möxöbo Judeia."

38 Idi toxo örabaa bölök a nine tödi pinilo arixe me ine, a öng kö lime tuun ma öng kö lime kes.

39 Ma a nangadi nang toxo önan saxit, toxo tenge uli ine. Idi toxo urie abo öxöno idi

40 ma toxo tengen te ine bara, "Nöngön mon iang örobo pörök ösu a gunon lotu raxin ma örobo uru öbaling mon kö narun ne bung, örö top öbaling iat nöngön! Nang bara nöngön a Barok kö God, na im örö wan su meringan kö sölöxöröp!"

41 Xö ina ngas iat nang, abo pris tataxin arixe mabo tene ausu möxöbo warkurai te Moses mabo duöng taxin idi bölök toxo tenge uli ine.

42 Me idi toxo tengen öbaling bara, "Ine i rorop a nangadi xabise, ma bara bule i kebeöt ta rorop ine iat? Bere ine a King mee Israel, irabo wan su na mon kalik a sölöxöröp, ma ire tabo nunu.

43 Ine ixobo isik iat a nunu rine urungan kö God. Ganim e God irabo top im ine na nang bara i maaa rö ine, möxö ixobo rengrenge, 'E a Barok kö God.' "

44 Xö ina mangana ngas a nine tödi wuwulo nang toxo örabaa idu xö nine sölöxöröp arixe mine, idu bölök toxo tenge uli ine.

*A minet te Jisas kö sölöxöröp*

*(Mak 15.21-32; Luk 23.26-43; Jon 19.17-27)*

45 Xö luono xaken a ködö ixo wanot ma ixo tawi xirip ina öxöno lagunon ot kö narun ne axana bung kö aien.

46 Ma xö narun ne axana bung, Jisas ixo gee wösö ma ixo tengen, "Eloi, Eloi, lama Sabakatani?" A unine möxönan i tengen bira, "God te e, God te e, ruasa u wan kalik e?"

47 Ma dauleng niang toxo tuu örörö sik toxo ölangen ina na, ma toxo tengen, "Ine i xukuwe e Elaija."

48 Saxit mon önga tödi mere idi ixo ulo ma ixo kip lo a spans. Ixo bulus öläxa xö wain manun, ma nang a wain ixo wöwö xönan ixo kut parange xö önga iaa ma ixo sanga kaa min urungan te Jisas sa ininim.

49 Ma a nangadi xabise toxo tengen, "Tuu bang! Ire ta pere bere Elaija irabo ot ma irabo top ine bara kaim."

50 Ma nang e Jisas ixoro gee wösö baling, me ine ixo isik tewe a to re ine ma ixo met.

51 Ma saxit mon a xönö man taxin nang ibo bölö wi sik a gunon lotu raxin ixo tamadidi nine xönö meriso lömö uri arixe xö pu. A gie ixo ot mabo warawat ixo tawörök.

52 Abo maöt toxo tawalang mabo töngön köbo töxödös ne minet toxo taru kaa ma toxo to.

53 Idi toxo wan su xalik abo lieng möxöbo minet, ma melamu xö tinaru baling ke Jisas, idi toxo wan laxa Jerusalem a lagunon madakdak ma toxo wösö xö oleleng ne nangadi.

54 Nang a umri raxin me ewe midi niang toxo balaure e Jisas, toxo pere a gie ma abo lalaa niang ixo wanot, toxo buut saban ma toxo tengen, "Turunon saxit, a tödi na a Barok kö God!"

55 Oleleng ne balixilik bölök angen toxo tuu sik kö palaa ma toxo ngökngök köbo lasa niang ixo orot. Idi toxobo mumuu e Jisas mee Galili me idi toxo balaure ine xöbo lasa niang ibo mamaa lamun.

56 Kaluluon tidi, e Maria mee Makdala, me Maria nago re Jems me Josep, ma nago xö nine barok ke Sebedi.

### *Toxo pömös e Jisas*

*(Mak 15.42-47; Luk 23.50-56; Jon 19.38-42)*

57 Niang ixoro lörörö ra aien, a orong mee Arimatia ixo wanot, a esene e Josep. Ine iat ixo önga bak ne ausu re Jisas.

58 Ixo wanot pösöt e Pailat ma ixo ose ine lamun a minet te Jisas. Me Pailat ixo isik a tinenge lölös bere idi tabo isik ina minet urungan te Josep.

59 Josep ixo kip lo ina minet, ma ixo kait pi ma man maxat pidien,

60 ma ixo bulus ölaxa ine xö lieng maxat te ine iat niang ine ixo luok tewe xalik a wat. Io, ixo ubun pi a marana lieng ma önga wat taxin ma ixo wan.

61 Maria mee Makdala, me Maria xabise, idu toxo kisisik kö lörörö xö lieng.

### *Toxo balaure ödeek a lieng*

62 A bung möxö tagure abo lalaa möxö bung Sabat iri kawam, ma xö bung melamu, abo pris tataxin mabo Parasi toxo wan pösöt e Pailat.

63 Idi toxo tengen, "Asuono orong, mem me dökömen lo a tinenge ina tene röxröxö ixo tengen niang ixo to sik bara, 'E rabo taru baling melamu xö narun ne bung.'

64 Io, mem me mamaa ra isik a tinenge lölös bara idi tabo balaure ödeek ina marana lieng ot kö narun ne bung irabo kawöm. Ma xalik abo bak ne ausu rine tabo wanot ma tabo pulo ina töngön ma tabo tengen kö nangadi bara iri taru baling kalik a minet. Ma ina mangana tinenge töxö na irabo saban köba xö niang i araun."

<sup>65</sup> Pailat ixo tengen, “Mum moro wan, moro lamus lo a dauleng ne umri rua balbalaure ödeek ina marana lieng xarnang mum mo eöt tua wewet pi.”

<sup>66</sup> Io, idi toxo wan lo ma toxo balaure ödeek ina lieng biringan. Idi toxo isewi a wat nang ixo pet pi sik a marna lieng, ma toxo wan lie sik abo umri rua balbalaure ödeek ine.

## 28

### *A tinaru baling ke Jisas*

*(Mak 16.1-10; Luk 24.1-12; Jon 20.1-10)*

<sup>1</sup> Melamu xö Sabat, xö puxu bubung kö Sade, Maria mee Makdala, me Maria xabise, idu toxo wan lo rua werwere ina lieng ne minet.

<sup>2</sup> A gie raxin ixo ot, möxösa, önga angelo xö Orong ixo wan su meruso xö balana kubu. Ixo wan pösöt ina lieng ma ixo ubun tewe ina wat ma ixo kis kaa sik könan.

<sup>3</sup> A winara re ine ixo bio xarnang a siek, ma ina man tine ixo pidien köba saxit.

<sup>4</sup> Abo umri nang toxo balaure sik ina lieng ne minet, toxo buut köba, io, toxo dede xirip ma binuut ma toxo xarnang abo tödi minet.

<sup>5</sup> A angelo ixo tengen kö nini une, “Ganim e mu ra binuut. E ösöxö bere mu mo wawara siwin e Jisas, ewe niang toxo taba ine xö sölöxöröp.

<sup>6</sup> Kaim ine ra, me ine iri taru baling kalik a minet, xarnang ine ixoro tengen sik. Mu moro miang ma moro pere ina xönö niang toxo ömarin ine e.

<sup>7</sup> Ma na iat mon, mu moro wan saxit ma moro tengen köbo bak ne ausu re ine, ‘Ine iri taru baling kalik a minet me iri sila re mum uri Galili. Ma ri, mum morobo pere ine.’ Io, mu moro döxömen lo ina lasa e re tengen sik ke mu.”

<sup>8</sup> Io, a nine une toxo wan saxit mon kalik ina lieng, idu toxo buut ma lamun toxo wöwö ma axanan, ma toxo ulo rua rengreng oßen abo bak ne ausu rine.

<sup>9</sup> Saxit mon, Jisas ixo esuo me idu. Me ine ixo tengen, “Puxu.” Idu toxo wanot pösöt ine, me idu toxo töndik a xexene ma toxo lotu rine.

<sup>10</sup> Io, Jisas ixo tengen te idu, “Ganim e mu ra binuut. Mu moro wan ma moro tengen köbo tönö re e bara idi tabo wan uruso Galili. Me idi tabo pere e ringan.”

*A unine bara abo Judeia tokobo nunu bere Jisas ixo taru baling*

<sup>11</sup> Io, nang a nine une toxo önan kö ngas, a dauleng ne umri nang toxo balaure ina lieng ne minet, toxo wan laxa

xö lagunon taxin ma toxo tengen osen köbo pris tataxin lamun abo lalaa xirip nang ixo wanot.

<sup>12</sup> Ma nang abo pris tataxin toxo wanot etok arixe mabo sisila, toxo ot kö önga dinödöm, me idi toxo tabaa abo umri ma oleleng ne tuluwok.

<sup>13</sup> Me idi toxo rengrengen te idi, “Mum morobo tengen bara, ‘Abo bak ne ausu rine toxo wanot kö dömön ma toxo pulo rewe ine nang mem moxo paliso.’

<sup>14</sup> Nang bara ina sisila raxin mee Rom i ölangen bira, mem marabo ötöxödös arixe mine, re mum pa malaa wes xalik ina tiip.”

<sup>15</sup> Io, abo umri toxo kip lo abo tuluwok ma toxo pet xarnang toxoro tengen te idi. Ma ina pii ixoro wan elixilik kaluluonin abo Judeia ot kö ina axana bung na.

*Jisas ixo tenge lölös köbo tultul te ine*

*(Mak 16.14-18; Luk 24.36-49; Jon 20.19-23)*

<sup>16</sup> Io, a sangaun ma öng ne bak ne ausu toxo wan uruso Galili, xö maii niang Jisas ixo tengen te idi ra nuan uxe.

<sup>17</sup> Nang idi toxo pere ine, idi toxo lotu wösöt ine, ma lamun dauleng toxo nine dinödöm sik.

<sup>18</sup> Io, Jisas ixo wanot pösöt idi ma ixo tengen, “Abo lölös kirip nuso xö watmaep ma xö öxöno lagunon, a Tata re e ixoro tabaa e min.

<sup>19</sup> Io, mum moro wan ma moro pet abo bak ne ausu möxöbo kantri xirip, me mum morobo baptais idi xö esene e Mama ma ina Barok ma ina Töxödös ne Tanono.

<sup>20</sup> Me mum moro usu idi ra tame abo lalaa xirip e xoro tenge lölös se mum pua wewet. Ma i maras pi sik, e bo arixe me mum köbo bung kirip ot kö axana bung möxö xakawöm.”

## A Tinenge Deek ke MAK

A tinenge deek ke Mak i kobo tengen te oleleng ne ausu re Jisas (pere a öxöno tinenge re Matiu). Kaim. I rengrengen köba ulamun a tinörön taxin te Jisas sua osen bere Jisas i uruoxe a lölös taxin te God, io nang, i eöt bara irabo döxömen tewe abo magingin saban ma irabo kun ölanglanga ire (pere Mak 10:45). Me Mak ixo bulus öläxa a oleleng ne tinenge re Jisas ulamun abo auban nang ixo ot pösöt abo Kristien bölök. Io nang, i wawara bara xö axana bung bara e Mak ixo geet ina tinenge na, abo eler ixo ot pösöt abo Kristien, me Mak ixo ödöxömen lo idi xöbo tinenge re Jisas (8:34-38).

*Jon ixo tagure a nuan möxö Orong  
(Matiu 3.1-12; Luk 3.1-18; Jon 1.19-28)*

<sup>1</sup> A urulo möxö ina na lamun a tinenge deek ke Jisas Kraiss, a Barok kö God.

<sup>2</sup> God ixo tengen kölöme xö ginigeet te propet Aisaia bira: *“E rabo tile re tene kip tinenge re e mesila re nöngön, ewe nang irabo tagure a ngas se nöngön.”*

<sup>3</sup> *“A inöno öng i xukup kö xönö tataun, ‘Tagure a nuan möxö Orong, ötöxödös a ngas sö ine.’ ”*

<sup>4</sup> Io, Jon a tene baptais ixo wanot kö xönö tataun, ixo baptais ma ixo etöngösen bara, “Mum moro kip lo a baptais sa osen bara mum muru dödöm puxus. Me God irabo döxömen taun abo magingin saban te mum.”

<sup>5</sup> Ma nangadi oleleng mee Judeia arixe mabo nangadi mee Jerusalem, toxo wan lo urungan te Jon. Idi toxo tengen ösu bara idi abo duöng saban, ma ixo baptais idi xö Ari Jordan.

<sup>6</sup> Jon ixo sige a man nang toxo pet ma bebene kamel ma ixo kie ine ma lewene bulmakau, ma ixobo enen a kö ma musien.

<sup>7</sup> Ma tinenge rine bira, “Önga tödi irabo wanot melamu re e, i taxin köba re e. E kobo töxödös eöt ta tinunsu ra walwalas a kililöng kalik a nine sandel te ine.

<sup>8</sup> E baptais e mum ma ari, lamun ine xalik irabo baptais e mum ma Töxödös ne Tanono.”

*Jon ixo baptais e Jisas me Satan ixo könönöin ine  
(Matiu 3.13—4.11; Luk 3.21-22; 4.1-13)*

<sup>9</sup> Xina bung nang e Jisas ixo wanot meruso Nasaret kölöme Galili, ma ixo kip lo a baptais xalik e Jon kö Ari Jordan.

<sup>10</sup> Ma nang e Jisas ixo wan kaa xalik a ari ixo pere a balana kubu ixoro tamasawang ma Tanono ixo wan su lömö rine xarnang a buno.

<sup>11</sup> Io, a inöno öng ixo ot meruso xö balana kubu ma ixo tenge bira, "Nöngön ano Barok ke e. E maaa lamun me e axanan köba re nöngön."

<sup>12</sup> Saxit mon, a Tanono ixo tile ine urungan kö xönö tataun,

<sup>13</sup> me ine ixo kis kö xönö tataun kö nit ne sangaun ne bung. E Satan ixo könönöin ine ma ixo kis arixe mabo gineme axe, nexalik abo angelo toxo top ine.

*Jisas ixo etöngösen ma tingenge deek*

*(Matiu 4.12-17; Luk 4.14-15)*

<sup>14</sup> Io, nang toxoro öxös lo e Jon ma toxo öläxa ine xö gunon ne aömokorot, Jisas ixo wan laxa urso Galili ma ixo etöngösen nana ma tingenge deek ke God.

<sup>15</sup> Me Jisas ixo tengen, "A axana bung ire kis eöt. A kingdom kö God iri lörörö. Moro dödöm puxus ma moro nunu xö tingenge deek."

*Jisas ixo kuwe abo tene kip inan*

*(Matiu 4.18-22; Luk 5.1-11)*

<sup>16</sup> Bara e Jisas ixo önan kö gegene tu Galili, ixo pere e Saimon, ma tönö rine, e Endru. Idu toxo retewe eben kö ari, möxösa, idu a nine tene kip inan.

<sup>17</sup> Me Jisas ixo tengen tidu, "Mu moro miang ma moro muu e, e rabo usu e mu ma ngas möxö xikip a nangadi."

<sup>18</sup> Io, saxit mon, idu toxo wan lie abo eben te idu ma toxo muu ine.

<sup>19</sup> Ma nang e Jisas ixo wan ulik mon, ixo pere e Jems a barok ke Sebedi, arixe ma tönö e Jon kö mön, idu toxo marangas bulus abo eben.

<sup>20</sup> Ma saxit mon, ixo kuwe idu me idu toxo wan lie e tamadu xö mön arixe mabo nangadi tinörön ma toxo muu ine.

*Jisas ixo irewese abo tano saban*

*(Luk 4.31-37)*

<sup>21</sup> Me Jisas mabo bak ne ausu toxo wan uruso Kaprenaum. A bung Sabat ixo ot, me Jisas ixo wan laxa xö gunon ne sineseng köbo Judeia ma ixo usu a nangadi.

<sup>22</sup> Nangadi toxo wuwus kö ausu rine, möxösa, ixo usu idi xarnang a tödi iri kip lo a lölös sua inausu, kaim xarnang abo tene ausu möxöbo warkurai te Moses.



<sup>23</sup> Io, önga tödi kölöme xö gunon ne sineseng ke idi nang a tano saban ixo kis sine, ixo gee wösö bira,

<sup>24</sup> “Jisas mee Nasaret, u maaaa ruasa xalik e mem? U wanot ta ögarin esexerein e mem? E ösöxö sik nöngön, bere nöngön Öng Ewe Nang a lak Madakdak meriso re God!”

<sup>25</sup> Me Jisas ixo köö ina tano saban, ma ixo tengen, “Örö ödödö, ma wan su xalik ine.”

<sup>26</sup> A tano saban ixo ögögöng ina tödi, io, ixo wan su xalik ine ma kinup taxin.

<sup>27</sup> A nangadi toxo wuwus saban arixe, ma toxo ose öbaling iat idi bira, “A lasa ia? A ausu maxat ma lölös! Ine bo isik tinenge lölös urungan köbo tano saban me idi tobo tame ine.”

<sup>28</sup> Io, a atöngösen tue Jisas ixo wan pasaxit kö boxönö xirip mee Galili.

*Jisas ixo ölanglanga a oleleng*  
(Matiu 8.14-17; Luk 4.38-41)

<sup>29</sup> Io, Jisas mabo bak ne ausu rine toxo wan su xalik a gunon ne sineseng. Ma saxit mon, idi toxo arixe me Jems me Jon urungan kö gunon te Saimon me Endru.

<sup>30</sup> A taön te Saimon ixo maru sik ma malao xö öra, me idi toxo töngösen e Jisas me ine.

<sup>31</sup> Io, Jisas ixo wan urungan te ine, ixo tön lo a limine ma ixo tön öraru ine. A malao ixo kawam kalik ine ma ixo urulo ra tabaa nienin idi.

<sup>32</sup> Xina aien, nang a xaken ixoro kis döröng, a nangadi toxo kip ot abo duöng miniset me idi nang abo tano saban toxoro tup pe idi urungan te Jisas.

<sup>33</sup> A nangadi oleleng köba möxö ina lagunon taxin idi toxo ot etok kö marame.

<sup>34</sup> Me Jisas ixo ölanglanga a oleleng ne nangadi ma mangana miniset. Ma ixo irewese a oleleng ne tano saban, nexalik mon kaim ine ra ömaraxen abo tano saban ta tinenge, möxösa, idi toxoro ösöxö ewe iang ine.

*Jisas ixo palas tinenge*  
(Luk 4.42-44)

<sup>35</sup> Xö puxu bubung, nang ixo ködö xudun, Jisas ixo laran ma ixo wan lie a gunon, ma ixo wan lo urungan kö xönö tataun, ma ixo seseseng.

<sup>36</sup> E Saimon mabo nangadi mere ine toxo wan ta winara re Jisas.

<sup>37</sup> Ma nang idi toxo pere wösöt ine, idi toxo tengen bira, “Nangadi xirip te wawara siwin nöngön!”

<sup>38</sup> Jisas ixo balu, “Ire ta wan urungan köbo lagunon lörörö, io nang, e öt ta palas tinenge bölök kidi e, möxösa, e ot ulamun.”

<sup>39</sup> Io, ixo wan kö boxönö xirip mee Galili, ixo palas tinenge xöbo gunon ne sineseng kidi ma ixo irewese abo tano saban.

### *Önga lepra*

(*Matiu 8.1-4; Luk 5.12-16*)

<sup>40</sup> A tödi ma miniset lepra ixo ot pösöt e Jisas ma ixo subun kexe mesila rine ma ixo seng ine, “Nang bara u maaa, nöngön u eöt ta öxawam a miniset lepra xalik e bara e ra madakdak.”

<sup>41</sup> Me Jisas ixo sasanga ma limine ma ixo tön ine möxö ixo balamu ine. Ine ixo tengen te ine, “E maaa. Öro deek.”

<sup>42</sup> Saxit iat mon a miniset lepra ixo wan kalik ine ma ixo langlanga.

<sup>43</sup> Jisas ixo ugunan tewe ine arixe ma tinenge lölös bira,

<sup>44</sup> “Ganim bara u tengen osen kere öng. Inexalik öro wan ma öro osen nöngön kö pris ma öro isik abo arabaa ne söngsöngöt eöt ma warkurai te Moses bara örobo deek baling. Ma irabo xarnang a atöngösen maras sö idi bara a turunon bere u xoro langlanga.”

<sup>45</sup> Lamun ine ixo wan ma ixo etöngösen maras nana ma tinenge. Unine möxönan, Jisas kaim a nilaxa xö lagunon taxin kö mamaran kö nangadi, ma lamun ixo xisixis kö boxönö nang kaim pe nangadi xönan. Inexalik a nangadi angen toxo orot pösöt ine möxö boxönö xirip.

## 2

### *Önga pengpeng*

(*Matiu 9.1-8; Luk 5.17-26*)

<sup>1</sup> Nang ne bung melamu, Jisas ixo wan laxa baling kö Kaprenaum. Io, a nangadi toxo ölangen bara ixoro wanot kö lagunon.

<sup>2</sup> Io, a oleleng ne nangadi toxo ot etok ma kölöme xö gunon ixo wöwö xöba, ma araman kö marame bölök kawaim pe xönö ixo langlanga. Me Jisas ixo palas tinenge ma tinenge re God urungan tidi.

<sup>3</sup> Dauleng ne duöng toxo ot ma pengpeng. Ma nit ne tödi toxo kip ine.

<sup>4</sup> Nang idi kaim a eöt ta kip ot ine urungan te Jisas, möxösa, a marakörö toxo oleleng, io, idi toxo pök a öxöno gunon lömö re Jisas, me idi toxo ösölöng ösu a ben arixe ma pengpeng könan.

<sup>5</sup> Jisas ixo pere a nunu ridi, ixo tengen kö pengpeng, “Barok, na iat mon a magingin saban te nöngön iri kawam.”

<sup>6</sup> Dauleng abo tene ausu möxöbo warkurai te Moses toxo kisisik ma toxo dōxōmen suxume re idi iat bira,

<sup>7</sup> “Ruasa ina tödi na i tengen bira? Ine i tengen ögarin e God. Kaim pe öng i öt ta kip tewe a magingin saban, nexalik bara e God kalik mon.”

<sup>8</sup> Saxit mon, Jisas ixo ösöxö xulen abo dinödöm kö kat tidi. Jisas ixo tengen te idi, “Rösa mum mo dödōxōmen inabo lalaa na?”

<sup>9</sup> Nangang sa ridu i malus sa rengrengan? I malus se e ra tengen kö pengpeng bira, ‘A magingin saban te nōngön iri kawam’? Bara i malus se e ra tengen, ‘Tuu lömö, kip lo a ben te nōngön ma örö wan’?

<sup>10-11</sup> Ma lamun eka osen e mum bara a Barok kö Tödi ine ma lölös kö öxōno lagunon tua irewese a magingin saban.” Ma ixo tengen kö pengpeng, “E tengen te nōngön, tuu lömö ma örö kip lo a ben te nōngön ma örö wan urungan kö ngasiem.”

<sup>12</sup> Io, ina tödi na ixo taru ma ixo kip lo a ben te ine ma ixo wan kö mamaran kö nangadi xirip. Me idi xirip idi toxo wuwus me idi toxo ölet e God, “Ire tekala pere re laa bira.”

*Ewenene irabo dödöm puxus*

*(Matiu 9.9-13; Luk 5.27-32)*

<sup>13</sup> Io, Jisas ixo wan baling melamu xö gegene tu Galili. A marakörö raxin toxo ot pösöt ine, me Jisas ixo usu idi.

<sup>14</sup> Ma nang ine ixo wan saxit, ixo pere e Lewi, a barok ke Alipaio, ixo kisisik kö xönö möxö kip takis. Me Jisas ixo tengen te ine, “Örö muu e!” Me Lewi ixo tuu lömö ma ixo muu ine.

<sup>15</sup> Melamu, nang e Jisas mabo bak ne ausu rine toxo aan kö gunon te Lewi, a oleleng ne tene kip takis mabo ‘duöng saban’ toxo aan arixe mine mabo bak ne ausu rine, möxösa, oleleng ke idi tobo mumuu ine.

<sup>16</sup> Nang abo tene ausu möxöbo warkurai te Moses, nang idi abo Parasi, toxo pere bere e Jisas ixo aan arixe mabo ‘duöng saban’ mabo nangadi möxö kip takis, idi toxo ose abo bak ne ausu rine bira, “Ruasa i aan arixe mabo tene kip takis mabo ‘duöng saban’?”

<sup>17</sup> Jisas ixo ölengen abo Parasi, io, ixo tengen te idi bira, “A nangadi nang kaim a miniset, idi tekara sasaxan ulamun a tene aule, nexalik idi xalik nang a lak miniset. E kobo ot ta xukuwe abo tene töxödös. Kawaim, e ot lamun a nangadi saban.”

*Abo lalaa maxat te Jisas*

*(Matiu 9.14-17; Luk 5.33-39)*

<sup>18</sup> Io, abo bak ne ausu re Jon ma abo Parasi toxo ölölö. Ma toxo ot pösöt e Jisas ma toxo ose ine, “Ruasa abo bak

ne ausu re Jon ma abo bak ne ausu möxö Parasi bölök toxo ölö, lamun abo bak ne ausu re nöngön kalik, kaim?"

<sup>19</sup> Jisas ixo balu idi, "Bule bara a bung osee möxö tödi alolo maxat, tabo ölö nang bara ine angen arixe midi? Kaim. Idi tokobo eöt kö bung nang a tödi alolo maxat i nangen arixe midi, möxösa, idi tabo axanan iat.

<sup>20</sup> Ine xalik, a axana bung irabo wanot nang tabo kip lo ina alolo maxat kalik idi. Ma xina bung nang, idi tabo ölö im.

<sup>21</sup> "Kaim pe öng ibo sösöxö a xönö sewene man maxat lömö xö man maut. Nang bara i pet bie, a xönö sewene man maxat irabo tamaliling lo xalik ina xönö man maut, ma irabo pet ötamadidi ma irabo saban arixe.

<sup>22</sup> Ma kaim pe öng ibo linglinge a wain maxat nang i kobola ebobot bang kölöme xö önga laa mo kuluwo ari nang toxo pet ma lewene meme maut i lelet sik. Nang bara i pet, a wain irabo ebobot kaa ma irabo pörök ina lewene meme. Ma wain ma lewene meme idu xirip tabo saban. Kawaim bie, ibo riri a wain maxat kö lewene meme maxat."

### *A bung Sabat tua rorop a nangadi*

*(Matiu 12.1-8; Luk 6.1-5)*

<sup>23</sup> Io, xö önga Sabat, Jisas arixe mabo bak ne ausu rine toxo wan kaluluonin a komo wit, mabo bak ne ausu rine toxo pit köröp lo a uleng ne xurxurno wit.

<sup>24</sup> Mabo Parasi toxo tengen te ine, "Pere bang! Ruasa abo bak ne ausu re nöngön, idi te pet biringan? Idi tokobo mumuu a warkurai möxö bung Sabat."

<sup>25</sup> Io, Jisas ixo balu, "Mum moxoro kos abo laa mesila nang e Dewit ixo pet nang ine ixo irilöng ma sasaxan tua nien arixe mabo duöng nang toxo wan arixe mine.

<sup>26</sup> E Dewit ixo wan laxa xö gunon te God köbo bung ke Abiata, a sisila raxin möxöbo pris, ma ixo en a beret nang tobo tabaa e God min. Mabo warkurai te Moses i tengen bara abo pris kalik tobo enen ina beret na. Ma ixo tabaa bölök abo duöng nang toxo wan arixe mine."

<sup>27</sup> Me ine ixo tengen tö idi, "God ixo pet a bung Sabat tua rorop a tödi, ma i koxobo pet a tödi ulamun a bung Sabat.

<sup>28</sup> Möxö ina na, a Barok kö Tödi i kure bölök a bung Sabat."

## 3

*Jisas ixo ölanglanga önga tödi ma lime met kö Sabat  
(Matiu 12.9-14; Luk 6.6-11)*

<sup>1</sup> Önga bung kabise, Jisas ixo wan laxa kölöme xö gunon ne sineseng möxöbo Judeia, ma önga tödi ma lime met nangen nang.

<sup>2</sup> Dauleng ke idi nang toxo kisisik kingan, toxo werwere ine nang bara irabo ölanglanga ine xö Sabat bara kaim, io, niang ke idi ra wupuk ine.

<sup>3</sup> Io, Jisas ixo tengen kö tödi niang a lime met, "Örö tuu lömö mesila xö nangadi xirip."

<sup>4</sup> Me Jisas ixo ose idi, "Mum moro dödöm deek, a sa xö warkurai te Moses i tengen bara i töxödös bara tabo pet kö bung Sabat? I deek sik ka rorop bara rua ögarin, ma rua öro re öng bara rua sexomet te öng?" Lamun idi toxo ödödö.

<sup>5</sup> Jisas ixo wawara nana ma ixo laie. Ma ixo tapunuk köba, möxösa, abo balana idi ixo lölös. Io, ixo tengen kö tödi, "Sasanga kaa ma limem." Io, ine ixo sasanga kaa ma limine, ma a limine ixo deek baling.

<sup>6</sup> Io, abo Parasi toxo wan lo ma toxo pingit arixe mabo tene mumuu re Erot tua wewet te ngas sua sesexomet e Jisas.

#### *A marakörö raxin toxo muu e Jisas*

<sup>7</sup> Jisas arixe mabo bak ne ausu re ine toxo wan lo ma toxo ot kö tu Galili. A marakörö raxin mee Galili toxo muu idi.

<sup>8</sup> Nang idi toxo ölangen inabo lalaa Jisas ixo wewet, oleleng ne nangadi toxo ot pösöt ine mee Galili, Judeia, Jerusalem, Idumaia ma ina xönö lawana Ari Jordan ma boxönö lörörö Tair ma Saidon.

<sup>9</sup> Nang ixo rataxin a marakörö, Jisas ixo tengen köbo bak ne ausu rine bara idi tabo tagure sik ke mon, io, nang idi takarabo emorop pönö ine.

<sup>10</sup> Jisas ixo tengen ina na, möxö ixoro ölanglanga a oleleng, io, a nangadi miniset toxo exöxöp silain idi ra sisigi ine.

<sup>11</sup> Nang a nangadi ma tano saban tobo pere e Jisas, idi tobo subu mesila rine ma tobo tengen bira, "Nöngön a Barok kö God."

<sup>12</sup> Lamun ine ixo isik abo tinenge lölös se idi ra ganim a rengrengen osen bara ewenene ine.

#### *Jisas ixo pere kos lo abo aposol (Matiu 10.1-4; Luk 6.12-16)*

<sup>13</sup> Jisas ixo wan kaa urso xö lawana maii ma ixo kuwe a nangadi ine ixo mamaa lamun, me idi toxo ot pösöt ine.

<sup>14-15</sup> Io, ixo pere kos lo a sangaun ma ninöng ma ixo isik a ese 'aposol' te idi. Io, ixo pere kos idi bara idi tabo kis arixe mine ma bara irabo tile elixilixin idi rua palas tinenge ma rua kip lölös sua xikip tewe abo tano saban.

<sup>16</sup> Abo sangaun ma ninöng ne tödi nang ixo pere kos lo idi, e Saimon nang e Jisas ixo isik a ese 'Pita',

<sup>17</sup> e Jems a bak ke Sebedi ma tönö ine Jon (ixo tabaa idu ma ese Boaneges, a unine möxönan bara, 'A Nangadi Xarnang a Barawagas'),

<sup>18</sup> Endru, Pilip, Batolomiu, Matiu, Tomas, Jems a barok ke Alpius, Tadius, Saimon nang toxo tengen bara ine ina Silot,

<sup>19</sup> me Judas Iskariot, a tödi nang ixo isik tewe e Jisas kö limine nangadi.

### *Jisas me Belsebul*

*(Matiu 12.22-32; Luk 11.14-23; 12.10)*

<sup>20</sup> Io, Jisas ixo laxa xö önga gunon, ma marakörö toxo ot etok baling. Möxö ina na Jisas mabo bak ne ausu re ine kaim kö eöt iat ta nien.

<sup>21</sup> Nang a nago mabo tönö e Jisas toxo ölangen bira, idi toxo wan ta werwere ine, möxö a nangadi toxo rengrenge bara, "Ine iri baulang."

<sup>22</sup> Ma abo tene ausu möxöbo warkurai te Moses niang toxo wan su meriso Jerusalem, idi toxo tengen, "Ine ma tano saban nang tobo rengrenge ma Belsebul! Ine a sisila möxöbo tano saban ibo tabaa ine ma lölös sa xikip tewe abo tano saban."

<sup>23</sup> Io, Jisas ixo kuwe lo idi urungan tine ma ixo tenge wuo ridi, "Bara bule e Satan, i eöt ta kip tewe Satan? Kaim.

<sup>24</sup> Nang bara bung marapun tekobo tuu arixe, ina bung marapun nang tekebeöt ta kinis deek.

<sup>25</sup> Ma nang bara kinis sine barama i tawörök, ina barama nang tekebeöt ta kinis deek.

<sup>26</sup> Ma nang bara a nangadi re Satan te öbulubun idi iat ma te subu, io, tekebeöt ta tinuu lölös, lamun Satan iri kawam sik mon.

<sup>27</sup> Kaim pe önga tödi i eöt ta wörwörök ölaxa re gunon kere önga tödi lölös ma irabo pulo rewe abo lalaa re ine nang bara i kala kut dik bang ina tödi lölös, ma melamu irabo wuwulo xö ina gunon te ine.

<sup>28</sup> Turunon saxit, God irabo kip tewe abo mangana magingin saban kirip möxö nangadi, ma nang bara te tengen ögarin önga tödi, irabo döxömen taun ine bölök.

<sup>29</sup> Ma lamun ewe nang i tengen ögarin a Töxödös ne Tanono, God i karabo döxömen taun ine. Ina magingin saban na, irabo kis ulorexe ma kaim pe öxöwöm."

<sup>30</sup> Jisas ixo tengen bira, möxösa, idi toxo tengen, "Ine ma tano saban."

### *A nago re Jisas mabo tönö*

*(Matiu 12.46-50; Luk 8.19-21)*

<sup>31</sup> Io, a nago mabo tönö e Jisas toxo wanot, idi toxo tuu sik kö araman ma toxo tile önga tödi ra lalamus lo ine.

<sup>32</sup> A marakörö toxo kis elulurwe ine, me idi toxo tengen te ine, "A nago re nöngön mabo töm, idi ia xö araman te wawara re nöngön."

<sup>33</sup> Ine ixo ose, "E rabo tengen ösu bara ewe a nago re e, ma ewe abo töke."

<sup>34</sup> Io, ine ixo pere idi nang toxo kis elulurwein sik ine ma ixo tengen, "Idi na abo nago mabo töke."

<sup>35</sup> Ewe nang i mumuu abo lasanene nang e God i mamaa bara irabo pet, ine a töke, a saxake ma a nago re e."

## 4

### *A tene susulo*

*(Matiu 13.1-23; Luk 8.4-15)*

<sup>1</sup> Melamu, Jisas ixo urulo öbaling a inausu xö gegene tu Galili. Mabo marakörö nang toxo ot etok elulurwein ine ixo taxin köba, io, ine ixo kis laxa xö mön nang kö tu, ma marakörö toxo kis muu a gegene tu.

<sup>2</sup> Ine ixo usu idi ma oleleng ne lalaa xö tinenge öwuo, ma kölöme xö ausu rine ixo tengen,

<sup>3</sup> "Ölengen! A önga tödi ixo wan tua retewe abo irine wit kö komo.

<sup>4</sup> Ma nang ine ixo retewe nanin abo irine wit, a dauleng toxo subu melamu xö ngas, ma bung pun toxo wanot ma toxo en idi.

<sup>5</sup> Ma dauleng ne irine wit toxo subu xö öxöno wat nang kaim pe pu oleleng könan. A irine wit ixo das kaa pasaxit mon, möxösa, a pu ixo wöwöt.

<sup>6</sup> Ma xaken ixo tuu, ixo dek abo wit ma ixo mölös ma ixo met, möxösa, abo buon kaim kö sinu xöba uri xö pu.

<sup>7</sup> Dauleng ne irine wit toxo subu kaluluonin abo gargaras. Ma abo gargaras toxo pari abo wit nang i dadas kaa, io, abo irine wit kaim kö ino.

<sup>8</sup> Lamun a uleng ne irine wit toxo subu xö pu deek. Idi toxo das kaa ma toxo oleleng, ma toxo o. Dauleng ixo o eöt ma narun ne sangaun ne irine, dauleng toxo pitnö ma öng ne sangaun, ma dauleng toxo eöt ma önga mar ne irine wit."

<sup>9</sup> Io, Jisas ixo tengen, "Ewe nang ine ma talingine ra ölöngö, ine irabo ölangen."

<sup>10</sup> Xö axana bung nang ine xalik, a sangaun ma ninöng ne bak ne ausu mabo duöng nang toxo elulure ine, toxo ose ine lamun abo tinenge öwuo.

<sup>11</sup> Ine ixo tengen te idi, "God ixoro tabaa e mum ma nanase möxö kingdom kö God. Lamun kö nangadi nang

kö araman möxö kingdom, abo laa xirip idi tabo ölangen kö tinenge öwuo.

<sup>12</sup> Io, nang,

*'idi tabo wawara ma wawara, lamun idi tekebeöt ta werwere xulen te laa,  
me idi tabo ölöngö ma ölöngö, ma lamun idi tekebeöt ta ölangen kulan,  
xalik idi tabo dödom puxus me God irabo döxömen taun abo magingin saban te idi.' "*

<sup>13</sup> Io, Jisas ixo tengen köbo bak ne ausu, "Bule, mum kobo laa maras lamun ina tinenge öwuo na? Nang bara kaim, mum korobo öt ta ösöxö rebo tinenge öwuo.

<sup>14</sup> A tamana komo i susulo a tinenge re God.

<sup>15</sup> Dauleng ne nangadi te eöt ma wit i subu xö ngas nang te sulo a tinenge, i xarnang a nangadi tere ölengen a tinenge ma saxit mon Satan ibo ot ma ibo xikip tewe abo tinenge nang toboro sulo kölöme re idi.

<sup>16</sup> Ma dauleng te eöt ma irine wit i subu xö pu warawat. Idi te ölangen a tinenge, ma pasaxit mon te axanan tua xikip lo.

<sup>17</sup> Ma lamun idi tobo tuu ulik mon, möxösa, kaim idi ma buon. Nang bara tiip ma sasaban i ot möxö idi te kip a tinenge, ma saxit mon idi toboro wan tewe.

<sup>18</sup> Ma nangen a dauleng ne nangadi, idi te eöt ma irine wit i subu kaluluon köbo gargaras. Idi te ölengen a tinenge.

<sup>19</sup> Me idi te döxömen köbanin abo lalaa möxö öxöno lagunon ma ulamun a kinis ne orong nang ibo röxröxö rewe idi, me idi tobo maaa xöba lamun a mangana lalaa xabise. Inabo lalaa ibo önan laxa ma ibo wewet pi a tinenge re God, ma i kobo eöt ta o re pasuno.

<sup>20</sup> Dauleng ne nangadi te eöt ma irine wit i subu xö pu deek. Idi te ölengen a tinenge, me idi te kip lo, me idi te o a pasuno. Dauleng tabo o narun ne sangaun ne irine wit, ma dauleng ma pitnö ma öng ne sangaun ne irine wit ma dauleng ma önga mar ne irine wit."

*A laam kö ene bile  
(Luk 8.16-18)*

<sup>21</sup> Me ine ixo tengen te idi, "Mum bo xikip ölaxa a laam rua uxis kö ene bile bara xö ene öra? Kawaim, a laam morobo uxis lömö xö xönö iat möxönan.

<sup>22</sup> Abo laa sanene niang i mun sik, i xarna na niang irabo wanot kö maras. Mabo laa sanene niang i kait pi sik, i xarna na niang irabo wanot kö malmalan.

<sup>23</sup> Nang bere ewenene re öng ma talingine ra ölöngö, ine irabo mana tam."



24 Me ine ixo tengen bölök kö idi bira, “Mum morobo mana balaure ödeek a lasa mum mo ölengen. God irabo isik puxus urungan te mum xarnang iat mum mu ölangen kulen. Ma irabo öwöwö öbaling urungan te mum.

25 Ewenene midi nang idi ma lalaa, God irabo tabaa idi ma oleleng. Me ewenene midi nang kawaim idi mere lalaa, God irabo kip tewe bölök kirip abo lalaa xalik idi.”

*Abo irine wit nang iboro xuxubu*

26 Me Jisas ixo tengen bölök bira. “A kingdom kö God i xarnang a tödi i tewe nanin a irine wit kö pu.

27 Ma xöbo dömön ma xöbo xaken, niang ibo paluso bara ibo lalaran, abo irine wit iboro xuxubu ma iboro dadas taxin. Ma lamun ine iat i kala ösöxö bara ibo dadas bule.

28 A pu iat ibo öxubu a irine wit, sila ibo das kaa, io, ibo oo a kölömene, ma malamun irabo maruxo.

29 Nang bara iri maruxo, ina tödi ibo reree lo a pasuno, möxösa, a axana bung möxö kip nien iri ot.”

*A irine iaa nang a lak lik köba*

*(Matiu 13.31-32, 34; Luk 13.18-19)*

30 Me Jisas ixo tengen bölök bira, “Ire tabo tengen bira a kingdom kö God i xarnang a lasa? Bara xö mangana tinenge öwuo sa nang ire tabo pet tua palas ödeek ina tinenge na?

31 I xarnang a irine iaa nang a lak lik köba xöbo irine iaa xabise nang u bo susulo xö pu.

32 Ma nang bara tere sulo, ibo das kaa ma ibo taxin köba ma ibo saxit kirip abo iaa kölöme xö komo. Ma ibo masanga raxin, io, abo pun meriso lömö tobo ot ma tobo wewet abo wöwösö re idi xö sinisii möxönan.”

33 Me Jisas ixobo walwalas tinenge ma ixobo wewet abo oleleng ne mangana tinenge öwuo bira, nang irabo eöt te idi rua ölengen kulen.

34 Ine ixobo wöwörö xö marakörö mabo tinenge öwuo xalik mon. Ma lamun nang ine arixe mabo bak ne ausu re ine xalik mon, ine ixobo tengen osen ömaras abo tinenge öwuo re idi.

*Jisas ixo ömalile a dalun*

*(Matiu 8.23-27; Luk 8.22-25)*

35 Xö ina bung kö aien sumara xoxo, Jisas ixo tengen köbo bak ne ausu rine bara, “Ire ta wan köröp uruo xö lawa xabise möxö tu.”

36 Io, Jisas mabo bak ne ausu re ine toxo wan lo xalik a marakörö ma toxo kaa xö mön nang e Jisas ixoro kisisik könan. Ma dauleng ne mön bölök toxo wan arixe me idi.

37 A xiki raxin ixo wawaxat ma dalun ixo tawit laxa xö mön ma ari ixoro lörorö ra öwöwö a mön.

<sup>38</sup> Jisas ixo paluso sik malamun xö mön ma ixo lulungon kaa sik kö lulungo re ine. Ma abo bak ne ausu toxo ölaran ine ma toxo tengen te ine, “Tene Ausu, nöngön u kobo balamu ire, xalik tabo köngö?”

<sup>39</sup> Io, ine ixo taru ma ixo köö a xiki, ma ixo tengen kö dalun, “Örö ödödö! Ma örö malile!” Io, a xiki ixo kawam ma dalun ixo malile esexere.

<sup>40</sup> Io, Jisas ixo tengen köbo bak ne ausu re ine, “Mum, mo bubuut köba ruasa? Kaim iat bang e mum ma nunu?”

<sup>41</sup> Idi toxo buut köba ma toxo ose nanin öbaling idi iat bira, “A mangana tödi sa ia? Nang a xiki ma dalun te tame ine!”

## 5

*Önga tödi ma tano saban*

*(Matiu 8.28-34; Luk 8.26-39)*

<sup>1</sup> Io, Jisas mabo bak ne ausu rine toxo wan lies uri xö lawana tu Galili, xö xönö pu mee Gerasen.

<sup>2</sup> Nang e Jisas ixo kaa su xalik a mön, a tödi ma tano saban ixo wan su xalik abo lieng kö nangadi minet ta inasuo mine.

<sup>3</sup> Ina tödi na ixobo xisixis kölöme xöbo lieng möxöbo tödi minet, ma kaim pe tödi i öt ta kubus pi öbaling ine arixe mere mangana uno bara sen bölök.

<sup>4</sup> Ina tödi na, toxobo xuxut abo limine ma xexene, nexalik bara ixobo xörxöröp ina sen ma ixobo wörwörök abo aen kö xexene. Kaim pe öng i lölös sik ka rorop ine.

<sup>5</sup> Xöbo dömön ma xaken, kaluluon köbo lieng möxöbo minet ma kölöme xöbo maii ixobo kalasii, ma ixobo xurxuru öbaling a aine ma warawat.

<sup>6</sup> Ma nang ixo pere e Jisas kö palaa, ixo ulo ma ixo subun kexe mesilain ine.

<sup>7</sup> Ixo kup nöngösö lömö, “Jisas, a Barok kö God lömö saxit, u maaaa lamun a lasanene xalik e? E seng nöngön kö esene God u bele ögarin e!”

<sup>8</sup> Ixo tengen bira, möxösa, Jisas ixoro tengen tö ine, “Nöngön a tano saban, wan su xalik a tödi na!”

<sup>9</sup> Io, Jisas ixo ose ine, “Ewe a esem?”

Ixo balu ine bira, “A esene e ‘Arip ne Arip,’ möxö mem a oleleng.”

<sup>10</sup> Ma ixo tenge marmaris se Jisas sa ganim a ritile rewe idi möxö ina xönö.

<sup>11</sup> Oleleng ne bung bo toxo aan nana xö gegene maii.

<sup>12</sup> Abo tano saban toxo seng e Jisas, “Örö tile e mem urungan kaluluonin a bung bo. Örö ömaraxen e mem pa nilaxa rup pidi.”

<sup>13</sup> Io, ixo ömaraxen idi, mabo tano saban toxo wan su ma toxo laxa rup kö bung bo. Ina bung bo xirip, toxo öt ma nini arip ne bo, ma toxo ewasak su xö gegene maii urungan kölöme xö ari ma toxo köngö met.

<sup>14</sup> Io, a nangadi möxö balaure a bung bo, toxo ulo lo ra atöngösen min kö lagunon taxin ma xö boxönö lörörö. Mabo nangadi toxo wanot ta werwere a lasa nang ixo ot.

<sup>15</sup> Nang a nangadi toxo wanot pösöt e Jisas, idi toxo pere ina tödi nang abo tano saban toxoro tup kalik ine. Ixo laulawa sik ma ixo kisisik ma dinödöm pe ine ixoro maras. Mabo nangadi toxo buut.

<sup>16</sup> Io, a nangadi nang toxo pere ina laa, idi toxo tengen kö nangadi a lasa nang ixo ot kina tödi nang abo tano saban toxoro kis sine, ma toxo paraa bölök lamun a bung bo.

<sup>17</sup> Io, a nangadi toxo urulo ra tinenge marmaris se Jisas sa nuan pes xalik ina xönö re idi.

<sup>18</sup> Io, nang e Jisas ixo kakaa xö mön ma ixo mamaa ra nuan, a tödi nang abo tano saban toxoro tup kalik ine, ixo seng e Jisas sa nuan arixe mine.

<sup>19</sup> Me Jisas kaim kö ömaraxen lo ine, lamun ixo tengen te ine, "Örö wan baling kö lagunon te nöngön urungan kö nangadi re nöngön ma örö tengen tö idi a lasanene nang a Orong ire pet te nöngön ma a abalamu raxin te ine urungan te nöngön."

<sup>20</sup> Io, ina tödi ixo wan pes ma ixo urulo ra atöngösen kölöme xö xönö raxin Dekapolis, mabo lasanene nang e Jisas ixo pet te ine. Mabo nangadi toxo wuwus saban arixe.

*A balik minet ma a une miniset  
(Matiu 9.18-26; Luk 8.40-56)*

<sup>21</sup> Nang e Jisas ixo lies köröp baling kö mön uruo xö lawana tu Galili, a marakörö raxin toxo ot emorop pönö ine nang ine ixo kisisik kö gegene ari.

<sup>22</sup> Io, önga tödi a esene e Jairus, a tödi sila xö gunon ne sineseng ke idi abo Judeia, ma ixo ot bölök, ixo pere e Jisas ma ixo subun kexe xö nine xexene Jisas.

<sup>23</sup> Ma ixo tenge marmaris se Jisas, "A balik lik ke e, i ka minet. E seng nöngön, örö miang ma örö bulus a limem lömö rine, bara ine irabo deek ma irabo to."

<sup>24</sup> Io, Jisas ixo wan arixe mine.

A marakörö raxin toxo muu ine ma toxo parap sik iat tine.

<sup>25</sup> Ma önga une nangen niang, nang a dee ixobo önan kalik ine, ma ixo öt xarnang a sangaun ma ninöng ne awat.

<sup>26</sup> Ine ixo kip a tiip taxin kalik abo dokta ma ixo ösek abo lasa nang ine min, rö ine ra dedeek. Ma kaim. Nangen a dee ixo önan köba mon kalik ine.

27 Nang ine ixo ölangen a tinenge ure Jisas, ine ixo wan melamu rine kaluluonin a marakörö ma ixo sigi a man te Jisas.

28 Ixo pet ina na, möxösa, ine ixo döxömen, “Nang bara e sigi a man te ine mon, e rabo deek.”

29 Saxit mon a dee ixo masa xalik ine ma ixo örasen kö aine bara iri deek kalik ina tiip pe ine.

30 Io, saxit mon, Jisas ixo örasen bara ina lölös ixoro wan su xalik ine ma ixo tawuxus kaluluon kö marakörö ma ixo eose, “Ewe i sigi a man te e?”

31 Abo bak ne ausu rine toxo balu ine, “Örö pere a nangadi nang te emorop pönö nöngön, ma u ose bölök bule, ewe i sigi nöngön?”

32 Me Jisas ixo wawara nana iat tua werwere bere ewe iat ixo pet ina na.

33 Io, a une ixo wanot ma ixo subun kexe xö nine xexene Jisas, möxösa, ixo ösöxö arixin a lasa ixo ot tine. Ixo buut ma ixo dedede ma ixo tengen ösu xirip a turunon.

34 Jisas ixo tengen tö ine, “Balik, a nunu re nöngön iri öro nöngön. Örö wan ma malum ma öro langlanga xalik ina miniset te nöngön.”

35 Nang e Jisas nangen bang ixo wöwörö xö une, a dauleng ne duöng möxö gunon te Jairus, a tödi raxin möxö gunon ne sineseng, idi toxo tengen te Jairus, “A balik ke nöngön iri met. Nöngön u bele isik a tiip kö tene ausu.”

36 Jisas kaim a mumuu a lasa idi toxo rengrengan, ma ixo tengen te Jairus bira, “U bele buut. Örö mana nunu mon.”

37 Jisas kaim kö ömaraxen tebo duöng bölök kua mumuu ine, nexalik mon e Pita, Jems, me Jon a tönö re Jems.

38 Nang idi toxo ot kö gunon te Jairus, Jisas ixo pere arixin a marakörö toxo ees köba ma toxo gegee nöngösö lömö.

39 Ixo wan laxa ma ixo tengen tö idi, “Mum bele ees ma ginee. A balik i kobo met. Inexalik i paliso mon.”

40 Me idi toxo isis belek ine.

Ma nang ixoro tile ösu a nangadi xirip, ixo lamus lo a tata ma nago xö balik arixe mabo bak ne ausu nang toxo wan arixe mine, ma toxo wan laxa urungan kö xönö nang a balik ee.

41 Io, Jisas ixo tön a limine ma ixo tengen te ine, “Talita kum!” (A unine bara, “Balik lik, e tengen te nöngön, taru kaa!”).

42 Saxit mon, a balik ixo tuu kaa ma ixo önan nana. (Ine ma sangaun ma ninöng ne awat). Ma nang idi toxo pere ina na, toxo wuwus saban köba arixe.

<sup>43</sup> Ine ixo isik a tinenge lölös bere idi tebele tengen osen ina na xere öng, ma ixo tengen te idu ra tabaa ine mere laa ra enen.

## 6

*A propet niang tokobo ii ine  
(Matiu 13.53-58; Luk 4.16-30)*

<sup>1</sup> Jisas ixo wan kalik ina xönö nang ma ixo wan urungan kö lagunon tine. Ma abo bak ne ausu rine toxo arixe mine.

<sup>2</sup> Nang a bung Sabat ixo ot, Jisas ixo urulo a ausu xö gunon ne sineseng. Ma oleleng idi nang toxo ölengen ine toxo wuwus saban.

Idi toxo ose bira, "Ina tödi na i kip lo inabo mangana lalaa na mole? A lasa ina nanase na nang toxoro tabaa ine min, nang ine ibo wewet abo lalaa lölös ne auwuwus!"

<sup>3</sup> Ine mon a tene pet gunon, nang a barok ke Maria ma abo tönö rine e Jems, Jon, Judas me Saimon. Mabo saxana nangen na me ire." Me idi toxo mölök kalik ine.

<sup>4</sup> Jisas ixo tengen tö idi, "Xöbo lagunon kabise a nangadi tobo ii öraxin a propet. Inexalik kö lagunon iat tine ma kaluluon kö bung marapun ma nang bölok kö gunon tine, tekarako ii ine."

<sup>5</sup> Io, Jisas i koxobo eöt ta wewet te laa lölös ne auwuwus singan. Inexalik ixo bulus a nine limine lömö xö dauleng ne miniset ma ixo ölanglanga idi.

<sup>6</sup> Me Jisas ixo wuwus saban, möxösa, kaim idi xo nunu.

*Jisas ixo tile ösu abo bak ne ausu  
(Matiu 10.5-15; Luk 9.1-6)*

Io, Jisas ixo wan nana xöbo lagunon ma ixo usu nanin a nangadi.

<sup>7</sup> Ixo kuwe etok lo a sangaun ma ninöng ne bak ne ausu rine ma ixo tile rewe idi ninöng ninöng ma ixo tabaa idi ma lölös sua tile ösu abo tano saban.

<sup>8</sup> Ixo tengen ömaras idi bira, "Mum korobo kip pe laa xö nuan te mum, ma lamun morobo tön kalik a buxo. Mum korobo kip pe nien, a rat, ma re tuluwok kölöme xö kie.

<sup>9</sup> Mum morobo sige abo sandel, ma lamun mum korobo kip bölok ke önga man kabise."

<sup>10</sup> Jisas ixo tengen bölok kidi bira, "Nang bara mum morobo laxa xö önga gunon, morobo xisixis iat tingan ot nang mum morobo wan lo baling kalik a lagunon niang.

<sup>11</sup> Ma nang bara önga lagunon i kobo öga e mum, bara i kobo tame e mum, io, nang bara mum ka nuan, mum morobo se rewe a kabus kalik abo xexe mum rua uxileng kö idi lamun a magingin saban te idi nang toxo pet te mum."

<sup>12</sup> Io, abo bak ne ausu toxo wan ebasin ma toxo tenge lölös bara a nangadi tabo mana dödöm puxus.

<sup>13</sup> Idi toxo irewe a oleleng ne tano saban ma toxo salap a wel kö oleleng ne nangadi miniset ma toxo ölanglanga idi.

*Erot ixo dökö e Jon*

*(Matiu 14.1-12; Luk 9.7-9)*

<sup>14</sup> Io, king Erot ixo ölangen bira lamun abo lalaa nang idi toxo pet, möxösa, a esene e Jisas ixo taxin köba xö ölöngö rine. Dauleng toxo rengrengen bere Jisas ine ma lölös taxin tua wewet abo lalaa ne winiwus lölös, möxösa, idi toxo dökömen bere Jisas ine iat e Jon a tene baptais nang ixoro taru baling kalik a minet.

<sup>15</sup> Inexalik a dauleng toxo tengen bere ine e Elaija. Ma dauleng iat toxo tengen bere ine a propet möxöbo propet mee mesila saxit.

<sup>16</sup> Nang e Erot ixo ölangen bira, ixo tengen, "E Jon, a tödi nang e xo tee xöröp a inöno, iri taru baling kalik a minet!"

<sup>17</sup> Erot ixoro tengen bira, möxösa, ine iat ixo isik a tinenge rua öxös lo e Jon tua bulbulus ine xö gunon ne aömokorot. Erot ixo pet bira, möxösa, e Erodias a une re tönö ine, niang e Pilip, ma lamun Erot ixo elolo belek e Erodias.

<sup>18</sup> Jon ixobo rengrengen te Erot, "I kobo töxödös bara örobo elolo a une xö tönö nöngön."

<sup>19</sup> Io, Erodias ixo bala saban te Jon ma ixo maaaa ra sesexomet ine. Ma lamun ine i kobo eöt

<sup>20</sup> möxösa, e Erot ixo buburin e Jon ma ixo balaure ödeek ine xalik ibo met, möxösa, ine ixo ösöxö bara a tene töxödös ma a tödi madakdak ine. Nang e Erot ixo ölangen e Jon, ixo dödöm oleleng köbo winörö rine, ma lamun ixobo maaaa ra ölangen a tinenge re ine.

<sup>21</sup> Önga axana bung deek ixo ot tue Erodias bara irabo pet eörin im a dinödöm pe ine. Erot ixo pet a nien taxin ta uxileng a bung nang toxo kip ine xönan. Io, ixo pet ina nien ulamun a duöng taxin nang tobo rorop ine xö tinörön ne gapman mabo umri mabo duöng sisila mee Galili.

<sup>22</sup> Io, nang a balik ke Erodias ixo laxa ma ixo tie, ine ixo öaxanan e Erot mabo osee rine.

Io, king Erot ixo tengen kö balik, "Nang bara u maaaa lamun a mangana lasanene, örö tengen, me e rabo tabaa nöngön min."

<sup>23</sup> Me ine ixo usugurno ine bira, "Turunon saxit, a mangana lasanene nang u ose lamun, e rabo tabaa nöngön min, ma nang bara u ose e xö subana kingdom pe e, io, e rabo tabaa iat nöngön min."

<sup>24</sup> Io, a balik ixo wan su ma ixo ose a nago re ine, “A lasa nang e rabo ose lamun?” E nene ixo balu ma ixo tengen, “Örobo ose ulamun a öxöno e Jon a tene baptais.”

<sup>25</sup> Ma saxit mon, a balik ixo baling urungan kö king ma ixo tengen, “Na iat, e maa bara örö tabaa e ma öxöno e Jon a tene baptais kö bile.”

<sup>26</sup> Me Erot ixo tapunuk köba, ma kawaim ine ra öngasin a sineseng kine möxö ixoro tenge ösugurno sila xö ölöngö xöbo osee.

<sup>27</sup> Ma saxit mon, e Erot ixo tile önga umri rua xikip lo a öxöno e Jon ura. Io, ina umri ixo wan laxa xö gunon ne aömokorot ma ixo tee xöröp lo a öxöno e Jon,

<sup>28</sup> ma ixo kip ot öbaling a öxöno Jon kö bile. Io, a umri ixo isik kö balik, ma balik ixo tabaa e nene min.

<sup>29</sup> Ma abo bak ne ausu re Jon idi toxo ölangen bira, io, idi toxo wanot ma toxo kip lo a lewene aine e Jon ma toxo bulus kö maöt.

*Jisas ixo tabaa a pitnö ne arip*

*(Matiu 14.13-21; Luk 9.10-17; Jon 6.1-14)*

<sup>30</sup> Abo aposol toxo kis etok arixe me Jisas ma toxo töngösen ine mabo lalaa nang idi toxoro pet ma toxoro eusu min.

<sup>31</sup> Möxö kaim a eöt a axana bung kö idi ra nien, möxösa, a oleleng ne nangadi toxo önan eli, io, Jisas ixo tengen köbo bak ne ausu rine, “Moro miang, ire xalik ta wan urungan kö xönö madödö me ire ta mamas.”

<sup>32</sup> Io, idi iat kalik toxo wan lo xö mön urungan kö xönö tataun.

<sup>33</sup> Ma oleleng ne nangadi nang toxo perexulen e Jisas mabo bak ne ausu rine nang toxo önan, toxo ulo möxöbo lagunon taxin kirip ma toxo ot sila ridi.

<sup>34</sup> Ma nang e Jisas ixo ösö, ixo pere a marakörö raxin, ma ixo marase idi, möxösa, idi toxo xarnang a bung sipsip te tup ma kaim idi ma tene walbalaurai. Io, ixo urulo ra usu idi mabo mangana lalaa.

<sup>35</sup> A xaken ixoro su mabo bak ne ausu toxo ot pösöt ine ma toxo tengen te ine, “Ina xönö na a xönö tataun ma iri aien şumara xoxo.

<sup>36</sup> Örö tile rewe a nangadi na. Me idi ta wan urungan köbo lagunon örörö, ma tabo kun nien tö idi ra enen.”

<sup>37</sup> Me Jisas ixo tengen tö idi, “Mum iat, mum moro tabaa idi merebo lalaa rua enen.”

Mabo bak ne ausu rine toxo balu öbaling ine bira, “U maa bara mem mara wan, mara ösek tewe sik a nini mar ne tuluwok na ra kun a beret tua ratabaa idi min tua enen?”

38 Io, Jisas ixo ose idi, "Ma ausen ne xönö beret niang e mum min? Mum moro wan me mum morobo pere." Nang idi toxo ösöxö lo, idi toxo tengen bara, "Pitnö ne beret ma nini en."

39 Io, Jisas ixo tengen köbo bak ne ausu rine bara, "Mum moro erimine idi xö kinis arixe xö maduduan ne pasle."

40 Io, idi toxo kis erimine idi, uleng a mar ma uleng a pitnö ne sangaun.

41 Io, e Jisas ixo tön lo ina pitnö ne beret ma nini en ma ixo wawara kaa xö balana kubu, ma ixo tengen deek ke God ma ixo pidik a beret. Ma ixo tabaa abo bak ne ausu re ine min, me idi toxo erimine nanin kö nangadi. Ma ixo erimine bölök idi ma nini en kaluluonin idi.

42 Me idi xirip toxo an ma toxo masii.

43 Io, abo bak ne ausu toxo tuxo a sangaun ma ninöng ne kölöt ma subana inan ma beret nang idi toxo en paling.

44 Mabo duöng nang toxo an, ixo eöt ma pitnö ne arip.

45 Ma saxit mon, Jisas ixo tile öxaa abo bak ne ausu rine xö mön, bara idi tabo sila rine uruo Betsaida, me ine bang, irabo tile elixilik a marakörö.

*Jisas ixo wan lömö xö ari  
(Matiu 14.22-23; Jon 6.15-21)*

46 Melamu ixo wan lo xalik a marakörö ma ixo wan kaa wes kalik idi uruso xö maii rua sineseng.

47 Ma nang ixoro aien, idi toxo uluso kaluluon kö tu raxin, me ine xalik mon ixo xisixis kö maii.

48 Jisas ixo pere abo bak ne ausu rine toxo uuluso esuo ma xiki. Xö lörörö xö pitnö ne axana bung kö puxu bubung, e Jisas ixo önan lömö xö rasi urungan tidi. Ine ixo maa ra nuan saxit idi,

49 ma lamun nang idi toxo pere ine ixo önan lömö xö rasi, idi toxo nunuxas bara e Jisas a tano. Io, idi toxo kup wösö

50 möxösa, idi xirip toxo pere ine me idi toxo buut saban arixe.

Saxit iat mon, e Jisas ixo tengen tö idi, "Mum moro balamasa. E mon. Ganim a binuut."

51 Io, ixo kaa xö mön arixe midi ma a xiki ixo kawam. Me idi toxo wuwus kirip arixe,

52 möxö kaim idi xo marmaras ulamun a unine arabaa möxö beret nang e Jisas ixo tabaa a pitnö ne arip ne marakörö min, möxö abo baladi ixo lölös.

*Jisas ixo ölanglanga a oleleng ne nangadi miniset kö xönö  
Genesaret  
(Matiu 14.34-36)*

53 Ma nang idi toxo köröp kö tu ma toxo ösö Genesaret, me idi toxo kut oxe a mön.



<sup>54</sup> Idi toxo kaa su xalik a mön, ma saxit mon a nangadi toxo perexulen e Jisas.

<sup>55</sup> Me idi toxo ulo elixilik köbo lagunon, me idi toxo kip ot abo miniset lömö xöbo ben urungan kö boxönö nang toxo ölangen bere ine nangen ne.

<sup>56</sup> Ma nang kö boxönö xirip ma xöbo lagunon kirip nang e Jisas ixobo önan könan, a nangadi toxobo bulbulus abo miniset kölöme xö boxönö möxö misik. Me idi toxobo seng ine bara irabo ömaraxen idi rua rörön a ngusuno man te ine mon, me ewe idi nang toxo tön, toxobo langlanga.

## 7

*Abo lalaa i eöt tua wewet ösaban a tödi  
(Matiu 15.1-20)*

<sup>1</sup> Abo Parasi ma dauleng ne tene ausu möxöbo warkurai te Moses, nang toxo wanot meriso Jerusalem, toxo kis etok arixe me Jisas.

<sup>2</sup> Me idi toxo pere a dauleng möxöbo bak ne ausu rine toxo enen a nien. Ma toxo döxömen bara e God i pere sik a sasaban köbo limine idi abo bak ne ausu, möxösa, idi kaim kö gisgis abo limine idi xarnang toxo döxömen bara abo warkurai te Moses i tengen bie.

<sup>3</sup> (Abo Parasi mabo Judeia xirip te mumuu abo ausu nang toxo kip kalik abo tubudi. Ina ausu bira nang bara idi tokobo muu ödeek a warkurai möxö gis lime xö axana bung möxö gilime, io, idi tokobo eöt ta nien.

<sup>4</sup> Io, nang bere idi tobo wan baling meri xö misik, idi tabo gis abo limedi. Io, melamu, idi tabo an. Me idi tobo mumuu a oleleng ne warkurai nang abo tubudi toxo tengen te idi bie. Idi tabo gis ödeek abo kap, abo sosopen mabo dis.)

<sup>5</sup> Io, abo Parasi mabo tene ausu möxöbo warkurai te Moses toxo ose Jisas, "Ruasa abo bak ne ausu re nöngön tokobo muu eörin a ausu möxöbo tubuno ire? Ruasa bölök idi te enen a nien mabo limine idi nang a lak saban?"

<sup>6</sup> Me ine ixo balu idi, "E Aisaia i tengen a turunon lamun e mum. Mum bo röxröxö mon bara mum a lak deek, xarnang ixo geet abo tinenge re God bira,

*'Inabo nangadi na, tobo ii öxaa e mabo ngaladi,  
ma lamun abo kat tidi i kis kö palaa xalik e.*

<sup>7</sup> *Idi tobo lolotu tataun te e,  
möxösa, abo ausu ridi i ot mon möxö nangadi.'*

<sup>8</sup> Mum moxoro ömalim tewe abo warkurai te God. Me mum mo tön sik bölök abo ausu möxö nangadi mon."

<sup>9</sup> Me Jisas ixo tengen öbaling ke idi, "Mum ma nanase deek kua bulbulus tewe abo warkurai te God, muu a inausu xöbo tubu mum iat.

<sup>10</sup> Na e tenge ma lasa nang e Moses ixo tengen: ‘Nöngön örobo ii a tata ma nago re nöngön,’ me, ‘Ewenene nang i tenge saban kö tamana bere nene, mum morobo sexomet ine.’

<sup>11</sup> Ma lamun mum bölök bo rengrengen bira: Ewe nang ma önga laa rua rorop e tamana bere nene, io, i öt bölök bara ine irabo tengen, ‘E xoro tagur sik kua tabaa e God min. E kebeöt ta tabaa nöngön min tua rorop nöngön.’ Ma nang bara mum mo döxömen bira,

<sup>12</sup> io, mum bele ömaraxen ine ra wewet tebo lalaa lamun e tata me nago rine.

<sup>13</sup> Möxö ina na, mum bo döxömen taun a tinenge re God, möxösa, mum bo isik abo ausu nang mum bo kip kalik abo untubu mum. Me mum bo wewet a oleleng ne mangana lalaa xarnang.”

<sup>14</sup> Io, Jisas ixo kuwe öbaling a marakörö urungan tine ma ixo tengen, “Mum kirip moro ölangen e, ma moro maras könän.

<sup>15-16</sup> A laa nang i kis kö araman ma i wan laxa xö tödi i kebeöt ta ösaban ine. Inexalik bara a lasa nang i kis kölöme xö tödi ma i wan su xö araman, ibo ösaban a tödi.”

<sup>17</sup> Melamu nang ine ixo wan lie a marakörö ma ixo wan laxa xö gunon, abo bak ne ausu rine toxo ose ine lamun ina tinenge öwuo.

<sup>18</sup> Jisas ixo tengen tö idi, “Mum kobo maras, aa? Mum kobo maras kö lasa nang ibo önan laxa xö tödi, i kebeöt ta ösaban ine?

<sup>19</sup> I kebeöt, möxösa, i kara laxa urungan kö kat, nexalik ibo laxa xö balna, io, ibo wan su baling kalik a aine.” (Io, nang e Jisas ixo tengen bira, ixo tengen osen bara abo nien kirip i deek kua enen.)

<sup>20</sup> Me ine ixo tengen öbaling, “A lasa nang i wan su möxö könönö tödi, i ösaban ine.

<sup>21</sup> Ma meringan kölöme xö könönö tödi ibo wan su abo dinödöm saban, a tatalien ne ilawa, a tatalien pinilo, a tatalien möxö inarsexomet, a tatalien ne ilawa ma önga tödi alolo,

<sup>22</sup> a gumut, abo mangana sasaban, atöxö, a tatalien ne xekeme, a tatalien ne aneek, tuxo tinenge ra ögarin önga tödi, a ii öxaa a esem, ma tatalien ne kinis ne baulang.

<sup>23</sup> Inabo lalaa saban na ibo wan su möxö kölöme ma ibo wewet ösaban a tödi.”

*A nunu xö önga une  
(Matiu 15.21-28)*

<sup>24</sup> Jisas ixo wan lo meringan kina xönö ma ixo wan urungan kö xönö mee Tair. Ixo wan laxa xö gunon ma i

ixo mun. Ma kaim kö mamaa bara re öng irabo ösöxö bara ine nangen nang. Lamun ine i koxobeöt ta minun.

<sup>25</sup> Io, önga une, nang a tano saban ixo kis kö balik lik kine, ixo ölangen bere Jisas angen. Ine ixo wanot pösöt e Jisas ma ixo subun kexe mesilain e Jisas.

<sup>26</sup> Ina une na, ine a Grik (kawaim bara ine a Judeia). Toxo kip ine ri Ponisia i kis kö xönö raxin Siria. Ixo tenge maris urungan te Jisas sua irewe a tano saban kalik balik lik kine.

<sup>27</sup> Me Jisas ixo tengen te ine, “Ire tabo arun ta tabaa a bung barok ma nien tö idi ra minasi, möxö i kobo töxödös bara ire tabo kip lo a nien kö bung barok ma tabo tewe rabaa a bung puluwun min.”

<sup>28</sup> Me ina une ixo balu ine ma ixo tengen, “A turunon saxit, Orong, ma lamun abo wuluwun kö ene öra, idi tobo enen abo perene nien kö bung barok lixilik.”

<sup>29</sup> Io, Jisas ixo tengen tö ine, “Möxösa u balu ödeek e, örö wan, a tano saban iri wan tewe xalik a balik lik ke nöngön.”

<sup>30</sup> Io, ina une ixo baling urungan kö gunon tine ma ixo pere a balik lik ke ine ixo maru sik kö öra, ma tano saban ixoro wan kalik ine.

### *Önga tödi, a talinge baa ma ngala bot ine*

<sup>31</sup> Io, Jisas ixo wan lie ina xönö Tair ma ixo wan köröp kö lagunon taxin Saidon ma ixo wan su urungan kö tu Galili ma kölöme xö xönö Dekapolis.

<sup>32</sup> Io, a dauleng ne nangadi toxo kip ot a önga tödi urungan tine. A talinge baa ma ngala bot ine. Me idi toxo seng e Jisas sua bulbulus a limine xö tödi.

<sup>33</sup> Io, Jisas ixo lamus lo ine xalik a marakörö, ma ixo bulus a nine kasine limine xö nine talingine ina tödi, ma melamu ixo gisip a limine, io, ixo sigi a kamene.

<sup>34</sup> Jisas ixo wawara kaa uruso lömö xö balana kubu ma bala maris ma ixo tengen tö ine, “Epapata!” (A unine bira, “Örö tamasawang!”).

<sup>35</sup> Saxit mon, ma nine talingine ina tödi ixo tamasawang, ma kamene ixo wawaxan ma ixo urulo rua tinenge.

<sup>36</sup> Io, Jisas ixo isik a tinenge lölös bere idi tebele tengen kere öng. Ma lamun abo lalaa oleleng nang ine ixo wewet, nangen bölök idi toxo etöngösen nana min.

<sup>37</sup> Idi toxo wuwus saban, me idi toxo tengen, “Ine ibo wewet ödeek abo lalaa xirip. Me ine ibo wewet abo talinge baa rua ölöngö ma ngala bot tua tinenge.”

## 8

*Jisas ixo tabaa a nit ne arip*

*(Matiu 15.32-39)*

<sup>1</sup> Xinabo bung niang a marakörö xabise toxo ot etok. Ma nang kaim idi ma nien tua enen, me Jisas ixo kuwe abo bak ne ausu re ine urungan te ine ma ixo tengen,

<sup>2</sup> “E marase a nangadi na idi te kis arixe me e xö narun ne bung tar ma kaim idi ma nien.

<sup>3</sup> Nang bara e rabo tile idi xöbo lagunon te idi ma irilöng, idi tabo met saxit kö ngas, möxösa, a dauleng ke idi toxo wanot möxö ngas ömat.”

<sup>4</sup> Mabo bak ne ausu rine toxo tengen te ine, “Ma ule re xönö tataun ta nang ke tödi i öt ta xikip eörin tebo beret tua tabaa idi?”

<sup>5</sup> Jisas ixo ose, “A nausen ne xönö beret nangen me mum?”

Me idi toxo balu ine bira, “Pitnö ma ninöng.”

<sup>6</sup> Io, ine ixo tengen kö marakörö ra kinis kö pu. Ma nang ixo kip lo a pitnö ma ninöng ne beret ma ixo tengen deek kö God ulamun. Ixo pidik ma ixo isik köbo bak ne ausu ra erimine nanin kö nangadi mabo bak ne ausu toxo pet eörin.

<sup>7</sup> Me idi angen bölök ma dauleng ne inan lixilik, ma nang ixo tengen deek ke God, ixo tengen köbo bak ne ausu rua erimine nanin te idi.

<sup>8</sup> Abo marakörö toxo an ma toxo masii. Melamu im abo bak ne ausu toxo kip lo a pitnö ma ninöng ne kölöt subana nien nang ixo kis.

<sup>9</sup> A marakörö nang toxo kis ixo eöt ma nit ne arip. Ma ixo tile rewe idi xöbo lagunon te idi,

<sup>10</sup> me ine xö kakaa xö mön arixe mabo bak ne ausu re ine ma toxo wan urungan kö xönö möxö Dalmanuta.

*Toxo seseng ulamun a auxileng*

*(Matiu 16.1-4)*

<sup>11</sup> Abo Parasi toxo wanot pösöt e Jisas ma toxo urulo ra agot arixe me ine. Idi toxo ose bara irabo pet te önga mangana auxileng lölös sua osen bara abo tinörön te ine meriso re God, möxö toxo maaaa ra könönöin ine.

<sup>12</sup> Jisas ixo örasen a tiip kö to re ine ma ixo tengen, “Ruasa inabo marakörö mee nixinen te ose lamun a uxileng lölös? E tengen a turunon te mum, kaim pe uxileng merso lömö irabo ot te mum.”

<sup>13</sup> Io, ixo wan lie idi, ma ixo kakaa laxa xö mön ma ixo uluso lies urungan kö lawa xabise.

*A ausu möxöbo Parasi*

*(Matiu 16.5-12)*

14 Abo bak ne ausu toxo dōxōmen taun ta kip beret, nexalik ōnga beret nangen kō mōn arixe me idi.

15 Jisas ixo tenge lōlōs se idi, "Tumarang e mum, lamun a is kōbo Parasi ma nang bōlōk ke Erot."

16 Idi toxo rengreng nana min kaluluonin idi ma toxo tengen, "Ine i tengen bira, mōxōsa, kaim ire ma beret."

17 Jisas ixoro ōsōxō ina tinenge ridi, ma ixo ose idi, "Ruasa mum mo wōwōrō oleleng kō kinis se mum bara kaim pebo beret? Mum kala pere ōmaras bang? Abo bala mum a lak lōlōs?"

18 Mum ma mara mum, ma lamun mum mo kōbo pere. Me mum ma talinge mum, ma lamun mum kobo ōlōngō? Me mum kobo dōdōxōmen lo?

19 Nang e xo pidik ina pitnō ne xōnō beret lamun a pitnō ne arip, a nausen ne kōlōt wōwō ne subana nien nang mum moxo tuxo?"

Idi toxo tengen, "Sangaun ma ninōng ne kōlōt".

20 "Ma nang e xo pidik a pitnō ma ninōng ne beret lamun a nit ne arip, a nausen ne kōlōt wōwō ma subana nien nang mum moxo kip lo?"

Idi toxo tengen, "Pitnō ma ninōng."

21 Io, Jisas ixo tengen te idi, "Mum kala maras iat bang?"

### *A tōdi marapulo ro Betsaida*

22 Idi toxo wanot to Betsaida, ma dauleng ne nangadi toxo lamus ot a tōdi marapulo ma ixo seng e Jisas sua sisigi ine.

23 Jisas ixo tōn lo ina marapulo xō limine ma ixo lamus ōsu ine xalik a lagunon. Nang ine ixo ibis a nine marana tōdi ma ixo bulus a nine limine lōmō rine, ma ixo ose, "U pere bōlōk ke laa?"

24 Ina tōdi ixo tadang kaa ma ixo tengen, "E pere a nangadi. Idi te wawara xarnang abo uno iaa te ōnan nana."

25 Io, Jisas ixo bulus ōbaling a nine limine lōmō xōbo marana ina tōdi. Ma a nine marana ixo tamasawang, ma nine marana ixo deek ma ixo pere ōdeek kirip abo lalaa.

26 Jisas ixo tile rewe ine urungan kō gunon te ine ma ixo tengen, "U bele wan laxa xō lagunon Betsaida."

### *Pita ixo tengen ōsu bere Jisas a Mesaia*

*(Matiu 16.21-28; Luk 9.22-27)*

27 Jisas mabo bak ne ausu re ine toxo wan urungan kōbo lagunon kō araman Kaisaria Pilipai. Xō nuan te idi xō ngas, Jisas ixo ose, "A nangadi tobo rengrengen e me we?"

28 Io, idi toxo balu ine, "Dauleng te tengen bere nōngōn e Jon a tene baptais, dauleng te tengen bere nōngōn e Elaija, ma lamun dauleng te tengen bara nōngōn a ōng mōxōbo propet."

<sup>29</sup> Me ine ixo ose, “Me mum, mum bo rengrengen e me we?”

Io, Pita ixo balu ine ma ixo tengen, “Nöngön a Mesaia.”

<sup>30</sup> Me Jisas ixo panak idi bere idi tebele tengen osen kere öng bere ine ewe.

*Jisas ixo tengen bara irabo met*

*(Matiu 16.21-28; Luk 9.22-27)*

<sup>31</sup> Io, Jisas ixo urulo ra usu idi bira, “A Barok kö Tödi irabo kip lo a tiip möxö oleleng ne lalaa. Abo sisila, mabo pris tataxin mabo tene ausu möxöbo warkurai te Moses idi tabo öbulubun ine. Ma a nangadi tabo sexomet ine ma melamu xö narun ne bung irabo taru baling.”

<sup>32</sup> Me ine ixo tengen ömaras idi lamun a minet te ine. Io, Pita ixo lamus pes lo ine xalik idi ma ixo urulo ra xöxöö ine lamun a tinenge nang ixo tengen.

<sup>33</sup> Ma lamun, nang e Jisas ixo talingen ma ixo pere abo bak ne ausu re ine, ixo köö e Pita. Ma ixo tengen bira, “Satan, wan pes kalik e! Pita, a dinödöm pe nöngön i kobo muu sik abo dinödöm pe God, lamun nöngön u mumuu a dinödöm kö nangadi.”

<sup>34</sup> Io, Jisas ixo kuwe a marakörö ura re ine arixe mabo bak ne ausu re ine ma ixo tengen: “Nang bara re tödi i mamaa ra mumuu e, ine irabo mana döxömen taun ine iat ma irabo sölök a sölöxöröp pe ine ma irabo muu e.

<sup>35</sup> Möxö ewe nang i mamaa rua töndik sik iat a to re ine, irabo ömalim tewe, ma lamun ewe niang i ömalim tewe a to re ine rua gene e ma rua gene a tinenge deek, irabo töndik sik.

<sup>36</sup> Nang bara tödi i kip lo xirip abo lalaa möxö öxöno lagunon, ma i ömalim tewe a to runon te ine, io, a lasa i deek möxö inabo lalaa irabo top ine? Kawaim.

<sup>37</sup> Ma a tödi irabo isik a xunuxun sa rua xukun puxus lo a to re ine?

<sup>38</sup> A marakörö mee nixinen tobo tuu tawuxus xalik e God me idi tobo wewet abo magingin saban. Nang bara öng mere mum i mengmenge re e mabo tinenge re e, io, a Barok kö Tödi irabo mengengin ine nang ine irabo wanot kö mariris kö Tata re ine arixe mabo angelo madakdak.”

## 9

<sup>1</sup> Me Jisas ixo tengen öbaling ke idi, “Turunon saxit, dauleng nang te tuu sik na takarabo met ot nang idi tabo pere a kingdom kö God irabo ot ma lölös.”

*Jisas ixo xuxulas lömö xö maii*

*(Matiu 17.1-13; Luk 9.28-36)*

<sup>2</sup> Melamu xö pitnö ma öng ne bung ixo saxit, Jisas ixo lamus lo e Pita, Jems me Jon arixe mine urso lömö xö maii raxin, nang idi xalik mon. Me Jisas ixo xuxulas kö mamaran tidi.

<sup>3</sup> Abo man te ine ixo wipidien ma ixo pidien köba saxit nang kaim pe öng kö öxöno lagunon i eöt ta gisgis öpidien ina man.

<sup>4</sup> Me Elaija me Moses toxo wösö ridi ma toxo wöwörö me Jisas.

<sup>5</sup> Io, Pita ixo tengen te Jisas, “Tene Ausu, i deek bara met mara xisixis sa. Met mara uru re narun ne walpali, öng ke nöngön, öng ke Moses ma öng ke Elaija.”

<sup>6</sup> (Ine i kobo ösöxö re laa ra rengrengen, idiet toxo buut saban arixe.)

<sup>7</sup> Io, a kubu ixo wösö ot ma ixo tawi idi, ma inöno öng ixo ot möxö kubu, ixo tengen, “Ine ano Barok ke e. E maaaa lamun ine. Muot morobo ölangen ine!”

<sup>8</sup> Saxit mon, idiet toxo wawara eli nana, ma kaim idiet ta werwere re öng, e Jisas xalik mon.

<sup>9</sup> Ma nang idi toxo önan su baling kalik a öxöno maii, Jisas ixo isik a tinenge lölös bara idiet tebele tengen osen kere öng a lasa nang idiet te pere ot nang a Barok kö Tödi irabo taru baling kalik a minet.

<sup>10</sup> Me idiet toxo pidik ma tinenge re idiet iat, ma toxo wöwörö min iat te idiet bara a lasa a unine möxö tinenge nang, “Taru baling kalik a minet!”

<sup>11</sup> Me idiet toxo ose ine, “Ruasa abo tene ausu möxöbo warkurai te Moses tobo rengrengen bere Elaija irabo wanot sila?”

<sup>12</sup> Jisas ixo balu, “I turunon bara Elaija irabo wanot sila, ma irabo bulus ödeek öbaling abo lalaa. Ma ruasa nang tere geet bara a Barok kö Tödi irabo kip a kinadik ma tabo kasen tewe ine?”

<sup>13</sup> E tengen te muot, Elaija iri ot, me idi toxoro pet eörin abo lalaa urungan tine nang idi toxo maaaa lamun, xarnang toxo geet lamun ine.”

*A barok ine ma tano saban  
(Matiu 17.14-21; Luk 9.37-43)*

<sup>14</sup> Ma nang idi toxo ot pösöt abo bak ne ausu xabise, idi toxo pere a marakörö toxo elulurwe idi, mabo tene ausu möxöbo warkurai te Moses toxo egot arixe me idi.

<sup>15</sup> Ma nang a nangadi xirip toxo pere e Jisas, idi toxo wuwus saban me idi toxo ulo urungan te ine rua öga lo ine.

<sup>16</sup> Jisas ixo ose abo bak ne ausu re ine, “A lasa mum mo egot me idi lamun?”

17 Önga tödi kaluluonin a marakörö ixo balu ine, “Tene Ausu, e lamus ot a barok ke e ura re nöngön, möxö a tano saban i tup pe ine me ine kebeöt ta tinenge.

18 Nang bara tano i tup pe ine, ibo tewe ine urungan kö pu ma bise ibo wöwö xö ngalana ma ibo engiren abo ngisine ma aine ibo södön kirip. E xo seng abo bak ne ausu re nöngön tua irewe ina tano, nexalik kaim idi ra eöt.”

19 Jisas ixo balu, “Mum a marakörö mee nixinen nang mum kobo nunu, e kebeöt ta kinis arixe me mum kö axana bung ömat. Ma nausen ne bung e rabo kip abo tiip pe mum? Kip ot a barok ura re e.”

20 Io, idi toxo kip ot ina barok. Ma saxit mon nang a tano ixo pere e Jisas, ixo ögögöng a barok. Ine xö subu su xö pu, ma ixo dedede nana ma bise pidien ixoro wöwö xö ngalana.

21 Jisas ixo ose a tamana barok, “Ma lause ine ixo to bira?”  
Ma tamana ixo tengen, “Möxö bak lik iat.

22 Oleleng ne bung a tano saban ibo retewe ine urungan kö ia söstöt, bara xö ari ra sesexomet ine. Lamun nang bara u öt ta wewet te laa, örö marase e mem ma örö top e mem.”

23 Jisas ixo tengen, “Ruasa u tenge, ‘Nang bara u öt?’ Abo lalaa xirip i öt sik ke ewe nang i nunu.”

24 Saxit mon a tamana barok ixo kup wösö ma ixo tengen, “E nunu. Lamun a nunu re e i lik. Örö top e bara a nunu re e irabo taxin!”

25 Io, nang e Jisas ixo pere bara marakörö toxo ululo ot pösöt ine, ixo tenge köö ina tano saban bira, “Nöngön a talinge baa ma ngalaböt, e tengen te nöngön, örö wan su xalik ine ma u bele laxa baling kine.”

26 Ina tano ixo kup saban ma ixo ögögöng ina barok ma ixo wan su. A oleleng toxo tengen bara, “Iri met,” möxösa, a barok ixo wawara sik xarnang a tödi minet.

27 Ma lamun Jisas ixo tön ine xö limine ma ixo rarik öxaa ine ma ixo tuu lömö.

28 Melamu nang e Jisas ixo wan laxa xö gunon, mabo bak ne ausu rine toxo ose suxume ine, “Ruasa me mem kobo eöt ta irewe ina tano saban?”

29 Jisas ixo balu idi, “A sineseng kalik mon i öt ta irewe inabo mangana tano bira.”

*Jisas ixo tengen bara irabo met*

*(Matiu 17.22-23; Luk 9.43-45)*

30 Io, idi toxo wan lie ina xönö ma toxo wan köröp Galili. Jisas kaim a maaaa re öng ka ösöxö a xönö nang idi e,

31 möxösa, ine xö usu nanin abo bak ne ausu rine. Ixo tengen te idi, “Tabo bulus a Barok kö Tödi xö limine a nangadi, me idi tabo sexomet ine, ma melamu xö narun ne bung, ine irabo taru baling.”



32 Ma lamun idi kaim a xikip a lasa ine ixo rengrengen, me idi toxo bubuut tua ose ine ulamunon.

*Ewe runon i taxin?*  
(Matiu 18.1-5; Luk 9.46-50)

33 Io, idi toxo wanot Kaprenaum. Nang idi toxo laxa xö gunon, Jisas ixo ose idi, "A lasa iang mum mo egot nana min kö ngas?"

34 Lamun idi toxo kis malus, möxösa, xö ngas idi toxoro egot lamun ewe ine nang i taxin sik.

35 Jisas ixo kisisik kö pu, ma ixo kuwe ina sangaun ma ninöng ma ixo tengen, "Nang bara ewe nang i maaaa rua taxin, ine irabo ii ölik ine iat, ma irabo tultul kö maraköro xirip."

36 Jisas ixo lamus lo a bak lik ma ixo uru ine kaluluonin idi. Ixo pama ine ma ixo tengen tö idi,

37 "Ewe nang irabo öga öng möxö ina abo barok lixilik na xö esene e, ine i öga e, ma lamun ewe nang i öga e, ine i kobo öga e, nexalik ine i öga a öng nang ixo tile e."

38 Jon ixo tengen, "Tene Ausu, mem moxo pere a tödi ixo xikip tewe abo tano saban kö esem, me mem moxo tengen te ine ra ganim a wewet, möxösa, ine köbo öng mere ire."

39 Jisas ixo tengen, "Ganim e mum kö wanwanak ine. Kaim pe öng nang i wewet a laa lölös ne auwuwus kö esene e, ma melamu ulik baling irabo tengen te laa saban tö e,

40 möxö ewe nang i kobo öbulubun ire, ine mere ire.

41 Turunon saxit, ewenene nang i tabaa e mum ma kap ari, möxösa, mum mo kip sik a esene nang mum mere Kraiss, me ine irabo kip a xinixun möxönan."

*Tewe rewe abo lalaa nang i engin nöngön tua pet magingin saban*

(Matiu 18.6-9; Luk 17.1-2)

42 Me Jisas ixo tengen öbaling, "Nang bara ewenene i pet a öng mere inabo barok lixilik na ewe idi te nunu re e rua pet magingin saban, irabo kip a warkurai taxin melamu. Io, ixere deek kö ine bara texere kut te xönö wat taxin kö inöno ma texere öriru ösu ine xö rasi, xalik ibo engin lo re öng kua pet magingin saban.

43-44 Nang bara a limem i engin nöngön tua pet magingin saban, örobo tee xöröp tewe ine. I deek ke nöngön ta nilaxa xö to runon ma lime mut nöngön, xalik tabo tewe nöngön arixe ma nine limem urungan kö ia sösöt taxin nang i kara met.

45-46 Ma nang bara a xexem i engin nöngön ta pet magingin saban, örobo tee xöröp tewe ine. I deek ke nöngön ta nilaxa xö to runon ma xexe mut nöngön, xalik

tabo tewe nōngōn arixe ma nine xexem urungan kō ia sōsōt taxin.

<sup>47</sup> Ma nang bara a maram i engin nōngōn ta pet magingin saban, örobo luok tewe ine. I deek ke nōngōn ta nilaxa xō kingdom kō God arixe ma önga kalait maram, xalik tabo tewe nōngōn arixe ma nine maram urungan kō ia sōsōt,

<sup>48</sup> nang kō ia,

‘abo sisi ibo enen idi ma i karabo met,  
ma ia, tekebeöt ta pus ömet.’

<sup>49</sup> Tobo bulbulus a sol kō nien xarnang a ia irabo söngöt a nangadi xirip.

<sup>50</sup> “A sol ibo rorop ma nang bara a nanamien möxōnan iri kawam, a nanamien möxōnan irabo ot baling bule? I kebeöt. Me mum bölök, mum morobo top e mum iat, xarnang a sol ibo rorop. Me mum morobo kis ma malum arixe me mum iat.”

## 10

*A magingin ne palas alolo  
(Matiu 19.1-12; Luk 16.18)*

<sup>1</sup> Io, Jisas ixo wan kalik a xönö niang ma ixo wan laxa xö xönö pu mee Judeia ma ixo lies köröp kō Ari Jordan. Ma marakörö toxo wanot pösöt öbaling ine, ma ixo usu idi, xarnang ibo wewet.

<sup>2</sup> Ma dauleng ne Parasi toxo wanot pösöt ine ma toxo könönöin ine arixe ma önga aose bira, “I töxödös sik kō warkurai te ire bara a tödi irabo palas alolo xö une re ine?”

<sup>3</sup> Io, Jisas ixo balu, “A warkurai sa nang e Moses ixo isik ke mum?”

<sup>4</sup> Io, idi toxo tengen, “E Moses ixo ömaraxen a tödi ra gegeet te tinenge maras sua palas alolo ma rua ritile rewe ina une.”

<sup>5</sup> Jisas ixo balu idi bira, “Moses ixo geet a warkurai na, möxösa, abo bala mum ixo lölös köba.

<sup>6</sup> Ma lamun kō urulo möxö uxixis möxö öxöno lagunon te God, ‘ixo pet idu a körö ma une.’

<sup>7</sup> ‘Möxö ina na, a tödi irabo wan lie a tata ma nago rine ma irabo kis arixe ma une re ine.

<sup>8</sup> Me idu tabo öng.’ Io, idu tekarabo ninöng im, ma lamun idu tabo öng.

<sup>9</sup> Nang bara ixoro bie, ganim pe tödi ra walwalas a lasa nang e God ixoro bulus arixin sik.”

<sup>10</sup> Io, nang idi toxo laxa baling kölöme xö gunon, abo bak ne ausu toxo ose e Jisas lamun ina laa.

<sup>11</sup> Ine ixo tengen, "Ewe re öng nang i köröp alolo ma une re ine ma i elolo xö une xabise, ine i pet a tatalien saban kö une re ine, möxösa, ine i maru ma une kaim bara re ine.

<sup>12</sup> Ma nang bara une i köröp alolo ma tödi re ine ma i elolo xö tödi xabise, ine i pet a tatalien saban, möxösa, i maru ma tödi kaim bara re ine."

*Kip lo a kingdom xarnang a bak lik*

*(Matiu 19.13-15; Luk 18.15-17)*

<sup>13</sup> A nangadi toxo kip ot abo barok lixilik urungan te Jisas sö ine ra sisigi idi, nexalik abo bak ne ausu toxo töö rewe idi.

<sup>14</sup> Io, nang e Jisas ixo pere bira, ine xö bala kadik sik ke idi ma ixo tengen, "Moro ganim a bung bak lixilik ta wan ura re e, ma ganim a wanwanak idi, möxö a kingdom kö God, ine möxö inabo mangana bak lixilik bira.

<sup>15</sup> Turunon saxit, nang bara öng i kobo kip lo ina kingdom kö God xarnang a bak lik ine, i kebeöt ta nilaxa xönan."

<sup>16</sup> Me Jisas ixo pama ot abo barok lixilik, ma ixo bulus a nine limine lömö re idi ma ixo seng e God ta wadöane idi.

*Önga orong*

*(Matiu 19.16-30; Luk 18.18-30)*

<sup>17</sup> Nang e Jisas ixo urulo a nuan te ine, a tödi ixo ulo kaa urungan te ine ma ixo subusu xö pu ma nine busuno xexene mesila re ine ma ixo ose, "Tene Ausu deek, a lasa nang arabo mana pet tua xikip ina to ulorexe saxit?"

<sup>18</sup> Io, Jisas ixo balu ma ixo tengen, "Ruasa u tengen e ma tödi deek? Kaim pe öng i deek, nexalik e God kalik mon.

<sup>19</sup> U ösöxö abo warkurai te Moses i tengen bira, '*Ganim a arsexomet tataun, ganim a pet a tatalien ne ilawa ma önga tödi alolo, ganim a wuwulo, ganim a tengen töxö lamun a önga tödi, ganim a röxröxö lo a laa xö önga tödi xabise, ma öro ii ölik nöngön te tata me nago.*' "

<sup>20</sup> Ina tödi ixo tengen te Jisas, "Tene Ausu, nang e xo bak lik sik, e xobo mumuu inabo warkurai ot na."

<sup>21</sup> Jisas ixo pere ine ma ixo maaaa lamun ine. Ma ixo tengen, "Önga laa xalik u kobo pet eörin, öro wan, ma öro misik mabo laa xirip nang nöngön min ma öro tabaa a nangadi maris, io nang, nöngön örobo kip abo arabaa deek saxit tiso xö watmaep. Ma öro miang ma öro muu e."

<sup>22</sup> Nang a tödi ixo ölangen bira, a winara re ine ixo wawara marmaris, ma ixo wan lo ma tawunuk, möxösa, ine a tödi orong.

<sup>23</sup> Jisas ixo wawara eli xöbo bak ne ausu re ine ma ixo tengen tö idi, "I lölös köba xö önga tödi orong kua nilaxa xö kingdom kö God."

24 Abo bak ne ausu toxo wuwus arixe xöbo tinenge re ine. Ma lamun Jisas ixo tengen öbaling ke idi, "Bung barok, i lölös köba ra nilaxa xö kingdom kö God!

25 Nang bara önga kamel i ka nuan laxa xö mara möxö nil möxö sinöxö, i kobo lölös köba xarnang a tödi orong i ka nilaxa xö kingdom kö God."

26 Abo bak ne ausu toxo wuwus köba arixe ma toxo tengen öbaling urungan tö idi iat, "Nang bara bie, ewe im pe öng irabo eöt ta xikip a to ulorexe?"

27 Jisas ixo pere idi ma ixo tengen, "Xö nangadi mon, idi tekebeöt. Ma lamun kö God, abo lalaa xirip i eöt, möxösa, e God i öt ta wewet eörin kirip abo lalaa."

28 Io, e Pita ixo tengen te ine, "Mem mere wan lie xirip abo lalaa re mem rua mumuu e nöngön!"

29 Jisas ixo balu ma ixo tengen, "Turunon saxit, ewe nang iri wan lie a gunon tine, abo tönö, abo saxana, a nago, a tata, a bung baroxorok, bara abo komo rine rua gene e ma tinenge deek,

30 ine irabo kip lo öbaling lömö xö önga mar ne gunon mabo tönö mabo saxana mabo nago mabo barok mabo komo, me idi tabo tabaa ine bölok ma kinadik taxin nang bara i mumuu e. Ma xö axana bung nang irabo ot melamu, ine irabo kip a to ulorexe saxit.

31 Ma lamun a oleleng ewe nang te sila, tabo muu, ma nang te muu, tabo sila."

*Jisas ixo tengen bara irabo met  
(Matiu 20.17-19; Luk 18.31-34)*

32 Jisas mabo bak ne ausu toxo önan kö ngas uruso Jerusalem, me Jisas ixo silien a ngas, mabo bak ne ausu toxo dödom oleleng, ma nangadi nang toxo muu idi toxo buut. Io, ixo lamus öbaling ina sangaun ma ninöng urungan kö lawa ma ixo tengen te idi lamun a lasa nang irabo ot te ine.

33 Ine ixo tengen, "Ire tabo wan kaa uruso Jerusalem, ma Barok kö Tödi, tabo isik ine xöbo limine abo pris tataxin mabo teñe ausu möxöbo warkurai te Moses. Idi tabo bulus warkurai ra sesexomet ine ma tabo isik ine xö limine a nangadi kaim bara abo Judeia.

34 Ma ewe me idi nang tabo eösaxit saban arixe me ine ma tabo gisip ine, tabo dangat ine ma tabo sexomet ine. Narun ne bung melamu ine irabo taru baling."

*Ewe nang i maaa rua tinuu sila, irabo tultul mon  
(Matiu 20.20-28)*

35 Io, Jems me Jon, a nine barok ke Sebedi, toxo wanot pösöt e Jisas me idu toxo tengen te ine, "Tene Ausu, maa

me maaaa bara örobo pet te laa rö maa nang bere maa me seng nöngön.”

<sup>36</sup> Io, ine ixo ose idu bira, “Mu mo maaaa bara a lasa e rabo pet te mu?”

<sup>37</sup> Idu toxo tengen te ine, “Örobo ömaraxen bere öng mere maa irabo kis kö lime tuun ma öng kö lime kes se nöngön nang örobo kip lo a kinis ne warkurai taxin te nöngön.”

<sup>38</sup> Inexalik Jisas ixo tengen te idu, “Mu kobo ösöxö a lasa nang e mu mo eose ulamun. I eöt bere mu morobo inim kö tubon möxö kinadik niang e rabo inim könan, ma i eöt bere mu morobo kip lo a baptais ne tiip nang e rabo kip?”

<sup>39</sup> Idu toxo balu ine bira, “Maa me eöt.” Jisas ixo tengen tö idu, “Mu morobo inim kö tubon nang e rabo inim ma morobo kip lo a mangana baptais nang e rabo kip.

<sup>40</sup> Ma lamun tua kinis kö lime tuun bara xö lime kes, kaim bara laa re e ra inerabaa min. God iat irabo isik inabo kinis kö nangadi niang ixoro tagur sik inabo kinis se idi.”

<sup>41</sup> Io, nang a sangaun ne bak ne ausu xabise toxo ölangen bira, idi toxo bala kadik ke Jems me Jon.

<sup>42</sup> Io, Jisas ixo kuwe arixin idi ma ixo tengen te idi, “Mum mo ösöxö sik bara ewe me idi niang kaim bara abo Judeia. Ewe midi nang tabo perexulen bere idi a sisila re idi, io, inabo sisila tobo öraxin idi iat ma tobo pere ösu a nangadi xabise. Mabo orong ke idi tobo kure xöbanin idi.

<sup>43</sup> Ina mangana magingin na i bele kis kaluluonin e mum, ma lamun ewe niang i maaaa ra ii öraxin ine iat kaluluonin e mum, ine irabo tultul te mum.

<sup>44</sup> Me ewe niang i maaaa rua tinuu sila, ine irabo tödi tinörön tataun mon te nangadi xirip.

<sup>45</sup> Rösa nene, nang a Barok kö Tödi bölök ine i kobo wanot bara a nangadi tabo tultul te ine. Kaim. Ine ixo wanot tua tultul te idi, ma bara irabo isik a to re ine ra xukun puxus a oleleng ne nangadi.”

### *Batimaus a marapulo*

*(Matiu 20.29-34; Luk 18.35-43)*

<sup>46</sup> Io, idi toxo wanot to Jeriko. Nang e Jisas mabo bak ne ausu re ine, arixe ma a marakörö raxin, toxo önan lie ina lagunon taxin, önga tödi marapulo, a esene iang e Batimaus, a barok ke Timaus, ixo kisisik kö gegene ngas ma ixobo seseng lalaa xalik a nangadi.

<sup>47</sup> Nang ine ixo ölengen bara e Jisas mee Nasaret, ine ixo urulo a kinup, “Jisas, a Barok kö marapun te Dewit,\* örö

\* **10:47** Abo Judeia toxo ösöxö sik bara ina Mesaia ewe nang irabo öro a nangadi, irabo ot ta marapun te Dewit. Ma a nine marapulo toxo nunu bara Jisas ina tödi.

marase e!”

<sup>48</sup> Oleleng toxo töö rewe ine ma toxo tengen te ine rua ödödö, nexalik bere ine ixo kup taxin belexim, “Barok köbo untubuno e Dewit, örö marase e!”

<sup>49</sup> Io, Jisas ixo tuu ma ixo tengen, “Moro kuwe ine ura.”

Io, idi toxo kup urungan kina tödi marapulo, “Örö taru arixe ma axanan! Ine i xukuwe nöngön.”

<sup>50</sup> Ma nang ixoro tewe rewe a xönö xinaxain te ine ma ixo kos kaa ma nine xexene ma ixo wanot pösöt e Jisas.

<sup>51</sup> Jisas ixo ose ine, “U mamaa bara arabo pet a lasanene re nöngön?”

A tödi marapulo ixo tengen bira, “Tene Ausu, e mamaa bara arabo wawara.”

<sup>52</sup> Jisas ixo tengen te ine, “Örö wan, a nunu re nöngön iri öro nöngön.” Saxit mon iang, a marna ixo öt ta winara ma ixo muu e Jisas kö ngas.

## 11

*Jisas ixo laxa Jerusalem xarnang a king  
(Matiu 21.1-11; Luk 19.28-40; Jon 12.12-19)*

<sup>1</sup> E Jisas arixe mabo bak ne ausu re ine toxo wanot lörörö Jerusalem, idi toxo ot kö lagunon Betepage me Betani xö Maii Olip, io, Jisas ixo tile a nine bak ne ausu re ine,

<sup>2</sup> ma ixo tengen tidu bara, “Mu moro wan urungan kö lagunon mesila re mu, ma saxit mon nang bara mu mo laxa xönan, mu morobo pere a önga dongki maxat te kubus sik ine e, ma kaim bang ke öng i kala xisin ine. Mu morobo palas tewe ine ma morobo lamus ot ine ura.

<sup>3</sup> Ma nang bara önga tödi i ose e mu bara, ‘Ruasa mu mo walwalas ina dongki na?’, io, mu morobo tengen te ine bira, ‘A Orong i mamaa ulamun ma irabo isik puxus öbaling na mon.’ ”

<sup>4</sup> Io, idu toxo wan lo ma toxo pere önga dongki maxat kö ngas, nang toxo kut sik ine xö maramelalaxa xö gunon. Nang idu toxo walwalas lo ine,

<sup>5</sup> dauleng ne nangadi nang toxo tuu sik, toxo eose bara, “Mu mo palas a dongki na rua wewet a sa?”

<sup>6</sup> Idu toxo balu xarnang e Jisas ixo tengen sik ke idu, ma nangadi nang toxo öbala rewe idu.

<sup>7</sup> Io, idu toxo lamus ot ina dongki maxat urso re Jisas me idu toxo bulus abo man ömat te idu lömö xina dongki, me Jisas ixo kis kaa xönan.

<sup>8</sup> Ma nangadi oleleng toxo kip tewe abo xinaxain te idi ma toxo parawe xö ngas, ma dauleng toxo parawe abo axana iaa nang idi toxo tee möxöbo komo.

<sup>9</sup> Ewe idi nang toxo wan sila ma ewe idi nang toxo muu toxo xukup bira,

*"Axabe e God! God irabo wadöane a öng nang i wanot tua wewet eörin a maaa xö Orong!"*

<sup>10</sup> "God irabo wadöane ewe i ot ta xikip a kingdom kö untubuno ire e Dewit."

*"Axabe e God uruso lömö saxit!"*

<sup>11</sup> Me Jisas ixo laxa Jerusalem, ma ixo wan laxa xö gunon lotu raxin. Ine ixo wawara nana xöbo lalaa xirip, ma lamun ixo wan lo urso Betani arixe ma ina sangau ma ninöng, möxö ixoro aien im.

*Jisas ixo köö a uno löwö  
(Matiu 21.18-19)*

<sup>12</sup> Xö bung melamu nang idi toxo wan lie Betani, e Jisas ixo irilöng.

<sup>13</sup> Ine ixo wawara möxö palaa ma ixo pere a uno löwö ixo tuu sik ma labana. Ine ixo wan lo ra werwere bara ine mere pasuno bara kaim. Io, nang ine ixo ot könan, ine ixo parasiwin bara kaim a pasuno, a labana xalik mon, möxösa, kaim bara axana bung möxö löwö ra ino.

<sup>14</sup> Io, Jisas ixo tengen kö ina uno iaa, "Ökorobo o baling ma kaim pe öng irabo en te pasuno mere nöngön." Ma abo bak ne ausu re ine toxo ölangen ina nang ine ixo tengen.

*A gunon lotu re God  
(Matiu 21.12-17; Luk 19.45-48; Jon 2.13-22)*

<sup>15</sup> Io, nang idi toxo ot tiso Jerusalem, Jisas ixo laxa xö xönö möxö gunon lotu raxin ma ixo urulo ra batbat ösu ewe me idi nang toxo xuxuxun ma toxo mismisik kölöme. Ine ixo puxus lubeng abo öra xö nangadi nang tobo kulas tuluwok mabo öra möxö kinis se nangadi nang tobo mismisik ma bunu.

<sup>16</sup> Me Jisas i kaim kö ömaraxen lo öbaling ke öng kua xikip ölaxa abo lalaa möxö misik urungan kö xönö möxö gunon lotu.

<sup>17</sup> Io, ine ixo usu idi ma ixo tengen, "Mum muru ösöxö sik a tinenge re God nang toxo geet i tengen bira:

*'A gunon te e tabo tengen ine ma gunon ne sineseng möxö öxöno lagunon kirip.'*

Inexalik bara mum iat mum mo pet ine xarnang 'a gunon ne minun möxö nangadi pinilo.' "

<sup>18</sup> Abo pris tataxin arixe mabo tene ausu möxöbo warkurai te Moses toxo ölangen bira ma toxo wawara siwin te ngas sa sesexomet ine, möxösa, idi toxo burin ine. Ma toxo

burin ine, möxösa, a marakörö xirip tobo wuwuwus saban köbo ausu re ine.

<sup>19</sup> Aien ixoro orot me Jisas arixe mabo bak ne ausu rine toxo wan lie e Jerusalem.

*A sineseng arixe ma nunu*

*(Matiu 21.20-22)*

<sup>20</sup> Xö bung kabise, Jisas arixe mabo bak ne ausu re ine toxo önan kö ngas, me idi toxo pere ina uno löwö ixoro manga xirip.

<sup>21</sup> Io, Pita ixo döxömen lo a tinenge re Jisas nang ixo tengen kö ina uno iaa. Ma ixo tengen, "Tene Ausu, pere bang! A uno löwö nang nöngön u köö, iri manga."

<sup>22</sup> Io, Jisas ixo balu idi ma ixo tengen, "Örobo nunu re God.

<sup>23</sup> Turunon saxit, nang bara öng i tengen kö puot na bara, 'Örö taru mera ma örö wan su uruo xö rasi,' ma kaim ine mere nine dinödöm kö kat te ine ma lamun i nunu xö lasa ine i tengen irabo wanot, io, God irabo tabaa ine min.

<sup>24</sup> E tengen te mum, lasanene mum mo seseng ulamun, mum morobo nunu bara mum morobo kip lo, ma a lasa niang mum mo seng, irabo re mum.

<sup>25-26</sup> Ma nang bara u tuu sik ma u seseseng, ma nang bara u bala kinadik sik kere öng, örö döxömen taun a lasa ine i pet te nöngön, ma Tamam nuso lömö xö watmaep irabo döxömen taun a magingin saban te nöngön."

*Jisas ixo kip lo a lölös sine mole*

*(Matiu 21.23-27; Luk 20.1-8)*

<sup>27</sup> Io, idi toxo ot baling kuso Jerusalem. Nang e Jisas ixo önan kölöme xö xönö möxö gunon lotu raxin, abo pris tataxin, mabo tene ausu möxöbo warkurai te Moses, mabo sisila toxo ot pösöt ine.

<sup>28</sup> Me idi toxo ose ine bira, "U kip lo ina ese raxin na mole nang nöngön u döxömen bere i töxödös se nöngön ta wewet inabo lalaa na? Me ewe i tabaa nöngön mina lölös na ra wewet inabo lalaa na?"

<sup>29</sup> Jisas ixo balu idi ma ixo tengen, "E rabo ose e mum ma önga ineose bölök. Nang bara mum morobo balu e, io, e rabo tengen te mum a lölös sa nang e wewet inabo lalaa na min.

<sup>30</sup> A baptais se Jon, ine meriso lömö re God, bara mera xö nangadi mon? Moro tengen te e."

<sup>31</sup> Idi toxo wöwörö min kaluluonin idi iat ma toxo tengen, "Nang bara ire te tengen bara, 'Meriso re God,' me ine irabo ose ire bara, 'Ma ruasa me mum koxobo nunu re ine?'



<sup>32</sup> Me ire takarabo tengen, 'Möxö nangadi mon.' " (Idi toxo burin a nangadi, möxösa, idi toxo ösöxö sik bere Jon a propet.)

<sup>33</sup> Io, idi toxo balu e Jisas, "Mem kobo ösöxö."

Jisas ixo tengen te idi bara, "E bölök, e karabo tengen te mum ewe i isik ina lölös na re e ra wewet inabo lalaa na."

## 12

*Abo tene balaure komo wain  
(Matiu 21.33-46; Luk 20.9-19)*

<sup>1</sup> Jisas ixo urulo a tinenge öwuo re idi, "A tödi ixo sulo a komo wain, ine ixo kut pi ma tabörö. Ma ixo kin a mara möxö wawas ömeme a pasuno wain ma ixo timet öxaa a warawat ma ixo pet a walpali rua werwere muu a komo wain. Io, ixo isik ina komo wain urungan köbo duöng kua tinörön könan ma ixo wan lo bang kö nuan ömat saxit.

<sup>2</sup> Ma xö axana bung möxö dixidik a pasuno wain ine ixo tile a önga tene tinörön urso xöbo tene werwere muu wain ta xikip lo xalik idi rebo pasuno wain möxö komo.

<sup>3</sup> Ma lamun ina nangadi nang toxo rörörön tingan toxo tödik ine ma toxo se ine ma toxo uguran tewe öbaling ine ma kaim a xikip pe pasuno wain.

<sup>4</sup> Io, ine ixo tile öbaling önga tene tinörön urso re idi me idi toxo paxat a öxöno ma toxo ömenge ine.

<sup>5</sup> Io, ine ixo tile öbaling önga tene tinörön, me idi toxo sexomet ine. Me ine ixo tile öbaling a oleleng bölök. Dauleng mere idi toxo se, ma dauleng toxo sexomet.

<sup>6</sup> "Io, ine ma öng kalik im pa uguran, a bak söxöt iat te ine nang ibo maaaa xöba lamun. Ine ixo tile a bak ke ine melamu arixe re idi xirip, ma ixo tengen bara, 'Idi tabo ii a barok ke e.'

<sup>7</sup> "Lamun abo tene werwere muu a komo wain toxo tengen kö öngöng kaluluonin idi iat bara, 'Ina tödi niang i öt ta unan lo ina komo wain te tamana umelamu. Go, ire ta sexomet ine me ire tabo unan lo abo lalaa re tamana.'

<sup>8</sup> Io, idi toxo lamus lo ine ma toxo sexomet ine, ma toxo tewe ösu ine xalik a komo wain.

<sup>9</sup> "Io, a tamana komo irabo perim a lasa? Ine irabo wanot ma irabo sexomet inabo tene werwere muu a komo wain ma irabo isik ina komo wain urungan kö nangadi xabise.

<sup>10</sup> I deek bara mum morobo döxömen ina tinenge re God nang toxo geet bara,

*'A wat nang abo tene pet gunon toxo kumamaa lamun,  
möxösa, idi toxo döxömen bara a laa tataun,  
i wawara bara ine bölök a lölös möxö unine gunon kirip.*

<sup>11</sup> *A Orong iat i pet ot ina laa na,  
me ire te pere ma lak deek saxit kö winara re ire.' "*

<sup>12</sup> Io, a duöng tataxin mee Judeia toxo wawara siwin te ngas sua rörön dik e Jisas, möxösa, idi toxoro ösöxö bere Jisas ixo wöwörö eöt me idi ma tinenge öwuo na. Ma lamun idi toxo burin a marakörö, idi toxo wan lo xalik ine.

*A tatalien ne kun takis*  
(Matiu 22.15-22; Luk 20.20-26)

<sup>13</sup> Io, melamu idi toxo uguran a dauleng ne Parasi ma dauleng nang tobo mumuu e Erot urso re Jisas. Idi toxo maaa ra sasaxi e Jisas möxöbo tinenge re ine.

<sup>14</sup> Idi toxo ot pösöt ine ma toxo tengen, "Tene Ausu, mem me ösöxö sik nöngön a tödi möxö rengrengen a turunon. Me nöngön u kobo ösöxö ra tinuu arixe mere önga tödi xalik mon, möxösa, nöngön u kobo dödöm köba lamun abo mangana duöng bule idi. Ma lamun nöngön u bo usu a nangadi ma turunon ulamun a ngas nang e God i maaa bara ire tabo muu. I töxödös se ire bara tabo kun takis kö king taxin mee Rom bara kaim?"

<sup>15</sup> Ire tabo kun bara ganim?"

Ma lamun e Jisas ixo ösöxö sik abo röxröxö re idi me ine ixo ose idi bara, "Ruasa mum mu maaa ra uxun e? Mum moro kip lo re tuluwok ura ma ara pere."

<sup>16</sup> Idi toxo kip ot ina önga tuluwok me ine ixo ose idi, "Re we ina wawara na ma ese na?"

Me idi toxo balu bere, "Re king taxin mee Rom."

<sup>17</sup> Io, Jisas ixo tengen te idi, "Mum morobo isik ke king taxin a lasa nang ke king taxin. Ma a lasa nang ke God, mum morobo isik ke God iat."

Io, idi toxo wuwus saban arixe re Jisas.

*Abo minet tabo to baling*  
(Matiu 22.23-33; Luk 20.27-40)

<sup>18</sup> Io, dauleng ne Sadiusi niang tobo nunu bara kaim pe tinaru baling kalik a minet, toxo ot pösöt e Jisas ma toxo ose ine bara,

<sup>19</sup> "Tene ausu, Moses ixo geet tö ire bira, nang bara önga tödi, kaim ine mere barok ma i met kalik a une re ine, io, a tönö ina tödi irabo ot lamun ina möxösö ma irabo kip barok kö ina tönö.

<sup>20</sup> Io, a pitnö ma ninöng ne barön. A sisila ixo elolo ma ixo met, ma kaim ine mere barok.

<sup>21</sup> Ma a mumuu lo ine ixo ot lamun a möxösö, lamun ine bölök ixo met, ma kaim ine mere barok. Ma ixo bie bölök mon kö barok sese önarunin.

<sup>22</sup> Io, kaim im pe öng möxö ina pitnö ma ninöng ixo met lie re barok. Xakawöm möxönan, a une ixo met bölök.

23 Kö axana bung nang bara abo minet tabo taru baling, ine irabo une re ewe runon? Möxö ina pitnö ma ninöng toxo ot lamun ine."

24 Jisas ixo tengen te idi bara, "A dinödöm pe mum i kobo töxödös, möxösa, mum kobo ösöxö sik abo tinenge re God niang toxo geet ösu, me mum kobo ösöxö sik bölök a lölös se God."

25 Nang abo minet tabo taru kaa baling, idi tokobo eöt ta inalolo. Idi tabo xarnang abo angelo meriso xö watmaep.

26 Na e rabo wöwörö lamun abo minet, nang bara idi tabo taru baling, bara kaim. I deek bara mum morobo döxömen lo a ginigeet te Moses nang a uno iaa lik ixo söt, ma xina pii na, e God ixo tengen te Moses bie, *'E a God te Abaram, a God te Aisak ma bara a God te Jekop.'*

27 Ine kaim bara a God möxö nangadi minet. Kaim! Inexalik ine a God möxö nangadi to. A dödöxömen te mum i kobo töxödös."

*Ina warkurai i taxin saxit  
(Matiu 22.34-40; Luk 10.25-28)*

28 Önga tene ausu möxöbo warkurai te Moses ixo wanot ma ixo ölangen abo Sadiusi arixe me Jisas toxo egot ma tinenge. Ine ixo ölangen bere e Jisas ixo balu ödeek idi me ine ixo ose Jisas bira, "Ma xöbo warkurai kirip pe God, nangang sa i taxin ma i sisila?"

29 Jisas ixo balu ine ma ixo tengen, "A sisila ne warkurai taxin ine bira, *'A bung Israel, moro ölangen, a Orong, a God te ire, a Orong ine xalik mon.*

30 *Mum morobo mamaa ulamun a Orong, a God te mum, kö kat te mum ma xö tano mum ma xö dinödöm pe mum ma xö lölös se mum.'*

31 Sese ninöngin ine bira, *'Örobo mamaa lamun a öng kabise xarnang u mamaa lamun nöngön iat.'* Kaim pe warkurai i taxin köba re idu na."

32 Io, ina tene ausu möxö warkurai ixo tengen te Jisas, "Tene Ausu, a tinenge re nöngön i turunon saxit. *A Orong ine xalik mon, ma kaim bölök ke önga god.*

33 *Ma nang bara nöngön u mamaa lamun ine xö kat te nöngön, xö dinödöm pe nöngön, ma xö lölös se nöngön, ma u mamaa lamun a öng kabise xarnang u mamaa lamun öbaling nöngön iat, io, i taxin kirip sik köbo mangana arabaa ire te isik uruso re God.'*

34 Nang e Jisas ixo ölangen bara ine ixo balu ödeek ine xarnang a tödi ma nanase deek, me ine ixo tengen te ine bira, "Nöngön u kobo kis kö palaa sik kalik a kingdom kö God." Ma meringan urso abo tödi xabise toxo buut tua ose öbaling ine merebo inausu bölök.

*A Mesaia ine a bak ke Dewit  
(Matiu 22.41-46; Luk 20.41-44)*

<sup>35</sup> Bere Jisas ixo eusu rusu kölöme xö gunon lotu raxin, ine ixo tengen bira, “Bara bule abo tene ausu möxöbo warkurai te Moses tobo rengrengeng bara ine a Mesaia a barok tubuno e Dewit?”

<sup>36</sup> Dewit kalik mon ixo kip lo abo tinenge möxö Töxödös ne Tanono ma ixo tengen bira,

*‘God a Orong ixo tengen kö Orong ke e bara:*

*“Nöngön örö kis kö lawa tuun te e  
ot nang e rabo bulus abo iuo re nöngön*

*kö ene xexem.” ’*

<sup>37</sup> Dewit kalik mon i tengen ine me ‘Orong.’ Io, bule nang bara ine a Mesaia ma irabo a tubuno Dewit bölök?”

Ma marakörö raxin toxo axanan ta ölangen a tinenge re Jisas.

<sup>38</sup> Ma nang e Jisas ixo usu idi ine ixo tengen bira, “Mum morobo balaure e mum lamun abo tene ausu möxöbo warkurai te Moses. Idi tobo maaaa rua önan nana ma boxönö man ömat ma tobo maaaa bara tabo xukuwange idi kölöme xö boxönö möxö mismisik.

<sup>39</sup> Ma tobo werwere kos lo abo kinis deek kölöme xö gunon ne siniseng, ma tobo maaaa rua xikip lo a kinis deek kö axana bung möxö nien tataxin.

<sup>40</sup> Idi tobo kip lo abo lalaa möxöbo möxösö ma tobo osesen mabo sineseng ömat te idi. E God irabo ömokorot köbanin inabo mangana nangadi na.”

*A arabaa raxin möxö maris ne une möxösö  
(Luk 21.1-4)*

<sup>41</sup> Jisas ixo kisisik kölöme xö gunon lotu raxin lörörö xö xönö möxö bubulus. Ma ixo werwere a marakörö toxo bubulus abo tuluwok ke idi kölöme xö xönö möxö bulbulus. Oleleng ne nangadi orong toxo bulus ölaxa oleleng ne tuluwok.

<sup>42</sup> Ma lamun önga maris ne une möxösö ixo wanot ma ixo bulus ölaxa a nine peni re ine nang a marna i su xö pu.

<sup>43</sup> Jisas ixo kuwe abo bak ne ausu re ine ma ixo tengen te idi bira, “Turunon saxit, ina maris ne une möxösö na, iri bulus ölaxa a oleleng köba re idi xirip kabise.

<sup>44</sup> Idi xirip toxo isik abo tuluwok meringan kalik abo kinis ne orong ke idi, ma lamun ina une maris i bulus ölaxa xirip abo lasanene nang i öt kö kinis kirip pe ine.”

## 13

*Abo uxileng möxö xakawöm  
(Matiu 24.1-44; Luk 21.5-36)*

<sup>1</sup> Bere Jisas ixo önan lie a gunon ne lotu raxin, önga bak ne ausu re ine ixo tengen te ine bara, “Tene Ausu, pere bang abo xönö xö ina gunon lotu toxo pet mabo wat tataxin deek!”

<sup>2</sup> Io, Jisas ixo balu ine, “Nöngön u pere inabo gunon tataxin na. Idi tabo tamaöbeng su xirip. Kaim pe önga wat ta irabo kis lömö xö önga wat kabise.”

<sup>3</sup> Ma nang bere Jisas ixo kisisik kiso xö Maii Olip nang kö lawa xabise möxö marasaa nang a gunon lotu raxin ee, io, Pita, Jems, Jon me e Endru toxo wanot ma toxo ose ösuxume ine bara,

<sup>4</sup> “Örö tengen te mem bara lause inabo lalaa na tabo ot kö inabo gunon, ma sa irabo ot ta uxileng bara inabo lalaa na iri lörörö ra inot?”

<sup>5</sup> Me Jisas ixo balu idi bira, “Mum morobo balaure e mum, kalik ke öng ibo töxö lo e mum.

<sup>6</sup> Oleleng tabo wanot ma tabo tengen bara idi te wanot kö esene e, ma bere, ‘E mon ina Mesaia.’ Me idi tabo töxö lo a oleleng.

<sup>7</sup> Ma nang bara mum morobo ölangen ulamun abo inarse rataxin ma ulamun abo tinenge lamun abo inarse rataxin, io, mum bele buut. Abo mangana lalaa na irabo ot, lamun a xakawöm angen i kala ot bang.

<sup>8</sup> Abo kantri tabo erese ma abo kantri. Mabo kingdom tabo erese mabo kingdom. Ma xöbo dauleng ne boxönö, a gie irabo ot, ma a irilöng taxin bölök. Inabo lalaa i xarnang a urulo möxö kinadik kö une ibo eka kip barok.

<sup>9</sup> “Mum morobo mana balaure ödeek e mum. Idi tabo isik e mum kö limedi abo tene warkurai, tabo se e mum kölöme xöbo gunon ne sineseng. Me mum morobo tuu xö warkurai xö wawara xöbo duöng sisila mabo orong lamun mon e. Me mum morobo tenge maras se idi lamun a tinenge deek.

<sup>10</sup> Ma mesila xö axana bung möxö xakawöm, tabo mana palas tinenge ma atöngösen deek urungan kö boxönö xirip.

<sup>11</sup> Ma nang bara te tödik e mum ma te uru e mum kö warkurai, ganim bere mum mo dödöm ne binuut bara mum morobo pet te tinenge sa. Mum morobo tengen mon abo lasa nang i ot urungan te mum kina axana bung, möxösa, kaim bere mum mo wöwörö. Kaim. Töxödös ne Tanono ine iat i wöwörö.

<sup>12</sup> “Abo duöng tabo isik abo tönö idi xö minet, ma abo tata tabo pet bölök bie xö bung barok ke idi. A bung barok tabo baba urungan köbo tamadi mabo nenedi ma tabo tengen ta sesexomet idi.

<sup>13</sup> A nangadi xirip tabo melentexin e mum, möxösa, xö eseke. Lamun ewe nang i tuu lölös sik urungan kö xakawöm, God irabo öro ine.

14 “Mum morobo pere *ine nang i manga saban köba, nang ibo ögat lagunon*, i tuu sik kö xönö nang i kobo töxödös bara ine mee. (Ewe i kos ina ginigeet na, irabo maras kö unine möxönan.) I deek bara a nangadi nang te xisixis Judeia xina bung, tabo ulo urso xöbo maii.

15 Ewe a öng nang i kisisik lömö xö öxöno gunon te ine, ganim bara i kaa su ma i wan laxa xö gunon ta xikip ösu rewe rebo mangana lalaa.

16 Me ewenene nang i xisixis siso xö komo, ganim bara i su uri xö gunon ta xikip lo re xönö man te ine.

17 Irabo laa ne maris köbo une nang te tienen, me idi nang te urus barok kö inabo bung na.

18 Mum morobo seseng bara inabo lalaa na i karabo ot kö axana bung möxö labur.

19 Möxösa, a tiip taxin köbo bung niang, i karabo eöt ma nang möxö urulo, nang e God ixo uxis a öxöno lagunon ot na. Ma melamu, kaim pe tiip bira irabo wanot baling.

20 Ma nang bara Orong i kobo se öwuruwut inabo bung niang, kawaim pe öng irabo to. Ma lamun ine irabo se öwuruwut abo bung kua rorop idi a nangadi re ine, nang ixo pere kos lo.

21 Kö ina bung niang, nang bara öng i tengen te mum, ‘Moro pere, a Mesaia ine na,’ bara, ‘Moro pere, a Mesaia ine niang,’ ganim e mum pa nunu xönan.

22 Möxösa idi abo mesaia röxröxö mabo propet röxröxö, idi tabo wanot. Ma tabo pet ot abo uxileng mabo mangana lalaa lölös ne auwuwus sua röxröxö lo a nangadi niang God ixoro pere kos, nang bara idi te eöt tua röxröxö lo idi bira.

23 Io, mum morobo mana tumarang e mum. E xoro tengen ösila sik ke mum köbo lasanene nang irabo ot te mum.

24 “Ma xöbo bung melamu xinabo tiip,  
*‘a xaken irabo ködö,  
 ma texe i kebeöt ta bibio,*

25 *ma abo tii tabo subu meriso xö balana kubu,  
 ma abo lalaa lölös meriso xö mango irabo mamagi.’*

26 “Kö ina axana bung niang im, a nangadi tabo pere a Barok kö Tödi irabo wanot kö kubu arixe ma lölös taxin ma a mariris.

27 Ma irabo tile abo angelo ra lalamus etok a nangadi rine nang ixo pere kos lo. Abo angelo tabo lamus etok idi möxö nit ne marana xiki ma meringan bölök köbo ngusuno öxöno lagunon.

28 “Io na, mum morobo kip inausu xalik a uno fik. Nang bara abo labana te subun kaa ma i tawalas, mum morobo ösöxö bara a axana bung möxö xaken iri lörörö rua inot.

<sup>29</sup> Xarnang iat mon, nang e mum mo pere inabo lalaa na te orot, mum morobo ösöxö bara ina axana bung iri lörörö rua inot, nang mon kö marama möxö nuan laxa.

<sup>30</sup> Turunon saxit, ina nangadi nang tabo pere inabo lalaa na, tekebeöt ta minet bang, ot nang abo lalaa na xirip irabo ot.

<sup>31</sup> A balana kubu ma öxöno lagunon irabo wan tup, nexalik bara a tininge re e, i kebeöt ta xakawöm.

<sup>32</sup> “Ma kawaim pe öng i ösöxö sik ina bung, bara a axana bung tunon, nang abo lalaa irabo wanot. Abo angelo niso xö watmaep tokobo ösöxö, ma a Barok iat bölök, i kobo ösöxö. Lamun e Mamaa xalik mon i ösöxö.

<sup>33</sup> Moro tumarang e mum! Me mum moro tagur sik! Möxö mum kobo ösöxö lause ina axana bung na irabo ot.

<sup>34</sup> I xarnang a tödi nang i önan tewe. Ine ibo wan lie a gunon te ine ma ibo tibe idi abo tultul te ine xöbo tinörön öngöng kua wewet, ma ibo tengen kö öng ibo ruruu wi a marama bara ira tagur sik.

<sup>35</sup> “Io, mum morobo mana tagur sik, möxösa, mum kobo ösöxö a axana bung nang a tamana gunon irabo wanot baling, nang bara irabo wanot kö aien, bara xö luono dömön, bara nang a xixök i rengrenge, bara xö puxu bubung.

<sup>36</sup> Io, nang bara ine i wanot kölö e mum, xalik ine ibo pere lo e mum mo paliso sik.

<sup>37</sup> Lasa nang e tengen te mum, e tengen te nangadi xirip: ‘Mum morobo mana tagur sik!’ ”

## 14

*Toxo wawara siwin te ngas sua sesexomet e Jisas  
(Matiu 26.1-5; Luk 22.1-2; Jon 11.45-53)*

<sup>1</sup> Io, melamu xö nine bung urungan kö Luxa ne Nuan Lexe ma xöbo bung taxin möxö Enen a Beret Kaim a Is Könan, abo pris tataxin mabo tene ausu möxöbo warkurai te Moses, idi toxo wawara siwin te ngas sua öxös suxume e Jisas sua sesexomet ine.

<sup>2</sup> Ma lamun idi toxo tengen, “Ire takarabo pet biringan kö bung ne Luxa, xalik a nangadi tabo eöngat ma tabo ögat ire.”

*Önga une ixo linge a sada re Jisas  
(Matiu 26.6-13; Jon 12.1-8)*

<sup>3</sup> Ma nang e Jisas ixo xisixis siso Betani xö gunon te Saimon, nang mesila ine ma miniset lepra, me Jisas ixo kisisik ma ixo aan, io, önga une ixo wanot arixe ma botol

deek ne sada, ma a xinixun möxönan a lak taxin. Ine ixo pörök ina botol sada ma ixo linge xö öxöno e Jisas.

<sup>4</sup> Ma uleng ne nangadi nang toxo kisisik kingan, toxo bala saban ma toxo etöngösen kaluluon te idi iat baling bara, “Ruasa ine i ösek tataunin ina sada na?”

<sup>5</sup> Ina sada na, ixoro eöt tua misik min kö narun ne mar ne siliwa, ma toxoro eöt tua isik abo tuluwok kö nangadi maris.” Me idi toxo tenge köö ögarin ina une.

<sup>6</sup> Me Jisas ixo tengen, “Moro ganim ine! Ruasa bara mum mo ögat köbanin ina une na? Ine iri pet a tatalien deek kö e.

<sup>7</sup> A nangadi maris angen tobo xisixis arixe me mum köbo bungbung kirip, me mum mo öt tua rorop idi xöbo mangana bung nang mum mo maaaa ulamun. Inexalik e karabo kis ömat arixe me mum kö bungbung kirip.

<sup>8</sup> A une na, iri pet eörin a lasa nang i öt ta wewet. Ine i linge a sada nang lak sixine deek kö aike, rua tagur sik e ra minet te e melamu.

<sup>9</sup> Turunon saxit, kö boxönö xirip kö öxöno lagunon nang tabo etöngösen ma tinenge deek, a lasanene niang a une na ixo pet, tabo etöngösen min, ma a nangadi tabo döxömen bölök ine.”

### *Judas ixo aut ta isik tewe e Jisas*

*(Matiu 26.14-16; Luk 22.3-6)*

<sup>10</sup> Me Judas Iskariot, öng möxö ina sangaun ma ninöng, ixo wan pösöt abo pris tataxin tua isik tewe e Jisas kö limedi.

<sup>11</sup> Ma nang idi toxo ölangen ina na, idi toxo axanan köba. Ma toxo kubus tinenge rua ratabaa ine ma tuluwok. Io, ine ixo urulo ra winara siwin te mangana ngas mamaran tua isik e Jisas kö limedi.

### *A Luxa ne Nuan Lexe xö Orong*

*(Matiu 26.17-30; Luk 22.7-23; Jon 13.21-30; 1 Korin 11.23-25)*

<sup>12</sup> Xö sila ne bung möxö Luxa möxö Beret Kaim a Is Könan, abo Judeia toxobo sesexomet abo sipsip ma ra enen tua dödöxömen lo a Luxa ne Nuan Lexe. Xö ina bung nang, abo bak ne ausu re Jisas toxo ose ine, “Ule ina xönö nang nöngön u maaaa bara e mem pa tagure a nien ne Nuan Lexe rue nöngön tua enen?”

<sup>13</sup> Io, ine ixo tile a ninöng möxö xinabo bak ne ausu re ine, ma ixo tengen te idu bara, “Mu moro wan laxa xö lagunon, ma tödi i kip nanin a bile ari irabo esuo me mu ringan. Mu morobo muu ine.

<sup>14</sup> Ma nang irabo wan laxa xere önga gunon, mu morobo tengen kö tamana gunon, “Tene Ausu i ose bara, “Ule a



ngasieke nang e mabo bak ne ausu re e, mem marabo en ina nien ne Nuan Lexe xönan?" ' "

<sup>15</sup> Me ine irabo osen e mu ma önga xönö raxin niso lömö möxö önga gunon nang tere tagure sik. Mu morobo tagure a nien te ire xönan."

<sup>16</sup> Io, a nine bak ne ausu toxo wan lo, ma toxo wan laxa xö lagunon, me idu toxo pere xirip lo inabo lalaa nang e Jisas ixo tengen te idu. Io, idu toxo tagure a nien möxö Luxa ne Nuan Lexe.

<sup>17</sup> Ixoro aien, Jisas ixo wanot ma sangaun ma ninöng ne bak ne ausu.

<sup>18</sup> Ma nang idi toxo kisisik ma toxo aan, Jisas ixo tengen te idi, "Turunon saxit, öng mere mum irabo isik e xö limine nangadi, ewe a öng nang i aan arixe me e na."

<sup>19</sup> Io, a bung bak ne ausu toxo tapunuk, me idi öngöng toxo ose e Jisas bara, "Kaim bere e, goo?"

<sup>20</sup> Io, Jisas ixo balu idi, "Ine a öng kaluluon iat mon te mum a sangaun ma ninöng nang irabo öwösö a beret kölöme xö bile arixe me e.

<sup>21</sup> A Barok kö Tödi irabo wan urungan kö minet xarnang abo propet toxoro geet lamun ine. Ma maris belek kö tödi nang irabo isik a Barok kö Tödi xö limine a nangadi. Ixoro deek köba rö ine nang bara kaim e nago xö xikip ine."

<sup>22</sup> Ma nang idi angen toxo aan, Jisas ixo kip lo a beret ma ixo tengen deek kö God, io, ixo pidik, ma ixo tabaa nanin abo bak ne ausu re ine min, ma ixo tengen te idi, "Mum moro kip lo. Ina na a aike."

<sup>23</sup> Io, ixo kip lo a kap wain, ma ixo tengen deek kö God ma ixo örarabaa idi min, me idi xirip toxo inim könan.

<sup>24</sup> Me Jisas ixo tengen te idi bara, "Ine na a dee re e, nang e rabo linge lamun a oleleng kua öturunonin a kunubus meriso re God.

<sup>25</sup> Turunon saxit, e karabo inim öbaling ina wain na ot kö bung arabu inim öbaling ine xarnang a wain maxat tiso xö kingdom kö God."

<sup>26</sup> Io, idi toxo ii önga sinö me idi toxo wan lo urso xö Maii Olip.

*Jisas ixo tengen bara Pita irabo öös sine  
(Matiu 26.31-35; Luk 22.31-34; Jon 13.36-38)*

<sup>27</sup> Jisas ixo tengen te idi, "Mum kirip morobo buut ma morobo buut ma morobo ulo lie e, möxö abo tinenge re God toxoro geet i tengen bira,

*'E rabo sexomet a tene werwere muu sipsip,  
ma abo sipsip tabo ulo rup elixilik.'*

<sup>28</sup> Ma lamun melamu e rabo taru baling kalik a minet ma arabu sila re mum urso Galili."

29 Inexalik Pita ixo tengen te ine, “Nang bere idi xirip tabo wan lie nōngōn, lamun e iat, kaim.”

30 Me Jisas ixo tengen te ine bara, “Turunon saxit, na xō dōmōn, nang a xixōk i kobola tenge bang kō ninōng ne axan, nōngōn örobo öös kelen e xō narun ne axan.”

31 Ma lamun e Pita ixo tengen ölölös bara, “Nang bara e rabo met bölök arixe me nōngōn, e karabo öös kelen nōngōn.” Me idi xirip toxo tengen bölök bie.

### *Getsemani*

*(Matiu 26.36-46; Luk 22.39-46)*

32 Jisas arixe ma abo bak ne ausu re ine toxo wan urso xō önga xōnō tobo rengrengen me Getsemani, ma ixo tengen kōbo bak ne ausu re ine bara, “Mum moro xisixis sa me e ra wan ara seseng.”

33 Ine ixo lamus e Pita, Jems, me Jon arixe mine ma ixo xölxölö ma dinödöm oleleng.

34 Ma ixo tengen te idi bara, “A balake iri tiip kōba me e örasen bara örörö e rabo met. Mum moro kis ma moro wawara deek.”

35 Me ine ixo wan ulik ma ixo subun kexe xō pu ma ixo seseseng bara ina axana bung möxö aöxadik irabo wan lie ine nang bara i öt.

36 Ine ixo seseng bira, “Mama, Mama re e, nōngōn u öt ta wewet abo mangana laa xirip. E maaaa bara örobo irewe ina tiip na xalik e, ma lamun u bele muu eörin a maaaa re e. Kaim. Örobo muu a maaaa re nōngōn iat.”

37 Io, Jisas ixo wan pösöt öbaling idiet narun ne bak ne ausu re ine ma ixo pere wösöt lo idiet toxo paliso sik. Me ine ixo ose e Pita bara, “Saimon, nōngōn u paliso? I kobo eöt bara örobo wawara arixe me e xere önga awa?”

38 Muot morobo mana wawara ma sineseng kalik a laa ne aöwalam irabo ot pösöt e muot, me muot bo subu xō magingin saban. A turunon, a bala muot i maaaa ra wewet abo tatalien deek, ma lamun a aimuot i kobo lölös.”

39 Io, Jisas ixo wan tewe baling ma ixo seseng baling xarnang ixoro seseng bie.

40 Ma nang ixo baling, ixo pere abo bak ne ausu toxo paliso, möxösa, a maradi ixo tiip kōba ra pinaliso. Ma kaim idi xo ösöxö bara idi tabo tengen bule rö ine.

41 Sese önarun ne nuan baling ke Jisas wösöt idiet ixo tengen bira, “Muot angen mo wupaliso ma mo mamas? Iri öt. Iri orim ina axana bung. Moro pere. Na tabo isik a Barok kö Tödi xō limine abo duöng saban.

42 Moro taru me iret ta önan. Moro pere. A tödi nang irabo isik e xō limine idi, ine niang i önan ot.”

*Judas ixo isik tewe e Jisas*

*(Matiu 26.47-56; Luk 22.47-53; Jon 18.3-12)*

<sup>43</sup> Ma nang e Jisas angen ixo rengrenge, e Judas, öng möxö ina sangaun ma ninöng, ixo wanot. A marakörö raxin toxo ot arixe mine mabo sele mabo amu. Abo pris tataxin mabo tene ausu möxöbo warkurai te Moses, mabo sisila toxoro tile idi.

<sup>44</sup> Ma ina tödi nang ixo mamaa ra isik e Jisas kö limine nangadi, ine ixoro tagure önga mangana uxileng bira, "A öng nang e rabo muum, ine mon ina tödi. Mum morobo tödik ine ma morobo lamus tewe ine arixe mabo umri."

<sup>45</sup> Saxit mon, e Judas ixo wan pösöt e Jisas ma ixo tengen, "Tene Ausu!" Ma ixo muum ine.

<sup>46</sup> A nangadi toxo tödik e Jisas.

<sup>47</sup> Ma a öng mere idi nang toxo tuu sik örörö ixo sat lo a sele ömat te ine ma ixo se a tödi tene tinörön möxö sisila raxin möxöbo pris, ma use ixo tee xöröp a talingine.

<sup>48</sup> Io, Jisas ixo tengen te idi, "Mum mo ot mabo sele mabo amu rua rörödik e, xarnang arixe bere e a tödi baba?"

<sup>49</sup> Ma xöbo bungbung kirip e xobo xisixis arixe me mum kölöme xö xönö möxö gunon ne lotu raxin me e xobo eusu, me mum kara töndik e. Ma lamun inabo lalaa na i ot ta wewet eörin abo tingenge re God."

<sup>50</sup> Me idi xirip toxo wan lie e Jisas ma toxo ulo rup.

<sup>51</sup> Ma önga tödi maxat ixo mumuu nanin e Jisas, ixo laulawa sik mon ma xönö man. Ma nang idi toxo tön ine,

<sup>52</sup> ixo pules idi ma xö ulo lie a xönö man ma belbele.

*Abo sisila toxo kure Jisas*

*(Matiu 26.57-68; Luk 22.54-55, 63-71; Jon 18.13-14, 19-24)*

<sup>53</sup> Idi toxo lamus lo e Jisas urungan kö sisila raxin möxöbo pris. Mabo pris tataxin kirip, abo sisila arixe mabo tene ausu möxöbo warkurai toxo wanot etok.

<sup>54</sup> Pita ixo mumuu e Jisas kö nuan a lak palaa ulik ot nang ine ixo laxa xö xönö xö lawana ngasiene a sisila raxin möxöbo pris. Ringan, e Pita ixo kis arixe mabo tene walbalaurai me ine ixo dededek kö lawana ia.

<sup>55</sup> Abo pris tataxin mabo kansel kirip toxo wawara siwin te mangana unine tingenge rua wupuk e Jisas min tua sesexomet ine, ma lamun kaim idi xo werwere wösöt lo re mangana ngas.

<sup>56</sup> A oleleng toxo tengen ot a tingenge röxröxö rö ine, nexalik abo tingenge re idi kaim kö ululo eöt.

<sup>57</sup> Ma dauleng toxo tuu lömö ma toxo tengen ot a tingenge töxö rabaa ine bara,

<sup>58</sup> "Mem me ölangen ine i tengen bira, 'E rabo öbeng ina gunon lotu raxin na nang a duöng toxo pet ma limedi. Ma

xö sese önarun ne bung arabo uru a öng kabise nang a tödi i karabo pet ma limine.' "

<sup>59</sup> Ma lamun ina tinenge ridi kaim kö ululo eöt.

<sup>60</sup> Ma a sisila raxin möxöbo pris ixo tuu kaa xö wawara re idi ma ixo ose e Jisas bara, "Nöngön ökorobo balu re tinenge? A lasa ina tinenge na nang abo duöng na te wupuk nöngön min?"

<sup>61</sup> Ma lamun e Jisas ixo kis ödödö sik mon ma kaim kö babalu.

Ma a sisila raxin möxöbo pris ixo ose öbaling ine, "Nöngön a Mesaia, a Barok kö God, bara kaim?"

<sup>62</sup> Me Jisas ixo tengen, "E iat mon, me mum morobo pere a Barok kö Tödi irabo kisisik kö kinis taxin tangan kö lime tuun te God nang a lak lölös ine, ma irabo ot kö kubu ne watmaep."

<sup>63</sup> Ma sisila raxin möxöbo pris ixo laie ma ixo didii a man te ine, ma ixo tengen bara, "Ire tebele ose öbaling kebo duöng kua rengrengen ot tebo tinenge bölök kö ina tödi.

<sup>64</sup> Mum moxoro ölangen bere ine ixoro tengen ögarin e God. Mum mo döxömen bara tabo pet bulungin ine?"

Me idi xirip toxo tengen bara i töxödös bere e Jisas irabo mana met.

<sup>65</sup> Io, a dauleng toxo urulo ra gisgisip ine, me idi toxo kubus pi a marana, ma toxo tut ine mabo limedi ma toxo tengen te ine bara, "Örö tengen te tinenge propet im na." Mabo tene walbalaurai toxo kip lo ine ma toxo se ine.

### *Pita ixo öös kelen e Jisas*

*(Matiu 26.69-75; Luk 22.56-62; Jon 18.15-18, 25-27)*

<sup>66</sup> Nang e Pita ixo kisisik lawu kölöme xö xönö lawana gunon ma önga une tultul kö sisila raxin möxöbo pris ixo wanot.

<sup>67</sup> Nang ina une ixo pere e Pita ixo dededek kö lawana ia, ma ixo pere dik e Pita ma ixo tengen, "Nöngön mon nang u xo arixe me Jisas meri Nasaret."

<sup>68</sup> Ma lamun e Pita ixo öös, "Kaim. E kobo ösöxö me e kobo maras tunon lamun ina tinenge na nang u rengrengen." Ma ixo wan urungan kö marama möxö nilaxa.\*

<sup>69</sup> Ma nang a une tinörön ixo pere ine ringan, ixo tengen öbaling kö nangadi nang toxo ruruu nana bara, "Ina tödi na ine bölök a öng mere idi."

<sup>70</sup> Me ine ixo öös baling.

\* **14:68** A dauleng ne ginigeet me lorexe toxo wasum ina tinenge na: "ma xixök ixo tengen."

A ulik mon melamu, a nangadi niang toxo ruruu lörörö nana toxo tengen te Pita bara, “Turunon bara nöngön mon a öng mere idi. Nöngön a tödi mee Galili.”

<sup>71</sup> Me Pita ixo tengen ölölös bara, “Sugurno bang mon e tengen a turunon te mum, e kobo ösöxö ina tödi nang mum mo rengrengene ine. Nang bara e töxö, io, e mamaa bara God irabo ömokorot köbanin e.”

<sup>72</sup> Ma saxit mon a xixök ixo tenge sese öninöng. Pita ixo döxömen lo a tinenge niang e Jisas ixo tengen te ine: “Nang a xixök i kobola tenge sese öninöng, nöngön örobo öös kelen e xö narun ne axan.” Me Pita ixo gee saban arixe.

## 15

### *Jisas ixo tuu mesila re Pailat*

(*Matiu 27.1-2, 11-26; Luk 23.1-5, 13-25; Jon 18.28—19.16*)

<sup>1</sup> Xö puxu bubung arixe, abo pris tataxin, abo sisila mabo tene ausu möxöbo warkurai te Moses arixe mabo kansel kirip möxö lotu, toxo etöngösen ma toxo ot kö önga dinödöm. Idi toxo kubus a nini limine e Jisas ma toxo lamus ine urungan te Pailat.

<sup>2</sup> Me Pailat ixo ose ine, “Nöngön a king möxöbo Judeia?”

Jisas ixo balu ine bara, “Ine mon xarnang u tengen.”

<sup>3</sup> Abo pris tataxin toxo puk ine mabo tinenge oleleng.

<sup>4</sup> Io, Pailat ixo ose öbaling ine, “Kaim nöngön mere tinenge ra babalu idi? Öro pere bara a oleleng ne lalaa te wupuk nöngön min.”

<sup>5</sup> Inexalik e Jisas kaim ine ra babalu bang ke tinenge, io, e Pailat ixo wuwus ma ixo dödöm oleleng.

<sup>6</sup> Io, xö Luxa ne Nuan Lexe, Pailat ixobo walwalas ösu a önga tödi xalik a gunon ne aömokorot, a tödi nang a nangadi tobo ose lamun ine.

<sup>7</sup> A tödi a esene e Barabas, toxo bulus ölaxa ine xö gunon ne aömokorot arixe mabo duöng nang idi toxo erese ömet arixe midi nang tobo kure abo Judeia xö axana bung kö arse raxin.

<sup>8</sup> A marakörö raxin toxo wanot ma toxo ose e Pailat tua wewet önga laa ra öaxanan idi xarnang ixobo wewet kö ina luxa.

<sup>9</sup> Me Pailat ixo balu idi ma ixo tengen, “Mum mo mamaa bara ara ii ösu ina king köbo Judeia urungan te mum?”

<sup>10</sup> Ixo tengen bira, möxö ine ixo ösöxö bara abo pris tataxin toxo bala saban te Jisas, io, idi toxo isik ot e Jisas urungan te ine.

<sup>11</sup> Inexalik abo pris tataxin toxo silien a marakörö ma tinenge lölös sa kinup pe Pailat bara irabo ii ösu e Barabas xalik mon ma ganim e Jisas.

12 E Pailat ixo ose idi bara, “A lasa nang e rabo pet kö ina tödi nang mum bo xukuwe ine, a king möxöbo Judeia?”

13 Me idi toxo kup urungan te ine bara, “Tut ine xö sölöxöröp!”

14 Me Pailat ixo ose idi, “Ruasa? A mangana sasaban sa ine ixo pet?”

Ma lamun idi toxo xukup nöngösö lömö iat bara, “Tut ine xö sölöxöröp!”

15 E Pailat ixo maaa ra wewet öaxanan a marakörö, io, ixo ii ösu e Barabas urungan te idi ma ixo tengen köbo umri ma toxo dangat e Jisas ma buso, ma melamu e Pailat ixo isik ine urungan te idi ra rutut ine xö sölöxöröp.

*Toxo eösaxit me Jisas  
(Matiu 27.27-31; Jon 19.2-3)*

16 Abo tene inarse toxo lamus öläxa e Jisas urungan kö gunon taxin te Pailat, ma toxo kuwe etoxin kirip a nangadi arse.

17 Idi toxo öläulawa e Jisas ma man dadan xarnang a king ibo sisige, io, idi toxo kubus arixin abo uno gargaras ma toxo pet xarnang a bubuan, ma toxo usige xö öxöno e Jisas.

18 Me idi toxo urulo ra kinup urungan bara, “Mem me ölet nöngön, king köbo Judeia.”

19 Idi toxo dangdangat a öxöno ma buso ma toxo gisgisip ine. Idi toxo subun kexe me idi toxo tenge ölolot ine.

20 Ma nang idi toxoro eösaxit mine, idi toxo irewe ina man dadan kalik ine ma toxo öläulawa öbaling ine ma man iat te ine. Me idi toxo lamus ösu ine ra rutut ine xö sölöxöröp.

*Toxo tut e Jisas kö sölöxöröp  
(Matiu 27.32-44; Luk 23.26-43; Jon 19.17-27)*

21 Önga tödi mee Sairin, a esene iang e Saimon, a tata re Aleksenda me Rupas, ixo önan kö nuan te ine ma ixo wan saxit kö ina lagunon. Me idi toxo ölölös lo ine rua xikip a sölöxöröp pe Jisas.

22 Idi toxo lamus e Jisas urso xö xönö tobo rengrengen me Golgota. (Unine ese na bara Xönö möxö Siine Öxöno Tödi).

23 Io, idi toxo tabaa e Jisas ma wain nang toxo pet arixin ma abo mangana laa a lak sixine deek. Lamun kaim ine xo ininim.

24 Io, a nangadi arse toxo tut ine xö sölöxöröp, ma toxo erimine abo man te ine re idi iat baling. Me idi toxo egulös satu ra werwere bere ewenene iat te idi irabo kip lo re lasanene sa.

25 Xö pitnö ma nit ne axana bung kö puxu idi toxo tut ine xö sölöxöröp.

<sup>26</sup> Ma toxo geet abo tinenge nang toxo puk ine min bira, "A king möxöbo Judeia."

<sup>27</sup> Idi toxo tut bölök a nine tödi pinilo arixe me ine, a öng kö lime tuun ma öng kö lime kes.\*

<sup>29</sup> Mabo nangadi nang toxo önan saxit, toxo tenge uli ine. Idi toxo urie abo öxöno idi ma toxo tengen te ine bara, "Aa! Nöngön mon iang örobo pörök ösu a gunon lotu raxin ma örobo uru öbaling mon kö narun ne bung.

<sup>30</sup> Na im örö wan su meringan kö sölöxöröp ma örö top öbaling nöngön iat!"

<sup>31</sup> Xö ina ngas iat nang, abo pris tataxin arixe mabo tene ausu möxöbo warkurai te Moses idi bölök toxo tenge uli ine kaluluon iat te idi, me idi toxo tengen öbaling bara, "Ine i rorop a nangadi xabise, ma bara bule i kebeöt ta rorop ine iat?"

<sup>32</sup> Nang bere ine a Mesaia, a King mee Israel, irabo wan su na mon kalik a sölöxöröp me ire tabo pere ma tabo nunu." Nine tödi idi toxo tut idu xö nine sölöxöröp arixe mine, idu bölök toxo tenge uli ine.

*A minet te Jisas kö sölöxöröp*

*(Matiu 27.45-56; Luk 23.44-49; Jon 19.28-30)*

<sup>33</sup> Xö luono xaken a ködö ixo wanot ma ixo tawi xirip ina öxöno lagunon ot kö narun ne axana bung kö aien.

<sup>34</sup> Ma xö narun ne axana bung, Jisas ixo gee wösö ma ixo tengen, "Eloi, Eloi, lama Sabakatani?" A unine möxönan i tengen bira, "God te e, God te e, ruasa u wan kalik e?"

<sup>35</sup> Ma dauleng niang toxo tuu örörö sik toxo ölangen ina na, ma toxo tengen, "Moro ölöngö, ine i xukuwe e Elaija."

<sup>36</sup> Ma önga tödi mere idi ixo ulo ma ixo bulus ölaxa a spans kö wain manun, ma nang a wain ixo wöwö xönan ixo kut parange xö iaa ma ixo sanga kaa min urungan te Jisas sa ininim. Ma ixo tengen, "Tuu bang! Ire ta pere bere Elaija irabo ot ma irabo palas ösu ine bara kaim."

<sup>37</sup> Me Jisas ixo kup taxin ma ixo tewe mamas.

<sup>38</sup> Ma xönö man taxin nang ibo bölö wi sik a gunon lotu raxin ixo tamadidi nine xönö merso lömö uri arixe xö pu.

<sup>39</sup> Ma a umri raxin möxöbo duöng arse ixo tuu mesila sik ke Jisas. Nang ine ixo ölangen e Jisas bara ixo kup taxin ma ixo pere bölök nang e Jisas ixo met bule, ixo tengen, "Turunon saxit, a tödi na a Barok kö God!"

<sup>40</sup> Ma dauleng ne balixilik toxo tuu sik kö palaa ma toxo ngökgök mon. Kaluluon te idi, e Maria mee Makdala, me

\* 15:27 A dauleng ne ginigeet me lorexe toxo bulus ölaxa rina 28 i tengen bira: *Ma ina laa na ixo öturunon a tinenge re God nang toxo geet niang i tengen bira, 'Me idi toxo kos arixin ine mabo duöng saban.'*

Maria nago re Josep me Jems nang a barok melamu, arixe me Salomi.

<sup>41</sup> Idiet toxobo mumuu e Jisas nang ine ixo xisixis Galili ma toxobo balaure ine xöbo sasaxan te ine. Ma oleleng ne balixilik bölök ewe nang toxo wanot arixe me ine uruso Jerusalem, idi bölök angen.

*Toxo pömös e Jisas*

*(Matiu 27.57-61; Luk 23.50-56; Jon 19.38-42)*

<sup>42</sup> Xö aien kö bung pitnö abo Judeia tobo tagur möxö ina Sabat, xö bung malamau.

<sup>43</sup> Io, Josep me Arimatia, ine a öng möxö duöng taxin möxöbo kansel. Me ine iat bölök ibo xixiset lamun a kingdom kö God. Ine ixo wan pösöt e Pailat ma kaim ine xo binuut ma ixo ose ine lamun a minet te Jisas.

<sup>44</sup> Pailat ixo wuwus nang ixo ölangen bere Jisas ixoro met. Ine ixo kuwe lo a umri raxin möxöbo duöng ne arse ma ixo ose ine bere Jisas ixoro met bara kaim.

<sup>45</sup> Ma nang ixo ölangen a tinenge möxö ina umri bere Jisas ixoro met, ixo ömaraxen a minet te Jisas urungan te Josep.

<sup>46</sup> Io, Josep ixo kun abo man pidien ma ixo tön ösu ina aine. Ixo kait pi ine ma man pidien, ma ixo bulus ölaxa ine xö lieng niang ixoro luok tewe xalik a wat. Ma ixo ubun pi a marana lieng ma önga wat taxin.

<sup>47</sup> Maria mee Makdala me Maria nago re Joses toxo pere a xönö nang toxo ömarin sik ine xönan.

## 16

*A tinaru baling ke Jisas*

*(Matiu 28.1-8; Luk 24.1-12; Jon 20.1-10)*

<sup>1</sup> Nang a Sabat ixoro saxit, Maria mee Makdala, me Maria nago re Jems, arixe me Salomi toxo kun a wel ma abo lalaa nang a lak sixine deek, rö idiet ta nuan ta salap kö aine e Jisas.

<sup>2</sup> Xö Sade xö puxu bubung nang a xaken ixo tawök ka arun, idiet toxo wan urungan kö lieng ne minet.

<sup>3</sup> Me idiet toxo ose öbaling iat idiet bara, "Ewe irabo ubun tewe ina wat kalik a marana lieng?"

<sup>4</sup> Ma lamun nang idiet toxo wawara kaa, idiet toxo pere bara toxoro ubun tewe ina wat nang a lak taxin.

<sup>5</sup> Nang idiet toxo laxa urso kölöme xö lieng, idiet toxo pere önga tödi maxat ixo kisisik kö lawa tuun ma ixo sige sik a man pidien. Me idiet toxo wuwus köba ma toxo buut.

<sup>6</sup> Ma ina tödi ixo tengen tö idiet bara, "Ganim e muot ta binuut. E ösöxö bere muot mo wawara siwin e Jisas meri



Nasaret, ewe nang toxo taba ine xö sölöxöröp. Kaim ine ra. Ine iri taru baling kalik a minet. Me muot moro pere ina xönö niang toxo ömarin ine xönan.

<sup>7</sup> Lamun na, muot moro wan ma moro tengen köbo bak ne ausu re ine arixe me Pita bere, 'Jisas ire sila re mum uri Galili. Ma ri, mum morobo pere ine xarnang ine ixoro tengen sik ke mum.' "

<sup>8</sup> Io, idiet toxo wan su xalik ina lieng ma toxo ulo rup, möxösa, idiet toxo buut ma toxo dedede. Me idiet kaim kö rengrenge kere öng, möxösa, idiet toxo buut köba.

*Jisas ixo wösö re Maria mee Makdala*  
(Matiu 28.9-10; Jon 20.11-18)

<sup>9</sup> [Ma nang e Jisas ixo taru baling kalik a minet kö Sade xö puxu, ine ixo wösö arun te Maria mee Makdala nang ine ixo irewe a pitnö ma ninöng ne tano saban kalik ine.

<sup>10</sup> Ine ixo wan ma ixo tengen nanin te idi nang toxobo önan nana arixe me ine, me idi nang toxo gegee ma tapunuk.

<sup>11</sup> Nang idi toxo ölangen bere Jisas ixoro to baling ma bere Maria mee Makdala ixo pere sik ine, kaim idi ra nunu xönan.

*Jisas ixo wösö xö nine tödi*  
(Luk 24.13-35)

<sup>12</sup> Melamu xönan, Jisas ixo ot pösöt a nine tödi xö ngas ma önga mangana winara xabise niang idu toxo önan köbo lagunon taxin.

<sup>13</sup> Me idu toxo wanot baling ma toxo tengen osen köbo bak ne ausu xabise xirip, lamun kaim idi xo nunu re idu.

*Jisas ixo wösö xöbo bak ne ausu*  
(Matiu 28.16-20; Luk 24.36-49; Jon 20.19-23; Aposol 1.6-8)

<sup>14</sup> Melamu arixe im, e Jisas ixo ot pösöt ina sangaun ma öng nang toxo aan. Ine ixo köö idi, möxösa, kaim idi xo nunu ma abo baladi ixo tabönöt köba rua nunu re nangadi nang toxo pere bere ine i taru baling.

<sup>15</sup> Me Jisas ixo tengen te idi, "Mum moro wan urungan kö öxöno lagunon kirip ma moro palas tinenge ma tinenge deek.

<sup>16</sup> Ewenene nang i nunu ma i kip a baptais, irabo kip a to ulorexe, ma lamun ewenene nang i kobo nunu irabo tuu xö warkurai.

<sup>17</sup> Me ewe idi nang te nunu re e, e rabo tabaa idi ma lölös sua wewet abo auxileng kölöme xö eseke rua tile rewe abo tano saban, me idi tabo wöwörö xöbo mangana tinenge xabise kaim idi ra ausu ulamun.

18 Idi tabo tön öxaa a si xö limedi, ma nang bara idi te inim a mele möxö sesexomet a nangadi, i karabo perögat idi. Kaim. Idi tabo bulus abo limine idi lömö xö nangadi miniset, ma tabo deek baling.”

*Jisas ixo wan uruso xö watmaep*  
(Luk 24.50-53; Aposol 1.9-11)

19 Malamu nang e Jisas a Orong ixo wöwörö re idi, God ixo kip lo ine uruso lömö xö watmaep, ma ixo kis kö lawa tuun te God.

20 Io, abo bak ne ausu toxo wan lo ma toxo palas tinenge xö boxönö xirip, me Orong ixo rörön arixe me idi ma ixobo isik abo uxileng kua osen bara abo tinenge re idi a lak turunon.]

## A Tinenge Deek ke Luk

Luk ixo geet ina ginigeet na urungan kö önga tödi a esene e Tiopilas (pere Luk 1:1). Ine önga orong kuso Rom. Me Luk ixo maaa bere Tiopilas irabo maras ulamun a bung a nago re Jisas ixo kip ine, ma ulamun a tino re Jisas, a minet, ma a tinaru xalik a minet te ine, ma bere ine a Mesaia (nang toxo tengen bara 'e Kraiss') ewe i eöt bara irabo öro abo Judeia me idi bölök nang kaim bara abo Judeia. Ine a Mesaia ulamun a öxöno lagunon kirip. Me Luk ixo bulus öläxa abo pii oleleng nang kaim pingan te Matiu me Mak (pere a öxöno tinenge re Matiu). Ma ina Tinenge Deek na re Luk a urulo möxö pii nang e Luk ixo maaa bara irabo töngösen e Tiopilas ulamunon. Ire ta pere a xakawam möxö pii xö ginigeet 'Abo Tinörön köbo Aposol' (Aposol 1:1-2). Ire ta pere xö xakawam pe Tinenge Deek kö Luk bere Jisas ixo töngösen abo bak ne ausu bere idi tabo kis xiset a laa e God ixo xuxubus ulamun ine (Luk 24:29). Jisas ixo wöwörö ulamun a Töxödös ne Tanono. Ma xö sisila ne xönö xö Aposol tabo pere öbaling bere Jisas ixo töngösen idi bere idi tabo kis xiset a Tanono nang e God ixo xuxubus bara irabo tile rue idi. Io nang, Luk ma Aposol, idu önga xönö pii mon ulamun e Jisas ma xö nuan elixilik nana möxö tinenge deek nang ixo etöngösen ulamun e Jisas.

<sup>1</sup> 23Orong Tiopilas, a oleleng idi toxo döxömen bara idi tabo geet muu abo lalaa iri wanot kaluluonin e mem.

<sup>2</sup> Io, idi toxo muu abo atöngösen te idi abo tene atöngösen ma tinenge deek. Me idi abo tene atöngösen, idi iat niang idi toxo pere runin inabo lalaa mero xö urulo.

<sup>3</sup> Möxö ina na, e döxömen bara i deek bara arabo geet muu inabo lalaa na, möxösa, e iat e xo ose muu ödeek ulamun inabo lalaa mero xö urulo.

<sup>4</sup> Me e döxömen bara arabo pet bie bara örobo ösöxö a turunon ulamun abo lalaa nang u xoro kip abo inausu möxönan.

*A angelo ixo etöngösen sila me Jon tabo kip ine*

<sup>5</sup> Xö axana bung nang e Erot ixo king mee Judeia, önga pris a esene iang e Sekaraia. Ine a marapun te Abisa, ma a une re ine e Elisabet. Me ine bölök a marapun te Aron.

<sup>6</sup> Me idu xirip a nine tene töxödös kö wawara xö God. Me idu xirip toxobo mumuu a warkurai xö Orong. Ma i kebeöt te öng bara irabo puk idu mere tatalien saban.

<sup>7</sup> Inexalik bara, kaim idu mere barok, möxösa, e Elisabet ixo une tuu me idu xirip toxo ötaxin saban.

<sup>8</sup> Önga bung e Sekaraia ixo wewet a tinörön köbo pris kö mamaran kö God, möxösa, a axana bung bara abo pris nang idi mere Sekaraia idi toxo rörörön.

<sup>9</sup> Io, idi toxo egulös ma satu rua pere kos bere ewenene irabo laxa xö gunon lotu xö Orong kua söngsöngöt a arabaa nang a lak sixine deek.

<sup>10</sup> Ma nang a axana bung möxö söngsöngöt a arabaa nang a lak sixine deek ixo ot, a nangadi nang toxo ot etok kö araman kö gunon kö God, idi toxo seseseng.

<sup>11</sup> Io, a önga angelo ixo ot pösöt e Sekaraia. Ma a angelo ixo tuu sik kö lawa tuun kö öra möxö söngsöngöt a arabaa nang a lak sixine deek.

<sup>12</sup> Ma nang e Sekaraia ixo pere ine, ixo wuwus ma ixo buut köba.

<sup>13</sup> Inexalik bara a angelo ixo tengen te ine, "Sekaraia, ganim a binuut. A Orong iri ölangen a sineseng ke nöngön. Elisabet, a une re nöngön, irabo kip a bak suxurno rö nöngön, ma örobo isik a esene bere e Jon.

<sup>14</sup> Ine irabo öaxanan nöngön ma oleleng tabo axanan nang tabo kip ine,

<sup>15</sup> möxösa, ine irabo tödi raxin kö wawara xö Orong. Me ine i bele inim pe wain bara re ari lölös. Ma irabo wöwö ma Töxödös ne Tanono urulo iat mero xö balana nago.

<sup>16</sup> Me ine irabo lamus puxus a marakörö oleleng mee Israel urungan kö Orong, a God te idi.

<sup>17</sup> Me ine irabo kip a tatalien ma lölös se Elaija ma irabo sila xö Orong kua bulbulus a malum kaluluonin a tata ma bung barok ke idi. Ma irabo ötöxödös a dödöxömen köbo tabuno ölangen tinenge, me idi tabo kip a dinödöm deek xarnang a nangadi töxödös. Ine irabo tagur sik a nangadi bara idi tabo xixiset ulamun a Orong nang irabo wanot."

<sup>18</sup> Sekaraia ixo ose a angelo, "E rabo ösöxö bulengin ina na? E re ötaxin ma une re e bölök iri une raxin."

<sup>19</sup> A angelo ixo balu, "E, e Gabriel. E bo ruruu xö wawara xö God, me ine iat i tile e rua rengrengen te nöngön ma rua töngösen nöngön ma ina atöngösen deek na.

<sup>20</sup> Ma nixinen nöngön örobo tabuno tinenge ma örobo ödödö ot kö bung nang ina laa irabo wanot, möxösa, nöngön u kobo nunu xöbo tinenge re e nang irabo ot turunon kö bung iat möxönan."

<sup>21</sup> Inexalik bara, a marakörö toxo xixiset me Sekaraia, ma toxo ngangao ruasanene ine ixo kis lis köba ruso kölöme xö gunon ne lotu raxin.

22 Nang ine ixo wan su, kaim ine ra eöt tua tinenge rö idi. Me idi toxo ösöxö xulen lo bara ine ixo pere önga winawara xö gunon ne lotu raxin, möxö ixo ööt mon ma limine urungan te idi inexalik bara i kexebe eöt tua tinenge.

23 Nang a axana bung ke ine möxö tinörön ixo kawam, ixo tawuxus baling u lagunon.

24 Melamu xö ina na, e Elisabet, a une re ine, ixo tienen, ma ixo kis mun sik kö ngasiene ot kö pitnö ne texe.

25 Me ine ixo tengen, "A Orong i pet bira rö e. Ma xö ina axana bung na, ine iri osen a inemarse ma iri kip tewe a minenge re e xalik a marana a marakörö."

*A angelo ixo etöngösen sila me Jisas tabo kip ine*

26 Ma nang e Elisabet ixoro tienen kö pitnö ma öng ne texe, God ixo tile e angelo Gabriel u Nasaret, a lagunon kölöme Galili.

27 Ma ixo tile ine urungan kö önga une maxat nang kaim bang ine xö minaru arixe mere tödi ma toxo isik pi sik ine bara irabo elolo xö önga tödi a esene e Josep, a marapun te Dewit. Ma a esene ina une maxat e Maria.

28 Ma a angelo ixo wan urungan te ine ma ixo tengen, "A Orong iri kis arixe me nöngön ma iri wadöane nöngön."

29 Maria ixo ngangao xöbo tinenge re ine ma ixo dödödöm bara a mangana tinenge sa ina na.

30 Inexalik bara, a angelo ixo tengen te ine bira, "U bele bubuut, Maria. God i axanan te nöngön ma i tagur sik bara irabo wadöane nöngön.

31 Nöngön örobo tienen ma örobo kip önga barok suxurno, me nöngön örobo pes a esene e Jisas.

32 Ine irabo tödi raxin ma tabo tengen ine ma Barok kö God lömö saxit. God, a Orong, irabo tabaa ine ma kinis ne king nang ke untubuno e Dewit.

33 Me ine irabo kure ulorexe a bung marapun te Jekop. Ma kinis ne warkurai te ine i karabo kawam."

34 Maria ixo ose a angelo, "Ina laa na irabo ot turunon bara bule? E kobola ösöxö bang ke tödi."

35 Ma a angelo ixo balu ine bira, "A Töxödös ne Tanono irabo ot pösöt nöngön ma lölös kö God lömö saxit irabo kawönö nöngön. Io, ina tee Madakdak nang örobo kip tabo tengen ine bara a Barok kö God.

36 Örö ölangen! E Elisabet nang a unaun te nöngön, ine iri tienen, ma a une raxin ine. Ma toxo tengen bara ine a une tuu, inexalik bara ine iri tienen eöt ma pitnö ma öng ne texe.

37 Kaim pe laa i lölös se God."

38 Me Maria ixo balu, "E a tultul kö pu xö God. I öt bara irabo bie ura rö e xarnang nöngön uru tengen." Io, a angelo ixo wan lie ine.

*Elisabet ixo perexulen a nago xö Orong*

39 Io, xö ina axana bung nang Maria ixo tagur lo ma ixo wan pasaxit urungan kö önga lagunon tuso xöbo maii mee Judeia.

40 Ma ixo laxa xö gunon te Sekaraia ma ixo öga e Elisabet.

41 Ma nang e Elisabet ixo ölangen bere e Maria ixo öga ine, a barok nang kö balana ixo mamagi xöba, me e Elisabet ixo wöwö ma Töxödös ne Tanono.

42 Io, ixo tenge lömö saxit, "Irabo deek kö nöngön köbo balixilik kirip, ma ina barok bölök nang örobo kip.

43 Inexalik bara, e ewe, bara a nago xö Orong ke e irabo wanot ura rö e?

44 Nang iat mon a nine talingine e i ölangen nang u öga lo e, a barok na kölöme re e i mamagi ma axanan.

45 Irabo deek kö nöngön nang uru nunu bara a lasanene a Orong iri tengen te nöngön, ine irabo ot turunon."

*Maria ixo ölet a Orong*

46 Me Maria ixo tengen,

"Mera kölöme re e, e ii öraxin a Orong.

47 Ma a tanoke i axanan te God a Tene Aöro re e,

48 möxö ixo döxömen e xö kinis ne maris se e, a tultul te ine.

Io, urulo im na a marakörö nixinen me idi nang melamu idi tabo tengen bara irabo deek kö e,

49 möxösa, a God nang a lak lölös saxit iri pet abo lalaa rataxin tö e.

A esene ine i madakdak.

50 *Ma a inemarse re ine i önan urungan te idi nang tobo buburin ine*

*möxö önga mexubu urungan kö önga mexubu.*

51 Iri pet abo lalaa lölös ma limine.

Iri tile ebasin idi nang idi te döxömen öraxin öbaling idi.

52 *Iri bulus ösu abo sisila raxin meringan köbo kinis möxö pet warkurai te idi.*

Inexalik bara ine iri ii öraru abo maris.

53 Ine iri öwöwö idi nang te irilöng ulamun abo lalaa deek.

Inexalik bara ine iri tile rewe tataunin abo asuono orong.

54 Ine iri top e Israel, a tultul kö pu re ine.

Ma i döxömen sik iat bara irabo isik ulorexe saxit a abalamu re ine

55 rue Abaram mabo untubuno melamu,

xarnang bölök ixo tengen urungan köbo untubuno ire."

<sup>56</sup> Me Maria ixo kis arixe me Elisabet ot kö narun ne texe ma ixo tawuxus baling im urungan lagunon.

*A bung nang toxo kip e Jon*

<sup>57</sup> Nang a axana bung ke Elisabet ta xikip a barok, ixo kip a barok suxurno.

<sup>58</sup> Idi nang idi tobo kis lörörö sik ke ine ma bung unaun te ine, idi toxo ölangen bara a Orong ixo osen a inemarse re ine, me idi toxo axanan arixe me ine.

<sup>59</sup> Ma xö pitnö ma narun ne bung idi toxo wanot tua xurxuru a lewene aine barok, me idi toxo eka isik a esene tamana e Sekaraia re ine.

<sup>60</sup> Inexalik bara a nago re ine ixo tengen bara, "Kawaim! Tabo tengen ine bere e Jon."

<sup>61</sup> Me idi toxo tengen te ine, "Kaim pe öng kaluluonin abo unaun te nöngön ewe ma ina ese niang."

<sup>62</sup> Io, idi toxo ööt urungan kö tata re ine rua ösöxö lo bara ese sa ine i maaaa bara tabo isik kö barok.

<sup>63</sup> Ixo seseng ulamun te laa rua ginigeet könan, ma ixo geet bira, "A esene e Jon." Me idi xirip toxo wuwus saban.

<sup>64</sup> Ma nang iat mon a ngalana ixo tamasawang ma a kamene ixo tawalas, ma ixo urulo rua tinenge ma ixo ölet e God.

<sup>65</sup> Me idi nang lörörö toxo wöwö ma binuut. Ma a nangadi ringan kö boxönö xirip köbo maii mee Judeia, toxobo wöwörö ulamun inabo lalaa na.

<sup>66</sup> Me idi xirip nang toxo ölangen ina na, toxo dödöm oleleng ulamun, ma toxo eose, "Ina barok na, irabo mangana tödi bule?" Möxö a lölös kö Orong ixo kis arixe me ine.

*Sekaraia ixo tenge propet*

<sup>67</sup> A tamana ine e Sekaraia ixo wöwö ma Töxödös ne Tanono ma ixo tenge ne propet bira,

<sup>68</sup> "A aölelet urungan kö Orong, a God mee Israel, möxösa, ine iri wanot ma iri ölanglanga a nangadi re ine.

<sup>69</sup> Ine iri öraru a önga tödi lölös meringan kö bung marapun te Dewit, nang a tultul kö pu re ine, bara rua öro ire.

<sup>70</sup> I xarnang ixo tengen mesila saxit meringan köbo madakdak ne propet te ine.

<sup>71</sup> *Irabo öro ire xalik abo iuo re ire ma meringan kö limine idi xirip nang tobo melentexin ire.*

<sup>72</sup> Ixo pet bira rua osen a inemarse urungan köbo untubuno ire,

ma rua dödöxömen lo a kunubus madakdak ke ine

<sup>73</sup> nang ixo usugurno xö untubuno ire e Abaram

<sup>74</sup> rua ölanglanga ire xalik a limine abo iuo re ire,

bara ire tabo eöt tua tinörön tö ine ma kaim a binuut

<sup>75</sup> arixe ma tatalien madakdak ma tatalien töxödös xö mamaran te ine xöbo bungbung kirip pe ire.

<sup>76</sup> Me nöngön a barok ke e, tabo tengen nöngön bara a propet nang ke God lömö saxit,

möxö nöngön örobo sila xö Orong kua tagure a ngas sö ine

<sup>77</sup> rua tabaa a nangadi ma nanase rua xikip a ineöro

nang e God irabo döxömen taun abo magingin saban te idi,

<sup>78</sup> möxösa, xö inemarse deek kö God te ire.

Ma arixe ma a inemarse re ine irabo tile a maras möxö xaken meruso xö watmaep ura re ire,

<sup>79</sup> rua mararang lömö re idi nang te xisixis kö ködö ma xö ene lölös möxö minet,

ma rua silien ire ra nuan kö ngas ne malum.”

<sup>80</sup> Ma a barok ixo taxin kaa ma ixo lölös kölöme xö tanono, ma ixobo xisixis kö xönö tataun ot nang ixo wanot wösö xöbo Israel.

## 2

### *Maria ixo kip ot e Jisas*

<sup>1</sup> Ma xö ina axana bung Augastus, a king taxin mee Rom, ixo isik önga warkurai bara tabo kos a marakörö xirip nang e Rom ixo balaure sik.

<sup>2</sup> Ina na a sinila ne kip ese nang ixo ot kö axana bung nang e Kuirinius ixo warkurai sik kingan Siria.

<sup>3</sup> Ma a marakörö toxo wanot kirip baling urungan köbo lagunon te idi rua rengrenge osten abo esedi bara tabo geet oxe.

<sup>4</sup> Me Josep ine a marapun te Dewit. Ma ixo wan tewe bölök kalik ina lagunon Nasaret nang Galili, ma ixo wan urungan Judeia xö lagunon te Dewit nang tobo rengrenge me Betliem.

<sup>5</sup> Ma ixo wan urungan ee rua gegeet a esene idu me Maria ewe nang toxoro tengen bara irabo elolo re ine ma ixoro tienen.

<sup>6</sup> Ma nang idu toxo xisixis singan a axana bung ixo ot bara e Maria irabo kip a barok.

<sup>7</sup> Ma ixo kip a sisila ne barok, a barok suxurno. Me Maria ixo kain ine ma man ma ixo ömarin ine xö önga laa möxö nien köbo bulmakau, möxösa, kaim pe xönö gölö ringan kö gunon ne ose.

### *Abo angelo toxo etöngösen bara a Mesaia iri wanot*

<sup>8</sup> Ma abo tene balaure sipsip idi tobo werwere muu abo sipsip pe idi xöbo dömon lörorö xö ina xönö.

<sup>9</sup> Io, önga angelo xö Orong ixo wösö re idi. Ma a mariris kö Orong ixo sili ömalan idi, me idi toxo buut.



10 Ma lamun a angelo ixo tengen te idi, "Ganim e mum kö binuut. E ot ma atöngösen deek nang irabo öaxanan a marakörö xirip.

11 Ma nixinen te kip ot a Tene Aöro ruso xö lagunon te Dewit, me ine a Mesaia, a Orong.

12 Me mum morobo pere a uxileng nang tabo öturunon ina tinenge na. Mum morobo pere lo a barok te kain pi sik ine ma i maru sik kö önga laa möxö nien köbo bulmakau."

13 Ma nang iat mon, a oleleng ne angelo meruso xö balana kubu idi toxo wösö arixe ma ina angelo, ma toxo ölet e God bira,

14 "Ii öraxin a esene e God nang ibo xisixis tiso lömö.

Ma xö öxöno lagunon, a bala malum irabo wan urungan kö nangadi nang God iri bala deek ke idi."

15 Ma nang abo angelo toxo wan kalik idi uruso xö balana kubu, io, abo tene balaure sipsip toxo etöngösen baling ke idi, "Ire ta wan uruso Betliem ma ta pere ina laa nang i ot nang a Orong iri töngösen ire min."

16 Io, idi toxo wan pasaxit lo me idi toxo pere wösöt e Maria me Josep arixe ma barok ewe nang ixo maru sik kö laa möxö nien.

17 Ma nang idi toxo pere ine, idi toxo eselein ina tinenge ulamun a lasa nang abo angelo toxo töngösen idi min ulamun a barok.

18 Me idi xirip nang toxo ölangen, idi toxo wuwus kö lasa nang abo tene balaure sipsip toxo töngösen idi min.

19 Ma lamun e Maria ixobo döxömen oxe sik inabo laa xirip, ixobo dödödöm köba ulamun kö balana.

20 Mabo tene balaure sipsip idi toxo tawuxus, me idi toxo ölet e God ulamun inabo laa xirip nang idi toxo ölangen me idi toxo pere. Ma inabo lalaa i xarnang mon nang abo angelo toxo tengen te idi.

*A nine propet idu toxo tengen osen e Jisas a Mesaia*

21 Ma xö pitnö ma narun ne bung, idi toxo kuru a lewene aine a barok. Ma toxo tengen ine me Jisas. Ma ina ese nang a angelo ixo araun ta rengrengen ine min nang bang e Maria kaim kö ösaxit texe me ine.

22 Io, nang a axana bung ixoro wanot bara tabo pet eörin abo warkurai te Moses bere idu tabo madakdak baling kö wawara xö inabo warkurai, Josep me Maria idu toxo wan me Jisas uruso Jerusalem rua isik ine xö Orong.

23 Me idu toxo maaaa rua mumuu xarnang toxo geet kö warkurai xö Orong i bira: "Abo marna barok kirip tabo isik tewe idi urungan kö Orong."

24 Me idu toxo mamaa rua isik a arabaa re idu eöt ma warkurai xö Orong i tengen bira, *“Mum morobo erabaa ma nine buno bara nine balus lik.”*

25 Ma önga tödi ixobo xisixis singan Jerusalem, a esene e Simion. Ine a önga tene töxödös ma ibo lolotu wösöt a Orong. Me ixobo xisiset ma ina tödi nang e God irabo isik kua ömamanaa abo Israel. Ma Töxödös ne Tanono ixo kis se ine.

26 Ma Töxödös ne Tanono ixo osen ine bara irabo arun ta werwere bang a Mesaia xö Orong, ma melamu irabo met.

27 Io, a Töxödös ne Tanono ixo silien ine urungan kö gunon ne lotu raxin. Ma a tamana barok ma nago idu toxo kip öläxa a barok kua wewet sik a magingin urungan te ine eöt ma warkurai te Moses.

28 Io, Simion ixo kip lo a barok ma ixo ölet e God arixe ma ina tinenge na:

29 *“A Orong ke e, na e re örasen a malum.*

Örö ömaraxen lo e, a tultul te nöngön, ara wan kalik ina to na,

30 möxösa, nine marake iri pere im a lasa nang nöngön u xo pet tua öro e mem.

31 Nöngön u xo tagur sik ina ineöro na xö wawara xö nangadi xirip.

32 *Me ina ineöro a bibio möxö ömaras ewe idi nang kaim bara abo Judeia,*

me ine irabo isik a mariris köbo Israel, a nangadi re nöngön.”

33 Ma tata ma nago re Jisas idu toxo ölangen ina tinenge nang e Simion ixo pet te ine, idu toxo dödödöm oleleng.

34 Io, Simion ixo wadöane idiet ma ixo tengen te Maria, a nago xö barok, bira, *“Ina barok na, God ixo pere kos ine ulamun abo sunubu mabo tinaru möxö a oleleng ne nangadi mee Israel, ma irabo önga uxileng nang a nangadi tabo pere wuxus,*

35 bara a dinödöm möxö oleleng nang i mun sik irabo ot kö malmalan. Ma tapunuk irabo öriip nöngön xarnang a sele ibo kara a kat te nöngön.”

36 Io, önga propet une, esene e Ana, a balik ke Paniel, me Paniel a marapun te Aser. Ine ixoro une raxin saban, ma ixobo xisixis arixe ma usuono eöt ma pitnö ma ninöng ne awat.

37 Ma melamu a tödi re ine ixo met, me ine ixo xisixis tataun eöt ma pitnö ma narun ne sangaun ma nit ne awat. Ana i kara wan lie a gunon ne lotu raxin. Ma lamun ixobo ölölö ma ixobo seseseng köbo xaken ma dömön.

38 Ma xö ina bung nang ine bölökö ixo wanot lörörö xö barok ma ixo tengen deek kö God. Ma ixo tengen osen

ina tinenge ulamun a barok urungan kö nangadi xirip nang te xixiset me God irabo ölanglanga abo nangadi mee Jerusalem.

<sup>39</sup> Ma nang e Josep me Maria idu toxo pet kirip abo laa nang a warkurai xö Orong i tengen, idu toxo baling im u Nasaret, a lagunon te idu, niso Galili.

<sup>40</sup> Ma barok ixo taxin kaa ma aine ixo lölös, ma ixo wöwö ma nanase, ma a abalamu xö God ixo kis se ine.

*Jisas ixo kis kö gunon te Tamana*

<sup>41</sup> Ma xöbo awat kirip a tata ma nago re ine, idu tobo önan uruso Jerusalem ulamun a Luxa ne Nuan Lexe.

<sup>42</sup> Ma nang e Jisas ixo sangaun ma ninöng ne awat idiet barama toxo wan uruso Jerusalem lamun ina luxa xarnang idi toxobo wewet bie.

<sup>43</sup> Melamu xö ina nien, a tata ma nago re ine, idu toxo urulo rua binaling urungan kö lagunon, me Jisas ixo kis baling kingan Jerusalem, ma lamun idu kaim kö ösöxö bara ixo kis baling.

<sup>44</sup> Me idu toxo döxömen bara ine ixo önan arixe ma marakörö, idu toxo wan kö önga bung kudun. Ma melamu idu toxo urulo rua winara siwin ine kaluluonin abo ais mabo marapun te idu.

<sup>45</sup> Ma nang kaim idu xö werwere wösöt ine, idu toxo wan baling uruso Jerusalem rua winara rö ine.

<sup>46</sup> Ma melamu xö narun ne bung idu toxo pere lo ine kölöme xö gunon ne lotu raxin, ma ixo kisisik kaluluonin abo tene ausu ma ixo ölangen idi ma ixo ose idi.

<sup>47</sup> Ma nangadi xirip nang toxo ölangen ine, idi toxo wuwus kö nanase re ine ma xöbo babalu re ine.

<sup>48</sup> Ma nang a tata ma nago re ine toxo pere ine, idu toxo wuwus. Ma nago re ine ixo tengen te ine bira: "Barok ke e, ruasa nöngön u pet e maa bira? A balana e maa me tata i tiip köba me maa me wawara siwin nanin nöngön."

<sup>49</sup> Io, ine ixo balu idu bira, "Ruasa mu mo wawara rö e? Mu kobo ösöxö bere e rabo mana xisixis kö gunon kö Tamake?"

<sup>50</sup> Inexalik kaim idu xö ösöxö xulen a lasa nang ine ixo wöwörö min urungan te idu.

<sup>51</sup> Io, ine ixo wan arixe me idu urungan baling Nasaret, ma xöbo bung kirip ine ixobo ölangen a tinenge re idu. Ma nago re ine ixobo döxömen dik sik iat inabo lalaa xirip.

<sup>52</sup> Me Jisas ixo taxin kaa, ma nanase re ine ixo rataxin bölök. Me God arixe ma nangadi toxobo axanan köba rö ine.

## 3

*Jon ixo tagure a ngas  
(Matiu 3.1-12; Mak 1.3-6)*

<sup>1</sup> Xö sangaun ma pitnö ne awat kö kinis ne warkurai re Tiberius, a king taxin mee Rom, nang e Pontias Pailat ixo sisila me Judeia, Erot ixobo kure sik e Galili me tönö re ine e Pilip ixobo kure sik e Iturea me Trakonitis, me Lisantias ixobo kure e Abilene.

<sup>2</sup> Me Anas me Kaiapas idu toxo taxin ma toxobo sila sik köbo pris kabise. Ma a tinenge re God ixo ot pösöt e Jon, a barok ke Sekaraia, xö xönö tataun.

<sup>3</sup> Ine ixo wan kö boxönö xirip lörörö xö Ari Jordan ma ixo etöngösen bara, "Mum moro kip lo a baptais sa osen bere mum moro dödöm puxus. Me God irabo dökömen taun abo magingin saban te mum."

<sup>4</sup> Ina na nang toxoro geet kölöme xö ginigeet köbo tinenge re propet Aisaia bira:

*"A inöno öng i xukup kö xönö tataun,  
'Tagure a nuan möxö Orong,  
ötöxödös a ngas sö ine.*

<sup>5</sup> *Abo marasaa xirip tabo pömös,  
ma abo puot ma kalala tabo pet eörin.  
Abo ngas gege irabo töxödös,  
mabo ngas gargaras irabo madalaan.*

<sup>6</sup> *Ma a nangadi xirip tabo pere a ineöro mere God.' "*

<sup>7</sup> Jon ixo tengen kö marakörö nang toxo ot bara rö ine ra baptais idi, "Mum abo tene röxröxö! Ewe ixo panak e mum pa ulo rup kalik ina kinadik nang e God i lörörö ra isik?"

<sup>8</sup> Mum morobo mana pet abo lalaa nang irabo osen bara mum moxoro dödöm puxus. Me mum iat mum bele urulo rua dökömen bie: 'Ire te ösöxö bara e Abaram i xarnang a tubuno ire.\*' E tengen te mum bara God i öt sik ka öraru abo tubuno e Abaram meringan kinabo wat.

<sup>9</sup> A matau tuar iang kö unine iaa, mabo iaa xirip nang tekara o abo pasuno deek, tabo tee ösu ma tabo tewe urungan kö könönö ia sösöt."

<sup>10</sup> Io, a marakörö toxo ose bara, "Mem marabo pet a sa?"

<sup>11</sup> Jon ixo balu idi bira, "A tödi ma nine siot irabo erimine me we nang kawaim, ma ewe nang ma nien irabo pet bölök bie."

<sup>12</sup> Abo tene kip takis bölök toxo ot tua kip baptais me idi toxo eose, "Tene ausu, mem marabo pet a sa?"

---

\* **3:8** Abo Judeia toxo dökömen bara idi takarabo dödöm puxus, möxösa, idi toxo dökömen bara idi abo nangadi re God, möxösa, idi abo untubuno e Abaram.

<sup>13</sup> Ma ixo tengen te idi, "I deek bara mum morobo kip eöt mon nang te kure bie, ma ganim a lexlexe inabo warkurai."

<sup>14</sup> Io, a dauleng ne umri toxo ose ine, "Ma a laa sanene nang mem marabo pet?"

Jon ixo balu idi bira, "Ganim a öparara lo a tuluwok kö nangadi ma ganim e mum pua wupuk a nangadi ma tinenge töxö, me mum morobo axanan lamun a xinixun te mum."

<sup>15</sup> Ma nangadi toxo xixiset lamun a inot kö Mesaia, ma toxo döxömen kö kat te idi bara e Jon gut ine ina Mesaia.

<sup>16</sup> Jon ixo balu idi xirip, "E baptais e mum ma ari. Ma lamun önga tödi irabo wanot i taxin köba re e. E kobo töxödös eöt ta walwalas a kililöng kalik a nine sandel te ine. Ine irabo baptais e mum ma Töxödös ne Tanono ma ia sösöt bölök.

<sup>17</sup> Me ine i tön sik a sawol te ine ra tewe öxaa abo irine wit kö xiki nang irabo paxat tewe abo lewene xalik abo irine. Lamun abo irine wit deek kölömene nang ixo tiip ma i subu, ine irabo iiögun arixin tingan kö öra ne nien te ine. Ma lamun ine irabo tewe rewe abo lewene irine wit urungan kölöme xö ia sösöt nang idi tekebeöt ta pus ömet."

<sup>18</sup> Ma arixe ma oleleng ne tinenge xabise, Jon ixo öxaxat a nangadi ma ixo palas tinenge ma tinenge deek urungan te idi.

<sup>19</sup> Me Jon ixo köö e Erot a tödi raxin mee Galili ulamun e Erodias a une re tönö ine mabo lalaa saban kirip nang ine ixo pet.

<sup>20</sup> Ma nang e Jon ixo pet bira, Erot ixo pet a laa saban tunon. Ixo baxut e Jon kö gunon ne aömokorot.

### *Jon ixo baptais e Jisas*

*(Matiu 3.13-17; Mak 1.9-11)*

<sup>21</sup> Nang Jon ixo baptais abo nangadi, Jisas ixo kip lo bölök a baptais. Ma nang ixo seseseng, a balana kubu ixo tamasawang

<sup>22</sup> ma a Töxödös ne Tanono ixo wan su lömö re ine, ma ixo wawara bara ixo kip lo a aine xarnang a buno. Io, a inöno öng ixo ot meruso xö balana kubu ma ixo tenge bira, "Nöngön ano Barok ke e. E mamaa lamun me e axanan köba re nöngön."

### *Abo untubuno e Jisas*

*(Matiu 1.1-17)*

<sup>23</sup> Me Jisas ine ixo öt ma narun ne sangaun ne awat nang ine ixo urulo a tinörön te ine. A dödxömen kö marakörö bara ine a barok ke Josep,

a barok ke Eli,

<sup>24</sup> a barok ke Matat,

a barok ke Lewi, a barok ke Melki,

a barok ke Janai, a barok ke Josep,  
<sup>25</sup> a barok ke Matatias, a barok ke Amos,  
 a barok ke Nahum, a barok ke Esli,  
 a barok ke Nagai,  
<sup>26</sup> a barok ke Maat,  
 a barok ke Matatias, a barok ke Semein,  
 a barok ke Josek, a barok ke Joda,  
<sup>27</sup> a barok ke Joanan, a barok ke Resa,  
 a barok ke Serubabel, a barok ke Sealtiel,  
 a barok ke Neri,  
<sup>28</sup> a barok ke Melki,  
 a barok ke Adi, a barok ke Kosam,  
 a barok ke Elmadam, a barok ke Er,  
<sup>29</sup> a barok ke Josua, a barok ke Elieser,  
 a barok ke Jorim, a barok ke Matat,  
 a barok ke Lewi,  
<sup>30</sup> a barok ke Simion,  
 a barok ke Juda, a barok ke Josep,  
 a barok ke Jonam, a barok ke Eliakim,  
<sup>31</sup> a barok ke Melea, a barok ke Mena,  
 a barok ke Matata, a barok ke Natan,  
 a barok ke Dewit,  
<sup>32</sup> a barok ke Jesi,  
 a barok ke Obet, a barok ke Boas,  
 a barok ke Salmon, a barok ke Nason,  
<sup>33</sup> a barok ke Aminadab, a barok ke Ram,  
 a barok ke Eson, a barok ke Peres,  
 a barok ke Juda,  
<sup>34</sup> a barok ke Jekop,  
 a barok ke Aisak, a barok ke Abaram,  
 a barok ke Tera, a barok ke Naor,  
<sup>35</sup> a barok ke Seruk, a barok ke Reu,  
 a barok ke Pelek, a barok ke Eber,  
 a barok ke Sela,  
<sup>36</sup> a barok ke Kainan,  
 a barok ke Arpaxat, a barok ke Sem,  
 a barok ke Noa, a barok ke Lamex,  
<sup>37</sup> a barok ke Metusela, a barok ke Enox,  
 a barok ke Jaret, a barok ke Maxalalel,  
 a barok ke Kenan,  
<sup>38</sup> a barok ke Enos,  
 a barok ke Set, a barok ke Adam,  
 a barok ke God.

## 4

*Satan ixo könönöin e Jisas*  
*(Matiu 4.1-11; Mak 1.12-13)*

<sup>1</sup> Jisas ixo wöwö sik ma Töxödös ne Tanono ma ixo wan baling meringan kö Ari Jordan ma Tanono ixo lamus lo ine urungan kö xönö tataun.

<sup>2</sup> Me Satan ixo könönöin ine ringan kö nit ne sangaun ne bung. Kaim ine xo enen te laa xö inabo bung niang, ma melamu ine ixo irilöng.

<sup>3</sup> Io, Satan ixo tengen te ine, “Nang bara nöngön ano Barok ke God, örö tengen kö ina wat na rua tawuxus urungan kö beret.”

<sup>4</sup> Jisas ixo tengen, “Abo tinenge re God toxoro geet i tengen bira: *‘A nangadi tokobo to xalik mon kö beret’* ”

<sup>5</sup> Io, Satan ixo lamus öxaa ine xö puot ma nang iat mon ixo osen ine mabo kantri kirip möxö öxöno lagunon.

<sup>6</sup> Ma ixo tengen te ine, “E rabo tabaa nöngön ma inabo kinis ne warkurai arixe mabo mariris se idi, möxösa, idi re e, me e eöt tua isik kere öng nang bara e maaaa.

<sup>7</sup> Io, nang bara örobo lotu wösöt e, ina na xirip irabo re nöngön.”

<sup>8</sup> Jisas ixo tengen, “Abo tinenge re God toxoro geet i tengen bira, *‘Mum moro lotu xö Orong, a God te mum, me ine xalik mon mum morobo ü ölik e mum pe ine.’* ”

<sup>9</sup> Io, Satan ixo lamus lo ine urungan Jerusalem, ma ixo uru e Jisas lömö saxit kö öxöno ngusuno möxö gunon lotu raxin. Ma ixo tengen, “Nang bara ano Barok kö God nöngön, örobo kos su mera,

<sup>10</sup> möxösa, abo tinenge re God toxo geet i tengen bira: *‘Irabo isik a tinenge lölös urungan köbo angelo re ine ulamun nöngön rua balaure ödeek nöngön.*

<sup>11</sup> *Idi tabo tön uru nöngön mabo limine idi, bara ökorobo segen parange abo sisixine xexem köbo warawat.’* ”

<sup>12</sup> Jisas ixo tengen, “Abo tinenge re God toxoro geet i tengen bira, *‘Ganim bara mum mo könönöin a Orong, a God te mum.’* ”

<sup>13</sup> Nang e Satan ixo kawam kirip pua könönöin e Jisas, ixo wan talu bang e Jisas ot kö önga axana bung kabise.

*Idi xö lagunon te Jisas, idi kaim kö öbala lo ine*

<sup>14</sup> Jisas ixo wan baling u Galili ma lölös kö Tanono, ma a tinenge ulamun ine ixo wan esexere xöbo lagunon.

<sup>15</sup> Ixo usu a nangadi kölöme xöbo gunon ne sineseng ke idi, me idi xirip toxo ölet ine.

<sup>16</sup> Ixo wan u Nasaret, lagunon nang ine ixo taxin kaa e, ma xö Sabat ine ixo laxa xö gunon ne sineseng xarnang ine ixobo wewet bie. Ma ixo tuu kaa rua xinoxos.

17 Io, toxo tabaa ine ma axana ginigeet te propet Aisaia. Ixo palase ine ma ixo pere lo a xönö nang a ginigeet i tengen bira:

18 *"A Tanono möxö Orong i kis kölöme re e, möxösa, ine iri pere kos lo e rua atöngösen ma tinenge deek urungan kö duöng maris. Ine iri uguran e rua atöngösen maras sö idi nang tobo kut dik sik idi, bara tabo langlanga, me idi nang a pulo, tabo wawara baling. Me ine iri uguran e rua ölanglanga rewese idi nang te kis kö ene abo tiip,*

19 *ma rua atöngösen maras bara a axana bung ne rorop kö Orong iri wanot."*

20 Io, ine ixo pulin öbaling ina axana ginigeet, ixo isik öbaling urungan kö tene balbalaure möxö ina axana ginigeet. Io, ixo kis. A marana nangadi xirip kölöme xö ina gunon ne sineseng toxo wawara xalik ke ine.

21 Me ine ixo urulo ma tinenge rö idi bira, "Nixinen ina ginigeet meruso re God iri wanot turunon kö ölöngö re mum."

22 Idi xirip toxo tengen bara ine a tödi deek me idi toxo wuwus köbo tinenge deek nang ixo wan su möxö ngusuno. Idi toxo eose, "Ire tokobo maras bere ine mon a barok suxurno re Josep."

23 Me Jisas ixo tengen te idi, "E ösöxö sik bara mum morobo tengen abo tinenge ne rorop ura rö e: 'Tene aule, ölanglanga öbaling nöngön. Pet baling ke laa ra xö lagunon turunon te nöngön nang mem moxo ölangen bara u xo pet tö Kaprenaum.'" "

24 Ma ixo tengen, "Turunon saxit, kaim pe propet te ömaraxen lo ine iat kölöme xö lagunon iat te ine.

25 E ömaras e mum bara oleleng ne möxösö ra Israel kö axana bung ke Elaija, nang a balana kubu ixo tamabaxut kö narun ne awat ma subana ma kaim arixe a nien kö ina xönö xirip Israel.

26 Inexalik God kaim kö uguran e Elaija urungan kö öng mere idi abo möxösö, inexalik ixo uguran ine urungan kö önga une möxösö kölöme Sarepat kölöme xö xönö Saidon.

27 Ma xö axana bung kö propet Elisa a oleleng ma lepra kölöme Israel. Inexalik kaim kö ölanglanga re öng mere idi. Naaman kalik mon, a Siria."

28 Nangadi xirip kölöme xö gunon ne sineseng toxo laie nang idi toxo ölangen ina na.

29 Idi toxo taru ma toxo uguran tewe ine xalik ina lagunon ma toxo lamus lo ine urungan kö öxöno maii nang toxo pet ina lagunon, bara rua tewe ösu ine xö kalala.



<sup>30</sup> Lamun ine ixo wan kaluluonin a marakörö ma ixo wan.

*Jisas ixo tile ösu a tano saban*  
(Matiu 1.21-25)

<sup>31</sup> Io, ixo wan su Kaprenaum, a lagunon kölöme Galili. Ma xö Sabat ixo urulo a usu a nangadi.

<sup>32</sup> Idi toxo wuwus kö ausu rine, möxösa, a tinenge re ine a lak lölös.

<sup>33</sup> Kölöme xö gunon ne sineseng, önga tödi a tano saban ixo kis se ine. Ma ixo kup lömö saxit,

<sup>34</sup> "Nang! Jisas mee Nasaret, u maaaa ruasa xalik e mem? U wanot ta ögarin esexerein e mem? E ösöxö sik nöngön, bere nöngön a Öng Ewe Nang a lak Madakdak meriso re God!"

<sup>35</sup> Me Jisas ixo köö ina tano saban, ma ixo tengen, "Örö ödödö, ma wan su xalik ine." A tano saban ixo tewe ösu ina tödi xö pu mesila re idi xirip ma ixo wan su xalik ine, inexalik kaim kö ögarin ine.

<sup>36</sup> A nangadi toxo wuwus saban, ma toxo tengen öbaling iat te idi bira, "A mangana ausu sanene ia? Ine ibo isik warkurai ma tinenge lölös urungan köbo tano saban me idi tobo önan su!"

<sup>37</sup> Ma a atöngösen ulamun e Jisas ixo wan esexere xöbo lagunon kirip kö ina xönö.

*Jisas ixo ölanglanga abo miniset*  
(Matiu 8.14-17; Mak 1.29-38)

<sup>38</sup> Jisas ixo wan kalik a gunon ne sineseng ma ixo wan urungan kö gunon te Saimon. Io, a taön te Saimon ixo sam malao lölös, me idi toxo seng e Jisas sua rorop ine.

<sup>39</sup> Io, ixo tun lexe ine ma ixo köö a malao, ma a lelewi ixo kawam kalik ine. Ma saxit mon ixo taru kaa ma ixo urulo rua tabaa idi ma nien.

<sup>40</sup> Nang a xaken ixo dödöröng, a nangadi toxo kip ot urungan te Jisas abo duöng nang mabo mangana miniset ma ixo bulbulus a limine lömö xö öngöng ma ixo ölanglanga idi.

<sup>41</sup> Ma nang abo tano saban toxo wan su xalik a nangadi toxo xukup bira, "Nöngön a Barok kö God!" Inexalik, ine ixo köö idi, ma kaim kö ömaraxen idi rua tinenge, möxösa, idi toxoro ösöxö sik bara ine a Mesaia.

<sup>42</sup> Xö puxu bubung Jisas ixo wan lo urungan kö xönö tataun. Ma nangadi toxo wawara rö ine ma nang idi toxo ot kö xönö nang ine e, idi toxo maaaa bara ine i bele önan lie idi.

<sup>43</sup> Ma lamun ixo tengen, "E rabo mana palas tinenge ma tinenge deek kö kingdom kö God urungan köbo lagunon kabise, möxösa, Tata ixo tile e ura ulamun ina na."

44 Ma ixo walwalas tinenge kölöme xöbo gunon ne sineseng kingan kö xönö mee Judeia.

## 5

*Abo sinila ne bak ne ausu*

*(Matiu 4.18-22; Mak 1.16-20; Jon 1.40-42)*

<sup>1</sup> A önga bung e Jisas ixo tuu sik kö lawana tu Genesaret mabo nangadi toxo tuu wi sik ine ma toxo ölangen a tinenge re God.

<sup>2</sup> Ma nang e Jisas ixo wawara ixo pere a nine mön ixo malaa sik kuso löxön, a mön kö nangadi möxö kip inan. Ma lamun idi toxoro wan kalik inabo mön, me idi toxo gisgis abo eben te idi.

<sup>3</sup> Io, Jisas ixo kaa xö önga mön, a mön te Saimon. Ma ixo tengen te Saimon bara ira sumen ulik kalik a löxön. Io, ixo kis kaa xö mön ma ixo usu a nangadi.

<sup>4</sup> Ma nang ixo wöwörö xirip, ixo tengen te Saimon, "Örö kaulusen ulik urungan kö dödongö. Ma örö tewe ösu a eben ma örö kip inan."

<sup>5</sup> Me Saimon ixo balu, "Tödi raxin, mem me rörön köba xö ina dömon na. Me mem kobola öxönöm pe laa. Ma lamun e rabo bulus ösu a eben, möxösa, nöngön u tengen bira."

<sup>6</sup> Ma nang idi toxo pet bie, idi toxo kip a oleleng ne inan. Mabo eben te idi ixo urulo ra tamadidi.

<sup>7</sup> Io, idi toxo kuwe abo ais se idi nang kö önga mön kabise ra nuanot ta rorop idi. Me idi toxo wanot ma toxo utuxo a nine mön. Ma toxo wöwö ma toxo urulo rua riririi.

<sup>8</sup> Ma nang e Saimon Pita ixo pere ina na, ixo subu xö xexene Jisas ma ixo tengen, "Wan kalik e, Orong. E a tödi saban!"

<sup>9</sup> Ixo tengen bira, möxösa, ine ma abo ais se ine toxo wuwus kö ina inan nang idi toxo kip.

<sup>10</sup> Ma nine ais se Saimon, e Jems me Jon, a nine barok ke Sebedi, idu toxo wuwus bölök.

Io, Jisas ixo tengen te Saimon, "U bele buut. Urulo nixinen nöngön örobo kip a nangadi."

<sup>11</sup> Io, idi toxo ösö löxön, ma toxo ganim sik abo lalaa xirip ma toxo muu ine.

*Önga lepra*

*(Matiu 8.2-4; Mak 2.3-12)*

<sup>12</sup> Ma nang e Jisas ixo wan urungan kö önga lagunon, a önga tödi ixo wanot ewe nang a miniset lepra ixo kawönö ine. Ma nang ixo pere e Jisas ixo subu ma marana xö pu ma ixo seng ine, "Orong, nang bara u maaaa, nöngön u eöt ta öxawam a miniset lepra xalik e bara e ra madakdak."

13 Me Jisas ixo sasanga ma limine ma ixo tön ine. Ma ixo tengen te ine, “E mamaa. Öro deek.” Ma saxit iat mon, ina miniset lepra ixo wan kalik ine.

14 Io, Jisas ixo panak ine, “Ganim bara u tengen osen kere öng. Inexalik öro wan ma öro osen nöngön kö pris ma öro isik abo arabaa ne söngsöngöt eöt ma warkurai te Moses bara örobo deek baling. Ma irabo xarnang a atöngösen maras sö idi bara a turunon bere u xoro langlanga.”

15 Inexalik a atöngösen ulamun e Jisas ixo wan esexere xö boxönö xirip, io, a marakörö toxo wanot tua ölangen ine ma bara irabo ölanglanga abo miniset te idi.

16 Inexalik uleng ne bung Jisas ixobo önan kalik a marakörö ma ixobo önan urungan kö boxönö nang kaim a nangadi ma ixobo seseseng.

*Jisas ixo ölanglanga a pengpeng  
(Matiu 9.2-8; Mak 2.3-12)*

17 Ma önga bung nang e Jisas ixo usu abo Parasi ma abo tene ausu möxöbo warkurai te Moses, ewe me idi nang toxo wanot möxöbo lagunon kirip Galili ma meringan Judeia ma Jerusalem, ma toxo xisixis singan ee. Ma a lölös kö Orong ixo kawönö ine ma ixo ölanglanga abo miniset.

18 A uleng ne duöng toxo ot ma toxo xikip nanin a pengpeng kö ben ma toxo kip öläxa ine xö gunon tua ömarin ine mesila re Jisas.

19 Ma nang idi toxo wawara siwin te ngas sua nuan laxa, möxösa, a marakörö toxo oleleng, idi toxo kaa uruso lömö, toxo pök a öxöno gunon, ma toxo ösölöng ösu ina pengpeng arixe ma minaru re ine kaluluonin a marakörö urungan te Jisas.

20 Nang e Jisas ixo pere a nunu ridi, ixo tengen, “Töke, na iat mon a magingin saban te nöngön iri kawam.”

21 Abo Parasi mabo tene ausu möxöbo warkurai te Moses toxo döxömen suxume re idi iat bira, “Ewe ina tödi na i tengen ögarin e God? Kaim pe öng i öt ta kip tewe a magingin saban, nexalik bara e God kalik mon.”

22 Ma lamun e Jisas ixo ösöxö xulen a lasa nang idi toxo dödöxömen, ma ixo eose, “Rösa mum mo dödöxömen inabo lalaa na xö kat te mum?”

23 Nangang sa re idu i malus sa rengrengen? I malus se e ra tengen bira, ‘A magingin saban te nöngön iri kawam?’ Bara i malus se e ra tengen, ‘Tuu lömö, ma öro wan?’

24 Ma lamun eka osen e mum bara a Barok kö Tödi ine ma lölös kö öxöno lagunon tua irewese a magingin saban.” Ma ixo tengen kö pengpeng, “E tengen te nöngön, tuu lömö

ma örö kip lo a ben te nöngön ma örö wan urungan kö ngasiem."

<sup>25</sup> Ma saxit mon ixo taru xö wawara re idi ma ixo rarik lo a minaru re ine ma ixo ölet God nang ixo önan urungan kö gunon te ine.

<sup>26</sup> Io, a nangadi xirip toxo wuwus ma toxo ölet e God. Idi toxo ii e God ma binuut ma toxo tengen, "Nixinen ire tere pere a lalaa deek ne auwuwus."

*Ewenene irabo dödöm puxus*

*(Matiu 9.9-13; Mak 2.14-17)*

<sup>27</sup> Melamu xö ina na, Jisas ixo wan su ma ixo pere a tene kip takis, a esene e Lewi, ixo kisisik kö xönö re ine möxö kip takis. Me Jisas ixo tengen te ine, "Muu e!"

<sup>28</sup> Me Lewi ixo tuu lömö, ma ixo wan lie abo lalaa xirip ma ixo muu ine.

<sup>29</sup> Io, Lewi ixo pet a nien taxin ulamun e Jisas kö gunon tine, ma a oleleng saxit ne tene kip takis ma dauleng kabise toxo aan arixe me idi.

<sup>30</sup> Ma lamun abo Parasi ma abo tene ausu möxöbo warkurai te Moses ewe nang a Parasi bölök idi, toxo wöwörö oleleng urungan köbo bak ne ausu re ine, "Ruasa mum mo aan ma mo ininim arixe mabo tene kip takis mabo 'duöng saban'?"

<sup>31</sup> Jisas ixo balu idi, "A nangadi nang kaim a miniset, idi tekara sasaxan ulamun a tene aule, nexalik idi xalik nang a lak miniset.

<sup>32</sup> E kobo ot ta xukuwe abo tene töxödös. Kawaim, e ot ta xukuwe a nangadi saban tua dödöm puxus."

*Abo lalaa maxat te Jisas*

*(Matiu 9.14-17; Mak 2.18-22)*

<sup>33</sup> Idi toxo tengen te ine, "Abo bak ne ausu re Jon idi tobo ölölo ma tobo seseseng. Ma abo bak ne ausu möxöbo Parasi idi bölök tobo wewet bie. Ma lamun abo bak ne ausu re nöngön idi te aan ma te ininim."

<sup>34</sup> Jisas ixo balu, "I eöt bara örö pet abo osee möxö tödi alolo maxat, tabo ölölo nang bara ine angen arixe mididi? Kaim.

<sup>35</sup> Ma lamun a axana bung irabo wanot nang tabo kip lo ina alolo maxat kalik idi. Ma xinabo bung nang, idi tabo ölölo im."

<sup>36</sup> Ma ixo töngösen idi ma ina tinenge öwuo: "Kaim pe öng ibo dididii rewe re xönö man maxat ma ibo söxsöxö xö man maut. Nang bara i pet biringan, ine irabo ögarin ina xönö man maxat, ma xönö man i karabo eöt ma ina xönö man maut.

<sup>37</sup> Ma kaim pe öng ibo linglinge a wain maxat nang i kobola ebobot bang kölöme xö önga laa möxö kuluwo ari

nang toxo pet ma lewene meme maut i lelet sik. Nang bara i pet, a wain maxat irabo ebobot kaa ma irabo pörök a lewene meme. A wain irabo su xirip ma ina lewene meme irabo saban.

<sup>38</sup> Kaim. A wain maxat tabo mana tii urungan kö lewene meme maxat.

<sup>39</sup> Ma kaim pe öng nang iri inim a wain maut ibo maaaa lamun a wain maxat, möxösa, ine ibo tengen, 'A wain maut a lak deek.' "

## 6

*Jisas i kure sik a bung Sabat*

*(Matiu 12.1-14; Mak 2.23—3.6)*

<sup>1</sup> Io, xö önga Sabat, Jisas ixo wan kaluluonin a komo wit, mabo bak ne ausu rine toxo pit köröp lo a uleng ne xurxurno wit, ma toxo gigise mabo limine idi ma toxo en.

<sup>2</sup> Ma dauleng möxöbo Parasi toxo eose bira, "Ruasa mum mo pet bira? Mum kobo mumuu a warkurai möxö bung Sabat."

<sup>3</sup> Io, Jisas ixo balu idi, "Mum moxoro kos abo laa mesila nang e Dewit ixo pet nang ine ixo irilöng arixe ma abo duöng nang toxo wan arixe mine.

<sup>4</sup> E Dewit ixo wan laxa xö gunon te God, ma ixo kip lo ina beret nang tobo tabaa e God min, ixo en ine. Mabo warkurai te Moses i tengen bara abo pris kalik tobo enen ina beret na. Ma ixo tabaa bölök abo duöng nang toxo wan arixe me ine."

<sup>5</sup> Io, Jisas ixo tengen te idi, "A Barok kö Tödi i kure bölök a bung Sabat."

<sup>6</sup> Xö önga Sabat kabise Jisas ixo wan laxa kölöme xö gunon ne sineseng möxöbo Judeia ma ixo usu a nangadi, ma önga tödi ixo xisixis singan a lime tuun te ine ixo met.

<sup>7</sup> Abo Parasi mabo tene ausu möxöbo warkurai te Moses toxo werwere ine nang bara irabo ölanglanga a tödi miniset kö Sabat bara kaim, io, niang ke idi ra wupuk ine.

<sup>8</sup> Ma lamun Jisas ixo ösöxö xulen abo dinödöm pe idi ma ixo tengen kö tödi niang a lime met, "Taru kaa ma örö tuu lömö mesila xö nangadi xirip." Io, ixo taru kaa ma ixo tuu sik.

<sup>9</sup> Io, Jisas ixo tengen te idi, "E ose e mum, a sa xö warkurai te Moses i tengen bara i töxödös bara tabo pet kö bung Sabat? I deek sik ka rorop bara rua wewet a tinörön saban, ma rua öro re öng bara rua ögarin esexerein ine?"

<sup>10</sup> Jisas ixo wawara nana re idi xirip, ma ixo tengen kö tödi, "Sasanga kaa ma limem." Ine ixo pet bie, ma a limine ixo deek baling.

<sup>11</sup> Inexalik idi toxo laie ma toxo wówörö nana iat te idi bara tabo pet bule re Jisas.

*Jisas ixo pere kos lo abo aposol*  
(Matiu 10.2-4; Mak 3.16-19; Aposol 1.13)

<sup>12</sup> Io, xö ina axana bung nang e Jisas ixo wan lo ma ixo kaa uruso lömö xö maii rua sineseng, ma xö ina dömön ixo seseseng uruso re God.

<sup>13</sup> Ma nang ixo puxu, ine ixo kuwe lo abo bak ne ausu re ine urungan te ine ma ixo pere kos lo a sangaun ma ninöng mere idi, ma ixo tengen idi mabo 'aposol':

<sup>14</sup> Saimon, ewe nang e Jisas ixo tengen ine me Pita, a tönö rine e Endru, Jems, Jon, Pilip, Batolomiu,

<sup>15</sup> Matiu, Tomas, Jems a barok ke Alpius, Saimon nang toxo tengen bara ine ina Silot,

<sup>16</sup> Judas a barok ke Jems, me e Judas Iskariot, a tödi nang ixo isik tewe e Jisas kö limine nangadi.

*Abo maris mabo orong*  
(Matiu 5.3-12)

<sup>17</sup> Jisas ixo su arixe me idi ma ixo tuu ringan kö xönö malabuo. A ololeng ne bak ne ausu re ine arixe ma marakörö raxin saxit idi toxo ot meruso xöbo lagunon Judeia, meringan Jerusalem, ma meringan Tair me Saidon kö gegene rasi.

<sup>18</sup> Idi ewe nang toxo ot tua ölangen ine ma bara irabo ölanglanga idi xalik abo miniset. Idi nang a tano saban ibo uban idi, toxo deek baling.

<sup>19</sup> Ma a marakörö toxo mamaa bara idi xirip tabo sigi ine, möxösa, a lölös ixo önan kalik ine ma ixo ölanglanga idi xirip.

<sup>20</sup> Ma ixo pere abo bak ne ausu re ine ma ixo tengen: "Irabo deek kö mum ewe e mum nang mo maris, möxösa, mum morobo laxa xö kingdom kö God.

<sup>21</sup> Irabo deek kö mum ewe nang mum mo irilöng nixinen, möxösa, mum morobo masii.

Irabo deek kö mum ewe nang mum mo gee nixinen, möxösa, mum morobo nöngnöngön.

<sup>22</sup> Irabo deek kö mum nang bara nangadi te melentexin e mum,

bara te öngus kalik e mum ma te tengen ögarin e mum bara idi te tengen ösu a esene mum bara mum abo tene sasaban, möxösa, mum bo mumuu a Barok kö Tödi.

<sup>23</sup> "Ma xö ina axana bung morobo axanan ma morobo kos ma axanan, möxösa, a xinuxun taxin te mum nangen nuso xö watmaep, möxösa, abo tubuno idi toxobo wewet ögarin abo propet bie.

24 “Inexalik, maris se mum abo orong, möxösa, mum moxoro uruoxe abo lalaa nang i öaxanan e mum.

25 Maris se mum nang mo masii sik nixinen, möxösa, mum morobo irilöng.

Maris se mum nang mo nöngnöngön nixinen, möxösa, mum morobo tawunuk me mum morobo gee.

26 Maris se mum nang bara nangadi xirip te ii öraxin e mum, möxösa, abo tubudi toxobo wewet bie xöbo propet.

*Mamaa lamun a iuo re nöngön*

*(Matiu 5.39-42)*

27 “Ma lamun e tengen te mum ewe nang i ölangen e: Mum morobo mana mamaa lamun abo iuo re mum, ma morobo pet a tatalien deek ke ewe me idi nang te melentexin e mum,

28 mum morobo mana seseng ke God irabo wadöane idi nang te seng e God bara irabo ögarin e mum, me mum morobo seseng kewe midi nang te pet a sasaban te mum.

29 Niang bara re öng i wasa nöngön kö wales se nöngön, tawuxus tabaa ine ma önga lawa xabise bölök. Nang bara re öng i kip lo a man te nöngön, u bele panak ine rua xikip lo a siot te nöngön bölök.

30 Ma nang bara re öng i seng nöngön mere laa, örobo mana tabaa ine. Nang bara re öng i kip lo re lasanene re nöngön, u bele seseng puxus.

31 Mum morobo pet kö nangadi xabise xarnang e mum mo mamaa lamun idi tabo pet te mum.

32 “Nang bara mum mo mamaa lamun ewe midi niang te mamaa lamun e mum, kaim pe öng irabo tengen bara e mum mo pet a dedeek. Inexalik abo tene saban bölök idi tabo mamaa lamun a nangadi nang tobo mamaa lamun idi.

33 Ma nang bara mum mo pet a tatalien deek kö nangadi nang te pet a tatalien deek ke mum, kaim pe öng irabo tengen bere mum mo pet te laa deek. Turunon saxit, abo tene saban idi bölök tobo wewet bie.

34 Nang bara mum mo öbala sik abo lalaa nang a öng i seng e mum, möxösa, e mum mo döxömen bara irabo balu wuxus, io, takarabo tengen bara mum moro pet a dedeek. Turunon saxit, abo tene saban idi bölök tobo öbala sik abo laa xöbo tene saban kabise lamun idi tabo kip puxus eöt ma nang toxo öbala sik.

35 Inexalik mum morobo mana mamaa lamun abo iuo re mum, me mum morobo pet a tatalien deek urungan te idi. Mum morobo tabaa idi, me mum korobo mamaa rö idi ra babalu öbaling. Nang bara mum morobo pet bie, a xinixun te mum irabo taxin me mum abo barok ke God lömö saxit,

möxösa, ine iat i pet a tatalien deek kö nangadi saban niang idi te pere öbulubun a rorop pe ine.

<sup>36</sup> Mum morobo marase a nangadi xarnang e Tata re mum ibo marase idi.

*U bele kure re öng*

*(Matiu 7.1-5)*

<sup>37</sup> “Ganim e mum pa kure abo mangana magingin kö öng, ma ganim e mum pa kure a öng bara i pet a saban, xalik e God irabo kure e mum bölök bira. Mum morobo mana döxömen taun abo tatalien saban nang te pet te mum, me God irabo döxömen taun a magingin saban te mum.

<sup>38</sup> Mum morobo mana erabaa, me God irabo tabaa e mum. Ma arabaa re mum i karabo ot köt ma irabo saxit a mamaa re mum, ma irabo öwöwö e mum. God irabo pet bölök ke mum xarnang mum mo pet kö nangadi xabise.”

<sup>39</sup> Jisas ixo töngösen idi bölök ma ina tinenge öwuo na: “Önga pulo i eöt tua silien a önga pulo xabise? Kaim. Idu xirip tabo subu laxa xö mara.

<sup>40</sup> Re bak ne ausu i kobo lömö sik kö tene ausu re ine, nexalik bara ewe nang i eusu deek irabo xarnang a tene ausu re ine.

<sup>41</sup> “Ruasa nöngön u pere abo perne iaa kölöme xö marana e töm ma u kobo döxömen lo im ina pönö iaa kölöme xö marana e nöngön iat?

<sup>42</sup> Nöngön u bele tengen urungan kö töm bara, ‘Tönö, e rabo kip tewe a perne iaa xö maram.’ Nöngön ökorobo pet bie, möxösa, nöngön iat u kobo pere a pönö iaa xö maram. Nöngön nang u bo röxröxö mon bara nöngön a lak deek, örö luok tewe bang ina pönö iaa xö maram iat, melamu nöngön örobo wawara deek kua xikip tewe abo perne iaa xö marana e töm.

*Abo pasuno iaa*

*(Matiu 7.16, 18, 20)*

<sup>43</sup> “Kaim pe iaa deek ibo oo a pasuno saban, ma önga iaa saban i kebeöt tua o a pasuno iaa deek.

<sup>44</sup> Tabo perexulen abo uno iaa öngöng kö inone idi. Mum kara ösöxö rua kip pöxö xö pirixö gargaras. Me mum kara ösöxö ra dik gamat kalik a iaa gargaras.

<sup>45</sup> A tödi deek ibo isik ot a lalaa deek nang i wöwö sik kö balana ine, ma a tödi saban ibo isik ot a lalaa saban nang i wöwö sik kö balana ine, möxösa, a tödi ibo tengen ösu abo lalaa i wöwö sik kö balana.

*A nine mangana pet gunon*

*(Matiu 7.24-27)*



46 “Ruasa mum mo tengen e me, ‘Orong, Orong,’ me mum kobo pet a lasa nang e tengen?”

47 E rabo osen e mum ma tatalien te ine ewe nang i wanot ura re e ma i ölangen a tinenge re e ma i pet muu xö to rine.

48 I xarnang önga tödi i uru a gunon, ewe nang i kin abo mara ma i pömös ösu abo xösöng kö warawat. Ma nang bara i ari lölös, irabo sumen ina gunon ma lamun i kebeöt ta ömagi ine, möxösa, toxo uru ödeek.

49 Ma lamun ewenene a öng nang i ölangen a tinenge re e ma i kara pet muu, i öt ma tödi nang ixo pömös ögölgölo mon a gunon. Ma nang bara a ari lölös i sumen ina gunon irabo subu ma irabo saban esexere.”

## 7

### *A umri ma nunu raxin (Matiu 8.5-13)*

1 Nang e Jisas ixo kawam kö rengrengen ina niang urungan kö ölöngö xö nangadi, ixo laxa Kaprenaum.

2 Ringan ee a tene tinörön kö önga umri raxin möxöbo duöng inarse. Ma ina tene tinörön ewe nang a tödi raxin te ine ibo döxömen öraxin, ixo meset ma ixo lörorö rua minet.

3 A umri raxin ixo ölangen ulamun e Jisas ma ixo tile a uleng ne sisila möxöbo Judeia urungan te ine rua seseng ine rua nuan ta ölanglanga a tene tinörön te ine.

4 Nang idi toxo ot pösöt e Jisas, idi toxo seng marmarisin ine, “Ma i eöt bara öro top ina tödi na,

5 möxösa, ine ibo mamaa lamun ire abo Judeia ma iri pet a gunon ne sineseng ke mem.”

6 Io, e Jisas ixo wan arixe me idi.

Kaim ine xo palaa xalik a gunon, nang ina umri raxin ixo ugaran abo ais sua rengrengen a tinenge re ine bira, “Orong, u bele öxadik nöngön, möxösa, e kobo tödi deek köba bara örobo wan laxa xö gunon te e.

7 Möxösa lamun ina na, e kobo döxömen bara i töxödös bara arabo wan urungan te nöngön. Inexalik bara öro tengen a tinenge re nöngön, ma ina tene tinörön te e irabo langlanga.

8 E tengen bira, möxösa, e bölök e kisisik kö ene warkurai, ma abo umri bölök te kisisik kö ene e. Me e bo tengen kö öng, ‘Wan’, io, ibo wan. Me e bo tengen kö öng niang, ‘Miang’, ma ibo wanot. Me e bo tengen kö tene tinörön te e, ‘Öro pet a na’, ma ibo pet bie.”

9 Jisas ixo wuwus saban te ine nang ixo ölangen ina na, ma ixo tawuxus urungan kö marakörö nang toxo mumuu

ine ma ixo tengen, "E tengen te mum, e kala parasiwin te nangadi mee Israel iat ma mangana nunu raxin bira."

<sup>10</sup> Io, abo duöng ewe nang toxo tile idi, toxo tawuxus baling urungan kö gunon ma toxo pere wösöt a tene tinörön ixoro deek.

*Jisas ixo öro a barok kö une möxösö*

<sup>11</sup> Melamu mon, Jisas ixo wan urungan kö önga lagunon tobo rengrengen mee Nain, mabo bak ne ausu re ine ma a marakörö raxin toxo wan arixe me ine.

<sup>12</sup> Nang ixo lörörö xö maranangas möxö lagunon, dauleng toxo xikip ösu a minet. Ma ina minet ine a barok kas kö nago re ine, me ine a möxösö. Ma a marakörö raxin möxö ina lagunon toxo arixe me ine.

<sup>13</sup> Nang a Orong ixo pere ina une ixo balamu ine kölöme xö kat te ine ma ixo tengen, "U bele gegee."

<sup>14</sup> Io, ixo wan pösöt ina sesebe nang a tödi minet ixo maru sik könan ma ixo sigi. Me idi nang toxo xikip ine toxo tuu ödödö. Ine ixo tengen, "Tödi maxat, e tengen te nöngön, örö taru kaa!"

<sup>15</sup> Ma tödi minet ixo kis kaa ma ixo urulo rua tinenge, me Jisas ixo isik öbaling ine urungan kö nago re ine.

<sup>16</sup> Idi toxo buut ma toxo dödöm oleleng ma toxo ölet e God. Idi toxo rengrengen bira, "A propet taxin iri ot wösö kaluluonin ire. God iri wanot tua rorop a nangadi re ine."

<sup>17</sup> Ma ina tinenge maras ulamun e Jisas ixo wan esexere kölöme Judeia ma abo xönö lörörö.

*Jisas ixo ölet e Jon*

*(Matiu 11.2-19)*

<sup>18</sup> Abo bak ne ausu re Jon toxo töngösen ine ulamun inabo lalaa na. Ma ixo kuwe lo a ninöng mere idi.

<sup>19</sup> Ma ixo tile idu urungan kö Orong bara idu tabo eose bira, "E nöngön mon ina tödi nang mem me xixiset bara irabo wanot, bere mem marabo kis xiset sik bang ke öng kabise?"

<sup>20</sup> Nang ina nine tödi toxo ot pösöt e Jisas, idu toxo tengen bira, "Jon a tene baptais i tile e maa rua ose nöngön bara, 'Nöngön mon ina öng nang mem me xixiset bara irabo wanot, bere mem marabo kis xiset te öng kabise?' "

<sup>21</sup> Ma xina axana bung mon e Jisas ixo ölanglanga a oleleng nang ma abo miniset ma tano saban, ma ixo ölanglanga idi nang toxo pulo ma toxo wawara baling.

<sup>22</sup> Io, ixo balu abo tene kip tinenge re Jon bira, "Mu moro baling, ma moro ömaras e Jon ma lasanene nang mu muru pere me mu muru ölangen, bara *abo pulo tere wawara*, ma abo pengpeng tere önan, idi nang ma lepra idi tere deek, idi

nang abo talinge baa tere ölöngö, ma abo minet tere taru baling, *ma a tinenge deek iri maras sö idi nang a lak maris.*

<sup>23</sup> A tödi a nunu re ine i kobo tawes xalik e, irabo deek kö ine."

<sup>24</sup> Melamu nang abo tene kip tinenge re Jon toxoro wan, Jisas ixo urulo ra tinenge urungan kö marakörö ulamun e Jon bira, "Mum moxo wan su urso xö xönö tataun ta werwere a lasa? I xarniang a puru niang a xiki ibo wawaxat elin nanin ine?"

<sup>25</sup> Nang bara kawaim, ma lasa mum moxo wan su ra werwere? A tödi niang ixo sige sik a man mamaran? Kawaim. Idi ewe nang tobo sisige a mangana man niang a marana a lak kaa ma tobo kis ne orong, idi tobo xisixis köbo gunon ne orong.

<sup>26</sup> Inexalik, a lasa mum moxo wan su ra werwere? A propet? Turunon saxit, me ine i taxin sik köbo propet.

<sup>27</sup> Ine mon ina öng niang toxoro geet ulamun:

*'E rabo tile re tene kip tinenge re e mesila re nöngön, ewe nang irabo tagure a ngas se nöngön mesila re nöngön.'*

<sup>28</sup> E tengen te mum, kaluluonin idi nang abo nene idi te kip idi, kaim pe öng i taxin köba re Jon. Inexalik ewe a öng i lik köba kölöme xö kingdom pe God, ine i taxin köba re Jon."

<sup>29</sup> Nangadi xirip me idi nang tobo kip takis, nang idi toxo ölangen abo tinenge re Jisas, idi toxo aut bara ina ngas se God i töxödös, möxösa, e Jon ixoro baptais idi.

<sup>30</sup> Inexalik abo Parasi ma abo duöng nanase xelen abo warkurai te Moses toxo mölök kalik a lasanene e God ixo pingit sik bara re idi, möxösa, kaim e Jon kö baptais idi.

<sup>31</sup> Me Jisas ixo tengen öbaling, "Io, a lasanene nang arabo öt ma marakörö mee nixinen? Idi te xarnang abo sa?"

<sup>32</sup> Idi te öt ma bung barok lixilik niang te kisisik kölöme xö xönö möxö misik ma te xukup urungan tö idi iat:

'Mem me maas a koo rö mum,

ma lamun mum kobo ririe.

Mem me sö ma sinö marmaris,

ma lamun mum kobo gegee.'

<sup>33</sup> Möxö, nang e Jon a tene baptais ixo wanot ma ixo ölölö ma kaim ine ra ininim pe wain, me mum moxo tengen bara, 'A tano saban iri tup pe ine.'

<sup>34</sup> A Barok kö Tödi ixo ot ma ixo aan ma ixo ininim, me mum moxo tengen bira, 'Ina tödi na a an sasaxa ma a tene ininim, me ine ibo ais arixe mabo tene kip takis ma "nangadi saban." '

35 Idi tobo rengrengen ina na, ma lamun a nangadi nang te kip a nanase xalik e God, idi te osen bara ina nanase nang, ine a laa runon."

*Önga une saban ixo salap e Jisas ma sada*

36 Io, önga Parasi, a esene e Saimon, ixo seng e Jisas sua nien arixe me ine, io, ixo wan urungan kö gunon möxö Parasi ma ixo kis sede xö öra möxö nien.

37 Ma önga une ewe nang ixo kis kö mangana to saban kö ina lagunon, ixo ösöxö lo bara e Jisas ixo aan kö gunon möxö Parasi, ixo kip ot a botol deek ne sada.

38 Ma nang ixo tuu sik melamu re Jisas kö nine xexene ixo gegee, me ine ixo urulo a öburun a nine xexene e Jisas ma line marana, ma ixo salap ma bebene, ixo muum, ma ixo linge a wel könan.

39 Ma nang ina Parasi ewe nang ixo seng ine ma ixo pere ina na ixo tengen iat tö ine, "Nang bara ina tödi na i xebe önga propet, ine i eöt tua ösöxö ewe i sisigi ine ma a mangana une sa ine, bara ine a tene saban."

40 Jisas ixo balu ine, "Saimon, e ma laa rua röngröngösen nöngön."

Ine ixo balu, "Tene ausu, tengen te e."

41 "Nine tödi toxo seng tuluwok kalik a önga tödi. Öng ixo kip lo a pitnö ne mar ma öng kabise a pitnö ne sangaun.

42 Kaim pe öng mere idu ixo eöt tua balu wuxus urungan te ine, ine ixo döxömen taun idu bara rua saksak öbaling a tuluwok. Io, na ewe mere idu irabo maaaa xöba lamun ine?"

43 Saimon ixo balu, "E döxömen bara ewe nang ine ma oleleng ne tuluwok nang ixo döxömen taun."

Jisas ixo tengen, "Dödöxömen te nöngön i töxödös."

44 Io, ixo talingen urungan kö une ma ixo tengen te Saimon, "U pere ina une na? E laxa ura xö gunon te nöngön, me nöngön u kobo tabaa e ma ari rua gisgis a xexeke, nexalik ine i öburun abo xexeke ma line marana ma i salap abo xexeke ma bebene öxöno.

45 Nöngön u kobo muum e, nexalik ina une na, xö axana bung nang e laxa, ine i kobola mamas kö mumuum abo xexeke.

46 Nöngön u kobo bulus a wel kö öxöke, inexalik ine iri linge xöbo xexeke ma sada.

47 Io niang, e tengen te nöngön, inabo magingin saban te ine, iri kawam, möxösa, i maaaa xöba lamun e. Inexalik ewe nang ma ulik ne magingin saban me God i döxömen taun ina tödi, irabo maaaa ulik mon lamun ine."

48 Io, Jisas ixo tengen kö une, "Abo magingin saban te nöngön iri kawam."

<sup>49</sup> Ma inabo osee toxo urulo rua tinenge kaluluonin idi, “Ewe ina tödi na nang ibo döxömen taun abo magingin saban?”

<sup>50</sup> Jisas ixo tengen kö une, “A nunu re nöngön iri öro nöngön. Öro wan ma malum.”

## 8

### *A tene susulo* (*Matiu 13.2-23; Mak 4.1-20*)

<sup>1</sup> Melamu xö ina na, Jisas ixo wan nana xöbo lagunon, ma ixo etöngösen ma tinenge deek möxö kingdom kö God. Ma a sangaun ma ninöng toxo arixe me ine,

<sup>2</sup> ma dauleng ne balixilik bölök ewe nang e Jisas ixoro kip tewe abo tano saban kalik idi ma ixoro ölanglanga idi xalik abo miniset. Ma öng kaluluonin idi, e Maria (ewe nang tobo tengen me Makdala), ewe nang a pitnö ma ninöng ne tano saban toxo wan su xalik ine,

<sup>3</sup> me Joana, a une re Kusa ewe nang ixobo sila sik kö warkurai xöbo lalaa xö gunon te Erot, me Susana ma oleleng kabise bölök. Inabo balixilik na idi toxo top e Jisas ma abo bak ne ausu re ine mabo lalaa iat te idi.

<sup>4</sup> Ma nang a marakörö raxin toxo orot etok ma toxo önan ot pösöt e Jisas meringan köbo lagunon öngöng, ine ixo tengen ina tinenge öwuo na:

<sup>5</sup> “A önga tödi ixo wan tua retewe abo irine wit kö komo. Ma nang ine ixo retewe nanin abo irine wit, a dauleng toxo subu muu a ngas. Ma toxo wawas kaa lömö xönan, ma bung pun meriso lömö toxo en idi.

<sup>6</sup> Ma dauleng ne irine wit toxo subu xö öxöno warawat, ma nang ixo das kaa, ixo mölös ma ixo met, möxösa, kaim a ari.

<sup>7</sup> Dauleng ne irine wit toxo subu kaluluonin abo gargaras. Ma abo gargaras toxo das kaa arixe ma irine wit ma toxo pari abo wit nang i dadas kaa.

<sup>8</sup> Lamun a uleng ne irine wit toxo subu xö pu deek. Idi toxo das kaa ma toxo o, öngöng ixo eöt ma önga mar ne irine wit.”

Ma nang ine ixo tengen bira, ine ixo tengen lömö bira, “Ewe nang ine ma talingine, ine irabo ölangen.”

<sup>9</sup> Abo bak ne ausu re ine toxo ose ine bara a unine a lasa ina tinenge öwuo na.

<sup>10</sup> Ine ixo tengen, “God ixoro tabaa e mum ma nanase möxöbo pidik möxö kingdom kö God, nexalik kö idi nang kabise e bo rengrengen abo tinenge öwuo bere,

*‘idi tabo wawara, lamun idi tekebeöt ta werwere xulen te laa,*

*me idi tabo ölöngö, ma lamun idi tekebeöt ta ölangen kulen.'*

<sup>11</sup> "Ine na a unine tinenge öwuo: ina irine iaa ine a tinenge xö God.

<sup>12</sup> A irine wit nang toxo subu muu a ngas, idi te eöt me idi nang te ölangen, me e Satan ibo ot ma ibo xikip tewe abo tinenge möxö kat te idi, bara idi takarabo nunu ma takarabo kip a ineöro.

<sup>13</sup> A irine wit nang idi toxo subu lömö xö warawat, idi te eöt me idi nang te axanan tua xikip lo a tinenge nang bara idi te ölangen ine, ma lamun kaim idi ma buon. Idi te nunu aulik mon, ma lamun kö axana bung möxö ölelewen idi tobo subu rewe.

<sup>14</sup> A irine wit i subu kaluluon köbo gargaras i eöt me idi nang te ölangen, nexalik nang idi te önan kö nuan te idi, idi te döxömen köbanin abo lalaa möxö öxöno lagunon ma ulamun a kinis ne orong ma axanan mera xö öxöno lagunon. Ma inabo mangana tatalien na tobo wewet pi idi me idi tokobo maruxo.

<sup>15</sup> Lamun a irine wit kö pu deek i eöt me idi ma bala deek nang toxo ölangen a tinenge, toxo töndik, ma tobo tuu lölös ot nang tobo oo.

*A laam kö ene bile*

<sup>16</sup> "Kaim pe öng ibo usumot a laam ma ibo umungen kölöme xö bile bara ibo bulbulus kö ene öra. Kaim. Inexalik ibo uxis lömö xö xönö iat möxönan, io nang, ewe idi te önan laxa tabo eöt tua werwere a maras.

<sup>17</sup> Io, abo lalaa i malaa mun sik irabo ot kö malmalan, ma abo lalaa te tawi sik irabo ot kö malmalan ma tabo ösöxö.

<sup>18</sup> Io niang, mum moro dödöm mamaran kö ölöngö re mum. Ewenene midi nang idi ma lalaa, God irabo tabaa idi ma oleleng. Me ewenene me idi nang kawaim idi mere lalaa, God irabo kip tewe bölok kirip abo lalaa nang idi te döxömen bara te uruoxe."

*Jisas ixo tengen osen abo unaun tunon te ine*

*(Matiu 12.46-50; Mak 3.31-35)*

<sup>19</sup> Io, a nago mabo tönö e Jisas toxo wanot tua werwere ine, nexalik kaim idi xo eöt tua inot lörorö re ine, möxösa, xö marakörö.

<sup>20</sup> Io, önga tödi ixo tengen te ine, "A nago re nöngön mabo töm te tuu sik ni xö araman, te mamaa rua werwere nöngön."

<sup>21</sup> Jisas ixo balu, "A nago re e mabo töke idi ewe nang te ölangen a tinenge xö God ma te muu eörin."

*Jisas ixo ömalile a dalun*

*(Matiu 8.23-27; Mak 4.36-41)*

22 Önga bung Jisas ixo tengen köbo bak ne ausu re ine bara, "Ire ta wan köröp uruo xö lawa xabise möxö tu." Io, idi toxo kaa laxa xö önga mön ma toxo wan.

23 Ma nang idi toxo ululo, Jisas ixo paluso. Ma a xiki raxin ixo wan su lömö xö tu ma ari ixo wan laxa xö mön me idi toxo lörörö rua iuiuo.

24 Abo bak ne ausu toxo wan, ma toxo ölaran ine ma toxo tengen, "Tödi raxin! Tödi raxin! Ire te eka köngö!"

Io, ine ixo taru ma ixo köö a xiki ma dalun. Ma xiki ixo kawam ma ina tu raxin ixo malile esexere.

25 Me ine ixo ose abo bak ne ausu re ine, "A nunu re mum ule?"

Idi toxo wuwus ma binuut, toxo ose öngöng mere idi, "A mangana tödi sa ia? Ine ibo isik a tinenge lölös kö xiki ma dalun, ma te tame ine."

### *Önga tödi ma tano saban*

*(Matiu 8.28-34; Mak 5.1-20)*

26 Io, idi toxo uluso uruso xö xönö pu mee Gerasen, ibo malaa sik kö lawana tu Galili.

27 Ma nang e Jisas ixo ösö, ixo esuo ma önga tödi meringan kö lagunon, a tano saban ixo kis se ine. Bang im iat ina tödi kaim kö sisige re man bara ixobo xisixis kere gunon, nexalik ixobo xisixis kölöme xöbo lieng kö nangadi minet.

28 Ma nang ixo pere e Jisas, ixo kalasii ma ixo subu su xö nine xexene e Jisas, ma ixo kup nöngösö lömö, "Jisas, a Barok kö God lömö saxit, u maaaa lamun a lasanene xalik e? E seng nöngön u bele öxadik köbanin e!"

29 Ixo tengen bira, möxösa, e Jisas ixoro isik a tinenge lölös kö ina tano saban tua nuan su xalik ina tödi. Tobo kut sik a nine limine ma nine xexene ma tobo bulus mara sik ke ine, ma lamun oleleng ne axana bung a tano saban ibo rörödik ina tödi ma ixoro köröp abo sen te ine ma tano saban ibo sasat nanin ine xö boxönö nang kaim a nangadi.

30 Jisas ixo ose ine, "Ewe a esem?"

Ixo balu ine bira, "Arip ne Arip,", möxösa, oleleng ne tano saban toxoro wan laxa re ine.

31 Me idi toxo rengreng marmaris se ine bara ganim ine ra tinenge lölös sik ke idi rua nilaxa xö mara lamin kaim pe xakawam möxönan.

32 Oleleng ne bung bo toxo aan nana xö gegene maii. Abo tano saban toxo seng e Jisas sua ömaraxen idi ra nilaxa rup pe idi, ma ixo ömaraxen idi.

33 Bara nang abo tano saban toxo wan su xalik ina tödi, toxo laxa rup kö bung bo, ma ina bung bo toxo ewasak su xö gegene maii urungan kölöme xö ari ma toxo köngö met.

34 Ma nang a nangadi möxö balaure a bung bo toxo pere ina lasa nang ixo ot, toxo ulo lo rua atöngösen min kö lagunon taxin ma xö boxönö lörörö.

35 Ma nangadi toxo wan su rua werwere a lasa ixo ot. Ma nang idi toxo wanot pösöt e Jisas, idi toxo pere wösöt ina tödi ewe nang abo tano saban toxoro wan su xalik ine, ixo kisisik kö nine xexene e Jisas. Ixo laulawa sik ma ixo kisisik ma dinödöm pe ine ixoro maras. Ma a nangadi toxo buut.

36 Io, idi nang toxo pere ina laa, idi toxo töngösen a nangadi ma a ngas sa nang e Jisas ixo ölanglanga ina tödi nang abo tano saban toxoro kis se ine.

37 Io, a nangadi xirip möxö xönö Gerasen toxo seng e Jisas sua nuan pes xalik idi, möxösa, a binuut ixo kawönö idi. Io, ixo kakaa xö mön ma ixo wan.

38 Ina tödi nang abo tano saban toxo wan su xalik ine, ixo seng e Jisas bara irabo ömaraxen lo ine rua nuan arixe me ine, nexalik e Jisas ixo tile rewe ine, ma ixo tengen,

39 “Örö wan baling kö lagunon te nöngön ma örö tengen a lasanene nang e God iri pet te nöngön.” Io, ina tödi ixo wan pes ma ixo etöngösen esexere xö lagunon mabo lasanene nang e Jisas ixo pet te ine.

*A balik minet ma a une miniset  
(Matiu 9.18-26; Mak 5.22-43)*

40 Ma nang e Jisas ixo baling, a marakörö toxo öga ine, möxö idi xirip toxo xixiset me ine.

41 Io, önga tödi a esene e Jairus, a tödi sila xö gunon ne sineseng ke idi abo Judeia, ixo ot ma ixo subun kexe xö nine xexene Jisas. Ma ixo tenge marmaris se Jisas sa nuan uruso xö gunon te ine,

42 möxösa, önga balik kalik mon te ine, a balik ixoro lörörö a sangaun ma ninöng, ma ixo eka minet.

Ma nang e Jisas ixo önan, a marakörö toxo emorop pönö ine.

43 Ma önga une nangen niang, nang a dee ixobo önan kalik ine, ma ixo öt xarnang a sangaun ma ninöng ne awat, nexalik kaim pe öng ixo öt ta ölanglanga ine.

44 Ina une ixo wan melamu re ine ma ixo sigi a ngusuno man te Jisas, ma saxit mon a ililo ne dee ixo kawam.

45 Jisas ixo ose, “Ewe i sigi e?”

Ma nang idi xirip toxo öösin, Pita ixo tengen, “Tödi raxin, a nangadi te orot etok ma te sisii rewe nöngön.”

46 Ma lamun e Jisas ixo tengen, “A öng i sigi e. E ösöxö bara lölös iri wan su xalik e.”

47 Io, a une ixo wanot arixe ma dedede ma ixo subun kexe xö nine xexene Jisas, möxösa, ixo pere bara i kebeöt



ta minun. Ma xö wawara xö nangadi ine ixo tengen ruasa ixo sigi e Jisas ma nang e Jisas ixo ölanglanga uwasaxit ine.

<sup>48</sup> Io, Jisas ixo tengen tö ine, "Balik, a nunu re nöngön iri öro nöngön. Öro wan ma malum."

<sup>49</sup> Nang e Jisas nangen bang ixo wöwörö xö une, önga tödi ixo ot meringan kö gunon te Jairus, a tödi raxin möxö gunon ne sineseng. Ma ixo tengen te Jairus, "A balik ke nöngön iri met. Nöngön u bele isik a tiip kö tene ausu."

<sup>50</sup> Jisas ixo ölangen ina na ma ixo tengen te Jairus bira, "U bele buut. Öro mana nunu mon, me ine irabo langlanga xalik ina miniset."

<sup>51</sup> Nang ine ixo ot kö gunon te Jairus, Jisas kaim kö ömaraxen tebo duöng bölök kua nilaxa arixe me ine, nexalik mon e Pita, Jon me Jems, ma tata ma nago xö balik.

<sup>52</sup> Ma nang a nangadi xirip toxo xukup ma ginee rö ine, Jisas ixo tengen, "Mum bele gegee. Ine i kobo met. Inexalik i paliso mon."

<sup>53</sup> Idi toxo isis belek ine, möxösa, idi toxo ösöxö sik bara ine ixoro met.

<sup>54</sup> Ma lamun e Jisas ixo tön a limine ma ixo tengen, "Balik lik ke e, taru kaa!"

<sup>55</sup> A tanono ixo ot baling, ma nang iat mon ine ixo taru kaa. Io, Jisas ixo tengen te idu ra tabaa ine mere laa ra enen.

<sup>56</sup> Tamana me nene toxo wuwus, nexalik ine ixo tengen te idu bara ganim a rengreng kere öng ma lasa ixo ot.

## 9

### *Jisas ixo tile abo bak ne ausu (Matiu 10.9-15; Mak 6.8-11)*

<sup>1</sup> Jisas ixo kuwe etok lo a sangaun ma ninöng ne bak ne ausu rine ma ixo tabaa idi ma lölös sua tile ösu abo tano saban ma rua ölanglanga abo mangana miniset.

<sup>2</sup> Ma ixo tile rewe idi rua palas tinenge ma kingdom kö God ma rua ölanglanga a nangadi miniset.

<sup>3</sup> Io, ine ixo tengen te idi, "Mum korobo kip pe laa xö nuan te mum. Mum korobo kip pe buxo, a rat, a nien, re tuluwok, ma re man bölök.

<sup>4</sup> A mangana gunon sa mum mo laxa xönan, morobo xisixis iat tingan ot nang mum morobo wan lo baling kalik a lagunon niang.

<sup>5</sup> Nang bara nangadi tekobo öga e mum, io, nang bara mum mo eka nuan kalik a lagunon te idi, mum morobo se rewe a kabus kalik abo xexe mum rua uxileng kö idi lamun a magingin saban te idi nang toxo pet te mum."

<sup>6</sup> Io, idi toxo wan nana xöbo lagunon ma toxo etöngösen ma tininge deek ma toxo ölanglanga a nangadi xö boxönö xirip.

*Erot ixo ngangao ulamun e Jisas*

*(Matiu 14.1-2; Mak 6.14-16)*

<sup>7</sup> Io, e Erot a tödi raxin mee Galili ixo ölangen ulamun abo lalaa nang ixo orot. Me ine ixo ngangao, möxösa, dauleng toxo rengrengen bara e Jon a tene baptais ixo taru baling kalik a minet.

<sup>8</sup> Dauleng toxo rengrengen bara e Elaija ixoro ot wösö, ma nexalik dauleng kabise bara ine öng möxöbo propet mee mesila saxit ixoro to baling.

<sup>9</sup> Ma lamun e Erot ixo tengen, "E xo tee xöröp a inöno e Jon. Ewe belek iang e ölangen inabo lalaa ulamun?" Me ine ixobo könönöin tua werwere ine.

*Jisas ixo tabaa a pitnö ne arip*

*(Matiu 14.13-21; Mak 6.32-44; Jon 6.5-13)*

<sup>10</sup> Nang abo aposol toxo tawuxus baling, idi toxo töngösen e Jisas mabo lalaa nang idi toxoro pet. Io, Jisas ixo lamus lo idi arixe mine ma toxo wan idi xalik iat urungan kö önga lagunon tobo rengrengen me Betsaida.

<sup>11</sup> Ma nang a marakörö toxo ösöxö lo ulamun ina nuan ma toxo muu ine. Ine ixo öga lo idi ma ixo wöwörö urungan te idi ulamun a kingdom kö God ma ixo ölanglanga idi nang toxo sasaxan lamun a öng irabo ölanglanga idi.

<sup>12</sup> Ma xö aien a sangaun ma ninöng toxo ot pösöt ine ma toxo tengen te ine, "Örö tile rewe a marakörö na. Me idi ta wan urungan köbo lagunon örörö rua winara lamun a nien ma lamun a xönö möxö minaru, möxösa, na ire ia xö xönö tataun."

<sup>13</sup> Jisas ixo tengen, "Mum iat, mum moro tabaa idi merebo lalaa rua enen."

Idi toxo tengen, "Mem angen ma pitnö ne xönö beret ma nini en. Nöngön u maaa bara mem marabo wan ta kun nien lamun ina marakörö na?"

<sup>14</sup> (Ixo lörörö a pitnö ne arip ne tödi toxo kis singan ee.)

Ma lamun ixo tengen köbo bak ne ausu re ine, "Morobo uxis idi eöt kö pitnö ne sangaun ne nangadi xö öngöng a muxu."

<sup>15</sup> Mabo bak ne ausu toxo pet bie, me idi xirip toxo kis kö pu.

<sup>16</sup> Io, Jisas ixo tön lo ina pitnö ne beret ma nini en ma ixo wawara kaa xö balana kubu, ma ixo tengen deek ke God ma ixo pidik. Ma ixo tabaa abo bak ne ausu min tua tabaa a nangadi.

17 Me idi xirip toxo an ma toxo masii. Io, abo bak ne ausu toxo tuxo a sangaun ma ninöng ne kölöt mabo subana nang idi toxo en paling.

*Pita ixo tengen osen bere Jisas a Mesaia  
(Matiu 16.13-16; 21—28; Mak 8.27—9.1)*

18 Önga bung nang e Jisas ixo seseseng suxume, mabo bak ne ausu re ine toxo arixe me ine, ixo ose idi, “Abo marakörö tobo rengrenge e me we?”

19 Idi toxo balu, “Dauleng te tengen bere nöngön e Jon a tene baptais, dauleng te tengen bere nöngön e Elaija, ma lamun dauleng te tengen iat bara öng möxöbo propet mesila saxit i to baling.”

20 Me ine ixo ose, “Me mum, mum bo rengrenge e me we?”

Io, Pita ixo balu ine ma ixo tengen, “A Mesaia re God.”

21 Jisas ixo panak ölölös idi bere idi tebele tengen osen ina na xere öng.

22 Ma ixo tengen, “A Barok kö Tödi irabo mana kip lo a tiip oleleng. Abo sisila, mabo pris tataxin mabo tene ausu möxöbo warkurai te Moses idi tabo öbulubun ine. Ma nangadi tabo sexomet ine, ma xö narun ne bung melamu, irabo taru baling.”

23 Io, ixo tengen te idi xirip: “Nang bara re tödi i mamaa ra mumuu e, ine irabo mana döxömen taun ine iat ma xöbo bungbung kirip irabo sölok a sölöxöröp pe ine ma irabo muu e.

24 Möxö ewe nang i mamaa rua töndik sik iat a to re ine, irabo ömalim tewe, ma lamun ewe niang i ömalim tewe a to re ine rua gene e, irabo töndik sik.

25 Nang bara tödi i kip lo xirip abo lalaa möxö öxöno lagunon, ma i ömalim tewe bara i pet örüp a to runon te ine, io, a lasa i deek möxö inabo lalaa irabo top ine? Kawaim.

26 Nang bara öng i mengmenge re e mabo tinenge re e, io, a Barok kö Tödi irabo mengein ine nang ine irabo wanot kö mariris se ine ma xö mariris kö Tata mabo angelo madakdak.

27 Turunon saxit, dauleng nang te tuu sik na takarabo met ot nang idi tabo pere a kingdom kö God.”

*A lewene aine e Jisas ixo xuxulas  
(Matiu 17.1-8; Mak 9.2-8)*

28 Ixo lörorö a pitnö ma narun ne bung melamu nang e Jisas ixo tengen ina na, ixo lamus lo e Pita, Jon me Jems arixe me ine me idiet toxo wan kaa xö maii raxin tua sineseng.

29 Ma nang ine ixo seseseng a winara möxö wawara re ine ixo xuxulas, mabo man te ine ixo sisiek.

30 Nine tödi, Moses me Elaija,

<sup>31</sup> toxo ot wösö xö dedeek ne mariris, me idu toxo wöwörö me Jisas. Idu toxo wöwörö ulamun a nuan te ine xalik ina öxöno lagunon nang ine ixoro lörörö ra wewet tingan Jerusalem eöt ma mamaa xö God.

<sup>32</sup> Pita mabo ais se ine toxo paluso, nexalik nang idiet toxo laran, idiet toxo pere a mariris se ine ma nine tödi toxo tuu arixe sik me ine.

<sup>33</sup> Ma nang a nine tödi toxo önan lie e Jisas, Pita ixo tengen te ine, "Tödi raxin, i deek bara met mara xisixis sa. Met mara uru re narun ne walpali, öng ke nöngön, öng ke Moses ma öng ke Elaija." (Kaim ine xo ösöxö a lasa niang ine ixo rengrengen.)

<sup>34</sup> Ma nang ine ixo wöwörö xudun, a kubu ixo wösö ot ma ixo tawi idi, me idiet toxo buut nang idiet toxo laxa xö kubu.

<sup>35</sup> A inöno a öng ixo ot meringan kö kubu, ixo tengen, "Ine ano Barok ke e. E re pere kos lo ine. Muot morobo ölangen ine!"

<sup>36</sup> Ma nang a inöno öng ixoro wöwörö, idiet toxo pere wösöt e Jisas kalik mon. Mabo bak ne ausu kaim kö rengrengen kere öng kö ina axana bung ulamun a lasanene idiet toxoro pere.

*A barok ine ma tano saban  
(Matiu 17.14-18, 22-23; Mak 9.14-27)*

<sup>37</sup> Xö bung melamu, nang idiet toxo wan su meruso xö mai, a marakörö toxo esuo me ine.

<sup>38</sup> Önga tödi kölöme xö marakörö ixo kup, "Tene ausu, e seng nöngön tua werwere a barok ke e möxö ine a önga barok xexese.

<sup>39</sup> A tano ibo rörödik ine me ine ibo xukup. Ibo retewe ösu ine xö pu ma ibo dedede, io, a bise ibo orot kö ngalna. I kebeöt ta nuan kalik ine, ma i ögarin ine.

<sup>40</sup> E xo seng abo bak ne ausu re nöngön tua irewe ine, ma lamun kaim idi rua wewet eörin."

<sup>41</sup> Jisas ixo balu, "Mum a marakörö mee nixinen nang mum kara nunu me mum bo tawuxus kalik abo tatalien töxödös, e kebeöt ta kinis arixe me mum kö axana bung ömat. Ma nausen ne bung e rabo kip abo tiip pe mum? Kip ot a barok ke nöngön ura."

<sup>42</sup> Ma nang a barok ixo önan ot, a tano saban ixo tewe ösu ine xö pu ma ixo dedede. Inexalik e Jisas ixo tenge köö ina tano saban ma ixo ölanglanga ina barok ma ixo isik öbaling ine urungan kö tata re ine.

<sup>43</sup> Me idi xirip toxo wuwus kö lölös taxin kö God.

Ma nang idi xirip toxo wuwus ma dinödöm oleleng lamun a lasa xirip nang e Jisas ixo pet, ixo tengen köbo bak ne ausu re ine,

44 “Ölöngö deek kö lasa e eka rengrengen te mum: Tabo bulus a Barok kö Tödi xö limine a nangadi.”

45 Ma lamun idi kaim a xikip a lasa ine ixo rengrengen. Ixo malaa mun sik kalik idi, io, idi tekexebeöt ta ösöxö ina laa, me idi toxo bubuut tua ose ine ulamunon.

*Ewe runon i taxin?*

*(Matiu 18.1-5; Mak 9.33-40)*

46 A agot ixo taru kaluluonin abo bak ne ausu nang bara ewe mere idi irabo taxin sik.

47 Jisas ixo ösöxö a dödöxömen te idi, ixo lamus lo a bak lik ma ixo uru ine xö lawana ine.

48 Ma ixo tengen te idi, “Ewe nang irabo öga ina barok lik na xö esene e, ine i öga e, ma lamun ewe nang i öga e, ine i öga a öng nang ixo tile e. Möxö ewe nang i lik köba kaluluon te mum kirip, ine i taxin saxit.”

49 Jon ixo tengen, “Tödi raxin, mem moxo pere a tödi ixo xikip tewe abo tano saban kö esem, me mem moxo eka wanwanak ine, möxösa, ine köbo öng mere ire.”

50 Jisas ixo tengen, “Ganim e mum kö wanwanak ine, möxö ewe nang i kobo öbulubun e mum, ine re mum.”

*Abo Samaria toxo kasen e Jisas*

51 Nang a axana bung ixo orot bara God irabo kip öxaa ine uruso xö watmaep, Jisas ixo dödöxömen ölölös sua nuan u Jerusalem.

52 Me ine ixo tile ösila abo tene kip tinenge, ewe nang toxo wan laxa xö önga lagunon mee Samaria rua tagure abo lalaa rö ine.

53 Lamun a nangadi ringan ee kaim kö öga ine, möxösa, ine ixo önan iat u Jerusalem.

54 Nang e Jems me Jon, a nine bak ne ausu, idu toxo pere ina na, idu toxo ease, “Orong, u maaa re maa rua xukuwe ösu a ia sösöt meruso xö watmaep pua ögarin esexerein idi?”

55 Lamun e Jisas ixo köö idu.

56 Io, idi toxo wan urungan kö önga lagunon kabise.

*A tatalien ne mumuu e Jisas*

*(Matiu 8.19-22)*

57 Nang idi toxo önan kö ngas, önga tödi ixo tengen te ine, “E rabo muu nöngön köbo nuan kirip pe nöngön.”

58 Jisas ixo balu, “A bung puluwun axe idi ma mara, ma bung pun meriso lömö idi ma wöwösö, nexalik a Barok kö Tödi kaim ine mere xönö rua ömarin a öxöno.”

<sup>59</sup> Ine ixo tengen kö önga tödi xabise, “Muu e.”

Lamun a tödi ixo balu, “Orong, örö öbala bang e ma ara wan ara pömös e tata re e.”

<sup>60</sup> Jisas ixo tengen te ine, “Ganim abo minet tabo pömös abo minet te idi, nexalik nöngön örö wan ma örö etöngösen ma kingdom kö God.”

<sup>61</sup> Inexalik önga tödi xabise ixo tengen, “Orong, e rabo muu nöngön, nexalik örö öbala öbaling bang e ma ara pere a baninen te e, ma melamu e rabo wan kalik idi.”

<sup>62</sup> Jisas ixo balu, “Kaim pe öng ewe nang ibo bulbulus a limine ra xikin a pu ma ibo wawara baling bara i eöt tua kinis kö kingdom kö God.”

## 10

*Jisas ixo tile a pitnö ma ninöng ne sangaun ma ninöng ne tödi*

*(Matiu 11.21-27; 13.16-17)*

<sup>1</sup> Ma melamu xö nang a Orong ixo pere kos a pitnö ma ninöng ne sangaun ma ninöng ne nangadi xabise ma ixo tile idi ninöng ninöng sila re ine xöbo lagunon kirip nang ixo eka nuan uwe.

<sup>2</sup> Ma ixo tengen te idi, “A nien iri maruxo xirip ma iri oleleng, nexalik a nausen mon idi abo tene tinörön. Io, mum morobo seng a Tamana ina nien maruxo bara irabo tile rebo tene tinörön urungan kö komo re ine.

<sup>3</sup> Mum moro wan. E tile rewe e mum xarnang a bung barok kö sipsip urungan kaluluon köbo wuluwun axe.

<sup>4</sup> Ganim e mum pua xikip pe tuluwok bara re rat. Me mum bele kip pe sandel tua xuxulas. Me mum korobo öga lo re öng kö ngas.

<sup>5</sup> “Ma nang bara mu morobo laxa xere gunon, sinila ne laa, mu morobo tengen, ‘A malum irabo kis kö ina gunon na.’

<sup>6</sup> Ma nang bara re tödi möxö malum nangen nang ee, a malum pe mu irabo kis lömö re ine. Nang bara kaim, mu morobo kip puxus a tinenge re mu bara a malum i karabo kis kö ina tödi na.

<sup>7</sup> Me mu morobo kis kö ina gunon, ma a lasanene nang te tabaa e mu min, mu morobo en ma morobo inim, möxösa, i töxödös bara a tene tinörön irabo kip a xinixun te ine. Me mu bele wan nana urungan köbo gunon kabise.

<sup>8</sup> “Ma nang bara mu morobo laxa xö önga lagunon ma te öga e mu, mu morobo en a lasanene nang te tagur sik ke mu.

<sup>9</sup> Mu morobo ölanglanga abo miniset nang te kis singan, ma morobo töngösen idi bara, 'A kingdom kö God iri lörörö re mum.'

<sup>10</sup> Ma nang bara mu mo laxa xö önga lagunon ma tokobo öga e mu, io, mu morobo wan urungan köbo ngas möxö ina lagunon na ma morobo tengen,

<sup>11</sup> 'A kabus iat möxö ina lagunon te mum nang ibo parap kö xexe maa, maa me us tewe xalik e maa rua öwösö ulamun a tatalien saban mum moxo pet te maa. Inexalik morobo maras kö ina laa na, bara a kingdom kö God iri lörörö.'

<sup>12</sup> E tengen te mum, God irabo ömokorot köba e Sodom kö axana bung möxö warkurai. Inexalik a ömokorot möxö ina lagunon nang kaim kö öga lo e mu, irabo taxin köba xö ömokorot te ine.

<sup>13</sup> "A maris se mum mee Korasin! A maris se mum mee Betsaida! Möxösa niang bara abo lalaa lölös ne auwuwas nang e xo pet tö mum, texere pet bölök ki Tair ma Saidon, idi texere sige abo xönö man biling ma texere urup idi ma xako rua osen bere idi tere dödöm puxus.

<sup>14</sup> God irabo pet a warkurai taxin kö nangadi mee Tair me Saidon kö axana bung möxö warkurai. Ma lamun irabo pet a warkurai nang i taxin köba re mum abo Betsaida mabo Korasin.

<sup>15</sup> Me mum mee Kaprenaum, mum bele döxömen bara tabo ii öxaa e mum urso lömö. Kaim, mum morobo wan su arixe uri xö pu xö xönö möxö minet.

<sup>16</sup> "Ewenene nang i ölangen a tinenge re mum, ine bölök i ölangen a tinenge re e. Me ewenene nang i wan talu e mum, ine bölök i wan talu e. Me ewenene nang i wan talu e, ine bölök i wan talu a öng niang ixo tile e ura."

<sup>17</sup> Ma pitnö ma ninöng ne sangaun ma ninöng toxo wanot baling ma axanan ma toxo tengen, "Orong, mem me rengrengen a esem, mabo tano saban iat te tame e mem."

<sup>18</sup> Ine ixo balu, "E xo pere e Satan ixo subu xarnang a siek meriso xö watmaep.

<sup>19</sup> E re tabaa e mum ma lölös sua wawas abo si mabo kalamasang ma ra wawas ösu a lölös kirip kö iuo re ire, ma kaim pe laa irabo ögarin e mum.

<sup>20</sup> Inexalik, ganim e mum pa axanan bara abo tano saban te tame e mum. Ma lamun mum morobo mana axanan bara abo ese mum e God iri geet tuso xö watmaep."

<sup>21</sup> Xö ina axana bung Jisas ixo wöwö ma axanan meringan kö Töxödös ne Tanono ma ixo tengen, "E ölet nöngön, Mama, a Orong möxö balana kubu ma öxöno lagunon, möxösa, nöngön u xo umungen abo lalaa na xalik a nangadi nanase ma u xo osen öwösö re idi nang kaim idi ma nanase.

Mee, Mama. U xo pet bie, möxösa, i mumuu a maaaa re nöngön.

<sup>22</sup> “A Tamake ixo tabaa e ma abo lalaa xirip. Kaim pe öng i ösöxö bara ewe ina Barok, ma lamun a Tamana xalik mon, ma kaim pe öng i ösöxö ewe ina Tamana, ma lamun a Barok kalik mon arixe me idi ewe nang a Barok ixo pere kos lo rua öwösö e Tamana urungan te idi.”

<sup>23</sup> Io, ine ixo tawuxus urungan köbo bak ne ausu re ine ma ixo tengen suxume re idi, “Irabo deek kö idi nang te pere a lasa mum mo werwere.

<sup>24</sup> Möxö e tengen te mum bara a oleleng ne propet ma abo king toxo maaaa rua werwere a lasa mum mo werwere, ma lamun idi kaim kö werwere. Me idi toxo maaaa rua ölangen a lasa mum mo ölangen, ma lamun kaim idi xo ölangen.”

*Ewe a unsaxam tunon?*

*(Matiu 22.34-40; Mak 12.28-31)*

<sup>25</sup> Ma xö önga bung melamu, önga tödi ixobo ösöxö ödeek sik abo warkurai te Moses, ixo taru kaa rua könönöin e Jisas. Ma ixo tengen, “Tene ausu, a lasanene nang arabo pet tua xikip a to ulorexe?”

<sup>26</sup> Jisas ixo balu, “A lasanene toxo geet köbo warkurai te Moses? Ma nang u kos, u kip bara bule?”

<sup>27</sup> Ine ixo balu, “‘Örobo maaaa ulamun a Orong, a God te nöngön, kö kat kirip pe nöngön, ma xö tanono e nöngön, ma xö lölös se nöngön, ma xö dinödöm pe nöngön,’ ma, ‘Örobo maaaa lamun a öng kabise xarnang u maaaa lamun nöngön iat.’ ”

<sup>28</sup> Jisas ixo balu, “Nöngön u balu ödeek. Öro pet bie me nöngön örobo to.”

<sup>29</sup> Ma lamun ine ixo maaaa rua ösöxö ödeek bara ine i töxödös, io, ixo ose e Jisas, “Ewenene a töke?”

<sup>30</sup> Jisas ixo balu ine bira, “A önga tödi ixo önan su meringan Jerusalem urungan Jeriko nang abo duöng pililo toxo se ine ma toxo didii rewe abo man kalik ine me idi toxo paxat ine ma toxo wan kalik ine bara irabo met.

<sup>31</sup> A pris ixo muu ösu ina ngas, ma nang ixo pere ina tödi, ixo wan lelebes ma ixo saxit ine xö lawa xabise.

<sup>32</sup> Io, önga tene tinörön möxö marapun te Lewi, nang ixo wanot kö ina xönö ma ixo pere ine, ixo wan lelebes bölök ma ixo saxit ine.

<sup>33</sup> Ma lamun önga Samaria nang ine ixo önan, ixo ot kö ina xönö nang a tödi ee, ma nang ixo pere ine, a balana ixo muu ine.

<sup>34</sup> Ma ixo wan urungan te ine ma ixo linge a wel ma wain köbo ruxuruk kine ma ixo kubus pi. Io, ixo bulus öxaa ina



tödi xö dongki re ine ma ixo kip lo ine urungan kö gunon ne osee ma ixo balaure ine.

<sup>35</sup> Ma xö bung kabise ixo kip lo a nine tuluwok ma ixo isik kö tamana ina gunon osee ma ixo tengen, 'Örö balaure ine, ma nang bara arabo baling, e rabo balu wuxus a tuluwok ke nöngön nang u xo top ine min.'

<sup>36</sup> "Ewenene mere idiet narun u döxömen bere ine a tönö ina tödi ewe nang abo duöng pililo toxo se ine?"

<sup>37</sup> Ma tödi nanase xöbo warkurai te Moses ixo balu, "A öng nang ixo marse ine."

Me Jisas ixo tengen te ine, "Örö wan ma örö pet bie."

*Maria ixo pere kos lo a dedeek*

<sup>38</sup> Ma nang e Jisas mabo bak ne ausu re ine toxo önan kö inuan te idi, ine ixo ot kö önga lagunon. Ma önga une a esene iang e Mata ixo öga lo ine urungan kö gunon te ine.

<sup>39</sup> Me ine ma önga tönö ine, a esene iang e Maria, ewe nang ixo kis lörörö xö xexene a Orong ma ixo ölangen a lasa nang e Jisas ixo rengrengen.

<sup>40</sup> Ma lamun e Mata ixo madung sik mabo tinörön nang ixo wewet. Me ine ixo ot pösöt e Jisas ma ixo ose ine, "Orong, nöngön u kobo döxömen bara a tönö e i wan kalik e mabo tinörön. Örö tengen te ine bara ira top e."

<sup>41</sup> Orong ixo balu, "Mata, Mata, u dödöm köba lamun abo lalaa oleleng ma i öriip a balam.

<sup>42</sup> Ma lamun önga laa xalik mon u sasaxan ulamun. E Maria iri pere tus lo a lasa i deek, ma takarabo kip tewe xalik ine."

## 11

*Jisas ixo eusu ma sineseng*

*(Matiu 6.9-13; 7.7-11)*

<sup>1</sup> Önga bung e Jisas ixo seseseng kö önga xönö ma nang i ixo kawam, öng möxöbo bak ne ausu re ine ixo tengen te ine, "Orong, örö usu e mem pua sineseng, xarnang e Jon ixo usu abo bak ne ausu re ine."

<sup>2</sup> Ine ixo tengen te idi, "Nang bara mum mo seseseng, mum morobo tengen bira:

" 'Mama,

mem me maaaa bere mem marabo bulus kabisein a esem pua osen bere nöngön u madakdak saxit,

me mem me maaaa bara a kingdom pe nöngön irabo wanot.

<sup>3</sup> Tabaa e mem ma nien kö öngöng a bung nang i eöt kö ina bung.

<sup>4</sup> Ma örö döxömen taun tewe abo magingin saban te mem,

möxö mem bölök marabo döxömen taun tewe abo magin-  
gin saban nang idi te pet tö mem.

Me mem me maaaa bölök bara örobo balaure wi e mem  
kalik abo ölelewen.' ”

<sup>5</sup> Io, ixo tengen te idi, “Öng ke mum ma ais, ma i wan  
urungan te ine xö luono dömön ma i tengen, ‘Eis, e maaaa  
bara örö tabaa e ma narun ne beret,

<sup>6</sup> möxösa, a ais se e i wan kö ngas ömat ma i ot pösöt e  
ma kaim e mere laa ra tabaa ine min.’

<sup>7</sup> “Io, a öng nang kölöme irabo balu, ‘U bele öxadik e.  
A marame iri tamabaxut ma bung barok arixe me e, mem  
mere paluso. E kebeöt tua tinaru ra tabaa nöngön mere  
laa.’

<sup>8</sup> Io, e tengen te mum, turunon ine a ais se ine, nexalik  
ine i karabo taru rua tabaa ine mere laa. Ma lamun irabo  
taru kaa ma irabo tabaa ine eöt ma sasaxan te ine, möxösa,  
ine i karabo mamanaa xö sineseng.

<sup>9</sup> “Io, e tengen te mum, nöngön örobo seseng, ma örobo  
kip lo a laa. Niang bara u wawara siwin, örobo pere wösöt  
lo. Ma niang bara u wiwidin kö marame, God irabo sawang  
lo nöngön.

<sup>10</sup> Möxö ewe i seseseng, irabo kip lo a lasa ine i ose lamun.  
Ewe i wawara siwin, irabo pere wösöt lo a laa niang ine i  
wawara siwin. Me ewe niang i wiwidin, God irabo sawang  
lo ine.

<sup>11</sup> “Ewe re mum abo tata i eöt ta tabaa belek a barok kine  
ma si, nang bara i seng a inan?

<sup>12</sup> Ma nang bara i seng a karalo, irabo tabaa belek ine ma  
kalamasang?

<sup>13</sup> Nang bere mum abo tene sasaban, mum mo ösöxö ra  
tabaa abo barok ke mum ma abo lalaa deek, io, i osen bara  
a Tata re mum nuso xö watmaep i ösöxö ra isik a Töxödös  
ne Tanono rö idi ewe niang te seng ine ulamunon.”

### *Jisas me Belsebul*

*(Matiu 12.22-29, 43-45; Mak 3.23-27)*

<sup>14</sup> Jisas ixo kip tewe a tano saban nang ibo xisixis kö önga  
tödi, a ngalaböt ine. Ma nang a tano saban ixo wan kalik  
ine, ina tödi ewe nang i kara tenge, ixo tenge wök, ma  
marakörö toxo wuwus saban.

<sup>15</sup> Ma lamun a dauleng ke idi toxo tengen bira, “Ine e  
Belsebul, a sisila möxöbo tano saban, ewe nang ibo isik a  
lölös se ine rua xikip tewe abo tano saban.”

<sup>16</sup> Dauleng kabise toxo könönöin ine bira. Toxo ose bara  
irabo pet te önga mangana auxileng lölös sua osen bara abo  
tinörön te ine meriso re God.

<sup>17</sup> Jisas ixo ösöxö abo dinödöm pe idi ma ixo tengen te idi,  
“Nang bara re kantri i kobo tuu arixe me idi iat, a dauleng

mere idi tabo pet ögarin kirip ina kantri. Ma nang bara a barama tekobo tuu arixe, idi tabo kis elixilik.

<sup>18</sup> Nang bara a nangadi re Satan te tawes lo, idi tekebeöt tua tinuu lölös. E tengen bira, möxösa, mum mo tengen bere e bo xikip tewe abo tano saban kö lölös se Belsebul.

<sup>19</sup> Mum iat mo köbo döxömen bara a nangadi re mum tobo xikip tewe abo tano saban kö lölös se Belsebul. Möxö ina na, mum mo köbo eöt tua tengen bere e bo xikip tewe abo tano saban kö lölös se Belsebul. Io, a nangadi iat te mum, tabo osen bere abo tinenge re mum i kobo turunon.

<sup>20</sup> Kaim. Ma lamun e bo xikip tewe abo tano saban ma lölös se God. Ma ina na i öturunon bara a kingdom kö God ixoro wan pösöt e mum.

<sup>21</sup> "Nang bara re önga tödi lölös i tön sik a use ma iie ma i tuu wi sik a gunon te ine, io, abo lalaa re ine irabo malaa deek sik.

<sup>22</sup> Ma nang bara önga tödi ma lölös taxin i erese ma ina tödi ma i se ine, io, irabo kip lo abo iie ma use xina tödi nang ixo bulus nunu sik könan. Ma lamun ina tödi lölös irabo palang inabo lalaa nang ixo pulo.

<sup>23</sup> "Me ewe nang i kobo ais me e, i mölök kalik e. Ma ewe nang i kobo rörön arixe me e ra lalamus etok a nangadi, ine ibo waswasak a nangadi.

<sup>24</sup> "Nang bara re tano saban i wan su xalik a tödi, ibo önan eli xirip kö boxönö masa, bara rua mamas, nexalik bara i kara parasiwin te xönö. Io, ibo tengen bira, 'E rabo tawuxus baling urungan kö ngasiene e niang e xo wan lie.'

<sup>25</sup> Ma nang bara i wanot uxe, irabo pere bara toxoro soso ma toxoro tagur bulus sik.

<sup>26</sup> Ma irabo wan lo ma irabo lamus öbaling a pitnö ma ninöng ne tano saban kabise, me idi te saban köba re ine. Me idi tabo wan laxa ma tabo kis im ee. Ma to xö ina tödi irabo saban köba xö nang sila."

<sup>27</sup> Ma nang e Jisas ixo rengrengen inabo lalaa, a une kalu-luonin a marakörö ixo kup wösö bira, "God ire wadöane a une nang ixo kip nöngön ma ixo urus nöngön."

<sup>28</sup> Ine ixo balu, "God ire wadöane ewe me idi nang te ölangen a tinenge re God ma te muu eörin."

*Jisas ixo köö a marakörö  
(Matiu 12.39-42)*

<sup>29</sup> Ma nang a xinixos möxö marakörö ixo rataxin, Jisas ixo tengen, "A marakörö me nixinen a lak saban. Idi te maaaa bere e rabo pet te auxilieng lölös, ma lamun e rabo isik a auxilieng ke Jona xalik mon urungan te idi.

<sup>30</sup> Ma xarnang e Jona ixo auxilieng urungan köbo nangadi mee Niniwe, io, irabo xarnang bölök a Barok kö Tödi ma irabo bie xö marakörö mee nixinen.

<sup>31</sup> Ma xö ina bung möxö warkurai, a kwin mee Siba, irabo puk e mum, möxösa, ixo wanot mero xö ngusuno öxöno lagunon tua ölangen a nanase re Solomon. Ma na, a öng nang i taxin sik ke idu me Solomon i nangen na.

<sup>32</sup> Ma xö bung möxö warkurai, a nangadi mee Niniwe idi tabo ömaso e mum, möxösa, idi toxo dödöm puxus nang e Jona ixo palas tinenge urungan te idi. Ma na, a öng nang i taxin sik ke idu me Jona i nangen na.

*A maras möxö kinis se nöngön  
(Matiu 6.22-23)*

<sup>33</sup> “Kaim pe öng ibo usumot a laam ma ibo bulbulus kö xönö nang a lak mun, ma bara xö ene bile. Kaim. Inexalik ibo uxis lömö xö xönö iat möxönan, io nang, ewe idi te önan laxa tabo eöt tua werwere a maras.

<sup>34</sup> A nini kalait maram, idu te xarnang a bibio re nöngön. Nang bara a nine kalait maram a lak deek, io, a aim kirip irabo maras bölök. Ma nang bere idu te saban, a aim kirip irabo wöwö ma ködö.

<sup>35</sup> Io, öro tumarang, xalik ina bibio nang kölöme re nöngön ibo ködö.

<sup>36</sup> Möxö ina na, nang bara a aim kirip i wöwö ma maras, ma kaim pe xönö möxönan i ködö, io, irabo maras kirip esexere xarnang a bibio möxö laam nang ibo maras urungan te nöngön.”

*Jisas ixo öbulubun abo sisila ne lotu*

<sup>37</sup> Nang e Jisas ixo wöwörö xirip, önga Parasi ixo seng ine rua nien arixe me ine. Io, ixo laxa ma ixo kis kö öra möxö nien.

<sup>38</sup> Inexalik ina Parasi ixo wuwus, möxösa, ine ixo pere bere e Jisas kaim bang kö gilime sila re ine ra nien.

<sup>39</sup> Io, a Orong ixo tengen te ine, “Io, mum abo Parasi mum moro gis ömaxat a araman möxö kap ma dis. Inexalik kö könönö e mum i wöwö ma tatalien saban ma tatalien ne mamaa lamun a oleleng ne lalaa.

<sup>40</sup> Mum a duöng baulang! Bule, e God ixo pet a araman möxöbo lalaa ma kaim ine xo wewet a könönö bölök?

<sup>41</sup> Io, mum morobo mana tabaa abo maris ma arabaa meringan kölöme re mum, ma abo lalaa xirip irabo maxat te mum, ma tekarabo eöt tua öbiling e mum kö wawara re God.

<sup>42</sup> “Maris se mum, abo Parasi, irabo saban te mum, möxösa, mum mo tabaa e God ma arabaa möxöbo lobo ma paluo mabo lalaa meringan kö komo bira. Mum bo erimine

xö sangaun ne xönö me mum bo isik a öng urungan te God. Ma lamun mum kobo muu a tatalien töxödös kö nangadi me mum kobo mamaa lamun e God. Io, irabo töxödös niang bara mum moxoro isik abo lalaa urso re God, me mum kobo lön bölök kua mumuu a tatalien deek.

43 “Maris se mum, abo Parasi, irabo saban te mum, möxösa, mum mo mamaa bere mum morobo kis kö kinis deek kölöme xö gunon ne siniseng, me mum bo mamaa bara tabo kuwange e mum kö boxönö möxö mimiisik.

44 “Maris se mum, irabo saban te mum, möxösa, mum mo xarnang a maöt i maxus nang a nangadi tobo önan lömö xönan ma takara ösöxö.”

45 A önga tene nanase xöbo warkurai te Moses ixo balu ine, “Tene ausu, nang bere nöngön u pet ina mangana tinenge na xöbo Parasi, nöngön u tengen ögarin e mem bölök.”

46 Jisas ixo balu, “Mum abo tene nanase möxöbo warkurai te Moses, maris se mum, irabo saban te mum, möxösa, mum mo öxadik a nangadi mabo tiip nang idi tekebeöt ta xikip, me mum iat mo korobo ii öxaa re önga sisixine lime mum pua rorop idi.

47 “A maris se mum, irabo saban te mum, möxösa, abo untubu mum toxo sexomet abo propet, me mum bo ömar ödeek abo midi re idi.

48 Io, mum mo tengen osen bere mum mo sixaut kö lasa nang abo untubu mum toxo pet. Idi toxo sexomet abo propet, me mum mobo ömar ödeek abo midi re idi.

49 Lamun ina na, xö nanase re God ine ixo tengen, ‘Arabo tile abo propet mabo aposol urungan te idi. Ma dauleng ke idi tabo eler, ma dauleng tabo sexomet.’

50 Möxö ina na, a marakörö mee nixinen tabo kip a tiip möxö dee ridi abo propet kirip nang ixo sen kö urulo möxö öxöno lagunon,

51 meringan kö dee re Abel urungan kö dee re Sekaraia ewe nang toxo sexomet kaluluonin a alta ma xö gunon ne lotu raxin. Turunon, e tengen te mum, a marakörö mee nixinen idi tabo kip a kinadik taxin ulamun idi xirip.

52 “Maris se mum, mum abo tene nanase möxöbo warkurai te Moses, irabo saban te mum, möxösa, mum moxö tuu wi a nangadi rua kip lo a nanase. Mum iat mo köbo lalaxa, me mum iat moxö pet pi idi nang toxo önan laxa.”

53 Ma nang e Jisas ixo wan lie ina lagunon, abo Parasi mabo tene ausu möxöbo warkurai te Moses toxo urulo ra tewe tinenge saban urungan te ine ma toxo ose ine ma oleleng ne ineose.

54 Ma toxo xixiset bara irabo tengen te tinenge ma tabo uxun ine.

## 12

### *Abo tinenge irabo wanot maras (Matiu 10.26-33)*

<sup>1</sup> Ma xö ina axana bung a marakörö möxö oleleng ne arip toxo ot etok, io, idi toxo wawas nanin idi iat. E Jisas ixo urulo bang kua tinenge xöbo bak ne ausu re ine ma ixo tengen, "Tumarang e mum lamun a is köbo Parasi, möxösa, idi tobo eönunu bara idi a lak töxödös saxit.

<sup>2</sup> A lasa nang te kait pi, irabo tamasawang. Ma a lasa nang i mun sik, irabo ot kö malmalan.

<sup>3</sup> A lasa mum moxo tengen kö ködö, tabo ölangen kö maras, ma a lasa mum moxo ngunungun min kö talinge mum kölöme xö gunon, tabo kup wösö min meriso xö öxöno gunon.

### *Ire tabo mana burin e God*

<sup>4</sup> "Abo ais se e, e tengen te mum, ganim e mum pa buburin ewe idi nang tabo sexomet a tödi mon ma melamu idi tekebeöt ta pet öbaling ke laa.

<sup>5</sup> Ma lamun e rabo osen e mum me ewe nang mum morobo buburin. Mum morobo buburin ine ewe nang melamu nang irabo sexomet a tödi, ine ma lölös sua tewe ösu e mum kö ia sösöt. Turunon, e tengen te mum, mum morobo buburin ine.

<sup>6</sup> Ma a ulik ne tuluwok mon i eöt ta xukun te pitnö ne sigie. Inexalik bara kaim pe öng mere idi God irabo döxömen taun.

<sup>7</sup> Turunon saxit, ma ixoro kos kirip bölök abo bebene öxöno e mum. Ganim e mum pa binuut, möxösa, a to re mum i taxin sik köbo sigie.

### *A tinenge re nöngön irabo osen a nunu re nöngön*

<sup>8</sup> "E tengen te mum, ewenene niang i tenge maras kö wawara xö nangadi lamun e, a Barok kö Tödi irabo pet bölök bie rö ine xö wawara xöbo angelo re God.

<sup>9</sup> Lamun ewe niang i öös tewe e xö wawara xö nangadi, e rabo öös tewe bölök ine xö wawara xöbo angelo re God.

<sup>10</sup> Me idi xirip nang te tengen ögarin a Barok kö Tödi, God irabo döxömen taun a magingin te idi, ma lamun ewe a öng nang i tengen ögarin a Töxödös ne Tanono, God i karabo döxömen taun a magingin tine.

<sup>11</sup> "Nang bere mum mo tuu mesila xöbo gunon ne sineseng, bara mesila xöbo tene pet warkurai arixe me idi nang ma ese raxin, ganim bere mum mo dödöm ne binuut bara morobo tuu wi e mum bule, ma bara a lasanene mum morobo tengen kö ina axana bung niang,

<sup>12</sup> möxösa, a Töxödös ne Tanono irabo osen e mum ma a lasanene nang mum morobo tengen.”

*Ganim ire rua ginumut*

<sup>13</sup> Önga tödi kölöme xö marakörö ixo tengen te ine, “Tene ausu, tengen kö töke bara irabo palang erimine e maa mabo lalaa re tata nang ixo met lie.”

<sup>14</sup> Me Jisas ixo balu bira, “Ewe ixo pere kos e bara arabo kure e muu? Me ewe i bulus e bara arabo palang erimine inabo lalaa niang ke muu?”

<sup>15</sup> Io, ixo tengen te idi, “Tumarang! Mum morobo balaure ödeek e mum, kalik abo mangana tatalien möxö ginumut. A to xö tödi i kobo eöt ta dedeek köbo mangana lalaa oleleng ke ine.”

<sup>16</sup> Ma ixo tengen ina tinenge öwuo na: “A komo xö önga asuono orong ixo kip ot a oleleng ne nien.

<sup>17</sup> Ine ixo döxömen iat te ine bara, ‘E rabo pet bule im? Kaim e mere xönö rua bulbulus abo nien te e.’

<sup>18</sup> “Io, ixo tengen, ‘Na arabo pet bira. Arabo öbeng ösu abo gunon mataxen te e ma arabo pet abo gunon mataxen rataxin, ma arabo bulus abo nien mabo lalaa re e ringan ee.

<sup>19</sup> Me e rabo tengen iat te e, “E ma oleleng ne lalaa deek e bulus öxaa lamun a oleleng ne awat. A to re e irabo malus, arabo an, arabo inim ma arabo axanan.” ’

<sup>20</sup> “Inexalik e God ixo tengen te ine, ‘Nöngön a baulang! Nixinen iat kö dömön örobo met. Io, ewe irabo kip lo abo lalaa nang u rö tagur sik kö nöngön?’

<sup>21</sup> “Ina na irabo eöt me ewe nang ibo bulbulus ögun abo oleleng ne lalaa rö ine iat, nexalik kaim pe oleleng ne tatalien deek ke ine xö winara xö God.”

*Ganim ire ra dinödöm oleleng*

*(Matiu 6.25-33)*

<sup>22</sup> Io, Jisas ixo tengen köbo bak ne ausu re ine: “Möxö ina na, e tengen te mum, ganim a dinödöm oleleng lamun a to re mum bara a lasa morobo en ma a lasa morobo inim, ma a lasa morobo sige xö aimum.

<sup>23</sup> A to re mum i taxin köba xö nien, ma a aimum i taxin köba xö man.

<sup>24</sup> Mum moro döxömen lo a bung xöxö. Idi tekara susulo. Ma tekara kin öxaa nien. Idi kaim a gunon mataxen, ma lamun e God ibo tabaa idi ma nien. Ma xö maaaa re God, mum mo taxin sik kö bung pun!

<sup>25</sup> Me ewenene mere mum i dödöm oleleng ulamun abo tiip pe ine, i eöt tua öxase a to re ine ulik baling? Kaim turunon.

<sup>26</sup> Ma nang bara mum kebeöt tua wewet ina laa lixilik na, ruasa mum bo dödöm oleleng ulamun abo lalaa xabise?

27 “Mum moro dödöm deek köbo pasuno iaa te das bule. Idi tekara ösöxö ra tinörön me idi tekara ösöxö ra söxsöxö man. Inexalik e tengen te mum bere e Solomon kaim ine xo sisige rebo man deek xarnang a öng mere idi.

28 Io, God i balaure a pirixö niang i to nixinen, ma maxalik tabo tewe öxaa xö ia sösöt. Nang bere God i pet bie xö pirixö, turunon saxit ine irabo tawi nöngön bölök arixe ma man te nöngön. Maris, a nunu re mum i wuruwut köba.

29 Me mum bele dödöm kö to re mum kö lasanene mum morobo en bara morobo inim. Mum bele tapunuk ulamun.

30 Ewe me idi nang möxö öxöno lagunon nang tekobo nunu re God, idi tobo wawara siwin inabo mangana lalaa na, ma Tata re mum i ösöxö bara mum mo sasaxan.

31 Ma lamun mum morobo mana parasiwin abo lalaa i eöt ma kingdom pe ine. Me ine irabo tabaa e mum minabo lalaa xirip bölök.

32 “Turunon bara a nausen mon e mum, ma lamun ganim e mum pa binuut, möxö a Tata re mum i axanan tua tabaa e mum ma kingdom.

33 Misik mabo mangana lalaa re mum ma moro tabaa a duöng maris. Mum morobo tagure e mum iat kö mangana tuluwok nang i karabo saban, a tabarikik kuso xö watmaep nang i karabo kawam, nang kaim pe tene pililo irabo pulo, ma kaim pe iwis irabo ögarin.

34 Möxö a bubulus se mum i kis singan ee, ma a to xirip pe mum i kis singan bölök.

*Ire ta tagur sik ulamun a inot baling kö Orong  
(Matiu 24.43-51; 25.1-13; Mak 13.33-37)*

35 “Mum morobo laulawa dik kua tagure e mum pa tinörön, mabo laam pe mum irabo mana bibio sik,

36 xarnang a duöng te xixiset ma orong ke idi nang irabo baling möxö luxa ne alolo, io, nang bara ine irabo wanot ma irabo wiwidin, saxit mon idi te eöt tua sasawang a marama rö ine.

37 Irabo deek kö idi abo tultul ewe nang a orong ke idi i pere wösöt idi ma te wawara sik nang ine irabo wanot. Turunon saxit, ine irabo ölaulawa ine iat tua tinörön, ma ina orong iat irabo tengen tö idi rua kinis kö öra möxö nien, me ine iat irabo ot ma irabo tabaa idi ma nien.

38 Irabo deek kö idi abo tultul ewe nang a orong ke idi i pere wösöt idi te tagur sik nang bara i ot kö luono dömön bara xö puxu bubung.

39 Ma lamun e mum moro dökömen ödeek a na. Nang bara tamana gunon ixere ösöxö a axana bung sa nang bara a tödi pinilo irabo wanot, ine i karabo eöt ta ömaraxen a gunon te ine bara tabo pörök ölaxa.



40 Mum morobo mana tumarang, möxösa, a Barok kö Tödi irabo wanot kö axana bung nang mum kobo döxömen bara irabo wanot könan.”

41 Pita ixo ose, “Orong, nöngön u rengrengen ina tinenge öwuo na ura re mem bara rua nangadi xirip?”

42 Ma Orong ixo balu, “Me ewe iat im ina öng nang a tene nanase ma a tultul turunon ine? Ine nang a orong i bulus ine bara irabo balaure abo tene tinörön kabise ma irabo tabaa ödeek idi ma nien.

43 Irabo deek kö ina tultul ewe nang a orong ke ine i wanot ma i pere bara i wewet bira.

44 Turunon saxit, ine irabo bulus ine rua balbalaure xirip abo lalaa re ine.

45 Ma lamun nang bara ina tultul i tengen öbaling ke ine iat, ‘A orong ke e i karabo ot baling pasaxit,’ io, irabo urulo ra sese abo tene tinörön, a körö ma balixilik, ma irabo aan ma ininim ma irabo inim saban arixe.

46 Io, a orong ke ine irabo wanot kö bung nang ine i kobo döxömen sik bara irabo ot könan ma xö axana bung nang i kobo ösöxö bara irabo wanot. Ina orong ke ine irabo tee ölixilik ine ma irabo tewe ine urungan kö xönö möxö kinadik arixe mabo tabuno ölöngö.

47 “Ina tultul ewe nang i ösöxö sik a mamaa xö orong ke ine, ma i kobo tagur sik bara i kobo pet a lasa nang a orong ke ine i mamaa lamun, tabo paxat olengin ine.

48 Ma lamun a öng ewe nang i kobo ösöxö a lasa nang a orong ke ine i mamaa ulamun, ma ibo wewet abo lalaa nang i seseng lo a ömokorot, tabo paxat ine a ulik mon. Me idi nang toxo tabaa idi ma oleleng ne lalaa, idi tabo balu öbaling ma oleleng ne lalaa. Ma nang bara te bulus a oleleng ne lalaa xö limine a öng, idi te seng ine bara irabo balu ma oleleng ne lalaa.

*Jisas i palang a nangadi  
(Matiu 10.34-36)*

49 “E xo wanot tua öxat a öxöno lagunon, me e mamaa xöba bara ina ia sösöt na e xoro usumot.

50 Ma lamun e rabo kip lo bang a tiip taxin. Ma balake i tiip köba ot kö nang ina tiip irabo kawam.

51 Mum mo döxömen bara e xo wanot tua uxis a malum kö öxöno lagunon? Kaim. Inexalik e tengen te mum, e xo wanot tua uxis elixilixin a marakörö.

52 Ma urulo nixinen ma uruo melamu, nang bara a barama a pitnö idiet, tabo uxis elixilixin idi iat, io, a narun tabo tuu elixilik a ninöng, ma ninöng tabo tuu elixilik a narun.

53 Idi tabo tuu elixilik, a tata irabo tuu talu a barok ma a barok irabo tuu talu a tata, a nago irabo tuu talu a balik ma

a balik kalik a nene, ma bara a une tamasik irabo tuu talu a une tamasik ke ine."

*Nangadi tekobo ösöxö a unine abo lasa nang i orot*

<sup>54</sup> Ine ixo tengen kö marakörö, "Nang bara mum bo pere a kubu i önan kaa ruso xö labur, saxit mon mum bo tengen, 'Irabo bara,' ma ibo bie.

<sup>55</sup> Ma nang bara a xiki ibo wawaxat mero xö marana en, mum bo tengen, 'Irabo lelewi,' ma ibo bie.

<sup>56</sup> Mum abo tene röxröxö! Mum bo ösöxö rua werwere xulen a winara möxö öxöno lagunon ma watmaep. Ma bara bule nang mum kobo eöt tua ösöxö xulen inabo mangana lalaa nang i orot nixinen?

<sup>57</sup> "Ruasa mum kobo perexulen öbaling ke mum iat a lasa nang i töxödös?

<sup>58</sup> Nang bara u bo önan arixe ma öng i lamus nöngön kö tene pet warkurai, örobo lölös bara örobo ötöxödös arixe me ine, nang bang mu mo önan arixe xö ngas, xalik ine ibo sat lo nöngön ma irabo isik nöngön kö tene pet warkurai, ma a tene pet warkurai ibo isik nöngön kö duöng möxö balaure a nangadi nang tobo kubus pi idi kölöme xö gunon ne aömokorot, ma ina tödi irabo bulus nöngön könan.

<sup>59</sup> E tengen te nöngön, ökorobo wan su ot nang örobo isik abo xinuxun kirip pe nöngön."

## 13

*Ewe nang i kobo dödöm puxus irabo iuo*

<sup>1</sup> Io, ringan ee xö ina axana bung nang a dauleng toxo töngösen e Jisas ulamun abo tee me Galili nang e Pailat ixo sexomet idi nang idi toxo isik a arabaa söngsöngöt te idi.

<sup>2</sup> Jisas ixo balu, "Mum mo döxömen bara inabo tee Galili nang idi toxo iuo biringan, idi abo tene sasaban tunon köbo tee Galili xabise xirip?

<sup>3</sup> E tengen te mum, kaim! Inexalik nang bara mum kobo dödöm puxus, mum kirip bölök morobo iuo.

<sup>4</sup> Ma ina sangaun ma pitnö ma narun nang toxo met nang a gunon ömat mee Siloam ixo subu kaa re idi, mum mo döxömen bara idi abo tene sasaban tunon te idi xirip nang toxo xisixis kölöme Jerusalem?

<sup>5</sup> E tengen te mum, kaim! Inexalik nang bara mum kobo dödöm puxus, mum kirip bölök morobo iuo."

<sup>6</sup> Io, ine ixo tengen ina tinenge öwuo na: "Önga tödi ixo sulo a uno löwö xö komo wain te ine, me ine ixo wan tua winara siwin tebo pasuno xönan. Inexalik kaim ine xo werwere lo re öng.

<sup>7</sup> Io, ixo tengen kö tödi nang ibo balaure sik ina komo wain, 'Iri eöt ma narun ne awat im nang e bo önan tua winara lamun tebo pasuno xö ina uno löwö na, me e kobola pere wösöt te öng. Öro tee ösu! Ruasanene i ösek a pu deek?'

<sup>8</sup> Ina tödi ixo balu, " 'Asuono orong, ganim bang ine xö önga awat baling, me e rabo kin elulurwein me e rabo bulus sebo lalaa deek ka wewet ödeek a pu.

<sup>9</sup> Ma nang bara irabo o a pasuno xö awat melamu, i deek. Nang bara kaim, io, tee ösu.' "

*Jisas ixo ölanglanga önga une ma tano saban kö bung Sabat*

<sup>10</sup> Xö önga Sabat, Jisas ixo eusu xö öng möxöbo gunon ne sineseng.

<sup>11</sup> Ma a une nangen nang ee ewe nang a tano saban ixo ögarin ine xö sangaun ma pitnö ma narun ne awat. Ma a siine sabono ixo gege ma i kara eöt tua tinuu töxödös.

<sup>12</sup> Nang e Jisas ixo pere ine, ixo kuwe ot ine ma ixo tengen, "Uru langlanga xalik a miniset te nöngön."

<sup>13</sup> Io, ixo bulus öxaa a limine lömö xö ina une, ma saxit mon ixo tuu töxödös ma ixo ölet e God.

<sup>14</sup> Io, a sisila möxö gunon ne sineseng ixo laie re Jisas, möxösa, ixo ölanglanga ina une xö Sabat, ma ixo tengen kö nangadi, "A pitnö ma öng ne bung möxö tinörön angen, io, mum morobo wanot kö inabo bung kua seseng önga tödi rua ölanglanga e mum, ma kaim bara xö Sabat."

<sup>15</sup> Ma Orong ixo balu ine, "Mum a nangadi möxö röxröxö! Xö bung Sabat öngöng mere mum ibo walwalas a bulmakau bara dongki re ine möxö löng ma ibo lalamus ösu rua ratabaa ine ma ari.

<sup>16</sup> Io, ina une na, a untubuno e Abaram ewe nang e Satan ixo kubus pi sik ine xö sangaun ma pitnö ma narun ne awat. I deek bölök bara xö bung Sabat tabo palas tewe ina laa nang ixo kubus pi sik ine."

<sup>17</sup> Ma nang ine ixo tengen ina na, abo iuo re ine toxo menge, nexalik a nangadi toxo axanan ulamun abo lalaa deek nang ine ixo wewet.

*A irine iaa ma is*

*(Matiu 13.31-33; Mak 4.30-32)*

<sup>18</sup> Io, Jisas ixo eose, "A kingdom kö God i xarnang a lasanene? E rabo öt ine ma lasa?"

<sup>19</sup> I xarnang a irine iaa nang a lak lik köba nang a tödi i kip lo ma i sulo xö komo re ine. Ixo das kaa ma ixo öt ma iaa, mabo pun meriso lömö tobo wewet abo wöwösö re idi xöbo axan möxönan."

<sup>20</sup> Ine ixo eose baling, "E rabo öt a kingdom kö God ma lasanene?"

<sup>21</sup> I xarnang a is nang önga une ixo kip lo ma ixo bulus arixin ma plawa oleleng ot nang irabo ebobot."

*A marame lik*

<sup>22</sup> Io, Jisas ixo wan kaluluonin abo lagunon, ma ixo usu a nangadi nang ixo önan u Jerusalem.

<sup>23</sup> Io, a önga tödi ixo ose ine, "Orong, i bule nang a usen ne nangadi xalik mon nang God irabo öro?"

Ine ixo tengen te idi,

<sup>24</sup> "Mum morobo mana lölös sua nilaxa xö marame lik, möxösa, e tengen te mum, a oleleng tabo maaaa rua nilaxa ma takarabo eöt.

<sup>25</sup> Ma nang bara tamana gunon irabo taru ma irabo baxut a marame, mum morobo tuu sik kö araman, morobo wiwidin ma morobo eose marmaris bira, 'Orong, öro sawang a marame rö mem.'

"Inexalik ine irabo balu, 'E kobo ösöxö e mum, me e kobo ösöxö bara mum mole.'

<sup>26</sup> "Io, mum morobo tengen, 'Mem moxo an ma moxo inim arixen me nöngön, me nöngön u xo usu e mem köbo ngas urungan köbo gunon te mem.'

<sup>27</sup> "Inexalik ine irabo balu, 'E kobo ösöxö e mum, me e kobo ösöxö bara mum mole. Moro wan kalik e, mum kirip abo tene pet laa saban!'

<sup>28</sup> "Ma nang mum morobo pere Abaram, Aisak me Jekop mabo propet kirip kölöme xö kingdom kö God, ringan ee mum morobo gegee ma morobo engiren abo ngisine mum, nexalik e mum iat tabo tewe ösu e mum.

<sup>29</sup> A nangadi tabo wanot meringan kö nit ne marana xiki, ma tabo kis kö pet nien kö kingdom kö God.

<sup>30</sup> Ma i turunon saxit bara idi ewe nang te sila, tabo muu, ma nang te muu, tabo sila."

*Jisas ixo marse abo Jerusalem*

*(Matiu 23.37-39)*

<sup>31</sup> Xö ina axana bung iat a dauleng ne Parasi toxo ot pösöt e Jisas ma toxo tengen te ine, "Öro wan kalik ina xönö na ma öro wan kere xönö xabise. Erot i maaaa rua sesexomet nöngön."

<sup>32</sup> Ine ixo balu, "Moro wan ma moro tengen kö ina iuo re e bara, 'Arabo tile ösu abo tano saban ma arabu ölanglanga a nangadi nixinen ma maxalik, ma xö sese önarun ne bung e rabo öxawam abo tinörön te e.'

<sup>33</sup> Ma lamun e rabo mana önan iat nixinen ma maxalik, ma xö bung melamu, möxösa, turunon saxit, kaim pe propet irabo met kö xönö xabise ma kölöme iat Jerusalem!

34 “Mum mee Jerusalem, maris se mum! Mum bo sesexomet abo propet me mum bo reteng idi nang e God ibo tile idi ura re mum. A oleleng ne axana bung e bo maaaa bara e rabo töndik lo e mum xarnang a nene xixök ibo böböng pi a bung barok kine ma nine wawono. Ma lamun mum koxobo maaaa bira.

35 Pere bang! Ina lagunon te mum irabo saban ma irabo malaa tataun, ma morobo pet bule? E tengen te mum, mum kebeöt ta pere öbaling e ot kö axana bung niang mum morobo tengen bara, ‘God irabo pet ödeek ina tödi niang ewe irabo wanot ta wewet eörin a maaaa xö Orong.’ ”

## 14

### *Ganim bara u ii öraxin nöngön*

1 Önga bung Sabat, nang e Jisas ixo wan tua nien kö gunon kö önga sisila ne Parasi, a marakörö toxo werwere dik ine bara irabo pet a lasanene.

2 Ma önga tödi a aine ixo u-ung ixo ot pösöt e Jisas.

3 Me Jisas ixo ose abo Parasi mabo duöng nanase möxöbo warkurai te Moses, “I deek bara ire tabo ölanglanga abo miniset kö bung Sabat bara kaim?”

4 Ma lamun kawaim idi xö tinenge. Io, ixo tön a tödi ma ixo ölanglanga ine ma ixo tile rewe ine.

5 Io, ixo ose idi, “Nang bara öng mere mum ma önga barok bara önga bulmakau i subu su xö mara ari xö Sabat, a turunon bara örobo sat öxaa öbaling ine. Goo?”

6 Ma kaim idi xo rengrengen te laa.

7 Ma nang ine ixo pere abo osee toxo pilak lo abo xönö deek kö öra möxö nien, io, ixo töngösen idi ma ina tinenge öwuo:

8 “Nang bara öng i pixe nöngön urungan kö luxa ne alolo, ganim bara u kis kö kinis kö tödi raxin, xalik ewe nang i taxin sik ke nöngön ibo wanot, möxösa, toxo pixe bölök ine.

9 Nang bara i biringan, ina tödi nang i pet ina nien irabo wanot, ine mon niang ixo pixe e mu. Ma irabo tengen te nöngön, ‘Örö taru wes a kinis se nanga.’ Io, örobo menge möxö i tile rewe nöngön urungan kö kinis ne tanaa.

10 Ma lamun nang bara te pixe nöngön, i deek bara örobo kis kö kinis ne tanaa nang bara ine nang i pixe nöngön irabo wanot ma irabo tengen te nöngön, “Töke, örobo kip önga kinis nang i taxin saxit.’ Io, ina marakörö meringan ee idi tabo ii nöngön.

11 Io, ewe nang i ii öraxin iat ine, God irabo ii ösu ine, me ewe nang i ii ösu ine, God irabo ii öraxin ine.”

<sup>12</sup> Me Jisas ixo tengen kö ina tödi nang ixo pixe ine ra nien, “Nang bara u epixe ra nien, ganim bara u pixe abo ais se nöngön, mabo töm bara abo unsaxam, mabo nangadi orong nang te kis lörörö. Ganim bara u pet bie, xalik idi tabo pixe öbaling nöngön tua babalu öbaling.

<sup>13</sup> Ma nang bara u epixe urungan kö luxa re nöngön, örobo pixe abo maris, abo pengpeng, abo lime mut ma xexe mut, mabo pulo.

<sup>14</sup> Me God irabo wadöane nöngön nang bara idi tokobo balu öbaling urungan te nöngön, möxösa, God irabo balu sik ke nöngön kö axana bung möxö tinaru baling möxöbo tene töxödös.”

*A nien taxin kö Orong  
(Matiu 22.2-14)*

<sup>15</sup> Nang a öng mere idi nang toxo kis arixe me Jisas kö öra, ixo ölangen ina na, ma ixo tengen, “Ina tödi ewe nang irabo an kö ina nien kö kingdom kö God, e God irabo wadöane ine.”

<sup>16</sup> Jisas ixo balu, “A önga tödi ixo tagure a nien taxin ma i pixe a oleleng ne osee.

<sup>17</sup> Ma xö ina axana bung möxö pet nien, ixo tile a tene tinörön te ine rua rengrengen te ewenene me idi nang ixoro pixe sik bara, ‘Moro miang. Möxö abo lalaa xirip tere tagur sik.’

<sup>18</sup> “Ma lamun idi xirip belek toxo urulo rua rengreng wi idi iat. Öng ixo arun ta rengrengen, ‘E mana kun a xönö pu, me e rabo mana wan tua werwere. Maris, e karabo wanot.’

<sup>19</sup> “Ma öng kabise ixo tengen, ‘E mana kun a sangaun ne bulmakau möxö tinörön. Me e önan tua könönöin idi. Maris, e karabo wanot.’

<sup>20</sup> “Ma öng kabise bölök ixo tengen, ‘E mana elolo. E karabo wanot.’

<sup>21</sup> “Io, ina tene tinörön ixo baling ma ixo tengen osen ina na urungan kö orong ke ine. Io, a tamana gunon ixo laie ma ixo isik a tingege xöbo tene tinörön te ine bira: ‘Moro wan pasaxit urungan köbo ngas lixilik kirip möxö ina lagunon ma moro lamus abo maris, mabo pengpeng, mabo pulo mabo xexe mut ma lime mut.’

<sup>22</sup> “A tene tinörön ixo tengen, ‘Orong, e re pet eörin a lasanene nang u tengen, ma lamun a gunon i kobola wöwö.’

<sup>23</sup> “Io, a orong ixo tengen köbo tene tinörön te ine, ‘Moro wan su urungan köbo ngas taxin mabo ngas lixilik bölök, ma morobo ölölös lo idi rua nilaxa bara a gunon te e irabo wöwö.

<sup>24</sup> E tengen te mum, ma kaim pe öng mere idi abo duöng nang e xo pixe, irabo nanamienin ina nien te e.’ ”

*Ewe nang i mumuu e Jisas irabo ganim tewe abo lalaa xabise xirip*

<sup>25</sup> Io, a marakörö raxin toxo önan arixe me Jisas, ma ixo tawuxus urungan te idi ma ixo tengen,

<sup>26</sup> “Nang bara re öng i wan ura re e ma i kobo melentexin a tata ma nago ma une re ine ma bung barok mabo tönö mabo saxana ma lamun ine iat bölök, ine i kebeöt tua mumuu e.

<sup>27</sup> Me ewenene re öng niang i kobo sölök a sölöxöröp pe ine ma i kobo mumuu e, ine i kebeöt tua mumuu e.

<sup>28</sup> “Nang bara re öng i mamaa ra uru a gunon, sinila ne laa irabo kis bang ma irabo döxömen muu a xinixun möxö ina gunon tua ösöxö bara a tuluwok ke ine irabo eöt sik ka öxawam a gunon bara kaim.

<sup>29</sup> Ma nang bara ine i uru a gunon ma i kobo öxawam, ewe idi nang te pere tabo ösaxit ine.

<sup>30</sup> Io, idi tabo tengen, ‘Ina tödi na ixo urulo ra wewet a gunon ma lamun kaim ine ra eöt tua öxawam.’

<sup>31</sup> “Nang bara a king i mamaa ra nuan ta inarse ma önga king kabise, io, irabo kis bang ma irabo dödöm deek bara a sangaun ne arip ne umri re ine i eöt tua inarse ma nine sangaun ne arip ne umri möxö king kabise.

<sup>32</sup> Ma nang bara ine i kebeöt, io, irabo tile re uleng ne tultul te ine rua seseng a malum kalik ina king kabise nang bang i nangen kö palaa.

<sup>33</sup> I xarnang mon, nang bara ewe re öng mere mum nang i kara kip tewe abo lalaa xirip pe ine, io, i kobo eöt tua mumuu e.

<sup>34</sup> “A sol ibo rorop ma nang bara a nanamien möxönan iri kawam, a nanamien möxönan irabo ot baling bule? I kebeöt.

<sup>35</sup> I kobo deek bara irabo top a pu xö könönö komo ma i kebeöt ta bulbulus arixin ma texene bulmakau ra rorop a komo. Tabo tewe rewe.

“Ewe nang ine ma talingine, ine irabo mana ölangen.”

## 15

*A sipsip nang i tup  
(Matiu 18.12-14)*

<sup>1</sup> Önga bung abo tene kip takis ma nangadi xabise nang tobo rengrengen idi bara abo tene saban, toxo kis elulurwein e Jisas sua ölangen ine.

<sup>2</sup> Ma lamun abo Parasi mabo tene ausu möxöbo warkurai te Moses toxo tengen, “Ina tödi ibo öga abo tene saban ma ibo aan arixe me idi.”

<sup>3</sup> Io, Jisas ixo töngösen idi ma ina tinenge öwuo na:

4 “Nang bara re öng mere mum ine ma önga mar ne sipsip ma nang bara re öng i tup, io, irabo ganim sik ina pitnö ma nit ne sangaun ma pitnö ma nit tabo aan kö önga xönö, ma irabo wan tua winara siwin ina önga sipsip ot nang irabo pere wösöt ine.

5 Ma nang bara ine irabo pere wösöt lo ine, irabo bulus ine xö xalxalam pe ine

6 ma irabo wan urungan lagunon. Ma irabo kuwe abo ais se ine mabo duöng lörörö ma irabo tengen, ‘Moro axanan arixe me e. E re parasiwin lo a sipsip pe e nang ixo tup.’

7 E tengen te mum, irabo bie bölök kuso xö watmaep. Nang bara önga tene saban i dödöm puxus, a axanan taxin irabo ot tuso lömö. Ina axanan i taxin köba xö axanan tuso lömö nang bara a pitnö ma nit ne sangaun ma pitnö ma nit abo tene töxödös idi tokobo sasaxan tua dinödöm puxus.

### *A tuluwok nang i tup*

8 “Ma bara önga une ma sangaun ne tuluwok ma i pet örup a öng, turunon saxit, ine irabo usumot a laam, ma irabo so a gunon ma irabo wawara siwin ödeek ot nang ine irabo pere wösöt lo ine.

9 Ma nang ine irabo pere wösöt lo ine, irabo kuwe abo ais se ine me idi nang tobo xisixis lörörö re ine ma irabo tengen, ‘Moro axanan arixe me e. E re pere wösöt lo a tuluwok ke e nang ixo tup.’

10 E tengen te mum, irabo bie bölök kuso lömö. A axanan taxin kaluluonin abo angelo re God lamun önga tene saban nang i dödöm puxus.”

### *A barok nang ixo tup*

11 Io, Jisas ixo tengen öbaling, “Önga tödi ine ma nine barok suxurno.

12 Ma nang a lik ke idu ixo tengen kö tamana, ‘Tata, örö erimine e maa narön mabo kinis se nöngön, ma örobo tabaa wes e ma lawa nang ke e.’ Io, ixo erimine abo lalaa re ine kaluluonin idu.

13 “Xö uleng ne bung melamu, ina lik ixo pok lo xirip abo lalaa re ine ma ixo wan lo xö önga lagunon kö palaa. Ma ringan ee ixo götö nana ma ixo ösek kirip abo tuluwok ke ine.

14 Melamu nang ixoro öxawam kirip abo tuluwok, a irilöng taxin ixo ot kö ina kantri xirip, ma ixo urulo im pa sasaxan.

15 Io, ixo wan ma ixo ose tinörön kö önga tödi meringan iat kö ina kantri, ewe nang ixo tile ine urungan kö xönö möxö bung bo bara irabo ratabaa.



16 Ma ixo mamaa xöba rua öwöwö a balana ma lewene nien niang a bung bo toxo enen paling, ma lamun kaim pe öng ka tabaa ine mere laa.

17 “Ma nang a dinödöm deek ixo ot te ine, ixo tengen, ‘A usen ne tene tinörön te tata re e idi ma nien nang ibo kis baling, ma na e belek im a, e re memet ma irilöng!

18 E rabo baling urungan te tata ma arabo tengen te ine, “Tata, e xo pet a magingin saban urungan te God ma ura re nöngön bölök.

19 I kobo töxödös sik bara örobo tengen bara e a barok ke nöngön. Inexalik örobo pet e xarnang a öng möxöbo tene tinörön te nöngön.” ’

20 Io, ixo taru lo ma ixo wan urungan kö tata re ine.

“Ma lamun nangen bang ixo önan kudun kö palaa, a tamana ixo pere ine ma ixo marse xöbanin ine. Ma ixo ulo urungan te ine, ma ixo gön lo ine ma ixo muum ine.

21 “Ma a barok ixo tengen kö tamana, ‘Tata, e xo pet a magingin saban urungan te God ma ura re nöngön. I kobo töxödös sik bara örobo tengen bara e a barok ke nöngön.’

22 “Ma lamun a tata ixo tengen köbo tene tinörön te ine, ‘Moro saxit! Moro kip lo a man nang a lak deek ma moro usige ine min. Ma moro bulus a mörölö xö limine ma moro usige ine ma nine sandel.

23 Ma moro kip lo a barok kö bulmakau nang a lak ebobot ma moro sexomet, me ire tabo pet a luxa raxin.

24 Möxö a barok ke e ixoro met ma iri to baling. Ixo tup me ire tere pere wösöt lo ine.’ Io, idi toxo urulo a luxa.

25 “Ma a taxin te idu ixo xisixis uso xö komo. Ma nang ixo wanot lörörö xö gunon, ixo ölangen a inöno sinö ma tinie.

26 Io, ixo kuwe a öng möxöbo tene tinörön ma ixo ose ine bara te wewet a lasanene.

27 A tene tinörön ixo balu ine, ‘A tönö re nöngön iri wanot baling. Me tata re nöngön i tile tinenge bere mem mara döxö ömet te bak kö bulmakau nang i ebobot deek, möxösa, ine i pere a töm bara i to deek.’

28 “A sinila ne barok ixo laie ma ixo kasen tua nuan laxa. Io, a tamana ixo wan su ma ixo tenge marmaris se ine ra nuan laxa.

29 Inexalik ixo balu e tata re ine bira: ‘Pere bang! Xö inabo awat na e xobo rörörön te nöngön me e xobo rarama nöngön. Ma kaim arixe bara u xo tabaa e mere bak kö me bere e rabo pet a luxa min arixe mabo ais se e.

30 Inexalik bara ina barok ke nöngön na ixo susur ma inabo lalaa re nöngön kö balixilik ilawa. Ma nang ine i wanot baling, nöngön u döxö ömet a bak kö bulmakau nang i ebobot tö ine.’

31 “A tata ixo tengen, ‘Barok ke e, nōngön u bo xisixis arixe me e, mabo lalaa xirip pe e re nōngön.

32 Inexalik ire tabo mana axanan ma tabo bala deek, möxösa, ina tōm ixo met ma na iri to baling. Ixo tup ma tere pere lo ine.’ ”

## 16

### *Jisas ixo eusu ulamun a tuluwok*

1 Jisas ixo tengen köbo bak ne ausu re ine: “Önga asuono orong ine ma önga tōdi ewe nang ibo balaure abo lalaa re ine. Ma tinge ixo ot pösöt a asuono orong bara ina tene balaure laa ixo ösek tataunin abo tuluwok ke ine.

2 Io, ixo kuwe öläxa lo ina tene balaure lalaa ma ixo ose ine, ‘A sa inabo lalaa na nang e ölangen ulamun nōngön? Örö isik kebo tinge maras ura lamun abo lalaa re e nang nōngön u xo balaure, möxösa, nōngön ökorobo a tene balaure lalaa baling im pe e.’

3 “Ma a tene balaure lalaa ixo tengen öbaling iat tö ine, ‘Arabo pet a lasa im? A tōdi raxin te e irabo kip tewe a tinörön kalik e. Me e kobo eöt lölös sua xikin, me e menge belek bara arabo seng tuluwok xarnang önga maris.

4 E ösöxö a lasa nang e rabo pet, io nang bara tabo kip tewe e xalik a tinörön te e ra, a nangadi tabo öga lo e xöbo gunon te idi.’

5 “Io, ine ixo kuwe öläxa a öngöng mere idi nang toxo kip lo abo lalaa nang toxo seng lo xalik a asuono orong ke ine. Ixo ose a sisila ne tōdi, ‘A nausen ne lalaa xö asuono orong ke e nang nōngön u xo kip lo?’

6 “Ma ixo balu, ‘A önga mar ne daram ne wel.’

“Ma tene balaure lalaa ixo tengen te ine, ‘Örö kis, ma saxit mon örö geet bara örobo balu wuxus a pitnö ne sangaun mon tua öxawam a dinau pe nōngön.’

7 “Io, ixo ose a sese öninöng ne tōdi, ‘Ma nausen iang u xo kip lo?’

“Me ine ixo balu, ‘A önga arip ne bek wit.’

“Ma ixo tengen te ine, ‘Örö geet bara örobo balu wuxus a pitnö ma narun ne mar mon.’

8 “Ma asuono orong ixo ölet ina tene balaure lalaa nang ixoro töxö ine, möxösa, ixo wewet inabo lalaa xarnang a tene nanase. Io, a nangadi nang tobo mumuu a mangana tatalien mera xö öxöno lagunon idi tobo nanase sik köbo mangana ngas sua wewet abo tinörön te idi. Xö ina tinörön na, idi tobo nanase xöba xö nangadi nang tobo mumuu a mangana tatalien möxö maras.

<sup>9</sup> Me e tengen te mum, mum morobo rörörön mabo tuluwok saban bara mum morobo kip lo rebo ais se mum, ma nang bara inabo tuluwok irabo kawam, tabo öga lo e mum kö kinis nang i karabo kawam.

<sup>10</sup> “Ewe nang tobo nunu sik ke ine bara ine i eöt tua balaure abo lalaa lixilik, tabo nunu sik bölök ke ine bara ine i eöt tua balaure abo lalaa rataxin. Me ewenene nang i kobo muu a tatalien töxödös kö lalaa lixilik, i karabo töxödös bölök köbo lalaa rataxin.

<sup>11</sup> Io, nang bere i kebeöt bara tabo nunu sik ke mum pua balaure abo tuluwok mera xö öxöno lagunon, io, ewenene irabo nunu sik im pe mum pua balaure abo bubulus turunon?

<sup>12</sup> Ma nang bere i kebeöt bara tabo nunu sik baling ke mum pua balaure abo lalaa xö öng kabise, kaim pe öng irabo tabaa e mum merebo lalaa ure mum iat.

<sup>13</sup> “Kaim pe önga tultul i öt tua ölangen a nini orong. Möxö ine irabo kasen a öng ma irabo mamaa ulamun a öng kabise, ma bara irabo araröt sik kö öng ma irabo melentexin a öng kabise. Io, mum kebeöt tua ölangen e God ma a tuluwok bölök.”

<sup>14</sup> Abo Parasi ewe nang tobo mamaa xöba lamun a tuluwok, toxo ölangen ina na ma toxo kaes e Jisas.

<sup>15</sup> Ma ixo tengen te idi, “Mum iat mum bo ötöxödös öbaling e mum kö winara xö nangadi, nexalik e God i ösöxö sik abo bala mum. A lasanene a nangadi te döxömen öraxin kö dinödöm pe idi, i laa tataun kö wawara re God.

### *Abo warkurai te Moses*

*(Matiu 5.18; 11.12-13; 19.9; Mak 10.11-12)*

<sup>16</sup> “Abo warkurai te Moses arixe mabo ginigeet köbo propet idi toxo warkurai ot kö axana bung ke Jon a tene baptais. Urulo xö ina axana bung na, tobo etöngösen ma a atöngösen deek möxö kingdom kö God, ma a nangadi xirip tobo lölölös sua nuan laxa xönan.

<sup>17</sup> Nang bara i lölös kö watmaep ma öxöno lagunon ta xakawöm, io, i lölös köba bara re ulik ne xönö möxöbo warkurai te Moses irabo tup.

<sup>18</sup> “Ewe re öng nang i köröp alolo ma une re ine ma i elolo xö une xabise, ine i pet a tatalien saban kö une re ine, möxösa, ine i maru ma une kaim bara re ine. Ma önga tödi ewe nang i elolo a önga une nang a tödi i palas alolo re idu, i pet a tatalien saban, möxösa, ine i maru ma une kaim bara re ine.

*A tödi orong me Lasarus*

19 “Önga asuono orong ewe nang ixobo sisige abo man mamaran nang a marna a lak kaa, ixobo xisixis kö kinis a lak deek kö bungbung kirip.

20 Ma toxobo bulbulus a önga tödi maris kö maramelaxlaxa re ine, a esene e Lasarus, ma a aine ixo wöwö ma ruxuruk.

21 Ma ixobo maaaa xöba rua enen a lasanene nang ixobo susubu su xalik a öra ne nien möxö asuono orong, ma bung puluwun toxobo önan ot ma toxobo demdem abo ruxuruk ke ine.

22 “Ma axana bung ixo ot nang ina tödi maris ixo met ma a bung angelo toxo kip lo ine uruso xö lawana e Abaram. Ma asuono orong bölok ixo met ma toxo pömös ine.

23 Kölöme xö xönö möxöbo minet ixo örasen a kinadik taxin. Ine ixo wawara kaa ma ixo pere e Abaram kö palaa arixe me Lasarus kö lawana.

24 Io, ixo kup urungan te ine bara, ‘Tata Abaram, örö marase e ma örö tile e Lasarus, ira öwösö a sixsixine limine xö ari ma ira ösisii a kamene e, möxösa, e örasen a kinadik taxin kö ina ia sösöt na.’

25 “Inexalik e Abaram ixo balu, ‘Barok ke e, örö döxömen bara xöbo bungbung ne to re nöngön, u xo kip lo abo lalaa deek kö nöngön me Lasarus ixo kip lo abo lalaa saban. Ma na im ine i örasen a to deek, me nöngön iang kö kinadik.

26 Ma önga laa bölok, kaluluonin e maa me nöngön, e God ixo bulus a marasaa raxin, io, ewe me idi nang te eka nuan mera urungan te nöngön, idi tekebeöt, ma kaim pe öng irabo köröp me ringan ura re maa.’

27 “Ine ixo balu, ‘Möxö ina na, tata, e seng nöngön bara örö tile e Lasarus uri xö gunon te tata re e,

28 möxö e ma pitnö ne töke. Örö öbala ine bara ira ötumarang idi bere idi takarabo wan bölok ura xö ina xönö möxö kinadik.’

29 “Abaram ixo balu, ‘Abo warkurai te Moses mabo ginigeet möxöbo propet nangen idi min. Ganim inabo töm tabo tame inabo tinenge.’

30 “Ine ixo tengen, ‘Tata Abaram, kawaim, nexalik nang bara re öng meringan kö minet irabo wan urungan te idi, idi tabo dödom puxus.’

31 “Me Abaram ixo tengen tö ine, ‘Nang bere idi tokobo ölangen abo warkurai te Moses mabo ginigeet möxöbo propet, ma nang bara a öng i taru baling kalik a minet, i kebeöt tua öxaxat idi rua dödom puxus.’ ”

## 17

*Döxömen taun abo sasaban  
(Matiu 18.6-7, 21-22; Mak 9.42)*

<sup>1</sup> Jisas ixo tengen köbo bak ne ausu re ine: “Abo lalaa nang ibo usubu a nangadi xö magingin saban irabo wanot, nexalik, maris belek ke ine nang irabo ösubu a marakörö bira.

<sup>2</sup> Nang bara ewenene i pet a öng mere inabo barok lixilik na ewe idi te nunu re e rua pet magingin saban, irabo kip a warkurai taxin melamu. Io, ixere deek kö ine bara texere kut te xönö wat taxin kö inöno ma texere öriri ösu ine xö rasi, xalik ibo engin lo re öng kua pet magingin saban.

<sup>3</sup> Io, mum morobo balaure öbaling e mum iat.

“Nang bara a töm i pet magingin saban, örobo köö ine. Ma nang bara i dödöm puxus, örobo döxömen taun a magingin saban te ine.

<sup>4</sup> Ma nang bara i pet magingin saban urungan te nöngön kö pitnö ma ninöng ne axan kö önga bung, ma pitnö ma ninöng ne axan ine i ot baling ma i tengen te nöngön, ‘E re dödöm puxus,’ örobo döxömen taun ine.”

#### *A tatalien möxö nunu*

<sup>5</sup> Mabo aposol toxo tengen kö Orong, “Örö öraxin a nunu re mem!”

<sup>6</sup> Ma Orong ixo tengen te idi, “Nang bara a nunu re mum i lik köba xarnang a irine sie, mum mo eöt ta tengen kö ina uno iaa na, ‘Örö tamaxaxat ma örö tuu baling kö rasi!’ Ma irabo ölangen e mum.

#### *Ire abo tene tinörön mon*

<sup>7</sup> “Rösa? Nang bara öng mere mum ma a tene tinörön i rörörön komo, bara i werwere muu abo sipsip, ma i baling ot meriso xö komo, ma saxit mon a orong ke ine irabo tengen te ine, ‘Örö miang im, örö kis ma örö an?’

<sup>8</sup> Kaim. Irabo tengen belek bira, ‘Örö tagure a nien te e, ma örö kulas man ma örö tabaa e. Ma nang bere e re an ma bere e re inim, melamu xö nang, nöngön örobo an ma örobo inim.’

<sup>9</sup> Mum mo döxömen bara a orong irabo tengen deek kö tene tinörön, möxösa, ixo pet eörin abo lalaa nang ine ixo tengen te ine rua wewet? Kaim.

<sup>10</sup> Io, mum bölöök, nang bere mum moro pet kirip abo lalaa nang a Orong ke mum ixo tengen te mum pua wewet, io, mum morobo mana tengen bira, ‘Mem abo tene tinörön tataun mon. Mem me wewet mon abo lalaa nang i deek bere mem marabo pet.’ ”

#### *Abo lepra*

<sup>11</sup> Io, xö nuan te ine u Jerusalem, Jisas ixo wan muu a wapang kaluluonin e Samaria me Galili.

<sup>12</sup> Nang ine ixo önan urungan kö önga lagunon, a sangaun ne tödi toxo eka asuo me ine, ma lamun toxo tuu sik kö palaa ulik, möxösa, idi ma lepra.

<sup>13</sup> Io, idi toxo kup lömö saxit, "Jisas, tödi raxin, örö marse e mem!"

<sup>14</sup> Nang ixo pere idi, ixo tengen, "Moro wan, moro osen e mum iat köbo pris." Io, nang idi toxo önan, a miniset te idi ixo kawam kö ngas.

<sup>15</sup> Öng mere idi, nang ixo pere bara ixoro deek, ixo baling, ma ixo ölet e God ma ixo xukup lömö saxit.

<sup>16</sup> Ixo tewe ösu ine xö pu xö nine xexene e Jisas, ma ixo tengen deek ke ine. Me ine a önga Samaria.

<sup>17</sup> Jisas ixo eose, "A sangaun idi xirip nang idi te langlanga. Ma a pitnö ma nit ule?"

<sup>18</sup> Rösa ina osee na xalik mon i tawuxus baling kua ölelet e God?"

<sup>19</sup> Io, ixo tengen te ine, "Taru ma örö wan. A nunu re nöngön iri ölanglanga nöngön."

### *Jisas irabo ot baling*

*(Matiu 24.37-39)*

<sup>20</sup> Önga bung, abo Parasi toxo ose e Jisas, "A axana bung sa a kingdom kö God irabo wanot?"

Me Jisas ixo balu, "A kingdom kö God i karabo ot xarnang önga auxileng nang a marakörö tabo pere ma marana idi.

<sup>21</sup> Me idi takarabo tengen bara, 'Ine na,' ma bara 'Ine niang,' möxö a kingdom kö God ine iang me mum."

<sup>22</sup> Io, ixo tengen köbo bak ne ausu re ine, "A axana bung irabo ot nang mum morobo mamaa xöba rua werwere a öng möxöbo bung kö Barok kö Tödi, nexalik bara mum korobo pere.

<sup>23</sup> Ma nangadi tabo tengen te mum, 'ine niang!' ma bara 'Ine na!' Mum bele ululo rup muu idi.

<sup>24</sup> Xö bung iat te ine, a Barok kö Tödi irabo xarnang a siek nang irabo siek, ma irabo mararang lömö xö balana kubu möxö önga ngusuno urungan kö önga ngusuno xabise.

<sup>25</sup> Inexalik mon, a sisila ne laa, ine irabo kip a kinadik lamun abo lalaa oleleng, ma marakörö mee nixinen tabo kasen ine.

<sup>26</sup> "Xö axana bung kö Barok kö Tödi, a nangadi tabo talien xarnang a nangadi xöbo bung ke Noa.

<sup>27</sup> A nangadi toxobo aan, toxobo ininim, ma toxobo laxlaxa xöbo alolo ot kö bung nang e Noa ixo wan laxa xö mön taxin. Io, a gus ixo wanot ma ixo ögarin esexerein kirip idi.

28 “Ma ixo eöt ma abo bung ke Lot. A nangadi toxo aan ma toxo ininim, toxo xuxuxun ma toxo mimiisik, toxo susulo ma toxo wewet gunon.

29 Ma lamun a bung nang e Lot ixo wan lie e Sodom, a ia sösöt ma solam ixo subu su meriso xö watmaep ma ixo ögarin esexerein idi xirip.

30 “Irabo xarnang ina niang kö bung nang a Barok kö Tödi irabo wanot wösö.

31 Ma xö ina bung, ewe a öng nang i kisisik lömö xö öxöno gunon te ine, mabo lalaa deek ke ine kölöme xina gunon, ganim bara i kaa su ra xikip lo. Ma irabo bie bölök ke ewenene nang i xisixis siso xö komo, ganim bara i su uri xö gunon ta xikip lo re laa.

32 Mum morobo döxömen a usuono e Lot!

33 Ewenene nang i maaaa ra rörödik a to re ine, irabo ömalim tewe, me ewe niang i ömalim tewe a to re ine, ine irabo töndik sik.

34 E tengen te mum bara a ninöng idu tabo maru xö önga öra xö ina bung dömö, tabo kip lo a öng ma tabo gan sik a öng.

35 A nini une idu tabo xuxu abo irine wit arixe. Tabo kip lo a öng ma tabo gan sik a öng uxe.”\*

37 Idi toxo eose, “Orong, ule?”

Jisas ixo balu idi, “Xöbo xönö sa nang abo minet könan, abo tago tabo oretok ee.”

## 18

### *A möxösö nang ixobo seseseng sösöxö*

1 Io, Jisas ixo töngösen abo bak ne ausu re ine ma tinenge öwuo rua osen idi bere idi tabo mana seseseng sösöxö ma ganim a lönlön.

2 Ine ixo tengen, “Kölöme önga lagunon i nangen a önga tene pet warkurai ewe nang i kara ösöxö a buburin e God ma i kara niniang muu a nangadi.

3 Kölöme xina lagunon a önga möxösö ewe nang ixobo önan ot sösöxö wösöt ine arixe ma siniseng bara, ‘A iuo re e i maaaa rua ögarin e, ma örö kure ötöxödös e maa.’

4 “Xö uleng ne axana bung sila ixobo mölmölök kua rorop ine. Ma lamun ine ixo döxömen, ‘A turunon e kara ösöxö a buburin e God me e kara niniang muu a nangadi.

5 Inexalik ina möxösö na ibo tabaa e ma tiip. Möxö ina na, e rabo kure ötöxödös abo lalaa rua rorop ine, bara xalik ine ibo ölon e ma nuanot sösöxö!’ ”

\* 17:35 A dauleng ne ginigeet me lorexe toxo bulus öläxa rina 36 i tengen bira: A nini tödi idu tabo rörörön kölöme xö komo. Tabo kip lo a öng ma tabo gan sik a öng.

<sup>6</sup> Ma Orong ixo tengen, “Mum moro ölangen a lasa nang a tene pet warkurai saban ixo tengen.

<sup>7</sup> Ma irabo bie lamun a nangadi re God nang ine ixo pere kos, ewe nang tobo seseseng urungan te ine xö xaken ma dömön. Turunon saxit, irabo kure ötöxödös abo lalaa rua rorop idi. Mum mo döxömen bara ine irabo alilis sua rorop idi? Kaim.

<sup>8</sup> E tengen te mum, ine irabo kure ötöxödös pasaxit abo lalaa rua gene idi. Ma lamun nang bara a Barok kö Tödi irabo wanot, ine irabo parasiwin a nunu xö öxöno lagunon bara kaim?”

*A Parasi ma a tene kip takis*

<sup>9</sup> Me Jisas ixo tengen a tinenge öwuo na urungan kö dauleng ewe nang toxo döxömen bere idi te töxödös sik iat ma te pere öbulubun a nangadi xabise:

<sup>10</sup> “Nine tödi toxo wan kaa uruso xö gunon lotu raxin tua siniseng, önga Parasi ma önga tene kip takis.

<sup>11</sup> A Parasi ixo tuu kaa ma ixo seseng lamun ine iat bira, ‘God, e tengen deek ke nöngön bere e kobo xarnang a dauleng ne nangadi xabise nang abo tene pinilo, abo tene atöxö, ma abo tene minaru arixe mabo une nang kaim bere re idi. E tengen deek bere e kobo xarnang ina tene kip takis bölök.

<sup>12</sup> E bo ölölo a nine bung kölöme xö pitnö ma ninöng ne bung, me e bo isik a nang i sangaun min möxöbo laa xirip nang e bo xikip.’

<sup>13</sup> “Ma lamun a tene kip takis ixo tuu xö palaa. Ine ixo kaim kö winara kaa uruso xö watmaep, ma ixo sese a böngböngöno ma ixo tengen, ‘God, marse e, e a tene saban.’

<sup>14</sup> “E tengen te mum bara ina tödi na ixo baling urungan kö gunon te ine, ine ixo töxödös kö wawara xö God ma öng kabise, kaim. Io, ewenene nang i ii öraxin ine, God irabo bulus ösu ine, me ewenene nang i ii ölik ine, God irabo ii öxaa ine.”

*A bung bak lixilik*

*(Matiu 19.13-15; Mak 10.13-16)*

<sup>15</sup> Nangadi toxo xikip ot bölök a bung barok lixilik urungan te Jisas sö ine ra sisigi idi. Nang abo bak ne ausu toxo pere bira, idi toxo töö rewe idi.

<sup>16</sup> Ma lamun e Jisas ixo kuwe a bung bak lixilik urungan te ine ma ixo tengen, “Moro ganim a bung bak lixilik ta wan ura re e, ma ganim a wanwanak idi, möxösa, a kingdom kö God, ine möxö inabo mangana bak lixilik bira.

<sup>17</sup> Turunon saxit, nang bara öng i kobo kip lo ina kingdom kö God xarnang a bak lik, ine i kebeöt ta nilaxa xönan.”



*Önga orong**(Matiu 19.16-29; Mak 10.17-30)*

18 Ma önga sisila ixo ose ine, "Tene ausu deek, a lasa nang arabo mana pet tua xikip ina to ulorexe saxit?"

19 Io, Jisas ixo balu ma ixo tengen, "Ruasa u tengen e ma tödi deek? Kaim pe öng i deek, nexalik e God kalik mon.

20 U ösöxö abo warkurai te Moses i tengen bira, '*Ganim a pet a tatalien ne ilawa ma önga tödi alolo, ganim a arsexomet tataun, ganim a wuwulo, ganim a tengen töxö lamun a önga tödi, ma örö ii ölik nöngön te tata me nago.*' "

21 Ina tödi ixo tengen te Jisas, "Nang e xo bak lik sik, e xobo mumuu inabo warkurai i ot na."

22 Ma nang e Jisas ixo ölangen ina na, ixo tengen te ine, "Önga laa xalik mon u koxobola pet eörin bang. Örö misik mabo laa xirip nang nöngön min ma örö tabaa a nangadi maris, io nang, nöngön örobo kip abo arabaa deek saxit tiso xö watmaep. Ma örö miang ma örö muu e."

23 Nang ine ixo ölangen bira, ixo tawunuk köba, möxösa, ine a tödi orong.

24 Me Jisas ixo pere ine ma ixo tengen, "I lölös köba xö önga tödi orong kua nilaxa xö kingdom kö God!

25 Nang bara önga kamel i ka nuan laxa xö mara möxö nil möxö sinöxö, i kobo lölös köba xarnang a tödi orong i ka nilaxa xö kingdom kö God."

26 Ewe midi nang toxo ölangen ina na, toxo tengen, "Nang bara bie, ewe im pe öng irabo eöt ta xikip a to ulorexe?"

27 Jisas ixo tengen, "A lasa nang a nangadi tekebeöt ta wewet, God i eöt ta wewet."

28 Me Pita ixo tengen te ine, "Mem mere wan lie xirip abo lalaa re mem rua mumuu e nöngön!"

29 Jisas ixo tengen, "Turunon saxit, ewe nang iri wan lie a gunon tine, bara a une, bara a tata ma nago, bara abo tönö ma a bung baroxorok kua gene a kingdom kö God,

30 irabo kip lo a oleleng baling kö ina axana bung na. Ma xö axana bung nang irabo ot melamu, ine irabo kip a to ulorexe saxit."

*Jisas ixo tengen osen bara irabo met**(Matiu 20.17-19; Mak 10.32-34)*

31 Jisas ixo lamus ina sangaun ma ninöng urungan kö lawa ma ixo tengen te idi, "Ire tabo wan kaa uruso Jerusalem, mabo lalaa xirip nang abo propet toxo geet ulamun a Barok kö Tödi irabo wanot turunon.

32 Ma tabo isik ine xö limine a nangadi nang kaim bara abo Judeia. Tabo eösaxit saban arixe me ine, ma tabo

tengen ögarin ine, tabo gisip ine, tabo dangat ine ma tabo sexomet ine.

<sup>33</sup> Narun ne bung irabo saxit, ine irabo taru baling.”

<sup>34</sup> Abo bak ne ausu kaim kö marmaras ulamun te laa niang ine ixo wówörö min, möxösa, a unine toxo umingen kalik idi, me idi tokoxobo ösöxö a lasa nang ine ixo rengrenge ulamunon.

*A marapulo xö ngas uri Jeriko  
(Matiu 20.29-34; Mak 10.46-52)*

<sup>35</sup> Ma nang e Jisas ixo önan ot Jeriko, önga tödi marapulo ixo kisisik kö gegene ngas ma ixobo seseng lalaa xalik a nangadi.

<sup>36</sup> Ma nang ine ixo ölangen a marakörö toxo önan saxit, ine ixo eose bara, “A lasa iang?”

<sup>37</sup> Idi toxo tengen te ine, “E Jisas mee Nasaret ine ia i önan saxit.”

<sup>38</sup> Me ine ixo kup bara, “Jisas, a Barok kö marapun te Dewit,\* örö marase e!”

<sup>39</sup> Me idi nang toxo silien a nuan, toxo töö rewe ine ma toxo tengen te ine rua ödödö, nexalik bere ine xö kup taxin belexim, “Barok kö marapun te Dewit, örö marase e!”

<sup>40</sup> Jisas ixo tuu ma ixo euguran ulamun ina tödi bara ta lamus ot ine ura re ine. Ma nang ine ixo ot lörörö, Jisas ixo ose ine,

<sup>41</sup> “U mamaa bara arabo pet a lasanene re nöngön?”

Ine ixo tengen bira, “Örong, e mamaa bara arabo wawara.”

<sup>42</sup> Jisas ixo tengen te ine, “Örö wawara! A nunu re nöngön iri öro nöngön.”

<sup>43</sup> Saxit mon iang, a marna ixo öt ta winara ma ixo muu e Jisas, ma ixo ölet nanin e God. Ma nang a nangadi xirip toxo pere ina na, idi bölök toxo ölet e God.

## 19

*Sakias ixo kip a to*

<sup>1</sup> Jisas ixo wan laxa Jeriko ma ixo önan saxit tingan.

<sup>2</sup> Ma önga tödi ringan, a esene e Sakias. Ine a önga tödi raxin te idi abo tene kip takis ma a orong bölök ine.

<sup>3</sup> Ine ixo mamaa ra werwere e Jisas bere ewe ine, nexalik ine ixo wuruwut ma ixo kebeöt, möxösa, a marakörö raxin köba.

<sup>4</sup> Io, ine ixo ulo sila ma ixo kakaa xö önga uno sikamo rua werwere e Jisas, möxö ine ixo önan kina ngas.

\* **18:38** Abo Judeia toxo ösöxö sik bara ina Mesaia ewe nang irabo öro a nangadi, irabo ot kö bung marapun te Dewit. Ma a nine marapulo toxo nunu bara Jisas ina tödi.

<sup>5</sup> Ma nang e Jisas ixo ot kina xönö, ine ixo wawara kaa ma ixo tengen tö ine, “Sakias, örö wan su saxit mon, möxösa, nixinen e rabo mana kis kö gunon te nöngön.”

<sup>6</sup> Io, saxit mon ine ixo kakaa su ma ixo öga lo ine ma axanan.

<sup>7</sup> A nangadi xirip toxo pere ina na ma toxo urulo ra ngunungun. Idi toxo tengen bira, “Ina tödi na iri wan tua nien arixe ma a tene saban.”

<sup>8</sup> Me Sakias ixo tuu kaa ma ixo tengen kö Orong bira, “Orong! Örö pere! Na arabu palang kaluluon abo lalaa re e ma arabu isik ke subana xö nangadi maris. Ma nang bere e xoro töxö re öng me e xoro pulo re önga laa, io, e rabo balu wuxus ma nit ne laa baling.”

<sup>9</sup> Jisas ixo tengen tö ine, “Nixinen a to maxat iri wanot kö ina gunon na, möxösa, ina tödi na ine bölök a barok ke Abaram.

<sup>10</sup> Ma möxö a Barok kö Tödi iri wanot tua wawara siwin ma rua öro idi nang te tup.”

### *Abo tultul*

*(Matiu 25.14-30)*

<sup>11</sup> Ma nang a nangadi angen toxo ölangen tinenge, Jisas ixo tengen a önga tinenge öwuo urungan tö idi, möxösa, ine ixo lörorö Jerusalem ma a nangadi toxo döxömen bara a kinis ne kingdom kö God iri lörorö rua nuanot.

<sup>12</sup> Ma ixo tengen, “A önga tödi raxin i maaaa rua nuan urungan kö önga lagunon kö palaa bara tabo tabaa ine ma a kinis ne warkurai te ine ma melamu ine irabo tawuxus baling.

<sup>13</sup> Io, ixo kuwe a sangaun möxöbo tultul te ine ma ixo tabaa idi öngöng ma önga tuluwok. Ma ixo tengen tö idi bira, ‘Mum moro rörön arixe mina tuluwok na ot nang arabu wanot baling.’

<sup>14</sup> “Ma a nangadi möxö ina lagunon te ine toxo melentexin ine. Idi toxo tile a dauleng ne nangadi ra mumuu ine ma tinenge rua rengrengen bere idi tokoxobo maaaa bara ina tödi irabo kure idi.

<sup>15</sup> Inexalik, toxo isik ina kinis ne warkurai te ine ma ixo tawuxus baling urungan lagunon. Io, ine ixo euguran lamun abo tultul ewe idi nang ine ixo tabaa idi ma tuluwok kua rengrengen ömaras ine ma tinörön ma tuluwok.”

<sup>16</sup> “Io, a öng ixo sila ot ma ixo tengen tö ine, ‘Orong, a tuluwok ke nöngön i wan kaa xö sangaun.’

<sup>17</sup> “A orong ke ine ixo tengen tö ine, ‘Deek saxit, nöngön a tultul deek! Nöngön u xo pet a tinörön deek kö laa a lak lik köba, io niang, e rabo tabaa nöngön ma sangaun ne lagunon tua balbalaure.’

18 “Ma a sese öninöng ixo wanot ma ixo tengen, ‘Orong, a tuluwok ke nöngön i wan kaa xö pitnö.’

19 “Ma a orong ke ine ixo tengen tö ine, ‘Örö balaure a pitnö ne lagunon.’

20 “Io, önga tultul bölok ixo wanot ma ixo tengen, ‘Orong, a tuluwok ke nöngön na. E xo bulus umingen tewe kölöme xö xönö subana man.

21 E xo burin nöngön, möxösa, nöngön a tödi möxö tenge oleleng. Nöngön u bo kip lo a lasa nang u koxobo sulo. Ma u bo xikip lo a inone malawang köbo dauleng kabise.’

22 “A orong ke ine ixo tengen, ‘Nöngön a tultul saban! E rabo kure nöngön mabo tinenge re nöngön iat. Nöngön u tengen bara u xo ösöxö bere e a önga tödi möxö tenge oleleng. Ma u tengen bölok bere e bo xikip lo a lasa nang e koxobo sulo, me e bo xikip lo a inone malawang köbo dauleng kabise.

23 Ruasa nang nöngön u koxobo bulus a tuluwok ke e xö gunon ne bulus tuluwok, io, nang arabo wanot baling, e xebe kip lo ma dauleng bölok lömö?’

24 “Io, ine ixo tengen te idi nang toxo tuu sik, ‘Mum moro mana kip tewe ina tuluwok kalik ine me mum moro isik ine xö tultul nang i kip lo a sangaun ne tuluwok.’

25 “Idi toxo tengen te ine, ‘Orong! Ine ma sangaun tuar!’

26 “Ine ixo balu, ‘E tengen te mum bara ewenene midi nang idi ma lalaa, God irabo tabaa idi ma oleleng. Ma lamun ewenene midi nang kaim a lalaa, God irabo kip tewe bölok kirip abo lalaa.

27 Inexalik abo iuo re e ewe idi nang tokoxobo mamaa bere e rabo king ke idi, moro lamus ot idi ura ma moro sexomet idi xö wawara re e.’ ”

*Jisas ixo laxa Jerusalem xarnang a king  
(Matiu 21.1-9; Mak 11.1-10; Jon 12.12-15)*

28 Melamu nang e Jisas ixo tengen ina tinenge na, ine ixo wan sila uruso Jerusalem.

29 Ma nang ine ixo wanot lörörö Betepage me Betani xö maii tobo rengrengen ma Maii Olip, ixo tile a nine bak ne ausu re ine, ma ixo tengen tidu bara,

30 “Mu moro wan urungan kö lagunon mesila re mu, ma nang bere mu mo laxa xönan, mu morobo pere a önga dongki maxat te kubus sik ine ee, ma kaim bang ke öng i kala xisin ine. Mu morobo palas tewe ine ma morobo lamus ot ine ura.

31 Ma nang bara önga tödi i ose e mu bara, ‘Ruasa mu mo walwalas ina dongki na?’, io, mu morobo tengen te ine bira, ‘A Orong i mamaa ulamun.’ ”

32 Io, ewe idu nang ixo tile, idu toxo wan lo ma toxo pere a lasa ixo ot xarnang e Jisas ixo tengen tö idu.

33 Ma nang idu toxo walwalas lo ina dongki, a tamana dongki ixo ose idu, "Mu mo walwalas lo a dongki ruasa?"

34 Me idu toxo balu bara, "A Orong i maaaa ulamun."

35 Io, idu toxo lamus ot ina dongki urungan te Jisas me idu toxo bulus abo man ömat te idu lömö xina dongki maxat tue Jisas sua kinis kaa.

36 Ma nang ine ixo önan nana, a nangadi toxo kip tewe abo xinaxain te idi ma toxo parawe xö ngas.

37 Ma nang ine ixo wanot lörorö xö lagunon nang a ngas i wan su uri xö Maii Olip, a marakörö ne bak ne ausu xirip toxo urulo ra axanan tua ölelet e God ma kinup taxin ulamun abo lalaa lölös ne auwuwus kirip nang idi toxo pere. Me idi toxo kup uruso bira,

38 "*God irabo wadöane ina king nang i wanot tua wewet eörin a maaaa xö Orong!*"

"A malum uso lömö xö watmaep ma a mariris meriso lömö saxit!"

39 Dauleng möxöbo Parasi kaluluonin kö marakörö toxo tengen te Jisas, "Tene ausu, örö köö abo bak ne ausu re nöngön!"

40 Ine ixo balu, "E tengen te mum, nang bere idi tabo kis malus, abo warawat tabo kup wösö."

### *Jisas ixo gee ulamun e Jerusalem*

41 Ma nang ine ixo ot lörorö Jerusalem, ine ixo pere ina lagunon me ine ixo gee ulamunon.

42 Ma ixo tengen, "Mum mee Jerusalem, e maaaa xöba bara nixinen mum iat morobo ösöxö a lasa irabo isik ot a malum pe mum. Ma lamun na iri mun tewe xalik abo marana e mum.

43 Abo bung irabo ot pösöt e mum nang abo iuo re mum tabo bulus ögun a warawat ma pu rua kinös köröp abo bölö möxö lagunon te mum, ma tabo tuu elulurwein e mum, ma tabo tuu wi abo xönö xirip kalik mum bo ulo rup.

44 Idi tabo tewe ösu e mum uri xö pu, mum arixe ma bung baroxorok ke mum kölöme xö lagunon te mum. Idi tekebeöt ta gan sik ke wat lömö xere öng kabise, möxösa, mum koxobo perexulen a axana bung nang e God ixo ot tua rorop e mum."

### *A gunon lotu re God*

*(Matiu 21.12-16; Mak 11.15-18; Jon 2.13-16)*

45 Io, Jisas ixo laxa xö xönö möxö gunon lotu raxin ma ixo urulo ra batbat ösu ewe me idi nang toxo mimiisik kölöme.

<sup>46</sup> Ixo tengen te idi, “A tinenge re God nang toxo geet i tengen bira, ‘A gunon te e, ine irabo a gunon ne sineseng.’ Inexalik bere mum iat mum mo pet ine xarnang ‘a gunon ne minun möxö nangadi pinilo.’ ”

<sup>47</sup> Ma xöbo bungbung kirip ine ixobo eusu xö gunon ne lotu raxin. Inexalik abo pris tataxin, abo tene ausu möxöbo warkurai te Moses mabo tene sisila kaluluonin a nangadi toxo mamaa ra sesexomet ine.

<sup>48</sup> Ma lamun idi tekebeöt tua wewet te önga laa re ine, möxösa, a nangadi xirip toxo mamaa rua ölangen kirip abo tinenge re ine.

## 20

*Jisas ixo kip lo a lölös sine mole*

*(Matiu 21.23-27; Mak 11.27-33)*

<sup>1</sup> Önga bung nang e Jisas ixo usu a nangadi kölöme xö xönö raxin möxö gunon ne lotu raxin ma ixo etöngösen ma tinenge deek, abo pris tataxin mabo tene ausu möxöbo warkurai te Moses, arixe mabo sisila, toxo ot pösöt ine.

<sup>2</sup> Me idi toxo tengen te ine bira, “Örö tengen te mem, nöngön u kip lo ina ese raxin na mole nang nöngön u döxömen bere i töxödös se nöngön ta wewet inabo lalaa na? Me ewe i tabaa nöngön mina lölös na?”

<sup>3</sup> Me ine ixo balu ma ixo tengen, “E rabo ose e mum ma önga ineose bölök. Ma moro tengen te e,

<sup>4</sup> a baptais se Jon, ine meriso lömö re God, bara mera xö nangadi mon?”

<sup>5</sup> Idi toxo wöwörö min kaluluonin idi iat ma toxo tengen, “Nang bere ire te tengen bara, ‘Meriso re God,’ ine irabo ose ire bara, ‘Ma ruasa me mum koxobo nunu re ine?’

<sup>6</sup> Ma lamun nang bara ire te tengen bara, ‘Möxö nangadi mon,’ a nangadi xirip tabo teng ire ma warawat, möxösa, idi te nunu lölös bere Jon a önga propet.”

<sup>7</sup> Io, idi toxo balu, “Mem kobo ösöxö ina lölös na i wanot mole.”

<sup>8</sup> Me Jisas ixo tengen tö idi, “E bölök, e karabo tengen te mum ewe i isik ina lölös na re e ra wewet inabo lalaa na.”

*Abo tödi möxö balaure komo*

*(Matiu 21.33-46; Mak 12.1-12)*

<sup>9</sup> Me ine ixo urulo ra rengrengen ina tinenge öwuo na xö nangadi: “A tödi ixo sulo a komo wain, ma ixo isik ina komo wain urungan köbo duöng kua tinörön könan ma ixo wan lo bang kalik ma ixo kis ömat kö ina lagunon.

<sup>10</sup> Ma xö axana bung möxö dixidik a pasuno wain ine ixo tile a önga tene tinörön urso xöbo tene werwere muu wain

bara tabo tabaa ine ma rebo pasuno wain möxö komo. Ma lamun abo tene werwere muu wain toxo tödik ine ma toxo se ine ma toxo ugaran tewe öbaling ine ma kaim a xikip pe pasuno wain.

<sup>11</sup> Ine ixo tile öbaling önga tene tinörön, ma lamun toxo se bölök ine, ma toxo ömenge ine ma toxo ugaran puxus öbaling ine ma kaim a xikip pe pasuno wain.

<sup>12</sup> Io, ine ixo tile öbaling a öng sese önarun min, me idi toxo se ögarin ine ma toxo tewe ösu ine.

<sup>13</sup> "Io, a tamana komo wain ixo tengen, 'A lasa e rabo pet? E rabo tile a bak ke e nang e bo maaaa xöba lamun. Nagut idi tabo ii ine.'

<sup>14</sup> "Inexalik nang abo tene werwere muu a komo wain toxo pere ine, idi toxo wöwörö re idi iat. Me idi toxo tengen bara, 'Ina tödi niang i öt ta unan lo ina komo wain te tamana umelamu. Ire ta sexomet ine me ire tabo unan lo abo lalaa re tamana.'

<sup>15</sup> Io, idi toxo tewe ösu ine xalik a komo wain, ma toxo sexomet ine.

"Io, a tamana komo irabo perim a lasa urungan tö idi?"

<sup>16</sup> Ine irabo wanot ma irabo sexomet inabo tene werwere muu a komo wain ma irabo isik ina komo wain urungan kö nangadi xabise." Ma nang a nangadi toxo ölangen bira, idi toxo tengen, "Kaim tunon sik iat!"

<sup>17</sup> Jisas ixo pere dik idi ma ixo ose, "Nang bara mum mo döxömen bira, mum moro mana dödöm ulamun a unine ina tinenge möxö God toxo geet, i tengen bira:

*" 'A wat nang abo tene pet gunon toxo kumamaa lamun, möxösa, idi toxo döxömen bara a laa tataun, i wawara bara ine bölök a lölös möxö unine gunon kirip.'*

<sup>18</sup> Me ewe nang i subu xö ina wat na irabo tawörök lixilik, nexalik ine irabo pörök ke öng nang bara i subu lömö rine."

<sup>19</sup> Ma saxit mon abo tene ausu möxöbo warkurai te Moses mabo pris tataxin toxo wawara siwin te ngas sua rörön dik e Jisas, möxösa, idi toxoro ösöxö bere Jisas ixo wöwörö eöt me idi ma ina tinenge öwuo na. Ma lamun idi toxo burin a nangadi.

*A tatalien ne kun takis  
(Matiu 22.15-22; Mak 12.13-17)*

<sup>20</sup> Io, idi abo sisila toxo werwere muu e Jisas. Me idi toxo tile a dauleng ne tene winara suxume. Me idi toxo töxö bere idi a dauleng ne tene töxödös, rue idi ra uxun ine xöbo tinenge re ine ma bara tabo isik ine xö limine a sisila raxin mee Rom.

<sup>21</sup> Me idi abo tene winara suxume toxo ose ine bara, "Tene ausu, mem me ösöxö bara nöngön u bo wöwörö ma u bo eusu ma lalaa a lak töxödös, ma bara nöngön u kara ösöxö

ra tinuu arixe mere önga tödi xalik mon. Ma lamun nöngön u bo usu a nangadi ma turunon ulamun a ngas nang e God i mamaa bara ire tabo muu.

<sup>22</sup> I töxödös se ire bara tabo kun takis kö king taxin mee Rom bara kaim?"

<sup>23</sup> Inexalik e Jisas ixoro ösöxö xulen a tinenge atöxö re idi ma ixo tengen tö idi,

<sup>24</sup> "Mum moro osen e ma re tuluwok. Ma re we ina wawara na ma ese sa xönan?"

<sup>25</sup> Me idi toxo balu bere, "Re king taxin mee Rom."

Ma ixo tengen te idi, "Io, mum morobo isik ke king taxin a lasa nang ke king taxin. Ma a lasa nang ke God, mum morobo isik ke God iat."

<sup>26</sup> Me idi toxo kaim kö eöt ta uxun ine kölöme xö lasa nang ine ixo rengrengen kö wawara xö marakörö. Idi toxo kis malus, möxösa, idi toxo wuwus kö babalu re ine.

*Abo minet tabo to baling*

*(Matiu 22.23-33; Mak 12.18-27)*

<sup>27</sup> Dauleng ne Sadiusi niang tobo nunu bara kaim pe tinaru baling kalik a minet, toxo ot pösöt e Jisas ma toxo ose ine bara,

<sup>28</sup> "Tene ausu, Moses ixo geet tö ire bira, nang bara önga tödi, kaim ine mere barok ma i met kalik a une re ine, io, a tönö ina tödi irabo ot lamun ina möxösö ma irabo kip barok kö ina tönö.

<sup>29</sup> Io, a pitnö ma ninöng ne barön. A sisila ixo elolo a une ma ixo met ma kaim a barok.

<sup>30</sup> Ma a tönö mumuu lo ine

<sup>31</sup> ma sese önarun toxo ot lamun ina une, ma xö ina mangana ngas idi xirip a pitnö ma ninöng toxo met, ma kaim idi mere bung barok.

<sup>32</sup> Ma melamu im, a une bölök ixo met.

<sup>33</sup> Io, xö axana bung nang bara abo minet tabo taru baling, ine irabo a une re ewe runon? Möxö idi xirip ina pitnö ma ninöng toxo ot lamun ine."

<sup>34</sup> Jisas ixo balu idi, "A nangadi nang te to nixinen idi te elolo.

<sup>35</sup> Inexalik i karabo bie bira rö idi nang God ixoro pere kos lo idi bara tabo eöt ta nilaxa xö axana bung melamu ma xö tinaru baling kalik a minet. Idi tekarabo eöt ta inalolo.

<sup>36</sup> Ma takarabo met baling, möxö idi te xarnang abo angelo. Idi a bung baroxorok ke God, möxösa, idi te taru kaa baling kalik a minet.

<sup>37</sup> Ma lamun e Moses iat i osen bara abo minet tabo taru kaa baling. I kis kölöme xö pii möxö iaa, nang ine ibo rengrengen bere a Orong bara 'a God te Abaram, a God te Aisak ma bara a God te Jekop.'



38 Ine kaim bara a God möxö nangadi minet. Kaim! Inexalik ine a God möxö nangadi to, möxösa, xö winara re God idi xirip te to."

39 A dauleng ne tene ausu möxöbo warkurai te Moses toxo tengen te ine, "Tene ausu, a babalu deek ke nöngön."

40 Ma abo tödi xabise toxo buut tua ose öbaling ine merebo inausu bölök.

*A Mesaia ine a bak ke Dewit  
(Matiu 22.41-46; Mak 12.35-37)*

41 Me Jisas ixo tengen tö idi, "Bara bule tobo rengrengan bara ine a Mesaia a barok tubuno e Dewit?"

42 E Dewit iat i tengen ömaras kölöme xö Buk ne Sinö bara,

*"God a Orong ixo tengen kö Orong ke e bara:*

*"Nöngön örö kis kö lawa tuun te e*

43 *ot nang e rabo bulus ösu abo iuo re nöngön kö pu, xarnang a laa möxö bulus xexe."*

44 Dewit i tengen ine me 'Orong.' Io, bule nang bara ine a Mesaia ma irabo a tubuno Dewit bölök?"

45 Ma nang a nangadi xirip toxo ölöngö, Jisas ixo tengen köbo bak ne ausu re ine,

46 "Tumarang e mum kalik abo tene ausu möxöbo warkurai te Moses. Idi tobo maaaa rua önan nana ma boxönö man ömat ma tobo maaaa bara tabo xukuwange idi kölöme xö boxönö möxö mismisik, ma tobo werwere kos lo abo kinis deek kölöme xö gunon ne siniseng, ma tobo maaaa rua xikip lo a kinis deek kö axana bung möxö nien tataxin.

47 Idi tobo kip lo abo lalaa möxöbo möxösö ma tobo osesen mabo sineseng ömat te idi. E God irabo ömokorot köbanin inabo mangana nangadi na."

## 21

*A arabaa raxin kö maris ne une möxösö  
(Mak 12.41-44)*

1 Ma nang e Jisas ixo wawara, ixo pere abo duöng orong toxo bubulus abo tuluwok ke idi kölöme xö xönö möxö bubulus kö gunon lotu raxin.

2 Ine ixo pere bölök önga maris ne une möxösö ixo bulus ölaxa a nine peni re ine.

3 Jisas ixo tengen, "Turunon saxit, ina maris ne une möxösö na, iri bulus ölaxa a oleleng köba re idi xirip kabise.

4 Ina nangadi xirip na te isik abo arabaa re idi meringan kalik abo kinis ne orong ke idi, ma lamun ina une maris i bulus ölaxa xirip abo lasanene nang i öt kö kinis kirip pe ine."

*Abo auxilieng nang irabo osen a axana bung möxö xakawöm*

*(Matiu 24.1-35; Mak 13.1-37)*

<sup>5</sup> A dauleng ne bak ne ausu re ine toxo wówörö ulamun a gunon ne lotu raxin. Idi toxo tengen bara a mariris se ine ixo deek, möxösa, toxo ömar ma mangana wat deek ma abo arabaa idi toxo isik ke God. Inexalik Jisas ixo tengen,

<sup>6</sup> “Xarnang a lasa mum moro pere ra, a axana bung irabo wanot nang kaim pe önga wat irabo kis lömö xö önga wat kabise. Idi tabo öbeng ösu xirip.”

<sup>7</sup> Me idi toxo ose ine, “Tene ausu, lause inabo lalaa na tabo ot, ma sa irabo ot ta uxileng bara inabo lalaa na iri lörörö ra inot?”

<sup>8</sup> Jisas ixo balu idi bira, “Mum morobo balaure e mum kalik ke öng ibo töxö lo e mum. Möxö a oleleng tabo wanot ma tabo tengen bara idi te wanot kö esene e, ma bere, ‘E mon ina Mesaia,’ ma, ‘A axana bung iri lörörö.’ Ganim e mum pa mumuu idi.

<sup>9</sup> Ma nang bara mum morobo ölangen ulamun abo mangana inarse rataxin, io, mum bele bubuut. Abo lalaa na irabo araun ta nuanot. Ma lamun a xakawöm i karabo ot pasaxit mon.”

<sup>10</sup> Me ine ixo tengen tö idi, “Abo kantri tabo erese ma abo kantri. Mabo kingdom tabo erese mabo kingdom.

<sup>11</sup> Ma xöbo dauleng ne boxönö, abo gie raxin ma irilöng taxin mabo miniset tataxin tabo wanot pösöt idi. Mabo mangana auxilieng tataxin irabo wan su meriso xö watmaep pua ubuut a nangadi.

<sup>12</sup> “Inexalik bara mesila xö inabo lalaa xirip na, idi tabo töndik e mum ma tabo pet ögarin e mum. Idi tabo isik e mum pa tinuu xö warkurai xöbo gunon ne sineseng köbo Judeia ma tabo tile e mum köbo gunon ne aömokorot. Ma tabo lamus e mum pua tinuu mesilain abo king mabo duöng sisila rua gene e.

<sup>13</sup> Lamun ina na, mum morobo tenge maras se idi lamun a tinenge deek.

<sup>14</sup> Ma lamun mum moro dödöm deek bang bere mum mo korobo dödöm ne binuut bara mum morobo tuu wi bulengin abo aupuk ke idi,

<sup>15</sup> möxösa, e rabo tabaa e mum ma tinenge deek ma dinödöm nanase, ma kaim pe öng ke idi nang irabo puk e mum irabo eöt tua irewese bara ra puxus tewe ina tinenge e isik ke mum.

<sup>16</sup> Mabo tata ma nago, abo tönö e mum, abo marapun te mum, mabo ais se mum idi tabo isik e mum urungan kö

limine idi nang te maaaa rua pet ögarin e mum. A dauleng ke mum, idi tabo sexomet.

<sup>17</sup> A nangadi xirip tabo melentexin e mum, möxösa, xö eseke.

<sup>18</sup> Inexalik kaim pe önga axana bebene öxöm mum irabo tup.

<sup>19</sup> Ma nang bara mum morobo tuu lölös, mum morobo uruoxe a to.

<sup>20</sup> “Nang bere mum morobo pere a oleleng ne umri te elulure e Jerusalem, mum morobo ösöxö bara a axana bung möxö wewet ögarin ina lagunon iri löörö.

<sup>21</sup> Io, i deek bara a nangadi nang te xisixis Judeia xina axana bung, tabo ulo uruso xöbo maii. Me idi nang te kis kölöme Jerusalem tabo wan su. Me idi nang te xisixis kö boxönö löörö, idi tebele laxa xina lagunon taxin.

<sup>22</sup> Ina axana bung na ine a axana bung nang God irabo balu ma ömokorot tua öturunon abo tinenge re ine nang toxoro geet.

<sup>23</sup> Irabo laa ne maris köbo une nang te tienen, me idi nang te urus barok kö inabo bung na! A tiip taxin arixe irabo wanot kö ina öxöno lagunon ma a laie re ine irabo bulus öxaa xö ina nangadi.

<sup>24</sup> Ma tabo buso idi ma sele, ma tabo kip lo a dauleng kabise xarnang abo karabus urungan köbo kantri xirip. Ma nangadi nang kaim bara abo Judeia idi tabo pas ösu e Jerusalem ot kö axana bung nang e God iri pilak irabo kis eöt.

<sup>25</sup> “Ma abo auxilieng irabo ot kö xaken, a texe mabo tii. Ma ra xö pu xö öxöno lagunon, a nangadi tabo dödöm oleleng, ma tabo burin a börbörön ma tinawit möxö rasi.

<sup>26</sup> A nangadi tabo memet saxit ma binuut ulamun a lasa i orot pösöt idi ra xö öxöno lagunon. Ruasa, möxösa, abo lalaa lölös meriso xö mango irabo mamagi.

<sup>27</sup> Kö ina axana bung niang, idi tabo pere a *Barok kö Tödi irabo wanot kö kubu* arixe ma lölös ma a mariris taxin.

<sup>28</sup> Ma nang abo lalaa na irabo urulo ra inot, mum morobo tuu lömö ma morobo wawara kaa, möxösa, a ineöro re mum iri löörö rua nuanot.”

<sup>29</sup> Ma ixo tengen ina tinenge öwuo na re idi. Ma ixo tengen bira, “Mum moro pere ina uno fik mabo mangana uno iaa xirip.

<sup>30</sup> Ma nang mum mo pere abo labana te tawalas, mum morobo ösöxö bara a axana bung möxö xaken iri löörö rua inot.

<sup>31</sup> Xarnang iat mon, nang e mum mo pere inabo lalaa na te orot, mum morobo ösöxö bara a kingdom kö God iri löörö rua inot.

<sup>32</sup> “Turunon saxit, ina nangadi nang tabo pere inabo lalaa na, idi tekebeöt ta minet bang, ot nang abo lalaa na xirip irabo ot.

<sup>33</sup> A balana kubu ma öxöno lagunon irabo wan tup, nexalik bara a tininge re e, i kebeöt ta xakawöm.

<sup>34</sup> “Mum moro tumarang, xalik a magingin ne ininim baba ma a dinödöm köba ulamun abo mangana axanan möxö to irabo öriip e mum. Nang bere mum mo wewet bira, ina bung na irabo uxun öwuwus e mum,

<sup>35</sup> möxösa, irabo wanot pösöt idi xirip ewe nang tobo xisixis sa xö öxöno lagunon kirip.

<sup>36</sup> Mum morobo tumarang ma morobo seseseng sösöxö bara a lölös se mum irabo eöt tua rorop e mum pua ulo wes kirip abo lalaa nang irabo ot pösöt e mum. Ma morobo seseseng sösöxö bölök bara mum morobo eöt ta balamasa xö wawara xö Barok kö Tödi.”

<sup>37</sup> Ma xöbo bungbung kirip Jisas ixobo eusu ringan kö gunon ne lotu raxin. Ma xöbo aien kirip, ine ixobo önan tua minaru ringan kö maii tobo rengrengen ine me Maii Olip.

<sup>38</sup> Ma xöbo puxu xirip a marakörö oleleng toxobo önan ot urungan kö gunon ne lotu raxin tua ölangen ine.

## 22

*Judas ixo aut tua isik tewe e Jisas*

*(Matiu 26.2-5; Mak 14.1-2, 10-11)*

<sup>1</sup> Io, a bung taxin möxö Enen a Beret Kaim a Is Könan, tobo rengrengen ine ma Luxa ne Nuan Lexe, ixo lörorö ra nuanot.

<sup>2</sup> Mabo pris tataxin mabo tene ausu möxöbo warkurai te Moses, idi toxo wawara siwin te ngas sua sesexomet e Jisas, möxösa, idi toxo buburin a nangadi.

<sup>3</sup> Io, Satan ixo tup pe Judas nang tobo tengen ine me Iskariot, me ine a öng möxö ina sangaun ma ninöng.

<sup>4</sup> Me Judas ixo wan pösöt abo pris tataxin mabo sisila möxöbo köbat möxö gunon ne lotu raxin. Me idi toxo etöngösen arixe bere Judas irabo isik tewe e Jisas bara bule.

<sup>5</sup> Idi toxo axanan köba ma toxo sixaut tua ratabaa ine ma tuluwok.

<sup>6</sup> Io, Judas ixo sixaut bölök ma ixo urulo ra winara siwin te mangana ngas mamaran tua isik e Jisas kö limine idi nang kaim pe marakörö ra ösöxö.

*Toxo tagure a Nien ne Nuan Lexe*

*(Matiu 26.17-19; Mak 14.12-16)*

<sup>7</sup> Io, a bung möxö Luxa möxö Beret Kaim a Is Könan ixo wanot. Ma ina bung abo Judeia toxobo sesexomet bölök

abo bak kö sipsip rue idi ra enen tua dödöxömen lo a bung möxö Luxa ne Nuan Lexe.

<sup>8</sup> Jisas ixo tile e Pita me Jon ma ixo tengen, “Moro wan ma moro tagure a nien ne Nuan Lexe rue ire rua enen.”

<sup>9</sup> Me idu toxo ose ine, “U maaaa bere maa marabo tagure ine ule?”

<sup>10</sup> Ine ixo balu, “Ma nang bere mu me laxa xö lagunon taxin, a tödi i xikip nanin a bile ari irabo esuo me mu ringan. Mu morobo muu ölaxa ine xö gunon nang bara i laxa xönan.

<sup>11</sup> Me mu morobo tengen kö tamana gunon, “Tene ausu i ose bara, “Ule a ngasieke nang e mabo bak ne ausu re e, mem marabo en ina nien ne Nuan Lexe xönan?” ’

<sup>12</sup> Me ine irabo osen e mu ma önga xönö raxin niso lömö xö gunon nang toxoro tagure bulus. Mu morobo tagure a nien könan.”

<sup>13</sup> Io, idu toxo wan lo me idu toxo pere xirip lo inabo lalaa nang e Jisas ixo tengen te idu. Me idu toxo tagure a nien möxö Luxa ne Nuan Lexe.

*A minet te Jisas i öturunon a kunubus maxat  
(Matiu 26.26-30; Mak 14.22-26; 1 Korin 11.23-25)*

<sup>14</sup> Ma nang a axana bung möxö nien ixo wanot, Jisas mabo aposol idi toxo kis arixe xö öra.

<sup>15</sup> Me Jisas ixo tengen te idi, “E maaaa bere e rabo en ina nien möxö Nuan Lexe arixe me mum melamu nang e rabo kip a kinadik.

<sup>16</sup> Io, e tengen te mum, e karabo en öbaling ina nien na ot nang a unine ina nien irabo wanot turunon kö kingdom kö God.”

<sup>17</sup> Io, Jisas ixo kip lo a kap wain ma ixo tengen deek kö God ulamunon, ma ixo tengen, “Mum moro kip lo ina na ma morobo erimine elin e mum min.

<sup>18</sup> Möxö e tengen te mum, e karabo inim öbaling ina wain na ot nang a kingdom kö God irabo wanot.”

<sup>19</sup> Ma ixo kip lo a beret ma ixo tengen deek kö God, io, ixo pidik, ma ixo tabaa nanin idi min ma ixo tengen, “Ina na a aike nang e isik kua gene mum. Mum moro en tua dödöxömen e.”

<sup>20</sup> Xina mangana ngas mon, melamu xö nien ine ixo kip lo a kap wain ma ixo tengen, “Ina kap wain na ine a xuxubus maxat kö dee re e nang irabo su rua gene mum.

<sup>21</sup> Ma lamun mum moro pere, a limine ina öng nang irabo isik tewe e, ine ia xö öra möxö nien arixe me e.

<sup>22</sup> A Barok kö Tödi irabo wan urungan kö minet xarnang kö kunubus se God. Ma lamun, maris belek kö tödi nang irabo isik ine xö limine a nangadi.”

23 Mabo bak ne ausu re ine toxo urulo ra aose baling iat kaluluonin idi bara ewenene iat im pe idi irabo pet bira.

*A öng i taxin saxit i eöt ma öng nang i xö pu*  
(*Matiu 20.25-28; Mak 10.42-45*)

24 Io, a inangat ixo taru kaluluonin idi bara ewenene re idi i taxin.

25 Jisas ixo tengen tö idi, "Ewe me idi niang kaim bara abo Judeia, abo king ke idi tobo ii öraxin idi iat ma tobo pere ösu abo nangadi xabise. Ma ewe me idi nang tobo kure xöbanin idi, tobo rengrengen öbaling idi bara abo tene rorop kö nangadi.

26 Inexalik mum bele wewet biringan. I deek bara ewe a öng i taxin saxit sik ke mum, irabo eöt ma öng nang i xö pu, ma bara öng nang i kure e mum, irabo eöt ma öng nang i tultul.

27 Me ewe re idu i taxin? A öng nang i kis kö öra möxö nien bara a öng nang i tultul? Turunon saxit, nangang i kisisik kö öra. Inexalik e ia kaluluonin e mum, e xarnang a önga tultul te mum.

28 Mum iat moxo tuu arixe me e, me mum moxo kaim kö nuan lie e nang abo tiip ixo wanot pösöt e.

29 Ma xarnang mon a Tata re e ixoro isik a kinis ne kingdom pe e, e bölök e rabo isik a kinis ne kingdom pe mum.

30 Io, mum morobo an me mum morobo inim arixe me e xö öra möxö nien kö kingdom pe e. Me mum morobo kis köbo kinis taxin tua kure a sangaun ma ninöng ne marapun mee Israel.

*Jisas ixo tengen bara Pita irabo öös sine*  
(*Matiu 26.33-35; Mak 14.29-31; Jon 13.37-38*)

31 "Saimon, Saimon, God iri öbala e Satan bara irabo könönöin e mum, tua palang elixilixin abo dedeek mabo sasaban xarnang a öng irabo same a wit tua xikip tewe abo lewene xalik a irine.

32 Ma lamun e re seseng lamun nöngön, bara a nunu re nöngön i karabo subu. Ma nang bara u dödöm puxus, örobo mana ölölös abo töm."

33 Inexalik e Pita ixo tengen, "Orong, e re tagur bara arabo wan arixe me nöngön urungan kö ömokorot ma a minet."

34 Jisas ixo tengen, "E tengen te nöngön, Pita, nixinen nang a xixök i koxobola tenge bang, örobo narun ne öös bara u koxobo ösöxö e."

*A unine bara abo bak ne ausu tabo kip a tiip*

35 Me Jisas ixo ose idi, "Nang e xo tile e mum kö inuan te mum ma kaim a rat, bara re tuluwok ma bara re sandel, mum moxo sasaxan lamun te laa?"

Idi toxo balu, “Kawaim.”

<sup>36</sup> Ine ixo tengen tö idi, “Ma lamun na, nang bere mum ma tuluwok, moro kip, ma moro kip abo rat te mum. Ma nang bara kaim e mum ma sele möxö inarese, io, mum moro misik mabo saket te mum ma morobo kun te öng.

<sup>37</sup> E tengen biringanin te mum, möxö abo tinenge re God toxo geet ulamun e, i tengen bira, ‘*Me idi toxo kos arixin ine mabo duöng saban.*’ Me ina tinenge na irabo wanot turunon, möxösa, abo lalaa toxo geet ulamun e iri önan ot turunon.”

<sup>38</sup> Mabo bak ne ausu toxo tengen, “Orong, örö pere, a nine sele möxö inarese ia.”

Me Jisas ixo balu idi ma ixo tengen, “Iri eöt.”

*Jisas suso xö Maii Olip*

*(Matiu 26.36-46; Mak 14.32-42)*

<sup>39</sup> Io, Jisas ixo wan su ma ixo wan urungan kö Maii Olip, xarnang ine ixobo wewet bie, mabo bak ne ausu re ine toxo muu ine.

<sup>40</sup> Ma nang idi toxo ot kina xönö, ine ixo tengen te idi bara, “Mum morobo seseng bara mum korobo subu nang bara a ölelewen irabo ot pösöt e mum.”

<sup>41</sup> Io, ine ixo wan talu idi a ömat aulik, eöt ma tinarang möxö wat a önga tödi i pet. Ixo subun kexe ma ixo seseng bira,

<sup>42</sup> “Mama, nang bara u mamaa, e mamaa bara örobo irewe ina tiip na xalik e, ma lamun u bele muu a mamaa re e. Kaim. Örobo muu eörin a mamaa re nöngön iat.”

<sup>43</sup> Ma önga angelo meriso lömö xö watmaep ixo ot pösöt ine ma ixo ölölös ine.

<sup>44</sup> Me Jisas ixo örasen a tiip taxin, ma ixo seseng lölös ma malawang ke ine ixo tibin xarnang a dee i susubu su xö pu.

<sup>45</sup> Nang ine ixo taru xalik a siniseng ma ixo wan baling urungan köbo bak ne ausu re ine, ixo parasiwin idi ma toxo paliso, möxösa, idi toxo tapunuk.

<sup>46</sup> Ine ixo ose idi, “Mum mo wapaliso rösa? Mum moro taru ma moro seseng lamun mum mo korobo subu nang bara re ölelewen i ot pösöt e mum.”

*Judas ixo isik tewe e Jisas*

*(Matiu 26.47-56; Mak 14.43-50; Jon 18.3-11)*

<sup>47</sup> Ma nang e Jisas angen ixo rengrenge, a marakörö toxo ot, ma tödi ewe nang tobo rengrenge ine me Judas, a öng möxö ina sangaun ma ninöng ne bak ne ausu, ixo silien idi. Ine ixo wan pösöt e Jisas sua mumuum ine.

<sup>48</sup> Ma lamun Jisas ixo ose ine, “Judas, nöngön u isik a Barok kö Tödi xö limine abo iuo arixe mina mumuum na?”

49 Nang abo bak ne ausu re Jisas toxo pere a lasa ixo eka inot, idi toxo tengen, "Orong, i öt bere mem marabo erese mabo sele re mem?"

50 Ma a öng mere idi ixo tee xöröp tewe a talinge tuun möxö tene tinörön kö pris taxin.

51 Ma lamun Jisas ixo tengen, "Iri eöt ina na!" Ma ixo sigi a talingine ina tödi ma ixo ölanglanga ine.

52 Io, Jisas ixo tengen köbo pris tataxin, mabo umri möxöbo köbat möxö gunon ne lotu raxin, mabo sisila nang toxo ot tua rörödik ine bara, "Mum mo ot mabo sele mabo amu rua önawan e, xarnang arixe bere e a tödi baba?"

53 Ma xöbo bungbung kirip e xobo xisixis arixe me mum kölöme xö xönö möxö gunon ne lotu raxin, me mum kaim kö mamaa rua rörön dik e. Ma lamun ina na a axana bung bara God iri öbala a lölös möxö ködö rua sisilien e mum rua wewet a tinörön te mum."

*Pita ixo öös tewe e Jisas*

*(Matiu 26.69-75; Mak 14.66-72; Jon 16.18, 25-27)*

54 Io, idi toxo töndik ine, me idi toxo silien tewe ine ma toxo kip lo ine urungan kölöme xö gunon möxö pris taxin. Me Pita ixo mumuu nana, ma lamun ixo ömat aulik kalik idi.

55 Ma nang idi toxoro usumot a ia sösöt kölöme xö xönö möxö gunon ma toxo kis kö pu arixe, Pita ixo kis kö pu arixe midi.

56 A önga une tultul ixo pere ine xö bibio ne ia sösöt ixo kisisik. Ixo pere dik ine ma ixo tengen, "Ina tödi na ixo arixe me Jisas."

57 Ma lamun e Pita ixo öös ma ixo tengen, "Une, e koxobo ösöxö ine."

58 A aulik melamu a öng kabise belek ixo pere ine ma ixo tengen, "Nöngön bölök a öng mere idi."

Me Pita ixo balu, "Tödi, e kaim!"

59 Io, a axana bung melamu a öng kabise belek ixo wöwörö lölös, "Turunon saxit, ina tödi na ixo arixe me Jisas, möxösa, ine mee Galili."

60 Pita ixo balu, "Tödi, e kobo ösöxö a lasa nöngön u wöwörö ulamun!" Ma nang mon ine ixo wöwörö, a xixök ixo tenge.

61 A Orong ixo tawuxus ma ixo pere dik e Pita. Io, Pita ixo döxömen lo a tingenge niang a Orong ixo tengen te ine bara, "Nixinen nang a xixök i kobola tenge bang, nöngön örobo öös tewe e xö narun ne axan."

62 Me Pita ixo wan su ma ixo gee saban arixe.

*Abo kansel toxo kure e Jisas*

*(Matiu 26.63-68; Mak 14.61-65; Jon 18.19-23)*



<sup>63</sup> A nangadi ewe nang toxo werwere muu e Jisas, toxo urulo a aösaxit saban ma toxo dangdangat ine.

<sup>64</sup> Idi toxo kut pi a marna ma toxo ose ine, “Örö tengen te tinenge propet im na. Ewe i tut nöngön?”

<sup>65</sup> Me idi toxo tengen a oleleng ne tinenge saban kabise rö ine.

<sup>66</sup> Xö puxu bubung a kansel möxöbo sisila möxö nangadi, mabo pris tataxin arixe mabo tene ausu möxöbo warkurai te Moses, toxo kis arixe. Ma toxo silien e Jisas urungan kö wawara re idi.

<sup>67</sup> Me idi toxo tengen, “Örö tengen te mem nang bara nöngön a Mesaia bara kaim.”

Me Jisas ixo tengen tö idi, “Nang bara e tengen te mum, mum mo korobo nunu re e,

<sup>68</sup> ma nang bere e ose e mum, mum mo korobo balu e.

<sup>69</sup> Ma lamun urulo nixinen ma melamu, *a Barok kö Tödi irabo kis kö kinis taxin tingan kö lime tuun te God* nang a lak lölös ine.”

<sup>70</sup> Idi xirip toxo ose, “Me nöngön a Barok kö God?”

Me ine ixo balu, “Mum mo töxödös nang mum mo tengen biringan tö e.”

<sup>71</sup> Io, idi toxo tengen, “Ire tebele ose öbaling kebo tinenge maras lamun ina tödi na. Ire tere ölangen ina tinenge xalik a ngalana ine iat.”

## 23

*Toxo isik e Jisas urungan te Pailat*

*(Matiu 27.11-14; Mak 15.2-5; Jon 18.29-37)*

<sup>1</sup> Io, idi xirip abo sisila nang toxo kis etok toxo taru kaa ma toxo silien tewe e Jisas urungan mesila re Pailat.

<sup>2</sup> Me idi toxo urulo ra wupuk ine ma toxo rengrengen, “Mem mere parasiwin ina tödi nang ibo sisilien ölelebes a nangadi re mem abo Judeia. Me ibo wanwanak e mem bere mem bele kun takis urungan kö king mee Rom, ma ibo rengrengen bara ine iat a Mesaia, a king.”

<sup>3</sup> Io, Pailat ixo ose e Jisas, “Nöngön a king möxöbo Judeia?”

Jisas ixo balu ine bara, “Ine mon xarnang u tengen.”

<sup>4</sup> Io, Pailat ixo tengen köbo pris tataxin ma xö marakörö, “E kobo parasiwin te unine saban ulamun ina tödi na.”

<sup>5</sup> Ma lamun idi toxo wöwörö lölös iat, “Ine ibo öraru a balana nangadi mee Judeia ma inausu re ine, urulo ro Galili ma ixo wan esexere ura.”

*Pailat ixo tile rewe e Jisas urungan te Erot*

<sup>6</sup> Ma nang e Pailat ixo ölangen ina na, ixo ose bara ine mee Galili bara kaim.

<sup>7</sup> Ma nang e Pailat ixo ösöxö bere Jisas ine möxö xönö nang e Erot ibo kure sik, ine ixo tile e Jisas urungan te Erot, möxösa, e Erot bölök nangen nang Jerusalem kö ina bung.

<sup>8</sup> E Erot ixo axanan saban arixe nang ixo pere e Jisas, möxösa, ixoro ölangen abo winörö ulamun ine ma ixo baa xixiset bang iat tua werwere ine. Ma ixo mamaa rua werwere abo lalaa lölös ne auwuwus nang irabo pet.

<sup>9</sup> Ine ixo ose e Jisas ma oleleng ne ineose, nexalik Jisas kaim kö babalu ine.

<sup>10</sup> Abo pris tataxin mabo tene ausu möxöbo warkurai te Moses, toxo tuu sik kingan ma toxo wewet abo tinenge lölös sua wupuk e Jisas.

<sup>11</sup> Io, Erot mabo duöng möxö inarse re ine, toxo uli ine ma toxo eösaxit saban te ine. Ma toxo ölaulawa ine ma man deek xarnang möxö king, ma toxo tile wuxus ine urungan te Pailat.

<sup>12</sup> Mesila Erot me Pailat toxobo eöngat, ma xö ina bung idu toxo ais im.

*Pailat ixo kure e Jisas*

*(Matiu 27.15-26; Mak 15.6-15; Jon 18.39—19.16)*

<sup>13</sup> Pailat ixo kuwe etok abo pris tataxin, abo tene sisila ma a nangadi,

<sup>14</sup> ma ixo tengen tö idi, “Mum moxo lamus ot ina tödi na ura rö e, xarnang a öng bara i silien ögarin a nangadi. E xo ose ine xö wawara re mum ma kaim a parasiwin te unine sasaban kö ina tödi nang mum mo puk ine.

<sup>15</sup> Me Erot bölök kaim a parasiwin te unine sasaban lamun ine ma ixo tile öbaling ine ura re ire. Xarnang mum mo öt ta werwere, ine i koxobo pet te laa nang irabo met kelen.

<sup>16</sup> Io niang, e rabo ömokorot ine ma arabo palas tewe ine.”\*

<sup>18</sup> A marakörö toxo kup taxin bara, “Sexomet ine! Ma moro palas sik e Barabas ura re mem!”

<sup>19</sup> (Me Barabas, toxo bulus öläxa ine xö gunon ne aömokorot, möxö ine ixo öraru a inarese arixe ma gapman ma ixo erese ömet bölök.)

<sup>20</sup> Pailat ixo mamaa rua uguran tewe e Jisas, io, ixo tengen öbaling kö marakörö.

<sup>21</sup> Ma lamun idi toxo xukup iat bara, “Tut ine xö sölöxöröp! Tut ine xö sölöxöröp!”

\* **23:16** A dauleng ne ginigeet me lorexe toxo bulus öläxa rina **36** i tengen bira: *Io, xö Luxa ne Nuan Lexe, Pailat ixobo mana walwalas ösu a önga tödi xalik a gunon ne aömokorot urungan te idi.*

22 Sese önarun min, ine ixo tengen tö idi, “Ruasa? A mangana sasaban sa ina tödi na ixo pet? E parasiwin kölöme re ine kaim pe laa i saban eöt bara irabo met kelen. Io niang, e rabo ömokorot ine ma melamu arabu palas tewe ine.”

23 Inexalik idi toxo xukup lölös bara tabo mana tut e Jisas kö sölöxöröp, io, abo kinup pe idi ixo örarik e Pailat bara irabo sixaut.

24 Io, Pailat ixo kure e Jisas xarnang idi toxo maaaa.

25 Ine ixo palas tewe a tödi ewe nang toxo tewe öläxa xö gunon ne aömokorot, ine nang ixo öraru a inarese raxin ma inarese ömet kö gapman, a öng nang idi toxo seng lo ine. Me Pailat ixo isik e Jisas urungan köbo duöng inarese xarnang kö maaaa xö nangadi.

*Toxo tut e Jisas kö sölöxöröp*

*(Matiu 27.33-44; Mak 15.22-32; Jon 19.17-24)*

26 Io, nang idi toxo silien tewe e Jisas, idi toxo töndik e Saimon mee Sairin, ewe nang ixo önan kö nuan te ine, ma toxo bulus a sölöxöröp lömö rine ma toxo ölölös lo ine rua xikip ma ra muumuu e Jisas.

27 A marakörö raxin toxo muu ine, kaluluonin idi a dauleng ne balixilik ewe toxo tapunuk ma toxo gegee nana rö ine.

28 Jisas ixo tawuxus ma ixo tengen tö idi, “Balixilik mee Jerusalem, mum bele gegee rö e. Mum moro gegee rö mum iat ma bung baroxorok ke mum,

29 möxösa, axana bung möxö kinadik irabo ot pösöt e mum nang mum morobo tengen, ‘A bung une tuu ewe nang tekara kip barok ma tekara eurus, irabo deek kö idi.’

30 Io,

“ ‘idi tabo tengen köbo maii, “Moro subu kaa re mem!”

ma tabo tengen köbo kalala, “Moro kait pi e mem!” ’

31 Ma nang bara idi te pet ina mangana tatalien na xö iaa i to sik, io, idi tabo pet a lasa nang a iaa iri manga?”

32 A nine tödi xabise bölök, idu a nine tödi saban, idu bölök toxo silien ösu idu ra minet arixe me Jisas.

33 Ma nang idi toxo wanot kö xönö tobo rengrengen me Siine Öxöno Tödi, ringan idi toxo tut ine xö sölöxöröp arixe ma nine tödi saban, a öng kö lime tuun ma öng kö lime kes.

34 Me Jisas ixo tengen, “Mama, döxömen taun a magingin saban te idi, möxö idi tokoxobo ösöxö a lasa nang idi te wewet.” Me idi toxo egulös satu rua erimine abo man te ine re idi iat.

35 A nangadi toxo tuu ngökngök sik, mabo tene pet warkurai toxo eösaxit tine. Idi toxo tengen, “Ine i rorop

a nangadi xabise. Ma nang bara ine a Mesaia re God nang God ixoro pere kos, ganim ine irabo öro öbaling ine iat."

<sup>36</sup> Abo duöng inarese bölök toxo wanot ma toxo eösaxit me ine. Idi toxo tabaa ine ma wain manun.

<sup>37</sup> Ma toxo tengen, "Nang bara nöngön a king möxöbo Judeia, na im öro top öbaling nöngön iat."

<sup>38</sup> Ma toxo geet a xönö tinenge ma toxo bulus lömö xö sölöxöröp. Ma i tengen bira, "Ina tödi na ine a king möxöbo Judeia."

<sup>39</sup> Öng möxö ina nine tödi saban ewe nang ixo tabaleleng sik kingan, ixo eösaxit te Jisas bira, "Nöngön a Mesaia, goo? Göm, örobo öro nöngön iat arixe me maa!"

<sup>40</sup> Ma lamun a öng kabise ixo tenge köö ine bira, "Nöngön u kobo buburin e God? Nöngön bölök u kip sik ina mangana ömokorot nang ine i kip sik.

<sup>41</sup> Idi te se iraa eöt mabo lasa nang iraa tobo wewet, nexalik ina tödi na i koxobo pet te laa nang i saban."

<sup>42</sup> Io, ine ixo tengen, "Jisas, örobo döxömen lo e xö axana bung nang örobo wan laxa xö kinis ne kingdom pe nöngön."

<sup>43</sup> Me Jisas ixo balu ine, "Turunon saxit, nixinen nöngön örobo kis arixe me e ruso xö xönö i deek saxit."

*Jisas ixo met*

*(Matiu 27.45-56; Mak 15.33-41)*

<sup>44</sup> Ma ixo lörörö ra luono xaken, ma a ködö ixo wanot ma ixo tawi xirip ina öxöno lagunon ot kö narun ne axana bung kö aien,

<sup>45</sup> möxösa, a xaken ixo mun. Ma a xönö man taxin meringan kölöme xö gunon ne lotu raxin ixo tamadidi ninöng ne xönö.

<sup>46</sup> Jisas ixo kup wösö raxin bira, "Mama, e isik a tanono e xö tabalana limem." Ma nang ine ixo tengen sik bira, ixo met.

<sup>47</sup> A umri raxin möxöbo duöng inarese ixo pere a lasa ixo wanot, ma ixo ölet e God ma ixo tengen, "Turunon saxit, ina tödi na a tene töxödös."

<sup>48</sup> A nangadi xirip ewe nang toxo ot etok ka werwere ina laa, idi toxo pere a lasa ixo ot ma toxo tapunuk ma toxo wasa abo böngböngöno idi ma toxo wan tewe.

<sup>49</sup> Ma lamun ewe idi xirip nang toxo ösöxö ine, idi toxo tuu sik kö palaa ma toxo werwere inabo lalaa na. Ma kaluluonin idi a balixilik nang toxo muu lo ine mee Galili.

*Toxo bulus e Jisas kö maöt*

*(Matiu 27.57-61; Mak 15.42-47; Jon 19.38-42)*

<sup>50-51</sup> A önga tödi a esene e Josep, ine a öng möxöbo kansel, me ine mee Arimatia xö xönö Judeia. Ine a tödi deek ma a

tene töxödös, ewe nang kaim ine xo sixaut kö dinödöm ma tatalien te idi. Me ine ixo xixiset ma kingdom kö God.

<sup>52</sup> Ine ixo wan pösöt e Pailat, ma ixo seng lo a minet te Jisas.

<sup>53</sup> Io, ine ixo kip ösu, ma ixo kait pi ma man pidien, ma ixo bulus ölaxa ine xö lieng niang toxoro tee, a öng nang kaim bang ka ömarin te tödi xönan.

<sup>54</sup> Ma ina bung, a bung möxö tagur bulus sua Sabat. Ma a bung Sabat ixoro lörörö ra inot.

<sup>55</sup> A balixilik nang toxo muu e Jisas mee Galili, idi toxo wan arixe me Josep ma toxo pere a lieng ne minet. Ma toxo pere bölök nang toxo ömarin bulengin e Jisas kölöme xönan.

<sup>56</sup> Io, idi toxo wan baling urungan lagunon ma toxo tagure bulus abo mangana aururup nang a lak sixine deek. Inexalik idi toxo mamas kö bung Sabat xarnang a warkurai i tengen.

## 24

*Jisas ixo taru kaa xalik a minet*

*(Matiu 28.1-8; Mak 16.1-8; Jon 20.1-8)*

<sup>1</sup> Xö Sade xö puxu bubung, abo une toxo kip abo mangana aururup deek nang idiet toxoro tagure, me idiet toxo wan urungan kö lieng möxöbo minet.

<sup>2</sup> Me idiet toxo parasiwin bara toxoro ubun tewe a wat kalik a marana lieng,

<sup>3</sup> ma lamun nang idiet toxo wan laxa, idiet kaim kö werwere a aine e Jisas, a Orong.

<sup>4</sup> Ma nang idiet toxo dödödöm ulamun ina na, saxit iat mon a nine tödi toxo tuu xö lawana idiet mabo man te idu ixo sisiek xarnang a siek.

<sup>5</sup> Inabo une toxo buut ma toxo ii ötun a wawara re idiet uri xö pu, ma lamun a nine tödi toxo tengen tö idiet, "Rösa muot mo wawara siwin kaluluonin abo minet lamun a tödi nang i to sik?"

<sup>6</sup> Kaim ine ra. Ine iri taru baling kalik a minet! Muot moro dökömen lo a tinenge ine ixo tengen te mum nang ine ixo kis arixe bang me mum pingan Galili bira,

<sup>7</sup> 'A Barok kö Tödi, tabo mana isik ine xöbo limine a nangadi saban, ma tabo tut ine xö sölöxöröp ma xö bung sese önarun min ine irabo taru kaa baling.' "

<sup>8</sup> Io, idiet toxo dökömen lo abo tinenge re ine.

<sup>9</sup> Ma nang idiet toxo tawuxus baling meringan kalik ina lieng, idiet toxo tengen abo lalaa xirip urungan kö sangaun ma öng ne bak ne ausu ma urungan bölök köbo dauleng kabise xirip.

<sup>10</sup> E Maria Makdala, Joana, me Maria a nago re Jems ma dauleng ne balixilik kabise bölök ewe nang toxo tōngösen abo aposol minabo tinenge na.

<sup>11</sup> Inexalik kaim idi xo nunu xöbo balixilik, möxösa, abo tinenge re idiet ixo xarnang a laa tataun tö idi.

<sup>12</sup> Ma lamun e Pita ixo sile taru ma ixo ulo urungan kö lieng. Ine ixo tunsu, ma ixo pere abo xönö man kalik mon tingan kö pu. Io, ine ixo wan lo ma ixo dödödöm iat te ine ulamun a lasa ixo ot.

*Jisas ixo ot wösö xö nine tödi xö ngas u Emaus*

<sup>13</sup> Xö ina bung mon, a ninöng mere idi, idu toxo önan lamun a lagunon tobo rengrengen ine me Emaus, i eöt ma sangaun ma öng ne kilomita meringan Jerusalem.

<sup>14</sup> Me idu toxo etöngösen nana re idu ulamun abo lalaa xirip nang ixoro wanot.

<sup>15</sup> Ma nang idu toxo etöngösen nana re idu minabo lalaa na, Jisas iat ixo wanot pösöt idu ma ixo wan arixe me idu.

<sup>16</sup> Inexalik God ixo eng pi abo marana idu ra werwere xulen ine.

<sup>17</sup> Me ine ixo ose idu, “Mu mo etöngösen ma a lasa nang mu mo önan nana?”

Io, idu toxo tuu ödödö, mabo mamaran te idu ixo wawara maris.

<sup>18</sup> A öng mere idu, e Kiliopas, ixo ose ine bira, “Nöngön mon a önga ose ringan Jerusalem nang u koxobo ösöxö abo lasa nang iri ot tingan kö inabo bung na?”

<sup>19</sup> Me ine ixo ose bara, “Mabo lasa?”

Io, idu toxo balu bara, “Abo lalaa ulamun e Jisas mee Nasaret. Ina tödi na a propet ine. Abo tinenge re ine mabo tinörön te ine a lak lölös kö wawara xö God ma xö nangadi xirip bölök.

<sup>20</sup> Abo pris tataxin mabo tene pet warkurai te ire toxo isik tewe e Jisas bara irabo tuu xö warkurai ma bara irabo met. Me idi toxo tut ine xö söloxöröp.

<sup>21</sup> Ma lamun mem moxo nunu sik bara ine a öng ewe nang irabo ölanglanga e Israel. Ma önga laa bölök, a narun ne bung iri saxit nang toxo tut ine xö söloxöröp.

<sup>22</sup> A dauleng ne balixilik bölök mere mem te öwuwus e mem. Idi te wan urungan kö lieng möxöbo minet kö puxu bubung.

<sup>23</sup> Inexalik idi tokobo pere a aine. Me idi te wanot ma te tengen te mem bara idi te pere a nine angelo, me idu te tengen bara ine iri to baling.

<sup>24</sup> Io, a dauleng ne ais se mem toxo wan urungan kö lieng ma toxo pere xarnang mon abo balixilik toxoro tengen, ma lamun ine, kaim idi xo werwere ine.”

25 Me Jisas ixo tengen tö idu, “Bara bule me mu koxobo maras me mum mo alilis sua nunu xöbo tinenge propet nang toxoro tengen?”

26 Turunon saxit, a Mesaia irabo mana kip iat ina kinadik, ma melamu irabo laxa xö mariris se ine.”

27 Me Jisas ixo tengen ömaras se idu ulamun abo lalaa nang i kis kölöme xöbo ginigeet kirip pe God lamun ine iat, urulo re Moses arixe mabo tinenge xöbo propet kirip.

28 Ma nang idiet toxo orot lörörö xö lagunon nang idu toxo maaaa rua nuan uxe, Jisas i pet ine xarnang bara ixo maaaa rua nuan esexere.

29 Ma lamun idu toxo seng ölölös ine, me idu toxo tengen, “Örö kis arixe me maa, möxö iri aien im ma a ködö iri lörörö ra inot.” Io, ine ixo wan laxa rua kinis arixe me idu.

30 Ma nang ixo kisisik kö öra möxö nien arixe me idu, ixo kip lo a beret ma ixo tengen deek ulamun ma ixo pidik ma ixo tabaa idu min.

31 Io, abo dinödöm pe idu ixo wanot maras me idu toxo perexulen ine. Me Jisas ixo kawöm tataun mon kalik idu.

32 Me idu toxo wöwörö iat te idu bara, “Turunon saxit, a balana iraa i kos nang ine i etöngösen nana me iraa xö ngas ma nang i palas abo unine tinenge möxöbo ginigeet te God te iraa.”

33 Saxit iat mon, idu toxo taru ma toxo baling iat mon urungan Jerusalem. Idu toxo ot pösöt a sangaun ma öng ne bak ne ausu ma dauleng kabise bölök arixe me idi. Me idi toxo kis etok arixe.

34 Ma toxo rengrenen, “Turunon saxit. A Orong iri taru kaa baling ma iri wösö re Saimon.”

35 Io, idu toxo etöngösen ma lasa nang ixo wanot kö ngas, ma bara bule nang idu toxo perexulen e Jisas nang ine ixo pidik a beret.

### *Jisas ixo ot wösö xöbo bak ne ausu*

36 Ma nang idi angen toxo etöngösen mina na, e Jisas iat ixo tuu kaluluonin idi ma ixo tengen tö idi, “A malum irabo kis arixe me mum.”

37 Me idi toxo wuwus ma toxo buut. Idi toxo dödödöm bere idi te pere a tano.

38 Me ine ixo tengen tö idi, “Mum mo wuwus sö sa me mum mo dödöm ninöng kö sa?”

39 Moro pere abo limine e arixe mabo xexene e. E, e iat mon! Moro sigi e ma moro pere, a tano kaim ine ma lewene aine ma sii xarnang na mum mo pere e min.”

40 Ma nang ine ixoro tengen ina na, ixo osen idi mabo limine mabo xexene.

41 Ma kaim iat idi xö nunu xönan, möxösa, idi toxo wöwö ma axanan ma toxo dödöm köba. Io, Jisas ixo ose idi, "Mum mere laa ringan tua enen?"

42 Me idi toxo tabaa ine ma xönö subana en toxoro söngöt.

43 Ma ixo kip lo ma ixo en kö wawara re idi.

44 Me ine ixo tengen tö idi, "Inabo lalaa na e xo töngösen e mum min nang e xo xisixis bang me mum, bara abo lalaa xirip tabo mana pet eöt ma nang toxo geet ulamun e kölöme xöbo warkurai te Moses mabo tinenge xöbo propet ma xö buk ne Sinö."

45 Io, ixo palas abo dödöxömen te idi bere idi tabo maras ulamun inabo ginigeet te God.

46 Ma ixo tengen tö idi bira, "Toxoro geet ina na, bara a Mesaia irabo örasen a kinadik ma xö bung sese önarun min irabo taru kaa xalik a minet.

47 Ma tabo etöngösen ma esene xö nangadi xirip pa xö öxöno lagunon, urulo ra Jerusalem, bara a nangadi xirip tabo dödöm puxus me God irabo döxömen taun tewe abo magingin saban te idi.

48 Mum moxo pere inabo lalaa na me mum morobo etöngösen min.

49 Me e rabo tile ösu re mum a lasa nang a Tamake ixo xuxubus ulamunon. Inexalik mum morobo kis xiset ulamun ine ra xö ina lagunon ot nang bara a lölös meriso lömö irabo kain e mum."

*God ixo kip lo e Jisas urso xö watmaep*

50 Ma nang ine ixo lamus ösu idi urungan Betani, ixo rarik a limine ma ixo wadöane idi.

51 Ma bara nang ine ixo wawadöane idi, ixo wan lie idi me God ixo kip lo ine uruso lömö xö watmaep.

52 Io, idi toxo lotu wösöt ine, ma toxo tawuxus baling arixe ma axanan taxin urungan Jerusalem.

53 Me idi toxobo önan ot sösöxö urungan kö gunon ne lotu raxin me idi toxobo ölelet e God tingan.



## A Tinenge Deek ke JON

Jon a aposol ixo geet ina ginigeet na **bara nangadi nang tabo kos ina na, idi tabo nunu bara e Jisas ine a Mesaia (nang toxo tengen bara 'e Krais'), a Barok kö God, me God irabo öro idi (pere e Jon 20:31)**. Ina na a unine ina ginigeet na. Me Jon ixo osen ömaras bere Jisas, ine runon niang a God, ixo wanot xarnang a tödi, ma ixo to ra xö pu xö öxöno lagunon tua osen e God ura re ire (14:7-11). Io nang, e Jon ixo tengen bara e Jisas a 'Tinenge', möxösa, a to re ine i töngösen ire ulamun e God (1:1-18). Jon ixo etöngösen köba bere Jisas ixo wanot bara irabo isik a to ulorexe rö idi xirip nang te nunu re ine (1:12; 3:16; 3:36; 5:24; 6:40; 10:28; 11:25) ma bere ine a Barok kö God ma kaim pe ngas kabise uruso xö God, Jisas kalik mon (5:19-27; 10:30; 11:27; 14:6).

<sup>1</sup> Mesila xö urulo möxöbo lalaa xirip, a Tinenge ixoro kis. Ma ina Tinenge ixo kis arixe me God, ma ina Tinenge e God iat.

<sup>2</sup> Ma ina Tinenge ixo kis arixe me God mesila xö urulo möxöbo lalaa xirip.

<sup>3</sup> Me God ixo uxis abo lalaa xirip arixe ma ina Tinenge na. Ma kaim pe laa ixo wanot tataun. Kaim. God i ixo pet abo lalaa xirip arixe ma ina Tinenge.

<sup>4</sup> Me ine iat mon a unine to runon. Ma ina to, ine a bibio nang irabo ömaras a nangadi.

<sup>5</sup> A bibio i sili ömaras a ködö, ma lamun a ködö i kobo eöt tua tinuu wi ine.

<sup>6</sup> Önga tödi ixo ot nang e God ixo tile ine, a esene e Jon.

<sup>7</sup> Me ine ixo ot tua rengrengen ösu lamun ina bibio, bara a nangadi xirip nang tabo ölangen, idi tabo nunu xö ina bibio.

<sup>8</sup> Me ine iat kaim bara ine ina bibio, inexalik, ixo ot tua rengrengen ösu lamun ina bibio.

<sup>9</sup> Ma ina bibio runon i nangen, ma iri wanot ura xö öxöno lagunon ma ibo ömaras a nangadi xirip.

<sup>10</sup> A Tinenge ixo kis sa xö öxöno lagunon. Ma i turunon bere God ixo uxis a öxöno lagunon min, ma lamun a nangadi belek möxö ina öxöno lagunon idi kaim kö werwere xulen ine.

<sup>11</sup> Ine ixo ot kö xönö re ine iat, ma lamun a nangadi re ine kaim kö ömaraxen lo ine.

<sup>12</sup> Lamun ewe me idi nang toxo ömaraxen lo ine, ixo ömaraxa lo idi bara idi tabo bung baroxorok ke God, idi iat nang ewe toxo nunu re ine.

<sup>13</sup> Ma tokoxobo xikip idi xarnang a tatalien möxö nangadi mon, bara xö mamaa xö tödi. Lamun kaim. God iat ine a Tamana idi.

<sup>14</sup> Ma ina Tinenge ixo ot xarnang a tödi, ma ixo to kaluluonin ire. Me ire tere pere a mariris se ine, a mariris möxö ina önga Barok söxöt mon meringan te Tamana. Ma ixo wöwö ma a abalamu mabo turunon te God.

<sup>15</sup> Jon ixo etöngösen maras lamun ine, ma ixo wöwörö lölös bira, "Ine a öng nang e xo wöwörö ulamun ine nang e xo tengen bira, 'Irabo ot melamu re e, ma lamun ine i taxin sik ke e, möxösa, ine ixoro kis nang bang kaim kö xikip e.' "

<sup>16</sup> Ma i wöwö sik arixe ma abalamu ma ibo ratabaa söxöin ire xirip min.

<sup>17</sup> Moses ixo isik abo warkurai ura re ire nang God ixo tabaa ine min. Ma lamun meringan te Jisas Kraisa a abalamu ma turunon ixo ot.

<sup>18</sup> Kaim bang ke öng ixoro pere e God. Ma lamun God ine ma önga Barok kalik mon me ine iat e God, ma ibo xisixis kö lawana e Tamana. Me ine iat ixoro wöwörö maras sö ire ulamun ine.

*Jon ixo öös bara ine a Mesaia*

*(Matiu 3.1-12; Mak 1.1-8; Luk 3.1-18)*

<sup>19</sup> Nang abo tödi raxin mee Judeia ringan Jerusalem toxo tile a uleng ne pris ma Liwai urso re Jon tua ose ine, bara a mangana tödi bule ine, io, Jon ixo tengen ömaras.

<sup>20</sup> Ine kaim kö öös sua babalu idi, ma lamun ixo ömaras mon idi, ma ixo tengen bara, "Kaim bere e ina Mesaia."

<sup>21</sup> Me idi toxo ose öbaling ine, "Me ewe iat im nöngön? E Elaija nöngön?"

Me Jon ixo balu idi, "Kaim, kaim bere e Elaija."

Me idi toxo ose öbaling ine, "Nöngön ina Propet nang ire te xixiset ulamun?"

Ine ixo balu öbaling idi, "Kawaim."

<sup>22</sup> Io, idi toxo tengen te ine, "Go, örö tengen im pe mem bere ewenene runon iat nöngön, rue mem pa töngösen idi nang toxo tile e mem ura. Örobo tengen bule im pe nöngön?"

<sup>23</sup> Jon ixo balu idi mabo tinenge propet te Aisaia bira: "E a inöno öng i xukup kö xönö tataun bara, 'Mum morobo ötöxödös a ngas kö Orong.' "

<sup>24</sup> Io, dauleng ne Parasi nang toxo tile,

<sup>25</sup> idi toxo ose e Jon bira, "Ma nang bara kaim bere nōngön iang a Mesaia, bere e Elaija, bara ina Propet, ma ruasa nōngön u baptais a nangadi?"

<sup>26</sup> Me Jon ixo balu idi bira, "E bo baptais idi arixe ma ari. Ma lamun öng kaluluonin e mum, mum kobo ösöxö ine."

<sup>27</sup> Ine mon a öng nang irabo ot melamu re e, me e kobo töxödös eöt tua walwalas a kililöng kalik a nine sandel te ine."

<sup>28</sup> Inabo lalaa xirip ixo ot to Betani, kö lawana Ari Jordan, nang e Jon ixo baptais a nangadi xönan.

*Jisas nang irabo kip tewe abo sasaban*

<sup>29</sup> Önga bung kabise im, Jon ixo pere e Jisas ixo önan pösöt ine ma ixo tengen, "Mum moro pere bang, ina na a bak kö sipsip nang e God ixo tile ura rua xikip tewe abo magingin saban kö nangadi möxö öxöno lagunon!"

<sup>30</sup> Ine mon a tödi nang e xo töngösen ulamunon bara, 'A tödi irabo ot melamu re e, ma lamun ine i taxin sik ke e, möxösa, ine ixoro kis nang kaim bang kö xikip e.'

<sup>31</sup> Me e iat kaim kö ösöxö ine, ma lamun e wanot tua baptais e mum ma ari rua osen ömaras abo Israel ulamun ine."

<sup>32</sup> Io, Jon ixo isik a tinenge maras bira, "E xo pere a Tanono ixo wan su meriso xö watmaep xarnang a bunu ma ixo kis lömö re ine."

<sup>33</sup> E iat kaim kö ösöxö xulen bara ine iat mon nang irabo ot. Ma lamun ewe nang ixo tile e rua baptais a nangadi arixe ma ari ixo tengen bara, 'A tödi nang örobo pere a Tanono irabo wan su ma irabo kis lömö xö ina tödi, ine iat mon niang irabo baptais arixe ma Töxödös ne Tanono.' "

<sup>34</sup> Me Jon ixo tengen, "E xoro pere ine me e xo tengen ösu bara ine iat mon a Barok kö God."

*Dauleng toxo perexulen e Jisas bara ine a Mesaia*

<sup>35</sup> Io, xö bung melamu e Jon arixe ma nine bak ne ausu re ine, idiet toxo tuu sik baling kingan.

<sup>36</sup> Ma nang ixo pere e Jisas ixo önan saxit, ixo tengen te idu, "Mu moro pere, ina na a bak kö sipsip nang e God ixo tile."

<sup>37</sup> Ma nang ina nine bak ne ausu toxo ölangen biringan, idu toxo muu e Jisas.

<sup>38</sup> Jisas ixo talingen baling ma ixo pere idu toxo mumuu re ine. Ma ixo ose idu, "Mu mo mamaa lamun a sa?"

Idu toxo balu ine ma toxo tengen, "Rabai, nōngön u xisixis ule?" (Ma a unine ina tinenge 'Rabai' bara 'Tene Ausu').

<sup>39</sup> Me Jisas ixo balu, "Mu moro miang me mu morobo pere."

Io, idu toxo muu ine ma toxo pere a xönö ixo xisixis e, ma ixoro lörörö im kö nit ne axana bung kö aien. Io, idu toxo kis arixe me ine xö ina bung kö aien.

<sup>40</sup> Io, Endru a tönö e Saimon Pita, ine a öng ke idu nang toxo ölangen a lasa e Jon ixo tengen, io, idu toxo muu lo e Jisas.

<sup>41</sup> A laa nang e Endru ixo arun ta wewet ixo parasiwin a tönö nang e Saimon, ma ixo tengen te ine, "Maa mere pere lo a Mesaia." (Ma tabo puxus ina tinenge na bara ine mon a 'Krais').

<sup>42</sup> Ma ixo lamus e Saimon urungan te Jisas.

Jisas ixo pere ine ma ixo tengen, "Nöngön e Saimon, a barok ke Jon. Tabo rengrengen nöngön me Kepas" (niang, toxo puxus bere, e Pita).

*Pilip me Natanael toxo perexulen e Jisas bara ine a Mesaia*

<sup>43</sup> Io, xö bung melamu, Jisas ixo mamaa ra nuan uruso Galili. Ixo pere lo e Pilip ma ixo tengen tö ine, "Muu e."

<sup>44</sup> Pilip ine meri Betsaida xö lagunon nang e Endru me Pita tobo xisixis bölök ee.

<sup>45</sup> Pilip ixo ot pösöt e Natanael ma ixo tengen te ine, "Mem mere pere lo a öng nang e Moses ixo gegeet ulamunon kölöme xö Buk möxö Warkurai ma nang bölök abo propet toxo gegeet ulamun ine. E Jisas meriso Nasaret, a barok ke Josep."

<sup>46</sup> Me Natanael ixo ose, "Kaim pe lalaa deek i eöt tua nuanot meriso Nasaret!"

Io, Pilip ixo tengen, "Örö miang ma örö pere."

<sup>47</sup> Ma nang e Jisas ixo pere e Natanael ixo önan pösöt ine, ixo tenge ulamun ine bara, "Turunon saxit, ina tödi a Israel tunon, ma i koxobo ösöxö ra röxröxö."

<sup>48</sup> Me Natanael ixo ose ine, "U ösöxö e bule?"

Jisas ixo balu ine ma ixo tengen, "E xo arun ta werwere nöngön kö pu xö uno löwö, melamu re Pilip pa xukuwe nöngön."

<sup>49</sup> Io, Natanael ixo tengen, "Rabai, nöngön a Barok ke God. Me nöngön a King köbo Israel."

<sup>50</sup> Me Jisas ixo balu ma ixo tengen, "U nunu, möxösa, e tengen te nöngön bara e xo pere nöngön kö pu xö uno löwö. Inexalik nöngön örobo pere rebo lalaa nang i taxin saxit te nanga."

<sup>51</sup> Io, ine ixo tengen öbaling, "E tengen a turunon te nöngön, mum morobo pere a watmaep irabo tamasawang, mabo angelo re God tabo önan kaa ma tabo önan su xö Barok kö Tödi."

## 2

*Jisas ixo puxus a ari urungan kö wain*

<sup>1</sup> Io, melamu xö nine bung ixoro saxit, a nien taxin ne alolo ixo wanot kö lagunon Kena ro Galili. A nago re Jisas bölök ixo ot.

<sup>2</sup> Me idi toxo seng bölök e Jisas ma bung bak ne ausu re ine rua kinis kö ina nien ne alolo.

<sup>3</sup> Ma nang a wain ixo kawam, a nago re Jisas ixo tengen te ine bara, "Kawaim im idi ma wain."

<sup>4</sup> Me Jisas ixo balu ine bira, "Nago, ruasa u rengrengen tö e? Kaim bara a laa re e. A axana bung ke e i kela wanot bang."

<sup>5</sup> A nago re Jisas ixo tengen köbo tene tinörön, "Mum morobo pet abo lasanene nang ine i tengen te mum."

<sup>6</sup> Ma lörörö ringan a pitnö ma öng ne bile raxin toxo pet ma wat. Inabo mangana bile ne ari nang abo Judeia toxobo gilime min eöt mabo warkurai te idi. A öngöng ke idi abo bile ixobo rörön a nine sangaun bara a narun ne sangaun ne buluxom ne kö ari.

<sup>7</sup> Jisas ixo tengen köbo tene tinörön, "Mum moro tii abo bile ma ari." Io, idi toxo tii öwöwö urungan köbo marana idi.

<sup>8</sup> Io, ixo tengen te idi bira, "Na mum moro kuluwe re uleng ma moro isik kö tödi sisila möxö nien taxin."

Me idi toxo pet eörin.

<sup>9</sup> Ma a tödi sisila möxö nien taxin ixo nanamienin a ari nang e Jisas ixoro puxus sa wain. Kaim ine xo marmaras bara ina wain ixo ot mole, inexalik abo tene tinörön nang toxo ölele a ari, idi toxo ösöxö sik. Io, ixo kuwe lo a tödi nang ixo eka inalolo.

<sup>10</sup> Ma ixo tengen te ine, "A nangadi xirip tobo araun ta erabaa ma wain deek. Ma melamu nang a nangadi osee tere inim a oleleng, idi tobo isik belek a wain nang kaim a nanamien möxönan. Ma lamun nöngön u xo bulus tewe sik iat ina wain deek ot na."

<sup>11</sup> Io, ina na a sisila ne auxileng lölös e Jisas ixo pet kö lagunon Kena ro Galili. Me ine ixo osen a mariris se ine, mabo bak ne ausu re ine toxo nunu re ine.

*Jisas nang irabo kulas tewe a gunon ne lotu raxin*

<sup>12</sup> Melamu xönan Jisas ixo wan su uruo Kaprenaum arixe me nene mabo tönö, mabo bak ne ausu re ine. Ma ringan ee, idi toxo kis a dauleng ne bung.

<sup>13</sup> Ma nang ixoro lörörö ra axana bung taxin möxö nien ne Nuan Lexe xöbo Judeia, Jisas ixo wan uruso Jerusalem.

<sup>14</sup> Me ine ixo pere lo a nangadi kölöme xö xönö mesila xö gunon lotu raxin, idi toxo mismisik mabo bulmakau, abo

sipsip mabo buno, ma dauleng toxo kisisik köbo öra ma toxo exuxulas ma tuluwok.

<sup>15</sup> Io, Jisas ixo ipelee a wip ma uno, ma ixo wasak tewe idi xalik a xönö mesila xö gunon lotu raxin, arixe mabo sipsip ma bulmakau. Ine ixo sesele nanin abo tuluwok ke idi nang toxo exuxulas nana min ma ixo puxus lubeng abo öra re idi.

<sup>16</sup> Me Jisas ixo tengen te idi nang toxo misik mabo pun bara, "Mum moro kip tewe abo lalaa na mera! Ma ganim e mum kö wewet a gunon kö Tamake xarnang a gunon ne mismisik."

<sup>17</sup> Ma abo bak ne ausu re ine toxo döxömen lo a tinenge re God nang toxoro geet, i tengen bira, "*God, a balake i raru xöba rua werwere muu a gunon te nöngön.*"

<sup>18</sup> Io, abo Judeia toxo ose ine bara, "A mangana auxilieng lölös sa nang örobo osen te mem pua öturunon bere i töxödös sik kö nöngön tua wewet bie?"

<sup>19</sup> Me Jisas ixo balu idi ma ixo tengen, "Mum moro öbeng ösu ina gunon ne lotu raxin, me e rabo öraru öbaling ine xö narun ne bung."

<sup>20</sup> Ma abo Judeia toxo balu öbaling ine, "Idi toxo rörön kö ina gunon ne lotu raxin na xö nit ne sangaun ma pitnö ma öng ne awat. Me nöngön örobo öraru öbaling ine xö narun ne bung mon?"

<sup>21</sup> Ma lamun a gunon ne lotu raxin nang e Jisas ixo wöwörö ulamunon, ine na mon a aine.

<sup>22</sup> Melamu xö tinaru baling ke ine xalik a minet, abo bak ne ausu re ine toxo döxömen lo a lasa nang ine ixo tengen. Io, idi toxo nunu xina tinenge xö buk ke God arixe ma tinenge bölök niang e Jisas ixoro tengen.

<sup>23</sup> Ma nang e Jisas ixo xisixis suso Jerusalem kö Luxa ne Nuan Lexe, a oleleng ne nangadi toxo nunu xö esene, möxösa, idi toxo pere ine ixo pet abo auxilieng lölös.

<sup>24</sup> Ma lamun e Jisas kaim kö nunu re idi bara tabo pet ödeek ine, möxösa, ixo ösöxö sik abo tatalien kö nangadi.

<sup>25</sup> Kaim pe unine bara re öng irabo mana töngösen e Jisas mere nangadi, möxö ine ixo ösöxö sik a dödxömen kö nangadi.

### 3

#### *Ewe nang i nunu irabo kip a to ulorexe*

<sup>1</sup> Io, önga tödi raxin möxöbo Judeia, a esene e Nikodimas, me ine bölök a öng mere idi abo Parasi.

<sup>2</sup> Ixo ot pösöt e Jisas kö dömön ma ixo tengen, "Rabai, mem me ösöxö bere nöngön a tene ausu, me God ixo tile

nöngön, möxösa, kaim pe öng i eöt tua wewet abo auxileng nang u wewet nang e God i kobo kis arixe me ine.”

<sup>3</sup> Jisas ixo balu ine ma ixo tengen, “Turunon saxit, kawaim pe öng i öt ta nilaxa xö kingdom kö God nang bara tekobo kip öbaling ine.”

<sup>4</sup> Nikodimas ixo ose ine, “Tabo kip öbaling a tödi bara bule nang bara ine iri ötaxin? Turunon saxit, i kebeöt ta nilaxa baling kö balana nago re ine rua xikip öbaling ine!”

<sup>5</sup> Jisas ixo balu ine, “Turunon saxit, kawaim pe öng i öt ta nilaxa xö kingdom kö God nang bara tekobo kip ine xö ari ma xö Tanono.

<sup>6</sup> Ewenene nang tobo kip ine xö lewene aine, ine a tödi ne lewene aine iat. A nangadi tobo kip a nangadi iat, nexalik a Tanono ibo kip a tanono iat.

<sup>7</sup> Ganim nöngön kö wuwuwus nang bara e tengen te nöngön bara, ‘Tabo mana kip öbaling e mum.’

<sup>8</sup> A xiki ibo wawaxat muu a maaa re ine. Mum bo ölangen a börbörön möxönan, ma lamun mum kobo ösöxö bara i wanot mole, me mum kobo ösöxö a xönö nang i önan uwe. I xarnang a nangadi xirip ewe nang a Tanono i kip idi.”

<sup>9</sup> Nikodimas ixo ose, “Ma ina na irabo ot bule?”

<sup>10</sup> Me Jisas ixo tengen, “Nöngön a tene ausu raxin mee Israel. Bule u kobo öt ta marmaras kö ina laa na?”

<sup>11</sup> Turunon saxit, mem me rengrenge xö laa mem me ösöxö sik, me mem me tengen ösu a lasa mem mere pere. Inexalik mum angen mo köbo ömaraxen abo tinenge re mem.

<sup>12</sup> E re töngösen e mum lamun abo lalaa mera xö öxöno lagunon me mum kobo nunu. Io, irabo bara bule nang bara mum morobo nunu nang arabo rengrenge a lalaa möxö watmaep?”

<sup>13</sup> Io, kaim pe öng iri wan urso xö watmaep, lamun ine xalik mon a Barok kö Tödi nang ixo wan su meriso xö watmaep.

<sup>14</sup> Xarniang e Moses ixo ii öxaa a petpuo möxö si xö xönö tataun ma iaa, io, a Barok kö Tödi, tabo mana ii öxaa ine,

<sup>15</sup> bara idi xirip niang te nunu re ine tabo kip a to ulorexe.

<sup>16</sup> “Io, God ine ma önga Barok kalik mon. Me God ixo maaa xöba lamun a öxöno lagunon, io, ixo isik ösu ina Barok ke ine, bere ewenene niang i nunu re ine i karabo met, ma lamun irabo kip a to ulorexe.

<sup>17</sup> Me God kaim kö tile ösu a Barok ke ine ura xö öxöno lagunon bara irabo ömokorot a öxöno lagunon, ma lamun ixo tile ösu ine bara irabo öro ire.

<sup>18</sup> Io, ewe niang i nunu re ine, i karabo tuu xö warkurai. Ma lamun ewe niang i kobo nunu re ine, a warkurai irabo

ömokorot ine, möxösa, ine i kobo nunu xö esene önga Barok kalik mon te God.

<sup>19</sup> Ma unine bara God ixoro kure sik a öxöno lagunon bira. A Maras ixoro ot ta xö öxöno lagunon, ma lamun a nangadi toxo mamaa xöba lamun a xödxödö, ma maras kawaim, möxösa, abo magingin te idi a lak saban.

<sup>20</sup> Me ewenene niang ibo wewet a sasaban i kara maa xöba ulamun a maras. Ma i karabo ot urungan kö maras, xalik abo magingin te ine irabo wösö.

<sup>21</sup> Ma lamun ewenene niang ibo xisixis muu a turunon te God, ine irabo ot urungan kö maras, io nang bere irabo maras bara abo lasanene niang ixo wewet, ixo pet kö lölös se God.”

*Jisas i taxin saxit me ine a to ulorexe*

<sup>22</sup> Io, melamu xö ina na, Jisas arixe mabo bak ne ausu toxo wan lo uruso xö xönö raxin Judeia. Ma ixo kis bang me idi xö uleng ne bung, ma ixo baptais a dauleng ne nangadi.

<sup>23</sup> Me Jon ixo pet baptais singan kö lagunon Ainon lörörö Salim, möxösa, ringan nangen a ari raxin. Ma a nangadi toxobo önan uxe bara irabo baptais idi.

<sup>24</sup> (Ma ina laa na ixo ot melamu niang kaim bang kö bulbulus e Jon kö gunon ne aömokorot.)

<sup>25</sup> Ma dauleng ne bak ne ausu re Jon toxo egot arixe ma önga Judeia. A warkurai te idi bara idi tabo mana gilime bara God i karabo pere re sasaban kölöme re idi. Me idi toxo egot lamun ina tatalien.

<sup>26</sup> Io, idi toxo wan uruso re Jon ma toxo tengen, “Tene Ausu, mem me eka töngösen nöngön lamun a tödi ewe niang ixo tuu sik me nöngön ti lawu xö gegene Ari Jordan. Ine mon niang u xo etöngösen me ine. Io, na nangen i wewet a baptais ma oleleng te orot pösöt ine.”

<sup>27</sup> Io, Jon ixo tengen te idi, “Kaim pe öng irabo pet te tinörön nang bere God i kobo isik sik ke ine.

<sup>28</sup> Mum iat morobo eöt tua öturunon xarniang e xo tengen bie: ‘Kaim bere e a Mesaia. Ma lamun God ixo tile ösila e re ine.’

<sup>29</sup> Ma na i bira. A tödi niang i maa ra alolo, re ine iat ina taluso niang i mamaa rua elolo. Lamun a ais kö ina tödi ibo ruruu ma ibo ölöngö. Ma i axanan tua ölangen a tingenge xö ina tödi alolo. Ma na a balake iri wöwö ma axanan.

<sup>30</sup> A esene iat irabo mana taxin sik ma eseke irabo xö pu.

<sup>31</sup> “A öng niang i wan su meriso lömö i taxin köba xöbo lalaa xirip. Me ewe niang mera xö pu, ine iat mera xö pu, ma ibo wöwörö mabo lalaa mera iat kö pu. Ma lamun i turunon, ewe niang i wan su meriso xö watmaep i taxin köba xöbo mangana lalaa xabise xirip.



<sup>32</sup> Ine i rengrenge ulamun inabo lasanene niang ixoro pere ma ixoro ölangen, ma lamun kaim pe öng ibo ömaraxen lo a tinenge re ine.

<sup>33</sup> Me ewe niang i ömaraxen lo a tinenge re ine, i öturunon bara abo tinenge re God i turunon.

<sup>34</sup> I turunon bira, möxösa, ewe niang e God ixo tile ösu, i wöwörö mabo tinenge re God, möxösa, God ixo tabaa xirip ine ma Töxödös ne Tanono.

<sup>35</sup> Tata i maa xöba lamun a Barok ke ine, io, ixo bulus ine bara irabo kure xirip abo lalaa.

<sup>36</sup> Ewenene niang i nunu xö Barok ke ine, ine iri kip a to ulorexe. Ma lamun niang bara ewenene i mölök kalik a Barok ke ine i karabo pere ina to, nexalik a laie re God i kisisik lömö re ine."

## 4

### *A une mee Samaria*

<sup>1</sup> Io, abo Parasi toxo ölangen bere Jisas ixo silien a oleleng ma ixo baptais a oleleng ne bak ne ausu ma niang e Jon kawaim.

<sup>2</sup> (Ma lamun i kobo turunon bara e Jisas ixo baptais a dauleng. Lamun abo bak ne ausu re ine mon toxobo baptais idi.)

<sup>3</sup> Nang e Jisas ixo ösöxö lo a sanene niang toxo rengrenge, ixo wan kalik a xönö raxin Judeia, ma ixo baling urso Galili.

<sup>4</sup> Ma ngas niang ine irabo mana muu i wan köröp kö xönö raxin Samaria.

<sup>5</sup> Io, ixo wanot urungan kö önga lagunon tobo rengrenge me Saikar, i kis kölöme xö xönö mee Samaria. Ma ina lagunon i lörörö xö xönö pu re Jekop niang ixo isik ke Josep, a barok ke ine.

<sup>6</sup> Ma marna ari niang e Jekop ixo kin i nangen niang, ma nang ixo lörörö ra luono xaken Jisas ixo wanot ma ixo kisisik kingan kö gegene möxö ina marna ari, möxösa, a nuan ixo uban ine.

<sup>7</sup> Ma önga une mee Samaria ixo ot tua kuluwe ari. Me Jisas ixo tengen te ine bara, "E mamaa bara örö tabaa e ma ari."

<sup>8</sup> (Ma abo bak ne ausu re ine toxoro wan lo rua kun nien kö lagunon.)

<sup>9</sup> A une mee Samaria ixo tenge balu ine, "Nöngön a Judeia, me e a une Samaria. Ma ruasa u seseng e ma ari?" (Ine ixo tengen bira, möxösa, abo Judeia tekara ais deek arixe mabo Samaria.)

<sup>10</sup> Io, Jisas ixo balu ine ma ixo tengen, "Nang bere nöngön u xoro ösöxö a arabaa xö God, ma u ösöxö bölök bere e

ewenene nang e seng nōngōn ma ari, io, nōngōn u xebe seng e ma ari, me e xebe tabaa nōngōn ma ari mōxō to.”

11 A une ixo tengen te ine bira, “Tōdi raxin, kaim pe lalaa niang örobo kuluwe min, mōxō a marna ari i dōdōngō xōba. Nōngōn örobo kip ina ari mōxō to mera?”

12 Nōngōn u dōxōmen gut bara u taxin sik kō untubuno mem e Jekop? Ine iat ixo tabaa e mem mina marna ari, me ine iat ixo inim e, ma bung barok ke ine, ma bung bulmakau ma bung sipsip bōlōk arixe min.”

13 Me Jisas ixo balu ine, “Idi xirip ewe niang te inim kō ina ari, idi tabo minauu baling.

14 Ma lamun ewe niang i inim kō ina ari niang e tabaa ine min, i karabo minauu baling. A ari niang e rabo tabaa ine min, irabo xarniang a ari i wuwut kaa kōlōme re ine rua isik a to ulorexe re ine.”

15 A une ixo tengen te ine bira, “Tōdi raxin, e mamaa bara örō tabaa e ma ina ari na, nexalik bara e kebeöt ta minauu baling me e kebeöt ta nuan ura ra kululuo.”

16 Io, Jisas ixo tengen te ine, “Örō wan, ma örō kuwe a usuom, ma örobo baling ura.”

17 A une ixo tengen te ine, “Kaim e mere tōdi.”

Me Jisas ixo balu ine, “I turunon niang u tengen bara kaim nōngōn mere tōdi,

18 mōxōsa, nōngōn u xoro elolo sik kō pitnō ne tōdi, ma ina tōdi na niang u kis arixe sik me ine, kaim bara ine a usuom. U tengen a turunon.”

19 Io, a une ixo tengen te ine, “Tōdi raxin, e pere bere nōngōn a propet.

20 Io, na iat e mamaa ra ose nōngōn ma önga laa. Abo untubuno mem toxobo lolotu wösöt e God kō ina maii na. Lamun e mum abo Judeia, mum bo rengrengen bara ire tabo mana lotu wösöt e God tuso Jerusalem kalik mon. Me nōngōn, u dōxōmen bule?”

21 Me Jisas ixo tengen te ine, “Nang, öro mana nunu xō tinenge re e. A axana bung i ka nuanot niang a nangadi tekarako lotu wösöt e Mama xō ina maii ma kaim bōlōk kingan Jerusalem.

22 Mum abo Samaria mum kobo ösöxō a lasa niang mum mo lotu xōnan. Lamun e mem abo Judeia, mem me ösöxō sik ewe niang mem me lolotu wösöt ine, mōxōsa, a tinörön te God tua öro nangadi irabo wanot meringan kōbo Judeia.

23 A axana bung i ka nuanot, ma na iri orim, bara ewe me idi niang tabo lotu wösöt e God ma turunon, idi tabo lotu bira. Idi tabo lotu wösöt e Mama meringan kōlōme xō tanono idi arixe ma turunon. Ma ina mangana lotu na e Mama i mamaa bara ta lotu wösöt ine bie.

<sup>24</sup> God, ine a tanono, me ewe me idi niang te lotu wösöt ine, idi tabo mana lotu wösöt ine meringan kölöme xö tanono idi arixe ma turunon."

<sup>25</sup> Ma ina une ixo tengen te ine, "E ösöxö sik bara ina Mesaia nang tobo rengrengen ine me Kraiss, irabo wanot. Ma nang bara irabo wanot, irabo ömaras kirip abo lalaa rö ire."

<sup>26</sup> Io, Jisas ixo balu ine, "E iat mon ine."

<sup>27</sup> Saxit mon, a bung bak ne ausu rine toxo baling, me idi toxo wuwus bere Jisas ixo wöwörö arixe mina une. Ma lamun kaim pe öng ixo ose ine bara, "Rösa u wöwörö arixe mine?" ma bara, "A lasa iang mu mo rengrengen?"

<sup>28</sup> Io, a une ixo gan sik a bile rine, ma ixo tawuxus baling urungan kö lagunon tine ma ixo tengen kö nangadi bara,

<sup>29</sup> "Moro miang, moro pere a önga tödi ewe niang i töngösen e mabo lalaa xirip nang e xo pet. Ine gut mon ina Mesaia?"

<sup>30</sup> Io, idi toxo wan kalik a lagunon te idi ma toxo wan pösöt ine.

<sup>31</sup> Nang a nangadi nangen bang kö ngas, abo bak ne ausu toxo tengen te ine, "Tene Ausu, mem me maaaa bara örobo an."

<sup>32</sup> Ma lamun ine ixo tengen te idi, "E ma nien ta enen niang mum kobo ösöxö runon ulamun."

<sup>33</sup> Io, abo bak ne ausu toxo wöwörö nana kaluluonin idi iat, "Re öng gut i kip pebo nien tö ine?"

<sup>34</sup> Io, Jisas ixo tengen te idi, "A nien te e, bara arabo mana pet eörin a maaaa re ine niang ixo tile e, ma rua öxawam bölök a tinörön te ine.

<sup>35</sup> Nang mum bo susulo abo komo re mum, mum bo rengrengen bara nangen bang a nit ne texe rua xikin. Lamun e tengen te mum, mum moro pere ödeek bang abo komo. Idi te maruxo xirip im pua xikin.

<sup>36</sup> Ma nixinen mon, ewenene niang i xixixin, i oxe lo a inone malawang ke ine ma i bulbulus etoxin abo nien möxö to ulorexe. Io, ina öng niang i susulo ma öng niang i xikin, idu tabo axanan arixe.

<sup>37</sup> Io, ina tinenge na i turunon bira, 'A öng i susulo ma öng kabise i xikin.'

<sup>38</sup> E xo tile e mum bara mum morobo xixixin kö nang kaim e mum pa sulo. Idi xabise toxo pet a tinörön lölös me mum moro kip lo belek im a inone malawang ke idi."

### *Abo Samaria toxo nunu*

<sup>39</sup> A oleleng ne tee mee Samaria möxö ina lagunon toxo nunu re Jisas mumuu a atöngösen möxö ina une bira, "Ine ixo töngösen e mabo lalaa xirip niang e xobo wewet."

<sup>40</sup> Io, niang abo tee mee Samaria toxo wan urungan te Jisas, toxo seng ine bara irabo kis bang midi ringan, ma ixo kis arixe me idi xö nine bung.

<sup>41</sup> Ma niang idi toxo ölangen a tinenge re ine, a oleleng ke idi bölök toxo nunu.

<sup>42</sup> Idi toxo tengen kö ina une bira, “Mesila mem moxo nunu, möxösa, mem moxo ölangen a tinenge re nöngön. Inexalik na, kawaim. Mem me nunu, möxö mem iat mere ölangen ine, ma i maras pi sik ke mem bara ina tödi na, ine a Tene Aöro möxö öxöno lagunon.”

*A barok ixo lörörö rua minet*

<sup>43</sup> Nine bung ixo saxit, io, Jisas ixo baling urso Galili.

<sup>44</sup> (Io, Jisas iat ixoro tengen osen bara a propet, tekara ii ine xö xönö runon iat te ine.)

<sup>45</sup> Ma nang ixo ot tiso Galili, a marakörö meringan ee toxo axanan suo ine, möxösa, idi bölök toxoro wan urso xö nien ne Nuan Lexe ringan Jerusalem ma toxoro pere abo lalaa ine ixo pet tingan.

<sup>46</sup> Meringan ee ixo wan baling urso Kena, a lagunon taxin kö xönö mee Galili, ina lagunon niang ine ixo puxus a ari urungan kö wain. Ma önga tödi raxin nang ixobo rörön kö king, a barok ke ine ixo meset to Kaprenaum.

<sup>47</sup> Io, niang ixo ölangen bere Jisas ixoro ot tingan Galili meriso Judeia, ixo wan urungan tine, ma ixo seng ine bara irabo wan ma irabo ölanglanga a barok ke ine, ewe niang ixo lörörö rua minet.

<sup>48</sup> Me Jisas belek ixo tengen te ine, “Nang bere mum mo kala pere abo auxilieng lölös mabo tatalien ne auuwuwus, mum kebeöt iat ta nunu.”

<sup>49</sup> Io, a tödi raxin möxö warkurai ixo tengen te Jisas, “Orong, örö miang! Iraa ta wan su wasaxit uri, xalik a barok ke e ibo met.”

<sup>50</sup> Jisas ixo balu ine, “Örö wan baling im. A barok ke nöngön irabo to.”

Ina tödi ixo nunu xö tinenge re Jisas ma ixo wan lo.

<sup>51</sup> Niang ine angen bang kö ngas ixo önan, ixo esuo mabo tultul te ine, me idi toxo tengen bara a barok ke ine iri langlanga im.

<sup>52</sup> Ma ixo ose idi bara xö axana bung sa a barok ke ine ixo langlanga. Io, idi toxo balu ine, “Laa, xö önga axana bung kö aien a lelewi ixo kawam kalik ine.”

<sup>53</sup> Ma a tata re ine ixo ösöxö xulen bara ina axana bung turunon iat niang e Jisas ixoro tengen bara a barok ke ine irabo langlanga. Io, ine me ewenene me idi niang toxo xisixis arixe me ine toxo nunu.

<sup>54</sup> Ma sese öninöngin a auxileng lölös niang e Jisas ixo pet tuso Galili nang ixo wan mee Judeia.

## 5

*A pengpeng kingan kö marna ari*

<sup>1</sup> Melamu xö ina na, Jisas ixo wan kaa urso Jerusalem kö önga luxa raxin te idi abo Judeia.

<sup>2</sup> Ma ringan Jerusalem lörorö xö maramé laxlaxa nang tobo rengrengén me Maramé Laxlaxa möxöbo Sipsip, ixo malaa sik a xönö ari, ma pitnö ne walpali toxo tuu wi sik. Ma xö tinenge me Ibru tobo rengrengén ina xönö niang ma Betesda.

<sup>3-4</sup> Ma oleleng ne miniset idi toxobo mamaru ee. Ma kaluluonin idi abo marapulo, mabo mangana pengpeng.\*

<sup>5</sup> Ma önga tödi kaluluonin idi ixoro meset eöt ma narun ne sangaun ma pitnö ma narun ne awat.

<sup>6</sup> Ma nang e Jisas ixo pere ine ixo maru sik, ixo ösöxö bara nangang ixoro meset lo im, io, ixo ose ine, "U maa bara örobo langlanga?"

<sup>7</sup> Ma ina tödi miniset ixo balu ine, "Nang orong, kaim pe öng nang mere e nang irabo top ölaxa e xö ina marna ari niang te ömamagi. Ma nang e bang angen e kala wan su, ma öng kabise iboro sila su im kalik e."

<sup>8</sup> Io, Jisas ixo tengen te ine, "Taru kaa, tön öxaa a minaru re nöngön ma örö önan."

<sup>9</sup> Saxit mon a tödi niang ixo langlanga. Io, ixo kip lo a minaru re ine ma ixo wan lo.

Ma ina laa niang ixo ot te ine xö Sabat.

<sup>10</sup> Io, abo Judeia toxo tengen kö ina tödi niang ixo langlanga bira, "Nixinen a Sabat ma i kobo töxödös kö warkurai te ire bara nöngön örobo kip nanin a minaru re nöngön."

<sup>11</sup> Ma lamun ixo balu idi, "A tödi nang i ölanglanga e, i tengen te e bira, 'Kip lo a minaru re nöngön ma örö önan.'"

<sup>12</sup> Me idi toxo ose ine, "Ewe ina tödi na i tengen te nöngön ta kip lo a minaru re nöngön ma örö önan?"

<sup>13</sup> Ma lamun a tödi nang ixo langlanga, kaim ine ra ösöxö bere ewe ine, möxösa, e Jisas ixo wan sixem kaluluonin a marakörö raxin tingan kö ina xönö.

<sup>14</sup> Io, melamu belek im, Jisas ixo pere wösöt lo ine kölöme xö gunon lotu raxin ma ixo tengen te ine, "Örö pere bang!

\* **5:3-4** A dauleng ne ginigeet me lorexe toxo bulus ölaxa rina **4** i tengen bira: *Me idi toxobo xixiset ma ari bara irabo mamagi, möxösa, xö uleng ne bung önga angelo xö Orong ixobo wan su xö marana ari ma ixobo ömamagi a ari. Ma ewe a tödi miniset nang irabo sila su xö ari nang ixo mamagi, a miniset te ine irabo kawam.*

Nöngön uru langlanga im. Ma na im, u bele pet öbaling ke sasaban, kalik u bo oxe lo re laa niang irabo ögarin köbanin nöngön.”

<sup>15</sup> Ma ina tödi ixo wan lo ma ixo tengen köbo Judeia bere Jisas mon niang ixo ölanglanga ine.

*Jisas ixobo wewet kalik mon a lasa nang a Mama re ine ibo wewet*

<sup>16</sup> Io, abo Judeia toxo rengrengen öbulubun e Jisas, möxösa, ixo ölanglanga a nangadi xö Sabat.

<sup>17</sup> Me Jisas ixo tengen te idi, “A Tamake ixobo rörörön ot kö ina bung na, me e bölök e bo rörörön.”

<sup>18</sup> Möxö ina na, abo Judeia ewe niang toxo maa bara tabo sexomet ine, a baladi ixo lelewi xöba bara tabo sexomet ine, möxösa, idi toxo döxömen bara ixo lexe abo warkurai möxö Sabat. Ma kaim bara ina niang kalik mon. Ixo tengen bölök bara a Tamana runon e God. Ma xö ina ngas iat mon, ixo pet ine iat bara irabo eöt arixe me God.

<sup>19</sup> Io, Jisas ixo balu idi bira: “E tengen a turunon te mum, a Barok i kebeöt ta wewet te laa xö dinödöm iat te ine. Kaim. I eöt mon te ine ra wewet abo mangana lasanene niang i pere muu lo xalik a Tamana ibo wewet, möxö a lasanene niang a Tamana i pet, a Barok bölök irabo pet.

<sup>20</sup> Me Tata i maa xöba lamun a Barok ke ine ma ibo osen ine mabo lalaa xirip niang ibo wewet. Ma irabo osen ine mabo lalaa nang i taxin köba re nangana. Me mum morobo wuwus saban.

<sup>21</sup> A Tamana i öraru abo minet ma i öro idi. Io, i xarnang iat mon kö Barok ke ine. Nang bara i mamaa ra tabaa ewenene ma to, irabo öro ine.

<sup>22-23</sup> Ma a Tamana i kara kure re öng, ma lamun ixoro isik tewe a lölös urungan kö Barok kine rua kure a nangadi xirip bara idi xirip tabo mana ii a Barok kine xarnang iat mon idi tobo ii e Tamana. Io, ewe nang i kobo ii a Barok ke ine, i kobo ii bölök a Tamana niang ixo tile ine ura.

<sup>24</sup> “Turunon saxit, ewe niang i ölangen abo tinenge re e ma i nunu re ine niang ixo tile e ura, io, ine iri kip a to ulorexe, ma i kebeöt ta tinuu xö warkurai. Ma lamun iri saxit a minet urungan kö to.

<sup>25</sup> Turunon saxit, a axana bung i ka inot, ma na im iri ot, niang abo minet tabo ölangen a inöno a Barok ke God, me idi ewe niang te ölangen, tabo kip a to.

<sup>26</sup> A Tamana a unine to. Xarnang iat mon iri isik a lölös kö Barok ke ine bara ine bölök a unine to.

<sup>27</sup> Ma a Tamana ixoro isik a lölös urungan te ine rua pet warkurai, möxösa, ine a Barok kö Tödi.

28 “Ganim e mum pa wuwuwus kö ina na. A axana bung i ka inot niang a nangadi minet kirip tabo ölangen a inöno,  
 29 ma tabo taru xalik abo maöt te idi. Idi niang toxobo wewet abo tatalien deek, tabo taru baling, ma tabo kip a to. Me idi niang toxobo wewet abo tatalien saban, tabo taru baling, ma tabo tuu xö warkurai.

30 E kebeöt bara arabo pet te laa xö dinödöm iat te e. Kaim. E bo pet warkurai xarnang mon niang e ölangen kalik a Tamake. Ma a tatalien te e rua pet warkurai i töxödös, möxösa, e kaim kö mumuu a mamaa iat te e. Ma lamun e bo mumuu iat a mamaa re ine niang ixo tile e ura.

*Abo tinenge ulamun e Jisas bere ewenene ine*

31 “Nang bara e xalik mon e tengen ösu ulamun e iat, a tinenge re e i karabo tuu lölös.

32 Re öng kabise iat tingan i rengrenge ulamun e, me e ösöxö bara a tinenge rine ulamun e i tuu lölös sik.

33 “Me mum iat, mum moxo uguran a nangadi urungan te Jon a tene baptais bara morobo kip lo a tinenge re ine, me Jon ixo wöwörö maras ma turunon lamun e.

34 E kobo ömaraxen lo a tinenge möxö tödi mon ulamun e. Ma lamun e tengen bira, bara mum morobo mana kip a to runon.

35 Jon ixo xarnang a bibio niang ixo bibio maras. Ma xö subana bung mon mum moxo axanan lamun a tinenge ne ömaras se ine.

36 “Lamun e xo kip a tinenge runon lamun e iat, niang i taxin sik kö tinenge re Jon. Ma i bira. A Tata re e ixo tabaa e ma tinörön tö e rua öxöwam. Ma ina tinörön niang e wewet, i tengen osen a turunon lamun e bara a Tamake ixo tile e ura.

37 Ma Tata iat te e niang ixo tile e ura, ixoro töngösen a turunon lamun e. Mum kala ölangen bang a inöno, me mum kala pere bang ine bara ine i xarniang a lasanene.

38 Ma tinenge re ine i kala kis se mum, möxösa, mum kobo nunu re e, me ine ewe niang ixo tile ösu e ura.

39 Me mum bo eusu mabo tinenge re God niang toxo geet, möxösa, mum mo döxömen bara inabo ginigeet irabo tabaa e mum ma to ulorexe. Inabo ginigeet na mon nang tobo töngösen a turunon lamun e.

40 Ma lamun e mum mo mölök ka nuan ura re e bara mum morobo kip a to.

41 “E kara ömaraxen bara a nangadi ta ölolot e,

42 ma lamun e ösöxö sik e mum. E ösöxö sik bara a mamaa urungan te God i kobo kisisik kölöme re mum.

<sup>43</sup> E xo wanot, möxösa, a Tamake ixo tile e ura. Me mum kobo ömaraxen lo e. Niang bara re öng kabise i wanot tataun mon, mum morobo öbala lo ine.

<sup>44</sup> Mum kebeöt bara mum morobo nunu re e, möxösa, mum mo axanan bara öngöng kaluluonin e mum iat irabo ölet e mum, ma lamun mum kobo döxömen bara a laa raxin bara Öng nang ine xalik mon e God irabo ölet e mum.

<sup>45</sup> Mum bele döxömen bere e mon iang, e rabo puk e mum merebo tatalien saban tingan kö wawara re Tamake. Kaim. E Moses mon niang irabo puk e mum, ine nang mum mo döxömen bara irabo top e mum.

<sup>46</sup> Ma nang bara mum moxoro nunu re Moses, mum mexebe mana nunu bölök ke e, möxösa, ixo gegeet ulamun e.

<sup>47</sup> Ma lamun mum kebeöt ta nunu xö lasanene nang e tengen, möxö mum kobo nunu xö lasa nang ixo geet."

## 6

*Jisas ixo tabaa a pitnö ne arip*

*(Matiu 14.13-21; Mak 6.30-44; Luk 9.10-17)*

<sup>1</sup> Io, melamu xina niang, Jisas ixo wan köröp kö tu Galili, niang toxobo rengrengren bölök ine me tu Taiberias.

<sup>2</sup> Ma a marakörö raxin saxit toxo muu ine, möxösa, idi toxoro pere a lölös ne auxilieng niang ixo wewet tua ölanglanga abo miniset.

<sup>3</sup> Io, Jisas ixo wan kaa urso xö gegene maii, ma ixo kis arixe mabo bak ne ausu re ine.

<sup>4</sup> Ma a axana bung möxö Nien ne Luxa ne Nuan Lexe möxöbo Judeia ixoro lörorö.

<sup>5</sup> Ma niang e Jisas ixo wawara kaa ma ixo pere a marakörö raxin toxo önan pösöt ine, ixo tengen te Pilip, "Ire tabo kun beret ule xö ina marakörö na ra enen?"

<sup>6</sup> Ixo ose bira ra könönöin e Pilip, möxösa, ixoro ösöxö sik a lasanene niang irabo pet.

<sup>7</sup> Pilip ixo balu ine, "A nini mar ne tuluwok i kebeöt niang bere ire tabo kun beret min, bara idi xirip öngöng tabo en a uk mon!"

<sup>8</sup> Ma önga bak ne ausu xabise, e Endru, a töne e Saimon Pita, ixo tengen,

<sup>9</sup> "Önga barok ka, i kip nanin a pitnö ne beret te pet ma bali, ma nine en lik, ma lamun irabo top kirip ina marakörö na bule?"

<sup>10</sup> Jisas ixo tengen, "Tengen kö marakörö bara ta kis kö pu." A pasle deek iang kina xönö niang kua kinis, ma a nangadi toxo kis kö pu. Ma a xinixos sidi abo duöng mon ixo eöt ma pitnö ne arip.



<sup>11</sup> Io, Jisas ixo tön lo a beret, ixo tengen deek ke God, ma ixo erimine nanin kö marakörö niang toxo kisisik kua wewet eörin a maaaa re idi. Ma ixo pet bienin kö nini en.

<sup>12</sup> Ma niang idi toxo an masii im, Jisas ixo tengen köbo bak ne ausu re ine, "Mum moro ii ot kirip abo subana nien. Ganim e mum pa ögarin tebo subana nien."

<sup>13</sup> Io, idi toxo ii ot kirip abo subana nien ma toxo tuxo öwöwö a sangaun ma ninöng ne kölöt arixe mabo subana pitnö ne beret nang ewe midi toxo en paling.

<sup>14</sup> Ma nang a marakörö toxo pere ina auxilieng lölös niang e Jisas ixo pet, idi toxo tengen, "Turunon saxit, ina tödi na, ine ina propet niang irabo ot ta xö öxöno lagunon."

<sup>15</sup> Me Jisas ixo ösöxö xulen bara idi tere örörö rua nuanot tua ölölös ine bara irabo king. Io, ine xalik ixo wan lo xalik idi urso xö önga maii raxin.

*Jisas ixo wan lömö xö ari*

*(Matiu 14.22-33; Mak 6.45-52)*

<sup>16</sup> Ma niang ixoro aien su maraxoxo im, abo bak ne ausu rine toxo wan su uruo xö tu Galili.

<sup>17</sup> Idi toxo kaa laxa xö önga mön, ma toxo lilies köröp kö tu uruo Kaprenaum. Ma ixoro ködö im, me Jisas kaim bang kö inot pösöt idi.

<sup>18</sup> A xiki lölös ixo wawaxat ma rasi ixo raru.

<sup>19</sup> Ma niang idi toxoro ulusen ot kö pitnö ma öng bara xö pitnö ma ninöng ne kilomita, idi toxo pere e Jisas ixo önan lömö xö ari urungan lörorö xö mön, me idi toxo buut saban arixe.

<sup>20</sup> Inexalik, e Jisas ixo tengen tö idi, "E mon. Ganim a binuut."

<sup>21</sup> Io, idi toxo maa bara irabo kakaa xö mön. Ma saxit mon, a mön ixo ösö xö xönö niang idi toxo önan uxe.

*Jisas ine a beret ne to ulorexe*

<sup>22</sup> Io, xö bung melamu, a marakörö raxin niang toxo kisisik bang kö lawana tu, toxo döxömen bara ina önga mön kalik mon niang ixo xisixis singan. Me idi toxo ösöxö bara abo bak ne ausu re ine toxoro wan lo, me Jisas kaim kö arixe me idi.

<sup>23</sup> Mabo mön kabise meri xö lagunon Taiberias toxo ösö lörorö xina lagunon niang a marakörö toxo en a beret niang e Jisas ixo tengen deek ulamun.

<sup>24</sup> Ma nang a nangadi toxo ösöxö lo bere Jisas mabo bak ne ausu rine kawaim, idi toxo kaa xöbo mön ma toxo muu uruo Kaprenaum rua winara rö ine.

<sup>25</sup> Ma niang idi toxo pere wösöt lo e Jisas kö gegene tu, idi toxo tengen te ine, "Tene Ausu, u wan ura lause?"

26 Io, Jisas ixo balu idi, "Turunon saxit, mum mo wawara siwin e, möxösa, mum moxoro en a beret me mum moxoro masii xönan. Ma lamun mum kobo wawara rö e, möxösa, mum muru perexulen abo auxilieng niang e xo pet.

27 Ganim e mum pa tinörön lamun a nien niang irabo saban. Ma lamun mum morobo rörön lamun a nien niang irabo kisisik iat ma irabo isik a to ulorexe. A Barok kö Tödi irabo tabaa e mum ma ina nien na, möxösa, e God a Tamana ixoro osen bara i maraxa sik kö niang ine i wewet."

28 Io, idi toxo ose e Jisas, "Mem marabo mana pet a sa rua wewet abo tinörön niang e God i maaaa ulamun?"

29 Me Jisas ixo balu bira, "A tinörön niang e God i maa bara mum morobo pet i bira. Mum morobo nunu xö öng niang e God ixoro tile ine ura."

30 Io, idi toxo ose ine, "A mangana auxilieng lölös sa iang örobo pet niang mem marabo pere, me mem marabo nunu re nöngön? Örobo pet a sa?"

31 Abo untubuno ire toxo en a manna ruso xö xönö tataun. Ma tinenge re God niang toxo geet i tengen bira: 'Ixo tabaa idi ma beret meriso xö watmaep pua enen.' "

32 Io, Jisas ixo tengen te idi, "Turunon saxit, kawaim bere Moses iang ixo tabaa e mum ma beret meriso xö watmaep, ma lamun a Tamake iang i tabaa e mum ma beret tunon meriso xö watmaep.

33 Möxö a beret meriso re God, ine mon a öng niang ixo wan su meriso xö watmaep ma i isik a to xö öxöno lagunon."

34 Io, idi toxo tengen te ine, "Orong, mem me maa bara örobo tabaa sösöxöin e mem ma ina beret."

35 Me Jisas ixo wöwörö re idi bira, "E mon a beret möxö to. Ewenene niang i wan pösöt e i kebeöt ta irilöng, me ewenene niang i nunu re e i kebeöt ta minauu.

36 Ma xarniang e xoro tengen te mum, mum moxoro pere e, lamun mum kobo nunu.

37 Me idi xirip niang e Tata i tile idi ura re e, idi tabo wan ura re e. Me ewe a öng niang i ot pösöt e, e kebeöt ta tile rewe ine,

38 möxösa, e xoro wan su meriso xö watmaep pua wewet eörin a maaaa xö öng niang ixo tile e ura. Me e kara muu a maaaa iat te e.

39 Ma a maaaa rewe niang ixo tile e ura i bira. I maa bara e bele ömalim tewe re öng mere idi xirip ewe niang ixoro tabaa e min. Lamun e rabo öraru öbaling idi xö axana bung möxö xakawöm,

40 möxösa, a Tamake ibo maa bara idi xirip ewe niang te perexulen a Barok ke ine ma te nunu bölök ke ine, idi tabo

kip a to ulorexe. Me e rabo öraru öbaling idi xö axana bung möxö xakawöm.”

41 Ma marakörö toxo bala kadik ma toxo urulo ra tinenge oleleng lamun ine, möxösa, ixo tengen bara, “E mon a beret niang ixo wan su meriso lömö xö watmaep.”

42 Me idi toxo tengen, “Ine mon e Jisas a bak ke Josep, me ire te ösöxö sik a tamana ma nene. Ma bara bule belek i tengen bara ixo wan su meriso xö watmaep?”

43 Io, Jisas ixo tengen tö idi, “Ganim e mum pa tinenge oleleng kaluluonin e mum iat.

44 Kaim pe öng i kebeöt tua nuanot ura re e niang bara a Tamake i kobo silien ine, ma arabö öraru öbaling ine xö axana bung möxö xakawöm.

45 Abo propet toxoro geet bira: ‘*God irabo usu idi xirip.*’ Me idi xirip ewe niang te ölangen e Tata ma te kip a ausu xalik ine, irabo wanot ura re e.

46 Niang e rengrengen bira, i kobo turunon bara re öng ixoro pere a Tamake. Kawaim. Öng kalik mon niang ixo wanot meriso re God, ine xalik mon iri pere e Tata.

47 Turunon saxit, ewenene niang i nunu re e irabo kip lo a to ulorexe.

48 E mon, a beret möxö to.

49 Abo untubuno mum toxo en a manna xö xönö tataun, ma lamun idi toxo met.

50 Lamun a na a beret niang i wan su meriso xö watmaep, me ewe i en i karabo met.

51 E mon a beret möxö to niang ixo wan su meriso xö watmaep. Nang bara ewenene niang i en ina beret, irabo to ulorexe saxit. Ma a beret niang e rabo tabaa idi min, ine a aike niang e rabo isik tewe, bara a nangadi tabo kip a to.”

52 Nang ine ixo tengen sik bira, abo Judeia toxo egot kaluluonin idi iat ma toxo tengen, “Ina tödi na irabo isik a aine bule rö ire ra enen?”

53 Me Jisas ixo tengen te idi bira: “Turunon saxit, nang bere mum kobo en a aine a Barok kö Tödi, ma mo köbo inim a dee rine, kaim pe to i karabo kis se mum.

54 Lamun ewenene niang i en a aike ma i inim a dee re e, a to ulorexe saxit i kis se ine, ma arabö öraru öbaling ine xö axana bung möxö xakawöm,

55 möxösa, a aike, ine a nien tunon, ma dee re e, ine a ininim tunon.

56 Ewenene niang i en a aike ma i inim a dee re e, ine i kis arixe me e, me e kis arixe mine.

57 A Tamake niang ixo tile e ura, ine ma to, me e to sik, möxösa, ine i to. Io, ewe nang i en e, irabo to, möxö e to sik.

<sup>58</sup> Ina beret mon na niang ixo wan su meriso xö watmaep. Ma i kobo xarnang a manna niang abo untubuno ire toxo en ma toxo met. Ma lamun ewe niang i en ina beret irabo to ulorexe.”

<sup>59</sup> Io, Jisas ixo tengen im ina na niang ixo usu idi kölöme xö gunon ne sineseng ki Kaprenaum.

*A oleleng toxo wan kalik e Jisas*

<sup>60</sup> Ma nang a oleleng ne bak ne ausu toxo ölangen ina na toxo tengen, “A ausu na a lak lölös köba. Ewenene runon im i eöt tua ömaraxen lo?”

<sup>61</sup> Me Jisas ixo ösöxö sik bara abo bak ne ausu toxo tenge oleleng lamun ina na. Io, Jisas ixo tengen tö idi, “A tingenge na i öriip gut abo bala mum?”

<sup>62</sup> Nang bara mum mo örasen bira, mum morobo döxömen bule niang bara mum mo pere a Barok kö Tödi niang irabo wan kaa baling urso xö xönö niang ixo ot mee!

<sup>63</sup> A Tanono ibo isik a to. A lölös kö nangadi ibo lalaa tataun. Ma lamun abo tingenge niang e xo töngösen e mum min, tobo wanot meringan kö Tanono ma tobo isik a to.

<sup>64</sup> Lamun a dauleng iat te mum tokobo nunu.” Jisas ixo tengen bira, möxösa, me lorexe saxit ine ixoro ösöxö ewe ridi niang kaim kö nunu ma ewe niang irabo isik ine xö limine nangadi.

<sup>65</sup> Me Jisas ixo tengen öbaling, “Ma ina na a unine e xoro tengen lorexe re mum bara kaim pe öng irabo eöt ta nuan ura re e niang bara Tamake i kobo öbala ine rua nuan bira.”

<sup>66</sup> Ma oleleng ne bak ne ausu re Jisas toxo wan kalik ine, me idi kaim kö eöt ta nuan arixe im mine, möxösa, ine ixo tengen bira.

<sup>67</sup> Io, Jisas ixo ose a sangaun ma ninöng ne bak ne ausu re ine bira: “Mum kobo mamaa bara mum bölök morobo wan?”

<sup>68</sup> Me Saimon Pita ixo balu ine bira, “Orong, mem marabo wan lo im pa ule? Abo tingenge re nöngön ibo isik a to ulorexe.

<sup>69</sup> Mem me ösöxö sik ma me nunu bölök bara nöngön a Öng Nang a lak Madakdak meriso re God.”

<sup>70</sup> Io, Jisas ixo tengen te idi, “E iat e xo pere kos lo e mum a sangaun ma ninöng. Inexalik a öng ke mum a lak saban ine. I wawara bara i eöt ma önga tano saban.”

<sup>71</sup> (Ma ixo rengrengen mon e Judas, a barok ke Saimon Iskariot. Ma i turunon e Judas ine a öng möxö ina sangaun ma ninöng, lamun ine nang irabo isik e Jisas kö limine nangadi.)

## 7

*Jisas ixo wan urungan kö Luxa*

<sup>1</sup> Io, melamu xina na, Jisas ixo wan kö boxönö xirip kölöme Galili. Ine ixo xisixis tewe xalik a xönö Judeia, möxösa, abo Judeia meringan idi toxo wawara siwin ine rua sesexomet ine.

<sup>2-3</sup> Inexalik nang a Luxa möxöbo Gunon ne Walpali xöbo Judeia ixoro lörörö, abo tönö e Jisas idi toxo tengen tö ine, “Nöngön örobo mana wan tewe mera ma örö wan u Judeia rua nang abo bak ne ausu re nöngön idi tabo pere abo tinörön niang u bo wewet.

<sup>4</sup> Nang bara re öng i maa bara tabo ösöxö ine, i kobo umingen a lasa nang ine ibo wewet. Kaim. Nang bara u bo wewet inabo lalaa na, örobo mana osen nöngön kö nangadi xirip.”

<sup>5</sup> Abo tönö ine toxo tengen bira, möxösa, idi bölök kaim kö nunu rine.

<sup>6</sup> Io, Jisas ixo tengen tö idi, “A axana bung ke e i kela wanot iat bang. Inexalik abo axana bung kirip ibo eöt te mum.

<sup>7</sup> A öxöno lagunon i kebeöt ta mölmölök kalik e mum, ma lamun idi te mölök kalik e, möxösa, e bo etöngösen ma turunon mere idi bara abo tatalien tidi a lak saban.

<sup>8</sup> Göm. Mum moro wan urungan kö luxa. Me e karabo wan urungan, möxö a axana bung ke e i kela wanot iat bang.”

<sup>9</sup> Ma bara ine ixo tengen bira re idi, me ine ixo xisixis iat bang kingan Galili.

<sup>10</sup> Ma nang abo tönö ine, idi toxoro wan urungan kö luxa, Jisas ixo muu bölök. Ma kaim bara ixo wan kö malmalan. Ine ixo wan sixem lo mon.

<sup>11</sup> Io, ringan kö luxa, abo sisila ne Judeia toxo wawara siwin ine ma toxo ose bara, “Ule im ina tödi?”

<sup>12</sup> Ma a marakörö raxin idi toxo wöwörö lixilik nana lamun ine. Ma dauleng toxo tengen bara, “Ine a tödi deek.”

Ma a dauleng kabise toxo tengen bara, “Kaim. Ine a öng nang ibo röxröxö lo a nangadi.”

<sup>13</sup> Inexalik bara kaim pe öng ka tengen te laa ulamun ine xö wawara xö nangadi, möxösa, idi toxo buburin abo sisila ne Judeia.

*Toxo döxömen bara Jisas ine a Mesaia*

<sup>14</sup> Ma nang a luxa ixoro önan aluo, Jisas ixo wan laxa urungan kö gunon ne lotu raxin ma ixo urulo ra eusu.

<sup>15</sup> Ma abo Judeia toxo wuwus me idi toxo ose bara, “Bule runon ma ina tödi na i ösöxö a oleleng ne lalaa ma kawaim ine ra inausu?”

16 Ma nang e Jisas ixo ölangen bira, ixo tengen, "Abo inausu e eusu min, kaim bere re e iat. Ma lamun te ine ewe nang ixo tile e ura.

17 Nang bara ewenene i maaaa bara irabo muu abo maaaa xö God, ine iat irabo ösöxö lo abo inausu re e, bara meringan kalik e God, bara e wöwörö tataun mon kö dinödöm pe e.

18 Me ewenene nang ibo wöwörö iat ma lölös sine, ine ibo ii öxaa öbaling iat ine. Ma lamun ewe a öng i maa bara irabo ii öxaa a öng ewe nang ixo tile ine, ine a tödi runon, ma kaim pe töxö xö to rine.

19 Mum moxo ösöxö bara Moses ixo isik abo warkurai te God urungan te mum. Inexalik kaim pe öng ke mum ibo mumu inabo warkurai. Ma ruasa mum mo maaaa rua sesexomet e?"

20 Io, a marakörö xirip toxo tengen tö ine, "A tano saban iri laxa re nöngön! Me ewenene i maa rua sesexomet nöngön?"

21 Jisas ixo balu a tinenge re idi bira, "E xo pet a önga laa mon me mum kirip moxo wuwus könän.

22 Inexalik mum bo xurxuru a barok lik kö bung möxö Sabat, möxösa, Moses ixo isik ina warkurai re mum. (Ma lamun kaim bara ixo ot meringan te Moses. Abo tubu mum iat mee mesila toxo urulo.)

23 Nang bara te kuru a önga barok lik kö bung möxö Sabat, xalik e mum bo lexe a warkurai te Moses,\* ruasa me mum mo laie re e, möxösa, e xo ölanglanga xirip a miniset kö tödi xö bung möxö Sabat?

24 Ganim e mum pa werwere wuxus ma werwere ödeek abo lalaa xarnang köbo winawara re mum iat. Inexalik mum morobo pere runin abo lalaa."

25 Io, dauleng ne nangadi meringan Jerusalem, idi toxo rengrengen bira, "Ina tödi mon na nang idi te maa rua sesexomet ine.

26 Moro pere! Ine iat i wöwörö xö wawara xö nangadi xirip. Inexalik idi kawaim kö rengrengen te tinenge re ine. Ma abo sisila te ösöxö gut bara turunon ine a Mesaia?

27 Inexalik bara ire tere ösöxö bara ina tödi ine mole. Ma nang bara a Mesaia irabo wanot, kaim pe öng irabo ösöxö bara ine i wanot mole."

28 Ma nang e Jisas nangen ixo eusu kölöme xö xönö möxö gunon ne lotu raxin köbo Judeia, ine ixo tengen bira, "Mum

\* 7:23 A warkurai te Moses i tengen bara tabo kuru a aine barok lik kö pitnö ma narun ne bung melamu xö nang a nago i kip ine. Ma abo Judeia toxo döxömen bara ina magingin na önga mangana tinörön. Ma lamun nang bara ina sese öpitnö ma narun ne bung ixo subu xö Sabat, idi toxo kuru iat a aine barok lik kö Sabat.

mo dōxōmen bara mum mo ösōxō e me mum mo ösōxō bōlōk bere e mole. E kobo wanot kō maaaa re e iat. Inexalik a öng nang i tile e ura, ine ibo wewet abo turunon. Me mum kobo ösōxō ine.

<sup>29</sup> Inexalik e ösōxō ine, möxō e mere ine me ine ixo tile e ura."

<sup>30</sup> Ma bara ine ixo tengen bira, idi toxo maaaa rua rōrōdik ine. Ma lamun kaim pe öng ka sisigi ine, möxō a axana bung kine i kobola wanot bang.

<sup>31</sup> Inexalik dauleng ke idi kōlōme xina marakörō, idi toxo nunu rine. Idi toxo tengen, "Nang bara Mesaia irabo wanot, i eöt bara ine irabo pet ot tebo oleleng ne auxilieng kō ina tōdi na ixo pet?"

<sup>32</sup> Abo Parasi toxo ölangen a marakörō toxo wōwōrō lixilik mabo mangana lalaa ulamun ine. Io, abo pris tataxin ma abo Parasi toxo tile rewe a dauleng ne umri ewe idi tobo ruruu wi a gunon ne lotu raxin bara idi tabo tōndik e Jisas.

<sup>33</sup> Jisas ixo tengen, "E kebeöt ta kinis ömat me mum. Kaim. Ma ulik melamu e rabo wan urungan kō öng ewe nang ixo tile e ura.

<sup>34</sup> Mum morobo wawara nana rō e, nexalik mum korobo eöt ta werwere lo e. Ma xōnō nang e rabo xisixis kōnan, mum korobo eöt bara mum morobo wan uwe."

<sup>35</sup> Ma abo Judeia toxo wōwōrō nana iat tidi bara, "Ina tōdi na i maa rua nuan taule, io nang ire tekebeöt ta werwere lo ine? Bule, nagut ine irabo wan kalik ina xōnō ma irabo kis arixe mabo nangadi re ire ewe nang te xisixis nana xōbo xōnō möxōbo Grik ma irabo usu inabo Grik?"

<sup>36</sup> Me ine ixo tengen bara ire tabo wawara nana rō ine, nexalik ire takarabo eöt ta werwere lo ine, ma nang bara ine i kis kō xōnō sa, ire bōlōk tekebeöt bara ire tabo wan uwe. Bule runon ma i tengen bira?"

<sup>37</sup> Io, a bung möxō öxōwōm a luxa, ma ixo önga bung taxin. Ma xina bung, Jisas ixo taru kaa ma ixo wōwōrō raxin bira, "Nang bara ewe re öng i minauu, irabo wan pösöt e ma irabo inim.

<sup>38</sup> Ewenene i nunu re e, abo ari möxō to irabo sen meringan kōlōme rine xarnang abo tinenge xō God idi toxo geet i tengen bie."

<sup>39</sup> Jisas ixo tengen ina na ulamun a Tōxödös ne Tanono, nang abo tene nunu re ine tabo kip lo, möxō God i kela isik a Tanono, möxōsa, a mariris se Jisas i kela wanot maras bang.

<sup>40</sup> Ma nang a dauleng ne nangadi toxo ölangen abo tinenge ine ixo tengen, io, idi toxo tengen bara, "Turunon saxit, ina tōdi na ine iat mon a propet ewe nang toxo xuxubus ulamun ine."

41 Ma dauleng kabise toxo tengen bara, "Ine a Mesaia."

Inexalik a dauleng iat baling toxo ose bara, "A Mesaia irabo ot bule mee Galili?"

42 I kobo eöt bira, möxösa, abo ginigeet te God i tengen bara a Mesaia irabo wanot meringan kö untubuno e Dewit, ma i wanot mee Betliem, a lagunon nang e Dewit ibo xisixis ee."

43 Io nang, a nangadi toxo tawalang kua gene Jisas.

44 A dauleng kidi toxo maaaa rua rörön dik ine, ma lamun kaim pe öng ka sisigi ine.

*Abo sisila xöbo Judeia idi kaim kö nunu bara e Jisas a Mesaia*

45 Io, abo umri ewe nang tobo ruruu wi a gunon ne lotu raxin, idi toxo tawuxus baling urungan köbo pris tataxin ma abo Parasi. Mabo sisila toxo tengen tö idi, "Ruasa me mum kobo lamus ine ura?"

46 Ma abo umri toxo balu idi bira, "Kaim turunon iat bara re öng ibo wöwörö xarnang ina tödi na."

47 Ma abo Parasi toxo tengen öbaling kidi, "Ine iri ömamang bölök e mum, goo?"

48 Bule, rebo dauleng ne sisila ma bara rebo Parasi, idi te nunu bölök ke ine, goo?"

49 Kaim! Inexalik ina marakörö raxin mon na nang idi tere pet bira. Lamun idi kaim pa ösöxö abo warkurai te God. Io nang, God irabo uguran sik idi xö minet."

50 Io, Nikodimas a öng bölök mere idi abo Parasi. Ine mon nang ixo ot pösöt bang e Jisas mesila, ma ixo tengen tö idi,

51 "Abo warkurai te ire i tengen bara ire tabo ölangen a tödi rua marmaras ulamun a lasa ine i pet mesila bara ire te eöt tua kure ine."

52 Io, idi toxo balu ine, "Go! Nöngön gut bölök meringan Galili? Örobo kos ödeek abo tinenge re God ma örobo pere lo bara önga propet i karabo wanot mee Galili."

53 [Io, idi toxo wan urungan köbo lagunon tidi öngöng.

## 8

*A une nang ixo wewet ögarin alolo*

1 Jisas ixo wan kaa uruso lömö xö Maii Olip.

2 Ma xö puxu bubung ine ixo wanot baling kuso kölöme xö gunon lotu raxin niang a marakörö toxo ot luluruein ine. Io, ine ixo kis ma ixo urulo ra usu idi.

3 Abo tene aušu möxöbo warkurai te Moses mabo Parasi idi toxo lamus öläxa önga une nang toxo pere lo ine ixo maru arixe ma önga tödi xabise nang kaim bara re ine. Me idi toxo uru ine xö wawara xö nangadi.



<sup>4</sup> Me idi toxo tengen te Jisas, “Tene Ausu, a une na toxo pere lo ine ixo wewet a magingin saban arixe ma önga tödi.

<sup>5</sup> Kölöme xö warkurai te Moses i tengen bara ire tabo teng ömet önga mangana une bira ma warawat. Me nöngön, örobo tengen bule?”

<sup>6</sup> Idi toxo tengen bira rua uxun ine bara idi tabo eöt ta tengen bara ine iri pet a sasaban.

Ma lamun e Jisas ixo tunsu ma ixo urulo ra ginigeet kö pu arixe ma kasine limine.

<sup>7</sup> Niang idi toxo ose xöbanin ine, ine ixo taru kaa ma ixo tengen te idi, “Nang bara öng ke mum kaim ine ma magingin saban, ine irabo arun ta tewe a warawat urungan tine.”

<sup>8</sup> Me ine ixo tunsu baling ma ixo gegeet kö pu.

<sup>9</sup> Niang idi toxo ölangen ina na, idi toxo urulo ra nuan öngöng. Abo duöng tataxin toxo arun ta silien idi ot nang e Jisas kalik mon ma une nang nangen ixo tuu sik.

<sup>10</sup> Jisas ixo taru kaa ma ixo ose ine, “Naang! Idi ule im? Kaim pe öng i kure bara örobo kip a ömokorot?”

<sup>11</sup> Ina une ixo balu, “Kaim pe öng.”

Io, Jisas ixo tengen, “E bölök e kobo kure bara örobo kip a ömokorot. Go, örö wan, ma lamun u bele wewet öbaling ke sasaban.”]

### *A tinenge re Jisas ulamun ine iat*

<sup>12</sup> Nang e Jisas ixo wöwörö baling kö nangadi, ine ixo tengen, “E a bibio möxö öxöno lagunon. Nang bara ewenene i muu e i kobo eöt tine ra nuan kö ködö, lamun irabo tön sik a bibio möxö to.”

<sup>13</sup> Abo Parasi toxo tengen te ine, “A tinenge re nöngön i kobo lölös, möxösa, nöngön iat mon, u tengen ösu ina mangana lalaa na ulamun nöngön iat.”

<sup>14</sup> Io, Jisas ixo balu idi bira, “Kaim. Nang bara e tengen ösu lamun e iat, a tinenge re e i turunon sik, möxösa, e ösöxö a xönö nang e xo wanot mee ma xönö nang arabo wan uwe. Inexalik mum kobo ösöxö a xönö nang e xo wanot mee ma xönö nang arabo wan uwe.

<sup>15</sup> Mum bo kure a nangadi arixe ma dinödöm pe mum iat mera xö öxöno lagunon. Ma lamun e kara ösöxö ra kure re öng.

<sup>16</sup> Ma lamun nang bara e kure re öng, a tinenge re e i turunon, möxösa, kaim bara e xalik mon. E arixe me Mama ewe nang ixo tile e ura.

<sup>17</sup> Kölöme xö warkurai te mum iat, e Moses ixo geet bira: Nang bara ninöng te aut ulamun önga tinenge, io, ina tinenge i turunon.

18 E a öng nang i rengrengen ösu ulamun e, me Mama nang ixo tile e ura, ine bölök ibo rengrengen ösu ulamun e."

19 Io, idi toxo ose e Jisas, "A Tata re nöngön ule?"

Jisas ixo balu idi, "Mum kobo ösöxö e, me mum kobo ösöxö bölök a Tata re e. Nang bara mum moxoro ösöxö e, mum morobo ösöxö bölök a Tata re e."

20 Ine ixo wöwörö minabo tinenge na nang ine ixo usu a nangadi xö xönö möxö gunon lotu raxin lörörö xö xönö möxö bulbulus tuluwok. Kaim pe öng ixo tön ine, möxösa, a axana bung kine e kala wanot bang.

### *Jisas ine meriso lömö*

21 Jisas ixo tengen öbaling ke idi, "E rabo wan kalik e mum, me mum morobo wawara siwin e, me mum morobo met kelen abo magingin saban te mum. A xönö nang arabo wan uwe, mum kobo eöt ta nuanot könan."

22 Ina tinenge na ixo engin abo Judeia toxo eose, "Bule, irabo sexomet ine iat? Ina unine gut i tengen bira, 'A xönö nang e rabo wan uwe, mum kobo eöt ta inot könan'?"

23 Me ine ixo tengen bölök bira, "Mum mera xö pu. E meriso lömö. Mum mera xö öxöno lagunon. E kaim bara e mera xö öxöno lagunon.

24 E tengen te mum bara mum morobo met kelen abo magingin saban te mum. Nang bara mum kobo nunu bara e ewenene nang e bo rengrengen bere e ine, mum morobo met kelen iat abo magingin saban te mum."

25 Idi toxo ose, "Ewe nöngön?"

Jisas ixo balu idi, "A lasanene iang e xo wöwörö min kö urulo.

26 E ma oleleng ne tinenge rua rengrengen ma rua kure e mum min. Ma lamun öng nang ixo tile e ura, ine i turunon, ma a lasa nang e xo ölangen meringan te ine, e bo rengrengen kö öxöno lagunon."

27 Idi kaim kö ösöxö bara ixo rerege re idi ulamun a Tamana.

28 Io, Jisas ixo tengen, "Nang bara mum mo ii öxaa a Barok kö Tödi, io, mum morobo ösöxö bara e ewenene nang e bo rengrengen bere e ine, me e kara ösöxö ra wewet te laa xö dinödöm pe e iat. Lamun e bo wöwörö ma lasa mon e Mama ibo usu e min.

29 Ewe nang i tile e, i kis arixe me e. Ine i kara wan pes e, möxösa, e bo wewet eörin a lasa ibo öaxanan ine."

30 Ma nang ine ixo wöwörö bira, a oleleng toxo nunu rine.

### *Jisas me Abaram*

<sup>31</sup> Jisas ixo tengen urungan kōbo Judeia nang toxo nunu rine bira: “Nang bara mum mo tōndik abo inausu re e, mum abo bak ne ausu runon te e.

<sup>32</sup> Io, mum morobo ösöxö a turunon, ma a turunon irabo ömamanaa e mum kalik abo kunubus se mum.”

<sup>33</sup> Idi toxo balu ine, “Mem abo untubuno e Abaram ma kaim pe öng ixo kut dik e mem bara mem marabo rōrōn lawu rine. Ma bule u tengen bara örobo ömamanaa e mem kalik abo kunubus?”

<sup>34</sup> Jisas ixo balu bira: “Turunon saxit, ewe nang ibo wewet abo magingin saban, abo magingin saban te ine ibo xuxut dik ine.

<sup>35</sup> A tultul nang ibo wewet abo tinörön lölös kö önga barama i kobo eöt ta kinis ulorexe xina barama. Lamun a Barok ke Mama möxö ina barama irabo kis ulorexe.

<sup>36</sup> Nang bara a Barok kö God irabo palas tewe e mum, io, mum morobo langlanga xalik abo kunubus kirip pe mum.

<sup>37</sup> E ösöxö bara mum abo untubuno e Abaram. Ma lamun mum ka sesexomet e, möxösa, a tinenge re e i kobo kis kölöme re mum.

<sup>38</sup> E rengrengen a lasa nang e xoro pere lo xalik a Tata, me mum mo wewet a lasa nang mum moxoro ölangen kalik a tata re mum.”

<sup>39</sup> Io, idi toxo tengen, “Abaram a tata re mem.”

Jisas ixo balu idi bira, “Nang bara mum mexebe a bung baroxorok ke Abaram, mum morobo mana pet abo lalaa nang Abaram ixo pet.

<sup>40</sup> Ma lamun nangen iat mum ka sesexomet e, me e ina tödi ewe nang ixo tengen abo turunon nang e xo ölangen meriso re God. Inabo mangana lalaa na Abaram kaim kö wewet.

<sup>41</sup> Mum bo wewet abo lalaa nang a tamana e mum iat ibo wewet.”

Io, idi toxo tengen te ine, “Mem kaim bara a bung baroxorok möxö ngas. E God kalik mon a Tata re mem.”

<sup>42</sup> Jisas ixo tengen te idi, “Nang bere God a Tata re mum, mum moxoro maaaa re e, möxösa, e xo wan su meriso re God ma na e ia. E kobo wan su xö maaaa re e iat, lamun ine iat ixo uguran e ura.

<sup>43</sup> Ruasa mum kobo maras kö tinenge re e? Möxö mum kobo ölangen kulen a sa e rengrengen.

<sup>44</sup> Mum abo baroxorok kö tata re mum, e Satan, me mum ka mumuu eöt a maaaa re tata re mum. Mesila ine a tödi möxö sexomet nangadi ma i kobo ösöxö a turunon ulamun e God möxö kaim a turunon kölöme rine. Ma nang bara ibo etöxö, ibo rengrengen meringan iat tine, möxösa, ine a önga tene atöxö, ma tamana röxröxö.

<sup>45</sup> Me e belek, e bo rengrengen a turunon ulamun e God, ma ina unine bara mum kobo nunu xöbo tinenge re e.

<sup>46</sup> Ewe re mum i eöt bara irabo tengen te e bara e xoro pet te sasaban? Ma nang bara e tengen a turunon, ruasa mum kobo nunu re e?

<sup>47</sup> Ewe nang mere God ine ibo ölangen abo tinenge re God nang ibo rengrengen. Nang bara mum kobo ölangen abo tinenge re ine, a unine bara mum kaim bara mere God."

<sup>48</sup> Abo Judeia toxo balu ine, "Mem bo rengrengen bara nöngön a Samaria ma bara a tano saban ixoro tup pe nöngön. I turunon, goo?"

<sup>49</sup> Jisas ixo balu idi bira, "Kaim pe tano saban ixo tup pe e. Lamun e bo ii öraxin a Tamake, me mum bo öbulubun e.

<sup>50</sup> E kobo ii öraxin öbaling a eseke, ma lamun nangen a öng nang i mamaa bara irabo ii öraxin a eseke, me ine a tene warkurai.

<sup>51</sup> Turunon saxit, ewe nang i töndik sik a tinenge re e, i kobo eöt ta minet."

<sup>52</sup> Ma nang abo Judeia toxo ölangen ina na, toxo tengen bira, "Na mem me ösöxö bara a tano saban i tup pe nöngön. Abaram ixo met, ma abo propet bölök. Inexalik u tengen bara ewe nang i muu eörin a tinenge re nöngön ine i kobo eöt ta minet.

<sup>53</sup> Nöngön u kobo taxin kö untubuno e mem, Abaram. Ine ixo met mabo propet bölök. U döxömen bara ewe nöngön nang u tengen bira?"

<sup>54</sup> Io, Jisas ixo balu bira, "Nang bara e ii öraxin a eseke iat, a laa tataun mon ine. A Tamake ewe nang mum bo rengrengen bara ine a God te mum, ine ewe nang ibo ii öraxin a eseke.

<sup>55</sup> Me mum kobo ösöxö ine, nexalik e ösöxö sik ine. Nang bara e xoro tengen bara e kobo ösöxö ine, e a tödi toxo xarnang e mum. Ma lamun e ösöxö ine me e muu eörin abo tinenge rine.

<sup>56</sup> A tamana e mum nang e Abaram ixo axanan, möxösa, ine ixo ösöxö bara irabo pere a axana bung ke e. Ine ixo pere ma ixo axanan."

<sup>57</sup> Ma abo Judeia toxo tengen te ine, "Nöngön u kala pitnö ne sangaun ne awat, ma bara bule u tengen bara uru pere e Abaram?"

<sup>58</sup> Me Jisas ixo balu idi, "Turunon saxit, kaim bang a xikip e Abaram, me e iat mon nangen."

<sup>59</sup> Ma nang idi toxo ölangen ina na, idi toxo ii a warawat ta reteng ine, lamun e Jisas ixo mun kalik idi ma ixo wan kalik ina xönö möxö gunon ne lotu raxin.

## 9

*Önga tödi toxo kip ine ma lak pulo*

<sup>1</sup> Ma niang e Jisas ixo önan, ixo pere a önga tödi toxo kip ine ma lak pulo.

<sup>2</sup> Mabo bak ne ausu rine toxo ose ine, "Tene Ausu, ewenene ixo pet a magingin saban ma niang toxo kip ine ixo pulo? Ina tödi bara a tamana arixe me nene?"

<sup>3</sup> Jisas ixo tengen, "Kaim pe öng mere idiet ixo pet te sasaban. Ma lamun ina na ixo ot bira rua osen a tinörön te God kölöme xina tödi.

<sup>4</sup> Nang bang i xaken sik, ire tabo mana pet a tinörön te ine ewe niang ixo tile e. A ködö irabo ot, ma i kebeöt im bere re öng irabo rörön.

<sup>5</sup> Nang e ia xö öxöno lagunon, e a bibio möxö öxöno lagunon."

<sup>6</sup> Nang ixoro tengen sik biringan ixo gigisip kö pu, ma ixo pet arixe ma pixak ma ixo bulus kö nine marna.

<sup>7</sup> Me Jisas ixo tengen kö ina tödi, "Örö wan ma örö etos kö ina Marna Ari Siloam." (A unine a esene Siloam bara 'Uguran'.) Io, ina tödi ixo wan ma ixo etos. Ma ixo wan baling urungan kö lagunon ma nine marna ixoro tamasawang.

<sup>8</sup> Abo duöng nang toxo ösöxö sik ine me idi ewe nang toxobo werwere ine nang ixobo seseseng marmaris ulamun a tuluwok, idi toxo wöwörö nana bara, "Ine mon ina tödi nang ixobo kisisik kingan ma ixobo seseseng marmaris ulamun a tuluwok. Goo?"

<sup>9</sup> Dauleng toxo aut bere ine iat mon.

Ma dauleng kabise toxo tengen bara, "Kaim. I wawara mon xarnang ine."

Melamu ine iat ixo tengen osen bara, "E mon ina tödi."

<sup>10</sup> Io, idi toxo ose ine, "Bara bule ma nini maram i tamasawang?"

<sup>11</sup> Me ine ixo tengen, "A tödi nang tobo rengrengen ine me Jisas ixo pet a dauleng ne pixak, ma ixo bulus lömö xö nine marake. Ma ixo tile e bara arabo wan urungan kö Marna Ari Siloam, ma arabo etos, ma arabo eöt ta winawara."

<sup>12</sup> Me idi toxo ose ine, "A tödi nang ule?"

Ma ixo balu idi bara, "E kobo ösöxö."

<sup>13</sup> Io, idi toxo lamus ot ina tödi ewe nang ixo pulo mesila urungan köbo Parasi.

<sup>14</sup> Ma xö bung nang e Jisas ixo pet a pixak ma ixo sawang a nine marna ina tödi, a bung Sabat ine.

<sup>15</sup> Io, abo Parasi toxo ose bölök ine bara bule ma ixo wawara. Ina tödi ixo tengen, "Ixo bulus a pixak kö nine marake, me e xo etos ma na im e re wawara."

16 A dauleng ne Parasi toxo tengen, "Ina tödi na kaim bere ine meringan te God, möxö i kara muu eörin a warkurai möxö bung Sabat."

Inexalik a dauleng kabise toxo tengen, "I kebeöt iat te önga tene saban irabo pet te mangana uxileng lölös bira." Io, idi toxo tawalang nine axan.

17 Io, idi toxo ose öbaling ina tödi ewe nang ixo pulo sila bira, "Ina tödi ixo sawang a maram. Örobo tengen bule rö ine?"

A tödi nang ixo balu bara, "Ine a propet."

18 Ma lamun abo Judeia kaim iat idi xö nunu bara ixo pulo ma bara ixoro wawara baling, ot toxo erile iat lamun a tamana ma nene ina tödi.

19 Me idi toxo ose idu, "Ina barok ke mu im, a? Ina barok mon niang mu moxo tengen bara u xo kip ine ma lak pulo? Ma bara bule ma na iri wawara im?"

20 A tamana ma nene toxo balu, "Maa me ösöxö bara ine a barok ke maa. Me maa me ösöxö bölök bara toxo kip ine ma lak pulo iat.

21 Ma lamun maa me köbo ösöxö bara bule niang i wawara im, ma bere ewe ixo sawang a nine marna. Mum moro ose ine. Kaim bara barok lik bang ine. Irabo wöwörö maras sö ine iat."

22 Ma tamana ma nene toxo tengen biringan, möxösa, idu toxo buburin abo Judeia. Ma unine bira. Abo Judeia toxoro kubus tinenge sik bere ewenene a öng nang i tengen osen bara i nunu bere Jisas ine a Mesaia, idi tabo kip tewe ine bara i bele lotu.

23 Xö ina na mon niang a tamana ma nene toxo tengen bara, "Kaim bara barok lik bang ine. Moro ose ine."

24 Önga axana bung baling idi toxo erile xö ina tödi ewe nang ixo pulo sila, ma toxo tengen te ine, "Örö ösugurno urso re God bara örobo tengen a turunon na. Mem me ösöxö bara a tene sasaban ina tödi na."

25 Ma ixo balu, "Nang bara ine a tene saban bara kaim, e kobo ösöxö. A önga laa xalik e ösöxö ine na. E xo pulo mesila, lamun na im e re wawara."

26 Io, idi toxo ose ine, "A lasa ine ixo pet te nöngön? Ixo sawang a maram bara bule?"

27 Ma ixo balu, "E xoro tengen te mum lamun mum kaim kö ölangen kulen. Ma ruasa mum mo maa baling kua ölangen? E örasen bara mum mo maaaa gut bara mum morobo bung bak ne ausu re ine bölök?"

28 Me idi toxo ösaxit ine ma toxo tengen, "Nöngön gut mon a önga bak ne ausu möxö ina tödi! Ma lamun e mem abo bak ne ausu re Moses!

29 Mem me ösöxö sik bere God ixo wöwörö urungan te Moses. Ma lamun ina tödi na, mem kobo ösöxö bara i wanot mole."

30 Ma ina tödi ixo balu bira, "Önga mangana laa iat! Mum kobo ösöxö i wanot mole. Inexalik bara ine ixo sawang a nine marake.

31 Ire te ösöxö bara God i kara tame abo siniseng köbo tene sasaban. Ma lamun ibo tame idi ewe nang tobo ii ine ma tobo wewet eörin a maaaa re ine.

32 Xö urulo möxö uxixis möxö öxöno lagunon ot na, kaim pe öng ixoro ölangen bara toxo sawang a marna önga tödi nang toxo kip ine ma marna a lak pulo.

33 Nang bara ina tödi na kaim kö nuanot meriso re God, ine i karabo eöt tua wewet te laa."

34 Io, idi toxo balu ine bira, "Toxo kip nöngön kölöme xö magingin saban kalik mon, ma u ka usu e mem?" Me idi toxo irewese ine xalik a gunon ne siniseng.

35 Ma nang e Jisas ixo ösöxö lo bara toxoro irewese ine, Jisas ixo wan ma ixo parasiwin ine. Ma nang ixo pere lo ine, ixo tengen, "Nöngön u nunu xö Barok kö Tödi?"

36 Ma ina tödi ixo ose ine bira, "Orong, ewenene ine? Öro töngösen e lamun e rabo nunu re ine."

37 Me Jisas ixo tengen, "Uru pere ine, me ine mon niang i etöngösen arixe me nöngön."

38 Io, ina tödi ixo tengen, "Orong, e re nunu." Ma ixo lotu wösöt e Jisas.

39 Me Jisas ixo tengen, "E wanot ura xö öxöno lagunon tua pet warkurai. Lamun ina na, abo duöng marapulo tabo wawara, mabo duöng nang tobo wawara tabo pulo."

40 Ma uleng ne Parasi ewe nang toxo arixe me ine toxo ölangen a lasa nang ixo tengen ma toxo ose ine, "A sa? E mem bölök abo marapulo?"

41 Jisas ixo tengen, "Nang bara abo mara mum a lak pulo, io, kaim pe magingin saban irabo kis se mum. Ma lamun na mum mo rengrengen bara mum mo wawara sik. Möxö ina na, abo magingin saban te mum irabo malaa sik iat bie."

## 10

### *A tene walbalaurai deek möxöbo sipsip*

1 "Turunon saxit, a tödi nang i kobo laxa kölöme xö marame möxö tabörö möxöbo sipsip, ma lamun ine ibo laxlaxa xöröp mon, ine a önga tödi pinilo.

2 Io, a tödi nang i laxa xö marame laxlaxa, ine a tene walbalaurai möxöbo sipsip.

3 A tene walbalaurai möxö marame ibo sasawang a marame ulamun ine. Ma abo sipsip tobo ölangen kulen

a inöno. Ma ibo xukuwe abo sipsip pe ine mabo esene idi, ma ibo silien ösu idi.

<sup>4</sup> Nang ine iri silien ösu idi, ine ibo wan mesila re idi. Io, abo sipsip tobo mumuu ine, möxösa, idi tobo ölangen kulen a inöno.

<sup>5</sup> Ma lamun idi tekebeöt tua mumuu re öng kabise. Kaim arixe. Idi tabo ulo rup tewe xalik ine, möxösa, idi tokobo ölangen kulen a inöno öng kabise.”

<sup>6</sup> Io, Jisas ixo isik a tinenge öwuo urungan te idi. Ma lamun kaim idi rua marmaras ulamun ina unine tinenge nang ine ixo rengrengen te idi.

<sup>7</sup> Lamun ina na, Jisas ixo tengen öbaling urungan te idi, “Turunon saxit, e iat a maramelaxlaxa möxöbo sipsip.

<sup>8</sup> Idi xirip ewe nang tere wanot sila re e, idi abo tödi pinilo mabo tödi nang idi tobo önan sixem. Inexalik abo sipsip tekara tame idi.

<sup>9</sup> E iat, e a maramelaxa. Ma bara ewe re öng i sölöng ke e, ine irabo kip a to. Ine irabo önan laxa ma irabo önan su, ma irabo pere wösöt lo a nien deek.

<sup>10</sup> A tödi pinilo ibo orot mon tua wuwulo ma rua arsexomet ma rua ögarin abo sipsip. Me e xo wanot bara idi tabo kip a to, ma to nang irabo wöwö re idi.

<sup>11</sup> E iat, e a tene walbalaurai deek möxöbo sipsip. Ma a tene walbalaurai deek ibo isik tewe a to re ine xelen idi abo sipsip.

<sup>12</sup> Inexalik a öng nang toxo kun mon ine, kaim bara ine ina tene walbalaurai nang ibo unan sik abo sipsip. Io, nang bara i pere re wuluwun axe i önan ot, irabo wan lie abo sipsip ma irabo ulo rup. Io, ina wuluwun axe irabo kat abo sipsip ma irabo wasak elixilixin idi.

<sup>13</sup> Ina tödi irabo ulo rup, möxösa, toxo kun mon ine ma i kara niniang muu abo sipsip.

<sup>14</sup> “E iat, e a tene walbalaurai deek möxöbo sipsip. Me e ösöxö sik abo sipsip pe e, me idi te ösöxö sik e.

<sup>15</sup> I xarnang mon a Tamake i ösöxö sik e, me e ösöxö sik bölök ine. Me e isik tewe a to re e xelen idi abo sipsip.

<sup>16</sup> Io, e ma dauleng nebo sipsip kabise nang kaim bara idi mera xö löng möxöbo sipsip. E rabo mana lamus bölök idi. Idi bölök tabo ölangen a inöno e, me idi xirip tabo önga muxu ne sipsip ma irabo önga tene walbalaurai mon te idi.

<sup>17</sup> A unine bara e Tata i mamaa xöba ulamun e bira:, möxösa, e rabo isik tewe a to re e, ma arabo xikip lo öbaling.

<sup>18</sup> Ma lamun kaim pe öng i eöt ta xikip lo a to re e xalik e. Inexalik kö dinödöm iat te e, e isik tewe, möxösa, e iat



e lölös sua isik tewe a to re e me e lölös bölök kua xikip lo öbaling. Me Mama re e ixo tengen tö e bara arabo pet bie.”

<sup>19</sup> Nang abo Judeia toxo ölangen bira, idi toxo tawörök kö nine mangana dinödöm.

<sup>20</sup> Ma oleleng ke idi toxo rengrengen bara, “A tano saban iri tup pe ine ma iri baulang. Rösa mum mo ölangen ine?”

<sup>21</sup> Ma dauleng toxo rengrengen bara, “A tinenge xö ina tödi na i kobo xarnang bara tano saban iri tup pe ine. Ma i eöt bara tano saban irabo sawang a maradi abo marapulo?”

*Jisas ine ina Mesaia, a Barok kö God*

<sup>22</sup> Io, ruso Jerusalem idi toxo pet a luxa bara idi toxo döxömen lo a axana bung nang idi toxo pet ödeek öbaling ina gunon lotu raxin. Ma ixo axana bung sisii.

<sup>23</sup> Me Jisas ixo önan kölöme xö gunon lotu raxin kö pu xö walpali re Solomon.

<sup>24</sup> Io, abo Judeia toxo erop pönö e Jisas ma toxo ose ine bara, “Lause im örobo tengen ömaras e mem lamun nöngön? Nang bara nöngön a Mesaia, io, örö tengen ömaras e mem.”

<sup>25</sup> Io, Jisas ixo balu idi, “E xoro tengen sik ke mum, ma lamun mum kobo nunu. Ma abo tinörön nang e wewet kö esene a Tamake, idi te etöngösen ulamun e.

<sup>26</sup> Ma lamun mum kobo nunu, möxösa, mum kaim bara abo sipsip pe e.

<sup>27</sup> Abo sipsip pe e, idi tobo ölangen kulen a inöno e me e ösöxö sik idi me idi tobo mumuu e.

<sup>28</sup> Me e tabaa idi ma a to ulorexe, me idi tekebeöt ta iuiuo. Ma kaim pe öng irabo sat tewe idi xalik a limeke.

<sup>29</sup> A Tamake ewe nang ixoro isik idi ura re e, i taxin köba xöbo lalaa xirip. Ma kaim pe öng i kebeöt tua sasat tewe idi xalik a limine e Mama.

<sup>30</sup> Maa me Mama, maa me öng mon.”

<sup>31</sup> Io, abo Judeia toxo ii wat baling kua reteng ine.

<sup>32</sup> Lamun e Jisas ixo tengen te idi, “E xoro osen te mum a oleleng ne tinörön deek meriso lömö re Mama. Me mum mo eka reteng e lamun a önga sa runon möxö inabo tinörön?”

<sup>33</sup> Ma abo Judeia toxo tengen, “Mem kobo maaaa ra reteng nöngön lamun abo tinörön deek ke nöngön. Kaim. Mem marabo teng nöngön lamun abo tinenge saban ulamun e God, möxösa, nöngön a tödi tataun mon ma u rengrengen bere nöngön e God.”

<sup>34</sup> Me Jisas ixo balu idi, “Xö warkurai te mum i nangen a önga tinenge re God nang toxo geet bara God ixo tengen bara, ‘Mum abo god.’

<sup>35</sup> God ixo tengen idi a nangadi bara idi abo god. Ine ixo tengen idi ewe nang abo tinenge re ine ixo wanot pösöt idi. Me ire te ösöxö bara abo tinenge re God nang toxoro geet irabo kisisik ulorexe.

<sup>36</sup> Me Mama ixo bulus kabisenin e bara e rö ine iat, ma ixo tile ösu e ura xö öxöno lagunon. Io, rösa runon bara mum mo tengen bara e xo tengen ögarin e God nang e xo tengen bara, 'E a Barok kö God'?

<sup>37</sup> Ganim e mum pa nunu re e nang bara e kobo pet abo tinörön niang e Mama ibo wewet.

<sup>38</sup> Ma lamun nang bere e wewet inabo tinörön me mum kobo nunu xöbo tinenge re e, io, mum morobo mana nunu xöbo tinörön e wewet bara mum morobo ösöxö xulen bara Mama i kis kölöme re e me e kis kölöme re Mama."

<sup>39</sup> Me idi toxo könönöin baling bara idi tabo töndik e Jisas, nexalik kaim idi xo eöt tua rörödik ine.

<sup>40</sup> Io, Jisas ixo wan lies baling kö Ari Jordan uruso xö xönö nang e Jon a tene baptais ixobo baptais a nangadi ee sila. Me Jisas ixo kis singan.

<sup>41</sup> Ma oleleng ne nangadi toxo wanot pösöt ine. Me idi toxo tengen, "I turunon bara Jon kaim kö wewet tebo auxilieng lölös, ma lamun i turunon kirip abo tinenge nang e Jon ixo tengen ulamun ina tödi."

<sup>42</sup> Ma oleleng toxo nunu re Jisas kölöme xina lagunon.

## 11

### *Jisas ixo öraru e Lasarus*

<sup>1</sup> Io, önga tödi a esene e Lasarus ixo meset. Ine mee Betani a lagunon kö narön, e Maria me Mata.

<sup>2</sup> Ine Maria mon na, ewe nang ixo linge a sada xö xexene Orong ma ixo us ömasa ma bebene öxöno. Ine mon a saxane Lasarus ewe nang ixo maru ma miniset.

<sup>3</sup> Io, idu narön toxo tile tinenge urungan te Jisas bira, "Orong, a tödi nang u maaaa xöba re ine i meset."

<sup>4</sup> Ma nang e Jisas ixo ölangen ina na, ixo tengen, "Ina miniset i kebeöt ta sexomet ine. Kaim. Ma lamun ixoro ot biringan bara a nangadi tabo ölet a esene God tua a mariris ma lölös kö Barok kö God bölök irabo ot maras."

<sup>5</sup> Me Jisas ixobo maaaa xöba re Mata arixe ma tönö ine e Maria, me Lasarus.

<sup>6</sup> Inexalik nang ixoro kip a tinenge bere Lasarus ixo meset, ixo kis baling kö nine bung.

<sup>7</sup> Io, melamu ixo tengen köbo bak ne ausu re ine, "Ire tabo wan baling uruso Judeia."

<sup>8</sup> Ma lamun abo bak ne ausu toxo tengen, “Tene Ausu, la mon abo Judeia te maa ra reteng nōngōn. Ma ruasa nōngōn u maa ra nuanot baling urungan?”

<sup>9</sup> Io, Jisas ixo balu idi bira, “Ire te ösöxö bara önga sangaun ma ninōng ne axana bung i kis kölöme xö xaken. Ewe nang i önan kö xaken i kebeöt ta sinubu, möxösa, ibo wawara xö bibio möxö öxöno lagunon.

<sup>10</sup> Lamun ewe a öng nang ibo önan kö ködö irabo subu, möxö kaim ine ma bibio.”

<sup>11</sup> Melamu nang ixoro tengen sik bira, Jisas ixo tōngösen idi, “A ais se ire e Lasarus i paliso, ma lamun e önan ta ölaran ine.”

<sup>12</sup> Abo bak ne ausu toxo balu, “Orong, nang bara i paluso irabo langlanga baling.”

<sup>13</sup> Me Jisas ixoro wöwörö lamun a minet te Lasarus. Inexalik abo bak ne ausu toxo döxömen bara ixo rengrengen bere e Lasarus i paluso sik mon.

<sup>14</sup> Io, Jisas ixo ömaras idi bara, “Lasarus iri met.

<sup>15</sup> Me e axanan bara kaim e ra kinis arixe me ine, möxösa, a minet te ine irabo top e mum pua nunu. Inexalik na ire ta wan urungan te ine.”

<sup>16</sup> Io, Tomas (ewe nang toxobo rengrengen ine ma Xasang) ixo tengen köbo bak ne ausu xabise, “Ire bölök tabo wan ma tabo met arixe me ine.”

<sup>17</sup> Nang e Jisas ixo wanot, ixo see lo bara idi toxoro bulus e Lasarus kölöme xö lieng möxöbo minet ma iri nit ne bung tuar te ine.

<sup>18</sup> Me Betani i kobo ömat meringan Jerusalem. I eöt ma narun ne kilomita.

<sup>19</sup> Möxö ina na, a oleleng ne Judeia idi toxo ot tua ömamanaa e Mata idu narön me Maria ulamun a minet te saxana idu.

<sup>20</sup> Ma nang e Mata ixo ölangen bara e Jisas ixo önan ot, ixo wan lo rua susuo me ine. Ma lamun e Maria ixo xisixis iat tingan kö gunon.

<sup>21</sup> Me Mata ixo tengen te Jisas, “Orong, nang bara u xoro arun iat bang ka, a saxake i kebeöt ta minet.

<sup>22</sup> Inexalik, e ösöxö tuar bara nang u seng e God ulamun a sa na, na mon e God irabo isik ke nōngōn.”

<sup>23</sup> Me Jisas ixo tengen tö ine, “A saxam irabo taru baling kalik a minet.”

<sup>24</sup> Mata ixo tengen tö ine, “E ösöxö bara ine irabo taru kaa baling kö bung möxö tinaru baling möxö minet kö axana bung möxö xakawöm.”

<sup>25</sup> Me Jisas ixo tengen tö ine, “E iat a tinaru baling me e iat ina to. Ewe nang i met, ma lamun i nunu re e, irabo to.

26 Me ewenene nang i to ma i nunu re e i karabo eöt tua minet. U nunu lamun ina na, bara kaim?"

27 Me Mata ixo aut ma ixo tengen te Jisas, "Orong, e xoro nunu bara nöngön a Mesaia, a Barok kö God niang toxo tengen bara irabo wan su ura xö öxöno lagunon."

28 Ma melamu nang ixo tengen krip ina na, ixo wan baling ma ixo kuwe lo e Maria a tönö urungan kö lawa, ma ixo tengen, "A Tene Ausu tuar a, ma i ose lamun nöngön."

29 Nang e Maria ixo ölangen bira, ixo taru kaa pasaxit mon ma ixo wan su urungan te Jisas.

30 Ma kewene bang ine ra inot tingan kö lagunon. Ine angen bang kö xönö nang e Mata ixo esuo me ine ee.

31 Abo Judeia ewe nang toxo xisixis me Maria rua öaxanan ine kölöme xö gunon, toxo pere bara ixo tuu pasaxit mon ma ixo wan su, io, idi toxo muu re ine. Idi toxo döxömen bara ine i önan uri xö lieng möxöbo minet tua ginee.

32 Ma nang e Maria ixo ot kö xönö nang e Jisas ee, ixo pere e Jisas ma ixo subun kexe mesila re ine ma ixo tengen bira, "Orong, nang bara u xoro arun iat bang ka, a saxake i kebeöt ta minet."

33 Nang e Jisas ixo pere e Maria bara ixo gegee arixe mabo Judeia nang toxo wanot arixe me ine, a balna ixo muu idi ma ixo tapunuk.

34 Jisas ixo ose idi, "Mum moxo ömarin ine ule?"

Idi toxo balu ine, "Orong, örö miang ma örö pere!"

35 A line marna Jisas ixo sen.

36 Io, abo Judeia toxo tengen nanin te idi iat bara, "Pere! I mamaa xöba lamun e Lasarus."

37 Inexalik a dauleng toxo tengen bara, "Ina tödi mon na nang ixo sawang a nine marna a marapulo. Ma ruasa i koxobo maa ra öro e Lasarus nang ixo eka minet?"

38 Ma a balna e Jisas ixo tiip köba ma ixo wan urungan kö lieng. Ma ina marna lieng toxo uxis pi ma önga wat.

39 Me Jisas ixo tengen, "Mum moro irewe ina wat."

Ma lamun e Mata nang a saxana tödi nang ixoro met ixo tengen te Jisas bira, "Orong, a aine iri maxus, möxö na iri nit ne bung im pe ine."

40 Io, Jisas ixo tengen te ine, "Bule, e koxobo tengen te nöngön bara örobo pere a lölös se God nang bara örobo nunu?"

41 Io, idi toxo irewe a wat me Jisas ixo wawara kaa ma ixo tengen, "Mama, e tengen deek ke nöngön, möxösa, u xo ölangen e.

42 E ösöxö sik bara nöngön u bo ölangen e xöbo bung kirip, ma lamun e tengen ina na ulamun a nangadi na, bara idi tabo nunu bara u xo tile e.”

43 Io, nang ine ixo tengen ina na, Jisas ixo kup lömö bira, “Lasarus, wan su!”

44 A tödi minet ixo wan su, ma toxoro bun pi abo limine mabo xexene ma boxönö sewene man ömat, ma toxoro kait pi a mamaran te ine.

Jisas ixo tengen te idi, “Moro kip tewe abo xönö man möxö minet ma moro gan sik ine ma ira wan.”

*Toxo pingit tua sesexomet e Jisas  
(Matiu 26.1-5; Mak 14.1-2; Luk 22.1-2)*

45 Ma lamun ina na, a oleleng ne Judeia ewe nang idi toxo önan urungan tua uxileng e Maria, ma toxo werwere a lasa niang e Jisas ixo wewet, idi toxo nunu re ine.

46 Inexalik a uleng ke idi, toxo wan lo urungan köbo Parasi, ma toxo töngösen idi ma lasa e Jisas ixoro pet.

47 Io, abo Parasi mabo pris tataxin toxo kis kö önga nuan etok ma toxo tengen, “Ire tabo pet a laa sanene? Ina tödi na i wewet a oleleng ne uxileng lölös.

48 Ma nang bara ire te gan sik ine iat mon bira, a nangadi xirip tabo nunu re ine. Mabo Rom idi tabo wanot ma tabo pet ögat a gunon ne lotu re ire ma kantri re ire.”

49 Io, önga tödi mere idi abo Parasi, a esene e Kaiapas, ewe nang ixo sila sik köbo pris kina awat niang ixo tengen, “Mum kobo ösöxö re laa!

50 Mum kobo maras bara i deek kö mum bara önga tödi mon irabo met ulamun a nangadi ma ganim bara ina kantri xirip tabo iuo.”

51 Ine kaim kö rengrengen ina na xöbo dödöxömen te ine iat. Kaim. Inexalik ine a sisila raxin möxöbo pris möxö ina awat. Lamun ina na, God ixo kure a tinenge re ine bara irabo tengen te tinenge propet ulamun e Jisas bara irabo met kelen a marapun ne Israel.

52 Ma kaim bara xöbo marapun ne Israel kalik mon, ma lamun bara irabo met bölök ulamun idi abo barok ke God nang te kis elixilik nana rua lalamus etok idi bere idi tabo öng mon.

53 Io, urulo im kö ina bung idi toxo epingit arixe rua sesexomet e Jisas.

54 Lamun ina niang, Jisas kaim kö sinasai nana xö wawara xöbo Judeia, nexalik ixo wan lo uruo xö xönö lörorö xö xönö tataun, kö lagunon a esene e Epraem. Ma ixo kis arixe mabo bak ne ausu ringan.

55 Ma nang ixoro lörorö a axana bung möxö Luxa ne Nuan Lexe, a oleleng ne nangadi toxo wanot meringan

köbo lagunon kö palaa uruso Jerusalem rua wewet eörin a warkurai te Moses bara idi tabo madakdak kö wawara xö ina warkurai.

<sup>56</sup> Me idi toxo wawara nana iat ulamun e Jisas. Ma nang idi toxo tuu xö xönö möxö gunon ne lotu raxin, idi toxo eose nana re idi bara, “Mum mo dōxömen bule? I wawara bara i karabo wanot iat im ura xö Luxa, goo?”

<sup>57</sup> Ma abo pris tataxin mabo Parasi idi toxoro isik a tinenge lölös bara nang ewe re öng i see lo bara Jisas ule im, irabo tengen tö idi ra öxös lo ine.

## 12

*Maria ixo linge ösu a sada re Jisas*  
(*Matiu 26.6-13; Mak 14.3-9*)

<sup>1</sup> Ma nang a pitnö ma öng ne bung kalik im mesila xö Luxa ne Nuan Lexe, Jisas ixo wan urungan Betani xö lagunon te Lasarus, ewe ine nang e Jisas ixo öro ine xalik a minet.

<sup>2</sup> Me idi toxo pet a nien taxin te Jisas singan ee. E Mata ixo söxö nien, me Lasarus a öng mere idi nang ixo kis arixe me Jisas kö nien.

<sup>3</sup> Io, Maria ixo kip lo a sada möxö sasalap tobo rengrengen ma ‘nart’, ma i eöt ma subana kilo. Ma xinuxun möxönan a lak taxin. Maria ixo kip lo ina sada ma ixo linge ösu xö nine xexene e Jisas, ma ixo salap mabo bebene öxöno. Ma a sixine möxö ina sada ixo wöwö xirip kö gunon.

<sup>4</sup> Ma lamun a önga bak ne ausu re ine, Judas Iskariot (ewe nang irabo isik tewe e Jisas), ixo tengen bira,

<sup>5</sup> “Rösanene bara ire tekobo misik ma ina sada rua xikip pebo tuluwok ma rua isik köbo maris? Ma i eöt ma xinuxun kö öng ibo xikip kö tinörön te ine xö önga awat.”

<sup>6</sup> Judas kaim kö rengrengen bira, möxösa, bara ine ixo marase abo maris. Inexalik ixo tengen bira, möxösa, ine a tene pinilo. Ma ixobo balbalaure a bubulus möxöbo tuluwok ke idi, ma ixobo xikip suxumenin a tuluwok meringan ee.

<sup>7</sup> Ma lamun e Jisas ixo tengen, “Ganim sik mon ina une uxe. I deek bara irabo tön sik ina sada niang ot kö bung möxö wöpömös ee.

<sup>8</sup> A nangadi maris idi tobo xisixis arixe me mum köbo bungbung kirip, ma lamun e karabo kis arixe me mum köbo bungbung kirip.”

<sup>9</sup> Ma a marakörö raxin toxo see lo bara Jisas nangen niang Betani, io, idi toxo wanot uxe. Ma lamun kaim bara ra werwere xalik e Jisas, idi toxo wanot bölök kua werwere e Lasarus nang e Jisas ixo öraru ine xalik a minet.

<sup>10</sup> Io, abo pris tataxin toxo pingit tua sesexomet bölök e Lasarus,

<sup>11</sup> möxösa, e Lasarus ine a unine ina na nang a oleleng ne Judeia toxobo ruruu rewe xalik idi abo pris tataxin, ma toxobo nunu re Jisas.

*Jisas ixo laxa Jerusalem xarnang a king  
(Matiu 21.1-11; Mak 11.1-11; Luk 19.28-40)*

<sup>12</sup> Xö önga bung kabise a marakörö raxin nang toxo wanot kina Luxa raxin toxo ölangen see lo bere Jisas iang i önan ot urungan Jerusalem.

<sup>13</sup> Idi toxo kip abo labana beebie ma toxo wan su rua susuo me Jisas me idi toxo xukup nana bira,  
*"Axabe e God! God irabo wadöane a öng nang i wanot tua wewet eörin a maaa xö Orong!"*

God irabo wadöane ina King köbo Israel!"

<sup>14</sup> Io, Jisas ixo pere lo a önga dongki maxat ma ixo xisin, xarnang toxoro geet ulamun ine i tengen,

<sup>15</sup> *"A marakörö mee Jerusalem, mum bele bubuut. Pere bang! A king ke mum, ine na i önan ot ma i kisisik lömö xö önga dongki maxat."*

<sup>16</sup> Ma abo bak ne ausu re ine kaim idi xo marmaras sila ulamun abo lalaa xirip. Ma melamu belexim nang a mariris se Jisas ixo wanot maras, idi toxo döxömen lo bara toxoro pet inabo lalaa na urungan tö ine.

<sup>17</sup> Io, a marakörö ewe nang toxo arixe me Jisas nang ine ixo kuwe ösu e Lasarus xalik a lieng möxöbo minet, ma ixo öro ine xalik a minet, idi toxo tengen esexerein a tinenge lamun e Jisas.

<sup>18</sup> A nangadi oleleng toxo wan su rua inesuo me ine, möxösa, toxoro ölangen bara ine ixo pet ina auxilieng lölös.

<sup>19</sup> Io, abo Parasi toxo tengen nanin te idi iat bara, "Pere bang im! Ire tekexebe eörin im pua wewet te lalaa! Pere! A öxöno lagunon kirip im iri mumuu re ine!"

*Jisas ixo tengen bara irabo met*

<sup>20</sup> Ma dauleng ne Grik bölök nangen nang kaluluonin idi ewe nang idi toxo wan kaa uruso Jerusalem rua lotu xö ina bung möxö Luxa raxin.

<sup>21</sup> Idi toxo wan pösöt e Pilip ewe nang ine mee Betsaida, kölöme Galili, ma toxo tengen tö ine, "Maris, mem me maaa rua werwere e Jisas."

<sup>22</sup> Pilip ixo wan ma ixo tengen te Endru. Io, idu toxo wan ma toxo tengen te Jisas.

<sup>23</sup> Me Jisas ixo balu idu bira, "A axana bung iri wanot bara a mariris möxö Barok kö Tödi irabo wanot maras.

<sup>24</sup> Turunon saxit, nang bara önga irine iaa i kobola subu kaa xö pu ma i kobola met, ina irine iaa irabo kisisik iat mon bara a irine iaa xalik mon. Inexalik nang bara i met, irabo o a oleleng ne pasuno iaa.

<sup>25</sup> Ewenene re öng i maaaa xöba ulamun a to re ine iat, ine irabo ömalim tewe. Me ewenene re öng i mölök kalik a to re ine iat mera xö öxöno lagunon, irabo töndik sik iat a to ulamun a to ulorexe.

<sup>26</sup> Me ewenene re öng i maaaa rua tultul te e, ine irabo mana muu e. Ma nang bara e wan taule, a tultul te e bölök irabo wan uxe. Me ewenene nang i tultul tö e, e Mama irabo ii ine.

<sup>27</sup> "Ma na a balake i tiip köba me e rabo tengen a sa? I deek gut te e rua rengrengen, 'Mama örö kip tewe e xalik ina axana bung möxö kinadik'? Ma lamun kaim. Ina na a unine inot te e. E xo wanot bara e rabo laxa xina kinadik.

<sup>28</sup> Mama, örö pet öraxin a esem!"

Io, a inöno öng ixo tenge su meriso lömö xö watmaep bira: "E xoro pet öraxin sik ma na e rabo pet öraxin öbaling."

<sup>29</sup> Io, a marakörö nang toxo tuu sik kingan ee, toxo ölangen ma toxo tengen bara a barawagas. Inexalik a dauleng toxo tengen bara önga angelo ixo wöwörö me ine.

<sup>30</sup> Jisas ixo tengen, "Ina na i kobo wanot ulamun e, ma lamun i wanot ta xelen e mum.

<sup>31</sup> Ma na a axana bung möxö pet warkurai xö öxöno lagunon. Ma na God irabo bat tewe ina tene sisila saban möxö öxöno lagunon.

<sup>32</sup> Me e, nang bara tabo rarik e mera xö pu urso lömö, e rabo lamus lo a nangadi xirip ura rö e."

<sup>33</sup> Me ine ixo tengen bira rua osen a mangana minet nang ine irabo met könan.

<sup>34</sup> Ma nangadi toxo balu ine bara, "Mem moxo ölangen bara a warkurai te Moses ixo tengen bara a Mesaia irabo kis ulorexe saxit. Ma bule belek nang u tengen bara tabo rarik a Barok kö Tödi urso lömö? Me ewe runon ina Barok kö Tödi?"

<sup>35</sup> Me Jisas ixo rengrengen bara, "A bibio irabo kis me mum kö ulik ne axana bung mon bang. Möxö ina na, mum moro wan nang ine nangen bang i bibio xudun, xalik a xödxödö irabo kawönö e mum. Ma a tödi nang i önan kölöme xö ködö i kobo ösöxö bara i önan taule.

<sup>36</sup> Mum morobo mana nunu xina bibio na nang ina bibio i kisisik bang me mum, rue mum pa inot a nangadi möxö bibio." Ma nang e Jisas ixo tengen sik bira, ixo wan lo ma ixo mun kalik idi.

*A bung marapun Judeia toxo mölök kua nunu re Jisas*



<sup>37</sup> A turunon bara ixo pet a oleleng nebo auxilieng lölös kö wawara re idi. Inexalik idi toxo kaim kö nunu re ine.

<sup>38</sup> Ixo ot xarna na rua oturunon abo tinenge re propet Aisaia nang ixo tengen bira:

*“Orong, kaim pe öng iri nunu xö ina tinenge re mem, ma kaim pe öng iri kip pe dinödöm maras ulamun a lölös se nöngön.”*

<sup>39</sup> Ma ina unine nang kaim idi xo nunu, möxösa, e Aisaia ixo tengen bülök bira:

*<sup>40</sup> “God ixo öwulo abo maradi ma ixo öläläs abo baladi, xalik idi tobo perexulen mabo maradi, ma xalik idi tobo ösöxö xulen köläme xö baladi, me idi tobo dödöm puxus bara arabo öro idi.”*

<sup>41</sup> Aisaia ixo tengen ina na, möxösa, ine ixo pere a mariris se Jisas ma ixo etöngösen ulamun ine.

<sup>42</sup> Ma lamun i turunon kalik bara a oleleng kaluluonin abo sisila me Judeia toxo nunu re ine. Inexalik idi kaim kö rengrengen ösu a nunu re idi, möxösa, idi toxo buburin abo Parasi, bara xalik tobo pet pi idi xalik a gunon ne sineseng.

<sup>43</sup> Idi tobo maaaa bara a nangadi mon tabo ölet idi ma lamun tekobo maaaa bara God irabo ölet idi.

<sup>44</sup> Io, Jisas ixo tenge raxin bira: “Nang bara a tödi i nunu re e, ine i kobo nunu xalik mon te e, ma lamun kö öng ewe nang ixo tile e.

<sup>45</sup> Me ewe nang i pere e, ine i pere bülök a öng nang ixo tile e.

<sup>46</sup> E xo wanot ura xö öxöno lagunon xarnang a bibio, nang bara a nangadi xirip nang te nunu re e, idi tekarabo kis im kö ködö.

<sup>47</sup> “Ma ewenene nang i ölangen abo tinenge re e ma i kobo tame, e iat, e karabo kure ine, möxösa, e kobo wanot tua kure a öxöno lagunon, nexalik kua öro ine.

<sup>48</sup> Inexalik bara ewe nang i öngus kalik e ma i kobo ömaraxen lo abo tinenge re e, ine angen kö warkurai. Ma ina tinenge nang e xo tengen irabo kure ine xö axana bung möxö xakawöm,

<sup>49</sup> möxösa, e kara tenge xö dödöxömen te e iat. Kaim. Inexalik bara a Tata nang ixo tile e, ine iat ixo isik a tinenge lölös se e xö a lasanene arabo tengen ma arabo tengen bulungin.

<sup>50</sup> Me e ösöxö bara ina tinenge lölös sine nang ixo isik ke e, ibo isik a to ulorexe saxit. Ma a lasanene im nang e

tengen, ine mon a lasa nang e Mama ixoro tengen te e bara arabo etöngösen min.”

## 13

*Jisas ixo tos abo xexene idi abo bak ne ausu*

<sup>1</sup> A Luxa ne Nuan Lexe ixoro lörörö im me Jisas ixo ösöxö bara a axana bung ke ine iri ot bara irabo wan kalik ina öxöno lagunon urso re Tata. Ine ixo maaaa xöba iat lamun a nangadi re ine na xö öxöno lagunon, ma ixo maaaa iat tö idi ot kö öxöwam möxö to re ine.

<sup>2</sup> Me Jisas mabo bak ne ausu toxo aan arixe xö ina dömön im möxö ina bung. Me Satan ixoro bulus dinödöm sik kö balne Judas Iskariot, a barok ke Saimon, bara rö ine rua isik tewe e Jisas.

<sup>3</sup> Me Jisas ixo ösöxö sik bara a Tamana ixoro isik kirip sik abo lölös se ine. Ma ixo ösöxö sik bölök bara ixo wanot meriso xö God ma lörörö bara irabo baling urso xö God.

<sup>4</sup> Lamun ina na, Jisas ixo taru xalik a nien, ma ixo kip tewe a xönö man xinaxain te ine möxö araman, ma ixo kip lo a xönö man sasalap ma ixo laplawa min.

<sup>5</sup> Melamu xönan, ixo linge a ari xö bile, ma ixo urulo rua gisgis abo xexene idi abo bak ne ausu, ma ixo u-us ömasa arixin ma xönö man ixo laplawa sik min.

<sup>6</sup> Io, ixo wan urungan te Saimon Pita, me Pita ixo ose ine, “Orong, nöngön u maaaa rua roros a xexeke?”

<sup>7</sup> Me Jisas ixo balu ine bira, “A lasa nang e wewet na nöngön ökorobo maras könan, ma lamun melamu im örobo maras.”

<sup>8</sup> Io, Pita ixo tengen bira, “Kaim. Nöngön ökorobo tos a xexeke.”

Me Jisas ixo balu bira, “Nang bere e kobo tos nöngön, io, nöngön ökorobo kis arixe me e.”

<sup>9</sup> Saimon Pita ixo tengen te ine bira, “Orong, nang bara bie, io, u bele tos kalik a xexeke, örobo tos bölök abo limeke ma öxöke.”

<sup>10</sup> Jisas ixo balu ine bira, “Ewe nang iri etos sik irabo tos lo manin a nine xexene, möxösa, a aine xirip iri madakdak. Me mum moro madakdak sik, lamun kaim bere mum kirip.”

<sup>11</sup> Möxö ine ixo ösöxö sik ewenene niang irabo isik tewe ine, ma ulamun ina na, ine ixo tengen bara kaim bere idi xirip toxo madakdak.

<sup>12</sup> Nang ixo tos kirip abo xexene idi, ixo sige lo abo man te ine ma ixo baling urungan kö xönö re ine ma ixo ose idi bara, “Mum muru maras lamun a lasanene nang e re pet sik ke mum?”

13 Mum bo rengrengen e me 'Tene Ausu' ma 'Orong'. Ma i turunon, möxösa, e mon niang.

14 Nang bere e a Tene Ausu re mum ma Orong ke mum me e xo tos abo xexene mum, io, mum bölök morobo mana tos ebasinin abo xexene mum.

15 Io, e xo wewet biringan bere rue mum bölök, morobo pet bie xarnang e xoro pet tö mum.

16 Turunon saxit, a tultul i kobo taxin sik kö orong ke ine. Ma kaim pe tene tinam i taxin kö öng nang ixo tile ine.

17 I maras bara mum moro ösöxö inabo lalaa na. Io, irabo deek kö mum nang bara mum morobo pet bie.

18 Io, e kobo wöwörö ulamun e mum kirip. E ösöxö sik ewe me idi nang e xoro pere kos lo. Inexalik ina na i ot tua öturunon a tinenge re God nang toxoro geet: *'A tödi nang i en a beret arixe me e, i maaa bara irabo ögarin e.'*

19 A laa nang e töngösen ösila e mum min i kala ot, nexalik nang bara i ot turunon, mum morobo nunu bere e ewenene ine.

20 Turunon saxit, ewenene nang i öbala lo ewenene me idi nang e xo tile, i öbala e. Me ewe nang i öbala e, i öbala lo ewe a öng nang ixo tile e."

### *Öng irabo isik tewe Jisas*

21 Nang e Jisas ixoro tengen ina na, a balna ixo tiip ma ixo tengen osen te idi bira, "Turunon saxit, a öng ke mum irabo isik e xö limine nangadi."

22 Abo bak ne ausu re ine toxo epere dik nana baling ke idi iat, ma toxo ngangao esexere bere ewenene runon ee nanga i rengrengen ine.

23 Ma öng ke idi, ina bak ne ausu ewe nang e Jisas ibo maaa xöba lamun ine, ixo kis lörörö sik ke Jisas.

24 Io, Saimon Pita ixo urie a öxöno xö ina bak ne ausu ma ixo tengen te ine, "Örö ose ine bara i rengrengen ewe."

25 Io, ina bak ne ausu ixo maru sede ma ixo ose ine bara, "Orong, ewenene ine?"

26 Jisas ixo balu bira, "Ine ewe nang e rabo tabaa ine ma xönö beret niang e xoro öwösö xö bile." Io, nang ixoro öwösö a beret, ixo tabaa e Judas Iskariot, a barok ke Saimon.

27 Niang mon e Judas ixo tön lo a beret, Satan ixo laxa re ine. Io, Jisas ixo tengen te ine, "A laa niang u ka wewet te e, örö pet pasaxirin."

28 Ma lamun kaim pe öng kingan kö ina nien ixo maras bara ruasa me Jisas ixo tengen bira rö ine.

29 A unine bara Judas ixobo balaure abo tuluwok. Io, idi toxo nunu bara Jisas ixo rengrengen tö ine bara irabo mana

kun tebo lalaa idi toxo maaaa ulamun möxö ina Luxa ne Nuan Lexe, bara irabo tabaa abo tanaa merebo lalaa.

<sup>30</sup> Ma nang e Judas ixoro tön lo a beret, ixo wan su. Ma ixoro ködö.

### *A warkurai maxat*

<sup>31</sup> Ma nang e Judas ixoro wan, e Jisas ixo tengen, “Na a mariris kö Barok kö Tödi i ka nuanot maras, ma a Barok kö Tödi i eka urulo rua osen ömaras a mariris se God bölök.

<sup>32</sup> Ma nang bara a Barok kö Tödi irabo osen a mariris se God, io, God irabo osen kölöme re ine iat a mariris se Barok ke ine, ma irabo osen a mariris se ine pasaxit mon.

<sup>33</sup> A bung barok ke e, e karabo kis ömat arixe me mum. Mum morobo parasiwin e. Ma xarnang e xoro tengen sik köbo Judeia, io, na im e tengen te mum: A xönö nang e önan uxe, mum kebeöt ta nuan uwe.

<sup>34</sup> A warkurai maxat na, e tabaa e mum min ine bira: Mum morobo mana ebalamu kaluluonin e mum iat. Xarnang e xo balamu e mum bie, io, mum morobo mana balamu e mum iat.

<sup>35</sup> Nang bara mum morobo ebalamu kaluluonin e mum iat, io, a nangadi tabo ösöxö bara mum abo bak ne ausu re e.”

<sup>36</sup> Saimon Pita ixo ose ine, “Orong, u önan taule?”

Jisas ixo balu ine, “A xönö niang eka nuan uwe, nöngön u kebeöt tua mumuu e uxe xö ina axana bung na, ma lamun örobo muu im melamu.”

<sup>37</sup> Pita ixo ose ine, “Orong, e kebeöt tua mumuu nöngön na ruasa? E tagur sik kua isik a to re e lamun nöngön.”

<sup>38</sup> Io, Jisas ixo balu ine bira: “I turunon bara u tagur sik kua isik a to re nöngön lamun e? Turunon saxit, nang a xixök i kobola tenge bang, nöngön örobo öös lamun e xö narun ne axan.

## 14

### *Jisas a ngas uruso re God*

<sup>1</sup> “Ganim a öriip a bala mum. Nunu xö God, ma nunu bölök ke e.

<sup>2</sup> A oleleng ne xönö kölöme xö gunon te Tata re e. Nang bara i kobo turunon, e xoro tengen te mum. Arabo wan urso ra tagure a lagunon te mum.

<sup>3</sup> Ma nang bara arabu wan ma arabu tagure a lagunon te mum, e rabo wanot baling ma arabu kip lo e mum pa kinis arixe me e, lamun e mum morobo kis kö xönö nang e bo xixixis ee.

<sup>4</sup> Mum mo ösöxö sik a ngas urungan kö lagunon nang e önan uwe.”

<sup>5</sup> Tomas ixo tengen tö ine, “Orong, mem kobo ösöxö a xönö nang u önan uwe, io, mem marabo ösöxö muu a ngas bara bule?”

<sup>6</sup> Jisas ixo balu ine, “E mon a ngas, a turunon, ma a to. Kaim pe öng irabo wan urso re Tata xö ngas kabise. E mon a ngas uruso re Mama.

<sup>7</sup> Nang bara mum moxoro ösöxö e, mum moxoro ösöxö bölök a Tata re e. Urulo nixinen ma na uruso, mum muru ösöxö sik ine, me mum muru pere ine.”

<sup>8</sup> Pilip ixo tengen te ine, “Orong, osen e mem me Tata, ma irabo pet eörin abo maaaa re mem.”

<sup>9</sup> Jisas ixo tengen te ine, “E xoro kis arixe me mum kö axana bung ömat, Pilip. Nangen u kala ösöxö e? Ewenene nang iri pere e, iri pere e Tata. Ma bara bule u tengen, ‘Osen e mem me Tata’?”

<sup>10</sup> U kobo nunu bere e angen kö Tata me Tata angen na kölöme re e? Abo tinenge nang e tengen te mum, idi kaim bara mera iat te e. Ma lamun e Tata ewe nang ibo xisixis kölöme re e ibo wewet inabo tinörön.

<sup>11</sup> Mum moro mana nunu re e nang e tengen bere e angen kö Tata me Tata angen na kölöme re e. Lamun nang bere mum kobo nunu, io, nunu re e xöbo tinörön iat nang e bo wewet.

<sup>12</sup> Turunon saxit, ewe a öng nang i nunu re e, ine irabo pet abo tinörön nang e bo wewet. Ma irabo pet abo tinörön tataxin lömö xinabo tinörön na, möxösa, e önan uruso xö Tata.

<sup>13</sup> Me e rabo pet eörin a lasa nang mum mo seng kö esene e, bara a Barok ke ine irabo eöt tua olelet e Tata.

<sup>14</sup> Mum mo öt sik ka seseng e mere lasanene kölöme xö eseke, me e rabo pet eörin.

### *God irabo tile ösu a Töxödös ne Tanono*

<sup>15</sup> “Nang bara mum mo maaaa lamun e, mum morobo pet eörin abo tinenge lölös se e.

<sup>16</sup> Me e rabo ose e Mama, me ine irabo tabaa e mum ma önga Tene Rorop kabise rua kinis arixe me mum ulorexe.

<sup>17</sup> Ine a Tanono nang ibo osen abo turunon te God. A öxöno lagunon i kebeöt ta ömaraxen lo ine, möxösa, a öxöno lagunon i kebeöt ta werwere ine bara ösöxö ine. Lamun mum moxoro ösöxö sik ine, möxö ine i xisixis arixe me mum ma irabo kis kölöme re mum.

<sup>18</sup> E karabo wan lie e mum xarnang a barok kaim a tamana. E rabo ot pösöt e mum.

<sup>19</sup> Lörörö mon, a öxöno lagunon i kebeöt ta werwere im e, lamun mum morobo pere e. Me e rabo to. Möxö ina na, mum bölök morobo to.

<sup>20</sup> Xö ina bung nang mum morobo ösöxö xulen im bara e iang kölöme xö Mama me mum iang kölöme re e, me e iang kölöme re mum.

<sup>21</sup> Ewenene nang i ölangen abo tinenge lölös se e ma i muumuu, ine mon ina öng ewe nang i maa rö e. Ine ewe nang i maa rö e, e Tata re e irabo maa lamun ine, me e rabo maa lamun ine me e rabo osen e re ine."

<sup>22</sup> Io, Judas (kaim bere Judas Iskariot) ixo tengen, "Orong, bara bule nöngön u maa ra osen nöngön te mem ma kaim bara xö öxöno lagunon kirip?"

<sup>23</sup> Jisas ixo balu, "Nang bere ewenene i maaaa rö e, irabo muu abo ausu re e. A Tata re e irabo maaaa lamun ine, me maa marabo wanot pösöt ine, me maa marabo kis arixe me ine.

<sup>24</sup> Ine ewe nang i kobo maa lamun e, i kebeöt ta muumuu a ausu re e. Inabo tinenge na nang mum mo ölengen, kaim bara re e iat. Inabo tinenge na re Tata ewe nang ixo tile e.

<sup>25</sup> "Abo tinenge xirip nang e xo wöwörö min nang e xo xisixis arixe me mum.

<sup>26</sup> Ma lamun a Tene Rorop, a Töxödös ne Tanono, ewenene nang e Mama irabo tile xö eseke, irabo usu e mum mabo lalaa xirip ma irabo ödöxömen e mum köbo lalaa xirip nang e xoro tengen.

<sup>27</sup> E gan sik a malum arixe me mum. A malum pe e, e isik ke mum. E kobo isik ine re mum xarnang a öxöno lagunon ibo isik. Ganim bara a tapunuk i öriip abo bala mum ma ganim a binuut lo mon.

<sup>28</sup> "Mum moxoro ölangen nang e xo tengen, 'E rabo wan kalik e mum me e rabo ot baling.' Nang bere mum mo maa re e, mum morobo axanan bere e rabo wan uruso re Mama, möxö e Mama ine a tödi raxin te e.

<sup>29</sup> E xoro tengen te mum na ulamun ina na, ma melamu irabo ot. Io, nang irabo ot turunon, mum morobo nunu.

<sup>30</sup> E karabo tenge me mum kö axana bung ömat, möxösa, a tene sisila möxö öxöno lagunon irabo ot. Kaim ine mere lölös sua wewet te laa ura re e.

<sup>31</sup> Lamun a öxöno lagunon irabo mana ösöxö bara e maa xöba lamun e Mama me e bo wewet eörin abo mangana lasa nang e Mama ixoro tengen te e bara e rabo pet.

"Miang im, ire ta önan.

## 15

### *Jisas a uno iaa wain runon*

<sup>1</sup> "E iat a uno iaa wain turunon, me Tata re e, ine a tamana komo.

<sup>2</sup> Ine ibo reree rewe abo axana iaa xalik e nang i kala ösöxö ra ino. Ma abo axan nang ibo oo, ibo reree subun, lamun irabo wawara deek ma irabo o oleleng.

<sup>3</sup> Mum moxoro deek lamun abo tinenge nang e xoro usu e mum min.

<sup>4</sup> Parap arixe me e, me e rabo parap arixe me mum. Kaim pe axana wain irabo o rine iat. Irabo mana parap sik kö uno iaa wain. Xarna nang, mum mo korobo o nang bara mum kobo parap sik ke e.

<sup>5</sup> “E iat a uno iaa wain, me mum abo axana. Nang bara ewenene i parap pe e me e parap pe ine, ine irabo o a oleleng ne pasuno. Nang bere mum kobo parap pe e, mum mo kebeöt tua wewet te laa.

<sup>6</sup> Nang bara ewenene i kobo parap pe e, ine irabo xarnang a axana wain nang tobo tewe rewe ma irabo manga. Tabo iiögun inabo axana wain, ma tabo tewe xö iaa ra söngsöngöt.

<sup>7</sup> Nang bara mum morobo parap pe e, ma tinenge re e irabo kis arixe me mum, mum morobo seng a mangana lasa nang mum mo maaaa lamun, mum morobo kip lo.

<sup>8</sup> Nang bara mum mo o a oleleng ne pasuno, ina tatalien na irabo osen a mariris se Tata re e, me mum morobo osen bara mum abo bak ne ausu re e.

<sup>9</sup> “E maa rö mum xarnang e Tata ibo maaaa lamun e. Mum morobo mana kisisik kö maaaa re e.

<sup>10</sup> Nang bere mum mo töndik abo tinenge lölös se e, mum morobo kisisik kö maaaa re e, xarnang mon e töndik sik abo tinenge lölös se Mama me e bo kisisik kölöme xö maaaa re ine.

<sup>11</sup> E xoro töngösen e mum min bara a axanan te e irabo kisisik ke mum ma bara a axanan te mum irabo wöwö.

<sup>12</sup> A tinenge lölös se e bira: Mum morobo mana ebalamu kaluluonin e mum xarnang e re balamu e mum.

<sup>13</sup> Kaim pe öng nang ine ma abalamu raxin xarnang a öng ewe nang i isik ösu a to re ine ulamun abo ais se ine.

<sup>14</sup> Mum morobo ais se e nang bara mum mo pet a lasanene nang e tenge lölös.

<sup>15</sup> E karabo tengen im e mum bara abo tultul, möxösa, a tultul i kara ösöxö a lasanene a tödi raxin te ine ibo wewet. Ma lamun, e tengen te mum bara mum abo ais se e, möxö abo laa nang e xo usu meringan kö Tata re e, e xoro pet eörin ulamun e mum pa ösöxö xulen.

<sup>16</sup> Mum koxobo pere kos lo e, lamun e xo pere kos lo e mum, me e xo tile e mum pa nuan ma rua ino, ma bara abo pasuno e mum irabo kis ulorexe. Möxö ina na, Mama irabo isik a lasanene nang mum mo seseng ulamun kö eseke.

17 A tinenge lölös se e bira: Mum morobo mana ebalamu kaluluonin e mum.

*A öxöno lagunon irabo melentexin abo tultul te Jisas*

18 “Nang bara a öxöno lagunon i melentexin e mum, mum morobo mana döxömen bara toxo arun ta melentexin e.

19 Nang bara mum mera xö öxöno lagunon, a öxöno lagunon i xebe maaaa ulamun e mum xarnang bara re ine iat. Inexalik kaim bara mum mera xö öxöno lagunon, lamun e xoro pere kos lo e mum kalik a öxöno lagunon. Möxö ina na, a öxöno lagunon i melentexin e mum.

20 Me mum morobo döxömen lo abo tinenge nang e xo töngösen e mum bira, ‘Kaim pe tultul i taxin sik kö tödi raxin te ine. Kaim.’ Nang bara idi te elerin e, idi tabo elerin bölök e mum. Nang bara idi te muu a ausu re e, idi tabo muu bölök ke mum.

21 Idi tabo bienin e mum biringan ulamun a eseke, möxö idi tokobo ösöxö ewe a öng nang ixo tile e.

22 Na im idi ma magingin saban me idi te waparuo bira, möxösa, e re wanot me e re etöngösen me idi.

23 Ine ewe nang i melentexin e, i melentexin bölök a Tata re e.

24 Nang bara e koxobo pet kaluluonin idi re laa nang kaim im pe öng bölök ixo pet, kaim idi mere magingin saban. Ma lamun na im idi tere pere inabo uxileng lölös nang e xo pet, ma nangen iat idi te melentexin e, maa me Tata re e bölök.

25 Ma lamun a na ra wewet eörin a lasanene nang toxoro geet ösu xö buk möxö warkurai te idi bira: ‘Kaim pe unine me idi toxo melentexin e.’

26 “A Tene Rorop irabo ot, ewenene nang e rabo tile urungan te mum meriso re Tata. Ine a Tanono nang ibo osen abo turunon te God, ma ibo önan su xalik e Tata. Nang irabo wanot, ine irabo wöwörö maras lamun e.

27 Ma lamun mum bölök morobo mana wöwörö maras ulamun e, möxö mum moxoro kis arixe me e meringan kö urulo.

## 16

1 “Abo tinenge xirip nang e re tengen te mum bara mum korobo subu xö tinuu lölös se mum.

2 Idi tabo bulus ösu e mum kalik abo gunon ne sineseng ke idi. Ma i turunon bara a axana bung irabo ot nang ewenene nang i sexomet e mum irabo döxömen bara i isik a arabaa xö God.

3 Idi tabo pet abo mangana lalaa, möxösa, idi tekala ösöxö e Tata bere e.

4 E re tengen a na re mum, io, bara nang ina axana bung na irabo ot, mum morobo döxömen lo bara e xoro panak e



mum. E kaim kö araun ta rengrengen te mum, möxösa, e xo kis arixe me mum.

*A tinörön möxö Töxödös ne Tanono*

<sup>5</sup> “Na e rabo wan uruso re ine ewe nang ixo tile e, lamun kaim pe öng ke mum i ose e bara, ‘U önan taule?’

<sup>6</sup> Mum mo wöwö sik ma tapunuk, möxösa, e re tengen abo lalaa na.

<sup>7</sup> Lamun e tengen a turunon te mum, nang bere e wan kalik e mum ina laa na irabo top e mum, möxösa, nang bara e kobo wan, a Tene Rorop i karabo ot te mum. Lamun nang bara e wan kalik e mum, io, e rabo tile ine ura re mum.

<sup>8</sup> Nang bara ine irabo ot, ine irabo osen a nangadi möxö öxöno lagunon bara idi ma magingin saban. Ma irabo osen idi ulamun a magingin töxödös ma a pet warkurai re God.

<sup>9</sup> Irabo osen bara idi ma magingin saban, möxösa, a nangadi möxö öxöno lagunon tekobo nunu re e.

<sup>10</sup> Irabo osen bara a sasaxan te idi ulamun a magingin töxödös, möxösa, e rabo wan uruso re Tata, me mum korobo pere öbaling im e.

<sup>11</sup> Irabo osen idi ulamun a pet warkurai re God, möxösa, God iri ömaso a tene sisila möxö ina öxöno lagunon na.

<sup>12</sup> “E ma oleleng ne lalaa ra rengrengen tö mum, ma nexalik mum kebeöt ta ölangen nixinen.

<sup>13</sup> Lamun nang bara a Tanono irabo ot, ine nang irabo osen abo turunon te God, ine irabo silien e mum pua ösöxö xulen abo turunon. Ine i karabo wöwörö meringan kö dinödöm pe ine iat. Ine irabo wöwörö mon lamun a sanene ine ixo ölangen, ma irabo tengen te mum lamun a sanene nang nangen iat tua inot.

<sup>14</sup> Ine irabo osen a mariris se e bira: irabo kip lo abo lasanene re e ma irabo palas ömaras sö mum.

<sup>15</sup> Abo lalaa xirip nang ke Tata, abo lalaa re e. Möxö ina na, e tengen bara a Tanono irabo ilo abo lasanene re e ma irabo palas ömaras sö mum.

*A tapunuk ma a axanan*

<sup>16</sup> “I karabo ömat me mum korobo pere öbaling im e, ma melamu i kobo ömat me mum morobo pere öbaling e.”

<sup>17</sup> Dauleng ne bak ne ausu re ine toxo tengen kö öngöng iat te idi, “A lasanene a unine möxö ina tinenge re ine na? I rengrengen bara, ‘I karabo ömat me mum korobo pere öbaling im e, ma melamu i karabo ömat me mum morobo pere öbaling e’. Ma i rengrengen bölök bara, ‘Möxösa e rabo wan uruso re Tata.’ ”

18 Idi nangen toxo maaaa ma ose, “A mangana tinenge bule a ‘I karabo ömat’? Ire tokobo ösöxö xulen a sanene ine i rengrengen.”

19 Jisas ixoro ösöxö bara idi toxo maa ra ose ulamun ina na, io, ixo tengen te idi bira: “E xo tengen, ‘I karabo ömat me mum korobo pere öbaling im e, ma melamu i karabo ömat me mum morobo pere öbaling e.’ Mum mo ose nanin öbaling e mum ulamun ina tinenge na re e?”

20 Turunon saxit, mum morobo sisiöt ma ginee, ma lamun a öxöno lagunon irabo axanan. Mum morobo tapunuk, lamun a tapunuk ke mum irabo tawuxus urungan kö axanan.

21 A une nang i kip barok, ine ma kinadik, möxö a bung ke ine iri ot. Ma lamun nang ine iri kip a barok, ine irabo döxömen taun abo tiip pe ine, möxösa, xö axanan te ine nang a barok iri ot ura xö öxöno lagunon.

22 Io, i bie bölök ke mum. Na im a axana bung ke mum moxo tapunuk. Ma lamun e rabo pere öbaling e mum me mum morobo axanan, ma kaim pe öng irabo kip tewe a axanan te mum.

23 Xina bung nang, mum korobo seng im e mere lasanene. Turunon saxit, Tata re e irabo isik abo lasanene mum mo seng ine kölöme xö esene e.

24 Ot nixinen, mum koxobo seng ke lasanene kölöme xö eseke. Mum morobo mana seng, me mum morobo kip lo, ma axanan te mum irabo wöwö xöba.

25 “E xo rengreng ma tinenge öwuo, ma lamun a bung i eka inot nang e karabo tenge mabo tinenge öwuwuo im, lamun e rabo tengen öwalas se mum lamun a Tata re e.

26 Nang bara bung nang irabo ot, mum morobo seng ine kölöme xö eseke. Me e kobo tengen bara arabu ose ine xelen e mum,

27 möxösa, a Tata ine iat i maa re mum. Ine i maa lamun e mum, möxösa, mum mo maa lamun e me mum mo nunu bere e xo wanot meriso re God.

28 E xo ot meriso re Tata me e xo laxa ura xö öxöno lagunon. Ma na eka nuan lie im a öxöno lagunon me eka nuan baling uruso re Tata.”

29 Io, abo bak ne ausu re Jisas toxo tengen, “Na im nöngön u wöwörö maras ma kaim arixe re tinenge öwuwuo.

30 Na mem mere pere bara nöngön u ösöxö xirip abo lalaa ma bara kaim nöngön mere sasaxan bara re öng irabo ose nöngön ulamun te laa. Xina na i pet e mem me nunu bara nöngön u xo ot meriso re God.”

31 Jisas ixo balu, “Mum moro nunu im, goo?”

32 Lamun a axana bung i ka inot, ma iri lörörö tuar, nang mum morobo ulo rup elixilik, öngöng iat kö gunon iat te

ine. Mum kirip morobo wan kalik e. Ma lamun kaim bara e xalik iang, möxö a Tata re e nangen na arixe me e.

<sup>33</sup> “E xoro töngösen e mum minabo lalaa, bara mum morobo uruoxe a malum, möxösa, mum mo kis kölöme re e. Xina öxöno lagunon a kinadik irabo kis me mum. Lamun ganim a binuut. E xoro wan lexe a lölös möxö öxöno lagunon.”

## 17

*Jisas ixo seseng bara a Tata re ine irabo osen a mariris se ine*

<sup>1</sup> Nang e Jisas ixo tengen sik ina na, ixo wawara kaa urso lömö ma ixo seseng bira,

“Mama, a axana bung iri wanot. Osen ösu a mariris ulamun a Barok ke nöngön bara rua Barok ke nöngön irabo eöt ta osen ösu a mariris ulamun nöngön,

<sup>2</sup> xarnang u xo isik a lölös se ine bara a nangadi xirip tabo kis kö pu re ine bara irabo isik a to ulorexe rö idi xirip ewe nang u xo isik idi re ine.

<sup>3</sup> Ma a to ulorexe i bira: bara idi tabo ösöxö nöngön, bara nöngön kalik mon a God turunon, ma bara idi tabo ösöxö bölök e Jisas Kraiss ewe nang u xo tile ine ura.

<sup>4</sup> E xo osen a mariris ulamun nöngön ta xö öxöno lagunon nang e xo öxöwam abo tinörön nang u xo isik ke e ra wewet.

<sup>5</sup> Io, Tata, na nang e kis arixe me nöngön, nöngön iat örobo mana osen a mariris ulamun e, ina mariris e xo kip nang e xo kis arixe me nöngön mesila nang kaim bang a öxöno lagunon.

*Jisas ixo seseng ulamun abo bak ne ausu re ine*

<sup>6</sup> “E re osen sik nöngön te idi ewe nang u xo isik idi re e meringan kö öxöno lagunon. Mesila idi mere nöngön, ma u xo isik idi re e. Me idi tere muu a tinenge re nöngön.

<sup>7</sup> Ma na idi tere ösöxö sik im bara abo laa xirip nang u tabaa e min i wanot meriso re nöngön,

<sup>8</sup> möxösa, e xoro tabaa idi ma abo tinenge nang u xo tabaa e min me idi toxo öbala lo inabo tinenge. Me idi toxoro ösöxö im bere e xo wan su meriso re nöngön me idi te nunu im bara nöngön u xo tile e.

<sup>9</sup> Me e, e seseng kö idi. E kobo seseng ulamun a öxöno lagunon. Ma lamun e seseng ke ewe me idi nang u xo tabaa e, möxö idi re nöngön.

<sup>10</sup> A nangadi xirip pe e, idi re nöngön, mabo nangadi xirip pe nöngön, idi re e. Me idi tere osen ösu a mariris ulamun e.

<sup>11</sup> E re eka nuan kalik im ina öxöno lagunon urso re nöngön. Ma lamun idi iat angen bang kö öxöno lagunon. Madakdak ne Tata, örö balaure idi ma lölös möxö esem, a ese nang u xo tabaa e min, bere idi tabo öng mon xarnang mon iraa te öng mon.

<sup>12</sup> Nang e xo kis arixe me idi, e xo balaure idi ma lölös möxö ese nang u xo tabaa e min. E xo balaure sik idi ma kaim pe öng mere idi ixo wan tup. Lamun a öng kalik mon ewe nang ixo mumuu a ngas möxö iuiuo, ine xalik ixo wan tup, nexalik bara a tinenge re nöngön nang toxo geet irabo ot turunon.

<sup>13</sup> “Na im arabo ot pösöt nöngön, ma lamun e tengen inabo laa na nang e angen bang a xö öxöno lagunon. Me e tengen ina na rue idi bara tabo wöwö ma axanan te e kölöme xö to re idi xarnang bölök e wöwö ma ina axanan.

<sup>14</sup> E xo isik a tinenge re nöngön urungan te idi ma a öxöno lagunon ixo mölök kalik idi, möxösa, kaim bere idi mera xö öxöno lagunon, ma xarnang bölök bere e kaim bara mera xö öxöno lagunon.

<sup>15</sup> E kobo seng nöngön bara örobo kip tewe idi xalik a öxöno lagunon. Kaim. E seng nöngön bara örobo tuu wi idi xalik a tene sasaban.

<sup>16</sup> Kaim bara idi mera xö öxöno lagunon xarnang mon e kaim bara e mera.

<sup>17</sup> Örö ömaras a turunon te nöngön urungan te idi rua bulbulus kabisenin idi bara tabo nangadi re nöngön. Abo tinenge re nöngön i turunon.

<sup>18</sup> E re tile idi urungan kö öxöno lagunon xarnang mon u xo tile e urungan kö öxöno lagunon.

<sup>19</sup> E bulus kabisenin e iat urungan kö tinörön te nöngön tua rorop idi, bara idi tabo nangadi turunon te nöngön.

<sup>20</sup> “Ma lamun e kobo seseng ulamun idi xalik mon. Kaim. E seseng bölök ulamun idi ewe nang tabo ölangen a tinenge xö ina nangadi me idi tabo nunu re e.

<sup>21</sup> E seseng bara idi xirip tabo öng kalik mon. Tata, e seseng bara idi tabo kis kölöme re iraa xarnang nöngön u kis kölöme re e, me e, e kis kölöme re nöngön, bara rua a öxöno lagunon tabo nunu bara u xo tile e.

<sup>22</sup> A mariris nang u xo tabaa e min, e xo isik bölök ke idi bara idi tabo öng kalik mon xarnang iraa te öng.

<sup>23</sup> Nöngön u kis kölöme re e me e rabo kis kölöme re idi, bara idi tabo öng turunon mon, rua öxöno lagunon irabo ösöxö bara u xo tile e ma bara u xo maa rö idi xarnang u xo maa rö e bie.

<sup>24</sup> “Tata, e maa lamun idi ewe nang u xoro isik idi ura re e bere idi tabo kis arixe me e xö ina xönö nang arabo kis

ee, ma bara tabo pere a mariris se e, a mariris nang u xo tabaa e min, möxösa, nöngön u xo maa lamun e mesila xö uxixis möxö öxöno lagunon.

<sup>25</sup> “Töxödös ne Tata, a öxöno lagunon i kobo ösöxö nöngön, ma lamun e ösöxö nöngön, me idi te ösöxö bere nöngön u xo tile e.

<sup>26</sup> E re osen sik nöngön urungan te idi. Me e rabo osen sösöxöin nöngön urungan te idi bara a maaa re nöngön te e irabo eöt tua kinis kölöme re idi, ma bara e bölök arabo kis kölöme re idi.”

## 18

### *Toxo töndik e Jisas*

*(Matiu 26.47-56; Mak 14.43-50; Luk 22.47-53)*

<sup>1</sup> Niang e Jisas ixo seseng kirip sik, ine arixe mabo bak ne ausu rine toxo lies köröp kö marasaa Kidron. Önga komo olip angen kö lawana marasaa xabise, me Jisas arixe mabo bak ne ausu rine toxo wan laxa xönan.

<sup>2</sup> Io, Judas, ewe niang ixo isik e Jisas kö limine nangadi, ixo ösöxö sik ina xönö, möxösa, e Jisas mabo bak ne ausu rine toxobo xisixis etok ee xöbo uleng ne bung.

<sup>3</sup> Io, Judas ixo wan urungan kö komo ma ixo silien a uleng ne umri mee Rom ma uleng ne köbat niang abo pris tataxin mabo Parasi toxo tile. Me idi toxo tön abo laam mabo dexe mabo lalaa möxö inarse.

<sup>4</sup> Io, Jisas ixoro ösöxö xirip sik a lasa niang irabo ot tine, ma ixo tuu ot ma ixo ose idi bira, “Mum mo wawara siwin ewenene?”

<sup>5</sup> Idi toxo balu, “Jisas mee Nasaret.”

Jisas ixo tengen, “E mon ine.” (Me Judas ewe niang irabo isik e Jisas kö limine idi ixo tuu sik arixe midi.)

<sup>6</sup> Ma nang e Jisas ixo tengen bara, “E mon ine,” idi toxo suxo baling ma toxo subu su xö pu.

<sup>7</sup> Io, Jisas ixo ose öbaling idi, “Mum mo wawara siwin ewenene?”

Me idi toxo tengen, “Jisas mee Nasaret.”

<sup>8</sup> Io, Jisas ixo balu idi bira, “E re tengen sik ke mum bara e mon ine. Ma nang bara mum mo wawara siwin e, io, mum moro uguran tewe a nangadi na.”

<sup>9</sup> Ina na ixo ot tua öturunon abo tinenge rine niang ixoro tengen sik ke God bira: “Ma ina nangadi nang u xo tabaa e min, kaim e ra wewet örup pe öng.”

<sup>10</sup> Io, Saimon Pita, niang ixo xikip nanin a sele ömat, ixo sat lo ma ixo tee xöröp a talinge tuun möxö a tene tinörön möxö sisila raxin möxöbo pris. (A esene tene tinörön niang e Malkas.)

<sup>11</sup> Jisas ixo tengen te Pita, “Bulus tewe a sele re nongön kö xönö möxönan! Nongön u döxömen bara e rabo öngasin a ininim kö ina kap möxö kinadik nang e Mama ixo tabaa e min? Kaim.”

<sup>12</sup> Io, abo umri mee Rom arixe ma sisila ridi mabo köbat möxöbo Judeia, toxo töndik e Jisas ma toxo öxös lo ine.

<sup>13</sup> Ma toxo lamus ine urungan te Anas, a tamasik ke Kaiapas, möxö Kaiapas ixo sisila raxin möxöbo pris kina awat.

<sup>14</sup> Me Kaiapas mon niang ixo töngösen abo Judeia bara irabo deek nang bara re öng i met kelen a nangadi.

*Pita ixo öös tewe e Jisas*

*(Matiu 26.69-70; Mak 14.66-68; Luk 22.55-57)*

<sup>15</sup> Saimon Pita ma önga bak ne ausu xabise idu toxo mumuu e Jisas. Ma ina öng kabise ixo laxa arixe me Jisas uruso kölöme xö xönö möxö sisila raxin möxöbo pris, möxösa, a sisila raxin möxöbo pris ixo ösöxö sik ina bak ne ausu na.

<sup>16</sup> Ma lamun e Pita ixo xixiset kö araman kö marame. A bak ne ausu niang a sisila raxin möxöbo pris ixo ösöxö sik ine ixo tawuxus baling ma ixo tengen kö une niang ixo balaure sik a marame bara irabo lamus ölaxa e Pita.

<sup>17</sup> Ina balik ixo ose e Pita, “Nongön gut a bak ne ausu re nanga, goo?”

Me Pita ixo balu, “E kawaim.”

<sup>18</sup> A lagunon ixo madot, mabo tene tinörön mabo sisila möxöbo umri toxo tuu elulurwein a ia sösöt niang idi toxo usumot tua dinedek. Me Pita bölök ixo tuu arixe midu, ma ixo dededek.

*Anas ixo ose mumuu e Jisas*

*(Matiu 26.59-66; Mak 14.55-64; Luk 22.66-71)*

<sup>19</sup> Kaim pa ömat, a sisila raxin möxöbo pris ixo ose mumuu e Jisas ulamun abo bak ne ausu rine mabo inausu rine.

<sup>20</sup> Jisas ixo balu bira, “E xoro wöwörö maras kö wawara xö oleleng ne nangadi. Me e bo eusu kölöme xö gunon sineseng ma xö gunon lotu raxin, xö xönö a oleleng möxöbo Judeia tobo ot arixe xönan. Me e kara tengen ömun te lalaa.

<sup>21</sup> Ruasa u ose mumuu e? Öro ose idi ewe toxobo ölangen a tinenge re e. Idi te ösöxö sik a lasa e xobo rengrengen.”

<sup>22</sup> Nang e Jisas ixo tengen bira, önga köbat kö lawana ixo wasa ine, ma ixo tengen, “Bara bule u balu a sisila raxin möxöbo pris biringan?”

<sup>23</sup> Jisas ixo balu bira, “Nang bara e xoro tengen te tinenge saban, io, tengen ösu ina sasaban niang. Ma lamun nang bara e rengrengre ma turunon, ruasa u wasa e?”

24 Io, Anas ixo tile ine, ma kunubus angen kö limine, urungan te Kaiapas a sisila raxin möxöbo pris.

*Pita ixo öös tewe öbaling e Jisas*

*(Matiu 26.71-75; Mak 14.69-72; Luk 22.58-62)*

25 Niang e Saimon Pita ixo tuu sik ma ixo dededek, idi toxo ose ine bere, "Nöngön gut a bak ne ausu re nanga, goo?"

Me ine ixo öös, ma ixo tengen, "E kawaim."

26 Önga tene tinörön möxö sisila raxin möxöbo pris, ine a öng mere ina tödi niang e Pita ixo tee xöröp a talingine, ixo tenge wösö, "Xalik nöngön mon e xo pere nöngön arixe me ine kölöme xö komo olip?"

27 Xina axana bung niang e Pita ixo öös tewe baling, a xixök ixo tenge.

*Jisas ixo tuu mesila re Pailat*

*(Matiu 27.1-2, 11-18, 20-23; Mak 15.1-15; Luk 23.1-5, 18-25)*

28 Kö warwara puxu idi toxo lamus lo e Jisas kalik e Kaiapas me idi toxo wan mine urso xö gunon möxö tödi raxin mee Rom. Ma kaim idi ra nilaxa, möxösa, idi tokoxobo maa bara tabo biling kö wawara re God tua nien kö Nien ne Nuan Lexe.

29 Io, Pailat ixo wan su ma ixo ose idi, "A mangana sasaban sa mum mo puk ina tödi na min?"

30 Idi toxo balu e Pailat bira, "Niang bara kaim ine mere sasaban, mem kexebe lamus ine ura re nöngön."

31 Pailat ixo tengen, "Mum iat moro lamus ine ma morobo kure ine muu abo warkurai iat te mum."

Ma abo Judeia toxo balu, "Kaim, mem kebeöt. Mum abo Rom, mum kobo isik a lölös urungan te mem pua sexomet te öng nang mem moxoro kure ine."

32 Ina na ixo ot tua öturunon abo tinenge re Jisas niang ixoro wöwörö min lamun a mangana minet niang irabo ot tine bie.

33 Io, Pailat ixo wan laxa baling kö gunon möxö tödi raxin mee Rom, ma ixo kuwe ölaxa e Jisas ma ixo ose ine, "Nöngön mon a king möxöbo Judeia?"

34 Me Jisas ixo ose öbaling ine bira, "Xö dinödöm pe nöngön iat nang u pet ina tinenge na, bara nangadi te töngösen nöngön lamun e?"

35 Me Pailat ixo balu ine, "E kaim bara a Judeia. A nangadi re nöngön iat arixe mabo pris tataxin idi toxo isik nöngön ura re e. Ma u xo pet a lasa?"

36 Jisas ixo tengen, "A kingdom pe e kaim bara mera xö öxöno lagunon. Nang bara ine mera, io, abo tene tinörön te

e tabo erse wi e xalik abo Judeia. Lamun a kingdom pe e kaim bara mera xö öxöno lagunon.”

<sup>37</sup> Pailat ixo tengen, “Io, a turunon im bara nöngön önga king, goo?”

Me Jisas ixo balu, “Nöngön iat u tengen bere e önga king. Me e xo bak ot ta xö öxöno lagunon lamun ina unine na rua tingen lamun a turunon. Me ewenene midi niang te muu a turunon, tobo ölangen e.”

<sup>38</sup> Me Pailat ixo ose, “A turunon iang a lasa?”\* Io, Pailat ixo wan su baling urungan köbo Judeia ma ixo tengen, “E kobo pere lo re unine aupuk ke mum urungan tine.

<sup>39</sup> Ma lamun a tatalien te mum bara e rabo walwalas ösu re öng meriso xö gunon ne aömokorot urungan te mum kö axana bung möxö Nien ne Nuan Lexe. Mum mo maa bara e rabo palas ösu a king möxöbo Judeia?”

<sup>40</sup> Idi toxo kup baling, “Kaim. Kaim bere ine! Öro isik e Barabas ura re mem!” Io, me Barabas ine a tödi lölös möxö arse ma tene pinilo bölök ine.

## 19

*Pailat ixo kure e Jisas*

*(Matiu 27.27-31; Mak 15.16-20)*

<sup>1</sup> Io, Pailat ixo lamus lo e Jisas urungan te idi bara idi tabo dangat ine.

<sup>2</sup> Abo umri toxo kubus arixin abo uno gargaras ma toxo pet xarnang a bubuan, ma toxo usige xö öxöno. Me idi toxo ölaulawa ine ma man dadan xarnang a king ibo sisige.

<sup>3</sup> Me idi toxobo önan pösöt ine ma toxobo rengrengen, “Mem me ölet nöngön, king köbo Judeia!” Ma toxo wasa ine.

<sup>4</sup> Io, Pailat ixo wan su baling ma ixo tengen köbo Judeia, “Moro pere, na e rabo isik ösu ine urungan te mum bara mum moro ösöxö bara e kobo pere lo re unine aupuk ke mum urungan tine.”

<sup>5</sup> Niang e Jisas ixo wan su ma uno gargaras toxo bun kö öxöno arixe ma man dadan, Pailat ixo tengen te idi, “Ine na im ina tödi!”

<sup>6</sup> Nang iat mon niang abo pris tataxin mabo sisila möxöbo umri toxo pere ine, idi toxo xukup ma toxo tengen, “Tut ine xö sölöxöröp!”

Ma lamun Pailat ixo balu idi, “Mum moro lamus lo ine ma moro tut ine lömö xö sölöxöröp. Ma lamun e iat, e kobo pere lo re unine aupuk ke mum urungan tine.”

\* **18:38** I wawara bara a unine tingen re Pailat i bira. Ixo döxömen gut bara kaim pe öng i eöt tua tengen a lasa i turunon, bara i koxobo maa bara e Jisas irabo töngösen ine ma a lasa i turunon.



<sup>7</sup> Ma abo Judeia toxo balu öbaling, “Mem ma önga warkurai, ma xina warkurai mon ine irabo mana met, möxösa, ine ixobo rengrengen bara ine a Barok ke God.”

<sup>8</sup> Io, niang e Pailat ixo ölangen ina na, ixo buut köba mon,

<sup>9</sup> ma ixo wan laxa baling kö gunon möxö tödi raxin mee Rom. Ine ixo ose e Jisas, “Nöngön möxö xönö sa?” Ma lamun e Jisas kaim pa balu ine.

<sup>10</sup> Pailat ixo tengen, “Ma bara bule nöngön u kobo maa rua balu abo tinenge re e? U kobola maras bang bere e ma lölös sua ölanglanga nöngön bara rua rutut nöngön kö söloxöröp?”

<sup>11</sup> Jisas ixo balu, “Nöngön ma lölös mon tua kure e, möxösa, iri wanot te nöngön meriso lömö. Möxö ina na, a öng niang i isik sik e urungan kö limem, ine i pet a magingin saban i taxin kö saban te nöngön.”

<sup>12</sup> Meringan im, e Pailat ixo maa bara irabo ölanglanga e Jisas, ma lamun abo Judeia toxo xukuwe kalarain mon ine, “Niang bara u ölanglanga ina tödi na, ökorobo ais im me Kaisar a king taxin mee Rom. Ewenene a öng niang ibo rengrengen öbaling iat ine bara a king ine, ine a iuo möxö king mee Rom.”

<sup>13</sup> Niang e Pailat ixo ölangen ina na, ixo lamus ösu e Jisas ma ixo kis kö kinis möxö pet warkurai. Ma tobo rengrengen ina xönö na me ‘Luono Araman ne Wat.’ (Xö tinenge me Ibru tobo rengrengen me ‘Gabata’.)

<sup>14</sup> Ma ixoro lörörö im kö luono xaken möxö tagur rua Luxa ne Nuan Lexe.

Io, Pailat ixo tengen köbo Judeia, “Ne na im a king ke mum.”

<sup>15</sup> Ma lamun idi toxo kup, “Kip tewe ine! Kip tewe ine! Tut ine xö söloxöröp!”

Io, Pailat ixo ose, “Mum mo maaaa bara ara tut a king ke mum kö söloxöröp?”

Mabo pris tataxin toxo balu, “Kaim e mem mere king, e Kaisar kalik mon.”

<sup>16</sup> Io, Pailat ixo isik e Jisas urungan im kö limine idi bara tabo tut ine xö söloxöröp.

*Toxo tut e Jisas kö söloxöröp*

*(Matiu 27.32-44; Mak 15.21-32; Luk 23.26-43)*

Io, abo umri toxo kip lo e Jisas ma toxo lamus tewe ine.

<sup>17</sup> Jisas ixo sölok lo a söloxöröp pe ine iat ma ixo wan su urungan kö xönö möxö Siine Öxöno Tödi (niang kö tinenge me Ibru tobo rengrengen me Golgota.)

<sup>18</sup> Me idi toxo tut e Jisas kö söloxöröp pingan ee, arixe ma nine tödi xabise. Idu xö nine lawa, me Jisas kaluluon.

19 Pailat ixoro geet sik a xönö tinenge ma ixo uguran idi ra xuxut parange xö öxöno sölöxöröp. Mina tinenge i tengen bira: “Jisas mee Nasaret, a king möxöbo Judeia.”

20 Ma oleng ne Judeia toxo kos ina tinenge na, möxö ina xönö niang toxo tut e Jisas könan ixo lörörö sik kö lagunon taxin Jerusalem. Ma ina xönö tinenge toxo geet köbo tinenge me Ibru, Rom me Grik.

21 Mabo pris tataxin toxo tengen te Pailat, “Ganim a geheet bara: ‘A king möxöbo Judeia’, ma lamun örö geet bara, ‘Ina tödi na ixo rengrengen lo mon bere ine a king möxöbo Judeia.’ ”

22 Me Pailat ixo balu, “A lasa niang e xoro geet, irabo malaa sik bie.”

23 Nang abo umri toxo tut e Jisas kö sölöxöröp, idi toxo kip lo abo man tine ma toxo tibe nanin eöt ma nit ne tiniba. Ma öngöng iat ma önga tiniba. Me idi toxo kip lo bölök a man ömat te ine niang toxo pet ma önga xönö man mon ma kaim pe sinöxö xönan.

24 Idi toxo tengen nanin tidi iat bara, “Ire tebele didii. Inexalik bara ire tabo egulös satu lamun tua werwere bere ewenene iat irabo kip lo.”

Ina na ixo ot tua öturunon abo tinenge re God niang toxoro geet sik bira,

*“Idi toxo tibe nanin abo man te e kaluluonin idi ma toxo egulös satu lamun a man te e.”*

Mabo umri toxo pet eörin iat.

25 Ma lörörö xö sölöxöröp pe Jisas inabo une na toxo tuu sik kingan: a nago re ine, ma tönö nago rine, me Maria a usuono Klopas, me Maria mee Makdala.

26 Nang e Jisas ixo pere e nago rine arixe ma bak ne ausu niang ixobo maaaa xöba lamun, idu toxo tuu sik kingan, io, ixo tengen kö nago rine bira, “E nangang im, a barok ke nöngön.”

27 Ma ixo tengen kö bak ne ausu rine bira, “A une na irabo nago re nöngön im.” Urulo xina axana bung, ina bak ne ausu rine ixo lamus e Maria urungan kö gunon te ine.

*Jisas ixo met*

*(Matiu 27.45-56; Mak 15.33-41; Luk 23.44-49)*

28 Melamu, Jisas ixo tengen bira, “E minauu,” rua öturunon abo tinenge re God niang toxoro geet sik, möxö ixoro ösöxö bara abo tinörön kirip pe ine ixoro kawöm.

29 Ma ringan ee nangen a önga tubon wain manun, io, idi toxo ilo önga spans ma toxo bulus öläxa xina tubon wain i ot nang ixo wöwö xönan. Idi toxo söxö lo xö axana iaa isop ma toxo sasanga kaa urso xö ngalana e Jisas.

<sup>30</sup> Io, nang ixoro inim ina wain, ixo tengen bira, “Abo tinörön te e iri kawöm.” Ma ixo ii ötun a öxöno ma ixo isik tewe im a to re ine ma ixo met.

<sup>31</sup> A Bung Pitnö, a bung möxö tagur rua bung Sabat. Ma ina bung Sabat ine a bung taxin. Io, abo Judeia toxo ose e Pailat bara irabo tile tinenge rua köbön abo xexene idiet ma bara tabo kip ösu abo aine idiet, möxösa, abo Judeia kaim a maaa bara abo töngön tabo taba sik lömö xöbo sölöxöröp kö bung Sabat.

<sup>32</sup> Io, abo umri toxo wan ma toxo köbön abo xexe idu niang toxo taba sik me Jisas.

<sup>33</sup> Ma niang idi toxo wan urungan te Jisas, idi toxo pere Jisas ixoro met. Io, kaim idi ra köbön abo xexene.

<sup>34</sup> Ma lamun önga umri ixo buso a lawana e Jisas ma iie, ma saxit mon a dee ma ari ixo su.

<sup>35</sup> Ma ina tödi niang ixo pere ina na, iri etöngösen mina laa niang ixo pere. Ma ina tinenge niang i palas osen, i turunon. I ösöxö sik bara i turunon, ma i etöngösen min bara mum bölök morobo nunu.

<sup>36</sup> Inabo lalaa xirip na i ot tua öturunon a tinenge re God: *“Kaim pe sii mere ine bara irabo tawit,”*

<sup>37</sup> ma xarniang a xönö tinenge xabise bölök i tengen bere, *“Idi tabo werwere a öng niang idi toxo buso ine.”*

*Toxo ömarin a aine Jisas kö maöt  
(Matiu 27.57-61; Mak 15.42-47; Luk 23.50-56)*

<sup>38</sup> Io, melamu xina na, e Josep mee Arimatia ixo wanot, me ine bölök önga bak ne ausu re Jisas. Ma lamun ine ixobo xisixis suxume biringan, möxö ixobo buburin abo Judeia. Ine ixo seng e Pailat lamun a minet te Jisas, me Pailat ixo ömaraxen lo ine. Io, ine ixo wan ma ixo kip lo a minet te Jisas.

<sup>39</sup> Me ine ixo arixe me Nikodimas, a tödi niang ixo dawösöt bang e Jisas kö dömön. Me Nikodimas ixo kip lo a sada nang a lak sixine deek niang toxo pet ma bulbulut möxö nine mangana iaa, ma tiip möxönan ixo eöt ma narun ne sangaun ne kilo.

<sup>40</sup> Idu toxo kip lo a aine Jisas ma toxo bulus ina sada, ma toxo bun mabo subana man maxat. I xarnang mon abo Judeia tobo wewet kö aine nangadi minet.

<sup>41</sup> Ma xina lagunon niang toxo tut e Jisas könän, nangen a önga komo, ma xina komo nangen a önga lieng maxat niang kaim bang kö ömarin te öng könän.

<sup>42</sup> Ma xö ina bung niang, a bung möxö tagur ulamun a bung Sabat köbo Judeia, me idi toxo ömarin ine xönän, möxösa, a lieng ixo lörörö sik.

## 20

### *Jisas ixo taru baling*

*(Matiu 28.1-8; Mak 16.1-8; Luk 24.1-10)*

<sup>1</sup> Xö puxu bubung kö Sade nang ixo ködö xudun sik, e Maria mee Makdala ixo wan urungan kö lieng ne minet ma ixo pere bara toxoro ubun tewe a wat kalik a marame.

<sup>2</sup> Io, ixo ulo wösöt e Saimon Pita ma a bak ne ausu xabise, a öng niang e Jisas ixobo maaaa xöba ulamun ma ixo tengen, “Idi tere kip lo a Orong kalik a lieng, me meet me köbo ösöxö im bara te bulus ine ule!”

<sup>3</sup> Io, Pita ma bak ne ausu xabise, idu toxo wan urungan kö lieng ne minet.

<sup>4</sup> Idu toxo ulo arixe, ma lamun a bak ne ausu xabise ixo ulo silien e Pita, ma ixo sila xö lieng.

<sup>5</sup> Ixo tunsu ma ixo wawara laxa ma ixo pere abo xönö man angen niang toxo bun a aine Jisas min, nexalik kaim ine ra nilaxa.

<sup>6</sup> Io, melamu re ine, e Saimon ixo wanot ma ixo wan laxa. Ixo pere abo xönö man toxo malaa sik kingan,

<sup>7</sup> ma xönö man niang toxo bun a öxöno Jisas min nang toxoro luxun ma ixo malaa xabise sik iat.

<sup>8</sup> Io, a bak ne ausu xabise niang ixo arun ot kö lieng ixo wan laxa bölök. Ixo pere ma ixo nunu.

<sup>9</sup> (Idi kaim bang ka marmaras bara abo tinenge re God toxoro geet sik i tengen bere e Jisas irabo mana taru baling kalik a minet.)

### *Maria mee Makdala ixo pere e Jisas*

<sup>10</sup> Io, nine bak ne ausu toxo wan baling urungan köbo ngasiene idu.

<sup>11</sup> Ma lamun e Maria ixo tuu sik kö marame xina lieng ne minet ma ixo gegee. Nang ine angen ixo gegee, ixo tunsu ma ixo wawara laxa xö lieng.

<sup>12</sup> Ma ixo pere a nine angelo toxo sige sik abo man pidien. Idu toxo kisisik kö xönö niang a aine Jisas toxo ömarin sik ee. Öng ixo kis kö xönö niang ixo lulungon uxe, ma öng kö xönö niang ixo xöxodos uxe.

<sup>13</sup> Me idu toxo ose e Maria bira, “Nang, u gegee rösanene?”

Me ine ixo balu bira, “Idi tere kip lo a Orong ke e, me e kobo ösöxö im bara te bulus ine ule.”

<sup>14</sup> Nang ixo tengen bira, ixo tawuxus ma ixo pere e Jisas ixo tuu sik kingan, ma lamun kaim ine ra werwere xulen bere Jisas mon iang.

<sup>15</sup> Me Jisas ixo tengen, “Nang, u gegee rösanene? U wawara lamun e ewe?”

Maria ixo dōxōmen bara ine a tene walbalaurai möxō ina komo, ma ixo tengen bira, "Maris, nang bara u kip lo ine, örō tengen te e bara u bulus ine ule, me e rabo kip lo ine."

<sup>16</sup> Jisas ixo tengen te ine, "Maria."

Me Maria ixo talingen urungan tine ma ixo tenge xō tingenge me Ibru bira: "Rabonai!" (A unine bara 'Tene Ausu').

<sup>17</sup> Me Jisas ixo tengen, "Ganim bara u tön e, möxōsa, e kala baling bang urso re Tata. Ma lamun örobo mana wan urungan köbo töke, ma örobo tengen te idi bara, 'E rabo wan im urso re Tata re e ma Tata re mum, urso xō God te e ma God te mum.' "

<sup>18</sup> Io, Maria mee Makdala ixo ot pösöt abo bak ne ausu ma ixo etöngösen mina na. Ma ixo tengen, "E re pere a Orong." Ma ixo töngösen idi ma lasa niang a Orong ixo töngösen ine min.

### *Abo bak ne ausu toxo pere e Jisas*

<sup>19</sup> Xō ina Sade xō aien sumaraxoxo abo bak ne ausu toxo ot etok sik kölōme xō gunon, me idi toxo baxut ölölös a marame, möxōsa, toxo buburin abo Judeia. Me Jisas ixo wanot ma ixo tuu kaluluonin idi ma ixo tengen, "A malum irabo kis kö bala mum!"

<sup>20</sup> Ixo tengen sik ina na ma ixo osen abo tabalana limine ma lawana tarasine urungan tidi. Ma abo bak ne ausu toxo axanan köba nang idi toxo pere a Orong.

<sup>21</sup> Io, Jisas ixo tengen öbaling kidi, "A malum irabo kis kö bala mum! E rabo tile e mum xarnang mon niang e Tata ixo tile e."

<sup>22</sup> Io, melamu, ixo mas a mamas sine urungan tidi ma ixo tengen, "Mum moro mana kip lo a Töxödös ne Tanono.

<sup>23</sup> Nang bere mum mo dōxōmen taun abo magingin saban te ewenene re öng, io, God irabo dōxōmen taun abo magingin saban te ine. Ma nang bere mum kobo dōxōmen taun abo magingin saban te ewenene re öng, io, God i karabo dōxōmen taun abo magingin saban te ine."

### *Tomas ixo pere e Jisas*

<sup>24</sup> Io, nang e Jisas ixo ot pösöt abo bak ne ausu, Tomas, a öng mere idi a sangau ma ninöng, nang tobo rengrengen ine bara a Xasang, kaim ine ra kinis arixe midi.

<sup>25</sup> Io, abo bak ne ausu toxo töngösen ine bara, "Mem mere pere a Orong!"

Ma lamun ine ixo tengen te idi bira, "Nang bara kaim e ra werwere a mara möxō nil kö tabalana limine ma bara kaim e ra bulus a sisixine limeke xōnan, ma bara kaim e ra bulbulus öläxa a limeke xō lawana tarasine, e karabo nunu iat."

<sup>26</sup> Ma xö pitnö ma narun ne bung melamu, abo bak ne ausu toxo kis baling kölöme xö gunon, me Tomas bölök arixe midi. Me idi toxo baxut ölölös kirip abo marame, ma lamun e Jisas ixo wan laxa ma ixo tuu kaluluonin idi ma ixo tengen bira, “A malum irabo kis kö bala mum!”

<sup>27</sup> Io, ixo tengen te Tomas bira, “Bulus a sisixine limem pa. Pere abo tabalana limeke. Sanga ma limem ma örö bulus ölaxa xö lawana tarasine e. Ganim a dinödöm araruo ma lamun örö nunu.”

<sup>28</sup> Me Tomas ixo tengen te ine, “Nöngön a Orong ke e ma God te e!”

<sup>29</sup> Io, Jisas ixo tengen te ine bira, “U nunu, möxösa, uru pere e. Me idi ewe niang tekala pere e ma lamun te nunu, irabo deek kö idi.”

### *A unine ina ginigeet na*

<sup>30</sup> Me Jisas ixo pet a oleleng ne auxilieng lölös kabise bölök kö wawara xöbo bak ne ausu re ine, niang kaim a gegeet ölaxa ina ginigeet kö ina buk na.

<sup>31</sup> Inexalik bara ina na e xoro geet bere mum morobo mana nunu im bere Jisas ine a Mesaia, a Barok kö God, ma bere mum morobo kip a to runon kölöme xö esene ine nang bere mum mo nunu re ine.

## 21

### *Jisas ixo wösö xö dauleng nang toxo tewe eben*

<sup>1</sup> Melamu baling, Jisas ixo wösö xöbo bak ne ausu rine xö lawana tu Taiberias. Ma ixo osen iat ine xina ngas na.

<sup>2</sup> Saimon Pita, me Tomas nang tobo rengrengen ine ma Xasang, me Natanael mee Kena niang Galili, ma nine barok ke Sebedi arixe ma ninöng ne bak ne ausu xabise bölök kine toxo kis arixe.

<sup>3</sup> Saimon Pita ixo tengen tö idi bira, “E önan ta tewe eben.” Me idi toxo tengen, “Mem mara wan arixe me nöngön.” Io, idi toxo wan su ma toxo kakaa xö mön, nexalik kaim idi ra xikip pebo inan kina dömön.

<sup>4</sup> Xö warwara puxu, Jisas ixo tuu sik kiso löxön, nexalik abo bak ne ausu kaim idi rua werwere xulen bere ine e Jisas.

<sup>5</sup> Jisas ixo kup urungan tidi, “Bung barok ke e, kaim e mum merebo inan?”

Me idi toxo balu ine bara, “Kawaim.”

<sup>6</sup> Ine ixo tengen, “Mum moro tewe a eben te mum kö lawa tuun möxö mön me mum morobo kip pe dauleng.” Io nang, idi toxo tewe ösu, idi toxo kaim kö eöt tua sasat ölaxa a eben, möxö a inan ixo oleleng köba.

<sup>7</sup> Io, a bak ne ausu nang e Jisas ixobo mamaa xöba ulamun, ixo tengen te Pita, "A Orong iang!" Ma saxit iat mon e Saimon Pita ixo ölangen ine ixo tengen bara ine e Jisas, ixo usige ine ma saket (möxö ine ixo luwes tewe) ma ixo kos su uri xö ari.

<sup>8</sup> Ma öngabo bak ne ausu toxo muu xö mön. Me idi toxo sasat nanin a eben nang ixo wöwö sik ma inan, möxösa, kaim bere idi toxo ömat sik kalik a löxön, ixo xarnang a önga mar ne mita.

<sup>9</sup> Ma nang idi toxo ösö, idi toxo pere a ia ixoro söt malas. Ma a en lömö xönan, ma dauleng ne beret.

<sup>10</sup> Me Jisas ixo tengen tö idi, "A inan nang na mon mum mo kip, moro isik ke dauleng ura."

<sup>11</sup> Io, e Saimon Pita ixo kakaa laxa xö mön ma ixo sat a eben urungan löxön. Ma ixo wöwö sik ma inan tataxin, ixo eöt ma önga mar ma pitnö ne sangaun ma narun kirip. I turunon bara ixo oleleng köba ma lamun a eben kaim kö tamadidi.

<sup>12</sup> Me Jisas ixo tengen tö idi, "Moro miang ma moro an." Ma kaim pe bak ne ausu ixo döxömen tua ose ine bara, "Ewe nöngön?" Idi toxo ösöxö sik bere ine a Orong.

<sup>13</sup> Jisas ixo wanot ma ixo kip a beret ma ixo tabaa nanin idi min, ma ixo pet bölök bie xö inan.

<sup>14</sup> Na im, a sese önarun min nang e Jisas ixo ot pösöt abo bak ne ausu rine melamu xö tinaru baling kine xalik a minet.

### *Jisas ixo öxaxat e Pita*

<sup>15</sup> Ma nang idi toxoro an kirip, Jisas ixo tengen tue Saimon Pita bira, "Saimon barok ke Jon, bule, a mamaa re nöngön tö e i taxin köba re idi na?"

Saimon Pita ixo tengen, "Turunon saxit, Orong, nöngön u ösöxö bara e mamaa xöba ulamun nöngön."

Me Jisas ixo tengen tö ine bara, "Örobo tabaa nienin abo baroxorok sipsip pe e."

<sup>16</sup> Io, e Jisas ixo ose baling, "Saimon a barok ke Jon, u mamaa xöba ulamun e?"

Me ine ixo tengen, "Turunon saxit, Orong, nöngön u ösöxö bara e mamaa xöba ulamun nöngön."

Me Jisas ixo tengen öbaling kö ine, "Örobo balaure abo sipsip pe e."

<sup>17</sup> Io, sese önarunin Jisas ixo tengen te ine baling bara, "Saimon a barok ke Jon, u maa xöba ulamun e?"

Pita ixo bala kadik im, möxösa, ixo narun ne aose im Jisas ixo pet tö ine bara, "Nöngön u maa xöba ulamun e?" Ine ixo tengen bira, "Orong, nöngön u ösöxö xirip abo lalaa. U ösöxö bara e maa xöba re nöngön."

Jisas ixo tengen, "Örobo tabaa nienin abo sipsip pe e.

<sup>18</sup> Turunon saxit, nang u xo barok maxat sik, u xobo xuxut dik nöngön iat ma man ma u xobo önan kö mamaa re nöngön. Inexalik bara nang u ötaxin, örobo ötöxödös a nine limem ma önga tödi xabise irabo usige nöngön ma irabo silien nöngön urungan nang u kobo maa rua nuan uwe."

<sup>19</sup> Jisas ixo tengen bira rua osen ina mangana minet sa nang rue Pita ra ölelet e God. Io, ixo tengen te ine, "Örobo muu e!"

<sup>20</sup> Pita ixo talingen ma ixo pere bara a bak ne ausu nang e Jisas ixobo maa xöba ulamun ixo mumuu idu. (Nangang nang ixo maru sede dik kö lawana e Jisas kö axana bung idi toxo aan ma ixo tengen, "Orong, ewenene irabo isik nöngön kö limine nangadi?")

<sup>21</sup> Ma nang e Pita ixo pere ine, ixo ose bara, "Orong, bara bule lamun ine?"

<sup>22</sup> Jisas ixo tengen, "Nang bere e maa ulamun ine rua tino iat ot nang e rabo wanot baling, ruasa u dödödöm köba ulamun? Nöngön örobo mana muu e."

<sup>23</sup> A tinenge ixo wan esexere kaluluon köbo tönö bara ina bak ne ausu na i karabo met. Ma lamun e Jisas kaim kö rengrengen bara ine i karabo met. Ine ixo tengen mon bara, "Nang bere e maa ulamun ine rua tino iat ot nang e rabo wanot baling, ruasa u dödödöm köba ulamun?"

<sup>24</sup> Ina bak ne ausu mon na ewe ine ibo rengrengen osen inabo lalaa na ma ixo geet ösu inabo tinenge. Me ire te ösöxö bara a lak turunon.

<sup>25</sup> Jisas ixo pet a oleleng ne lalaa xabise bölök. Ma nang bara tabo geet ösu xirip idi öngöng, kaim pe boxönö xö öxöno lagunon iat tua bulbulus inabo buk nang bara texere geet.



## ABO TINÖRÖN KÖBO APOSOL

Luk ixo araun tua paraa a pii re Jisas kö Atöngösen Deek ke Luk (pere Luk 1:1) ma ixo öxawam ina pii ma ina ginigeet na nang i etöngösen ulamunon a nuan möxö atöngösen deek ulamun e Kraiss. Luk ixo isik ina nine ginigeet kirip pe Tiopilas (pere a öxöno tinenge xö Luk). Abo Tinörön köbo Aposol i ömaras ire ulamun **a urulo möxö lotu ma bara a lotu irabo wan esexere bule, meringan Jerusalem uri Samaria ma xö boxönö xirip möxö öxöno lagunon (Aposol 1:8)**. Ina na a unine ina ginigeet. I töngösen ire bara a lotu ixo wanot bule melamu xö tinaru kaa re Jisas. Xö urulo, abo Judeia toxo nunu, io, ma Töxödös ne Tanono ixo wan su lömö re idi (2:1-41). Ma lamun a atöngösen deek i kobo rua gene idi abo Judeia xalik mon. Kaim. A Töxödös ne Tanono ixo wan su bölök ke idi abo Samaria nang toxo nunu re Kraiss sua osen bara God irabo öro idi (8:14-17; 8:25). Ma a Tanono ixo wan su bölök ke idi nang kaim bara abo Judeia rua osen bara a nangadi möxö öxöno lagunon kirip tabo eöt tua xikip ina ineöro nang bara idi tabo nunu re Kraiss (10:1-11:18). I töngösen bölök ire ulamun a to ma tinörön te Pol nang ixo etöngösen ma atöngösen deek kö idi nang kaim bara Judeia, möxösa, abo Judeia toxo mölök kalik a atöngösen deek. Io nang, i eöt te ire bara tabo maras kere dauleng ne laa xö inabo lotu nang e Pol ixo tile inabo ginigeet urungan te idi. Me Luk ixo geet ina pii nang e Pol ixo kis kö gunon ne aömokorot to Rom kö nine awat. Pol ixo lörorö im bara irabo tuu xö warkurai ma i wawara bara e Luk ixo mamaa rua osen bere Pol i koxobo pet te önga sasaban. Abo tiip toxo ot pösöt e Pol, möxösa, abo Judeia toxo mölök kalik e Pol, ma kaim bara re önga tene pet warkurai mee Rom ixo pere lo re önga sasaban te Pol.

### *Jisas ixo wan uruso xö watmaep*

<sup>1</sup> Tiopilas, kölöme xö sisila ne buk e xo geet, e xo geet lamun abo lalaa nang e Jisas ixo urulo xö tinörön ma a ausu re ine,

<sup>2</sup> ot kö axana bung nang e God ixo kip lo ine uruso xö watmaep. Melamu ixo kip lo e Jisas uruso lömö, Jisas ixo isik a tinenge möxö lölös möxö Töxödös ne Tanono urungan köbo aposol nang ine ixo pere kos lo.

<sup>3</sup> Melamu xö kinadik ma tiip pe ine, ixo osen ine xinabo duöng ma ixo isik a oleleng ne auxilieng kua werwerexulen bara turunon saxit ine ixo to sik. Xö nit ne sangau ne

bung, e Jisas ixo orot pösöt idi ma ixo rerenge re idi lamun a kingdom kö God.

<sup>4</sup> Jisas ixo isik a tinenge lölös se idi nang idi toxo ot arixe: “Gan a nuan lie e Jerusalem, lamun mum morobo kis xiset lo a arabaa nang e Tata ixo kubus, nang e mum moxo ölangen bara e xo wöwörö lamun.

<sup>5</sup> Jon ixo baptais ma ari, lamun köbo bung na uruso mon mum morobo kip baptais arixe ma Töxödös ne Tanono.”

<sup>6</sup> Io, nang abo aposol toxo ot etok arixe me Jisas ma toxo ose ine, “Orong, xina bung na örobo isik a kingdom kö God baling köbo Israel?”

<sup>7</sup> Jisas ixo tengen tö idi, “I kobo laa re mum pa ösöxö a bung mabo axana bung nang e Tata ixoro bulus kö lölös se ine iat.

<sup>8</sup> Lamun morobo ilo a lölös kö bung nang a Töxödös ne Tanono irabo ot te mum, me mum morobo tengen a turunon tö e rusu Jerusalem, ma kölöme xirip Judeia me Samaria ma xo öxöwam möxö öxöno lagunon.”

<sup>9</sup> Malamu xo tinenge nang ixo tengen, ine ixo wan kaa ma a kubu ixo kait pi lo ine xo wawara re idi.

<sup>10</sup> Idi toxo werwere dik e Jisas ixo önan kaa uruso lömö, ma saxit mon, a nine tödi idu toxo sige sik ana man pidien, toxo tuu sik kö lawana idi.

<sup>11</sup> Me idu toxo tengen, “Duöng meriso Galili, ruasa mum mo ruruu ringan ma mo wawara uruso lömö xo watmaep? Ina Jisas nang God i kip lo uruso lömö xo watmaep, ine mon nang irabo wan su baling kina ngas iat nang mum mo pere ine i wan kaa bie uruso xo watmaep.”

### *Matias ixo kip kulas a xönö re Judas*

<sup>12</sup> Io, idi toxo wan lie a maii tobo tengen me Olip, ma toxo wan uruso Jerusalem. Ma Jerusalem i öt ma önga kilomita xalik a Maii Olip.

<sup>13</sup> Nang idi toxo ot, idi toxo wan kaa xo xönö rusu lömö xo gunon nang idi tobo xisixis könan. Nangadi nang toxo ot e Pita, Jon, Jems me Endru, Pilip me Tomas, Batolomiu me Matiu, Jems a barok ke Alpius me Saimon a Silot me Judas a barok ke Jems.

<sup>14</sup> Idi xirip tobo orot etok ma toxobo seseseng sösöxö arixe mabo une, me Maria a nago re Jisas mabo tönö re ine.

<sup>15</sup> Xina bung niang Pita ixo tuu kaluluonin abo tene nunu. A marakörö toxo öt ma a mar ma nine sangaun arixe.

<sup>16</sup> Me Pita ixo tengen, “Abo töke, a tinenge re God toxo geet i eörin nang a Töxödös ne Tanono ixo tengen mesila saxit kö ngusuno Dewit lamun e Judas, nang ixo rörön

xarnang a sisila, nang ixo sila re nangadi nang toxo tödik lo e Jisas.

<sup>17</sup> Ine a öng mere ire me ine ixo tön sik a subana tinörön kölöme xönan."

<sup>18</sup> (Arixé ma xinixun nang ixo kip lo möxö magingin saban te ine, Judas ixo kun a xönö pu, ma ringan könan ixo subu sila ma öxöno, ma aine ixo tawalang, ma balana ixo tamaluok su.

<sup>19</sup> Ma nangadi xirip niso Jerusalem toxo ölengen lo, ma xö tinenge re idi, idi toxo tengen ina xönö pu nang ma ese 'Akeldama,' a unine bara a 'Öxöno Pu möxö Dee.')

<sup>20</sup> Me Pita ixo tengen öbaling bira, "Na ixo ot, möxö toxoro geet ösu xö Buk ne Sinö bira,

*'E maaaa bara a gunon te ine irabo mene,  
ma kaim pe öng irabo kis könan.'*

Ma ixo tengen baling bira,

*'Re öng kabise irabo kip lo a ngasiene xina tinörön ne tene sisila.'*

<sup>21-22</sup> Io, tabo mana pere kos lo re öng mere idi ewe nang toxoro kis arixe me ire xöbo bungbung kirip nang e Jisas, a Orong, ixo önan eli kaluluonin ire, ma urulo xö baptais se Jon urungan kö bung nang God ixo kip lo e Jisas uruso lömö xalik ire. Io, öng mere idi irabo mana arixe me ire ra tinenge maras lamun a tinaru baling ke Jisas nang a lak turunon."

<sup>23</sup> Io, idi toxo maraxa ra pere kos a nine tödi, Josep nang tobo rengrengen ine me Barsabas (esene bölök e Jastus), me Matias.

<sup>24-25</sup> Idi toxo seseseng, "Orong, u ösöxö sik a dinödöm kö nangadi xirip. Orong, e seng nöngön örö osen e mem me nangang sa re idu nang uru pere kos lo rua xuxulas e Judas kina tinörön möxöbo aposol. Judas ixo wan lie ina tinörön ma ixo baling lamun kö xönö nang a kinis se ine iat."

<sup>26</sup> Io, idi toxo tewé a nine wat tua pere kos lo ewenene re Josep me Matias irabo kip kulas ina tinörön te Judas, ma wat ixo subu ma ixo osen bere Matias. Io, toxo kos öläxa ine xö önga sangaun ma öng ne aposol.

## 2

### *A Töxödös ne Tanono ixo wan su*

<sup>1</sup> Nang a bung möxö Pentikos ixo ot, idi xirip toxoro ot etok arixe xö önga xönö.

<sup>2</sup> Ma saxit mon, a ginee xarnang a winawaxat möxö xiki lölös ixo wan su meriso lömö, ma ixo öwöwö xirip ina könonö gunon nang idi toxo kisisik e.

<sup>3</sup> Idi toxo pere a laa xarnang a kamene ia ixo wan elixilik ma ixo kis kö öxödi a öngöng.

<sup>4</sup> Idi xirip toxo wöwö arixe ma Töxödös ne Tanono ma toxo urulo ra tinenge mabo tinenge xabise nang a Tanono ixo ölölös idi rua tinenge min.

<sup>5</sup> Io, a oleleng ne tene lotu möxöbo tee mee Judeia nang möxö boxönö xirip kö öxöno lagunon kö pu, toxo xisixis Jerusalem.

<sup>6</sup> Nang toxo ölangen ina ginee, a marakörö toxo ot etok ma toxo ngangao, möxösa, öngöng mere idi ixo ölangen a tinenge re ine iat nang idi toxo wöwörö min.

<sup>7</sup> Abo Judeia toxo wuwus köba ma toxo ose, "Ina nangadi na te wöwörö, idi mee Galili? Goo?"

<sup>8</sup> Io, bule bara ire öngöng te ölangen idi te wöwörö ma tinenge runon te ire öngöng iat?

<sup>9</sup> Ire mee Patia, Midia ma Ilam, me ire mee Mesopotemia, Judeia ma Kapadosia, Pontus ma Esia,

<sup>10</sup> Pirigia, Pampilia, Isip ma boxönö möxö Libia lörörö Sairin, mabo osee meriso Rom

<sup>11</sup> (idi xirip abo Judeia arixe mabo osee nang toxo laxa xö lotu ridi abo Judeia), ma dauleng ke ire mee Krit ma Arebia. Ire te ölangen kulen idi te wöwörö mabo tinörön lölös kö God köbo tinenge iat te ire."

<sup>12</sup> Idi toxo wuwus ma toxo ngangao ma toxo eose nana iat te idi, "A lasa ina unine möxö ina winawara na?"

<sup>13</sup> Inexalik, a dauleng toxo eösaxit me idi ma toxo tengen bira, "Idi te inim ösaxit a ari lölös."

### *Pita ixo palas tinenge*

<sup>14</sup> Io, Pita ixo tuu kaa arixe ma sangaun ma öng ne aposol, ma ixo tenge raxin ma ixo tenge maras kö marakörö: "Mum abo Judeia me mum kirip nang mum mo xisixis kölöme Jerusalem, moro ölangen ödeek a tinenge na arabo palas se mum.

<sup>15</sup> Abo duöng na tekobo inim, nang mum mo döxömen bie. Kaim. A pitnö ma nit ne axana bung kö puxu mon bang a!

<sup>16</sup> Ina tinenge na e propet Joel ixo etöngösen min.

<sup>17</sup> *'God ixo tengen, xöbo axana bung möxö xakawöm, e rabo tile ösu a Tanono e lömö xö nangadi xirip. Abo baroxorok ma balixilik ke mum tabo palas tinenge xarnang abo propet,*

*abo guama re mum tabo pere a winawara, ma abo duöng maruxo tabo pönöbe a wöpönöbö.*

<sup>18</sup> *Ma xinabo bung e rabo tile ösu a Tanono e xöbo tultul te e, a körö ma balixilik arixe min, me idi tabo palas tinenge xarnang abo propet.*

19 *E rabo pet abo mangana lalaa ne awuwus suso lömö xö watmaep*

*mabo uxileng kö öxöno lagunon kö pu.*

*Irabo bira, dee ma ia sösöt ma tabaa raxin irabo ot.*

20 *A xaken irabo tawuxus urungan kö ködö lilimen ma texe irabo dadan xarnang a dee.*

*Malamu, a mariris ne bung taxin kö Orong irabo ot.*

21 *Ma nangadi xirip ewe idi nang tabo seng a Orong bara irabo top idi, tabo kip a to.'*

22 "Mum a nangadi mee Israel, moro ölangen inabo tinenge na: Jisas mee Nasaret a tödi nang e God ixo osen te mum bere Jisas ine ewe. Me God ixo pet abo mangana lalaa ne auuwus mabo auxileng lölös kaluluonin e mum, ma ixo pet abo lalaa na xö limine Jisas xarnang mon mum iat mo ösöxö sik.

23 Toxo isik e Jisas urungan te mum, möxösa, God, kö mamaa ma nanase re ine iat, ixoro pingit bara tabo pet bie. Me mum iat mabo nangadi saban moxo tut ine xö sölöxöröp.

24 Lamun e God ixo öraru öbaling ine xalik a minet, ma ixo ölanglanga ine xalik a kinadik möxö minet, möxösa, a minet i koxobo eöt ta rörödik ine.

25 Dewit ixo tenge lamun ine:

*'E bo werwere a Orong mesila re e xöbo bungbung kirip.*

*Abo tiip i karabo ot tua ögigie e möxösa, ine i lörörö re e.*

26 *Io nang, a balake i deek me e tenge axanan.*

*A aike bölök irabo xixiset ma nunu ulamun abo lalaa deek,*

27 *möxösa, nöngön ökorobo ganim tewe e urungan kö lagunon ne minet,*

*ma ökorobo ömaraxen lo re Öng ke nöngön Nang i Madakdak bara irabo maxus.*

28 *Nöngön u xoro ömaras e xö ngas möxö to,*

*ma örobo öwöwö e ma axanan, möxösa, nöngön u kis arixe me e.'*

29 "Abo töke, e maras kirip sik ke Dewit, me e öt sik ka tengen osen e mum bara ixo met ma toxo pömös ine, ma a maöt te ine i nangen i kis nixinen.

30 Ine a propet ma ixo ösöxö bere God ixoro sugurno sik bere ine irabo uxis a untubuno xö kinis ne warkurai te ine.

31 Dewit ixoro maras lamun abo mangana lalaa nang irabo ot melamu, ma ixo etöngösen ma tinaru baling möxö Mesaia. Ixo tengen bara God i karabo ganim tewe ine urungan kö lagunon ne minet bara a lewene aine irabo maxus.

<sup>32</sup> Ine Jisas mon na, God ixo öraru öbaling ine me mem kirip moxo pere ina lalaa na, me mem moxo etöngösen min bara i turunon.

<sup>33</sup> Me God ixo öraxin ine ma ixo uxis ine xö lime tuun tine iat, me Jisas ixo kip lo a Töxödös ne Tanono i eöt ma kunubus se God. Ma na, mum mo werwere ine, me mum moro ölangen ina arabaa nang ine ixo tile urungan tö idi.

<sup>34</sup> Ma i maras bara Dewit kaim ine ra nuan uruso xö balana kubu, ma lamun ine iat ixo tengen bara,

*'A Orong i tengen kö Orong ke e bara:*

*"Nöngön u kisisik kö lawa tuun te e*

<sup>35</sup> *ot nang arabo bulus abo iuo re nöngön*

*kö ene xexem."*

<sup>36</sup> "Möxö ina na, i deek bara abo Israel kirip tabo ösöxö bere God ixoro uxis ina tödi na e Jisas, ine ewe nang mum moxo tut kö sölöxöröp, bere ine a Orong ma Mesaia bölök."

<sup>37</sup> Ma nang a nangadi toxo ölangen ina tinenge na, ixo kara abo baladi me idi toxo tapunuk ma toxo tengen te Pita ma önga bo aposol, "Abo tönö e mem, a lasa mem marabo pet?"

<sup>38</sup> Pita ixo balu idi bira, "Mum kirip a öngöng moro dödom puxus ma moro kip baptais kö esene Jisas Krais nang e God irabo döxömen taun abo magingin saban te mum. Me mum morobo kip lo a arabaa xö Töxödös ne Tanono.

<sup>39</sup> A kunubus na rua gene mum ma a bung baroxorok ke mum bölök, ma re we midi nang te kis kö palaa. Ina kunubus na rua gene idi xirip na nang a Orong, a God te ire, irabo kuwe idi."

<sup>40</sup> Pita ixo tengen ögele idi ma oleleng ne mangana tinenge, ma ixo tengen bira, "Balaure ödeek e mum iat, xalik e mum bo iuo arixe ma inabo nangadi saban na."

<sup>41</sup> Ewenene midi nang toxo ömaraxen lo a tinenge re ine, toxo kip baptais. Ma xina bung na ixo eöt ma narun ne arip ne nangadi toxo laxa ra öraxin a xinoxos möxöbo tene nunu re Jisas.

*Abo tene nunu idi toxo öng mon*

<sup>42</sup> Idi toxo isik idi iat ta ölangen abo inausu xöbo aposol, ma ra inot etok arixe rua rorop idi öngöng, ma rua widwidik a beret, ma ra sineseng.

<sup>43</sup> Mabo aposol toxo pet a oleleng ne laa ne auwuwus mabo uxileng lölös, ma nangadi xirip toxo ii e God ma binuut.

<sup>44</sup> Abo tene nunu xirip toxo kis etok arixe, ma toxo bulus etoxin abo lalaa re idi ma toxo erimine kaluluonin idi iat.

<sup>45</sup> Idi toxobo mimiisik mabo lalaa nang idi te unan ma toxobo erimine xö nangadi ewe idi nang te sasaxan.

<sup>46</sup> Xö bungbung kirip idi toxobo orot etok arixe kölöme xö gunon lotu raxin. Idi toxobo aan arixe xöbo gunon te idi a öngöng, ma toxobo aan arixe ma bala malum ma axanan kö to re idi.

<sup>47</sup> Idi toxobo ölelet e God, ma a nangadi xirip toxobo axanan me idi. Ma ewe midi nang a Orong ixobo öro idi, ixo bulus öläxa idi xö xinoxos se idi abo tene nunu xöbo bungbung kirip.

### 3

#### *Pita ixo ölanglanga a pengpeng*

<sup>1</sup> Xö önga bung, Pita me Jon toxo wan uruso xö gunon lotu raxin kö narun ne axana bung kö aien nang a axana bung ke idi möxö sineseng.

<sup>2</sup> Io, önga tödi, a nene ixo kiwine ma lak pengpeng, toxo kip lo ine ma toxo bulus ine ringan kö marama laxlaxa möxö xönö mesila xö gunon lotu raxin, nang tobo rengrengen ma Mariris. Bungbung kirip tobo uxis sik ine xina marama rua seng tuluwok kalik a nangadi nang tobo laxlaxa xina xönö xö gunon lotu.

<sup>3</sup> Nang ixo pere e Pita me Jon toxo eka nuan laxa, ine ixo seng tuluwok kalik idu.

<sup>4</sup> Pita me Jon toxo pere dik ine, io, Pita ixo tengen, “Örö pere e maa!”

<sup>5</sup> Io, a tödi nang ixo pere dik idu ixo dökömen bara irabo kip lo rebo lalaa xalik idu.

<sup>6</sup> Io, Pita ixo tengen, “Siliwa bara gol kaim e min, ma lamun a lasa nang e min, e rabo tabaa nöngön min. Kölöme xö esene Jisas Kraiss mee Nasaret, örö taru örö wan.”

<sup>7</sup> Pita ixo tön lo ine xö lime tuun, ma ixo top ine ra tinuu, ma saxit iat mon, abo xexene ina tödi arixe ma abo busuno xexene ixo deek.

<sup>8</sup> Ixo kos kaa ma ixo tuu, io, ixo urulo a nuan. Ixo wan laxa arixe me idu urungan kö xönö mesila xö gunon lotu, ixo önan ma ixo xoxos, ma ixo ölet nanin e God.

<sup>9</sup> A nangadi xirip toxo pere ine ixo önan ma ixo ölet nanin a esene God.

<sup>10</sup> Idi toxo perexulen ine bara ina tödi mon nang ixobo kisisik ma ixobo seseng tuluwok kö mariris ne marama laxlaxa möxö gunon lotu raxin. Idi toxo wuwus ma toxo dödöm oleleng kö mangana laa nang ixo ot te ine.

#### *Pita ixo tenge maras*

<sup>11</sup> Ma nang ina tödi pengpeng ixo tödik e Pita me Jon, a nangadi xirip toxo wuwus ma toxo ulo urungan te idiet kö xönö tobo rengrengen ma Walpali re Solomon.

<sup>12</sup> Io, nang e Pita ixo pere birina, ixo tengen tö idi, “Duöng mee Israel, ruasa a laa birina i öwuwus e mum? Ma ruasa mum mo ngökngök ke maa, i xarnang bara a lölös iat te maa, ma bara xö tatalien deek ke maa xö wawara re God, maa me ölanglanga ina tödi ma i wan? Kaim.

<sup>13</sup> A God te Abaram, te Aisak me Jekop, ma God köbo untubuno ire, i öraxin a tödi tinörön te ine, e Jisas. Mum moxo isik ot ine rua minet, me mum moxo kasen tewe ine mesila re Pailat, io, nang ixo mamaa ra öbala rewe ine.

<sup>14</sup> Mum moxo mölök lamun ina öng nang a tene Madakdak ma a tene Töxödös ine, me mum moxo ose e Pailat lamun a tödi möxö inarse ömet, bere Pailat irabo öbala ösu ine urungan te mum.

<sup>15</sup> Mum moxo sexomet a tödi nang ine a unine to, ma lamun e God ixo öraru öbaling ine xalik a minet. Mem a nangadi nang moxo pere ine, mem me etöngösen bara i turunon.

<sup>16</sup> Xö nunu xö esene Jisas, ina tödi ewe niang mum mo pere ma mo ösöxö ine ixo kip lölös. A lölös möxö esene Jisas ma a nunu nang i wanot meringan tine nang ixo ölanglanga ine xarnang mum moro pere.

<sup>17</sup> “Io, abo töke, e ösöxö bara a lasa nang mum moxo wewet te Jisas mum kobo maras bara mum mo wewet a sa, mum arixe mabo tene sisila re mum.

<sup>18</sup> Inexalik bara God ixo pet eörin a lasanene xarnang ine ixoro tengen köbo propet, bara Mesaia rine irabo kip a kinadik.

<sup>19</sup> Moro dödöm puxus, ma moro tawuxus urungan te God, io, God irabo döxömen taun abo magingin saban te mum mabo bung irabo ot nang a Orong irabo ösidö e mum,

<sup>20</sup> me God irabo tile e Jisas, a Mesaia ewe nang ine ixo pere kos lo ine rö mum.

<sup>21</sup> Ine irabo xisixis iat tuso lömö xö watmaep ot kö bung nang irabo ot te God ta ömaxat abo lalaa xirip kö öxöno lagunon, nang ixoro tengen lorexe saxit köbo madakdak ne propet te ine.

<sup>22</sup> Moses ixo tengen, ‘A Orong, a God te mum, irabo uru re önga propet xarnang e ringan kaluluonin e mum iat. Me mum morobo mana ölangen kirip abo tinenge nang irabo tengen te mum.

<sup>23</sup> Nang bere ewenene i kobo ölangen ine, io, tabo irewe ine xalik a nangadi re ine iat, io, irabo mana met.’

<sup>24</sup> “Abo propet kirip iat urulo re Samuel me idi nang melamu rine, idi toxo wöwörö mabo lalaa nang irabo wanot kinabo bung na.

<sup>25</sup> Mum morobo kip lo a inone tinenge xalik abo propet, me mum ina kunubus nang e God ixo pet arixe mabo tubu



mum. Me ine ixo tengen te Abaram bira, *'Meringan kölöme xöbo tubu mum e rabo wadöane a nangadi xirip möxö öxöno lagunon.'*

<sup>26</sup> Nang e God ixo öraru öxaa a tultul te ine, e Jisas, ixo tile araun ine urungan te mum pa wadöane e mum bira: irabo lamus puxus a öngöng mere mum kalik abo magingin saban te mum."

## 4

*Pita me Jon toxo tuu mesila xö wawara xöbo kansel*

<sup>1</sup> Abo pris mabo Sadiusi ma a umri raxin möxöbo köbat möxö gunon lotu raxin, toxo wanot pösöt e Pita me Jon kina axana bung nang idu toxo wöwörö xö nangadi.

<sup>2</sup> Idi toxo bala kinadik köbo aposol, möxösa, idu toxo palas tinenge ma toxo usu a nangadi bere Jisas ine ina unine möxö tinaru baling möxö minet.

<sup>3</sup> Idi toxo tödik e Pita me Jon, me idi toxo bulus idu kölöme xö gunon ne aömokorot ot kö bung kabise, möxö ixoro aien.

<sup>4</sup> Ma lamun a oleleng ewe idi nang toxo ölangen a tinenge, toxo nunu. Ma xinixos se idi ixo wan kaa xö pitnö ne arip.

<sup>5</sup> Xö bung melamu, abo sisila xöbo Judeia, abo duöng tataxin, mabo tene ausu möxöbo warkurai te Moses, toxo wan etok kuso Jerusalem.

<sup>6</sup> Anas nang a sisila raxin möxöbo pris i nangen iang arixe me Kaiapas, Jon, Aleksenda ma abo duöng kabise möxö baninen kö sisila raxin möxöbo pris idi bölök nangen.

<sup>7</sup> Idi toxo uru e Pita me Jon mesila xö wawara re idi ma toxo ose puk idu, "Xö lölös sa ma xö ese sa mu mo pet inabo lalaa na?"

<sup>8</sup> Io, Pita ixo wöwö ma Töxödös ne Tanono ma ixo tengen te idi bira, "Abo tene sisila mabo duöng tataxin kö nangadi, mum moro ölangen!

<sup>9</sup> Nang bara mum mo ose ömuu e maa nixinen lamun a tatalien deek nang maa moxo osen kö pengpeng me mum mo ose bule ine ixo langlanga,

<sup>10</sup> io, mum ma nangadi xirip mee Israel, moro ösöxö a na, bara tödi na i tuu sik kö mamaran te mum, i langlanga xö lölös möxö esene Jisas Kraiss mee Nasaret, ewe mum moxo tut ine xö sölöxöröp, me God ixo öraru ine xalik a minet.

<sup>11</sup> Ine

*'a wat nang e mum abo tene pet gunon mum koxobo maaaa ulamun,  
nang ine bölök im a lölös möxö unine gunon kirip.'*

<sup>12</sup> Kaim pe tödi xabise bölök i eöt tua öro ire, möxö kaim pe ese xabise lawu xö öxöno lagunon God ixo isik kö nangadi i eöt turunon ta öro ire."

<sup>13</sup> Nang idi toxo pere bere Pita me Jon idu kaim kö binuut ma toxo perexulen bara idu kaim kö ausu ma nine tödi tataun mon, idi abo tödi sisila toxo wuwus me idi toxo ösöxö bara idu toxoro kis arixe me Jisas.

<sup>14</sup> Inexalik, kawaim idi mere tinenge rua rengrengen, möxösa, idi toxo pere ina tödi ewe ixoro langlanga ixo tuu sik arixe me idu.

<sup>15</sup> Io, idi abo duöng tataxin toxo tengen te idiet ta nuan kalik ina kansel, io, idi toxo wöwörö kaluluonin idi.

<sup>16</sup> Idi toxo ose, "A lasanene ire tabo pet lamun a nine tödi na? Nangadi xirip nang tobo xisixis Jerusalem tere ösöxö bara idu toxoro pet a mangana laa lölös ne auwuwus, me ire tekobo eöt ta rengrengen bara i kobo turunon ina laa.

<sup>17</sup> Lamun ire te mamaa bara i bele wan esexere. Io, ire tabo mana ögele a nine tödi na ra ganim idu ra atöngösen mere tödi baling kö ese na."

<sup>18</sup> Io, idi toxo kuwe lo öbaling idu ma toxo tenge lölös se idu bara ganim idu ra winörö ma ra inausu bölök im ma esene Jisas.

<sup>19</sup> Lamun e Pita me Jon toxo balu idi bira, "Mum iat moro kure bara i töxödös sik kö wawara re God bere maa marabo ölangen e mum ma ganim e God.

<sup>20</sup> Möxö maa me kebeöt ta xakawam pa tinenge xalik a sa nang e maa moxoro pere ma moxoro ölangen."

<sup>21</sup> Melamu im köbo tinenge lölös nang toxo isik ke idu toxo öbala ösu idu ra nuan. Idi toxo pere bara i kebeöt ta ömaso idu, möxö a nangadi xirip toxo ölet e God lamun a lasa nang ixoro ot,

<sup>22</sup> möxösa, a tödi ewe nang ixo langlanga xö lölös möxö pet laa ne auwuwus, a awat tine ixo saxit a nit ne sangaun.

### *A sineseng köbo tene nunu*

<sup>23</sup> Nang toxo irewe idu, Pita me Jon toxo wan baling urungan kö nangadi re idu ma toxo tengen ösu xirip abo tinenge nang abo pris tataxin mabo sisila xö nangadi toxo tengen te idu.

<sup>24</sup> Nang idi toxo ölangen inabo tinenge na, idi toxo urulo ra sineseng arixe ma önga dinödöm mon uruso re God, idi toxo tengen, "Orong taxin, nöngön u xo pet a balana kubu ma öxöno lagunon ma rasi, mabo lalaa xirip kölöme xönan.

<sup>25</sup> U xo wöwörö ma Töxödös ne Tanono meringan kö ngusuno a tene tinörön te nöngön, untubuno ire e Dewit:  
*'Ruasa bara a nangadi nang kaim bara abo Judeia idi te bala kadik?  
Ruasa bara a nangadi te kubus tinenge me idi tekebeöt ta wewet eörin?'*

<sup>26</sup> *Abo king mera xö öxöno lagunon toxo tagure idi iat*

*mabo sisila toxo tuu arixe ra bulbulus ösu a Orong ma ra bulbulus ösu e Mesaia re ine.'*

<sup>27</sup> Turunon saxit, e Erot me Pontias Pailat toxo tuu arixe mabo nangadi nang kaim bara abo Judeia ma a nangadi mee Israel kölöme xö ina lagunon taxin na rua wewet abo ngas saban lamun a madakdak ne tene tinörön te nöngön, e Jisas ewe nang u xo uxis ine bara ine a Mesaia.

<sup>28</sup> Idi toxo pet abo lalaa xirip nang a lölös ma maaaa re nöngön ixo pingit ösila bara irabo ot.

<sup>29</sup> Orong, örö döxömen abo tinenge re idi nang idi te tengen bara tabo ögarin e mem, ma örö top e mem abo tultul te nöngön ta atöngösen ma tinenge re nöngön ma balamasa.

<sup>30</sup> Sasanga ma limem pa ölanglanga a nangadi miniset ma ra wewet abo auxileng lölös ma lalaa ne auwuwus kölöme xö esene Jisas, a madakdak ne tene tinörön te nöngön."

<sup>31</sup> Melamu xö sineseng, a xönö nang idi toxo kis etok könan ixo gigie. Me idi xirip toxo wöwö ma Töxödös ne Tanono ma toxo urulo ra atöngösen ma tinenge re God ma nunu ma balamasa.

*A kinis deek köbo tene nunu*

<sup>32</sup> A nangadi xirip nang toxo nunu, toxo tuu arixe xö önga dinödöm ma önga baladi, ma kaim pe öng ixo tengen bara abo lalaa rine xalik mon, ma lamun idi toxo erabaa kaluluonin idi öngöng mabo laa re idi iat.

<sup>33</sup> Abo aposol toxo palas tinenge ma lölös taxin kö tinaru baling ke Jisas, a Orong, ma a abalamu raxin saxit ixo kis lömö re idi xirip.

<sup>34</sup> Kaim pe öng kaluluonin idi ixo sasaxan. Ma xöbo bung nang, a dauleng ne nangadi toxo mimiisik ma pu bara gunon, toxo kiwot a tuluwok nang toxo kip möxö misik

<sup>35</sup> ma toxo bulus mesilanin abo aposol, me idi im toxo erimine xö nangadi nang toxo sasaxan.

<sup>36</sup> Josep meri Saipras, ine möxö bung marapun nang a Liwai, ewe niang abo aposol tobo rengrengen ine me Banabas (ma a unine bira a Tene Aöxaxat),

<sup>37</sup> ixo misik ma xönö pu rine ma ixo kiwot a tuluwok ma ixo bulus mesilanin abo aposol.

## 5

*Ananias me Sapaira*

<sup>1</sup> Io, a tödi, a esene Ananias, arixe me usuono Sapaira, idu toxo misik ma öxöno pu nang idu toxo unan sik.

<sup>2</sup> A uleng möxö ina tuluwok, Ananias kaim ine xo osen, ma uleng nang ixo kip, ixo bulus mesilanin abo aposol. Ma usuono ixo ösöxö sik ina na.

<sup>3</sup> Io, Pita ixo tengen, “Ananias, bara bule arixe nang e Satan i öwöwö xöbanin a balam nang u rö töxö a Töxödös ne Tanono ma u rö tödik a subana tuluwok kö nöngön iat, nang toxo isik ke nöngön lamun a xönö pu?”

<sup>4</sup> Nang bang kaim nöngön ta misik mina öxöno pu, ixo re nöngön iat. Ma nang u xo misik tar min, ina tuluwok ke nöngön bölök. A sa ixo pet nöngön nang u dödöm pa wewet ina mangana tatalien? U kobo röxröxö a nangadi. U röxröxö e God.”

<sup>5</sup> Nang e Ananias ixo ölangen ina na, ine ixo subusu ma ixo met. Ma binuut taxin saxit ixo kip ewe idi nang toxo ölangen a lasa nang ixo ot.

<sup>6</sup> Io, a bung guama toxo wanot, toxo kait lo ine, ma toxo kip ösu ine ma toxo pömös ine.

<sup>7</sup> Melamu xö narun ne awa, a usuono ixo wan laxa, kaim a ösöxö bara a sa ixoro ot.

<sup>8</sup> Pita ixo ose ine, “Örö tengen te e, ine mon ina xunuxun nang nöngön me Ananias mu moxo kip lo möxö pu?”

Ma usuono ixo aut ma ixo tengen, “Ine iat mon ina xunuxun.”

<sup>9</sup> Pita ixo tengen te ine, “Bara bule mu moro maraxa lo mon ta ölewen a Töxödös ne Tanono? Pere bang! Abo xexene nangadi nang te pömös e usuom, idi iang kö marame, me idi tabo kip ösu bölök nöngön.”

<sup>10</sup> Saxit iat mon ina une ixo subusu xö xexene Pita ma ixo met. Io, abo guama toxo wan laxa, ma toxo pere ine ma ixoro met, toxo kip ösu ine ma toxo pömös ine xö lawana usuono.

<sup>11</sup> A binuut taxin ixo kip abo tene lotu xirip, me idi xirip bölök nang toxo ölangen ina laa nang ixo ot.

*Abo aposol toxo ölanglanga a oleleng ne miniset*

<sup>12</sup> Abo aposol toxo pet a oleleng ne lalaa ne auxilieng lölös ma lalaa ne auwuwus kaluluonin a nangadi. Ma abo tene nunu xirip toxobo orot etok arixe ma önga dinödöm kö gunon ne walpali re Solomon.

<sup>13</sup> I turunon bara a nangadi xabise toxo ii öraxin abo tene nunu, ma lamun idi toxo bubuut ta kinis arixe ma abo tene nunu.

<sup>14</sup> A oleleng saxit, a körö ma balixilik, idi toxo nunu xö Orong me idi mon niang toxo pet a xinixos möxöbo tene nunu ixo wan kaa.

<sup>15</sup> Möxö ina na, a nangadi toxo lamus ot a nangadi miniset urungan kö ngas ma toxo ömarin idi lömö xö öra ma ben bara a tanono e Pita irabo tawi a dauleng ke idi nang bara ine i sasaxit.

<sup>16</sup> Marakörö toxo orot etok bölök möxöbo lagunon lörörö Jerusalem, ma toxo lamus a nangadi miniset te idi ma ewe

bölök nang a tano saban ixo sige idi, me idi xirip toxo deek baling.

*Abo eler köbo aposol*

<sup>17</sup> Io, a sisila raxin möxöbo pris mabo Sadiusi nang tobo rörörön arixe mine, idi toxo wöwö ma bala kadik.

<sup>18</sup> Idi toxo öxös abo aposol ma toxo ölaxa idi xö gunon ne aömokorot möxö nangadi xirip.

<sup>19</sup> Ma lamun kö dömön a angelo xö Orong ixo sawang abo marame möxö gunon ne aömokorot, ma ixo lamus ösu idi.

<sup>20</sup> Ma ixo tengen te idi, "Mum moro wan ma moro tuu ruso kölöme xö xönö mesila xö gunon lotu raxin ma moro tengen kirip abo tinenge möxö ina to maxat na xö nangadi."

<sup>21</sup> Nang a körörö ixo tawalang idi toxo wan laxa xö gunon lotu raxin, xarnang ixo tengen te idi bie, ma toxo urulo ra usu a nangadi.

Io, nang a sisila raxin möxöbo pris mabo duöng ke ine toxo ot, idi toxo kuwe etoxin abo sisila ne kansel kirip mee Israel, ma toxo tile tinenge urungan kö gunon ne aömokorot lamun abo aposol.

<sup>22</sup> Ma lamun kö inot te idi xö gunon ne aömokorot, abo tultul kaim a werwere abo aposol kölöme. Io, idi toxo wan baling ma toxo töngösen abo sisila bara,

<sup>23</sup> "Mem me pere a gunon ne aömokorot i tamabaxut, mabo köbat te tuu sik kö marame, ma lamun nang e mem me sawang abo marame, mem me parasiwin bara kaim pe öng kölöme."

<sup>24</sup> Xö ölöngö möxö ina atöngösen, a sisila möxöbo köbat mabo pris tataxin toxo dödöm oleleng, ma toxo dödödöm bara a lasa irabo wanot möxö ina laa na.

<sup>25</sup> Io, önga tödi ixo ot ma ixo tengen, "Mum moro pere bang! A nangadi nang mum moxo bulus ölaxa idi xö gunon ne aömokorot te tuu sik niso xö xönö mesila xö gunon lotu raxin ma te uusu a nangadi."

<sup>26</sup> Nang idi toxo ölangen ina na, a sisila möxöbo köbat ixo wan arixe mabo tödi raxin te ine ma toxo lamus lo abo aposol. Kaim idi ra örraran abo aposol, möxösa, idi toxo burin a nangadi xalik idi tobo teng idi ma warawat.

<sup>27</sup> Nang idi toxo lamus ot abo aposol urungan kö kansel, idi toxo uru idi mesila xö kansel tua ina sisila raxin möxöbo pris ta ose muu idi.

<sup>28</sup> Ine ixo tengen, "Mem moxo isik a tinenge lölös se mum bara ganim e mum pa ausu baling mina ese nang. Ma lamun e mum mo öwöwö e Jerusalem arixe ma ausu re mum me e mum moxo puk e mem mina minet kina tödi na."

29 Pita mabo aposol toxo balu, "Mem marabo mana tame e God, ma kaim bara duöng.

30 A Orong köbo tubuno ire ixo öraru e Jisas kalik a minet, ewe nang mum moxo sexomet nang moxo taba ine xö sölöxöröp.

31 God ixo ii öxaa ine uruso xö lime tuun te ine iat xarnang a Sisila Raxin ma Tene Aöro nang ine irabo sawang a ngas bara abo Israel tabo dödöm puxus ma ra dökömen taun abo magingin saban te idi.

32 Mem moxo pere ma moxo tengen ösu a turunon möxö xinabo lalaa na, ma a Töxödös ne Tanono bölök, ewe nang God iri isik ke ewe midi nang te tame ine."

33 Nang idi toxo ölangen bira, idi toxo bala kadik köba ma toxo maaaa ra sesexomet idi.

34 Lamun a Parasi esene iang e Gamaliel, a tene ausu möxöbo warkurai te Moses, ewe nang a nangadi toxobo ii öraxin ine, ixo tuu kaa kölöme xö kansel ma ixo isik a tingenge lölös köbo köbat bara idi ta lamus ösu abo aposol uri xö araman.

35 Io, ixo tengen te idi, "Mum a nangadi mee Israel, morobo balaure ödeek e mum kö mangana lasa nang mum morobo dökömen tua wewet kö nangadi na.

36 Mum mo dökömen bölök nang e Tiudas ixo ot dauleng ne awat mesila. Ixo tengen bere ine a önga mangana sisila. Ma ixo eöt ma nit ne mar ne tödi toxo muu ine. Ma lamun a dauleng toxo sexomet ine, ma a nangadi nang toxobo mumuu ine, toxo wan elixilik, ma a tinörön te ine ixo laa tataun.

37 Io, melamu rine, Judas mee Galili ixo tuu wösö xö bung möxö kos nangadi ma ixo silien a dauleng ne nangadi ra mumuu ine ra iwes abo Rom nang tobo kure sik ire. A dauleng toxo sexomet bölök ine, mabo nangadi xirip nang toxobo mumuu ine, toxo wan elixilik.

38 Xina tiip na, e tengen te mum bara ganim pa wewet te laa re idi! Moro ganim idi. Io, nang bara ina tinörön na i taru xö dinödöm kö nangadi mon, irabo kawam.

39 Ma lamun nang bara i ot meriso re God, mum kebeöt ta wanwanak idi, me mum morobo ösöxö bere mum mo erese me God."

40 Io, idi toxo muu a tingenge re Gamaliel. Idi toxo kuwe lo abo aposol uruso kölöme ma toxo dangat idi. Io, toxo tengen te idi bara ganim a rengrengen a esene Jisas, ma toxo öbala rewe idi ra nuan.

41 Abo aposol toxo wan kalik abo kansel ma axanan, möxösa, God ixoro perexulen bara idi tere eöt sik ka xikip a minenge xö esene Jisas.

<sup>42</sup> Ma xöbo bungbung kirip, kölöme xö gunon lotu raxin ma xöbo gunon kirip, idi tekara mut ta inausu ma palas tininge lamun a tininge maxat, bara Jisas ine a Mesaia.

## 6

### *Toxo pere kos lo a pitnö ma ninöng*

<sup>1</sup> Kölöme xinabo bung nang a xinixos möxöbo tene tinam pe Jisas ixo önan kaa, a nangadi ne lotu toxobo erabaa ma nien urungan köbo möxösö xöbo bungbung kirip. Ma abo Judeia kaluluonin idi nang tobo wöwörö me Grik, idi toxo tenge oleleng sik kidi abo Judeia re idi nang tobo wöwörö me Ibru. Ma abo Judeia nang tobo wöwörö me Grik toxo tengen bara abo möxösö re idi tekara kip nien xarnang abo möxösö re idi abo Judeia nang tobo wöwörö me Ibru.

<sup>2</sup> Io, ina sangaun ma ninöng ne aposol toxo kuwe etoxin abo tene tinam ma toxo tengen, "I karabo töxödös sö ire ra arabaa, nang bara ire tekobo pet eörin a tinörön möxö tininge re God.

<sup>3</sup> Io, abo töm mem, moro pere kos lo re pitnö ma ninöng ne tödi kaluluonin e mum ewe midi nang mum mo ösöxö bara idi te wöwö ma Töxödös ne Tanono arixe ma nanase. Me mem marabo bulus idi ra balaure ina tinörön na.

<sup>4</sup> Inexalik, mem iat marabo balbalan ma sineseng ma atöngösen ma tininge re God."

<sup>5</sup> A lasa nang idi toxo tengen ixo öaxananin a marakörö ne lotu, me idi toxo pere kos e Stiwen, a tödi i wöwö ma nunu ma Töxödös ne Tanono, arixe bölök me Pilip, Prokoras, Nikonor, Timon, Pamenas, me Nikolas meriso Entiok ewe nang kaim bara a Judeia ine, ma lamun mesila bang ixo laxa xö lotu möxöbo Judeia.

<sup>6</sup> Idi toxo isik ot ina pitnö ma ninöng ne duöng urungan köbo aposol, ewe nang toxo seseng ma toxo bulus abo limedi lömö ridi.

<sup>7</sup> Io, a tininge xö God ixo wan elixilik. A xinixos möxöbo tene tinam puso Jerusalem ixo wan kaa saxit mon, ma a oleleng ne pris mee Judeia toxo ömaraxen lo abo lalaa nang abo tene tinam toxo nunu xönan.

### *Toxo puk e Stiwen*

<sup>8</sup> Io, Stiwen, a tödi niang i wöwö ma abalamu ma lölös se God, ixo pet abo lalaa deek ne auwuwus tataxin mabo auxileng lölös kaluluonin a nangadi.

<sup>9</sup> Ma lamun a dauleng ne tödi toxo tuu rewe xalik e Stiwen. Me idi ewe nang möxö ina gunon ne sineseng niang toxo bulus a ese bara a 'Gunon ne sineseng möxöbo duöng niang toxoro ölanglanga idi.' Idi abo Judeia mee Sairin ma

Aleksendria ma dauleng mee Silisia ma Esia. Idi xirip toxo tuu kaa ma toxo egot me Stiwen.

<sup>10</sup> Ma lamun idi kaim a eöt ta babalu abo tinenge re ine, möxö a Töxödös ne Tanono ixo tabaa ine ma nanase.

<sup>11</sup> Io, idi toxo kun suxume a dauleng ne tödi rua rengrengen bere, "Mem moxoro ölangen e Stiwen ixo tengen ögarin e Moses me God."

<sup>12</sup> Io, inabo mangana tinenge ixo öraru a balna nangadi mabo tene sisila mabo tene ausu möxöbo warkurai te Moses. Idi toxo tödik lo e Stiwen ma toxo lamus ot ine urungan kö kansel.

<sup>13</sup> Io, idi toxo lamus öläxa a dauleng ne tödi rua töxö tinenge sik lamun ine bara, "Ina tödi na i kara mut ta rengrengen ögarin ina madakdak ne gunon lotu raxin mabo warkurai te Moses.

<sup>14</sup> Mem moxo ölangen ine ixo tengen bara ina Jisas mee Nasaret irabo pet ögarin ina gunon lotu raxin ma irabo puxus inabo tatalien nang Moses ixo isik ösu re ire."

<sup>15</sup> Ma nangadi xirip ewe nang toxo kisisik kölöme xö kansel toxo pere dik sik e Stiwen, me idi toxo pere bara mamaran tine ixo xarnang a mamaran kö angelo.

## 7

### *Stiwen ixo tenge köö abo Judeia*

<sup>1</sup> Io, a sisila raxin möxöbo pris ixo ose e Stiwen, "A lak turunon abo tinenge na?"

<sup>2</sup> Stiwen ixo balu bira, "Abo töke mabo tamake, moro ölangen e! A mariris se God ixo ot pösöt a tamana ire, e Abaram, niang ixo xisixis bang ni Mesopotemia ma mesila ixo xisixis suso Aran.

<sup>3</sup> Me God ixo tengen te ine, '*Örö wan pes kalik a lagunon te nöngön ma a nangadi re nöngön, ma örö wan urungan kö xönö pu nang e rabo osen te nöngön.*'

<sup>4</sup> "Io, ine ixo wan lie a xönö pu möxöbo Kaldian ma ixo kis Aran. Melamu xö minet te tamana, God ixo tile ine urungan kina xönö pu nang nixinen mum mo xisixis im könan.

<sup>5</sup> God i kobo tabaa runin e Abaram mere xönö bara rö ine iat, kaim tunon te xönö pu iat te ine. Kalik mon bara kaim e Abaram mere barok ke ine iat kina axana bung niang, e God ixo kubus bara *ine arixe mabo tubuno melamu re ine, idi tabo unan sik im ina pu niang.*

<sup>6</sup> God ixo tengen tö ine bira, '*Abo tubum tabo kis osee xö lagunon nang kaim bara re idi iat, ma nangadi meringan tabo tile nanin idi xöbo tinörön ma tabo pet ögat idi xö nit ne mar ne awat.*'



<sup>7</sup> Me God ixo tengen, *'Ma lamun e rabo ömokorot idi xina öxöno lagunon nang abo tubum tabo rörön tataun könan. Melamu xönan idi tabo wan su xalik a lagunon niang ma tabo lotu wösöt e xö xönö na.'*

<sup>8</sup> Io, God ixo isik a kunubus se Abaram arixe ma tatalien möxö kuru lewene aine idi, a bung barok suxurno rua uxileng idi kölöme xina kunubus. Me Abaram ixo tata re Aisak ma ixo kuru a lewene aine Aisak kö pitnö ma narun ne bung melamu xö bung nang toxo kip ine xönan. Melamu, e Aisak ixo tata re Jekop, me Jekop ixo tata möxö sangaun ma ninöng ne sisila ne untubuno ire.

<sup>9</sup> "Abo sisila ne untubuno ire, idi toxo misik ma tönö idi e Josep bere ine irabo rörön tataun to Isip, möxösa, idi toxo bala kadik sik kö ine. Ma lamun e God ixo kis arixe mine

<sup>10</sup> ma ixo balaure ine xalik abo tiip kirip pe ine. God ixo tabaa e Josep ma nanase deek me God ixo eörin e Josep pua öaxanan a king mee Isip. Io, a king ixo bulus ine rua tene sisila xö ina marakörö xirip mee Isip ma bara irabo balaure xirip a könönö gunon taxin te ine bölök.

<sup>11</sup> "Io, a irilöng taxin ixo ot ma ixo wan kö boxönö xirip Isip me Kenan, ma sasaxan taxin arixe ixo ot, mabo untubuno ire idi tokoxobo eöt ta susuxun te nien.

<sup>12</sup> Io, Jekop ixo ölangen bira, bara nangen a nien to Isip, ine ixo tile abo untubuno ire nang abo barok ke ine xö sisila ne nuan te idi urungan Isip.

<sup>13</sup> Ma sese öninöng ne unan baling, Josep ixo tengen köbo tönö bere ine e Josep. Ma a king mee Isip ixo ösöxö xulen im a bunbunarama re Josep.

<sup>14</sup> Melamu xönan, Josep ixo tile tinenge ure tamana, nang e Jekop, ma a bung marapun kirip pe ine, idi xirip a pitnö ma ninöng ne sangaun ma pitnö.

<sup>15</sup> Io, Jekop mabo untubuno ire toxo wan su uruo Isip. Melamu im, idi toxo met ee.

<sup>16</sup> Abo töngön te idi, toxo kip öbaling uruso Sekem ma toxo bulus kölöme xina maöt niang e Abaram ixo kun kalik a bung baroxorok ke Amor tuso Sekem ma oleleng ne tuluwok saxit.

<sup>17</sup> "Io, a axana bung ke God ixoro lörörö rua wewet eörin a kunubus sine rue Abaram, ma a xinixos kö nangadi re ire ringan Isip ixo wan kaa pasaxit mon.

<sup>18</sup> Io, *önga king kabise, ewe niang i koxobo ösöxö runon te laa lamun e Josep, ixo ot xarnang a tene sisila ro Isip.*

<sup>19</sup> Ine ixo ömamang abo untubuno ire ma ixo wewet ögat idi, ma ixo ölölös idi bara tabo tewe rewe a bung barok madak nang toxo mana kip idi bara idi tabo met.

20 “Xina awat nang toxo kip e Moses, a barok mamaran kö wawara re God. Xö narun ne texe toxo werwere muu ine xö könönö gunon te tamana.

21 Io, melamu nang toxo kip ösu ine xalik a gunon, a balik ke king mee Isip ixo pere wösöt lo ine ma ixo kip lo ine ma ixo ölön ine xarnang a barok söxöt iat te ine.

22 Moses ixo eusu mabo nanase xirip mee Isip, me ine a tödi raxin kölöme xöbo tinenge ma xö tatalien te ine.

23 “Nang e Moses ixo nit ne sangaun ne awat tine, ixo dödöm pa uxileng a nangadi re ine iat a bung Israel.

24 Ine ixo pere önga tödi mee Isip ixo wewet ögat a öng mere idi abo Israel, io, ine ixo tuu arixe mina Israel ma ixo sexomet ina Isip pua babalu ine lamun a lalaa nang ixo pet tö ina Israel.

25 Moses ixo nunu bara a nangadi iat te ine tabo perexulen bara God ixo önan arixe mine ra öro idi, ma lamun kaim idi ra werwere xulen ina na.

26 Xö bung malamü Moses ixo ot pösöt a nine Israel idu toxo erese. Ma ixo maaaa ra bulbulus a malum kaluluonin idu, io, ixo tengen, ‘Nibarok, a narön mon e mu, ruasa mu mo erse baling ke mu?’

27 “Ma lamun önga tödi niang ixo sese ögarin a öng kabise ixo sumen tewe e Moses ma ixo tengen, ‘Kaim pe öng ixo bulus nöngön bara örobo kure e maa!’

28 *Nöngön u maaaa ra sesexomet e xarnang u sexomet a tödi me Isip, goo?’*

29 Nang e Moses ixo ölangen bira, ixo ulo rup uruso Midian, ma ixo kis ee xarnang a osee, ma ixo elolo, me ine ma nine barok suxuruno ringan ee.

30 “Melamu xö nit ne sangaun ne awat ixoro saxit, a angelo ixo ot pösöt e Moses kö kamene ia sösöt ixo bibio kölöme xö uno iaa lik kö xönö tataun lörörö xö puot Sinai.

31 Moses ixo wuwus kina laa nang ixo pere. Ma nang ixo wan lörörö rua werwere, ixo ölangen a inöno a Orong:

32 *‘E mon a God köbo untubum, a God te Abaram, Aisak me Jekop.’* Moses ixo dede ma binuut ma ixo kebeöt ta winara.

33 “Io, a Orong ixo tengen te ine, ‘Kip tewe a sandel kalik a xexem, möxö a xönö pu nang u tuu sik könan, a lak madakdak saxit.

34 *Turunon saxit, e xoro pere abo kinadik kö nangadi re e nang te örasen to Isip. E xoro ölangen abo ginee ridi me e re wan su ra ölanglana idi. Miang im, e rabo tile nöngön baling uruo Isip.’*

35 “Ina Moses mon na ewe idi toxo kasen tewe ine arixe mina tinenge bira, ‘Kaim pe öng ixo bulus nöngön bara örobo warkurai.’ Inexalik, God iat mon ixo tile ine bara

irabo warkurai, ma irabo ölanglangua idi meringan. Ma ina angelo nang ixo wösö rine xö uno iaa lik, ixo top ine.

<sup>36</sup> Moses ixo silien ösu idi mero Isip ma ixo pet abo auxileng lölös mabo lalaa ne auwuwus so Isip, xö Rasi Dadan, ma xö xönö tataun kö nit ne sangaun ne awat.

<sup>37</sup> "Ine Moses mon ewe nang ixo tengen köbo nangadi mee Israel bara, *'God irabo tile ösu urungan te mum a önga propet xarnang e meringan kö nangadi iat te mum.'*

<sup>38</sup> Moses mon a öng nang ixo kis arixe ma nangadi xirip mee Israel kö xönö tataun, ma ixo kis arixe mabo untubuno ire, ma angelo ixo tabaa ine ma tinenge rusu xö puot Sinai. Ma ixo kip lo ina tinenge nang a to i kis könan tua isik öbaling urungan tö ire.

<sup>39</sup> "Xalik mon abo untubuno ire, idi toxo kaim a mamaa ra ölangen a tinenge re Moses. Kawaim arixe. Idi toxo kasen ine ma xö baladi toxo mamaa bara idi tabo baling uruo Isip.

<sup>40</sup> Idi toxo tengen te Aron, *'Örö pet tebo perewuo re mem nang irabo silien ire, möxö ina tödi na e Moses nang ixo silien ösu ire mero Isip, mem kobo ösöxö a lasanene i ot tine!'*

<sup>41</sup> Xina axana bung niang idi toxo pet a önga perewuo xarnang a bak kö bulmakau. Idi toxo erabaa urungan tine ma arabaa ridi ma toxo pet a luxa ma axanan lamun ina tinörön ne limedi.

<sup>42</sup> Ma lamun God ixo tuu talu idi ma ixo ganim idi bara idi tabo lotu wösöt abo tii, a texe, ma xaken meriso lömö xö balana kubu, xarnang toxo geet ösu xö buk kö bung propet: *'Marakörö mee Israel! Mum korobo pet tö e nang mum moxobo sesexomet abo bulmakau mabo sipsip pö mum pa wewet a arabaa urö e*

*xö nit ne sangaun ne awat nang mum moxo kis singan kö xönö tataun.*

<sup>43</sup> *Mum moxobo kip öxaa a walpali nang toxo pet ma man kö perewuo Molek.*

*Me mum moxobo kip öxaa a tii perewuo xö god te mum, e Repan,*

*idu a nine perewuo nang mum moxo pet tua lolotu wösöt.*

*Io, arabu tile rewe e mum uruo xö lagunon melamu re Babilon.'*

<sup>44</sup> "Abo untubuno ire toxo kis arixe ma walpali ne man kö xönö tataun. Ma ina walpali na ixo osen bara God ixo kis arixe me idi. Toxo pet xarnang e God ixoro pet osen te Moses, ma i eöt ma winawara nang Moses ixo pere bie.

<sup>45</sup> Io melamu, abo untubuno ire toxo kip lo ina gunon ne man meriso xöbo tamadi. Me idi toxo kip arixin me idi nang toxo arixe me Josua. Idi toxo wan ta xikip lo ina pu möxöbo

duöng kabise nang God ixo tile rewe xalik idi. Ma ixo kis singan ot kö axana bung ke Dewit.

<sup>46</sup> Me Dewit ixo örasen a abalamu re God ma ixo ose e God bara irabo ömaraxen ine rua wewet te gunon ure God te Jekop.

<sup>47</sup> Ma lamun e Solomon im iang ixo uru a gunon kö God.

<sup>48</sup> "Ma lamun, a Orong lömö saxit i kara kis kö gunon nang a tödi mon i pet. Xarnang a propet i tengen:

<sup>49</sup> 'Orong ixo tengen, "*Watmaep, ine a kinis ne king ke e, ma öxöno lagunon, ine a xönö tinuu möxö xexeke.*

*A mangana gunon sa mum morobo uru urö e?*

*Ma a xönö sa irabo eöt bara e rabo mamas könan?*

<sup>50</sup> *E iat e xo pet abo lalaa na ma limeke."* ' ' "

<sup>51</sup> Me Stiwen ixo tengen bölök bira, "Mum abo onwat! Abo bala mum i wöwö ma xödxödö! Mabo talinge mum a lak baa ma i kebeöt ta ölangen a tinenge re God! Mum mo xarnang mon abo untubuno mum. Mum bo kara ölengen a Töxödös ne Tanono.

<sup>52</sup> Ewe rebo propet mesila nang abo untubuno mum idi kaim a ögarin? Kaim! Idi toxo sexomet abo tödi mesila nang toxo rengrengeng ösila a inot kö Tene Töxödös. Ma na mum moxoro isik ine xö limine a nangadi saban ma toxo sexomet ine.

<sup>53</sup> Mum nang moxo ömaraxen lo a warkurai te God kalik abo angelo, inexalik mum kobo muu xönan."

### *Toxo teng ömet e Stiwen*

<sup>54</sup> Io, nang abo kansel toxo ölangen bira, idi toxo laie saban ma toxo engingirenin abo ngisedi.

<sup>55</sup> Ma inexalik bere Stiwen ixo wöwö sik ma Töxödös ne Tanono ma ixo wawara kaa uruso lömö xö balana kubu ma ixo pere a mariris se God, ma ixo pere e Jisas ixo tuu sik kö lime tuun te God.

<sup>56</sup> Me Stiwen ixo tengen, "Mum moro pere! E pere a balana kubu i tamasawang ma a Barok kö Tödi i tuu sik kö lime tuun te God."

<sup>57</sup> Io, idi toxo kup taxin uruso lömö ma toxo sing pi abo talingedi me idi xirip toxo ulo ot sik ine,

<sup>58</sup> ma toxo sat ösu ine xalik a lagunon taxin ma toxo urulo ra reteng ine ma warawat. Me idi nang toxo wupuk ine, idi toxo bulus abo man te idi xö xexene ina guama a esene e Sol.

<sup>59</sup> Nang idi toxo reteng ine, Stiwen ixo seseng uruso re God bira, "Jisas, a Orong, örö kip lo a tanoke!"

<sup>60</sup> Io, ixo subun kexe ma ixo gee wösö raxin arixe, "Orong, u bele döxömen lo abo magingin saban te idi. Ganim, örö döxömen taun!" Io, nang ine ixo tengen bira, ixo met.

## 8

<sup>1</sup> Io, e Sol ixo aut arixe midi nang toxo teng ömet e Stiwen.

*A tiip köbo tene lotu*

Xina bung nang toxo sexomet e Stiwen, idi toxo urulo ra wewet ögarin a marakörö möxö lotu ro Jerusalem. Ma a nangadi möxö lotu toxo ulo elixilik kö boxönö xirip mee Judeia me Samaria. Abo aposol kalik mon toxo xisixis siso Jerusalem.

<sup>2</sup> Mabo nangadi nang toxo ii e God, idi toxo pömös e Stiwen ma toxo gee rö ine.

<sup>3</sup> Ma lamun e Sol ixo urulo ra wewet ögarin a lotu. Ine ixo su ma laxa xöbo oleleng ne gunon te idi, ma ixo sasat ösu lo a körö ma balixilik ma ixo ölaxa idi xö gunon ne aömokorot.

*Pilip puso Samaria*

<sup>4</sup> Io, ewe midi nang toxo ulo elixilik nana, idi toxo palas tingenge xö boxönö xirip nang idi toxo önan nana xönan.

<sup>5</sup> Pilip ixo wan su xö önga lagunon taxin kölöme Samaria ma ixo tengen osen a Mesaia rö idi.

<sup>6</sup> Ma nang a marakörö raxin toxo ölangen e Pilip ma toxo pere abo auxileng ne auwuwus nang ine ixo pet, idi xirip toxo ölöngö sik kalik lamun a tingenge re ine.

<sup>7</sup> Arixe ma ginee lölös, abo tano saban toxo wan su xalik a oleleng, ma oleleng ne pengpeng mabo xexe met, idi toxo deek baling.

<sup>8</sup> Io, a axanan taxin ixo ot pösöt ina marakörö möxö ina lagunon taxin niang.

*Saimon a tene sewuk*

<sup>9</sup> Io, xina lagunon niang a önga tödi, a esene e Saimon, a sewuk ine. Ma ixobo öngangao idi a nangadi mee Samaria mabo pet laa ne auwuwus nang ixobo wewet. Ma ixobo wewet öraxin ine,

<sup>10</sup> ma nangadi xirip, a bung orong ma bung maris, idi xirip toxo lölös sik ka ölangen ine me idi toxo tengen, "Ina tödi na, ine ma lölös meriso re God nang a nangadi te rengrengen bara a lölös taxin."

<sup>11</sup> Idi toxo mumuu ine, möxösa, ine ixo öngangao idi mabo mangana pet laa ne auwuwus ixo wewet bang iat tö idi me idi toxo axanan ulamun.

<sup>12</sup> Ma lamun kö bung nang e Pilip ixo palas tingenge ma tingenge deek lamun a kingdom kö God ma esene Jisas Kraiss, idi toxo nunu, ma a körö ma balixilik idi toxo kip baptaiss.

<sup>13</sup> Saimon iat böläk ixo nunu ma ixo kip baptaiss. Ma ixo mumuu e Pilip kö boxönö xirip, ma ixo wuwus saban köbo mangana auxileng lölös ne auwuwus nang ine ixo pere.

14 Nang abo aposol mee Jerusalem toxo ölangen bara abo Samaria toxo ömaraxen lo a tinenge xö God, idi toxo tile e Pita me Jon urungan te idi.

15 Nang idu toxo ot, idu toxo seseng ke idi bara idi tabo oxe lo a Töxödös ne Tanono,

16 möxösa, a Töxödös ne Tanono kaim bang ka nuan su xö dauleng ke idi, inexalik mon idi toxo kip baptais kö esene Jisas, a Orong.

17 Io, Pita me Jon toxo bulus abo limedu lömö re idi, me idi toxo oxe lo a Töxödös ne Tanono.

18 Nang e Saimon ixo pere bara a Tanono ixoro wanot te idi nang a nine aposol toxo bulus abo limedu lömö re idi, io, ine ixo maaaa rua tabaa idu ma tuluwok,

19 ma ixo tengen, "Muu moro tabaa bölök e mina lölös niang lamun nang bara ewe nang arabu bulus lime lömö re idi, tabo oxe lo a Töxödös ne Tanono."

20 Io, Pita ixo balu ine bira, "I deek bara örobo iuo arixe ma tuluwok ke nöngön, möxösa, u xo döxömen bara örobo kun a arabaa re God ma tuluwok!

21 Kaim nöngön mere xönö xina tinörön na, möxö a balam i kobo töxödös sik kö wawara re God.

22 Io, örö dödom puxus köbo magingin saban na ma örö seseng uruso xö Orong. Ine irabo döxömen tewe gut abo mangana dinödöm nang i orot kö to re nöngön.

23 E tengen bira, möxö e pere bara u wöwö ma bala kinadik ma magingin saban i kubus pi nöngön."

24 Io, Saimon ixo balu bira, "E mu moro seseng urungan kö Orong urö e, ma lamun kaim pe laa nang mu moro tengen irabo ot pösöt e."

25 Io, nang Pita me Jon toxoro tenge ma tinenge xö Orong ma toxoro tengen osen ina turunon te ine, idu toxo baling uruso Jerusalem, me idu toxo palas tinenge ma atöngösen deek köbo oleleng ne lagunon mee Samaria.

### *Pilip ma a tödi raxin mee Itiopia*

26 Io, önga angelo xö Orong ixo tengen te Pilip, "Taru ma örö muu a ngas kaluluon kö xönö tataun nang i wan su meriso Jerusalem uri Gasa."

27 Io, e Pilip ixo wan lo, ma xö nuan te ine ixo esuo ma önga tödi mee Itiopia, me ine a tödi raxin möxö werwere muu abo tuluwok möxö Kadasi, a une sisila möxö nangadi mee Itiopia. Ina tödi na, mesila ixo wan uruso Jerusalem pa lotu xö lotu xöbo Judeia,

28 ma na xö nuan te ine uri baling lagunon ixo kis kölöme sik kö karis ma ixo xokos nanin a buk ke propet Aisaia.

29 A Tanono ixo tengen te Pilip, "Wan urungan kö karis ma örö wan lörorö xönan."

<sup>30</sup> Io, e Pilip ixo ulo kaa urungan kö karis ma ixo ölangen a tödi nang ixo xokos a buk ke propet Aisaia. Me Pilip ixo ose ine bira, “Nöngön u ösöxö sik a lasa nang u xokos?”

<sup>31</sup> A tödi nang ixo balu ine bira, “Me e rabo ösöxö bule nang mon bara re öng irabo ömaras sik kö e?” Io, ine ixo seng e Pilip pa kinaa ma ra kinis arixe me ine.

<sup>32</sup> Ina xönö tinenge nang ixo xokos i bira,  
*“Toxo lamus ine xarnang a sipsip nang tobo lamus sua  
 sesexomet.  
 Ma xarnang a bak kö sipsip nang ibo tuu ödödö ra xörxöröp  
 a bebene,*

*io, ine kaim kö rengrengen te xönö tinenge.*

<sup>33</sup> *Idi toxo ömenge ine ma kaim kö wewet ötöxödös se  
 warkurai rö ine.*

*I kebeöt te öng ka warwara abo lalaa lamun abo bung  
 baroxorok malamü,*

*möxösa, toxoro kip tewe a to re ine mera xö öxöno lagunon.”*

<sup>34</sup> Io, ina orong ixo ose e Pilip, “Tengen te e, ewenene ina propet niang i etöngösen min, ine iat bara re öng kabise?”

<sup>35</sup> Io, e Pilip ixo urulo arixin mina tinenge niang ma ixo töngösen ine ma tinenge deek lamun e Jisas.

<sup>36-37</sup> Nang idu toxo önan kö ngas, idu toxo wanot kö xönö ari ma ina orong ixo tengen, “Pere bang! A ari ia. A sanene i tuu wi e me e karabo kip baptais?” \*

<sup>38</sup> Ma ina orong ixo tengen kö tödi nang ibo waswasak a karis bara ira tuu bang. Io, idu xirip toxo wan su urungan kö könönö ari me Pilip ixo baptais ine.

<sup>39</sup> Io, nang idu toxo wan kaa xalik a ari, a Tanono Orong ixo kip lo e Pilip, ma ina tödi kaim kö werwere öbaling ine. Ma lamun ine ixo urulo öbaling lo a nuan te ine ma axanan.

<sup>40</sup> Me Pilip bölök ixo ot wösö Asdot, ma nang ixo wan nana ixo palas tinenge ma atöngösen deek kö boxönö xirip ot nang ixo wanot ti Kaisaria.

## 9

### *Jisas ixo wösö re Pol*

<sup>1</sup> Xina axana bung e Sol angen ixo rengreng lölös bara ra sesexomet abo tene tinam kö Orong. Me ine ixo wan urungan kö sisila raxin möxöbo pris

<sup>2</sup> ma ixo ose ine bara ira geet te pas uruo xöbo gunon ne sineseng köbo Judeia ro Damaskas. Io, kölöme xinabo pas i tenge maras sue Sol bira, nang bere Sol i esuo mere öng ke idi, re körö bara re balixilik, niang ibo laxa xö lotu niang

\* **8:36-37** Pilip ixo tengen, “U öt ta kip baptais nang bara u nunu turunon.” Ma ina orong ixo balu, “E nunu bere Jisas ine a Barok kö God.”

tobo tengen ine ma 'Ngas kö Orong', io, irabo öt tua öxös idi ma ra lalamus idi uruso Jerusalem.

<sup>3</sup> Nang e Sol ixo önan ot lörörö Damaskas, a önga bibio meriso lömö ixo siek elulurein ine.

<sup>4</sup> Ine ixo subu su xö pu ma ixo ölangen a inöno önga tödi ixo tengen tö ine, "Sol! Sol! Ruasa nöngön u ögarin e?"

<sup>5</sup> Sol ixo ose, "Ewe nöngön, Orong?"

Me ine ixo balu, "E Jisas, ewe nang nöngön u ögarin."

<sup>6</sup> Örö taru kaa ma örö wan laxa xö lagunon taxin, ma tabo töngösen nöngön ma lasa nang örobo pet."

<sup>7</sup> A duöng nang toxo wan arixe me Sol toxo tuu ödödö ma kaim pe tinenge. Idi toxo ölangen a ingana tinenge inexalik kaim kö werwere re tödi.

<sup>8</sup> Sol ixo taru kaa meringan kö pu, ma lamun nang ixo öwalas a marana, kaim ine xo werwere re laa. Io, idi toxo tön a limine ma toxo silien ine uri Damaskas.

<sup>9</sup> Xö narun ne bung ine ixo pulo, ma kaim ine xo nien ma ininim.

<sup>10</sup> Ruso Damaskas nangen a önga tene tinam pe Jisas a esene e Ananias. A Orong ixo kuwe ine xö wöpönöbö, "Ananias!"

Ine ixo balu, "Orong, e ia!"

<sup>11</sup> Io, a Orong ixo tengen te ine, "Wan uruso xö gunon te Judas nuso xö ngas tobo rengrengen ma Ngas Töxödös ma örö ose lamun a tödi mee Tasas, a esene e Sol, ma i nangen i seseseng.

<sup>12</sup> Kölöme xö wöpönöbö ine ixoro pere bara önga tödi, a esene e Ananias, i ot ma i bulus a limine ine lömö rine bara irabo wawara baling."

<sup>13</sup> Ananias ixo balu, "Orong, e xoro ölangen a oleleng ne tinenge lamun ina tödi na ma bara ixo wewet ögat a nangadi re nöngön iat tuso Jerusalem.

<sup>14</sup> Me ine ixoro kip lo a lölös meriso xöbo pris tataxin tua öxös kirip ewe midi nang tobo lolotu wösöt nöngön."

<sup>15</sup> Lamun a Orong ixo tengen te Ananias, "Örö wan, möxösa, e xoro pere kos ine xarnang a tene tinörön nang irabo wöwörö ma eseke urungan kö nangadi nang kaim bara abo Judeia, ma urungan köbo sisila raxin ma xö nangadi mee Judeia.

<sup>16</sup> E rabo osen ine mabo mangana kinadik ma tiip nang ine irabo mana örasen kö eseke."

<sup>17</sup> Io, Ananias ixo wan ma ixo laxa xö gunon. Ixo bulus a nine limine lömö re Sol ma ixo tengen, "Tönö Sol, a Orong ixo tile e. Me ine mon e Jisas nang ixo ot pösöt nöngön kö ngas nang u xo önan ura. Ma i tile e bara örobo wawara baling ma örobo wöwö ma Töxödös ne Tanono."



18 Saxit mon, önga laa xarnang a ölangine en ixo subu xalik a marana e Sol me ine ixo wawara baling. Io, ine ixo taru ma ixo kip a baptais,

19 ma melamu nang ixoro an, ma ixo kip öbaling a lölös se ine.

Sol ixo kis arixe mabo tene tinam pe Jisas suso Damaskas kö dauleng ne bung.

*Sol ixo palas tinenge ruso Damaskas me Jerusalem*

20 Io, saxit iat mon, ixo palas tinenge kölöme xöbo gunon ne sineseng möxöbo Judeia bara Jisas a Barok kö God.

21 Me idi xirip nang toxo ölangen ine, toxo wuwus ma toxo eose, "Ire te ösöxö bara ruso Jerusalem, ine mon a tödi nang ibo ögarin idi nang tobo lolotu wösöt e Jisas. Bule ine i ot ta rua rörön dik a nangadi bara öxös idi ma lamus idi wösöt abo pris tataxin?"

22 Inexalik a atöngösen maras se Sol ixo ot lölös. Ma abo Judeia ruso Damaskas idi kaim kö eöt ta babalu ine, möxösa, ine ixo öturunon te idi bara Jisas ine a Mesaia.

23 Io, melamu xö oleleng ne bung ixoro saxit, abo Judeia toxo ot arixe ma toxo pingit tua sesexomet e Sol.

24 Lamun e Sol ixoro ösöxö a pingit te idi. Xö xaken ma dömön idi tobo öman abo marna ngas möxö tabörö möxö ina lagunon tua sesexomet ine.

25 Lamun abo bak ne ausu re Sol, toxo kip lo ine xö dömön, ma toxo ösölöng ösu ine xö kölot kö mara xö bölö uri lawu.

26 Nang ine ixo ot tuso Jerusalem, ine ixo mamaa bara rua kinis arixe mabo tene tinam pe Jisas, inexalik kaim idi ra nunu runon te ine bara ine a tene tinam pe Jisas, me idi toxo buburin ine.

27 Ma lamun e Banabas ixo lamus ot ine urungan köbo aposol. Ine ixo töngösen ömaras idi xö nuan te Sol bere ine ixoro pere a Orong kö ngas ma bara a Orong ixoro etöngösen me ine, ma nang ine ixo kis Damaskas ine ixo palas tinenge ma esene Jisas, ma kaim ine xo binuut.

28 Io, Sol ixo kis arixe me idi ma ixo wan nana xö boxönö xirip kölöme Jerusalem, ma ixo palas tinenge xö esene Jisas ma kaim ine ra binuut.

29 Ine ixo tenge ma ixo egot arixe mabo Judeia nang tobo rengrengre me Grik. Ma lamun idi toxo mamaa bara ra sesexomet ine.

30 Nang abo Kristien toxo ösöxö lo ina na, idi toxo lamus ösu e Sol uri Kaisaria ma toxo tile rewe ine uruso Tasas.

31 Io, abo tene lotu xirip kölöme Judeia, Galili me Samaria toxo axanan ma toxo kis ma malum. Me idi toxo kip lo a rorop möxö Töxödös ne Tanono ma ixo ölölös idi, ma a

xinixos möxö nangadi kölöme xö lotu ixo wan kaa, möxösa, idi toxobo ii öraxin a Orong.

### *Enias me Dokas*

<sup>32</sup> Nang e Pita ixo wan nana xö boxönö xirip, ine ixo wan ta uxileng a nangadi re God nang toxo xisixis kölöme Lidda.

<sup>33</sup> Ruso ixo ot pösöt a tödi a esene e Enias, a pengpeng ewe nang ixoro maru xö pitnö ma narun ne awat kö öra.

<sup>34</sup> Pita ixo tengen te ine, "Enias, Jisas Krai i öro nöngön. Taru ma öro luxun ödeek lo a minaru re nöngön." Saxit mon Enias ixo taru kaa.

<sup>35</sup> A nangadi xirip ewenene nang toxo xisixis kölöme Lidda me Seron, toxo pere ine ma toxo tawuxus urungan kö Orong.

<sup>36</sup> Kölöme Jopa nangen a önga tene tinam pe Jisas, a esene e Tabita (nang a ese me Grik e Dokas), nang ixobo wewet abo tinörön deek ma ixobo rorop a nangadi tanaa.

<sup>37</sup> Xina bung niang, ine ixo meset ma ixo met, ma toxo tos a aine ma toxo bulus ine kölöme xö xönö ruso lömö xö gunon.

<sup>38</sup> Lidda ixo lörörö sik Jopa. Io, nang abo tene tinam toxo ölangen bere Pita nangen nang Lidda, idi toxo tile a nine tödi urungan te ine ma tinenge, "Maris, miang pasaxit mon ura re mem!"

<sup>39</sup> Pita ixo wan arixe me idu, ma nang idiet toxo ot, ine ixo wan kaa uruso lömö xö ina xönö. Abo möxösö toxo tuu wi ine, toxo gegee ma toxo osen ine mabo mangana man nang e Dokas ixobo söxsöxö nang bang ixo to sik.

<sup>40</sup> Pita ixo tile ösu xirip idi, io, ixo subun kexe ma ixo seseng. Ine ixo tawuxus urungan kö une minet, ma ixo tengen, "Tabita, taru kaa." Ine ixo öwalas a nine marana ma ixo pere e Pita, me ine ixo kis kaa.

<sup>41</sup> Pita ixo tön öraru ine ma limine ma ixo top ine ra tinuu. Io, ine ixo kuwe a nangadi re God ma abo möxösö ma ixo isik osen ine re idi bara ine iri to.

<sup>42</sup> A winörö möxö ina na ixo ot pösöt kirip a boxönö mee Jopa ma oleleng ne nangadi toxo nunu kölöme xö Orong.

<sup>43</sup> Io, Pita ixo kis Jopa xö dauleng ne bung arixe ma tene wewet lalaa ma lewene bulmakau, a esene iang e Saimon.

## 10

### *Konilias ixo erile rue Pita*

<sup>1</sup> Nangen a önga tödi ixobo xisixis si Kaisaria, a esene e Konilias, ine a sisila ne umri möxö önga muxu ne umri nang tobo rengrengene ine bara mee Itali.

<sup>2</sup> Ine arixe ma baninen te ine toxobo mumuu e God ma toxobo ii öraxin e God, me ine ixobo rorop a nangadi

sasaxan ma ixobo seseseng uruso xö God köbo bungbung kirip.

<sup>3</sup> Xö önga bung kö narun ne axana bung kö aien, Konilias ixo pere a önga winawara. Ine ixo pere a angelo re God, ixo ot pösöt ine ma ixo tengen, "Konilias."

<sup>4</sup> Konilias ixo pere dik sik a angelo ma binuut ma ixo eose, "Lasanene, Orong?"

A angelo ixo balu ine, "Abo sineseng mabo arabaa re nöngön urungan kö nangadi maris iri xarnang a arabaa uruso re God.

<sup>5</sup> Na örö uguran te dauleng ne tödi uruo Jopa rua lalamus ot a önga tödi, tobo rengrengen ine me Saimon, önga esene bölök e Pita.

<sup>6</sup> Ine ixobo xisixis kö gunon te Saimon, a tene wewet lalaa ma lewene bulmakau, ewe nang ixobo xisixis lörörö xö rasi."

<sup>7</sup> Nang a angelo ixoro wöwörö sik kö ine ixo wan lie ine, Konilias ixo kuwe a nine tödi tinörön te ine ma önga umri deek nang ibo mumuu e God, me ine a öng mere idi ewe nang toxobo rorop e Konilias.

<sup>8</sup> Ine ixo tengen kirip abo lalaa nang ixoro ot te ine ma ixo tile idiet uruo Jopa.

### *Pita ixo pere a winawara*

<sup>9</sup> Xö bung melamu nang idiet toxoro lörörö Jopa, Pita ixo wan kaa uruso lömö xö öxöno gunon kö luono xaken ta sineseng.

<sup>10</sup> Ine ixo irilöng ma ixo mamaa bara ira en te nien. Ma nang idi angen toxo tagure a nien, Pita ixo pere a winawara.

<sup>11</sup> Ine ixo pere a balana kubu ixo tamasawang, ma önga laa ixo wan su, ixo wawara xarnang a xönö man taxin, toxo tön ösu xö nit ne ngusuno ura xö öxöno lagunon.

<sup>12</sup> Kölöme xönan, abo mangana wawaguai nang idi ma nit ne xexedi, mabo si mabo mangana wawaguai nang tobo xaxabo, mabo pun axe.

<sup>13</sup> Io, a inöno önga tödi ixo tengen te ine bira, "Pita, taru kaa. Örö sexomet ma örö en."

<sup>14</sup> Ma lamun e Pita ixo balu, "Kaim tunon arixe, Orong! E kala ösöxö bara ara en te laa nang abo warkurai te nöngön ixo panak e mem pua enen."

<sup>15</sup> A inöno ina tödi ixo tengen öbaling kö ine, "Ganim a wanwanak ke laa nang e God ixoro ömaraxen."

<sup>16</sup> Ina laa na ixo wösö xö narun ne axan, ma saxit mon toxo sat öxaa ina xönö man baling uruso xö balana kubu.

<sup>17</sup> Nang e Pita ixo dödödöm lamun a unine ina winawara, narun ne tödi nang e Konilias ixo tile idiet, idiet toxo pere

wösöt a xönö nang a gunon te Saimon ee ma toxo tuu dik kö marame laxlaxa.

<sup>18</sup> Idiet toxo kup ma toxo eose bere Saimon ewe nang tobo rengrengren ine me Pita ixobo xisixis sa bara kaim.

<sup>19</sup> Nang e Pita angen ixo dödödöm lamun ina winawara, a Töxödös ne Tanono ixo tengen te ine bira, "Saimon, a narun ne tödi te wawara siwin nöngön.

<sup>20</sup> Göm, örö taru ma örö wan su. Ganim a dinödöm oleleng ka nuan arixe me idiet, möxö e xo tile idiet."

<sup>21</sup> Pita ixo wan su ma ixo tengen te idiet, "E mon ina tödi na nang muot mo wawara siwin. Muot mo wanot tö sa?"

<sup>22</sup> Idiet toxo balu, "A umri raxin e Konilias i tile e meet. Ine a tödi töxödös ma ibo buburin e God. Ma nangadi xirip mee Judeia tobo ii ine. A madakdak ne angelo ixo tengen te ine bara irabo lamus ot nöngön uri xö gunon te ine, io nang ine irabo ölangen a lasanene nang u ka rengrengren."

<sup>23</sup> Io, Pita ixo lamus ölaxa idiet uruso xö gunon te ine xarnang abo osee.

*A Töxödös ne Tanono ixo wan su re idi nang kaim bara abo Judeia*

Xö bung kabise, Pita ixo wan arixe me idiet, ma dauleng ne Kristien meri Jopa toxo wan bölök arixe me idi.

<sup>24</sup> Xö bung melamu ine ixo ot ti Kaisaria. Konilias ixo xixiset me idi ma ixoro kuwe lo etoxin bölök a bung marapun te ine mabo ais tunon te ine.

<sup>25</sup> Nang e Pita ixo laxa xö gunon, Konilias ixo wan suo ine ma ixo tunsu mesila ne ine, ma ixo ii ine.

<sup>26</sup> Ma lamun e Pita ixo tön öraru ine ma ixo tengen te ine, "Tuu kaa. E bölök mon a tödi xarnang nöngön."

<sup>27</sup> Pita ixo rengrengre me Konilias ma ixo önan laxa, ma ixo pere bara a nangadi oleleng toxoro ot etok.

<sup>28</sup> Io, ine ixo tengen te idi, "Mum mo ösöxö ödeek sik bara xö warkurai xöbo Judeia, i kebeöt bara re öng mere mem irabo uxileng bara rua kinis arixe mabo nangadi xarna na nang kaim bara abo Judeia. Ma lamun e God ixoro osen e bara ganim e rua wanwanak ke tödi rua kinis etok arixe me mem abo Judeia.

<sup>29</sup> Io niang, nang mum moxo erile rö e, kaim e ra mölmölök ka nuanot. Io, eka ose mum bara ruasa runon iat mum mo erile rö e?"

<sup>30</sup> Konilias ixo balu ine bira, "Nit ne bung ixoro saxit, e xo seseseng kölöme xö gunon te e xö narun ne axana bung kö aien xanana. Saxit mon önga tödi ixo sige sik a man sisiek ma ixo tuu mesilain e,

<sup>31</sup> ma ixo tengen, 'Konilias, God ixoro ölangen abo sineseng ke nöngön ma i döxömen lo abo arabaa re nöngön urungan köbo maris.

<sup>32</sup> Io, erile uruo Jopa rue Saimon nang tobo rengrengen ine me Pita. Ine ixobo xisixis kö gunon te Saimon a tene wewet laa ma lewene bulmakau, nang ixobo xisixis lörörö xö rasi.'

<sup>33</sup> Io, saxit iat mon e xo erile rö nöngön bara örö tam pe e, ma u pet a tatalien deek bara u wanot. Ma na mem kirip kö wawara re God me xisiset tua ölangen abo tinenge xirip nang a Orong i tengen te nöngön bara örobo töngösen e mem min."

<sup>34</sup> Io, Pita ixo urulo ra tinenge, "Na e re perexulen bara i turunon bere God i kara top kalik önga lawa ma ganim önga dauleng kabise.

<sup>35</sup> Ma lamun ibo öbala lo a nangadi möxö boxönö xirip nang tobo ii ine ma tobo wewet a lasa nang i töxödös.

<sup>36</sup> Mum mo ösöxö bara God ixo tile a tinenge rua nangadi mee Israel, a tinenge deek möxö malum kölöme re Jisas Kraiss, ewe a Orong kö nangadi xirip.

<sup>37</sup> Mum mo ösöxö a lasa ixo ot kö boxönö xirip mee Judeia, urulo Galili melamu xö baptais nang e Jon ixo etöngösen maras min.

<sup>38</sup> Me mum mo maras lamun e Jisas mee Nasaret nang e God ixo tulus lo ine, ma ixo tabaa ine ma Töxödös ne Tanono ma lölös ma nang ine ixo wan nana xö boxönö xirip, ixo wewet a tinörön deek ma ixo ölanglanga idi nang toxo kis kölöme xö lölös se Satan, möxösa, e God ixo kis arixe me ine.

<sup>39</sup> "Mem moxo pere abo mangana lalaa xirip nang ine ixo pet kölöme xö lagunon möxöbo Judeia ma kölöme Jerusalem. Io, mem me tengen ösu bara inabo lalaa i turunon. Idi toxo sexomet ine nang toxo taba ine xö sölöxöröp.

<sup>40</sup> Ma lamun e God ixo öraru ine xalik a minet kö narun ne bung ma ixo ömaraxen lo a nangadi ra werwere ine.

<sup>41</sup> Ma kaim bara nangadi xirip toxo pere ine, ma lamun mem mon nang e God ixoro pere kos lo e mem bara mem marabo tengen ömaras a turunon lamun ine. Ma melamu xö tinaru baling ke ine xalik a minet, mem moxo an ma moxo inim arixe me ine.

<sup>42</sup> Me ine ixo isik a tinenge lölös se mem rua töngösen ömaras a nangadi ma ra rengrengen bere ine ina tödi ewe nang God ixo bulus ine bara irabo pet warkurai te idi nang te to ma nang te met.

<sup>43</sup> Abo propet toxo etöngösen maras lamun ine bara kölöme xö esene, God irabo döxömen taun abo magingin

saban te idi nang te nunu re ine.”

<sup>44</sup> Nang bang e Pita angen ixo wöwörö mina tinenge na, a Töxödös ne Tanono ixo wan su urungan te idi xirip nang toxo ölangen ina tinenge.

<sup>45-46</sup> Mabo tene nunu mee Judeia ewe nang toxo wanot mee Jopa arixe me Pita, toxo wuwus lamun a arabaa möxö Töxödös ne Tanono nang e God ixo tile ösu urungan bölök ke idi a nangadi nang kaim bara abo Judeia, möxösa, idi toxo ölangen idi toxo wöwörö mabo mangana tinenge xabise ma toxo ölet e God.

Io, Pita ixo tengen,

<sup>47</sup> “I kebeöt bara re tödi irabo panak idi rua kip baptais ma ari möxö idi tere kip a Töxödös ne Tanono xarnang mon ire.”

<sup>48</sup> Io, ine ixo tengen te idi, “Mum moro kip baptais iat kö esene Jisas Krai.” Io, idi toxo seng e Pita ra kinis bang me idi xö uleng ne bung.

## 11

### *A to runon te idi bölök nang kaim bara abo Judeia*

<sup>1</sup> Abo aposol mabo Kristien nang toxo xisixis nana xö boxönö xirip mee Judeia toxoro ölangen bara a nangadi nang kaim bara abo Judeia bölök tere kip lo a tinenge xö God ma nunu.

<sup>2</sup> Io, nang e Pita ixo wan kaa uruso Jerusalem, abo tene nunu mee Judeia toxo tewe tinenge saban tö ine,

<sup>3</sup> ma toxo tengen bira, “Nöngön u wan laxa xö gunon möxö nangadi nang kaim bara abo Judeia ma u xo an arixe me idi.”

<sup>4</sup> Io, Pita ixo urulo a winörö re ine ma ixo tengen ömaras idi mabo laa xirip nang ixo ot te ine.

<sup>5</sup> Ma ixo tengen bira, “E xo xisixis si xö lagunon taxin Jopa ma kölöme xö önga wöpönöbö e xo pere önga winawara. E xo pere a önga laa xarnang a xönö man ma lak taxin toxo ömalus ösu meriso xö balana kubu xöbo nit ne ngusuno, ma ixo wan su ura re e.

<sup>6</sup> E xo wawara laxa me e xo pere abo mangana wawaguai ma nit ne xexedi angen nang tobo ölasan, arixe mabo wawaguai axe, ma si, mabo wawaguai tobo xaxabo, mabo pun axe.

<sup>7</sup> Io, e xo ölangen a inöno önga tödi ixo tengen te e bira, ‘Taru kaa, Pita. Öro sexomet ma öro en.’

<sup>8</sup> “E xo balu bira, ‘Kaim tunon arixe, Orong! E kala ösöxö bara ara en te laa nang abo warkurai te nöngön ixo panak e mem pua enen.’

<sup>9</sup> “A inöno önga tödi ixo wöwörö baling ke e meriso xö balana kubu, ‘Ganim pa wanwanak ke laa nang e God ixoro ömaraxen.’

<sup>10</sup> Ma ina laa na ixo wösö xö narun ne axan, ma saxit mon toxo sat öxaa öbaling ine uruso xö balana kubu.

<sup>11</sup> “Xö ina axana bung iat mon ina narun ne tödi nang toxo tile ura re e meri Kaisaria toxo ot kö gunon nang e xobo xisixis könan.

<sup>12</sup> A Tanono ixo tengen te e bira, ‘Nöngön u bele dödödöm oleleng ma örö wan arixe me idi.’ Ina pitnö ma öng ne tönö e na toxo wan arixe bölök me e, me mem moxo laxa xö gunon te Konilias.

<sup>13</sup> Me ine ixo tengen te mem bara ixoro pere önga angelo ixo ot pösöt ine kölöme xö gunon te ine ma ixo tengen, ‘Erile u Jopa rue Saimon nang tobo rengrengen ine me Pita.

<sup>14</sup> Me ine irabo tengen abo tinenge re nöngön nang nöngön arixe mabo nangadi xirip kö gunon te nöngön, mum morobo uruoxe a to turunon.’

<sup>15</sup> “Nang e xo urulo ra tinenge, a Töxödös ne Tanono ixo wan su sik ke idi xarnang ixo wan su sik ke ire xö urulo.

<sup>16</sup> Io, e xo döxömen lo a lasa nang a Orong ixo tengen, ‘Jon ixo baptais ma ari, ma lamun mum morobo kip baptais ma Töxödös ne Tanono.’

<sup>17</sup> Io, nang bere God ixo tabaa idi ma arabaa xarnang ixo tabaa ire nang toxo nunu re Jisas Kraias, a Orong, io, ewenene runon e rua tinuu wi e God?”

<sup>18</sup> Nang idi toxo ölangen bira, idi toxo ödödö ma toxo ölet e God, ma toxo rengrengen, “Io, i turunon sik bere God i tabaa bölök a nangadi nang kaim bara abo Judeia rua dinödöm puxus ma rua xikip a to runon.”

### *A lotu ruso Entiok*

<sup>19</sup> Io, a nangadi lotu niang toxoro ulo elixilik nang a inarse ixo ot pösöt idi xina axana bung bara toxo teng e Stiwen, idi toxo ulo rup kö palaa u Ponisia, Saipras ma Entiok. Me idi toxo etöngösen ma tinenge deek urungan köbo Judeia xalik mon.

<sup>20</sup> Inexalik bara dauleng ke idi a nangadi mee Saipras ma Sairin, toxo wan uruso Entiok ma toxo urulo ra rengrengen ömaras a tinenge deek lamun e Jisas, a Orong, urungan köbo Grik bölök.

<sup>21</sup> A lölös kö Orong ixo kis arixe me idi ma a oleleng saxit toxo nunu ma toxo tawuxus urungan kö Orong.

<sup>22</sup> A nangadi lotu me ruso Jerusalem toxo ölangen ina tinenge na ma toxo tile e Banabas uruso Entiok.

<sup>23</sup> Nang ine ixo ot ma ixo pere a inone abalamu re God, ixo axanan ma ixo öxaxat idi xirip bara tabo mana tuu lölös turunon arixe ma Orong.

<sup>24</sup> Banabas ine a tödi deek ma i wöwö ma Töxödös ne Tanono ma nunu. Me idi toxo lamus a oleleng ne nangadi urungan kö Orong.

<sup>25</sup> Melamu Banabas ixo wan uruso Tasas sua winawara siwin e Sol.

<sup>26</sup> Ma ixo pere wösöt lo ine ma ixo lamus ine uruso Entiok. Ma ixo öt ma önga awat kudun, e Banabas me Sol toxo kis arixe ma nangadi lotu ma toxo usu a marakörö raxin. A nangadi toxo arun ta rengrenge abo tene tinam pe Jisas mabo 'Kristien' ruso Entiok.

<sup>27</sup> Io, xina axana bung na a dauleng ne propet toxo wan su meriso Jerusalem uruo Entiok.

<sup>28</sup> Ma öng mere idi, esene e Agabus, ixo tuu ma ixo wöwörö ma lölös möxö Tanono bara a irilöng taxin irabo ot ma irabo wan elixilik kö boxönö xirip nang e Rom ibo kure sik. (Ina na ixo ot nang e Kolodias ixo king.)

<sup>29</sup> Ma abo tene tinam pe Jisas idi toxo döxömen bara tabo tile a tuluwok xarnang öngöng ke idi irabo eöt, ta rorop idi abo Kristien nuso Judeia min.

<sup>30</sup> Io, idi toxo pet biringanin ma toxo tile e Banabas me Sol arixe ma arabaa re idi, uruso xöbo sisila ne lotu.

## 12

*A angelo ixo ölanglanga rewe e Pita xalik a gunon ne aömokorot*

<sup>1</sup> Xö ina axana bung nang e Erot a king, ixo öxös a dauleng ne duöng möxö lotu rua ögarin idi.

<sup>2</sup> Ine ixo uguran abo umri rua sesexomet e Jems, a tönö e Jon, arixe ma use.

<sup>3</sup> Nang e Erot ixo pere bara abo Judeia toxo maa lamun a lasa nang ixo pet, io, ixo uguran öbaling idi rua öxös lo bölök e Pita. Ina na ixo wanot kö bung ne Nien möxö Beret nang Kaim a Is.

<sup>4</sup> Melamu nang toxo öxös e Pita, toxo bulus ölaxa ine xö gunon ne aömokorot. Erot ixo isik ine urungan köbo limine a nit ne muxu ne köbat, ma nit ne tödi xö öngöng ne muxu ne köbat. Erot ixo pingit bara a bung möxö Luxa ne Nuan Lexe irabo kawam, irabo lamus ot e Pita ma irabo tuu xö warkurai xö wawara xö marakörö.

<sup>5</sup> Io, Pita ixo xisixis kölöme xö gunon ne aömokorot, ma lamun a nangadi lotu toxo seseseng lölös urungan te God tö ine.

<sup>6</sup> Xö dömön, xina bung mesila nang e Erot irabo lamus ösu e Pita rua tinuu xö warkurai, e Pita ixo paliso kaluluonin a nine köbat, toxo kut ine ma nine uno lölös, ma dauleng ne köbat toxo tuu xö marame laxlaxa.



<sup>7</sup> Saxit mon, a angelo xö Orong ixo wanot ma a maras ixo wan esexere kölöme xö ina xönö möxö gunon ne aömokorot. Ine ixo ömagi a lawana e Pita ma ixo ölaran ine. Me ine ixo tengen, "Tuu kaa pasaxit!" Ma inabo uno lölös toxo tawalas xalik a limine.

<sup>8</sup> Io, a angelo ixo tengen te ine, "Örö laulawa ma örö sige a nine sandel." Me Pita ixo pet eörin. A angelo ixo tengen te ine, "Kain pi nöngön ma xönö man taxin te nöngön ma örö muu e."

<sup>9</sup> Pita ixo muu ösu ine xalik a gunon ne aömokorot, ma lamun kaim ine ra ösöxö a lasa nang a angelo ixo wewet, ixo ot turunon. Ine ixo nunu bere ixo werwere re winawara.

<sup>10</sup> Idu toxo wan saxit a nine köbat me idu toxo wanot kö marame lölös nang ibo laxlaxa su urungan kö lagunon taxin. Ina marame ixo tamasawang tataun mon tö idu, me idu toxo wan su. Nang idu toxo önan kö ngas, saxit mon ma angelo ixo wan kalik ine.

<sup>11</sup> Io, Pita ixo döxömen ödeek lo im a lasa ixo ot te ine, ma ixo tengen, "Na e re ösöxö bara turunon a Orong ixo tile a angelo re ine rua ölanglanga e xalik a limine Erot ma xalik abo lalaa xirip nang a nangadi mee Judeia toxo maaa bara irabo ot."

<sup>12</sup> Ma nang ine ixo ösöxö xulen ina na, ixo wan uruso xö gunon te Maria, a nago re Jon, önga esene bölök e Mak, ma a nangadi oleleng toxo wan etok ma toxo seseseng könan.

<sup>13</sup> Pita ixo wiwidin kö marame laxlaxa xö araman, ma önga tene tinörön esene e Roda, ixo wan ta werwere.

<sup>14</sup> Nang ixo ölangen kulen a inöno e Pita, a axanan taxin ixo kip ine ma ixo ulo baling uruso kölöme ma kaim kö sasawang a marame, ma ixo tengen nanin bere Pita i tuu sik ni xö maranangas.

<sup>15</sup> Idi toxo tengen te ine, "Nöngön u baulang!" Me ine ixo lölös sik mon bara i turunon. Io, idi toxo tengen, "A angelo gut te ine."

<sup>16</sup> Ma lamun e Pita nangen mon ixo wiwidin kö marame, ma nang idi toxo sawang a marame ma toxo pere ine, idi toxo wuwus saban.

<sup>17</sup> Pita ixo ööt tö idi ma limine rö idi rua kinis malus, me ine ixo töngösen idi ma nang a Orong ixo ölanglanga ine xalik a gunon ne aömokorot. Ma ixo tengen, "Morobo tengen te Jems ma abo töke re Krai lamun ina na." Io, ixo wan lie im idi urungan kö xönö xabise.

<sup>18</sup> Xö puxu xö önga bung kabise, idi toxo wawao siwin e Pita me idi toxo eose baling ke idi iat abo umri, bere Pita ule.

<sup>19</sup> Io, Erot ixo tile idi ra winawara siwin e Pita, ma lamun kaim idi xo werwere ine. Io, ine ixo ose muu abo umri nang tobo werwere muu e Pita, ma ixo tengen ta sesexomet idi.

*Erot ixo met*

Io, Erot ixo wan lie e Judeia uri Kaisaria ma ixo xisixis bang e.

<sup>20</sup> Erot ixo laie saban sik kö nangadi mee Tair ma Saidon. Io, idi toxo ot etok kua werwere ine, idi toxo nunu re Balastas bara ine a sisila ne tene tinörön te Erot, ma bara irabo top idi. Io, idi toxo wan urungan te Erot ma toxo ose ine lamun a malum bara irabo kis kaluluonin idi me ine, möxösa, a lagunon te idi irabo kip nien möxö xönö raxin a king ibo wewet warkurai xönan.

<sup>21</sup> Io, xö bung nang e Erot ixo kubus sua kinis arixe me idi, ine ixo sige a man köbo king, ine ixo kis kö kinis ne warkurai xö king ma ixo pet a tinenge urungan kö marakörö.

<sup>22</sup> Ma a nangadi toxo xukup bara, “A inöno i eöt ma önga god, kaim bara a inöno tödi.”

<sup>23</sup> Saxit mon kina axana bung, a angelo xö Orong ixo se ine, möxösa, kaim ine ra ölelet e God, mabo sisi toxo en aine, ma ixo met.

<sup>24</sup> Ma lamun a tinenge re God ixo ot lölös ma ixo wan elixilik nana.

<sup>25</sup> Io, nang e Banabas me Sol toxo öxawam a tinörön te idu, idu toxo tawuxus baling meriso Jerusalem, ma toxo lamus e Jon, nang tobo rengrengen ine me Mak, arixe me idu.

## 13

*Toxo tile rewe e Banabas me Sol*

<sup>1</sup> Kölöme xö lotu niso Entiok nangen a dauleng ne propet ma tene ausu. Abo esene idi e Banabas, e Simion, tobo rengrengen ine ma Kong, e Lusias meriso Sairini, e Manaen ewe nang ixo taxin arixe me Erot nang a tödi raxin, me Sol.

<sup>2</sup> Nang idi toxo lolotu wösöt a Orong ma toxo ölölo, a Töxödös ne Tanono ixo tengen, “Mum morobo mana pere kos e Banabas me Sol ta wewet a tinörön nang e xo kuwe idu ra wewet.”

<sup>3</sup> Io, melamu nang idi toxoro ölölo ma toxoro seseng, idi toxo bulus abo limine idi lömö ridu ma toxo tile rewe idu.

*Pol me Banabas suso Saipras*

<sup>4</sup> A Töxödös ne Tanono ixo tile idu, me idu toxo wan su xö lagunon taxin e Selusia ma toxo kakaa xö mön, ma ixo kip idu uruo Saipras.

<sup>5</sup> Nang idu toxo ot tiso Salamis, idu toxo etöngösen ma tinenge re God kölöme xö gunon ne sineseng möxöbo Judeia. Me idu toxo lamus e Jon, a ese xabise e Mak, arixe me idu ra rorop kölöme xö tinörön.

<sup>6</sup> Idiet toxo wan kirip kö muxulamin Saipras me idiet toxo ot kö lagunon Papos. Ringan ee idiet toxo esuo ma sewuk meriso Judeia ma a propet töxö, a esene e Baa-Iesu.

<sup>7</sup> Ine ewe nang a tene tinörön kö sisila meriso Rom, e Sergias Paulias. Ma ina sisila na, a tödi nanase, ixo tile tinenge ra lalamus e Banabas me Sol, möxösa, ine ixo maaaa ra ölangen a tinenge re God.

<sup>8</sup> Ma önga tödi a esene e Elimas, a sewuk ine, ma a esene, a unine bara, 'a sewuk'. Ma ixo tuu wi idiet ma ixo maaaa ra wuxwuxus a dinödöm kö ina sisila bere ine i bele nunu.

<sup>9-10</sup> Io, e Sol, niang tobo rengrengen bölök ine me Pol, ixo wöwö sik ma Töxödös ne Tanono ma ixo pere dik e Elimas ma ixo tengen, "U xarnang arixe e Satan! Nöngön a iuiuo möxöbo lalaa xirip nang a lak töxödös. Ma u wöwö sik mabo mangana atöxö ma abo ineösaxit saban kirip. U bo eka xuxulas a turunon kö Orong urungan baling kö röxröxö. Nagut u kebeöt ta iwes ina tatalien na?"

<sup>11</sup> Nixinen a Orong irabo ömaso e nöngön. Nöngön örobo pulo ma ökorobo eöt bölök bara örobo pere a maras möxö xaken."

Io, saxit mon niang a xödxödö ixo kait pi ine ma ixo sasae nana lamun te öng bara irabo tön a limine rua sisilien ine.

<sup>12</sup> Io, nang a tödi raxin möxö gapman ixo pere bira, ixo nunu, möxösa, ixo wuwus köbo inausu xö Orong.

### *Pol tuso Entiok kö distrik Pisidia*

<sup>13</sup> Io, Pol ma nine ais se ine, idiet toxo kakaa lo xö mön meringan Papos uruso Perga ro xö provins Pampilia. Me Jon ixo wan kalik idu ringan ma ixo baling uruso Jerusalem.

<sup>14</sup> Io, idu toxo wan lo meringan Perga uruso Entiok kuso xö distrik Pisidia. Ma xö Sabat idu toxo wan laxa rusu xö gunon ne sineseng möxöbo Judeia me idu toxo kis.

<sup>15</sup> Melamu, niang toxoro öxawam a xinixos möxöbo ginigeet möxöbo warkurai te Moses ma dauleng ne ginigeet möxöbo propet, abo sisila ne lotu toxo tile tinenge rö idu ma toxo tengen, "Abo tönö e mem, niang bere mu angen merebo tinenge aöxaxat möxö nangadi na, i deek bara mu morobo tengen."

<sup>16</sup> Pol ixo tuu kaa ma ixo ööt te idi ma limine bara idi ta kis ödödö. Io, ixo tengen, "Nangadi mee Israel, me mum ewe niang kaim bara abo Judeia niang mum bo lolotu wösöt e God, mum moro ölangen ee!"

17 A God möxö nangadi mee Israel ixo pere kos lo abo untubuno ire ma ixo öraxin idi niang toxo kis xarniang abo osee ri Isip. Ma ixo silien ösu idi meringan kina xönö arixe ma a lölös taxin.

18 Ma i turunon bara kaim idi ra raramine, lamun kaimine xo tinuu rewe xalik idi xö nit ne sangaun ne awat tuso xö xönö tataun.

19 Ixo ögarin a pitnö ma ninöng ne bung marapun to Kenan ma ixo isik tewe a pu re idi urungan kö nangadi re ine bara re idi im.

20 Inabo lalaa na ixo ot eöt ma nit ne mar ma pitnö ne sangaun ne awat.

“Melamu xina na, God ixo isik abo tene warkurai te idi ot kö bung ke propet Samuel.

21 Io, a nangadi toxo ose lamun te king me God ixo isik e Sol a barok ke Kis, meringan kö bung marapun te Benjamin. Me Sol ixo kure idi eöt ma nit ne sangaun ne awat.

22 Io, melamu, God ixo kip tewe e Sol ma ixo bulus e Dewit bara irabo king ke idi. Me God ixo töngösen idi lamun e Dewit ma ixo tengen bira, ‘E xoro pere wösöt lo e Dewit a barok ke Jesi bere ine ina mangana tödi nang i eöt xarniang kö maaaa re e. Me ine irabo pet kirip abo lalaa niang e maaaa bara irabo pet.’

23 “Io, meringan köbo tubuno e Dewit, God ixo isik ot a Tene Aöro, e Jisas, urungan köbo tee Israel, xarnang ixoro kubus sik.

24 Mesila nang bang kaim e Jisas sa urulo a tinörön te ine, Jon ixo palas tinenge lölös sik kidi abo Israel bara idi tabo dödöm puxus ma tabo kip baptais.

25 Niang e Jon ixo pet eörin kirip abo tinörön te ine ixo tengen, ‘Mum mo döxömen bere e iang ewe? Kaim bara e a Mesaia. Ma lamun öng melamu re e ine irabo wanot me e kobo töxödös eöt ta walwalas a kililöng kalik a tabalane xexene.’

26 “Abo töke, mum abo untubuno e Abaram, me mum niang kaim bara abo Judeia niang mum bo lolotu wösöt e God, moro ölangen. God ixo tile ina tinenge ne aöro ura re ire iat.

27 A nangadi mee Jerusalem mabo sisila re idi kaim kö ösöxö xulen e Jisas bere ine runon ewe. Me idi tekarabo ölangen kulen bölök abo tinenge möxöbo propet niang idi toxo ölangen nang idi xabise tobo xokos kölöme xöbo Sabat kirip. Ma lamun niang idi toxo kure ine bara irabo mana kip a aömokorot, idi toxo öturunon abo tinenge möxöbo propet.

28 Kaim idi ra ruruxun pösöt te laa nang i eöt bara idi tabo sexomet ine lamun. Ma lamun idi toxo seng lo e Pailat bara tabo sexomet ine.

29 Nang idi toxo pet kirip sik abo lalaa niang abo propet toxo geet bara tabo mana pet tö ine, idi toxo kip ösu ine meringan kö sölöxöröp ma toxo bulus ine xö önga maöt.

30 Ma lamun e God ixo öraru ine xalik a minet,

31 ma xöbo oleleng ne bung idi nang toxobo arixe mine meringan Galili urungan Jerusalem, idi toxobo werwere ine. Ma nixinen idi tobo rengrengen ine xö nangadi re ire.

32 “Me maa me tengen a tinenge deek ke mum. Ma i bira. God ixoro kubus sik köbo untubuno ire.

33 Ma ixoro pet eörin inabo kunubus sö ire, a bung barok umelamu bira: ixoro öraru e Jisas kalik a minet. Ma ixo ot eöt xarnang toxo geet kölöme xö Sinö seöninöng kö Buk Sinö. I tengen bira,

*‘Nöngön a barok ke e,*

*Ma nixinen e re tamana nöngön.’*

34 Ma ina tinenge na i tengen a turunon bara God ixo öraru ine xalik a minet ma i kebeöt ta mamaxus. Inabo tinenge i bira:

*‘E rabo isik a madakdak ne arabaa urungan te mum niang e xoro kubus sik me Dewit lamun. Ma inabo xuxubus i karabo kawaim.’*

35 Io, toxo tengen bölök kö xönö xabise bara,

*‘Nöngön ökorobo ömaraxen lo re Öng ke nöngön Nang i Madakdak bara irabo maxus.’*

36 “I maras bara abo tinenge iri ot turunon, möxösa, Dewit ixo pet eörin a lasa niang e God ixo pingit bara irabo pet köbo bung niang ixo to sik, ma melamu, ixo met. Me idi toxo pömös ine arixe mabo untubuno, ma a aine ixo maxus.

37 Ma lamun ine ewe nang God ixo öraru öbaling kalik a minet, kaim a mamaxus.

38 “Io, abo töke, e mamaa bara mum morobo mana ösöxö bara Jisas niang i sawang a ngas bere God irabo döxömen taun tewe abo magingin saban. Ma na maa marabo tengen te mum lamun ina niang.

39 Me idi xirip niang toxo nunu re Jisas, God irabo tengen te idi bara idi te töxödös ma bara tere langlanga xalik abo magingin saban niang abo warkurai te Moses i kebeöt ta ölanglanga idi xalik.

40 Mum moro balaure e mum möxö abo lasa niang abo propet toxo tengen, i karabo ot turunon te mum. Inabo tinenge i bira:

41 *‘Mum morobo mana ölangen, mum abo tabuno ölöngö.*

*Mum morobo wuwus ma morobo iuo saban,*

*möxösa, e rabo pet te laa kölöme xöbo axana bung nang  
mum mo roro xönan,  
ma lamun niang bere idi tabo tengen te mum lamun ine,  
mum korobo eöt ta nunu.' "*

<sup>42</sup> Io, niang e Pol me Banabas idu toxo önan su xalik a gunon ne sineseng möxöbo Judeia, a nangadi toxo seng idu rua tinenge baling lamun inabo lalaa xö Sabat melamu.

<sup>43</sup> Nang a nangadi niang toxo kis arixe midi toxoro wan elixilik, oleleng ne Judeia me idi xabise ewe niang toxo kip ausu xö lotu möxöbo Judeia, idi toxo muu e Pol me Banabas. Me idu toxo öxaxat bara idi tabo kisisik iat kölöme xö abalamu re God.

<sup>44</sup> Io, xö Sabat melamu, a nangadi oleleng arixe möxöbo lagunon taxin toxo wanot arixe ra ölangen a tinenge xö Orong.

<sup>45</sup> Niang abo Judeia toxo pere a nangadi oleleng idi toxo bala kadik ma toxo uli ma toxo tengen ögarin abo tinenge re Pol nang ixo rengreng.

<sup>46</sup> Io, e Pol me Banabas toxo balu idi ma balamasa bira, "God ixo pingit bara mum iat morobo mana araun ta ölangen a tinenge re ine. Ma lamun e mum moxoro kasen ine me mum kebeöt ta örasen bara e mum mo eöt tua kip a to ulorexe. Io, nixinen maa marabo tawuxus kalik e mum urungan te idi niang kaim bara abo Judeia.

<sup>47</sup> Me maa me pet bira, möxösa, abo tinenge niang e God ixo tengen ölölös se maa ulamun i bira:

*'E xoro bulus nöngön xarnang a bibio re idi ewe nang kaim  
bara abo Judeia,  
bara meringan kö tinörön te nöngön, God irabo öro rebo  
nangadi xö öxöno lagunon kirip.' "*

<sup>48</sup> Ma nang idi niang kaim bara abo Judeia toxo ölangen ina na, idi toxo axanan ma toxo tengen bara abo tinenge xö Orong a lak mamaran. Me idi ewe niang God ixoro tulus lo idi rua xikip a to ulorexe, idi toxo nunu.

<sup>49</sup> Io, a tinenge re God ixo wan elixilik kö boxönö xirip kina xönö.

<sup>50</sup> Lamun abo Judeia toxo öraru abo baladi abo une raxin niang idi toxo ii e God, mabo duöng orong bölök möxö ina lagunon. Me idi toxo isik ot a agot te Pol me Banabas ma toxo bat tewe idu meringan kalik a xönö re idi.

<sup>51</sup> Io, idu toxo talis tewe abo teles möxöbo xexene idu rua osen bara idi toxoro pet a magingin saban tö idu. Me idu toxo wan u Aikoniam.

<sup>52</sup> Ma abo tene tinam pe Jisas meringan Entiok, idi toxo wöwö arixe ma axanan ma Töxödös ne Tanono.

## 14

### *Pol me Banabas suso Aikoniam*

<sup>1</sup> Ruso Aikoniam e Pol me Banabas toxo wan laxa uruso kölöme xö gunon ne sineseng möxöbo Judeia xarniang iat idu toxobo wewet. Idu toxo wöwörö önga mangana iat, nang a oleleng ne Judeia me ewenene midi nang kaim bara abo Judeia, idi toxo nunu.

<sup>2</sup> Lamun abo Judeia niang toxo öngus sa nunu, idi toxo öraru abo bala kadik kö idi nang kaim bara abo Judeia nang kaim idi ra nunu. Me idi abo Judeia toxo öngat bölök a balna idi nang kaim bara abo Judeia bara tabo mana wan tewe meringan kalik abo Kristien.

<sup>3</sup> Io, Pol me Banabas toxo xisixis singan me idu toxo rengrenge ma balamasa lamun a Orong. Ma Orong ixo öturunon abo tinenge re idu lamun a abalamu re ine bira. Ixo tabaa idu ma lölös sua wewet abo auxileng lölös ma lalaa ne auwuwus.

<sup>4</sup> A nangadi möxö ina xönö lagunon toxo palang idi, dauleng kö lawa möxöbo Judeia ma dauleng kö lawana idu a nine aposol.

<sup>5</sup> Dauleng ne Judeia ma dauleng niang kaim bara abo Judeia arixe mabo tene sisila re idi toxo pingit bara tabo pet ögat idu ma tabo teng ömet idu.

<sup>6</sup> Ma lamun nang idu toxo ösöxö lo ina na, idu toxo ulo rup u Listra me Derbe xö xönö Likonia, ma toxo su xö boxönö löörörö xö nine lagunon taxin.

<sup>7</sup> Me idu toxo balan kö palas tinenge möxö tinenge deek kingan ee.

### *Pol tuso Listra me Derbe*

<sup>8</sup> Ro Listra önga tödi ixobo kisisik. Toxo kip ine ma a pengpeng ma i kara ösöxö a nuan.

<sup>9-10</sup> Ixo ölangen abo tinenge re Pol. Io, Pol ixo pere dik sik ine ma ixo pere bara ine ma nunu rua langlanga. Io, Pol ixo kuwe ine ma ixo tengen, "Örö taru ma örö tuu!" Saxit mon ina tödi na ixo kos kaa ma ixo urulo ra nuan nana.

<sup>11</sup> Nang a marakörö toxo pere a lasa niang e Pol ixo pet, idi toxo xukup ma tinenge me Likonia bara, "A nine god tere wan su ura re ire xarniang a tödi runon!"

<sup>12</sup> Io, idi toxo tut e Banabas ma ese Sius me Pol me Ermis, möxösa, ine ibo sila sik ke idu ra tinenge.

<sup>13</sup> A gunon lotu re Sius ixo tuu sik uri xö araman kö lagunon taxin. Ma a pris se Sius ixo kip ot a bulmakau suxurno arixe ma löm uruso lömö xö marame laxlaxa möxö ina lagunon taxin. Ixo pet bira, möxösa, ine arixe ma marakörö toxo maaaa rua söngsöngöt abo arabaa re idi rua lotu wösöt idu.

14-15 Ma lamun niang ina nine aposol, e Pol me Banabas, idu toxo ölangen bere idi te xeka wewet bira rö idu, idu toxo didii a man te idu rua osen bara idu tekobo maa bara idi tabo pet bira rö idu. Idu toxo ulo su lörörö xö marakörö me idu toxo tenge raxin bira, “Ai! Ganim e mum pa wewet abo mangana lalaa biringan! Maa a nine tödi mon xarnang e mum ma kawaim bara a nine god e maa. Maa me isik ot a tinenge deek kö mum. Maa me rengrengen tö mum bara mum morobo mana tawuxus meringan köbo laa tataun, ma morobo tawuxus urungan te God nang a lak to, ine nang ixo pet a mango, a xönö lagunon ma a rasi, mabo mangana lalaa xirip lömö kaluluonin idi.

16 Mesila, ixo gan sik a nangadi möxöbo kantri bara tabo mumuu abo mangana tatalien te idi iat.

17 Ma lamun ine ibo osen ömaras kö nangadi bere ewe ine. Ma ixo pet ina na bira. Ine i osen a abalamu re ine niang ixobo isik a baraa meriso xö mango ma niang ixobo ratabaa e mum arixe mabo nien te mum kinabo texe möxö kip nien. Ma nang ine i pet bira, i tabaa e mum ma nien ma i öwöwö e mum ma axanan.”

18 A turunon bara idu toxo tengen inabo tinenge, ma lamun kaim kö mamalus sö idu rua tinuu wi idi bara ganim idi ra söngöt arabaa rö idu.

19 Io, melamu, a dauleng ne Judeia toxo wanot mee Aikoniam ma Entiok meringan Pisidia, me idi toxo sat lo a dinödöm kö marakörö. Idi toxo teng e Pol arixe ma warawat ma toxo ösat ösu ine uri xö araman möxö lagunon taxin, möxösa, idi toxo dökömen bara ine ixoro met.

20 Ma lamun, melamu niang abo tene tinam pe Jisas toxo kis etok arixe me ine, ixo taru kaa ma ixo wan baling uruso xö lagunon taxin. Ma xö bung kabise idu me Banabas toxo wan u Derbe.

### *Idu toxo baling u Entiok niang Siria*

21 Idu toxo palas tinenge ma tinenge deek kö kölöme xina lagunon Derbe me idu toxo uxis a oleleng ne tene tinam pe Jisas. Io, idu toxo tawuxus baling uri Listra, Aikoniam, ma uri Entiok mee Pisidia.

22 Idu toxo ölölös inabo tene tinam pe Jisas me idu toxo öxaxat idi bara idi tabo mana tuu lölös sik kö nunu kölöme re Jisas. Idu toxo tengen, “Ire tabo mana örasen iat a oleleng ne kinadik kua nilaxa xö kingdom pe God.”

23 E Pol me Banabas toxo pere kos lo idi a dauleng ne sisila xöbo gunon ne lotu öngöng. Me idu toxo isik idi uruso xö limine Orong ewe niang idi toxoro nunu re ine. Idu toxo pet bira arixe ma sineseng ma ölölö.



<sup>24</sup> Melamu niang idu toxo wan saxit kölöme xö distrik Pisidia, idu toxo ot kölöme xö provins Pampilia.

<sup>25</sup> Ma niang idu toxoro etöngösen ma tinenge re God kö lagunon Perga, idu toxo wan su uruo Atelia.

<sup>26</sup> Io, idu toxo kakaa xö mön meringan Atelia me idu toxo baling u Entiok, a lagunon niang abo tene tinam pe Jisas toxoro isik idu ringan uruso xö abalamu xö God bere idu tabo pet ina tinörön na niang idu toxoro öxawam.

<sup>27</sup> Xö inot tidu ringan Entiok idu toxo lamus etok a marakörö ne lotu ma toxo tengen kirip abo lalaa niang e God ixoro pet kölöme xö tinörön te idu. Me idu toxo tengen bölök bara God ixo sawang a ngas bara idi niang kaim bara abo Judeia idi tabo nunu.

<sup>28</sup> Io, idu toxo kis ömat tingan arixe ma abo tene tinam pe Jisas.

## 15

### *A kinis etok kiso Jerusalem*

<sup>1</sup> A dauleng ne duöng mee Judeia toxo wanot su uruo Entiok ma toxo usu abo Kristien bira, “Ma nang bara mum kobo muu a warkurai te Moses möxö xurxuru abo lewene aine mum, e God i kobo eöt ta öro e mum.”

<sup>2</sup> Ina na ixo pet e Pol me Banabas sa inegot ma tinenge lölös arixe midi. Io, toxo tibe e Pol me Banabas arixe ma dauleng ne tene nunu, rua nuan kaa uruso Jerusalem pa werwere abo aposol mabo duöng sisila ne lotu rua atöngösen lamun ina ineose.

<sup>3</sup> Io, a marakörö ne lotu toxo tile idi ra nuan. Ma nang idi toxo wan köröp Ponisia mee Samaria, idu toxo tengen ömaras idi bara i bule a nangadi nang kaim bara abo Judeia, idi toxo dödöm puxus urungan te God. Ma ina tinenge ixo isik a axanan taxin urungan köbo Kristien.

<sup>4</sup> Ma nang idi toxo ot Jerusalem, a marakörö ne lotu mabo aposol arixe mabo duöng sisila ne lotu toxo öga idi. Me Pol me Banabas toxo tengen ömaras abo lasa nang e God ixo pet kö limine idu.

<sup>5</sup> Io, a dauleng ne tene lotu ewe idi nang möxöbo Parasi toxo tuu lömö ma toxo tengen, “A nangadi nang kaim bara abo Judeia tabo mana kuru a lewene aine idi ma tabo mana muu abo warkurai te Moses.”

<sup>6</sup> Abo aposol mabo duöng sisila ne lotu toxo ot arixe ra werwere muu ina ineose.

<sup>7</sup> Melamu xöbo tinenge oleleng, Pita ixo taru kaa ma ixo tengen ömaras idi bira, “Abo töke, mum mo ösöxö bara nang köbo bung mesila saxit, God ixo pere kos lo e kaluluonin e mum, bara a nangadi nang kaim bara abo

Judeia tabo ölangen a tinenge deek möxö ngalake ma tabo nunu.

<sup>8</sup> Me God, ine ewe i ösöxö a könönö ire xirip öngöng, ixo isik a Töxödös ne Tanono urungan tö idi xarnang mon ixo isik ke ire ra osen bara ibo öga idi bölök.

<sup>9</sup> Me ine kaim kö wewet te tatalien kabise kaluluon te ire me idi. Kawaim. Ine ixo ömadakdak abo balana idi ma nunu.

<sup>10</sup> Io, ma ruasa mum mo mamaa ra könönöin e God, rua bulbulus a tiip kö inöno abo tene tinam pe Jisas niang abo untubuno ire me ire bölök tokobo eöt ta sösölök?

<sup>11</sup> Ire te nunu bara a Orong e Jisas i tabaa tataunin mon ire ma ina to runon xarnang mon i pet tö idi."

<sup>12</sup> Io, a marakörö nang toxo kis etok toxo kis ödödö ma toxo ölangen e Banabas me Pol. Idu toxo rerenge lamun abo auxilieng lölös ma laa ne auwuwus nang e God ixo pet te idu kaluluonin a nangadi nang kaim bara abo Judeia.

<sup>13</sup> Ma nang idu toxo kawam kö winörö, Jems ixo tengen bira, "Abo töke, moro ölangen e.

<sup>14</sup> Saimon iri tengen ömaras se ire, nang bara bule e God ixo osen a abalamu re ine rua xikip lo a nangadi re ine iat meringan kölöme xö nangadi nang kaim bara abo Judeia idi.

<sup>15</sup> Ina na i eöt ma tinenge möxöbo propet nang toxo geet bira,

<sup>16</sup> *'Melamu xönan, e rabo ot baling*

*me e rabo uru öbaling a gunon lotu re Dewit nang ixoro subu.*

*E rabo uru öbaling abo xönö nang i tamauwuk su, ma arabo pet ödeek ine.*

<sup>17</sup> *Io nang, a nangadi xabise tabo wawara siwin a Orong, idi a nangadi xirip nang kaim bara abo Judeia nang e xo kip lo idi bara rö e.'*

<sup>18</sup> Ina niang abo tinenge xö Orong, nang ixo ömaras ire min ma abo lalaa me lorexe saxit."

<sup>19</sup> Jems ixo tengen, "A winara iat te e bara ganim ire ra öriip idi nang kaim bara abo Judeia nang ewe te ratawuxus pösöt e God.

<sup>20</sup> Inexalik bara ire tabo gegeet urungan tidi rua rengren-gen ögele idi bara, ganim idi ra enen a nien nang a dauleng te döxömen bara i koxobo töxödös bara tabo en, möxösa, a nangadi te erabaa min urungan kö perewuo, ma ganim idi ra wewet a magingin saban möxö minaru arixe, ma ganim idi ra enen a gineme nang tobo kut ömet, bara nien nang ma dee.

<sup>21</sup> Ire tabo tengen bira, möxösa, mesila saxit ot nixinen tobo walwalas tinenge mabo warkurai te Moses kö boxönö

lagunon taxin ma tobo xokos inabo warkurai xö gunon ne sineseng köbo bung Sabat kirip.”

<sup>22</sup> Io, abo aposol mabo tene sisila mabo nangadi xirip möxö lotu toxo kubus tinenge rua pere kos lo rebo tödi mere idi iat ta tile idi uruso Entiok arixe me Pol me Banabas. Idi toxo pere kos lo e Judas (a esene bölök e Barsabas) me Sailas, idu a nine tene sisila möxöbo Kristien.

<sup>23</sup> Idi toxo tile arixin idi ma axana ginigeet i tengen bira, “Mem abo aposol mabo tene sisila, abo tönö e mum kö esene e Kraiss, mem me tile a axanan te mum kö nangadi nang mum kaim bara abo Judeia, mum abo tene nunu meringan Entiok, Siria me Silisia.

<sup>24</sup> Mem me ölangen bara uleng mere mem te ot pösöt e mum ma te öwuwus e mum mabo tinenge re idi. Me idi te ögarin a dinödöm pe mum. Ma lamun mem kobo tengen te idi rua wewet biringan.

<sup>25</sup> Io, na mem mere ot kö önga dinödöm bara marabo pere kos lo rebo duöng. Mem marabo uguran idi urungan te mum arixe ma nine tönö e mem, e Banabas me Pol.

<sup>26</sup> A nangadi toxo maaaa rua sesexomet idu, ma lamun idu toxo isiksik iat a to ridu rua atöngösen ma esene Jisas Kraiss.

<sup>27</sup> Io, mem me uguran e Judas me Sailas urungan te mum rua töngösen e mum ma rua öturunon a tinenge nang mem moxo geet.

<sup>28</sup> I deek kö winawara xö Töxödös ne Tanono, me mem bölök, marabo ganim a urip e mum mere xinixip. A uleng ne warkurai i deek mon bara morobo muu.

<sup>29</sup> Ganim e mum pa enen a nien ne arabaa nang te erabaa min urungan kö perewuo, ma ganim e mum pa enen a nien nang ma dee, bara a gineme nang tobo kut ömet, ma ganim e mum pa wewet a magingin saban möxö minaru arixe. I deek bara mum morobo wan pes minabo mangana lalaa na. Io, ine mon.”

<sup>30</sup> Io, a marakörö ne lotu toxo tile rewe idi ma toxo wan su uri Entiok. Idi toxo kuwe arixin a marakörö ne lotu meringan, ma toxo isik a axana ginigeet te idi.

<sup>31</sup> Ma nang a marakörö ne lotu toxo kos, idi toxo axanan lamun ina tinenge ne aöxaxat.

<sup>32</sup> E Judas me Sailas, idu iat a nine propet. Me idu toxo tengen a oleleng ne tinenge ne aöxaxat möxö ölölös idi abo Kristien.

<sup>33</sup> Melamu xöbo bung ixo saxit idu ringan, abo Kristien toxo tile rewe öbaling idu ma malum rua binaling urungan te ewe midi nang toxo uguran idu.\*

\* 15:33 Dauleng ne ginigeet mesila toxo bulus ölaxa rina 34 i tengen bira: *Inexalik Sailas ixo döxömen bara irabo kis singan.*

<sup>35</sup> Ine xalik bere Pol me Banabas toxo kis baling kingan Entiok. Me idu arixe ma oleleng ne duöng kabise toxo eusu ma toxo tengen ömaras a tinenge xö Orong.

*Pol ixo urulo a nine inuan te ine*

<sup>36</sup> Io, xöbo bung melamu Pol ixo tengen te Banabas, "Iraa ta wan baling ma ta uxileng abo Kristien köbo lagunon tataxin kirip nang iraa toxoro tengen ömaras a tinenge xö Orong könan. Ma ta pere bara idi te bubule im."

<sup>37</sup> Banabas ixo maaa ra lalamus lo e Jon Mak arixe me idu.

<sup>38</sup> Inexalik e Pol ixo döxömen bara i kobo deek ka lalamus lo ine, möxösa, ine ixo wan talu idu rusu Pampilia ma kaim a nuan arixe me idu rua wewet a tinörön.

<sup>39</sup> A agot taxin ixo ot kaluluonin idu, io, idu toxo wan ewalas. Banabas ixo lamus lo e Jon Mak, idu toxo kaa lo xö mön uruso Saipras.

<sup>40</sup> Inexalik e Pol ixo pere kos lo e Sailas. Nang idu toxo maaa ra nuan, abo Kristien toxo tengen te idu bira, "A abalamu xö Orong irabo kis arixe me mu."

<sup>41</sup> Pol ixo wan kaluluonin e Siria me Silisia ma ixo ölölös abo marakörö möxöbo lotu.

## 16

<sup>1</sup> Io, Pol ixo wanot Derbe ma meringan ixo wan Listra, ma önga bak ne ausu a esene e Timoti ixobo xisixis singan. A nago re ine a Judeia ma a tene nunu, ma lamun a tata re ine a Grik.

<sup>2</sup> Abo Kristien kirip kölöme Listra me Aikoniam toxo etöngösen bara e Timoti ine a tödi mamaran.

<sup>3</sup> Pol ixo maaa rua lalamus e Timoti ra nuan. Io, ine ixo kuru a lewene aine, möxösa, abo Judeia ewe nang tobo xisixis singan, idi xirip toxo ösöxö bara tata rine a Grik.

<sup>4</sup> Io, nang idiet toxobo önan kölöme xöbo lagunon taxin, idiet toxobo isik urungan köbo tene nunu abo warkurai niang abo aposol mabo sisila ne lotu ringan Jerusalem toxo bulus bara rua nangadi ra mumuu.

<sup>5</sup> Io, a nunu xö marakörö ne lotu ixo tuu lölös ma a xinoxos ixo önan kaa xöbo bungbung kirip.

*Pol ixo pere a winawara xö Tanono*

<sup>6</sup> Idiet toxo wan kölöme xirip kö distrik Pirigia ma provins Galesia, nang a Töxödös ne Tanono kaim kö maaa re idiet ta atöngösen ma tinenge deek kö provins Esia.

<sup>7</sup> Ma nang idiet toxo ot lörörö distrik Misia, idiet toxo maaa ra nuan laxa xö provins Bitinia, inexalik a Tanono e Jisas kaim kö öbala idiet.

<sup>8</sup> Io, idiet toxo wan saxit Misia ma toxo wan su urungan Toroas.

<sup>9</sup> Xina bung kö dömön, Pol ixo pere a winawara möxö önga tödi mee Masedonia, ixo tuu sik ma ixo seseseng bira, “Örö miang ura Masedonia ma örö top e mem.”

<sup>10</sup> Melamu mon kö winawara re Pol, meet moxo tagur iat mon ta nuan uruso Masedonia, möxösa, e meet moxo ösöxö bere God ixo kuwe e meet tua atöngösen ma tinenge deek kingan tidi.

### *Ringan Pilipai Lidia ixo nunu*

<sup>11</sup> Meet moxo kakaa xö mön mee Toroas ma moxo wan töxödös u Samotares. Ma xö bung melamu meet moxo wan Niapolis.

<sup>12</sup> Io, meringan Niapolis meet moxo wan urungan Pilipai, a xönö lagunon taxin mee distrik Masedonia. Abo Rom toxo pet e Pilipai xarnang a lagunon te idi me meet moxo kis singan kö uleng ne bung.

<sup>13</sup> Xö bung Sabat meet moxo wan su xö marame möxö lagunon taxin urungan kö ari, nang meet me dökömen bere meet marabo wawara siwin te xönö rua sineseng. Meet moxo kis su ma moxo urulo ra tinenge ma balixilik ewe nang toxoro ot etok kingan.

<sup>14</sup> Öng mere idi ewe nang ixo ölangen e meet, e Lidia, a öng nang ixobo lolotu wösöt e God. Ine mee Taiataira ma ixobo rörörön kö man dadan leklek. A Orong ixo sawang a balana ine rua xikip lo a tinenge re Pol nang ixo rengrengen.

<sup>15</sup> Io, melamu, ine arixe mabo nangadi möxö gunon tine, idi toxo kip baptais, ma ixo seng ölölös e meet tua nuan urungan kö gunon tine. Ine ixo tengen, “Nang bara muot mo dökömen bere e a tene nunu xö Orong, muot moro miang ma moro kis so xö gunon te e.” Me ine ixo ölölös e meet ta nuan.

### *Toxo bulus e Pol me Sailas kö gunon ne aömokorot tiso Pilipai*

<sup>16</sup> Önga bung meet moxo önan uruso xö xönö möxö sineseng, meet moxo esuo ma önga balik tultul, niang a tano saban ixo kis sine. Io, nang a tano saban ixobo tabaa ine ma lölös sua atöngösen lamun abo lalaa irabo wanot melamu. Ine ibo rörön ot a tuluwok taxin te idi nang tobo unan sik ine.

<sup>17</sup> Ina balik ixo muu e meet kirip arixe me Pol, ma ixo xukup bira, “Inabo nangadi na, idiet abo tultul kö pu xö God niso lömö saxit, ewe idiet te rengrengen a ngas sua nang e God irabo öro mum könan.”

18 Ine ixo wewet bira xö oleleng ne bung, ot nang e Pol ixo laie me ine ixo tawuxus ma ixo tengen kö tano saban, "Xö esene Jisas Krais, e tengen bara örö wan su xalik ine." Ma saxit mon a tano saban ixo wan lie ine.

19 Ma bere idi nang toxo unan sik ina balik, toxo ösöxö xulen bara ngas se idi möxö wewet ot a tuluwok ixoro wan, toxo tödik e Pol me Sailas ma toxo ösat idu uruso xö xönö möxö misik kua tinuu mesila ridi nang tobo sila sik ma lölös.

20 Idi toxo lamus ot idu uruso mesila xöbo tene warkurai mee Rom ma toxo tengen, "Nine tödi na, idu a nine Judeia, me idu toxo öraru a kinis saban kö lagunon te ire.

21 Me idu te sasat ot a marakörö rua mumuu a mangana tatalien. Ma lamun, nang bara ire tabo ömaraxen lo bara tabo wewet muu inabo tatalien na, ire tabo lexe abo warkurai te ire a nangadi mee Rom."

22 A marakörö toxo tuu arixe ma toxo egot midu. Io, abo tene warkurai, idi toxo erile bara tabo didii ana man te idu ma bara tabo dangat idu.

23 Io, nang toxo dangat oleng idu, toxo bulus ölaxa idu xö gunon ne aömokorot, ma toxo tengen ölölös kö tödi ixobo balaure ina gunon tua winawara wi ödeek idu.

24 Melamu xöbo tinenge lölös kirip, a tödi möxö winawara wi a gunon ne aömokorot ixo bulus ölaxa idu uruso kölöme saxit kö gunon ne aömokorot ma ixo kubus ölölös abo xexedu urungan kö xönö iaa.

25 Xö luono dömön, Pol me Sailas toxo seseseng ma toxo sösö mabo sinö urungan te God, mabo nangadi xabise nang toxo kut dik idi, toxo ölangen idu.

26 Ma saxit mon a gie raxin ixo ot ma ixo ögigie ina gunon ne aömokorot. Mabo marama xirip toxo tamasawang mabo xinubus lölös se idi xirip toxo tawalas.

27 A tödi möxö winawara wi a gunon ne aömokorot ixo laran ma ixo pere abo marama möxö gunon ne aömokorot ixoro tamasawang, ma ixo döxömen bara abo tödi kölöme tere ulo rup. Io, ixo sat ösu a sele ma ulik bara irabo se öbaling ine.

28 Inexalik, Pol ixo kup, "U bele sese öbaling nöngön! Mem kirip angen na!"

29 A tödi möxö winawara wi a gunon ne aömokorot ixo kup ulamun te bibio. Ine ixo ulo laxa ma ixo subu ma dinedee mesila re Pol me Sailas.

30 Io, ine ixo lamus ösu idu ma ixo ose idu, "Nine tödi raxin, a lasa arabo mana pet ta xikip a to runon?"

<sup>31</sup> Idu toxo balu bira, “Örobo nunu xö Orong e Jisas, nang e God irabo öro nöngön, nöngön arixe me idi niang kö gunon te nöngön.”

<sup>32</sup> Io, idu toxo tengen a tinenge xö Orong urungan te ine ma urungan te idi xirip bölök nang kö gunon te ine.

<sup>33</sup> Xina axana bung iat kö dömön, a tödi möxö winawara wi a gunon ne aömokorot ixo lamus lo idu ma ixo tos abo ruxuruk ke idu. Me idi barama xirip kö gunon tine, toxo kip baptais.

<sup>34</sup> A tödi möxö winawara wi a gunon ne aömokorot ixo lamus öläxa idu xö gunon te ine ma ixo tabaa idu ma nien. Ine ixo wöwö ma axanan, möxösa, idiet barama toxoro nunu re God.

<sup>35</sup> Xö puxu abo tene warkurai toxo uguran abo duöng tinörön te idi uruso xö tödi möxö winawara wi a gunon ne aömokorot ma a tinenge bira, “Ölanglanga ösu ina nine tödi niang.”

<sup>36</sup> A tödi möxö winawara wi a gunon ne aömokorot ixo tengen te Pol, “Abo duöng möxö tene warkurai te tile a tinenge bara e ra ölanglanga ösu e mu. Na mu mo eöt ta nuan. Mu moro wan ma bala malum.”

<sup>37</sup> Inexalik, e Pol ixo tengen köbo duöng tinörön, “Idi toxo dangdangat e maa xö wawara xö nangadi ma kaim kö ölangen ödeek bang a tinenge re maa. Idi toxo tewe öläxa e maa xö gunon ne aömokorot. Inexalik maa me kip ese bara a nine Rom e maa. Ma na idi te eka irewe ömalus e maa? I kebeöt iat! Idi iat tabo mana wanot ma tabo lamus ösu e maa.”

<sup>38</sup> Abo duöng tinörön toxo tengen ina tinenge xöbo tene warkurai, ma nang idi toxo ölangen bara e Pol me Sailas idu mee Rom, idi toxo buut.

<sup>39</sup> Idi toxo wanot ma toxo wöwörö ma malum urungan te idu, ma toxo wan su arixe midu xalik a gunon ne aömokorot. Ma toxo seng idu ra nuan kalik a lagunon taxin niang.

<sup>40</sup> Ma nang e Pol me Sailas toxo wan su xalik a gunon ne aömokorot, idu toxo wan laxa uruso xö gunon te Lidia. Me idu toxo xisixis singan bang ma toxo esuo mabo Kristien ma toxo öxaxat idi. Io, idu toxo wan lo im.

## 17

### *Pol tuso Tesalonika*

<sup>1</sup> Io, nang idu toxo wan saxit kaluluonin Ampipolis me Apolonia idu toxo wanot Tesalonika. Ma a gunon ne sineseng ke idi abo Judeia nangen niang.

<sup>2</sup> Pol ixo laxa xö gunon ne sineseng xarnang ine ibo bibie. Ma kölöme xö narun ne bung Sabat ine ixo rengrenge ödöxömen idi ma tinenge re God.

<sup>3</sup> Ine ixo palas ömaras a unine tinenge re God i tengen bira, ina Mesaia irabo uruoxe a kinadik ma irabo taru baling kalik a minet. Ixo tengen, "Ina tödi na, e Jisas, e rengrenge te mum, ine a Mesaia."

<sup>4</sup> Dauleng mere idi abo Judeia, idi toxo dödöm köba xö tinenge re Pol ma toxo nunu bara i turunon, io, toxo muu idu me Sailas. Ma oleleng ne balixilik tataxin arixe mabo Grik, nang idi toxobo lolotu re God, toxo pet bölök bira.

<sup>5</sup> Inexalik, bara abo Judeia toxo bala kadik sik ke Pol me Sailas, io, toxo lamus lo abo duöng saban möxö xönö möxö misik. Idi toxo lamus etok idi ma toxo pet ot a angat taxin kina lagunon taxin. Idi toxo ulo laxa xö gunon te Jeson ta winara rue Pol me Sailas sua lalamus ösu idu urungan kö limine a marakörö.

<sup>6</sup> Inexalik, bara kaim idi xo werwere lo idu, toxo ösat lo e Jeson mabo Kristien kabise uruso xöbo sisila möxö lagunon taxin, me idi toxo xukup bira, "Inabo duöng na nang toxobo wewet a sasaban ta xö öxöno lagunon kirip, idi ia tere wanot.

<sup>7</sup> Me Jeson ixo öga ölaxa idi urungan kö gunon te ine. Idi takara muu eörin a warkurai te Kaisar, a king taxin mee Rom. Idi tobo rengrenge bara önga king kabise angen, a esene e Jisas."

<sup>8</sup> Ma nang idi abo sisila möxö lagunon taxin ma marakörö toxo ölangen ina tinenge bira, idi toxo bala kadik köba.

<sup>9</sup> Io, idi toxo tengen te Jeson ma önga uleng ka wewet te kunubus bara kaim pe bala kadik bira irabo ot baling. Io, idi toxo ölanglanga rewe idi.

### *Pol tuso Beria*

<sup>10</sup> Nang iat mon ixo dömön, abo Kristien toxo uguran tewe e Pol me Sailas uruso Beria. Xö inot tuso, idu toxo wan uruso xö gunon ne sineseng köbo Judeia.

<sup>11</sup> Abo Beria idi a lak deek xöba idi xöbo Tesalonika xö dinödöm pe idi. Idi toxo kip a tinenge re God ma maaaa raxin ma axanan, ma toxobo werwere abo tinenge re God köbo bungbung kirip pua werwere bere Pol i rengrenge a turunon.

<sup>12</sup> Ma oleleng köbo Judeia toxo nunu. Ma bie bölök kö oleleng ne körö ma balixilik tataxin mee Grik, toxo ölangen ma toxo nunu.

<sup>13</sup> Io, abo Judeia nuso Tesalonika toxo ölangen bere Pol ixo etöngösen ma tinenge re God tuso Beria, idi toxo wan bölök urungan ma toxo ögarin a dinödöm kö marakörö ma toxo öraru a tiip kö balana idi.



<sup>14</sup> Io, abo Kristien toxo tile wasaxirin e Pol uri xö löxön, inexalik bere Sailas me Timoti toxo xisixis baling Beria.

<sup>15</sup> Abo duöng nang toxo wan arixe me Pol, me idi toxo wan arixe me ine uruso Aten. Idi toxo tawuxus baling ma tinenge rua rengrengen te Sailas me Timoti bara idu tabo pasaxit ot urungan tine.

### *Pol tuso Aten*

<sup>16</sup> Io, nang e Pol ixo xixiset lamun idu rusu Aten, ine ixo tapunuk köba nang ixo pere bara a lagunon taxin ixo wöwö mabo perewuo.

<sup>17</sup> Io, ma nang kölöme xö gunon ne sineseng köbo Judeia ine ixo tengen ödöxömen abo Judeia arixe mabo Grik nang tobo lolotu re God. Ma xöbo bungbung kirip kö xönö möxö misik, ma ixobo rengreng rö idi nang toxobo önan ot ma toxobo xisixis singan ee.

<sup>18</sup> A uleng ne tene ausu ewe nang tobo mumuu a dödöxömen möxö Epikurian me idi nang kö Stoik, toxo urulo a agot ma tinenge arixe me ine. Ulang ke idi toxo eose bira, "Ina baulang na i rengrengen a sa?" Ma uleng kabise toxo tengen, "I wawara bara ine i rengrengen ot abo god möxö boxönö xabise." Idi toxo tengen bira, möxösa, e Pol ixo rengrengen ot a tinenge maras lamun e Jisas ma ina tinaru baling kalik a minet.

<sup>19</sup> Io, toxo lamus ine lamun a kinis etok köbo kansel, tobo rengrengen ma Ariopagas. Ma toxo ose ine bira, "I eöt bara mem marabo ösöxö a lasanene ina ausu maxat na u wewet?"

<sup>20</sup> Nöngön u isik ot önga bo lalaa maxat nang i xabise xö ölöngö re mem, io, mem me mamaa ra ösöxö a unine."

<sup>21</sup> (Nangadi xirip mee Aten ma duöng möxöbo lagunon kabise nang toxobo xisixis singan, tokoxobo wewet tebo lalaa. Inexalik idi te balan ma tinenge nana ma ra ölangen nanin abo mangana inausu maxat.)

<sup>22</sup> Io, Pol ixo tuu lömö xö kinis etok möxöbo Ariopagas ma ixo tengen, "Nangadi mee Aten! E pere bara xöbo ngas kirip mum mo muu eörin abo tatalien ne lotu re mum.

<sup>23</sup> E tengen bira, möxösa, nang e xo önan nana, e xo pere muu ödeek abo lalaa möxö lotu. E xo pere wösöt a alta ma öxöno tinenge toxo geet bira, 'Urungan kö önga god nang ire tekobo ösöxö ine.' Io, ina laa na nang mum kobo ösöxö ine me mum mo lolotu tataun wösöt ine, na im e rabo tengen te mum.

<sup>24</sup> "A God nang ixo pet a öxöno lagunon mabo lalaa xirip könan, ine a Orong möxö balana kubu ma öxöno lagunon. Me ine i kara kis kö gunon lotu nang a tödi mon i pet.

<sup>25</sup> Ine i kara sasaxan bara irabo to xö limine a nangadi lamun te laa, möxösa, ine iat ibo tabaa a nangadi xirip ma to ma xiki ra xikip mamas mabo lalaa xirip.

<sup>26</sup> Kö önga tödi xalik mon, God ixo pet ot a bung marapun kirip kö öxöno lagunon. Ma ixo uxis idi xö boxönö xirip möxö öxöno lagunon. Me ine iat ixo pingit sik a axana bung ke idi ra kinis ma xönö idi tabo kis könan.

<sup>27</sup> God ixo pet bira, bara a nangadi tabo wawara siwin ine ma nagut tabo sasanga rö ine ma tabo pere wösöt gut ine, ma lamun ine i kobo kis kö palaa sik kalik a öngöng ke ire.

<sup>28</sup> I xarnang a öng i tengen, 'Kölöme re ine, ire te kip a to, ma te mamagi nana me ire te kis.' I xarnang bölök a uleng ke mum iat a nangadi nanase toxo geet ma toxo tengen, 'Ire abo baroxorok ke ine.'

<sup>29</sup> "Io nang, ire abo baroxorok ke God ire takarabo döxömen bara God ine i eöt ma perewuo ma gol bara siliwa bara a warawat, nang a nangadi te tön ma nanase re idi.

<sup>30</sup> Mesila God ixo pere tataunin inabo tatalien ne baulang, inexalik bara na ine i tengen kö nangadi xö boxönö xirip pua dinödöm puxus.

<sup>31</sup> Ine ixo tengen bira, möxösa, ine iri kubus a bung nang ine irabo kure a öxöno lagunon ma tatalien töxödös, ma irabo isik a tinörön na xö tödi ine iat ixo pere kos lo bara irabo pet. Me God ixo öturunon urungan kö marakörö bara irabo pet bira, nang ixo öraru ina tödi xalik a minet."

<sup>32</sup> Ma nang idi toxo ölangen a tinenge lamun a tinaru xalik a minet, dauleng ke idi toxo eösaxit, ma lamun a uleng toxo tengen, "Mem me maaaa rua ölangen öbaling a tinenge re nöngön kö inabo lalaa niang."

<sup>33</sup> Io, Pol ixo wan lo meringan kalik idi.

<sup>34</sup> Inexalik a uleng ne duöng toxo muu e Pol toxo kip a tinenge ma toxo nunu. Kaluluonin idi e Daionisias, a öng möxöbo Ariopagas kansel, ma kölöme ridi bölök a önga une esene e Damaris ma önga bo nangadi bölök.

## 18

### *Pol tuso Korin*

<sup>1</sup> Melamu im, Pol ixo wan lo xalik e Aten ma ixo wan uruso Korin.

<sup>2</sup> Ma rö, ixo esuo ma önga tödi Judeia, a esene e Akuila. Me ine mee Pontus. Ma ixo mana wanot mon mee Itali arixe ma usuono e Pirusila, möxösa, e Kolodias, a king taxin mee Rom, ixo tile rewe xirip abo Judeia nang tobo xisixis Rom. Me Pol ixo wan ta werwere idu.

<sup>3</sup> Ma ixo xisixis arixe midu, möxösa, ine möxö ina mangana tinörön xarnang idu. Me idiet toxo rörörön arixe rua pet gunon walpali ne lewene bulmakau.

<sup>4</sup> Xöbo Sabat kirip, ine ixobo rengrengren ödöxömen idi kölöme xö gunon ne sineseng köbo Judeia, ma ixobo ösat a dinödöm pe idi abo Grik mabo Judeia rua nunu xö tinenge re ine.

<sup>5</sup> Io, nang e Sailas me Timoti toxo wanot mee Masedonia, Pol ixo balan sik ma palas tinenge xalik mon. Me ine ixo tengen palas ömaras idi abo Judeia bere Jisas ine a Mesaia.

<sup>6</sup> Inexalik bara abo Judeia toxo mölök ka ölangen a tinenge re ine ma toxo tengen ögarin ine. Io, ine ixo se rewe a kabus xalik a man te ine ra osen bara i kobo ösöxö idi ma ixo tengen, "Nang bere God irabo ömaso e mum, a unine tinenge iat te mum! E iat e langlanga sik kalik e mum. Urulo na, e rabo wan urungan te idi nang kaim bara abo Judeia."

<sup>7</sup> Io, Pol ixo wan lie a gunon ne sineseng köbo Judeia ma ixo wan urungan kö gunon kö tödi a esene e Titius Jastus, a tene lotu re God. Ma gunon te ine i lörörö sik kö gunon ne sineseng.

<sup>8</sup> Krispus, a tene sisila möxö gunon ne sineseng ke idi abo Judeia, ine mabo barama re ine toxo nunu xö Orong. Ma oleleng ne nangadi mee Korin ewe nang toxo ölangen ina tinenge na, toxo nunu ma toxo kip baptais.

<sup>9</sup> Önga dömön, e Pol ixo pere a winawara nang a Orong ixo wöwörö rine ma ixo tengen, "U bele bubuut. Örobo mana wöwörö iat ma u bele xisixis ödödö."

<sup>10</sup> Möxö e xisixis arixe me nöngön. Kawaim pe tödi irabo se ma ögarin nöngön, möxösa, e ma oleleng ne nangadi nang tobo nunu re e ra xina lagunon taxin na."

<sup>11</sup> Io, Pol ixo kis bang kingan kö önga awat ma subana, ma ixo usu idi ma tinenge re God.

<sup>12</sup> Nang e Galio ixo tödi raxin mee Akaia, abo Judeia toxo tuu etok ma toxo ögarin e Pol, ma toxo lamus ölaxa ine urungan kö xönö möxö pet warkurai.

<sup>13</sup> Io, idi toxo tengen, "Ina tödi na i ödöxömen a nangadi rua lotu wösöt e God kö mangana ngas nang i kobo muu a warkurai mee Rom."

<sup>14</sup> Io, bere e Pol ixo eka winöwörö, Galio ixo tengen köbo Judeia bira, "Nang bara ina tödi na i lexe a warkurai bara i pet te mangana magingin saban arixe, io, irabo deek ke e ra ölangen e mum abo Judeia.

<sup>15</sup> Inexalik bara abo aose lamun abo tinenge mabo ese mabo warkurai te mum iat. Io, mum iat moro ötöxödös ina

tiip na. E kobo mamaa bara arabo pet warkurai lamun a mangana laa bira.”

<sup>16</sup> Io, ine ixo bat tewe idi xalik a xönö möxö pet warkurai.

<sup>17</sup> Io, idi toxo tödik lo e Sostenis, a tene sisila möxö gunon ne sineseng möxöbo Judeia ma toxo dangat ine mesila xö xönö möxö pet warkurai. Ma lamun e Galio kaim kö niniang muu inabo lalaa nang idi toxo wewet.

*Pol ixo urulo a narun ne inuan te ine*

<sup>18</sup> Io, Pol ixo xisixis bang kingan Korin kö dauleng ne bung. Melamu ixo wan lie abo Kristien ma ixo kakaa xö mön u Siria arixe me Pisisila me Akuila. Nang mesila rine ra kinaa xö mön, toxo köröp a bebene öxöno ringan Senkiria, möxösa, lamun a kunubus ine ixo pet arixin me God

<sup>19</sup> Idi toxo wanot Epeses me Pol ixo wan lie e Pisisila me Akuila ringan. Me ine ixo wan laxa xö gunon ne sineseng ma ixo tengen ödöxömen idi abo Judeia.

<sup>20</sup> Ma nang idi toxo ose ine rua kinis bang arixe me idi, inexalik ine ixo mölök.

<sup>21</sup> Ma lamun nang ine ixo önan lie idi, ixo tengen te idi bira, “E rabo tawuxus baling nang bara xö mamaa re God iat.” Io, ine ixo kakaa xö mön ma ixo wan lie e Epeses.

<sup>22</sup> Ma nang ixo wanot Kaisaria, ine ixo wan kaa uruso Jerusalem ma ixo pere lo bang a marakörö ne lotu ma melamu ixo wan su u Entiok.

<sup>23</sup> Melamu xö kinis se ine ringan Entiok, Pol ixo wan lo meringan ma ixo wan laxa nana xö boxönö xirip kölöme re provins Galesia ma distrik Pirigia, ma ixo ölölös nanin abo tene tinam kirip pe Jisas.

*A atöngösen lölös se Apolos*

<sup>24</sup> Önga Judeia a esene e Apolos, me ine mee Aleksendria ixo wanot Epeses. Ine a tene nanase ma ixo maras kirip sik kö tinenge re God nang tere geet.

<sup>25</sup> Ine ixo kip ausu xö ngas kö Orong, me ine ixo palas tinenge ma lölös ma ixo eusu ma tinenge turunon te Jisas. Inexalik bara i ösöxö sik kalik a tinörön ne baptais se Jon.

<sup>26</sup> Ine ixo urulo ra tinenge ma kawaim pa binuut kö gunon ne sineseng köbo Judeia. Nang e Pisisila me Akuila toxo ölangen ine, idu toxo lamus ine urungan kö gunon te idu, me idu toxo palas ödeek tabaa ine ma ngas se God.

<sup>27</sup> Io, nang e Apolos ixo mamaa rua nuan urungan Akaia, abo Kristien nang Epeses toxo öxaxat ine. Idi toxo gegeet urungan köbo tene tinam pingan Akaia ra ömaraxen lo ine. Xö nuanot tine, ine ixo top ewe midi nang e God ixo tabaa tataunin idi ma abalamu rua nunu.

<sup>28</sup> Ma ixo top idi bira: ixo kawönö inabo tinenge möxöbo Judeia ma a lölös ne tinenge ne eöngat kö wawara xö nangadi. Meruso kölöme xöbo tinenge re God nang toxo geet, Apolos ixo öturunon bara Jisas ine a Mesaia.

## 19

### *Pol tuso Epeses*

<sup>1</sup> Nang e Apolos ixo xisixis Korin, Pol ixo muu a ngas i wan köröp kö öxöno raxin ma ixo wanot Epeses. Ma ringan ixo wanot pösöt abo tene tinam pe Jisas.

<sup>2</sup> Ma ixo ose idi, "Mum moxo kip a Töxödös ne Tanono nang mum moxo nunu?"

Idi toxo balu, "Kawaim, mem kaim kö ölangen bang bara re Töxödös ne Tanono i nangen."

<sup>3</sup> Io, Pol ixo ose bara, "Nang bara i biringan, a baptais sa iang mum moxo kip?"

Idi toxo balu, "A baptais nang ke Jon."

<sup>4</sup> Me Pol ixo tengen, "A baptais nang ke Jon a baptais möxö dinödöm puxus mon. Ma ixo tengen te idi ra nunu xö öng nang irabo wanot melamu re ine, ine e Jisas."

<sup>5</sup> Bere idi toxo ölangen ina na, idi toxo kip baptais kö esene a Orong e Jisas.

<sup>6</sup> Ma nang e Pol ixo bulus a limine lömö ridi, a Töxödös ne Tanono ixo wan su urungan tidi, me idi toxo rengrenge mabo tinenge xabise me idi toxo palas tinenge xarnang abo propet.

<sup>7</sup> Ma ixo eöt ma sangaun ma ninöng ne duöng suxurno xirip.

<sup>8</sup> Pol ibo önan laxa xö gunon ne sineseng köbo Judeia ma ibo rengrenge ringan ma kaim pe binuut eöt ma narun ne texe. Ma ixo egot ma ixo sat abo dinödöm pidi ulamun a kingdom kö God.

<sup>9</sup> Inexalik bara dauleng ke idi toxo ölölös a baladi ma toxo mölök bara tabo nunu. Me idi toxo tengen ögarin a Ngas nang kö Orong kö wawara xö marakörö. Io, Pol ixo wan lie idi ma ixo lamus lo abo tene tinam pe Jisas, me idi tobo wöwörö xöbo bungbung kirip kölöme xö gunon ausu re Tiranus.

<sup>10</sup> Idi toxo wewet bira i eöt ma nine awat, io, abo Judeia mabo Grik kirip ewe nang toxo xisixis kö provins Esia toxo ölangen a tinenge xö Orong.

<sup>11</sup> God ixo pet abo mangana lalaa lölös ne auwuwus saxit kölöme xö tinörön te Pol.

<sup>12</sup> Io, ma boxönö subana man nang e Pol ibo sisige, idi tobo xikip lo urungan köbo miniset, me idi tobo sigii ma tobo langlanga, mabo tano saban tobo önan su xalik idi.

<sup>13</sup> A dauleng ne Judeia, ewe idi toxo önan nana ma toxo iiwes nanin abo tano saban, idi tobo maaaa rua rengrengen a esene Jisas a Orong kua iiwes abo tano saban nang ibo rutup pidi. Idi tobo rengrengen bira, "Xö esene Jisas nang e Pol ibo rengrengen, e tengen te nöngön bara örö wan su."

<sup>14</sup> A pitnö ma ninöng ne barok ke Sewa, a pris taxin mee Judeia, idi tobo wewet ina na.

<sup>15</sup> Önga bung, önga tano saban ixo ose idi bira, "E ösöxö ewe e Jisas me e re maras lamun e Pol, nexalik bara ewenene e mum?"

<sup>16</sup> Io, a tödi ewe nang a tano saban ixo tup pine ixo kos kaa lömö ridi ma ixo se ögarin idi. Idi toxo ulu rup kalik a gunon tine ma belbele ma ruxuruk kö aine idi.

<sup>17</sup> Nang abo Judeia mabo Grik meringan Epeses toxo see lo ina tinenge, a binuut taxin ixo kip idi me idi toxo ii öraxin a esene Jisas a Orong.

<sup>18</sup> Ma oleleng ke idi nang ewe idi toxo nunu, toxo wanot ma toxo tengen ösu abo magingin saban te idi xö wawara re idi a nangadi.

<sup>19</sup> Io, ma oleleng ewe idi nang tobo wewet sewuk, toxo kip etok abo ginigeet möxöbo tinenge re idi ma toxo söngöt kö ia xö wawara xö nangadi nang toxo ot. Ma nang toxo kos arixin a xinixun möxö nang, ixo eöt ma pitnö ne sangaun ne arip ne tuluwok ne siliwa.

<sup>20</sup> Io, xö ina ngas na, a tinenge xö Orong ixo wan esexere xirip ma ixo ot arixe ma lölös.

<sup>21</sup> Melamu xinabo lalaa nang ixo wanot, a Töxödös ne Tanono ixo silien e Pol kö dinödöm rua nuan urungan Jerusalem. Me ine ixo wan kaluluonin e Masedonia me Akaia. Me Pol ixo tengen, "Melamu xö inot te e ringan, e rabo mana uxileng e Rom bölök."

<sup>22</sup> Ine ixo tile a nine tene rorop pine, e Timoti me Erastus urungan Masedonia. Me ine ixo xisixis bang im pingan kö provins Esia.

### *A tiip taxin tiso Epeses*

<sup>23</sup> Xö ina axana bung a tiip taxin ixo wanot lamun a Ngas kö Orong.

<sup>24</sup> Ma önga tene pet laa ma siliwa, a esene e Demitirius. Ine ibo rörörön ma siliwa rua wewet puo abo perewuo lixilik xarnang a gunon lotu re god une e Atemas. Ma tinörön te ine ibo wewet abo tene tinörön tobo xikip a tuluwok taxin.

<sup>25</sup> Me ine ixo kuwe etok abo tene tinörön te ine xirip arixe ma önga uleng nang a tinörön te idi i xarnang ke ine ma

ixo tengen bira, “A nangadi, mum mo ösöxö tuar bere ire te rörön lo a tuluwok taxin möxö inabo tinörön na.

<sup>26</sup> Me mum moxoro pere ma moxoro ölangen a lasa ina tödi na e Pol, ixo wewet. Ine i rengrengen bara inabo perewuo ewe nang a tödi i pet, i kobo god tunon arixe. Me ine iri lamus tewe a oleleng ne nangadi, ma kaim bara mera xalik Epeses, inexalik kö boxönö xirip mee provins Esia.

<sup>27</sup> Kaim bara xö tinörön te ire xalik irabo kip a ese saban, inexalik bölök bara a gunon lotu re god une e Atemas, ine nang i taxin saxit, irabo xarnang a laa tataun kö wawara xö nangadi. Ma ewe nang a nangadi xirip mee provins Esia ma öxöno lagunon tobo lolotu rine, ma na tabo ii ölik ine.”

<sup>28</sup> Io, nang idi toxo ölangen ina tinenge, idi toxo laie xöba ma toxo urulo ra kinup bara, “Atemas mera Epeses, a lak taxin saxit ine!”

<sup>29</sup> Ma kaim kö ömat mon ma kinup taxin ixo wan esexere xirip kö lagunon taxin. A nangadi toxo töndik lo e Gaius me Aristarkus, a nine tödi Masedonia, ewe tobo önan arixe me Pol. Me idi toxo ewasak laxa arixe urungan kö xönö möxö aluon.

<sup>30</sup> E Pol ixo maaaa rua tinuu mesila xö marakörö, inexalik bara abo tene tinam möxö lotu kaim kö ömaraxen ine.

<sup>31</sup> A dauleng ne tödi raxin möxö ina provins, ewe abo ais se Pol, toxo tile tinenge rine ma toxo seng ine bara ganim ine ra nilaxa urungan kölöme xö xönö möxö nuan etok.

<sup>32</sup> A marakörö niang toxo ot, idi toxo ngangao esexere. A uleng toxo xukup lamun önga lalaa, ma uleng lamun a önga laa xabise. Ma oleleng ke idi kaim iat ta ösöxö rösa bere idi toxo ot etok kingan.

<sup>33</sup> Abo Judeia toxo sumen e Aleksenda urungan mesila xö marakörö, ma dauleng toxo döxömen bere ine iat mon. Io, ine ixo sasanga kaa ma limine rö idi rua ödödö, möxö ixo maaaa rua tinenge maras urungan te idi.

<sup>34</sup> Inexalik nang idi toxo perexulen bere ine a Judeia, idi toxo kup arixe ma önga mangana kinup kalik mon bara, “Atemas nang mera Epeses, a lak taxin saxit ine!” Me idi toxo kup ömat a ulik bie.

<sup>35</sup> Io, a kansel möxö lagunon taxin ixo tenge lölös sik kö marakörö me idi toxo kis ödödö. Ma ixo tengen, “Duöng mera Epeses, abo marakörö xirip mera xö öxöno lagunon te ösöxö bara lagunon taxin Epeses ibo werwere muu a gunon lotu re god une Atemas, ine nang i taxin saxit, ma a malalar te ine nang ixo subu su meriso xö balana kubu!

<sup>36</sup> Kawaim pe öng irabo töxö xö ina turunon, io, mum morobo mana kis ödödö ma ganim e mum pa örraran tua wewet tebo lalaa.

<sup>37</sup> Mum moxo lamus ot inabo tödi na ura, inexalik bara kawaim idu ra wulwulo rebo gunon lotu ma kaim idu ra wewet tebo tinenge saban lamun a god une re ire.

<sup>38</sup> Io, nang bere Demitirius mabo tene tinörön te ine te bala kadik lamun te öng, abo gunon ne warkurai i tamasawang sik kua pet warkurai ma a tene pet warkurai nangen. Ma i eöt bara idi tabo osen ot kö malmalan abo lalaa nang idi te epuk nana min.

<sup>39</sup> Ma nang bara re laa angen bang mum mo mamaa rua tinenge min, io, morobo ötöxödös kö kinis etok i eöt mabo warkurai te ire.

<sup>40</sup> E tengen bira re mum, möxösa, ire te eöt ta xixip pe sasaban taxin lamun a tiip nang i wanot nixinen, möxösa, kaim pe unine möxönan. Ma nang tabo ose ire bara a lasa a unine tinuu arixe re ire ma kinup taxin nana, ire tekebeöt ta babalu re tinenge.”

<sup>41</sup> Io, nang ine ixo tengen sik bira, ixo tile elixilixin ina marakörö nang toxo kis etok.

## 20

### *Pol tuso Masedonia me Gris*

<sup>1</sup> Nang ina tiip möxö kinup taxin ixo kawöm, Pol ixo erile lamun abo tene tinam pe Jisas. Ma nang ine ixo öxaxat idi ixo tön lime arixe me idi ma ixo taru lo ra nuan u Masedonia.

<sup>2</sup> Ine ixo önan nana kölöme xinabo xönö, ma ixo öxaxat nanin a nangadi, ot nang ixo wanot Gris.

<sup>3</sup> Ma ixo xisixis singan kö narun ne texe. Mabo Judeia toxo epingit tua sese ine xö axana bung ixo mamaa rua kinaa xö mön u Siria, io, ixo döxömen bara irabo tawuxus baling kaluluonin a provins Masedonia.

<sup>4</sup> Ma inabo duöng na nang toxo wan arixe me ine, e Sopate a barok ke Pirus mee Beria, e Aristarkus me Sekundus idu mee Tesalonika, e Gaius me Timoti idu mee Derbe, me Tikikus me Toropimus meruso xö provins Esia.

<sup>5</sup> Inabo duöng na toxo wan sila ma toxo kis xiset e maa ro Toroas.

<sup>6</sup> Inexalik, maa moxo kakaa xö mön mee Pilipai, melamu xö Nien möxö Beret nang Kaim Is Könan. Ma malamau xö pitnö ne bung maa moxo wanot pösöt idi ro Toroas. Me mem moxo kis kö pitnö ma ninöng ne bung kingan.

### *Pol ixo öro e Jutikus so Toroas*

<sup>7</sup> Kö sisila ne bung kö wik, mem moxo wanot etok kua pidik a beret.\* Me Pol ixo wöwörö xö nangadi ot kö luono dömö, möxösa, ine ixo eka nuan kö bung malamau.

\* 20:7 Idi pet a 'holi kominio'.



<sup>8</sup> Me mem moxo kis etok kö xönö nuso lömö xö gunon. Ma oleng ne bibio ringan ee.

<sup>9</sup> Önga guama, a esene e Jutikus, ixo kis masap sik kö önga marakalanga ma ixo paluso xisixis singan nang e Pol angen ixo wöwörö. Nang ixo paliso metmerim, ixo subu su meriso lömö saxit uri xö pu xina xönö ma toxo rarik lo ine ma ixoro met.

<sup>10</sup> Io, Pol ixo wan su ma ixo maru lömö xö ina guama ma ixo pama ine. Io, ixo tengen, "Ganim e mum pa binuut. Iri to!"

<sup>11</sup> Io, Pol ixo wan kaa baling uruso lömö xö gunon ma ixo pidik a beret ma ixo en arixe mabo tene nunu. Ine ixo wöwörö ömat tö idi ot nang a xaken ixo wan kaa, io, ixo wan lo im.

<sup>12</sup> A nangadi toxo lamus lo ina guama nang ixo to baling urungan kö gunon te ine, ma ina laa na ixo öxaxat idi.

*Pol ixo wöwörö xöbo sisila ne lotu mee Epeses*

<sup>13</sup> Io, mem moxo wan sila xö mön me mem moxo ösö Asos, rua xikip basin lo e Pol meringan. Ine ixo tengen te mem pa wewet bira, möxösa, ine ixo önan kö pu.

<sup>14</sup> Ma nang ine ixo esuo me mem po Asos, mem moxo kip basin lo ine ma moxo wan u Mitilini.

<sup>15</sup> Ma xö bung kabise mem moxo wan lo meringan Mitilini ma moxo ot Kios, ma xö bung melamu mem moxo lies u Samos. Io, xö bung melamu xönan moxo ösö Miletus.

<sup>16</sup> Pol ixoro kubus a dinödöm bara irabo wan saxit Epeses, möxösa, i koxobo maaaa rua kinis ösaxit tebo bung kingan Asia, möxö ine ixo örraran uruso Jerusalem. Ma nang bara i eöt, ine i maaaa bara irabo wanot tingan kö bung möxö Pentikos.

<sup>17</sup> Io, Pol ixo erile mee Miletus urungan lamun abo duöng sisila möxö lotu Epeses.

<sup>18</sup> Ma nang idi toxo wanot ixo tengen tö idi, "Mum iat mo ösöxö sik a turunon möxö axana bung e xo xisixis me mum, urulo xö sisila ne bung e xo wanot kö provins Asia.

<sup>19</sup> A turunon bere e xo esuo ma lölös möxöbo tinenge nang abo Judeia toxo pingit ta ögarin e min. Inexalik bere e xo tön sik a tinörön kö Orong ma ginee me e xo ii ölik e.

<sup>20</sup> Mum mo ösöxö bara e kobo mölök ka palas tinenge ma rebo mangana lalaa deek nang irabo top e mum. Me e xo usu e mum kö wawara xö nangadi ma möxö önga gunon urungan kö önga gunon.

<sup>21</sup> E re wöwörö lölös köbo Judeia mabo nangadi nang kaim bara abo Judeia bara idi tabo mana dödöm puxus me idi tabo tawuxus baling urungan te God ma tabo nunu re Jisas a Orong ke ire.

22 “Ma na, a Töxödös ne Tanono i ödöxömen e bara arabo wan uruso Jerusalem me e kobo ösöxö bara a lasanene irabo ot te e ringan ee.

23 E ösöxö xalik mon bara abo lagunon niang e önan laxa xönan, a Töxödös ne Tanono ibo rengrengen te e bara a gunon ne aömokorot mabo tiip taxin i xixiset me e.

24 Inexalik bara e iat e döxömen bara a to re e i laa tataun tö e. E maaaa mon bara arabo öxawam a ililo ma tinörön niang e Jisas, a Orong, i isik ke e möxö rengrengen osen a tininge deek möxö abalamu re God.

25 “Mesila e xo wan nana kaluluon te mum me e xo palas tininge ulamun a kingdom kö God. Ma na e ösöxö bara kaim pe öng ke mum irabo pere öbaling e.

26 Io nang, e tengen te mum nixinen bara nang a öng mere mum i tup, e karabo kip pe tininge lamun ine.

27 E tengen bira, möxösa, kawaim e xo binuut tua rengrengen osen e mum abo dödöxömen kirip pe God.

28 Mum morobo mana balaure e mum iat arixe ma marakörö ne lotu xirip pe God. Idi xarnang abo sipsip niang te sasaxan lamun a köbat, ma a Töxödös ne Tanono ixo bulus e mum xarnang abo sisila ne lotu rua werwere muu idi. Io niang, mum abo köbat möxö lotu re God, nang ixo kun lo ma minet kö Barok ke ine.

29 E re ösöxö sik bara melamu nang e rabo wan lo, abo duöng saban nang abo tatalien te idi i eöt ma wuluwun akaat, idi tabo wanot kaluluonin iat e mum ma tabo pet ögarin abo marakörö ne sipsip.

30 Merebo duöng iat mon kaluluon te mum tabo taru kaa ma tabo tengen töxö rua sasat lo abo tene tinam pe Jisas sua mumuu idi.

31 Io, mum morobo ebalaure! Mum moro döxömen lo bara kaim e xo mamanaa ra ötumarang e mum köbo dömön ma xaken ixo eöt ma narun ne awat. Me e xo wewet bira xö öngöng ma nang e xobo usu e mum, a line-marang ixobo susu.

32 “Io, na im e isik tabaa e mum kö tabalana limine e God arixe ma tininge ne abalamu re ine nang i öt ta ölölös e mum ma ra ratabaa e mum ma oleleng ne lalaa deek nang e God ibo isik kö marakörö xirip nang ibo pere kos sik idi rö ine iat.

33 Me e kawaim kö maaaa lamun tebo gol ma rebo siliwa bara rebo man kalik ke öng.

34 Mum iat mum mo ösöxö bere e bo rörörön, ma ina nine limine e na ibo rorop e xo sasaxan te e arixe me idi nang toxo arixe me e.

35 Ma xöbo lalaa xirip nang e bo wewet, e bo osen te mum bara xö mangana tinörön lölös na ire tabo mana top a nangadi maris. Me ire tabo döxömen lo abo tininge re

Jisas, a Orong, nang ine iat ixo tengen bara, 'Ewe nang i erabaa, i manga deek ke ewe nang te ratabaa ine.' "

<sup>36</sup> Io, ma nang ine ixo tengen bira, ixo subun kexe arixe me idi xirip me idi toxo seseng urungan te God.

<sup>37</sup> Me idi toxo gee ma toxo pama dik e Pol, ma toxo muum ine.

<sup>38</sup> Ma a laa idi toxo manga tapunuk lamun, a tinenge re Pol bere idi tekebeöt ta werwere öbaling ine. Io, idi toxo wan arixe mine uruo xö mön.

## 21

### *Pol ixo wan urungan Jerusalem*

<sup>1</sup> Io, me mem moxo wan talu im idi, mem moxo kakaa xö mön ma moxo wan töxödös u Kos. Ma xö bung melamu mem moxo wan u Rodes ma meringan moxo ösö Patara.

<sup>2</sup> Io, mem moxo pere lo a önga mön ma ixo önan u Ponisia, io, mem moxo kakaa lo xönan ma moxo wan.

<sup>3</sup> Ma nang mem moxo pere e Saipras, mem moxo wan melamu xö lawa xö Saipras urungan Siria. Mem moxo ösö Tair, möxösa, ringan toxo maaaa rua ii ösu öngabo xinixip kalik a mön.

<sup>4</sup> Mem moxo wan ma moxo pere abo tene tinam pe Jisas meringan ma moxo kis midi xö pitnö ma ninöng ne bung. Ma a Töxödös ne Tanono ixo silien abo tene tinam pa rengrengen te Pol tua ganim pa nuan urungan Jerusalem.

<sup>5</sup> Ma lamun bara axana bung ke mem möxö kinis singan ixoro kawöm, mem moxo wan lo ma moxo wan baling kö nuan te mem. Abo tene tinam mabo balixilik kidi ma bung baroxorok kidi toxo wan arixe me mem kalik a lagunon taxin urungan löxön. Ma ringan mem moxo subun kexe ma moxo seseng.

<sup>6</sup> Io, mem moxo etön mabo lime mem, ma moxo kakaa lo xö mön. Me idi, idi toxo tawuxus baling urungan kö lagunon te idi.

<sup>7</sup> Mem moxo wan lo baling kö nuan te mem mee Tair ma moxo ösö Tolemas. Ma ringan mem moxo öga abo Kristien ma moxo kis midi xö önga bung.

<sup>8</sup> Ma xö bung kabise, mem moxo wan lo xalik idi ma moxo wanot Kaisaria. Ma moxo xisixis singan kö gunon te Pilip, a tene palas tinenge ma tinenge deek. Me ine a öng möxö pitnö ma ninöng ne duöng nang toxo pere kos lo idi mesila rua rorop a lotu.

<sup>9</sup> Me ine ma nit ne balik nang tokobo elolo, ewe nang tobo etöngösen xarnang a propet.

<sup>10</sup> Ma bara mem moxo xisixis singan kö dauleng ne bung, a önga propet a esene e Agabas ixo wan su mee Judeia.

11 Ine ixo wan su urungan te mem, ma ixo kip lo a kie re Pol. Io, ixo kut a nine limine ma nine xexene iat arixe min ma ixo tengen bira, "A Töxödös ne Tanono i tengen bira, 'Xarnang e osen nöngön, abo Judeia mee Jerusalem tabo kut lo a tamana kie na ma tabo isik ine urungan kö nangadi nang kaim bara abo Judeia.' "

12 Io, nang mem ma nangadi moxo ölangen ina na, mem moxo seng ölölös e Pol bara ine i bele wan kaa uruso Jerusalem.

13 Io, Pol ixo balu bira, "Ganim e mum pa ginee ma ra ötapunuk e! E tagur sik bara tabo kut e ma bara arabo met tiso Jerusalem lamun a esene Orong e Jisas."

14 Ma nang kaim ine ra mumuu, mem moxo mamanaa rua tinenge ma moxo tengen, "A lasa nang a Orong i mamaa bara irabo wanot, i deek bara irabo wanot."

15 Melamu xina na, mem moxo tagure abo lalaa re mem ma moxo wan lo uruso Jerusalem.

16 Ma dauleng ne tene tinam mee Kaisaria toxo wan arixe me mem ma toxo lamus e mem urungan kö gunon te Nason. Ine mee Saipras ma önga tene tinam pe Jisas mee mesila saxit.

### *Pol tuso Jerusalem*

17 Io, ma nang mem moxo wanot Jerusalem, abo Kristien meringan toxo öga e mem ma axanan.

18 Ma xö bung melamu, Pol me mem kirip moxo wan ta werwere e Jems. Mabo tene sisila xirip möxö lotu toxo kisisik kingan bölök.

19 Ma nang e Pol ixoro tön lime sik midi, ine ixo tengen ömaras idi mabo lasa e God ixo pet kölöme xö tinörön te ine urungan te idi a nangadi nang kaim bara abo Judeia.

20 Io, nang idi toxo ölangen bira, idi toxo ölet e God. Ma toxo tengen te Pol bira, "Tönö e mem, nöngön u ösöxö bara oleleng ne arip ne Judeia idi te nunu me idi te gaas bölök ka mumuu abo warkurai te Moses.

21 Inexalik bere idi tere see lo bara u bo usu abo Judeia niang ewe idi tobo xisixis kaluluon kö nangadi nang kaim bara abo Judeia bere idi tabo tuu talu abo warkurai te Moses, ma bara u bo rengrengen köbo Judeia bara ganim idi rua xurxuru a lewene aine a bung baroxorok ke idi ma ganim idi rua mumuu abo tatalien te ire.

22 Io, ire tabo perim a sa? Me idi tabo ösöxö lo bere nöngön uru wanot.

23 Io inexalik, örö mana pet a lasa nang mem marabo tengen te nöngön. Me mem ma nit ne tödi ra, nang a öngöng ke idi ixo pet a kunubus sine arixe me God.

<sup>24</sup> Örö mana lamus lo idi ma örö laxa midî xöbo laa niang idi tabo mana pet tua eöt ma warkurai te Moses bere idi tabo langlanga xö wawara re God. Ma örobo kun abo bebene öxöno idi nang tabo kuu. Io, biringan, a nangadi tabo ösöxö bara kaim pe turunon möxö tinenge niang idi toxo ölangen lamun e nöngön, inexalik bere nöngön iat u mumuu abo warkurai te Moses.

<sup>25</sup> Ma urungan köbo tene nunu nang kaim bara abo Judeia, mem mere tile a ginigeet urungan tö idi. Me mem me tengen ömaras idi bere mem me ot kö önga dinödöm bara, ganim idi ra enen a nien ne arabaa nang te erabaa min urungan kö perewuo, ma ganim idi rua enen a nien arixe ma dee, bara a gineme nang tobo kut ömet, ma ganim idi rua wewet magingin saban möxö minaru arixe."

<sup>26</sup> Io, xö bung kabise e Pol ixo lamus lo inabo duöng ma ixo laxa midî xina tatalien niang tabo wewet bere ine midî tabo langlanga xö wawara re God. Io, Pol ixo laxa xö gunon ne lotu raxin tua rengrengen ömaras a nangadi ulamun ina nit ne tödi, bara lause ina wewet ölanglanga möxö kunubus se idi irabo kawöm, ma bung sa tabo isik a arabaa re idi a öngöng.

*Toxo mamaa rua sesexomet e Pol*

<sup>27</sup> Io, nang a pitnö ma ninöng ne bung ixoro lörörö ra sinaxit, a dauleng ne Judeia möxö provins Esia toxo pere e Pol kö gunon ne lotu raxin. Idi toxo örarik a balana marakörö rua laie ra rörön dik ine.

<sup>28</sup> Me idi toxo xukup bira, "Marakörö mee Israel, moro top e mem! Ina tödi na ibo usu abo marakörö xirip kö öxöno lagunon bere idi tabo tengen ögarin a nangadi re ire abo Judeia ma a warkurai ma gunon ne lotu raxin te ire. Ma önga laa bölok, ine iri lamus ölaxa a dauleng ne Grik urungan kölöme xö xönö möxö gunon ne lotu raxin ma iri öbiling ina xönö na nang i madakdak kö wawara re God."

<sup>29</sup> (Io, idi toxo tengen bira, möxösa, mesila idi toxo pere e Toropimus mee Epeses singan kö lagunon taxin arixe me Pol. Me idi toxo döxömen bere Pol ixo lamus ölaxa ine urungan kö gunon lotu raxin.)

<sup>30</sup> Io, oleleng ne marakörö saxit meringan kö lagunon taxin toxo kup nana, ma toxo ululo ot etok möxöbo xönö xirip. Idi toxo töndik lo e Pol ma toxo ösat ösu lo ine meringan kö gunon ne lotu raxin ma saxit iat mon toxo baxut abo marame.

<sup>31</sup> Ma nang idi toxo mamaa rua sesexomet ine, a tinenge ixo wanot pösöt a sisila möxöbo umri mee Rom bara abo marakörö möxö lagunon taxin Jerusalem te eöngat ma te wewet a tiip taxin.

<sup>32</sup> Ine ixo saxit mon ma ixo lamus lo önga bo umri ma önga bo umri rataxin ma toxo ulo su uri xö marakörö. Ma nang ina marakörö niang toxo pere ina sisila mabo umri rine, idi toxo mamanaa ra sese e Pol.

<sup>33</sup> A sisila ne umri ixo wanot ma ixo öxös lo e Pol ma ixo isik a tinenge lölös bara ta kut ine ma nine uno lölös saxit. Io, ixo ose bara ewe ine ma i pet a lasa.

<sup>34</sup> A dauleng ne marakörö toxo xukup ma önga laa, ma uleng iat toxo xukup ma öng kabise. Ma nang ixo kebeöt tine rua ösöxö a turunon kalik ina marakörö nang toxo eengat, ine ixo isik a tinenge lölös köbo umri rine ra lalamus lo e Pol urungan kölöme xö bang ke idi.

<sup>35</sup> Ma bara nang e Pol ixo wanot kö nuan kaa möxö ina xönö, dauleng ne umri toxo kip ine lömö xalik abo marakörö tobo maaaa rua arase mine.

<sup>36</sup> Ma a marakörö nang toxo mumuu nana, idi toxo xukup nana bara, "Moro sexomet ine!"

### *Pol ixo wöwörö urungan kö marakörö raxin*

<sup>37</sup> Ma nang abo umri toxo maaaa rua xikip ölaxa ine xö bang ke idi, e Pol ixo ose a sisila möxöbo umri bara, "I öt bara ara tengen te laa re nöngön?"

Io, ine ixo balu e Pol bira, "Me nöngön u bo wöwörö me Grik!"

<sup>38</sup> Io, kaim bere nöngön a Isip niang ixo urulo a inarese kaluluon kö marakörö ma ixo silien a nit ne arip ne duöng nang toxo erese xö xönö tataun mesila saxit?"

<sup>39</sup> Pol ixo balu, "E a Judeia mee Tasas niang Silisia, a lagunon taxin te e ma ese raxin. Maris, öro ganim e, ara wöwörö bang kö nangadi."

<sup>40</sup> Io, nang a sisila ne umri ixo aut lo xö tinenge rine, Pol ixo tuu kaa xö xönö möxö nuan kaa xö gunon ma ixo ööt urungan kö marakörö. Ma nang idi xirip toxo ödödö, ine ixo tenge ridi xö tinenge ridi iat abo Judeia bira:

## 22

<sup>1</sup> "Abo töke ma abo tata re e, eka rengrengen ömaras e mum bara e kobo pet te laa saban."

<sup>2</sup> Ma nang idi toxo ölangen bere ine ixo wöwörö rö idi ma tinenge me Ibru, idi toxo tuu ödödö arixe.

Io, me Pol ixo tengen,

<sup>3</sup> "E a Judeia ma toxo kip e ro Tasas nang Silisia, inexalik bere e xo taxin kaa xö ina lagunon Jerusalem. Me e a önga bak ne ausu re Gamaliel, me e xo kip a ausu raxin möxö warkurai möxöbo untubuno ire, me e xo gaas sa mumuu e God kalik xarnang e mum mo wewet nixinen.

<sup>4</sup> E xobo wewet ögarin a nangadi nang toxobo mumuu ina ausu na, nang tobo tengen ine ma 'Ngas', rua sesexomet idi. E xobo rörödik lo a körö ma balixilik me e xobo bulbulus öläxa idi xö gunon ne aömokorot.

<sup>5</sup> Ma a sisila raxin möxöbo pris mabo kansel kirip bөлök, idi tabo öt sik ka tengen bara inabo tinenge xirip i turunon. Me e xo xikip a axana ginigeet mera re idi urungan te idi abo Judeia nang Damaskas, me e xobo önan urungan ta lalamus ot ina nangadi ura Jerusalem rö idi ra xikip a tiip.

<sup>6</sup> "Ma xö luono xaken nang e xo önan lörörö Damaskas, saxit mon a maras ne bibio raxin meriso lömö xö balana kubu ixo bulo e.

<sup>7</sup> Me e xo subu su xö pu me e xo ölangen a inöno öng ixo tengen te e bira, 'Sol! Sol! Ruasa nöngön u bo ögarin e?'

<sup>8</sup> "Me e xo eose, 'Me ewe nöngön, Orong?'

"Ma ixo balu bira, 'E Jisas mee Nasaret ewe nang nöngön u bo ögarin ine.'

<sup>9</sup> A duöng nang toxo wan arixe me e toxo pere ina bibio, inexalik kaim idi xo ölangen kulen ina inöno ine nang ixo wöwörö rö e.

<sup>10</sup> "Me e xo eose, 'A laa sanene nang arabo pet, Orong?'

"Ma Orong ixo tengen, 'Örö taru kaa ma örö wan u Damaskas. Ma ringan tabo töngösen nöngön ma lasanene xirip nang e God ixoro isik ke nöngön bara örobo pet.'

<sup>11</sup> Io, abo duöng nang toxo wan arixe me e, idi toxo lamus lo e u Damaskas, möxösa, a lölös möxö bibio ixo öwulo e.

<sup>12</sup> "Ma önga tödi a esene e Ananias ixo wanot ta werwere e. Ine a önga tödi nang ixobo mumuu eörin abo warkurai te Moses, mabo Judeia nang toxobo xisixis singan idi tobo ii öraxin ine.

<sup>13</sup> Ine ixo tuu xö lawana e ma ixo tengen, 'Tönö Sol, örö wawara baling!' Ma saxit iat mon e xo öt ta werwere ine.

<sup>14</sup> "Io, Ananias ixo tengen bira, 'A God köbo untubuno ire ixoro pere kos nöngön bara örobo ösöxö a mamaa re ine, ma bara örobo pere a öng nang a lak töxödös ma örobo ölangen a tinenge möxö ngalana.

<sup>15</sup> Me nöngön örobo etöngösen lamun ine urungan kö marakörö xirip ma lasanene nang u xo pere ma u xo ölangen.

<sup>16</sup> Io, a lasa bang u xixiset min? Örö taru kaa ma örö kip a baptais ma örö seseng urungan te God ma irabo irewe abo magingin saban te nöngön.'

<sup>17</sup> "Io, nang e xo wan baling u Jerusalem, e xo seseseng kö gunon ne lotu raxin me e xo pere a winawara meruso lömö.

18 E xo pere a Orong ixo wöwörö. Ma ixo tengen te e bira, 'Saxit! Örö wan kalik e Jerusalem na mon, möxösa, idi tekebeöt ta nunu xö tinenge re nöngön nang örobo tengen te idi.'

19 "Me e xo balu, 'Orong, inabo duöng na te ösöxö bere e bo önan möxö önga gunon ne sineseng urungan kö öng kabise rua öxös lo ma rua sese idi nang te nunu re nöngön.

20 Ma nang toxo teng ömet a tödi re nöngön, e Stiwen, niang ixobo etöngösen ma esem, e xo tuu sik kingan me e xo balaure a man te idi nang toxo reteng ömet ine. Me e xo maraxa xönan.'

21 "Io, a Orong ixo tengen te e bira, 'Wan, e rabo tile nöngön kö palaa saxit urungan kö nangadi nang kaim bara abo Judeia.' "

*Pol ixo tengen ösu bere ine önga Rom*

22 A nangadi toxo ölangen e Pol ot nang ine ixo tengen ina xönö tinenge. Io, idi toxo kup nöngösö lömö bira, "Mum moro se rewe ina mangana tödi! I kobo deek bara irabo kis kö öxöno lagunon!"

23 Nang bere idi toxo xukup, idi toxo kip tewe ana man te idi me idi toxo same rewe a kabus uruso lömö.

24 A tödi sisila ixo isik a tinenge lölös bara idi tabo kip öläxa e Pol urungan kö bang ke idi abo umri. Ma ixo erile bere idi tabo dangat ine me idi tabo ose mumuu ine rö idi ra ösöxö lo bara ruasa a nangadi toxo xukup pe ine bira.

25 Ma nang bara idi toxoro sat ötöxödös a nini limine ma toxoro kubus ine rua dangdangat ine, Pol ixo wöwörö urungan kö umri raxin ewe ixo tuu sik, "Bule, i töxödös kö warkurai te mum bara mum morobo dangat a önga Rom, ewe nang bang tekela pet te önga warkurai lömö re ine lamun ina na, ma bara iri pet te sasaban?"

26 Io, niang bara a umri ixo ölangen bira, ine ixo wan uruso xö sisila ma ixo ose ine, "Naang! A lasanene iang u maaa rua wewet? Ina tödi na ine a Rom!"

27 Io, a tödi sisila ixo wan urungan te Pol ma ixo eose, "Naang! Nöngön mee Rom?"

Me Pol ixo balu ine, "A turunon."

28 Ma a tödi sisila ixo tengen, "E xo xuxun ma tuluwok taxin arixe rö e ra xikip a ese bere e a önga Rom."

Me Pol ixo balu ine, "Ma lamun e, kaim. A tata re e ine ixo kip ina ese bara ine a önga Rom. Io nang, e nago ixo kip e bölök bie."

29 Io, idi ewe niang toxo ruruu ringan toxo maaa rua ose muu ine, idi toxo wan talu rewe saxit iat mon. Ma a tödi sisila ixo örasen a binuut niang ixo ösöxö lo bere ine ixoro kut e Pol ma uno lölös me ine a önga Rom.



*Pol ixo tuu xö wawara xöbo kansel*

<sup>30</sup> Önga bung kabise a tödi sisila ixo palas tewe e Pol, möxösa, ixo maaaa bara irabo ösöxö lo a unine turunon bara ruasa abo Judeia toxo puk e Pol. Io, ixo kup etok abo pris tataxin ma abo kansel nang mee Judeia. Ma ixo lamus lo e Pol ma ixo uru ine xö wawara re idi.

## 23

<sup>1</sup> Pol ixo pere dik abo kansel ma ixo tengen, “Abo töke, a dinödöm pe e i öturunon bara abo tatalien te e i deek kö wawara re God ot nixinen.”

<sup>2</sup> Io, bara e Ananias a sisila raxin möxöbo pris ixo ölangen bira, ixo tile idi ewe idi nang toxo tuu sik kingan bara tabo wasa a ngalana e Pol.

<sup>3</sup> Me Pol ixo tengen tö ine, “God irabo wasa nöngön. Me nöngön u xarnang a mariris möxö bölö möxö gunon, ma lamun nang kölöme i wöwö ma biling. U xisixis singan tua pet warkurai rö e ra eöt ma abo warkurai te Moses i tengen. Inexalik bere nöngön iat, u rö lexe abo warkurai niang u tile idi bara ta wasa e!”

<sup>4</sup> Me idi niang toxo tuu sik lörörö re Pol, toxo tengen, “Ewenene nöngön niang u rengrengen ögarin a sisila raxin möxöbo pris se God?”

<sup>5</sup> Io, Pol ixo balu bira, “Abo töke, e kobo maras bere ine a sisila raxin möxöbo pris. Niang bere e xoro maras bere ine ewe, e kebeöt ta winörö bira, möxösa, abo tinenge re God toxo geet i tengen bira, ‘Ganim e mum pa rengrengen ögarin a sisila xö nangadi re mum.’ ”

<sup>6</sup> Nang e Pol ixoro maras bara a dauleng ke idi a Sadiusi ma dauleng a Parasi, ine ixo wöwörö lömö ringan kö kinis etok arixe bara, “Abo töke, e a önga Parasi, a barok kö önga Parasi. E xo tuu xö warkurai ta, möxösa, e xoro xixiset ma nunu lamun a tinaru baling möxö minet.”

<sup>7</sup> Ma bara ixo wöwörö xarna na a önga angat taxin ixo taru kaluluonin abo Parasi ma abo Sadiusi. Ma abo kansel toxo palang idi.

<sup>8</sup> (Ma a unine bira. Abo Sadiusi tobo rengrengen bara kaim pe tinaru kaa baling möxö minet, ma kaim bölök kebo angelo bara rebo tano. Inexalik bara abo Parasi idi tobo rengrengen bara idi xirip angen.)

<sup>9</sup> Io, ma a kinis saban ixo wanot taxin. Ma dauleng ne tene ausu möxöbo warkurai te Moses niang idi abo Parasi, idi toxo tuu kaa ma toxo eegot ma lölös bara, “Mem kobo pere lo re önga sasaban kölöme xö ina tödi. Nagut, te önga tano bara re önga angelo, iri etöngösen arixe me ine.”

<sup>10</sup> A inangat ixo taxin köba im, io nang, a sisila möxöbo umri ixo buut bara xalik idi tobo dis ölixilik e Pol. Ine ixo

isik a tinenge lölös köbo umri bara idi tabo wan su ma tabo lamus lo e Pol kalik idi ma lölös ma tabo silien ine urungan kö bang ke idi.

<sup>11</sup> Io, xö dömön, a Orong ixo tuu lörörö re Pol ma ixo tengen bira, “Nöngön örobo balamasa! Nöngön örobo mana etöngösen bölök me e ri Rom xarna niang u rö etöngösen me e ra Jerusalem.”

*A apingit tua sexomet e Pol*

<sup>12</sup> Io, xö önga bung kabise xö puxu, abo Judeia toxo epingit me idi toxo xuxubus bara idi tekebeöt ta nien ma bara tekebeöt ta ininim ot nang idi tere sexomet e Pol.

<sup>13</sup> Ma ixo saxit a nit ne sangaun ne duöng ewe idi iang nang toxo laxa xö ina kunubus.

<sup>14</sup> Io, idi toxo wan urungan köbo pris tataxin ma abo sisila möxö bung marapun me idi toxo tengen, “Mem mere kubus bara mem kebeöt ta nien ot nang e mem marabo sexomet e Pol.

<sup>15</sup> Io niang, mum arixe mabo kansel mum morobo tile tinenge urungan köbo umri bara idi tabo lamus öxaa e Pol ura re mum. Me mum morobo talien xarnang bara mum mo maaaa bara mum morobo pere muu ödeek a turunon möxö tinenge meringan te ine rua wewet a warkurai te ine. Me mem mere tagur bara mem marabo sexomet tewe ine ringan kö ngas nang bara ine i önan ot ura.”

<sup>16</sup> Ma lamun nang a maruono e Pol ixo ölangen ina epingit te idi, ixo wan kaa urungan kö bang köbo umri ma ixo tengen te Pol.

<sup>17</sup> Io, Pol ixo kuwe lo a öng möxöbo umri raxin ma ixo tengen, “Lamus ina bak maxat na urungan kö sisila re mum. Ine ma dauleng ne tinenge niang irabo töngösen ine min.”

<sup>18</sup> Io, a umri raxin ixo lamus lo ine urungan kö sisila.

A umri raxin ixo tengen, “Pol ewe nang idi toxoro kut dik, i erile rö e ma niang i seng e bara arabo lamus ot ina bak guama na ura re nöngön, möxösa, ine ma tinenge ra rengrengen te nöngön.”

<sup>19</sup> A sisila ixo tön lo a limine ina bak guama ma ixo lamus tewe ine ma ixo ose ine bara, “A lasanene nang u maaaa rua töngösen e min?”

<sup>20</sup> Ma bak guama ixo tengen, “Abo Judeia idi te maraxa rua ose nöngön bara nöngön örobo lamus e Pol urungan köbo kansel maxalik. Me idi tabo talien xarnang idi te maaaa ulamun ine rua ose muu ine lamun abo turunon möxöbo tinenge.

<sup>21</sup> Ma lamun u bele tame idi, möxösa, i saxit a nit ne sangaun ne duöng, ewe idi tabo mun kiset ine. Me idi

toxoro kubus bara idi tekebeöt ta nien ma tekebeöt ta ininim ot nang idi tere sexomet ine. Idi te tagur sik na me idi te xixiset me nöngön bara nöngön örobo ömaraxen lo a sineseng ke idi.”

<sup>22</sup> Io, a sisila ixo ögele a bak guama bara, “U bele rengrengen kere öng bara nöngön u rö töngösen e lamun ina laa na.” Ma ixo tile rewe ine.

*Toxo ömen lo e Pol u Kaisaria*

<sup>23</sup> Io, ixo kuwe lo a ninöng möxöbo umri raxin ma ixo tengen, “Örö tagure re muxu ne umri: re ninöng ne mar ne tene tön sele, re pitnö ma ninöng ne sangaun ne tene xisin os, ma re ninöng ne mar ne tene tön iie. Tagure idi rua inuan u Kaisaria xö pitnö ma nit ne axana bung nixinen kö dömön.

<sup>24</sup> Ma tagure re dauleng ne os se Pol, io niang, idi tabo lamus ödeek ine urungan kö sisila raxin e Pelik.”

<sup>25</sup> Io, ixo geet a ginigeet bira:

<sup>26</sup> “E Kolodias Lisias, urungan kö tödi raxin deek möxö gapman e Pelik: A balamu irabo kis arixe me nöngön.

<sup>27</sup> “Abo Judeia idi toxo töndik ina tödi me idi toxo maaaa rua sesexomet ine, ma lamun e xo wan arixe mabo umri re e rua öro ine, möxösa, e xo ösöxö lo bara ine a önga Rom.

<sup>28</sup> Me e xo maaaa bara e rabo ösöxö bara idi toxo puk ine ruasa, io, e xo lamus lo ine urungan kö kansel te idi.

<sup>29</sup> E xo pere bira, bara abo tinenge re idi möxö apuk i wöwörö lamun abo warkurai te idi mon. Ma lamun kaim pe apuk nang ixo tiip eöt bara irabo met kelen. Ma kaim pe apuk bölök i eöt bara idi tabo bulus ine kölöme xö gunon ne aömokorot.

<sup>30</sup> Io, nang bara e xo see lo lamun ina önga apingit te idi rua wewet ögat ina tödi, e xo tile rewe iat mon ine urungan te nöngön. Me e xo isik a tinenge lölös bölök urungan kö duöng apuk bara idi tabo isik abo tinenge re idi ulamun ine urungan te nöngön.”

<sup>31</sup> Io, abo umri toxo muu a tinenge lölös möxö sisila me idi toxo lamus e Pol arixe me idi xö dömön urungan kö lagunon Antipatiris.

<sup>32</sup> Ma xö bung kabise idi toxo ganim tewe e Pol köbo tene kinis kö os bara idi tabo wan arixe me ine. Me idi toxo tawuxus urungan kö bang ke idi.

<sup>33</sup> Ma nang abo tene xisin os toxo wanot Kaisaria, idi toxo isik a ginigeet urungan kö tödi raxin möxö gapman me idi toxo isik e Pol urungan kö limine.

<sup>34</sup> Io, a tödi raxin möxö gapman ixo kos a ginigeet ma ixo ose e Pol bara ine mole. Niang bara ixo ösöxö lo bara ine mee Silisia,

<sup>35</sup> ine ixo tengen, “E rabo ölangen a tinenge re nöngön nang bara ewe idi toxo puk nöngön, midi tabo wanot.” Io, ixo isik a tinenge lölös bara idi tabo kis pi e Pol tingan kö gunon taxin ne warkurai te Erot.

## 24

### *Pol ixo tuu xö warkurai xö wawara re Pelik*

<sup>1</sup> A pitnö ne bung melamu, Ananias a sisila raxin möxöbo pris ixo wan su u Kaisaria arixe ma dauleng ne sisila möxö bung marapun ma önga tödi nanase möxöbo warkurai, a esene e Tertulus. Io, idi toxo kip abo tinenge ne apuk lamun e Pol urungan kö tödi raxin möxö gapman.

<sup>2</sup> Ma nang idi toxo kuwe ölaxa e Pol, Tertulus ixo bulus abo tinenge ne apuk urungan te Pelik bira: “Mem mere örasen a kinis ömat möxö malum kölöme xö werwere muu e nöngön. Ma a dinödöm deek ke nöngön ire kip ot a oleleng ne xuxulas sua wewet ödeek a xönö re mem.

<sup>3</sup> Ma xö boxönö xirip möxöbo lagunon mem me tengen deek urungan te nöngön a orong Pelik, lamun a lasa u xo pet.

<sup>4</sup> Ma lamun e kobo maaaa bara e rabo ömölös nöngön. Io nang, e seng nöngön bara, maris, nöngön örobo ölangen ina tinenge wuruwut te mem.

<sup>5</sup> “Mem mere ösöxö lo bara ina tödi na ine a önga tene baba ma ibo öraru a tiip kaluluonin abo Judeia ma xöbo uk kirip möxö öxöno lagunon. Ine a önga tene sisila möxö muxu ne lotu atöxö tobo rengrengen ma ‘Nasaret’.

<sup>6-8</sup> Ma kaim bara ina niang kalik mon. Kaim. Ixo könönöin iat bölök bara irabo pet ögarin a gunon ne lotu raxin te mem. Io, mem moxo töndik ine. \*Me nöngön iat, örobo ose muu ine, io niang ke nöngön ta ösöxö lo a turunon möxö ina apuk niang mem me wewet tö ine.”

<sup>9</sup> Ma abo Judeia bölök toxo epuk bira, bara inabo lalaa i turunon.

<sup>10</sup> Io, a tödi raxin möxö gapman ixo aut te Pol bara ine irabo wöwörö, ma ixo tengen, “E axanan bere e rabo isik a tinenge re e re nöngön möxö tinuu wi e xalik inabo apuk,

\* **24:6-8** 7-8: Dauleng ne ginigeet mesila idi toxo bulus ölaxa xö rina 7 i tengen bira: Mem moxo maaaa rua kure muu ine ma warkurai te mem. Ma lamun bere Lisias a sisila möxöbo umri ixo wanot arixe ma lölös ma ixo sat lo ine xalik e mem, ma ixo isik a tinenge lölös urungan kö nangadi niang toxo epuk bere idi tabo wan kaa urungan te nöngön.

möxösa, e ösöxö bara nöngön a tene pet warkurai möxö ina xönö xö oleleng ne awat.

<sup>11</sup> I kobola saxit bang a sangaun ma ninöng ne bung nang e xo wan kaa u Jerusalem rua lotu. Ma i malus se nöngön bere nöngön örobo ösöxö lo bara ina na a turunon.

<sup>12</sup> Ma nangadi ewe nang toxo wupuk e, idi kaim kö werwere e bara e xo eegot arixe ma öng kingan kö gunon taxin möxö lotu. Me idi kaim kö werwere bölök e bara e xo urulo a tiip kaluluonin a nangadi kölöme xöbo gunon ne sineseng bara ringan kö xönö xabise möxö lagunon taxin.

<sup>13</sup> Me idi kaim kö eöt bara idi tabo öturunon te nöngön abo apuk niang idi toxo wewet tö e.

<sup>14</sup> Inexalik e kebeöt ta umingen ina na: e xobo lolotu urungan te God möxöbo tubumem kölöme xö kinis ne nunu re e xö ina 'Ngas' na nang tobo rengrengan bara a lotu atöxö. E nunu bölök köbo warkurai kirip pe Moses ma xöbo ginigeet kö bung propet.

<sup>15</sup> Me e balawapat sik ma nunu wösöt e God xarna niang bölök idi inabo nangadi, bara God irabo öraru öbaling abo tene töxödös ma abo tene sasaban kalik a minet.

<sup>16</sup> Io nang, e xobo könönöin bere e rabo balaure ödeek abo tatalien te e, a dinödöm pe e i bele puk e xö wawara re God ma a nangadi.

<sup>17</sup> "Kaim e xo werwere e Jerusalem kö uleng ne awat. Melamu, e xo wan urungan tua isik a rorop pe e xö nangadi re e, ewe idi te sasaxan. Me e xo wan tua isik arabaa bölök ringan kö gunon taxin möxö lotu.

<sup>18</sup> Io, idi toxo pere e ringan nang e xo wewet ina na. Me e xo kawöm pa wewet eörin abo lalaa möxöbo warkurai te Moses bara e xebe langlanga xalik abo tiip meringan kölöme xöbo warkurai. Ma kaim pe marakörö ixo wanot etok urungan te e me e kaim kö nilaxa bölök urungan kere önga tiip.

<sup>19</sup> Inexalik nangen a dauleng ne Judeia meringan kö provins Esia, ma nang bere idi te eka wupuk e lamun tebo lalaa, i töxödös bara idi tabo kis sila re nöngön.

<sup>20</sup> Ma bara kaim, ewe idi nang te tuu sik ka, idi tabo mana tengen a magingin saban sa nang idi toxo pere wösöt mere e, nang e xo tuu xö wawara xöbo kansel.

<sup>21</sup> Idi te eöt bara idi tabo tengen mon ina önga laa e xo kup min nang e xo tuu xö wawara ridi. Me e xo tengen bira, 'E re tuu xö warkurai xö wawara re mum nixinen, möxösa, e nunu xö tinaru baling möxö minet.' "

<sup>22</sup> Inexalik e Pelik ixo maras deek ulik lamun abo Kristien. Io niang, ine ixo tengen köbo Judeia bere idi tabo xixiset kö önga bung kabise. Me ine ixo tengen bira, "Ma nang Lisias

a sisila möxöbo umri irabo wanot, io, e rabo bulus a öxöno warkurai niang bere nöngön u pet a magingin saban bara kaim.”

<sup>23</sup> Io, ixo isik a tinenge lölös urungan kö umri raxin ewe ibo balbalaure e Pol bara ibo ruruu wi e Pol. Ma lamun ixo tengen bere ine i bele tuu wi xöbanin ine. Ine irabo öbala e Pol bere ine irabo langlanga ulik ma irabo öbala abo ais se ine bere idi tabo werwere muu ine xöbo sasaxan te ine.

<sup>24</sup> Io, a uleng ne bung ixo saxit, Pelik ixo wanot arixe ma une re ine mee Judeia, e Darusila. Io, ixo uguran önga tödi ra lalamus e Pol ma ixo ölangen ine ixo wöwörö lamun ina mangana nunu re idi ewe idi nang tobo nunu re Krajs Jisas.

<sup>25</sup> Ma niang e Pol ixo wöwörö lamun a tatalien töxödös ma a tatalien niang a öngöng iat irabo kure ödeek ine, ma bere God irabo uru idi xö warkurai melamu, Pelik ixo buut ma ixo tengen, “Iri eöt bang! I eöt bara örö önan im. Melamu, bara e mere ulik ne axana bung, arabo erile lamun nöngön ta binaling.”

<sup>26</sup> Inexalik ixo maaaa xalik bere Pol irabo kun suxume ine ma re tuluwok. Io, ixobo erile sösöxö ulamun ine ma ixobo wöwörö arixe me ine.

<sup>27</sup> Ma nang a nine awat ixoro saxit, Porkios Pestus ixo kulas e Pelik. Ma lamun e Pelik ixo ganim sik e Pol kölöme xö gunon ne aömokorot, möxö ixo maaaa bara irabo öaxanan abo Judeia.

## 25

### *Pol ixo tuu xö warkurai xö wawara re Pestus*

<sup>1</sup> Io, a narun ne bung ixoro saxit melamu xö nuanot te ine urungan kö ina provins, Pestus ixo wan mee Kaisaria urungan Jerusalem.

<sup>2</sup> Ma abo pris tataxin ma abo sisila möxöbo Judeia idi toxo isik abo tinenge ne apuk ke idi ulamun e Pol urungan te Pestus.

<sup>3</sup> Idi toxo ose ölölös e Pestus bara irabo top idi xarnang, bara irabo lamus e Pol urungan Jerusalem, möxö idi toxoro pingit sik kua sesexomet ine xö ngas.

<sup>4</sup> Me Pestus ixo balu, “Na idi te xisixis pi e Pol ti Kaisaria me e iat arabo wan baling urungan melamu ulik.

<sup>5</sup> Io, nang bara ina tödi ixoro pet tebo lalaa saban, mum morobo tile rebo tene sisila re mum uri Kaisaria arixe me e, me idi tabo puk ine ringan.”

<sup>6</sup> Ma nang e Pestus ixoro kis a pitnö ma narun, bara xö sangaun ne bung arixe me idi, ine ixo wan su uri Kaisaria. Ma xö bung kabise ine ixo kuwe etoxin a kinis arixe ne pet warkurai ma ixo erile bere Pol irabo wanot ma irabo tuu mesila xö wawara rine.

<sup>7</sup> Ma nang e Pol ixo tuu ot, abo Judeia ewe idi toxoro wan su mee Jerusalem, idi toxo tuu elulurein ine me idi toxo isik ot abo tinenge lölös möxö apuk urungan tö ine. Inexalik idi tekebeöt bere idi tabo öturunon ina tinenge re idi.

<sup>8</sup> Io, Pol ixo isik a tinenge re ine möxö ruruu wi ine xöbo apuk bira: “E kebeöt ta wewet te önga sasaban urungan köbo Judeia, bara xö gunon ne lotu raxin, ma bara urungan bölök ke Kaisar, a king taxin mee Rom.”

<sup>9</sup> Ma lamun bere Pestus ixo maaaa bara irabo öaxanan abo Judeia, io, ixo ose e Pol bara, “U maaaa bara örobo wan u Jerusalem, ma arabo ose muu nöngön lamun inabo apuk na ringan, bara kaim?”

<sup>10</sup> Me Pol ixo balu ine bira, “E tuu sik na xö pet warkurai niang köbo Rom. Io, i töxödös bere e rabo tuu xö warkurai ta. E kaim kö wewet te sasaban urungan köbo Judeia me nöngön iat u ösöxö ödeek sik xarna na.

<sup>11</sup> Inexalik bara nang e xoro pet tunon te önga sasaban, i eöt bara arabo mana iuo xelen, io, idi tabo sexomet e, kaim pe laa. Ma lamun niang bara kaim pe turunon möxöbo apuk ke idi ura rö e, io, i kobo töxödös bara öng irabo isik e urungan kö limedi. E seseng bere Kaisar, a king taxin mee Rom, irabo ölangen e, xarnang i töxödös köbo warkurai te ire!”

<sup>12</sup> Melamu nang e Pestus ixoro wöwörö arixe mabo kansel te ine, ixo balu e Pol bira: “U xoro seseng bere Kaisar irabo ölangen nöngön. Io, e rabo tile nöngön uruso re Kaisar.”

### *Pestus ixo wöwörö re Agripa ulamun e Pol*

<sup>13</sup> Io, a uleng ne bung melamu, Agripa a önga king arixe me Bernis, idu nasixinen toxo wanot Kaisaria rua öga lo e Pestus kö kinis maxat te ine.

<sup>14</sup> Me idu toxo maaaa rua kinis bang kingan, io, Pestus ixo paraa abo lalaa lamun e Pol urungan te king Agripa. Ine ixo tengen tö ine, “Mesila e Pelik ixo wan lo, ixo gan sik önga tödi ringan kölöme xö gunon ne aömokorot.

<sup>15</sup> Ma nang e xo wan u Jerusalem, abo pris tataxin ma abo sisila möxö bung marapun Judeia, idi toxo puk ine ma toxo ose e bara arabo euguran ta sesexomet ine.

<sup>16</sup> “Ma lamun e xo tengen tö idi bara kawaim bara abo tatalien te mem mee Rom bere mem marabo isik tewe tataun a önga tödi rua ömaso ine. Kaim. Ine irabo mana tuu mesila xö wawara iat te idi ewe idi nang toxo puk ine. Me ire tabo ömaraxen tabaa ine bölök mere axana bung kö ine bara irabo tuu wi ine iat kalik abo apuk.

<sup>17</sup> Io, nang idi toxo wanot arixe me e ra, e kaim kö ulis a warkurai. Kaim. E xo kuwe etok a kinis arixe ne pet

warkurai xö bung kabise. Me e xo erile bere idi tabo lamus ölaxa ina tödi.

<sup>18</sup> Inexalik nang abo tene apuk ke ine toxo tuu me idi toxo wöwörö, idi tokoxobo puk ine lamun tebo magingin saban niang e xo döxömen bere idi tabo puk ine lamun.

<sup>19</sup> Inexalik idi toxoro mon tinenge ne agot sik arixe me ine lamun a lotu re idi iat ma lamun a tödi nang ixo met, a esene e Jisas, nang e Pol ixo tengen bere ine nangen i to.

<sup>20</sup> Me e kaim kö marmaras bara e rabo ose muu ulamun ina agot bule, io, e xo ose ine bara i maaaa rua nuan u Jerusalem bara kaim, nang idi tabo ose ine ringan lamun inabo apuk.

<sup>21</sup> Ma lamun bere Pol ixo tengen bere idi tabo ganim sik ine ot nang e Kaisar irabo pet a öxöno warkurai lömö re ine. Io, e xo isik a tinenge lölös bere idi tabo kis pi ine ot nang bara e rabo tile rewe ine urungan te Kaisar.”

<sup>22</sup> Io, Agripa ixo tengen te Pestus, “E maaaa bara e xalik, e rabo ölangen ina tödi na.”

Me Pestus ixo balu ine, “Nöngön örobo ölangen ine maxalik.”

### *Pol ixo wöwörö re Agripa*

<sup>23</sup> Xö bung kabise Agripa me Bernis, idu toxo wanot arixe ma mariris taxin me idu toxo laxa urungan kö gunon ne tinenge arixe ma abo sisila xö bung umri ma abo tödi orong möxö ina lagunon taxin. Io, Pestus ixo erile, me idi toxo lamus ölaxa e Pol.

<sup>24</sup> Io, Pestus ixo tengen, “Nöngön Agripa a king, me mum kirip na ewe mum mo kis etok, mum moro pere ina tödi na. A nangadi mee Judeia xirip pingan Jerusalem ma na Kaisaria, idi toxo xukup bara ta sexomet tewe ine.

<sup>25</sup> E kaim kö werwere lo re öng ke laa bere ine ixoro pet nang ine irabo met kelen. Inexalik ixo kup bara Kaisar irabo ölangen ine, io, e xo bulus a dinödöm pe e bara e rabo tile ine u Rom.

<sup>26</sup> Inexalik bere e kaim kö marmaras bara e rabo tengen tunin a lasa lamun ina tödi, nang e rabo geet ösu ina ginigeet urungan Kaisar. Io, e re lamus lo ine urungan kö wawara re nöngön, e king Agripa, me e mum kirip bölök, nang e eöt tua gegeet muu ine merebo tinenge niang bere ire tere ose mumu ine.

<sup>27</sup> Me e tengen bira, möxösa, e döxömen bara i kobo töxödös bere e rabo tile tataunin mon a öng meringan kölöme xö gunon ne aömokorot ma kaim bang e xo ömaras abo apuk ke ine.”



## 26

<sup>1</sup> Io, Agripa ixo tengen te Pol, “U rö eöt ta winörö iat tö nöngön.”

Io, Pol ixo ööt tidi ma limine ma ixo urulo abo tinenge re ine möxö ruruu wi abo apuk ke idi bira:

<sup>2</sup> “King Agripa, e döxömen bara i deek kö e rua tinuu mesila xö wawara re nöngön nixinen, rua rengrengen abo tinenge ne ruruu wi abo apuk köbo Judeia.

<sup>3</sup> A turunon saxit e döxömen bara i deek kö e, möxösa, nöngön iat, u maras deek lamun abo tatalien te mem abo Judeia ma möxöbo agot i wanot köbo tatalien niang. Io, e seseng ne marmaris urungan te nöngön bara örobo öbala e bara arabo wöwörö ulik bang ma örobo ölangen e.

<sup>4</sup> “Abo Judeia xirip te ösöxö abo tatalien te e urulo ringan nang e xo bak lik. Idi te maras bara xö to xirip pe e, e xo kis singan kö xönö re e ma ringan bölök iat Jerusalem.

<sup>5</sup> Idi toxoro ösöxö e xö axana bung ömat ma nang bara idi te maaaa, io, idi te eöt bara idi tabo tengen ösu bere e xo önga Parasi, ma abo Parasi xö ina muxu möxö lotu re mem nang a tatalien te idi a lak lölös köba.

<sup>6</sup> Me e tuu xö warkurai na, möxösa, e nunu xöbo lalaa nang e God ixo kubus sik köbo untubu mem.

<sup>7</sup> Ina na a kunubus nang abo sangaun ma ninöng ne bung marapun te mem, idi te kis xiset arixe ma nunu, bere idi tabo kip ine nang idi tobo lolotu wösöt e God köbo bung xaken ma xö dömön. Io, king, abo Judeia te puk e lamun a unine ina kinis ne nunu möxö ina kunubus na.

<sup>8</sup> E wuwus köba bara dauleng ke mum, mum mo döxömen bere God i kebeöt ta öraru abo minet.

<sup>9</sup> “E bölök e xo döxömen bara i deek bere e rabo pet te oleleng ne lalaa rua wewet ögarin a esene Jisas mee Nasaret.

<sup>10</sup> Ma ina mangana niang e xo pet tingan Jerusalem. Abo pris tataxin toxo tabaa e ma lölös sua wewet pi a oleleng ne nangadi runon te God kö gunon ne aömokorot, ma nang toxo sexomet idi, e xo aut bölök ulamun.

<sup>11</sup> Io, oleleng ne axana bung e xobo susu laxa xöbo gunon ne sineseng ke mem abo Judeia rua ömokorot idi. Me e xobo könönöin bara arabo sidien idi bara tabo tengen ögarin ine Jisas. Ma balake ixobo sösöt köba rö idi, io niang, e xobo önan urungan bölök kö boxönö lagunon nang i kis kö palaa rua ögarin idi.

<sup>12</sup> “Ma önga bung möxö inabo inuan te e, e xo önan u Damaskas arixe ma lölös ma auguran meringan köbo pris tataxin.

<sup>13</sup> Io, king, lörorö xö luono xaken lömö xö ngas e xo pere a önga bibio meringan kö watmaep. Ma bibio möxö xaken i

kebeöt arixe min ma ixo maras lömö re e arixe ma nangadi ewe niang idi toxo önan arixe me e.

<sup>14</sup> Mem kirip mem moxo subu urungan kö pu me e xo ölangen a inöno tödi ixo kuwe e xö tinenge me Ibru bira, 'Sol! Sol! Ruasa nöngön u ögarin e? Nöngön iat u öxadik öbaling nöngön nang nöngön u wawas kaa xö laa i aan.'

<sup>15</sup> "Io, e xo ose, 'Ewe nöngön, Orong?'

"Me Orong ixo balu, 'E Jisas ewe niang nöngön u ögarin ine.

<sup>16</sup> Go, örö taru kaa ma örö tuu. E re wösö re nöngön tua tibe nöngön bere nöngön örobo pet abo tinörön te e, ma bere nöngön örobo önga tene tinenge möxöbo lalaa nang u xoro pere lamun e, mabo lalaa bölök e rabo osen te nöngön.

<sup>17</sup> Me e rabo ömamanaa rewe nöngön meringan kalik a nangadi re nöngön ma meringan bölök ke idi nang kaim bara abo Judeia. E ugaran nöngön urungan te idi

<sup>18</sup> rua sasawang abo maradi ma rua lalamus tewe idi meringan kö ködö urungan kö maras, ma meringan kalik a lölös se Satan urungan te God. Ma irabo wanot bira re idi bara God irabo döxömen taun tewe abo magingin saban te idi ma bara irabo bulus idi arixin me idi nang God ixoro iwes lo idi rö ine iat, möxösa, idi toxo nunu re e.'

<sup>19</sup> "Io, king Agripa, e kaim kö mölmölök kua rarama abo tinenge möxö winawara meriso xö watmaep.

<sup>20</sup> E xo arun ta winörö urungan tö idi ringan Damaskas, io, meringan urungan te idi niang Jerusalem ma xö boxönö xirip Judeia ma urungan te idi niang idi kaim bölök bara abo Judeia. E xo tenge lölös urungan te idi xirip bere idi tabo dödöm puxus ma tabo talingen urungan te God, ma bere idi tabo pet abo mangana tatalien i eöt tua ömaras bara i turunon bere idi toxoro dödöm puxus.

<sup>21</sup> Ma ina unine iang abo Judeia idi toxo töndik e ringan kö gunon ne lotu raxin ma toxo könönöin bere idi tabo sexomet e.

<sup>22</sup> Ma lamun bere God ixoro top e ot nixinen, io, e tuu ra me e wöwörö ulamun e Jisas urungan kö nangadi xirip, a nangadi orong mabo nangadi tataun mon bölök. E kobo rengrengen lo re tinenge re e niang i xabise sik kö lasa abo propet me Moses idi toxo tengen bara irabo wanot.

<sup>23</sup> Me idi toxo tengen bara a Mesaia irabo örasen a tiip ma irabo met me ine ewe irabo silien a tinaru xalik a minet, io niang, ine mon ewe irabo palas tinenge urungan köbo Judeia me idi nang kaim bara abo Judeia ulamun a marmaras niang irabo wanot urungan te idi xirip."

<sup>24</sup> Ma nang e Pol ixo tenge bira, Pestus ixo tenge wi ine möxö abo tinenge re ine ma ixo kup bira, "Pol, u rö baulang! A ausu raxin nang u rö kip i öbaulang nöngön."

<sup>25</sup> Me Pol ixo balu ine, "Orong Pestus, e kaim bara baulang. A lasa e rengrengen i turunon ma i kobo tam xarnang bara a tinenge ne baulang.

<sup>26</sup> Me king Agripa i maras sik lamun inabo lalaa na. Ma i eöt te e rua winörö re ine ma akarabo buut, möxösa, e ösöxö bara iri tame xirip inabo lalaa e wöwörö ulamun. Me ine iri tame, möxö inabo lalaa i kobo wanot ne minun.

<sup>27</sup> King Agripa, u nunu xöbo tinenge xöbo propet? E ösöxö bere nöngön u nunu re idi."

<sup>28</sup> Io, king Agripa ixo tengen te Pol, "Nang! U döxömen bara u eöt tua sasat pasaxirin lo e iat mon tua önga Kristien?"

<sup>29</sup> Me Pol ixo balu ine, "Niang bara örobo wanot pasaxit bara örobo alilis, e seng e God bere nöngön me idi xirip bölök na ewe idi te ölangen e nixinen, bere mum morobo wanot xarnang e, inexalik e kumamaa bara mum morobo kis kölöme xö ina kunubus lölös xarnang e."

<sup>30</sup> Io, ina king ixo taru kaa, ma arixe me ine a sisila raxin möxö gapman me Bernis me idi bölök ewe idi toxo kis arixe me idiet.

<sup>31</sup> Idi toxo wan talu xalik ina xönö ma niang idi toxo wöwörö nana iat te idi, idi toxo tengen, "Ina tödi na kaim kö wewet te önga sasaban, i eöt bara irabo met kelen, bara tabo bulus ine xö gunon ne aömokorot ulamun."

<sup>32</sup> Me Agripa ixo tengen te Pestus, "E xere eöt tua ömamanaa ina tödi na niang bara kaim ine xo seeseng e Kaisar ta ölangen ine."

## 27

### *Pol ixo wan uruso Rom*

<sup>1</sup> Ma nang idi toxo bulus a öxöno tinenge bere mem marabo wan u Itali, idi toxo isik e Pol ma dauleng meringan kö gunon ne aömokorot urungan kö limine önga umri raxin esene e Julius. Me ine a önga umri raxin möxö önga muxu ne umri, idi tobo rengrengen ine bara, 'Abo umri re Kaisar, a king taxin mee Rom.'

<sup>2</sup> Io, mem moxo kakaa xö önga mön mee Adaramitium nang toxo tagur ta nuan urungan köbo lagunon taxin möxö provins Esia nang abo mön tobo ösö xönan. Io, mem moxo böxö su. Me Aristarkus, a tödi mee Tesalonika ringan Masedonia ixo wan arixe me mem.

<sup>3</sup> Io, mem moxo ösö ringan Saidon kö bung kabise, me Julius ixo marase e Pol ma ixo ömaraxen ine bere ine

irabo wan urungan köbo ais se ine rö idi ra rorop ine xöbo sasaxan te ine.

<sup>4</sup> Io, meringan mem moxo böxö su baling urungan kö rasi, me mem moxo wan melamu xö xiki möxö muxulamin Saipras, möxösa, mem moxo ulo esuo ma lölös möxö xiki.

<sup>5</sup> Niang bere mem moxo lies a xönö kasawa lörörö xö nine provins Silisia ma Pampilia mem moxoro ösö ringan Maira ruso provins Lisia.

<sup>6</sup> Io, a umri raxin ixo pere lo önga mön meringan Aleksandria nang ixo maaaa rua nuan urungan Itali ma ixo öparara öxaa e mem könan.

<sup>7</sup> A oleleng ne bung mem moxo böxböxö malus nana. Ma ixo lölös köba rö mem, lamun mem moxo eöt ta nuan örörö Nidas. Mem kaim kö eöt tua nuan ömat bira, a unine xö xiki raxin. Io, mem moxo wan melamu xö muxulamin Krit, nang bara mem moxoro uluso saxit a xönö ngusungus Salmone.

<sup>8</sup> Mem moxo lölös muu a tinawit möxö dalun me mem moxo wanot kö önga lagunon a esene bara Babaa ne Texasö, örörö xö lagunon Lasia.

<sup>9</sup> Io, a öngabo bung ixo saxit e mem pingan. A rasi ixo taru, möxö ixoro saxit a bung möxö ölölö xöbo Judeia, ma awat möxö baraa ire ot. Io, Pol ixo panak bira,

<sup>10</sup> "Wöxö körö, e pere bara ina nuan te ire irabo saban. Ma nang bara ire te wan kö mön, ina mön irabo saban arixe mabo xinixip möxö mön me ire bölök tabo iuo."

<sup>11</sup> Io, lamun ina a umri raxin kaim kö ölangen muu a tinge re Pol. Kaim. Ine ixo tame xalik a tödi möxö ulusen a mön ma tamana mon.

<sup>12</sup> Io, ma oleleng ke mem idi toxo maaaa bara mem marabo wan iat, möxösa, ina sö kaim kö eöt bere mem marabo xiset tewe a texe möxö labur tingan. Me idi toxo maaaa bara mem marabo könönöin bere mem marabo wan urungan Pinikis, io, mem marabo xiset tewe a labur tingan. Me Pinikis ine önga sö xabise ringan Krit niang i kis babaa xalik a labur.

<sup>13</sup> Nang ina önga xiki lik meringan kö mara en ixo urulo ra wawaxat, idi toxo döxömen bere idi te eöt ta wewet a lasa idi te maaaa, io, idi toxo sat öxaa lo a aga, idi toxo muu a gegene möxö rasi Krit.

<sup>14</sup> Io, kaim kö ömat, a önga xiki raxin ixo wanot, idi tobo rengrengen ma 'Maramangin-Tunamat'. Ina xiki ixo wan su meringan kö muxulamin Krit.

<sup>15</sup> Io, ixo paxat ina mön, me mem kaim kö eöt bere mem marabo ulo esuo mina xiki, io, mem moxo ganim sik a xiki ixo wawaxat nanin e mem.

<sup>16</sup> Io, mem moxo uluso melamu a muxulamin lik toxobo rengrengen me 'Kauda', me mem moxo wewewet ma

xukubus ölölös a sim niang mem moxo ösat melamu xö mön.

<sup>17</sup> Io, nang a duöng toxo ösat öxaa lo, idi toxo dit abo uno xö ene möxö mön taxin, bere i bele tamalus nana. Me idi toxo buut bere mem bo kos kaa xö boxönö önö lörörö löxön Libia ma mon ibo saban. Io, idi toxo sat ösu a öxöno man möxö mön me idi toxo ganim bara a xiki irabo wawaxat nanin ina mön.

<sup>18</sup> Io, a xiki ma dalun taxin ixo sösöwee xöbanin e mem, io nang, idi toxo urulo ra retewe ösu abo xinixip kö bung kabise.

<sup>19</sup> Xö narun ne bung melamu, idi toxo tewe ösu rewe ina man arixe mabo uno mabo lalaa xabise möxö mön niang idi toxobo rörörön arixe min.

<sup>20</sup> Ma xö oleleng ne bung a xaken ma tii kaim kö wöswösö, ma ina xiki raxin bölök ixo wawaxat, mem moxo döxömen bara mem kebeöt ta tino.

<sup>21</sup> Io, inabo duöng kaim idi xo enen te nien kö axana bung ömat. Io, Pol ixo tuu mesila ma ixo tengen, "Wöxö körö, mum mexebe muu a tinenge re e ra ganim ire ra inuan tewe xalik e Krit. Nang bara mum moxoro ölangen e, mum mo kebeöt ta asuo mina tiip.

<sup>22</sup> Ma lamun na, e seng e mum bara mum morobo balamasa, möxösa, kaim pe öng mere mum irabo met. Kaim. A mön kalik niang irabo saban.

<sup>23-24</sup> Laa xö dömön a angelo re God, nang e mere ine, ma ewe niang e bo lolotu wösöt ine, ixo wanot ma ixo tuu xö lawana e ma ixo tengen, 'Pol, u bule buut, nöngön örobo mana tuu xö warkurai mesila xö wawara re Kaisar, a king taxin mee Rom, me God iri wadöane nöngön bara inabo nangadi xirip nang u önan arixe me idi, idi tekebeöt ta minet.'

<sup>25</sup> Wöxö körö, mum morobo balamasa sik, möxösa, e nunu re God bara abo lalaa irabo wanot iat xarnang ixo tengen bienin.

<sup>26</sup> Inexalik bara, a mön irabo mana ulo ösö iat kö önga muxulamin."

<sup>27</sup> A xiki raxin ixo wawaxat muu e mem nang e mem angen kö rasi Adaria xö sangaun ma nit ne bung kö dömön. Nang ixo örörö ra luono dömön, abo tene tinörön möxö mön toxo örasen bere mem moxo maa rua ösö ringan kö muxulamin.

<sup>28</sup> Idi toxo pere muu a rasi bere ixo dödöngö eöt bule, me idi toxo pere bara mexe ixo ninöng ne sangaun ne sinangae uri su. Idi toxo kis ulik mon kö mön ma toxo könönöin baling a dödöngö möxö mexe, me idi toxo pere bara ixo sangaun ma pitnö ne sinangae uri su.

29 Io, idi toxo öriri ösu a nit ne aga meringan melamu xö mön, möxösa, idi toxo bubuut bara xalik a labur ibo paxat öxaa e mem köbo öxöno wat. Io, idi toxo seseseng bara irabo puxu pasaxit.

30 Abo tene tinörön möxö mön idi toxo könönöin bere idi tabo ulo meringan kö mön, io niang, idi toxo sexe ösu a sim uri xö pu xö mexe me idi toxo eömamang bere idi tabo ii ösu a dauleng ne aga meringan kö ngusuno mön.

31 Io, Pol ixo tengen kö umri raxin ma abo umri xabise bira, "Nang bara inabo nangadi tabo wan lo mera xö mön, io, i kebeöt bere mum morobo to."

32 Io nang, abo umri toxo tee xöröp a uno nang ixo töndik sik a sim, me idi toxo ganim ine ma ixo subu rewe.

33 Io, xö puxu bubung, Pol ixo öxaxat idi xirip bere idi tabo an. Ixo tengen bira, "Kö ina sangaun ma nit ne bung, mum moxo kis ma binuut bara a sa irabo wanot pösöt ire. Me mum moxo kis tataun, ma kaim e mum kö enen te laa.

34 Io, na e seng e mum bara mum morobo en te nien rue mum pa tino. Kaim pe öng mere mum irabo kip pe ulik ne iuiuo."

35 Niang ixoro tengen ina na, ixo kip lo a dauleng ne beret ma ixo tengen deek ke God ulamun kö wawara re idi xirip. Io, ixo pidik ma ixo araun kö enen.

36 Nang bere idi toxo pere bira, idi xirip toxo balawapat baling me idi bölök toxo en a dauleng ne nien.

37 E mem a nine mar ma pitnö ma ninöng ne sangaun ma pitnö ma öng ewe mem moxo önan kö mön.

38 Ma niang idi toxoro an masii, idi toxo tewe ösu xirip abo wit urungan kö mexe rua öwawaxan a mön.

39 Io, nang bara ixo puxu, idi kaim kö werwere xulen ina lagunon, inexalik idi toxo pere a sö arixe ma löxön, a önö xönan. Io, idi toxo döxömen bere idi tabo könönöin tua ösö ma mon könan.

40 Idi toxo kuru xöröp abo uno xalik abo aga, me idi toxo ganim sik idi xö mexe ma saxit mon bölök idi toxo palas abo uno niang ibo töndik sik abo ösö nang ibo ulusen a mön uri xö mexe. Io, idi toxo sat öxaa a man kö ngusuno mön urungan kö xiki raxin ma a mön ixo urulo ra böxböxo urungan löxön.

41 Inexalik a mön ixo tamake xö xönö mömö xö rasi ma ixo kis lömö, ma ngusuno ixo kaim kö eöt bara irabo mamagi. Io niang, a mumune ixo tawörök lixilik köbo dalun niang ixo sösöwee.

42 Io, abo umri toxo epingit bere idi tabo sexomet a nangadi möxö ömokorot bere idi tekarabo arasa urungan kö marna bisbise me idi tekarabo ulo rup.

<sup>43</sup> Ma lamun a umri raxin ixo maaaa bere Pol irabo to iat, nang ixo kis pi idi bara ganim idi ra wewet inabo apingit te idi. Io, ixo isik a tinenge lölös bere ewe idi te eöt tua arasa, bere idi tabo kos su sila ma tabo arasa uruso löxön.

<sup>44</sup> Ma ixo erile bere idi xirip im a nangadi xabise, idi tabo kip lo re boxönö kewene iaa möxö mön tua arasa arixe min urungan löxön. Io, toxo pet bie me idi xirip toxo ösö deek kingan kö löxön.

## 28

### *Pol ixo ösö Malta*

<sup>1</sup> Niang e mem moxoro ösö, mem moxo ösöxö lo bara toxo tengen ina muxulamin 'Malta'.

<sup>2</sup> A nangadi meringan toxo marase xöbanin e mem. Me idi toxo usumot a ia sösöt me idi toxo öga e mem kirip, möxösa, ixo baraa ma ixo sisii.

<sup>3</sup> Io, Pol ixo iiögun a wöxö xaxut, ma nang ixo bulus öxaa xö ia sösöt, önga si niang a lak piöt ixo ulo su möxö ia sösöt lelewi, ma ixo kat dik a limine.

<sup>4</sup> Ma nang bara a nangadi meringan kö muxulamin toxo pere a si ixo taba sik kö limine, idi toxo tenge kaluluonin idi iat bara, "I wawara bara a tödi na ine ibo sesexomet a nangadi. Ma i turunon bara ine i kobo met kö rasi, lamun a god ewe nang ibo babalu wuxus a nangadi xöbo tatalien saban te idi, i kobo ömaraxen ina tödi na bara irabo to."

<sup>5</sup> Lamun e Pol ixo same rewe a si urungan kö ia sösöt ma kaim kö xikip pe sasaban möxönan.

<sup>6</sup> Idi toxo döxömen bara irabo u-ung a limine ma bara irabo subu saxit ma irabo met. Ma lamun idi toxo xixiset kö axana bung ömat ma kaim pe laa saban ixo ot te ine, io, idi toxo dödom puxus, me idi toxo tengen bara ine a önga god.

<sup>7</sup> A sisila möxö ina muxulamin, e Pubilius. Mabo gunon te ine te kis lörörö. Ine ixo öga e mem urungan kö gunon te ine, ma xö narun ne bung mem moxo kis ne osee xö gunon tine, me ine ixo deek ke mem.

<sup>8</sup> A tamana ine ixo maru sik ma miniset. Ine ixo malao ma ixo bala sasan bölök. Io, Pol ixo laxa muu ine ma ixo seseng ke ine. Melamu nang ixo seseng sik ixo bulus a limine lömö rine ma ixo ölanglanga ine.

<sup>9</sup> Nang bara laa na ixo ot, abo miniset kabise meringan kö muxulamin idi toxo wanot me Pol ixo ölanglanga idi.

<sup>10</sup> Idi toxo top ödeek e mem mabo oleleng ne lalaa, ma nang bara mem moxo tagur tua nuan kö mön, idi toxo tabaa e mem mabo lalaa mem moxo sasaxan ulamun.

### *Pol ixo wanot tuso Rom*

<sup>11</sup> Melamu xö narun ne texe ringan kö muxulamin, mem moxo kakaa lo xö önga mön nang ixoro xiset tewe a axana bung bara a xiki iri kawam. A mön meruso Aleksendria, mesila xö nang toxo tais puo a nine narön xasang ne god, e Kastor me Poluk.

<sup>12</sup> Me mem moxo ösö ro Sirakius, io, mem moxo kis kö narun ne bung kingan.

<sup>13</sup> Meringan, mem moxo wan lo me mem moxo ösö rusu Regium. Xö bung melamu a labur ixo wanot, io, ma bung melamu xönan mem moxo ösö ro Putioli.

<sup>14</sup> Ringan mem moxo pere lo a dauleng ne Kristien, me idi toxo öga lo e mem bara mem marabo kis kö pitnö ma ninöng ne bung arixe me idi. Io, mem moxo wan uruso Rom.

<sup>15</sup> Abo Kristien meringan toxoro ölangen bara mem marabo wanot, me idi toxo esuo me mem kö lagunon tobo rengrengen ma 'Misik ke Apius'. Ma dauleng toxo wanot kö lagunon tobo rengrengen me 'Narun ne Gunon Osee'. Bara Pol ixo pere idi, ixo tengen deek ke God ma ixo kip a öxaxat meringan te idi.

<sup>16</sup> Ma niang bara mem moxo wanot tuso Rom, idi toxo ömaraxen lo e Pol bara ine xalik irabo kis ma önga umri rua werwere muu ine.

### *Pol ixo wöwörö mabo Judeia rusu Rom*

<sup>17</sup> Kö narun ne bung melamu, Pol ixo kuwe etok abo sisila möxöbo Judeia. Nang idi toxo ot etok, ine ixo tengen tö idi, "Abo töke, e kobo pet te sasaban urungan kö nangadi re ire, bara urungan bölök köbo tatalien möxöbo untubu re ire, inexalik toxo öxös e ro Jerusalem ma toxo isik e xöbo limine idi abo Rom.

<sup>18</sup> Idi abo Rom toxo ose mumuu e bara a lasa runon e xo pet me idi toxo maaaa ra palas tewe e, möxö idi toxo pere bara kaim pe laa bara e rabo iuo xelen.

<sup>19</sup> Ma nang bara abo Judeia toxo mölök bara tabo palas tewe e, io, ina dinödöm niang ixo sidien e rua seseng e Kaisar, a king taxin mee Rom, rua ölangen e. Inexalik e kaim kö wewet ne wupuk kö nangadi re e mee Israel.

<sup>20</sup> E xo ose ra werwere e mum ma tinenge arixe me mum, möxösa, e xo maaaa bara mum morobo maras kö unine bara toxo kubus e ma ina uno lölös na. A unine niang toxo kubus e i bira: ire abo Israel ire te xixiset ma Mesaia."

<sup>21</sup> Me idi toxo balu, "Mem kaim kö xikip pe ginigeet meruso Judeia rue nöngön. Ma kaim pe önga tönö ire abo Judeia ixo tenge saban rue nöngön.



22 Lamun mem me maaaa ra ölangen abo dinödöm pe nöngön, möxö mem me ösöxö bara a nangadi xö boxönö te tengen ögat ina mangana lotu u xoro laxa xönan.”

23 Io, idi toxo kubus önga bung bara idi tabo kis baling me Pol. Ma nangadi oleleng saxit toxo wanot kö ina bung urungan kö ina xönö e Pol ixo xisixis könan. Urulo xö puxu ot kö aien, Pol ixo palas tinenge ulamun a kingdom kö God urungan tö idi, ma ixo rörörön lölös sua öturunon te idi meringan köbo warkurai te Moses ma xöbo ginigeet köbo propet bere Jisas ine ewe.

24 Pol ixo eöt ta öturunon e Jisas kö dauleng ke idi xöbo tinenge re ine, lamun a dauleng kabise toxo kumamaa bara idi tabo nunu.

25 Idi toxo egot kaluluonin idi iat, möxösa, idi angen ma nine dinödöm, me idi toxo taru lo ra nuan melamu bere Pol ixo tenge ot mina tinenge rua öxawam abo tinenge re ine. Me ine ixo tengen bira: “A Töxödös ne Tanono ixo tengen a turunon köbo untubu mum nang ixo tengen meringan kö ngalana e propet Aisaia bira:

26 *‘Örö wan pösöt inabo nangadi na ma örobo tengen,  
“Mum morobo ölangen ma ölangen, ma lamun mum korobo  
ölangen kulen te laa,  
me mum morobo wawara ma wawara, lamun mum korobo  
perexulen te laa,”*

27 *möxösa, ina nangadi na te ölölös a baladi.  
Idi te mölök ka ölöngö ma talingine idi,  
me idi te baxut abo marna idi,  
xalik idi texere perexulen mabo marna idi,  
ma texere ölangen kulen mabo talingine idi,  
ma texere ösöxö xulen kölöme xö baladi,  
ma texere tawuxus, me e xere öro idi.’*

28 “Io lamun ina na, e maaaa bere mum morobo ösöxö bere God ixo tile ina tinörön ne aöro urungan te idi a nangadi nang kaim bara abo Judeia, me idi tabo ölangen kulen ine.”\*

30 Me Pol ixo kis eöt ma nine awat kudun kö ngasiene nang ixobo iisik a tuluwok bara irabo eöt tua kinis ee. Ma ixo öga lo idi xirip ewe iang idi toxo önan ta werwere ine.

31 Ma ixo palas tinenge ulamun a kingdom kö God ma ixo eusu ulamun e Jisas Kraiss, a Orong. Ixo pet ma balamasa ma kaim pe öng ixo panak ine.

---

\* **28:28** Dauleng ne ginigeet mesila idi toxo bulus ölaxa xö rina **29** i tengen bira: *Ma nang bara ixoro tengen ina na, abo Judeia toxo wan me idi toxo egot kaluluon te idi.*

## A Ginigeet te Pol urungan köbo ROM

Xö sese önarun ne nuan te Pol uruso xö xönö mee Gris, ixo geet ina ginigeet na urungan köbo Kristien tingan Rom (pere e Aposol 20:2-3). Me Rom ixo lagunon taxin kö öxöno lagunon kirip kö ina axana bung, me Pol ixo maaaa rua nuan urungan te idi rua rorop idi (pere e Rom 1:11-15). Ma lamun ixo eka nuan bang uruso Jerusalem pua isik arabaa xöbo Kristien tingan (15:25-28). Io niang, ixo tile ina ginigeet na urungan köbo Kristien tingan Rom bara idi tabo ösöxö bara ine irabo wan urungan te idi xö inuan te ine urungan Spein (15:23-24). E Pol i koxobola pere bang abo Kristien tingan Rom, io nang, ixo maaaa bölökö bara irabo töngösen idi ulamun a ineöro xö God. A oleleng ne Kristien tingan Rom idi kaim bara abo Judeia, inexalik kaluluonin idi a dauleng ne Judeia bölökö. Me Pol ixo maaaa bara irabo etöngösen maras bara a xuxubus kö God ine nang tar köbo Judeia i koxobo subu. Kaim. God a töxödösine ine ma iri pet eörin a xuxubus se ine. **Me God iri osen bara ine i töxödös bira, nang irabo kure bara öng i töxödös kö wawara re ine nang i nunu re Kraiss (1:16-17).** Ina na a unine ina tinenge na. Ma bara e God irabo kure bara öng i töxödös, io, irabo öro ine. Me Pol ixo etöngösen bara a nangadi xirip, abo Judeia me idi nang kaim bara abo Judeia, idi abo tene saban (1:18-3:20), me idi takarabo eöt tunon iat tua mumuu abo warkurai te God niang e God irabo kure bara te töxödös kö mamaran te ine. Kaim. Inexalik bara öng irabo nunu mon te Jisas Kraiss, io, God irabo marse ine ma irabo kure bara i töxödös, möxösa, e Kraiss ixoro kip tewe abo magingin saban te ire (3:21-26). Ma bara God irabo öro ire bira, i osen bara ine i töxödös ma iri pet eörin a xuxubus se ine nang ixo tengen bara irabo isik a ineöro (3:21, 26). Ma lamun kaim bara re öng i eöt tua mumuu a tatalien deek köbo warkurai te Moses sua xikip ina ineöro. Kaim. Tabo mana nunu mon te Kraiss xarnang e Abaram bölökö ixo nunu xö God (3:27-4:25). Ma nang bara e God iri kure bara ire te töxödös kölöme re Kraiss, i karabo laie re ire. Kaim. A malum i kis se ire me God, möxösa, e Kraiss iri lamus puxus ire urungan te God xarnang abo ais se ine (5:1-11). Ma turunon bere ire xirip toxo kis kö minet, möxösa, ire abo tene saban, inexalik a arabaa tataun te God i taxin saxit köbo magingin saban te ire, io niang, God i isik a to ulorexe urungan te ire (5:12-21). Ma bara iri ölanglanga rewe ire xalik a lölös möxö magingin saban, ire tebele tultul

baling köbo sasaban, inexalik ire ta tultul te Kraiss ma xöbo tatalien töxödös (6:1-23). Ma turunon bara a nangadi tobo wewet abo sasaban (7:7-25), ma lamun ire tokobo kis köbo ene warkurai baling (7:1-6). Kaim. Ire tere langlanga im me ire te to xö lölös möxö Töxödös ne Tanono (8:1-39). Ma ruasa bara abo Judeia tokobo kip lo ina ineöro? I kobo unine bara a xuxubus se God ixoro subu. Kaim. Inexalik möxösa idi tokobo nunu (9:1-11:36). Io, ma bere God iri kure bara ire te töxödös, ire tabo mana muu abo tatalien töxödös (12:1-15:13).

<sup>1</sup> E, e Pol, önga tene tinam möxö tinörön te Kraiss Jisas. Me God ixoro kuwe lo e bere e rabo önga aposol, ma ixo bulus kabisin e rua tinenge ma a atöngösen deek ke ine.

<sup>2</sup> Ma ina atöngösen deek nang e God ixoro xuxubus ulamunon mesila rusu kölöme xö tinenge re ine nang abo propet toxo geet ösu.

<sup>3</sup> Ma ina atöngösen deek na, i wöwörö ulamun a Barok kine, ma toxo kip ine kölöme xö marapun te Dewit, io nang, a tödi ine.

<sup>4</sup> Ma lamun a Töxödös ne Tanono ixo uxileng ine bara a Barok lölös kö God bölök ine nang ixo öraru ine xalik a minet. Me ine im, e Jisas Kraiss, a Orong ke ire.

<sup>5</sup> Ma xö kinis se e kölöme re Kraiss, God ixo tabaa tataunin e ma abalamu re ine bara arabu önga aposol tua silien idi nang kaim bara abo Judeia bere idi tabo rarama ine xö tatalien ne nunu rua ii öraxin a esene.

<sup>6</sup> Mum bölök kaluluonin idi. God ixoro kuwe lo e mum bölök bere mum morobo nangadi mere Jisas Kraiss.

<sup>7</sup> Io, e gegeet urungan te mum a nangadi niang Rom, mum ewe nang e God i maaaa xöba re mum ma ixoro kuwe lo e mum bara a nangadi tunon iat te ine.

A abalamu ma malum urungan te mum meruso re God a Tamana ire, ma meruso re Jisas Kraiss, a Orong.

*Pol ixo maaaa rua unan urso Rom*

<sup>8</sup> Io, ma a sisila ne laa bara xö kinis se ire kölöme re Jisas Kraiss e tengen deek uruso re God ulamun e mum kirip, möxösa, a nangadi xö öxöno lagunon kirip te wöwörö ma a nunu re mum.

<sup>9</sup> Me e isik a kat te e xirip pua tinörön te God nang e wöwörö ma a atöngösen deek ulamun a Barok ke ine. Me God ine ewe nang i eöt tua rengrengen ömaras ulamun a laa ine i ösöxö sik bara i turunon ma i bira, bara xöbo bung kirip e kara mamas sua rengrengen e mum kölöme xöbo sineseng ke e.

<sup>10</sup> E bo seseseng bara arabu eöt tua nuan urungan te mum nang bara Orong i maaaa bie. Axana bung ixo ömat köba

e xo mamaa rua werwere e mum, ma lamun e bo seseseng söxsöxö bara arabo eöt gut im pua nuan ot ta.

<sup>11</sup> E mamaa xöba bara arabo pere e mum pua ratabaa e mum merebo mangana arabaa nang i eöt tua rorop abo tanono e mum rue mum morobo eöt tua tinuu lölös.

<sup>12</sup> Ma nang e tengen bira, a unine bara e mamaa bere ire tabo eöxaxat kaluluonin ire xöbo nunu re ire.

<sup>13</sup> Abo töke kölöme re Krai, e mamaa bere mum morobo maras bere e xo pingit a oleleng ne axana bung bara arabo pere e mum, inexalik a uleng ne lalaa angen i tuu wi sik e ot iat nixinen. Me e xo wingwingit biringan bara arabo kip pebo inone meringan kaluluonin e mum xarnang e xoro kip lo meringan kaluluonin idi xabise ewe nang kaim bölök bara abo Judeia.

<sup>14</sup> Ma a tinörön iat te e bara arabo wan uruso re idi nang te laxa xöbo tatalien ma mangana dinödöm pe idi abo Grik me idi bölök nang tokobo muu inabo tatalien. A tinörön te e bölök bara arabo wan urungan köbo tene nanase me idi nang tokoxobo kip pe ausu raxin.

<sup>15</sup> Ma ina na a unine bara e mamaa xöba rua tinenge ma a atöngösen deek bölök urungan tö mum pingan Rom.

#### *A atöngösen deek ine a lölös kö God*

<sup>16</sup> E kobo munge ulamun a atöngösen deek, möxösa, a lölös kö God i kis kölöme xönan tua öro idi xirip nang te nunu. Abo Judeia idi toxo araun ma melamu im i öro idi nang kaim bara abo Judeia.

<sup>17</sup> Ma ina niang i turunon, möxösa, a atöngösen deek i osen bere God i töxödös ma irabo kure bara öng bölök irabo töxödös. Me God irabo kure bara öng irabo töxödös kö tatalien ne nunu xalik mon. Ma i xarnang a tinenge xö God i tengen bira, "A tödi töxödös irabo to xö nunu re ine."\*

#### *God i laie xöbo tene saban*

<sup>18</sup> Ma lamun God i osen ömaras meruso xö watmaep bara i laie xöbo tatalien ne tinuu talu ine ma abo magingin saban möxö nangadi, idi ewe tobo umungen abo lalaa nang i turunon ulamun e God nang tobo wewet abo sasaban,

<sup>19</sup> möxösa, abo lalaa i eöt bere idi tabo ösöxö ulamun e God, idi te maras sik ulamunon, möxösa, e God iri ömaras idi ulamun.

<sup>20</sup> Urulo xö uxuxis möxö öxöno lagunon idi toxoro maras sik ulamun abo tatalien te ine, abo mangana tatalien nang i

---

\* **1:17** I eöt bölök bara tabo puxus ina rina bira: *Ma ina niang i turunon, möxösa, a atöngösen deek i osen bere God i töxödös ma irabo kure bara öng bölök irabo töxödös. Ruasa, möxösa, God ibo pet eörin abo tinenge re ine, ma irabo kure idi bara te töxödös nang bara tabo nunu. Ma i xarnang a tinenge xö God i tengen bira, "A tödi töxödös irabo to xö nunu re ine."*

kobo eöt bara re öng irabo pere. Toxoro maras sik ulamun a mangana lölös se ine nang i karabo kawam ma bara ine a God. Me idi te maras bira, möxö idi tere pere im abo lalaa nang ixoro uxis. Io nang, idi tekebeöt bara tabo tengen bara idi tokobo ösöxö ine.

<sup>21</sup> A turunon idi toxo ösöxö sik e God, ma lamun idi tokoxobo ölelet ine ma tokoxobo tengen deek urungan te ine. Kaim. Abo dinödöm pe idi ixo laa tataun me idi toxo ot xarnang abo onwat, möxö abo baladi a lak ködö.

<sup>22</sup> A turunon idi toxo tengen bara idi abo tene nanase ma lamun idi toxo ot xarnang abo onwat.

<sup>23</sup> Idi toxo mölök kua lotu wösöt a God ewe nang a lak mariris ma i kebeöt tua minet. Idi toxo kulas a lotu ridi ma toxo lotu wösöt belek abo perewuo xarnang a tödi nang i eöt ta minet, mabo pun, mabo wawaguai, mabo mangana lalaa nang ibo xaxabo.

<sup>24</sup> Möxö ina na, God ixo gan tewe im idi bere idi tabo wewet abo magingin biling eöt mabo mamaa möxöbo kat te idi, ma toxo mumuu abo tatalien möxö minenge möxö lewene aine idi.

<sup>25</sup> Ma a turunon ulamun e God nang toxo maras ulamunon, idi toxo kulas belek kö magingin ne röxröxö möxö lotu wösöt abo lalaa nang God ixo uxis, ma toxo bulus ösu idi iat kö ene inabo lalaa, ma kawaim bere God, ine ewe nang ire tabo ölet ine ulorexe. Ma i turunon saxit.

<sup>26</sup> Ina na a unine bara God ixo ganim tewe im idi bere idi tabo mumuu abo mamaa saban nang a lak minenge. Ma xarna na, a balixilik toxo mölök tewe a tatalien eöt ma niang e God ixo uxis sik biringan te idi me idi toxo muu belek a öng kabise.

<sup>27</sup> Ma i xarnang bölök bira xöbo körö. Idi toxo mölök bara tabo kis arixe ma balixilik eöt ma niang e God ixo uxis sik ke idi bie, ma abo mamaa xöbo körö ixo lelewi xöbo körö xabise. Abo körö toxo muu abo tatalien minenge kaluluonin idi iat ma toxo kip lo a ömokorot eöt iat ma nang idi toxo wan saban könan.

<sup>28</sup> Me idi tokoxobo döxömen bara a laa raxin bara idi tabo ösöxö e God bere ewe ine. Io nang, e God ixo ganim tewe idi bara tabo muu xalik mon abo dinödöm baulang kidi rua wewet inabo tatalien nang i kobo töxödös sua wewet.

<sup>29</sup> Idi tere wöwö im mabo mangana tatalien nang i kobo töxödös, abo sasaban, abo tatalien ne pere neek laa, mabo tatalien biling. Me idi tere wöwö ma tatalien möxö mamaa lamun a kinis se idi xabise, ma tatalien ne arsexomet ma bala kadik bölök, ma tatalien ne lamus öröxröxö nangadi, ma a mamaa möxö ögarin idi xabise. Idi tobo etengen suxume

<sup>30</sup> ma tobo tengen ögarin idi xabise. Idi tobo melmelen-texin e God me idi abo onwat. Idi tobo öbulubun a dauleng kabise me idi abo tene aölolot. Idi tobo öraru abo mangana sasaban maxat. Idi tobo tabuno tame abo nago mabo tata re idi.

<sup>31</sup> Kaim pe nanase runon iat te idi. Idi tekara pet eörin a nang idi tobo tengen. Idi tekara mamaa iat ulamun a öng kabise, me idi tekara marse a nangadi.

<sup>32</sup> A turunon, idi te ösöxö ödeek a töxödösine warkurai te God nang i tengen bara idi nang te pet inabo lalaa na, i töxödös bere idi tabo met. Inexalik idi te wewet sösöxöin belek inabo magingin iat. Ma kaim bara ine xalik mon. Kaim. Idi tobo sixaut lo bölök idi nang te wewet bira.

## 2

### *Kaim pe öng i eöt ta ululo wes a warkurai te God*

<sup>1</sup> Io nang, ewe nöngön nang u kure a öng kabise bara i saban, i kobo eöt te nöngön tua tinenge wi ulamun abo magingin saban te nöngön, möxösa, abo lalaa u xoro kure a öng ulamun, io, u kure öbaling nöngön. Ruasa, möxösa, nöngön nang u ekure biringan, u bo wewet iat bölök inabo mangana magingin.

<sup>2</sup> Me ire ta ösöxö nang bere God irabo kure idi niang tobo wewet inabo mangana magingin, a warkurai te ine i töxödös.

<sup>3</sup> Nöngön önga tödi mon ewe nang u kure idi bara idi te pet a sasaban, ma nangen iat u wewet inabo mangana tatalien. Nöngön u döxömen bara u eöt ta ulo wes a warkurai kö God?

<sup>4</sup> Bule, u öbulubun a tatalien mamaran te ine nang ibo isik köbanin urungan te nöngön, ma bere ine ibo bala malus sö nöngön ma bara a warkurai tine i karabo ot saxit urungan te nöngön? U kobo perexulen bara a tatalien mamaran te God i lamus nöngön tua dinödöm puxus?

<sup>5</sup> U onwat köba ma u mölök bara örobo dödöm puxus, io nang, u tagure a laie nang irabo wan urungan te nöngön kö bung möxö laie xö God nang a warkurai töxödös se ine irabo wanot maras.

<sup>6</sup> Ine ewe nang "*irabo balu wuxus a nangadi xirip eöt mabo mangana tatalien te idi.*"

<sup>7</sup> A dauleng idi tobo wewet sösöxöin abo tatalien deek. Ma nang idi te wewet bira i maras bere idi te wawara siwin a ngas sua xikip a mariris ma a ese deek ma a kinis nang kaim pe minet könan. Me God irabo balu wuxus idi ma to ulorexe saxit.

<sup>8</sup> Inexalik a dauleng kabise, idi te pere neek abo lalaa rua öraxin idi iat. Idi te kasen tewe a turunon me idi te muu abo tatalien nang i kobo töxödös. Me God irabo balu wuxus im idi ma laie raxin.

<sup>9</sup> Abo kinadik mabo tiip taxin irabo ot pösöt a nangadi xirip nang idi te pet abo sasaban. Turunon saxit irabo ot köbo Judeia, ma lamun irabo ot bölök kö idi nang kaim bara abo Judeia.

<sup>10</sup> Ma lamun a mariris ma a kinis taxin ma malum irabo wan urungan kö nangadi xirip nang idi te pet a dedeek. Turunon saxit irabo ot köbo Judeia, ma lamun irabo ot bölök kö idi nang kaim bara abo Judeia,

<sup>11</sup> möxösa, e God i karabo top pe öng ma irabo ögarin tataunin te öng kabise.

<sup>12</sup> Io, idi xirip nang tokobo kip lo abo warkurai te Moses me idi te pet a sasaban, io, idi tabo iuo esexere. Me idi xirip im nang idi te kip lo abo warkurai te Moses ma te pet a sasaban, io, inabo warkurai irabo kure idi bara tabo kip a aömokorot.

<sup>13</sup> Ina na i turunon, möxösa, idi im nang te ölangen iat mon abo warkurai te Moses, God i karabo kure bere te töxödös kö wawara re ine. Kaim. Idi nang idi te muu abo warkurai, idi iat mon nang e God irabo kure bere te töxödös.

<sup>14</sup> Turunon saxit, idi nang kaim bara abo Judeia idi tokobo kip lo abo warkurai, inexalik idi te pet eörin inabo warkurai, möxö kölöme re idi iat idi te ösöxö bara tabo mana pet bira. Ma nang idi te pet bira, idi te pet ot a dauleng ne warkurai te idi iat. Ma kaim pe laa bere idi tokobo kip lo abo warkurai te Moses.

<sup>15</sup> Idi te osen bara i xarnang bara idi tere geet sik kölöme xöbo kat te idi abo arile nang abo warkurai te Moses i tengen bara ire tabo mana pet. I xarnang bira mon nang abo dinödöm pe idi i rengrengen osen ulamun abo mangana tatalien sa idi te pet. A dauleng ne axana bung abo dinödöm pe idi i tengen ömaras bere idi te pet a sasaban ma dauleng ne axana bung bere idi te pet a dedeek.

<sup>16</sup> Ma irabo xarnang bira xö ina bung nang e God irabo kure abo dinödöm suxume möxö nangadi eöt ma atöngösen deek e etöngösen min. Ma iri isik im ina tinörön möxö pet warkurai xö limine e Jisas Krai.

### *Abo Judeia te lexe abo warkurai*

<sup>17</sup> Me nöngön bölök, bule re nöngön? U tengen bara a Judeia nöngön. Ma u xoro sulo a nunu re nöngön köbo warkurai te Moses ma u bo eölolot bara nöngön mere God.

18 Nöngön u bo maras sik kö niang e God i maaaa bere örobo pet, ma u eöt tua werwere xulen abo lalaa nang i deek köba, möxö u xo eusu xöbo warkurai te Moses.

19 Nöngön u nunu runon iat bere u silien ödeek abo pulo ma bere nöngön a bibio urungan te idi nang idi te kis kö ködö.

20 Nöngön u nunu bölök bere nöngön a tene ausu rua ötöxödös idi nang idi tokobo ösöxö a dedeek ma a sasaban, ma bara a tene ausu nöngön tingan te idi nang tokobo maruxo xö dinödöm pe idi. Ma u döxömen bira, möxö uru uruoxe abo warkurai te Moses, ma inabo warkurai niang i osen ömaras a nangadi ulamun a turunon ma a nanase.

21 Me nöngön im, u usu idi xabise. Ruasa bara u kobo usu öbaling nöngön? U bo etöngösen bara re öng i karabo wuwulo, inexalik bule, nöngön u kara wuwulo?

22 U bo rengrengen bara öng i bele maru arixe ma öng i kobo re ine, inexalik bule, nöngön u kara pet bie? U bo melentexin abo perewuo, inexalik bule, nöngön u kara pulo abo perewuo möxöbo gunon lotu re idi?

23 U bo ölolot bere nöngön u xoro kip lo abo warkurai te Moses. Inexalik bule, nöngön u kara öbulubun a esene God nang u lexe inabo warkurai?

24 I xarnang mon a tinenge xö God idi toxo geet i tengen bira, *"Idi nang kaim bara abo Judeia, idi te tengen ögarin e God, a unine re mum abo Judeia."*

25 Io, i turunon bara a tatalien möxö kuru lewene aim irabo top nöngön nang bara u tame abo warkurai te Moses. Ma lamun nang bara u lexe inabo warkurai i xarnang bere idi tokobo kuru a lewene aim.

26 Nang bere idi nang tokobo kuru a lewene aine idi, idi te muu abo arile möxö inabo warkurai, God irabo perexulen idi xarnang bere tere kuru abo lewene aine idi.

27 Me nöngön, uru kip lo inabo warkurai idi toxo geet ösu ma uru kip lo bölök a tatalien möxö kuru lewene aim. Ma lamun a tödi nang tekobo kuru a aine, ma lamun i muu abo warkurai, io, ine irabo kure belek nöngön bara a tene lexe warkurai nöngön.

28 Io niang, a tödi i kobo Judeia runon nang bara ine a öng möxö marapun möxöbo Judeia mon. Ma nang bara idi te kuru a lewene aine, ina niang i kobo uxileng im bere ine önga Judeia runon.

29 Kaim. A tödi niang a Judeia runon, ine niang a Judeia meruso kölöme runon te ine. Ma a tatalien runon möxö kuru lewene aine a tödi, ina auxileng i ot tunon meruso xö kat te ine. A Töxödös ne Tanono i pet ine, ma i kobo ot möxöbo warkurai te Moses toxo geet ösu. Ma ina mangana



tödi i karabo kip a aölelet te ine mera xö nangadi. Kaim. Irabo kip lo meruso xö God.

### 3

#### *A xuxubus se God i karabo xuxulas*

<sup>1</sup> Io niang, nang bara öng a Judeia ine, irabo top bulengin ine? Ma a tatalien ne kuru lewene aine a tödi irabo isik ot a lasanene deek ke ine?

<sup>2</sup> Nang! A rorop taxin iri ot pösöt nöngön bara a Judeia nöngön. Ma a laa raxin i bira, bere God ixoro isik a tinenge rine ringan tö idi abo Judeia.

<sup>3</sup> Irabo bule nang bara dauleng ke idi tokobo nunu? Bule, abo tatalien ne tabuno nunu re idi i eöt tua wewet e God bara i karabo pet eörin a niang ine ixo tengen?

<sup>4</sup> Kaim tunon iat! Nang bara i ot maras bara nangadi xirip abo tene atöxö, inexalik ire te perexulen sik bere God ibo wewet eörin a niang i tengen. I xarnang a tinenge xö God idi toxo geet i tengen bira:

*“Irabo ot maras bara u töxödös köbo tinenge re nöngön, ma bara tabo puk nöngön, irabo ot maras bara inabo auwupuk i kobo turunon.”*

<sup>5</sup> Inexalik bara abo magingin saban te ire i osen ömaras bere God i töxödös, io, ire tabo tengen bule? I wawara bere God i kobo töxödös nang i laie re ire ma i ömokorot ire? (Maris! Nang e tenge bira, e muu a mangana dinödöm kö nangadi mon.)

<sup>6</sup> Kaim tunon iat! Nang bere God i kexebe töxödös, ine i xebe eöt bule rua kure a öxöno lagunon?

<sup>7</sup> Ma inexalik a öng i xebe tengen gut bara, “Idi toxo öt abo tatalien tunon te God ma abo tatalien te e nang i tawes lo xalik a turunon. Ma abo magingin saban te e bira i osen ömaras bere God i kisisik kölöme xö turunon, io nang, i ii öraxin a mariris se ine. Io nang, ruasa bere God i kure bang bere e a önga tene sasaban?”

<sup>8</sup> A dauleng ne nangadi tobo rengrengen ögarin e nang tobo röxröxö bara e tengen bira: “Go, ire tabo pet abo sasaban, io nang, a dedeek irabo ot.” Io, idi te maaaa lo iat ina ömokorot niang irabo ot pösöt idi.

#### *Kaim pe öng i töxödös kö wawara xö God*

<sup>9</sup> Io, ire tabo tengen im bule? Ire abo Judeia, ire tere kip a kinis i deek ke idi nang kaim bara abo Judeia? Kaim turunon arixe! Möxösa, e xoro osen bara abo Judeia me idi nang kaim bara abo Judeia bölök, idi xirip te kis kö ene lölös möxö magingin saban.

<sup>10</sup> I xarnang a tinenge xö God toxo geet i tengen bira:

*“Kaim pe öng i töxödös. Kaim tunon iat te öng.*

*11 Kaim pe öng i maras ulamun abo turunon te God, ma kaim pe öng i susuxun ulamun e God.*

*12 Idi xirip tere tawes lo, idi xirip arixe, idi tere laa tataun sik.*

*Kaim pe öng ibo wewet a dedeek.*

*Kaim tunon iat te öng.*

*13 Abo ngalna idi a lak maxus xarnang a maöt idi te kin sik. Idi tobo lamus öröxröxö a nangadi mabo kamed.*

*Abo buluno idi i mele eöt mabo mangana si saban.*

*14 Abo ngaladi i wöwö ma tinenge kinadik. Idi tobo tenge köö a nangadi.*

*15 Idi a lak saxit mon tua arsexomet.*

*16 Ma xöbo nuan te idi, tobo ögarin a to xö nangadi ma tobo isik a tiip pe idi.*

*17 Idi tokobo ösöxö ra bulbulus a malum.*

*18 Kaim idi ma binuut uruso xö God.”*

*19 Me ire te ösöxö im bara a lasanene nang abo warkurai xö God i tengen, i tengen bira rö idi nang te kis kö ene inabo warkurai, bara kaim pe öng irabo eöt tua tinenge wi abo sasaban te ine ma bara God irabo eöt tua kure a öxöno lagunon kirip.*

*20 Ruasa, möxösa, God i karabo kure bara re öng i töxödös kö mamaran te ine xö tatalien ne mumuu abo warkurai. Kaim. Ma lamun abo warkurai te ine i ömaras belek ire bere ire te pet a sasaban.*

*God i kure bara öng i töxödös nang i nunu*

*21 Ma lamun na im e God iri osen bara irabo kure re öng bara i töxödös, ma nang i pet bira i kara pere bara re öng i muu abo warkurai te Moses. Ma inabo warkurai iat mabo tinenge möxöbo propet i etöngösen maras bölök bara irabo pet bie.*

*22 Ma xö nunu re idi re Jisas Krais, God i kure bere te töxödös. Ma i ekure biringan tö idi xirip ewe idi te nunu, möxö idi xirip te eöt sik mon.*

*23 Me idi te eöt, möxösa, idi xirip te pet a sasaban me idi tere subu rewe xalik a mariris se God.*

*24 Ma lamun God i kure bere idi te töxödös kö abalamu re ine. Ma ina warkurai na i pet tö idi a arabaa tataun mon. Ma ixo eöt tua wewet bira nang e Krais Jisas ixo kun ölanglanga idi.*

*25 Me God ixo isik ot ine xarnang önga arabaa rua ruruu wi a laie re ine. Ma ina arabaa i rörörön bira re idi nang te nunu xö dee re ine. Mesila God ixo pere tataun abo magingin saban idi toxo pet ma kaim ine xo ömokorot idi,*

io nang, ixo isik ot ina mangana arabaa rua osen bara i töxödös.

<sup>26</sup> Ma ixo pet bira rua osen kö ina axana bung na bara i töxödös. Möxö ina na, i osen bara i eöt tö ine bara i töxödös me ine iat baling bölök ewe irabo kure bere idi te töxödös nang te nunu re Jisas Kraiss.

<sup>27</sup> Io niang, i eöt bere ire tabo eölolot? Kaim. Ma lasanene a unine? Bule, abo tatalien te ire i eöt mabo warkurai? Kaim. Ma lamun ire tebele eölolot, möxösa, ire te nunu mon.

<sup>28</sup> Ma i eöt bere ire tabo tengen bira, möxösa, ire te perexulen bere God i kure a öng bara i töxödös, möxösa, i nunu, ma kaim bara i mumuu abo warkurai te Moses.

<sup>29</sup> Nang bara i kexebe ot bira, irabo wawara bere God ine a God köbo Judeia xalik mon. I turunon ina niang? Bule, e God i kobo God te idi nang kaim bara abo Judeia bölök? Masa! A God te idi niang kaim bara abo Judeia bölök,

<sup>30</sup> möxösa, önga God kalik mon angen. Me ine ewe nang irabo kure abo Judeia ewe nang toxobo kuru a lewene aidi, bara idi te töxödös, möxösa, te nunu. Me ine bölök nang irabo kure bere idi nang tokobo kuru a lewene aidi, bara idi te töxödös bölök kö ina mangana nunu xalik mon.

<sup>31</sup> Io niang, nang ire te tengen bira ulamun a tatalien ne nunu, i wawara bere ire te döxömen bara a laa tataun inabo warkurai te Moses? Kaim tunon iat. Ire te osen bara a tinörön möxöbo warkurai i lölös.

## 4

*God ixo kure bere Abaram i töxödös möxösa ixo nunu*

<sup>1</sup> Io, me ire tabo tengen im bule ulamun e Abaram, a untubuno ire, nang a tödi xarnang mon ire? Ine ixo örasen bule ulamun a tatalien te God bara i kure bara a öng i töxödös?

<sup>2</sup> Nang bara i turunon bere God ixo kure bere i töxödös köbo tatalien deek ke ine, io, a unine nangen bere Abaram irabo eölolot. Inexalik e God i koxobo pere ine bira.

<sup>3</sup> Abo tinenge xö God toxo geet i tengen bira, "*Abaram ixo nunu xö God me God ixo perexulen ine bere i töxödös sik kö wawara re ine.*"

<sup>4</sup> Io, ma bara a öng i rörön, idi tekara perexulen a xinuxun tine bara a arabaa tataun. Kaim. Idi te perexulen ine bara a inone i eöt mabo tinörön te ine.

<sup>5</sup> Inexalik bule xö tödi nang i kobo rörön eöt mabo warkurai ma lamun i nunu xö God ewe nang ibo kure bere idi abo tene sasaban te töxödös? Io, God irabo perexulen lo a nunu re ine xarnang bara ina tödi i töxödös kö wawara rine.

<sup>6</sup> Me Dewit ixo tengen bōlōk ina laa nang ixo rengreng ulamun a kinis deek i wan pōsōt a tōdi nang i kobo muu abo tatalien eōt mabo warkurai te Moses ma lamun e God i perexulen ine bara i tōxōdōs. Ma ixo tengen bira:

<sup>7</sup> *“Idi tere kip a kinis deek*

*ewe nang e God iri dōxōmen tewe abo tatalien mōxō lexe warkurai te idi,*

*ma abo sasaban te idi iri tawi.*

<sup>8</sup> *A tōdi iri kip a kinis deek*

*ewe nang a Orong i karabo perexulen ine bara iri pet abo sasaban.”*

<sup>9</sup> Bule im, idi abo Judeia nang toxobo xurxuru a lewene aidi, idi xalik mon tere kip lo ina kinis deek, ma kaim bere idi niang tokobo kuru a lewene aidi? Me ire te tengen bere God ixo perexulen lo a nunu re Abaram xarnang bere Abaram i tōxōdōs kō wawara re ine.

<sup>10</sup> Lause e God ixo perexulen ine bira? Mesila bara melamu xō bung idi toxo kuru a lewene aine? Kaim bara melamu. Ma lamun, mesila.

<sup>11</sup> Ma toxo kuru a lewene aine xarnang ōnga auxileng nang ixo osen bere God ixo kure bara i tōxōdōs kō nunu rine xō ina axana bung niang iat bang kaim kō kuru a lewene aine. Io niang, ine a untubuno idi ewe nang kaim kō xurxuru abo lewene aidi, ma lamun idi te nunu, me God i perexulen idi bere te tōxōdōs kō wawara re ine.

<sup>12</sup> Me ine a untubuno idi bōlōk abo Judeia ewe nang toxobo xurxuru a lewene aidi, inexalik idi xalik mon ewe nang tobo mumuu bōlōk abo ngasiene xexene xō tatalien mōxō nunu nang a untubuno ire e Abaram ixo pet nang bang idi kaim kō xurxuru a lewene aine.

<sup>13</sup> Nang e God ixo xuxubus singan te Abaram mabo untubuno ewe nang tabo wanot melamu bere idi tabo unan lo a ōxōno lagunon, ina xuxubus i koxobo wanot kō tatalien ne muu warkurai. Kaim. Ixo xuxubus sik bira, mōxōsa, e God ixo perexulen e Abaram bara i tōxōdōs kō wawara re ine xō nunu re ine.

<sup>14</sup> Nang bere idi nang te muu abo warkurai, idi tabo unan lo bira, io, i xebe osen bara a tatalien ne nunu i laa tataun ma a xuxubus i kaim pe inone,

<sup>15</sup> mōxōsa, abo warkurai te Moses i isik ot a laie xō God. Inexalik nang bara kaim pe warkurai tingan ee, kaim bōlōk ke tatalien ne lexe warkurai.

<sup>16</sup> Io nang, ire te kip a xuxubus kō nunu re ire bara a xuxubus irabo xarnang a arabaa tataun meringan kō abalamu. I wanot mōxō abalamu lamun irabo mana wan tunon iat urungan kirip kōbo untubuno e Abaram ewe nang tabo wanot melamu, ma kaim pe ōnga laa irabo eōt tua

tinuu wi ine. I karabo wan kalik mon urungan te idi nang tere kip lo abo warkurai te Moses, ma lamun irabo wan urungan bölök ke idi nang te muu a mangana nunu re Abaram. Ine a untubuno ire xirip.

<sup>17</sup> I xarnang a tinenge xö God idi toxo geet i tengen bira, *“E xoro bulus nöngön xarnang a untubuno idi a oleleng ne bung marapun.”* God ewe nang e Abaram ixo nunu re ine ixo perexulen ine bara a untubuno ire. Ine a God ewe nang i isik a to xöbo minet ma ibo rengrengen abo lalaa nang i kobo laa kis bang bara irabo wanot.

<sup>18</sup> Ixo wawara sik urungan te Abaram bara a xuxubus se God i karabo eöt tua wanot turunon. Inexalik e Abaram belek ixo nunu, möxösa, ixo döxömen iat bara ina xuxubus irabo wanot turunon. Io niang, Abaram im a untubuno idi abo oleleng ne bung marapun kö öxöno lagunon xarnang mon e God ixo tengen tö ine bie, *“Abo untubuno e nöngön tabo oleleng bie.”*

<sup>19</sup> Abaram ixo perexulen bara a aine ixo eka minet, möxösa, ixo eöt im ma önga mar ne awat. Ma ixo perexulen e Sera bölök bie bara a axana bung ke ine möxö kip barok ixoro kawam im. Inexalik a nunu re ine i koxobo subu ulik.

<sup>20</sup> Abaram ixo perexulen öbaling idu bira, ma lamun nang ixo dödöm ulamun a xuxubus, kaim ine xo nine dinödöm. Inexalik ixo tuu dik sik kö nunu re ine. Me God ixo ölölös a nunu re ine nang e Abaram ixo ölet ine,

<sup>21</sup> ma ixo ösöxö xirip sik bere God irabo eöt tua wewet eörin kö nang ixoro xuxubus sik.

<sup>22</sup> Ma ina niang a unine bira, *“God ixo perexulen ine bere i töxödös sik kö wawara re ine.”*

<sup>23</sup> Ma ina tinenge na, *“God ixo perexulen ine bira,”* tokoxobo geet ulamun e Abaram kalik mon. Kaim.

<sup>24</sup> Idi toxo geet ine rua gene ire bölök nang e God ixo perexulen ire bere ire te töxödös kö wawara re ine. God irabo pet bira rö ire ewe nang te nunu re ine ewe nang ixo öraru e Jisas a Orong ke ire xalik a minet.

<sup>25</sup> Ine ewe nang e God ixo isik tewe bara irabo met kelen abo sasaban te ire, me ine bölök ewe nang e God ixo öraru öbaling ine bere ire tabo töxödös kö wawara re ine.

## 5

### *Ire abo ais me God*

<sup>1</sup> Io nang, a malum i kis im pe ire arixe me God kö kinis se ire kölöme xö Orong ke ire, e Jisas Kraiss, möxösa, xö nunu re ire God iri kure bara ire te töxödös kö wawara re ine.

<sup>2</sup> Ma xö nunu re ire, e Kraiss iri lamus ölaxa ire urungan kö abalamu nang e God ixoro tabaa tataunin ire min. Me ire

tobo tuu sik kö ina abalamu me ire tobo axanan, möxösa, ire te xixiset ma nunu bara ire tabo uruoxe a kinis deek nang i ot meriso xö maririsine God.

<sup>3</sup> Ma kaim bara ina na xalik mon. Kaim. Ire te axanan bölök köbo kinadik ke ire, möxösa, ire te ösöxö bara ina kinadik ibo wewet ot a tatalien möxö tinuu lölös kölöme xöbo tiip.

<sup>4</sup> Ma nang ire te tuu lölös bira xöbo tiip, i ot maras bara inabo tiip iri könönöin ire, ma lamun ire kaim bara abo mangana duöng nang tabo subu. Ma bara ire abo mangana duöng bira, io, i eöt tö ire rua xixiset ma nunu bara ire tabo uruoxe a kinis deek.

<sup>5</sup> Ma nang ire te xixiset ma nunu bira, ire tekarabo kis kere minenge, möxösa, God iri öwöwö abo balana ire arixe ma abalamu nang ixo tabaa ire ma Töxödös ne Tanono.

<sup>6</sup> Io, xö ina axana bung eöt iat ma maaaa xö God, nang ire tekebeöt tua wewet im pe laa, Kraiss ixo met tua gene ire ewe nang toxo tuu rewe xalik e God.

<sup>7</sup> I lölös sik iat bara re öng irabo met tua gene önga tene töxödös. Ma lamun i turunon bölök bara re öng irabo met gut tua gene a önga tödi deek bira.

<sup>8</sup> Ma lamun God ixo osen ömaras ire bara ine iat i maaaa rö ire bira, bara nang ire toxo tene sasaban sik bang, Kraiss ixo met tua gene ire.

<sup>9</sup> I turunon bara xö dee re Kraiss, God ixoro kure bara ire tabo töxödös kö wawara re ine. Ma nang bara ina na i turunon, io, i turunon saxit bara Kraiss irabo mana öro ire xalik a bala laie re God!

<sup>10</sup> Io, nang ire toxo melentexin e God, xö minet möxö Barok ke ine, God ixo lamus puxus ire urungan te ine xarnang abo ais se ine. Ma nang bara ina na i turunon, io, i turunon saxit bara xö to xö Barok ke ine, God irabo mana öro ire, möxösa, ixoro lamus puxus ire urungan te ine xarnang abo ais se ine bira!

<sup>11</sup> Ma kaim bara ina na xalik mon. Ire tobo axanan bölök kö God, möxösa, a Orong ke ire, e Jisas Kraiss, ixoro lamus puxus ire urungan te God xarnang abo ais se ine.

### *Adam me Kraiss*

<sup>12</sup> Io, önga tödi mon ixo pet a sasaban, ma xö ina magingin na a magingin saban ixo laxa xö öxöno lagunon ma ixo bulus ot a tatalien ne minet. Ma xö ina mangana ngas mon niang, a minet ixo wan sik kö nangadi xirip, möxösa, idi xirip toxo pet a sasaban.

<sup>13</sup> Io, i turunon bara a magingin saban ixo kis sa xö öxöno lagunon mesila xöbo warkurai te Moses ixo ot. Ma lamun i kebeöt bara idi tabo tengen kere öng bara i pet a sasaban nang kaim bang ke warkurai.

<sup>14</sup> Inexalik a nangadi meringan kö bung ke Adam ot kö bung ke Moses idi toxo kis kö ene a lölös möxö minet, idi iat bölök ewe nang tokoxobo pet tebo sasaban eöt ma tatalien möxö lexe warkurai xarnang Adam ixo pet. Me Adam a önga malalar turunon möxö öng nang irabo wanot malamü.

<sup>15</sup> Ma lamun a arabaa i koxobo rörön eöt ma tatalien möxö lexe warkurai. A turunon bara idi a oleleng toxo met, möxösa, ina önga tödi xalik mon ixo lexe a warkurai. Ma lamun a abalamu re God ma a arabaa nang a önga tödi, e Jisas Krais, ixo isik meringan kö abalamu re ine, io, ina niang ixo taxin köba ma ixo sen pi idi a oleleng!

<sup>16</sup> Ma ina arabaa i xabise xö inone nang i wanot kö magingin saban möxö önga tödi. Adam ixo pet önga magingin saban, ma a inone ina önga magingin saban kalik mon i bira, bara God ixo kure bara irabo mana ömokorot ine. Ma lamun a arabaa belek ixo ot, möxösa, toxo pet a oleleng ne magingin saban, ma a inone ina arabaa i bira, bara God irabo kure bara öng i töxödös kö wawara re ine.

<sup>17</sup> A nangadi toxo kis kö ene a lölös möxö minet, möxösa, ina önga tödi xalik mon ixo lexe a warkurai. Ma a unine möxö ina önga tödi mon. Inexalik a inone tinörön te önga tödi Jisas Krais i taxin köba xö minet. Idi ewe nang te kip a abalamu raxin kö God nang i tabaa tataunin idi min tua kure bara idi tabo töxödös kö wawara re ine, io, idi tabo kip a to ma tabo bulus ösu a minet.

<sup>18</sup> Io, a inone önga magingin saban kalik mon i bira, bara God ixo kure bara irabo ömokorot a nangadi xirip. Ma xarnang bira, a inone önga tatalien töxödös kalik mon i bira, bara God ixo kure bara nangadi xirip te töxödös kö wawara re ine me idi tabo to.

<sup>19</sup> Ma xarnang e God ixo kure bara idi a oleleng idi abo tene sasaban, möxösa, ina önga tödi mon i koxobo tame a tinenge, io, God irabo kure bölök bara idi a oleleng tabo töxödös kö wawara re ine, möxösa, ina önga tödi xalik mon ixo tame a tinenge.

<sup>20</sup> Io, abo warkurai te Moses ixo wanot im bara irabo maras bara abo magingin saban i oleleng saxit. Ma lamun bara abo magingin saban ixo oleleng saxit bira, io, a abalamu nang ine a arabaa tataun ixo saxit belek im inabo magingin saban.

<sup>21</sup> Ma a nangadi toxo kis kö ene lölös möxö magingin saban ma toxo met. Ma i bira bölök, ewe idi nang e God irabo kure bara te töxödös kö wawara re ine, idi tabo kis kö ene lölös möxö abalamu nang ine a arabaa tataun, ina

abalamu nang irabo isik a to ulorexe urungan te ewe idi nang te kip e Jisas Kraiss, a Orong ke ire.

## 6

### *Ire toxo met kalik a lölös möxö magingin saban*

<sup>1</sup> Io nang, ire tabo tengen bule im? Bule, i deek bara ire tabo wewet iat bang abo magingin saban tua ina abalamu nang ine a arabaa tataun irabo taxin köba im?

<sup>2</sup> Kaim tunon iat! Ire toxoro met kalik a lölös möxö magingin saban. Bara bule nang bara ire tabo kis baling kö ene ine?

<sup>3</sup> Bule, mum muru döxömen taun bara ire xirip ewe nang toxoro kip baptais kölöme re Kraiss Jisas, ina na i osen bara ire toxoro met arixe me ine?

<sup>4</sup> Io, i xarnang mon bara idi toxo pömös ire arixe me ine xö minet nang ire te kip baptais sua ire tabo to xarnang e Kraiss. A lölös nang i deek köba meriso re Mama ixo öraru ine xalik a minet. Xarnang bölök, irabo eöt tö ire bara ire tabo kis arixe ma önga mangana to maxat,

<sup>5</sup> möxösa, nang bara ire te parap arixe me ine xö minet te ine, io, turunon saxit ire tabo parap sik arixe me ine xö tinaru baling ke ine.

<sup>6</sup> Ma na i maras, möxösa, ire te ösöxö bara a mangana to maut te ire ixo met arixe me ine lömö xö öxöno sölöxöröp bara tekarabo kis bang kö ene a lölös möxö magingin saban, bara ire tekarabo tultul baling im möxö sasaban,

<sup>7</sup> möxösa, ewe re öng iri met, iri langlanga rewe xalik im a lölös möxö magingin saban.

<sup>8</sup> Inexalik nang bara ire toxoro met arixe me Kraiss, ire te nunu bara ire tabo to bölök arixe me ine,

<sup>9</sup> möxösa, ire te ösöxö bara i karabo met baling. Ruasa, möxösa, God ixo öraru rewe ine xalik a minet. Masa, i karabo kis baling kö ene lölös möxö minet.

<sup>10</sup> Ine ixo met kö önga axan mon. Ma i eöt. I karabo met baling. Inexalik kö mangana to re ine na, i roro rua gene e God.

<sup>11</sup> Xarnang bira bölök, mum morobo mana perexulen e mum iat bara mum moxoro met kalik a lölös möxö magingin saban, ma bara mum mo roro xö kinis se mum kölöme re Kraiss Jisas sua gene e God.

<sup>12</sup> Io nang, ganim e mum pa aut lo a magingin saban tua kure abo aimum, a mangana aine mum nang irabo met mon. Ma xalik mum morobo tame abo maaaa saban te ine.

<sup>13</sup> Ganim e mum pa isik ot abo xönö aimum urungan kö magingin saban bara a sasaban irabo rörön arixe min tua



wewet abo tatalien nang i kobo töxödös. Ma lamun mum morobo mana isik ot belek e mum iat urungan kö God, möxösa, mum moxoro met, ma lamun na im mum moro to tewe xalik a minet. Me mum morobo mana isik abo xönö aimum urungan te ine bara irabo rörön arixe min tua wewet abo tatalien töxödös.

<sup>14</sup> A magingin saban i karabo silien tewe e mum arixe ma lölös se ine iat, möxösa, mum kobo kis kö ene warkurai, inexalik mum mo kis kö ene a abalamu nang ine a arabaa tataun.

*Ire abo tultul köbo tatalien töxödös*

<sup>15</sup> Io, ire tokobo kisisik kö ene warkurai ma lamun kö ene abalamu nang ine a arabaa tataun. Io niang, ire tabo tengen bule im? Bara bule, i deek bara ire tabo pet abo sasaban? Kaim turunon iat!

<sup>16</sup> Mum morobo mana ösöxö bara nang mum mo isik tewe e mum kö öng kua rarame ine xarnang abo tultul te ine, io, i turunon bara mum mo tultul im kö ina tödi iat mon nang mum mo rarame ine. I eöt bara mum abo tultul kö magingin saban nang i silien sik e mum urungan kö minet, bara i eöt bara mum abo tultul möxö tatalien ne tame tingenge nang i silien sik e mum urungan kö God ewe irabo kure bere mum mo töxödös kö wawara re ine.

<sup>17</sup> I turunon bara mesila mum moxobo tultul sik kö magingin saban. Ma lamun God ixo bulus ot a inausu bara mum morobo kis kö ene, me mum moxo tame köbanin ina inausu. Möxö ina na, ire tabo tengen deek kö God.

<sup>18</sup> God iri ölanglanga rewe e mum kalik a lölös möxö magingin saban, me mum mo tultul im köbo tatalien töxödös.

<sup>19</sup> Nang e tengen bira, e osen a önga malalar kö mangana kinis se ire mera xö pu, möxösa, i malus bara mum morobo muu abo sasaban. I turunon bara mesila mum moxobo isik abo xönö aimum pua tultul im köbo magingin biling mabo magingin saban nang ixo lamus e mum rua wewet abo saban nang i saban esexere. Ma bira bölök, na im mum morobo mana isik inabo xönö aimum pua tultul köbo tatalien töxödös, ma möxö ina na, mum morobo madakdak tewe xalik a sasaban.

<sup>20</sup> Xö axana bung nang mum moxo tultul kö magingin saban, kaim pe lölös köbo tatalien töxödös bara irabo lamus e mum pua rarame ine.

<sup>21</sup> A mangana inone sa nang mum moro kip lo möxö inabo mangana magingin saban niang na im mum mo menge ulamunon? Inabo lalaa iri bulus e mum kö minet.

<sup>22</sup> Ma lamun na im God iri ölanglanga e mum kalik a lölös möxö magingin saban ma muru tultul im pe ine, ma a

inone, a kinis i madakdak kalik abo sasaban. Io nang, mum morobo kip a to ulorexe saxit.

<sup>23</sup> Ruasa, möxösa, a xinuxun möxö magingin saban, ine a minet. Ma lamun a arabaa xö God nang i tabaa tataunin ire min, ine a to ulorexe saxit nang i kis kölöme re Krai Jisas, a Orong ke ire.

## 7

### *Ire tere langlanga xalik abo warkurai*

<sup>1</sup> Abo töke kölöme re Krai, mum moro maras turunon ulamunon ina niang nang e eka rengrengan, möxösa, mum kirip mo ösöxö ulamun abo warkurai, bara a öng i kis kö ene a lölös möxö warkurai nang ine nangen i to sik.

<sup>2</sup> Io, a warkurai i kure bara a önga une alolo i xuxubus sik arixe ma usuono nang ina tödi nangen bang i to sik. Ma lamun nang bara a usuono i met, a une iri langlanga xalik a warkurai möxö inalolo biringan.

<sup>3</sup> Io, möxö ina na, nang bara a une i elolo a tödi xabise nang bang a sila ne usuono nangen i to sik, io, ire tabo tengen bara a une iri pet a magingin ne ilawa. Ma lamun nang bara a usuono iri met, a une iri langlanga im kalik ina warkurai, me ire tekexebe tengen bere ine iri pet a magingin ne ilawa. A laa tataun bara i elolo a önga tödi xabise.

<sup>4</sup> Ma i bira bölök kö mum abo töke. Xö winara möxöbo warkurai te Moses, mum moxoro met tewe xalik a lölös möxöbo warkurai, möxösa, mum kölöme xö aine Krai. Io niang, mum mo xuxubus sik kö öng kabise, ina tödi nang e God ixo öraru ine xalik a minet. Me mum mere Krai bira, bara mum morobo o a pasuno rua gene e God.

<sup>5</sup> Io, nang ire toxo kis kö ene a lölös mera xö pu kölöme re ire, abo maaaa saban nang abo warkurai te Moses ixo örarik, toxo rörön kölöme xö aine ire, io, ire toxo o pasuno eöt ma minet.

<sup>6</sup> Inexalik na im, ire tere langlanga xalik a lölös möxöbo warkurai te Moses, möxösa, ire tere met tewe xalik inabo niang ixo kubus sik ire. Io nang, ire abo tultul möxö ngas maxat nang i kis kö ene Töxödös ne Tanono. Ma kaim bere ire abo tultul baling im möxö ngas maut möxö rarame abo warkurai nang toxo geet ösu.

### *A inarse ma magingin saban*

<sup>7</sup> Io niang, ire tabo tengen bule im? Abo warkurai te Moses i saban? Kaim tunon iat! E kexebe ösöxö a şaşaban nang bara abo warkurai i koxobo osen e. Ruasa, möxösa, e kexebe eöt tua werwere xulen a magingin möxö pere neek abo lalaa xö öng kabise nang bara a warkurai i koxobo

tengen bira, “*Ganim bara u pere neek abo lalaa xö öng kabise.*”

<sup>8</sup> Ma lamun a magingin saban ixo perexulen a warkurai bara i sawang a ngas möxö sasaban, ma a magingin saban ixo kip ot abo mangana magingin möxö pere neek abo lalaa niang kö öng kabise kölöme re e. Ma i ot bira, möxösa, kaim pe lölös möxö magingin saban tua tinörön niang bara kaim pe warkurai.

<sup>9</sup> Önga axana bung e xo to sik nang e koxobo ösöxö abo warkurai te Moses. Inexalik nang abo warkurai te Moses ixo ot maras sö e, abo magingin saban ixo tuu ot arixe ma lölös me e xo met.

<sup>10</sup> Ma inabo warkurai niang ixo kis sua isik a to, io, ixo isik a minet belek.

<sup>11</sup> Ruasa, möxösa, a magingin saban ixo perexulen abo warkurai bara abo warkurai i sawang a ngas möxö sasaban, ma a sasaban ixo silien ölelebes e, ma xö lölös möxö warkurai ixo sexomet e.

<sup>12</sup> Io, abo warkurai im i madakdak kalik a sasaban. Ma abo arile möxö warkurai i madakdak bira ma i töxödös ma i deek.

<sup>13</sup> Bule im, i wawara bara abo warkurai nang i deek i isik a minet ura rö e? Kaim turunon. Inexalik ina magingin saban na belek niang ixo isik a minet. A magingin saban ixo rörörön arixe ma inabo warkurai deek kua isik ot a minet ura rö e bara irabo maras bara ina mangana tatalien i saban. Io, a warkurai im nang i osen bara ina mangana magingin i saban turunon sik.

<sup>14</sup> Me ire te ösöxö bara abo warkurai te Moses i wanot meringan te God, inexalik e mon a tödi mera xö pu. I xarnang bara toxo misik tewe e xarnang önga tultul tua kinis kö ene a lölös möxö magingin saban.

<sup>15</sup> E kobo maras kö unine bara e pet abo lalaa nang e bo wewet, möxösa, abo lalaa e maaaa bara arabo pet, e kobo wewet eörin, inexalik abo lalaa belek nang e mimixenin e bo wewet.

<sup>16</sup> Ma bara e pet ina laa iat nang e kobo maaaa bara arabo pet, io, e sixaut bara abo warkurai i deek.

<sup>17</sup> Möxö ina na, kaim bere e runon nang e pet inabo magingin. Kaim. A magingin saban nang ibo xisixis kölöme re e, ine iat nang i wewet biringan.

<sup>18</sup> E ösöxö bara kaim pe dedeek i roro kölöme re e. E wöwörö ulamun a lölös mera xö pu kölöme re e. Ma ina na i maras, möxösa, e maaaa ra wewet a dedeek, inexalik e kexebe eöt bara arabo pet bie.

<sup>19</sup> Inabo lalaa nang e pet, kaim bara inabo lalaa deek nang e maaaa bara arabo pet. Ma lamun e bo wewet inabo

sasaban iat nang e kobo maaaa bara arabo pet.

<sup>20</sup> Io niang im, nang bara e pet a laa nang e kobo maaaa bara arabo pet, i osen bara kaim bere e runon im iang i wewet a laa. Kaim. A magingin saban iang ibo xisixis kölöme re e, ine iang nang i wewet a laa.

<sup>21</sup> Io niang, e pere lo ina turunon bira, xö axana bung bara e maaaa rua wewet a dedeek, a magingin saban i xisixis arixe me e.

<sup>22</sup> Kölöme runon iat te e, e axanan köba ra wewet eörin arixe mabo warkurai kö God.

<sup>23</sup> Ma lamun e re suxun lo önga lölös kabise nang i rörörön tingan kölöme xö boxönö möxö aike, ma ina lölös kabise ibo erese arixe mabo mangana warkurai e mumuu arixe ma dinödöm pe e. Ma i kut dik e xö ene a magingin saban nang i kure abo xönö möxö aike.

<sup>24</sup> Maris! Ina na i manga öxadik a to re e! Ewe im irabo ölanglanga rewe e xalik ina aike nang i kis kö minet?

<sup>25</sup> E tengen deek kö God ewe nang i ölanglanga e bira xö tinörön te Jisas Kraiss, a Orong ke ire!

Io niang, i bira im pö e, bara e iat turunon, e önga tultul ma a dinödöm pe e xö ene warkurai te God. Inexalik a lölös mera xö pu kölöme re e a önga tultul kö ene a magingin saban.

## 8

### *A to re ire kölöme xö Tanono*

<sup>1</sup> Io niang, God i karabo kure bara irabo ömokorot idi nang idi kölöme re Kraiss Jisas,

<sup>2</sup> möxösa, a lölös möxö Töxödös ne Tanono ewe ibo isik a to re e kölöme re Kraiss Jisas, ina lölös i ölanglanga e bira xalik a lölös möxö magingin saban ma möxö minet.

<sup>3</sup> God ixo tile a Barok ke ine iat ura xarnang a nangadi saban ma xarnang a arabaa rua xikip tewe abo magingin saban. Ma nang ixo pet bira ixo irewese a lölös kö magingin saban nang i kis kö nangadi saban. Ina laa nang a warkurai te Moses i koxobo eöt tua wewet, möxösa, a lölös mera xö pu kölöme re ire ixo irewese a lölös möxöbo warkurai te Moses.

<sup>4</sup> Ma abo warkurai te Moses i tengen bara tabo muu eörin abo tatalien töxödös. Me God ixo irewese a lölös kö magingin saban bara ina arile möxö warkurai irabo wanot turunon kölöme re ire ewe nang ire tekobo to muu inabo maaaa mera xö pu kölöme re ire, ma lamun ire te to muu abo maaaa möxö Töxödös ne Tanono.

<sup>5</sup> Idi ewe nang idi te kis kö ene a lölös mera xö pu kölöme re ire, idi tobo döxömen muu abo maaaa mera xö pu. Ma

lamun ewe idi nang te kis kö ene a Töxödös ne Tanono, idi tobo döxömen muu abo maaaa möxö Tanono.

<sup>6</sup> Idi ewe nang idi tobo döxömen muu abo maaaa mera xö pu, ina dinödöm irabo silien idi urungan kö minet. Inexalik idi ewe nang idi tobo döxömen muu abo maaaa möxö Tanono, ina dinödöm irabo silien idi urungan kö to ma a malum.

<sup>7</sup> Ma i bira, möxösa, idi ewe nang idi tobo döxömen muu abo maaaa mera xö pu, ina mangana dinödöm pe idi i mimixenin e God. Önga mangana tödi bira i kobo ii ösu ine xö ene warkurai te God, ma i kebeöt tua wewet bira.

<sup>8</sup> Idi ewe nang a lölös mera xö pu kölöme re idi i silien idi, idi tekebeöt tua öaxanan e God.

<sup>9</sup> Ma lamun e mum kobo kis kö ene a lölös mera xö pu. Kaim. A Töxödös ne Tanono ibo sisilien e mum, möxösa, a Tanono e God i kis kölöme re mum. Ma nang bara re öng kaim ine ma Töxödös ne Tanono re Kraiss, ine kaim bere mere Kraiss.

<sup>10</sup> Ma i turunon bere abo aine e mum tabo met, möxösa, mum moxo pet abo magingin saban. Inexalik nang bara e Kraiss i kis kölöme re mum, mum mo to kölöme xöbo tanono e mum, möxösa, God i kure bere mum mo töxödös kö wawara re ine.

<sup>11</sup> Ma nang bara a Töxödös ne Tanono re nangang ewe nang ixo öro öbaling e Jisas kalik a minet i kis kölöme re mum, io, ewe nang ixo öraru e Kraiss kalik a minet irabo isik bölök a to meringan kö Tanono ewe nang i kis kölöme re mum urungan köbo aine e mum niang irabo met.

<sup>12</sup> Io nang, abo töke kölöme re Kraiss, a binilan te ire rua mumuu a mangana tatalien, ma lamun a lölös mera xö pu i kebeöt tua engin ire rua to muu ine.

<sup>13</sup> Ruasa, möxösa, nang bara mum mo to muu abo maaaa mera xö pu, mum morobo mana met. Ma lamun nang bara mum bo sese ömet a magingin saban möxöbo aine e mum arixe ma rorop möxö Töxödös ne Tanono, io, mum morobo to,

<sup>14</sup> möxösa, ewe idi a Tanono e God ibo sisilien idi, idi a bung baroxorok ke God.

<sup>15</sup> Ma ina Tanono ewe nang mum moxo kip, i kobo pet e mum bara e mum abo tultul baling kua binuut. Kaim. Mum moxo kip a Tanono ewe nang ixo ölon lo e mum bara e mum morobo barok ke God. Ma xö rorop kö Tanono, ire tobo xukup ma sineseng bira, "Mama! Mama!"

<sup>16</sup> Ma Töxödös ne Tanono iat i tengen turunon urungan köbo tanono ire bere ire abo baroxorok ke God.

<sup>17</sup> Ma nang bara ire abo barok ke ine, io, i turunon bölök bere ire tabo unan lo abo lalaa deek nang God ixo xuxubus

sua ratabaa abo barok ke ine min. Me ire tabo unan lo inabo lalaa deek arixe me Krai. Ma lamun nang bara ire tabo kip a mariris arixe me ine bira, ire tabo mana kip bölök abo kinadik arixe me ine.

*Ire tobo xixiset ulamun a mariris*

<sup>18</sup> E perexulen bara abo kinadik kö ina axana bung na i lik köba saxit nang bara tabo öt ine arixe ma mariris nang irabo wanot maras sö ire.

<sup>19</sup> Möxösa, a öxöno lagunon nang God ixo uxixis, ibo xixixis xiset ma maaa raxin ulamun a axana bung bara God irabo bulus osen a bung barok ke ine.

<sup>20</sup> Ma öxöno lagunon ibo xixixis xiset xarna na, möxösa, abo lalaa xirip kö öxöno lagunon ixo ot saban. Ma i koxobo ot bira xö maaa möxö öxöno lagunon. Kaim. God ixo kure bara a öxöno lagunon irabo kis bie bara a öxöno lagunon irabo eöt tua xixiset ma nunu

<sup>21</sup> bara irabo langlanga xalik a kinis se ine nang a lak maut, ma bara irabo laxa arixe mabo baroxorok ke God kö mangana kinis nang a lak mariris.

<sup>22</sup> Io, me ire te ösöxö im bara abo uxixis kirip kö öxöno lagunon iri örasen a tiip taxin ot na xarnang a barok i wawas a nago.

<sup>23</sup> Ma i kobo a öxöno lagunon kalik mon. Ire ewe nang te kip a Töxödös ne Tanono xarnang a sila ne arabaa nang i öturunon bara ire tabo kip abo arabaa deek kabise melamu, ire bölök te örasen a kinadik taxin kölöme xö balna ire nang ire te xixiset arixe ma maaa raxin ulamun a axana bung bara e God irabo ölon ire bara ire tabo a bung baroxorok ke ine ma bara ine irabo ölanglanga abo lewene aine ire bölök.

<sup>24</sup> Me ire te örasen abo kinadik bira, möxösa, nang e God ixo öro ire, ine ixo isik a mangana ineöro rö ire bere ire tabo xixiset ma nunu ulamun abo lalaa ire tabo kip melamu. Inexalik nang bara ire te xixiset ma nunu ulamun abo lalaa ire te pere na, io, ire tekobo xixiset ma nunu. Ruasa, möxösa, kaim pe öng i xixiset ma nunu ulamun abo lalaa ine iri uruoxe im.

<sup>25</sup> Ma lamun nang bara ire te xixiset ma nunu ulamun abo lalaa ire tekela uruoxe bang, ire tabo xixiset ma nunu arixe ma balawapat.

<sup>26</sup> Ma xarna niang bölök, a Töxödös ne Tanono ibo rorop ire ulamun inabo lalaa nang ire tekoxobo eöt min. Ire tokobo ösöxö bara a sa nang ire tabo seseng ulamun. Me ire tekebeöt tua rengreng osen, ma lamun a Tanono i örasen a tiip taxin te ire ma i seseseng kua gene ire.

27 Me God ewe nang ibo ruruxun ulamun abo lalaa kölöme xö kat te ire, ine i ösöxö sik a dinödöm kö Tanono, möxösa, a Tanono ibo seseseng eöt ma a mamaa iat kö God tua gene ire a nangadi xö God.

28 Me ire te ösöxö bere God ibo rörerön kölöme xöbo lalaa xirip pua öraru abo dedeek kua gene idi nang idi te mamaa re God, idi iat nang iri kuwe lo idi eöt ma dinödöm pe ine nang ine ixo bulus ot.

29 Ma ina na i maras, möxösa, idi ewe e God ixo bulus ot arun a dinödöm pe ine rua werwere kos idi, io, idi iat bölök God ixo tulus sik mesila bara idi tabo xuxulas sua eöt xarnang a Barok ke ine, bara a Barok ke ine irabo kip lo a sisila ne kinis kaluluonin idi abo oleleng ne tönö.

30 Me idi ewe God ixo tulus sik mesila, io, ixo kuwe lo bölök idi. Me idi nang ixo kuwe idi, ixo kure idi bara te töxödös kö wawara re ine. Me idi nang ixo kure idi, ine ixo ömar idi ma mariris taxin.

*A abalamu re God i karabo wan kalik ire*

31 Io, a lasa im nang ire tabo tengen ulamun inabo lalaa? Nang bere God i tuu rua gene ire, ewe irabo eöt tua tinuu xarnang a iuo urungan te ire?

32 God i koxobo pet pi a Barok ke ine iat kalik a ömokorot, ma lamun ixo isik tewe ine rua minet tua gene ire xirip. Ine mon nang ixo isik a Barok ura rö ire bira, a turunon saxit irabo tabaa tataunin ire arixe mabo lalaa xirip bölök.

33 Ewe im irabo eöt tua wupuk idi ewe God iri pere kos idi? Kaim pe öng. E God kalik i kure ewe nang i töxödös kö wawara re ine.

34 Ewe im i eöt tua kure bere ire tere pet a sasaban? Kaim pe öng. Krai Jisas ewe ixo met. Ma lamun a laa raxin belek bara God ixo öraru wuxus ine. Me ine xalik i kis kö kinis taxin kö lawa tuun te God ma i wöwörö rua gene ire.

35 Me ewe i eöt tua bölbölö wi ire xalik a abalamu re Krai? Ma i eöt bara a purpuruan, bara kinadik, bara eler, ma bara a irilöng taxin irabo bölö wi ire xalik ina abalamu? Ma nang bara kaim pe sisige, ma bara i lörörö bara tabo tee ömet ire, i eöt bara inabo lalaa irabo bölö wi ire xalik ina abalamu? Kaim.

36 I xarnang mon a tinenge re God nang toxo geet i tengen bara,

*“God, xöbo bung kirip tobo sesexomet e mem pua xelen nöngön.*

*Idi tobo pere kos e mem xarnang abo sipsip nang idi teka sese ömet.”*

37 Inexalik, i karabo bira. Ire tobo wawas ösu esexerein inabo lalaa sa nang ire te örasen, möxösa, ire te kisisik kö öng ewe nang ixo isik a abalamu re ine urungan te ire.

<sup>38</sup> Ma i eöt bara arabo tengen bira, möxösa, e ösöxö runon iat bara kaim pe laa irabo eöt tua bölbölö wi ire xalik a abalamu re ine. Ina to na, ma a minet idu tekobo eöt tua bölbölö wi ire. Ma abo angelo bölök, bara a lölös köbo tano saban, bara abo lalaa na ma nang bölök melamu, ma bara abo lölös kabise bölök i kobo eöt tua bölbölö wi ire.

<sup>39</sup> Kaim pe öng kuso lömö, bara mera xö pu, ma bara re mangana laa sa mera xö öxöno lagunon kirip irabo eöt tua bölbölö wi ire xalik a abalamu xö God nang i tabaa ire min kö kinis se ire kölöme re Kraiss Jisas, a Orong ke ire.

## 9

### *A pere kos se God*

<sup>1</sup> E tengen a turunon xarnang i eöt bara öng kölöme re Kraiss irabo tengen bie. E kobo töxö. A balake nang i kis kö ene Töxödös ne Tanono i sixaut bara ina tinenge i turunon.

<sup>2</sup> Ma i bira, bara e örasen a maris taxin kölöme xö kat te e ma ina tiip taxin i karabo kawam.

<sup>3</sup> Nang bara i eöt, e xebe maaaa rua tinuu xö ene ömokorot taxin te God ma bara God irabo irewese e xalik e Kraiss nang bara ina na irabo top abo töke,

<sup>4</sup> idi abo Israel, a bung marapun tunon te e. Idi iat ewe God ixo ölön lo idi bere idi tabo a bung baroxorok ke ine. Idi iat ewe God ixo osen a mariris se ine urungan te idi. Idi iat ewe God ixo xuxubus sua öturunon abo tinenge re ine urungan tö idi. Idi iat ewe toxo kip lo abo warkurai. Me re idi iat a tatalien ne lotu wösöt e God, me idi ewe nang e God ixo töngösen idi ulamunon abo lalaa irabo pet tua gene idi.

<sup>5</sup> Ma a bung marapun mee Israel toxo torowot ot te Abaram, Aisak me Jekop, abo untubuno raxin te idi. Ma nang a Mesaia ixo wanot, ixo wanot meringan kö bung marapun te idi, me Kraiss iat ewe nang i lömö xöbo lalaa xirip me ine e God ewe ire tabo ölet ulorexe. Amen.

<sup>6</sup> Nang e re tengen bira, e kaim kö rengrengen bara abo tinenge xö God iri subu. Kaim, möxösa, kaim bere idi xirip abo subun mee Israel ewe idi nang a Israel turunon.

<sup>7</sup> Ma kaim bara idi xirip ewe idi abo subun te Abaram bara idi abo subun tunon. A tinenge re God nang toxo geet i tengen belek bara, *"Ewe idi nang meringan te Aisak kalik mon, tabo perexulen idi bara abo subun te nöngön."*

<sup>8</sup> Ma abo lalaa e xo rengrengen i bira. Idi ewe nang te kip idi xö lölös tataun mon möxöbo nangadi, idi kaim bara a bung baroxorok kö God. Kaim. Idi xalik mon nang te wanot meringan kö kunubus, tabo perexulen idi bara abo subun te Abaram.



<sup>9</sup> Ma ina na i maras, möxösa, God ixo xuxubus bara, *“Xö axana bung e xoro kubus sik ke nöngön, e rabo tawuxus baling me Sera irabo kip a bak suxurno.”*

<sup>10</sup> Ma kaim bara ina na xalik mon. Rebeka ixo kip a nini xasang meringan kö önga tödi xalik mon, me ine e Aisak a untubuno idi abo Israel turunon.

<sup>11-12</sup> Kaim kö xikip bang idu me idu kaim bang kua wewet te laa i deek bara re laa i saban. Inexalik God ixo tengen te Rebeka bara, *“A sisila ne barok irabo kip a kinis ne tuttul belek kö ene a barok nang tabo kip ine melamu.”* God ixoro bulus pi sik a dinödöm pe ine bara irabo pere kos a öng bira, io niang, ixo tengen bira rua a dinödöm pe ine irabo ot turunon. Inexalik kaim kö mamaa bara a dinödöm pe ine irabo ot turunon köbo tatalien te idu. Kaim. God ixo mamaa bara a dinödöm pe ine irabo ot turunon meringan kalik ine iat ewe i ekuwe bira.

<sup>13</sup> Ina laa na i ot bira xarnang a tingenge xö God toxo geet i tengen bara,

*“Jekop ewe e xo mamaa rö ine, inexalik e Esau ewe e xo mölök kalik ine.”*

<sup>14</sup> Io, ire tabo tengen im bule ulamunon ina laa na? I wawara bere God i kobo töxödös? Kaim turunon iat! I töxödös sik.

<sup>15</sup> Ina niang i maras möxösa e God ixoro tengen te Moses bara,

*“E rabo marse a öng ewe e mamaa rua marse ine.*

*Me e rabo isik a balake rö idi ewe e mamaa rua isik a balake urungan tö idi.”*

<sup>16</sup> Io niang, nang God i pere kos a öng, ina tatalien na i kobo ot kö lölös kö nangadi ma i kobo ot meringan kö lasa nang te mamaa bölök. Kaim. Inexalik ina tatalien i ot meringan kö God ewe i isik a inemarse.

<sup>17</sup> Ma bie bölök, ire tobo kos kölöme xö Ginigeet Töxödös bara God ixo tengen kö king mee Isip bara, *“E re isik ina kinis ne king urungan te nöngön möxösa e mamaa bara arabo rorön arixe me nöngön tua osen a lölös se e ma bara tabo ii öraxin a eseke xö boxönö xirip möxö öxöno lagunon.”*

<sup>18</sup> Io niang im, God i marse ewe i mamaa rua marse ine, ma i ölölös abo baladi ewe ine i mamaa rua ölölös abo baladi bie.

<sup>19</sup> Io, nang bara i ot bira i eöt bara a öng irabo tengen tö e bara, *“Ruasa niang e God nangen i wupuk ire? Turunon saxit, nang bere God i mamaa rua wewet te önga laa, kaim pe öng i eöt tua tinuu wi ine.”*

<sup>20</sup> Ma lamun ewe im nöngön a tödi mon tua suongus e God? A önga bile nang idi toxo pet ine ma pu i karabo eöt

tua ose ewe i pet ine bara, “Ruasa iat nöngön u xo pet e xarna na?”

<sup>21</sup> Bule, i kobo töxödös bara a tene pet bile irabo rörön arixe ma önga ip pu xalik mon ma irabo pet önga bile rua abo tinörön deek ma önga bile xabise belek ulamunon a tinörön tataun mon?

<sup>22</sup> U bele wöwörö oleleng ulamun ina tatalien te God. Ine ixo kis malus mon ma i koxobo ömokorot pasaxit idi ewe nang toxo kis ne tagur sik kua xikip a ömokorot taxin, möxösa, ixo maaaa rua osen a laie re ine ma rua öwösö a lölös se ine.

<sup>23</sup> Me God ixo pet bira rua osen ömaras a mariris taxin te ine urungan te idi ewe nang te tagur sik kua xikip a inemarse re ine, idi iat nang e God ixoro tagure idi mesila rua xikip a mariris.

<sup>24</sup> Me ewe im idi nang e God ixo marse idi bira? Ire iat nang ixo kuwe lo ire. Ma i kobo kuwe lo ire meringan kalik abo Judeia xalik mon, ma lamun meringan kalik idi nang kaim bara abo Judeia bölök.

<sup>25</sup> Ma i xarnang toxo geet kö ginigeet te Osia nang e God ixo tengen bara,

*“E rabo kuwe idi nang kaim bara abo nangadi re e, bara a nangadi re e im idi.*

*Me e rabo kuwe a öng ewe e kobo maaaa rö ine, bara ine ewe e maaaa im pö ine.*

<sup>26</sup> *Ma xöbo lagunon niang e xo tengen tö idi bara, ‘Mum kobo a nangadi re e’,*

*io, tabo tengen idi bara a bung baroxorok kö God nang a lak to.”*

<sup>27</sup> Ma a propet Aisaia ixo tenge raxin ulamun abo Israel bara,

*“A turunon bara a xinixos möxöbo Israel i eöt mabo önö ni löxön,*

*inexalik a uleng mon im nang e God irabo öro lo idi,*

<sup>28</sup> *möxösa, a Orong irabo saxit tua isik a ömokorot kirip pe ine xö öxöno lagunon.”*

<sup>29</sup> I xarnang e Aisaia ixoro tengen mesila bara,

*“Nang bara a Orong, a Umri Raxin, i xebe öbala rewe a uleng möxöbo subun te ire,*

*io, ixoro ot tö ire xarnang ixo ot te idi abo Sodom,*

*me ire toxoro iuo bölök xarnang abo Gomora.”*

*God kaim kö kure bara abo Israel te töxödös möxösa idi kaim kö nunu*

<sup>30</sup> Io niang, ire tabo tengen im bule? Ire te pere bara idi nang kaim bara abo Judeia idi kaim kö mumuu a ngas bara God irabo eöt tua kure bere idi te töxödös kö wawara re

ine. Inexalik God iri kure bara a dauleng ke idi te töxödös, möxösa, idi tere nunu.

<sup>31</sup> Ma abo Israel belek, idi toxo mumuu abo warkurai nang i osen bara God irabo kure bule bara a öng i töxödös kö wawara re ine. Inexalik idi kaim kö xikip ina töxödös ne kinis.

<sup>32</sup> Ruasa? Möxösa idi toxo döxömen bere idi te eöt tua mumuu eörin inabo warkurai bara God irabo kure bere te töxödös kö wawara re ine, inexalik idi tokoxobo nunu. Idi toxo segen idi xö wat möxö sesegen.

<sup>33</sup> I xarnang a tinenge re God toxo geet i tengen bira, *"Pere bang! E re bulus singan Saion önga wat möxö sesegen. Ma ina wat nang i maru wi sik a ngas, a nangadi tabo salilinge xönan ma tabo subu. Me ewe nang i nunu re ine i karabo minge."*

## 10

<sup>1</sup> Abo töke kölöme re Kraiss, e maaaa xöba bara God irabo öro abo Israel me e bo seseseng ulamun ina na.

<sup>2</sup> E tengen ömaras a laa sanene nang i turunon ma i bira, bere idi te gaas sua mumuu e God. Inexalik idi tokobo ösöxö a turunon, io nang, idi tobo gaas tataun.

<sup>3</sup> Idi toxo könönöin bere idi tabo pet te ngas iat te idi bere God irabo kure idi bara te töxödös kö wawara re ine. Me idi te könönöin bira, möxösa, idi kaim pua ösöxö bere God irabo kure bule a öng bara i töxödös kö wawara re ine. Io niang, kaim idi xo ii ölik idi xö ngas niang e God i muu rua kure ina öng bara i töxödös.

<sup>4</sup> Kraiss ine a xakawam möxöbo warkurai te Moses. Io niang, i eöt bere God irabo kure bara idi xirip, ewe idi nang te nunu, te töxödös kö wawara re ine.

<sup>5</sup> E Moses ixo geet bara God irabo kure bule bara a öng i töxödös kö wawara re ine nang bara i mumuu abo warkurai te Moses. Ma ixo geet bira: *"Ewe a tödi nang i pet eörin inabo warkurai, irabo to muu inabo warkurai."*

<sup>6</sup> Inexalik nang bara e God i kure re öng bara i töxödös kö nunu re ine, io, ina niang i eöt ma tinenge xö God nang i tengen bara, *"Ganim bara u dödom kö balam bara, 'Ewe irabo wan uruso lömö xö watmaep?'"* (Ma nang bara u dödom bira i xarnang bere nöngön u xoro tengen bara re öng irabo mana lamus ösu e Kraiss meriso lömö.)

<sup>7</sup> *"Ma ganim bara u dödom kö balam bölök bira, 'Ewe irabo wan su uri xö pu?'"* (Ma nang bara u dödom bira i xarnang bere nöngön u xoro tengen bara re öng irabo mana lamus öxaa e Kraiss kalik a minet.)

<sup>8</sup> Ma lamun nang bere God i kure bara re öng i töxödös kö nunu re ine, io niang, irabo eöt ma tinenge re God nang

i tengen bara, *“A tinenge re God i lörörö re nōngōn. Niang i kisisik kō ngalam ma xō balam bōlōk.”* Ma ina tinenge nang ire tobo etōngōsen min, ma ina tinenge niang i tengen bara ire tabo mana nunu.

<sup>9</sup> Nang bara u wōwōrō maras ma ngalam bere Jisas Kraisis ine a Orong, ma nang bara u nunu xō balam bere God ixo öraru öbaling ine xalik a minet, io, e Orong irabo öro nōngōn.

<sup>10</sup> God irabo kure bara nōngōn u töxödös kō wawara re ine, möxōsa, u nunu ma balam. Me God irabo öro e nōngōn, möxōsa, u bo wōwōrō maras ma ngalam.

<sup>11</sup> I xarna na toxo geet kō tinenge re God ma i bira, *“Ewe nang i nunu re ine i karabo mēnge.”*

<sup>12</sup> Ma ina na i turunon tö idi xirip, möxōsa, abo Judeia me idi nang kaim bara abo Judeia, idi te eöt mon. Ina Orong iat, ine a Orong köbo nangadi xirip, ma ibo wadōane ödeek ewe idi xirip nang te kuwe ine rua öro idi.

<sup>13</sup> Ma i xarnang a tinenge re God i tengen bira, *“Ewe idi xirip nang te kuwe a Orong kua öro idi, irabo öro idi.”*

<sup>14</sup> Io niang, i eöt bule bara idi tabo kuwe ine rua öro idi nang bara idi kaim pua nunu re ine? Me idi tabo nunu re ine bara bule nang bara idi tokobo ölangen ulamun ine? Me idi tabo ölangen ulamun ine bara bule nang bara re dauleng tokobo palas tinenge?

<sup>15</sup> Me idi tabo palas tinenge bara bule nang bara tokobo tile idi? Ma i xarnang a tinenge re God nang toxo geet i tengen bira, *“I manga mariris a inot te idi ewe idi tobo xikip ot a tinenge deek.”*

<sup>16</sup> Inexalik kaim bere idi abo Israel kirip nang te öga a tinenge deek. Ma ina na i maras, möxōsa, e Aisaia ixo tengen bara, *“Orong, ewe iri nunu xō atōngōsen te mem?”*

<sup>17</sup> Io niang im, ire te ölangen a tinenge re God, ma ina na i öraru a nunu. Me ire te ölangen ina tinenge nang ire te ölangen a tinenge re Kraisis.

<sup>18</sup> Inexalik i eöt bara e rabo ose bara, i turunon, i wawara bara idi takara ölöngö, goo? Kaim. I turunon saxit idi toxo ölöngö. I xarnang a tinenge xō God toxo geet i tengen bara, *“Abo inōno idi iri wan kō boxōnō xirip kō öxōno lagunon. Abo tinenge re idi iri wan ömat köbo ngusuno öxōno lagunon.”*

<sup>19</sup> Inexalik e tengen bara i turunon bara abo Israel toxo maras. I xarnang e Moses ixo etōngōsen ma laa sa niang e God ixo tengen bira,

*“E rabo rōrōrōn me ewe idi nang kaim bara önga marapun taxin tua engin e mum pua neneek a mangana kinis se idi.”*

*Me e rabo rōrōrōn ma ōnga marapun niang kaim idi ma nanase rua engin e mum pua laie."*

<sup>20</sup> Io, me Aisaia ixo balamasa nang ixo etōngōsen ma laa sa niang e God ixo tengen bira,

*"Ewe idi nang tokoxobo wawara siwin e, idi toxo pere wōsōt lo e.*

*Ma e xo osen ōmaras e urungan tō idi ewe idi nang tokoxobo ose ulamun e."*

<sup>21</sup> Inexalik ulamun abo Israel belek, i tengen bara,

*"Ma xōbo bung kirip e xobo sasanga urungan tō mum abo tabuno ōlōngō,*

*mum nang mum a nangadi ne onwat."*

## 11

*A inemarse xō God urungan kōbo Israel*

<sup>1</sup> Io, e ose im bara i wawara bara God ixo mōlōk kalik abo nangadi re ine? Kaim turunon saxit! E iat, e a ōnga Israel. E ōnga subun te Abaram. Me e ōnga marapun te Benjamin.

<sup>2</sup> Me God kaim pua mōlmōlōk kalik a nangadi re ine nang ixo bulus a dinōdōm pe ine mesila rua ōsōxō im idi. Mum bo ōsōxō ulamun a xōnō mere Elaija kōlōme xō tingenge re God nang toxo geet. Ma ixo bala kadik sik urungan kōbo Israel. Io niang, ixo tengen kō God bara,

<sup>3</sup> *"Orong, idi tere sexomet abo propet te nōngōn me idi tere pōrōk ōsu bōlōk abo alta mōxō arabaa. E xalik mon a ōng na, ma te wawara siwin im e rua sesexomet e bōlōk."*

<sup>4</sup> Io, ma Orong ixo balu ine bule? Ixo tengen bira, *"A pitnō ma ninōng ne arip ne nangadi re e ewe idi tokoxobo subun kexe urungan kō Baal a tano saban."*

<sup>5</sup> Ma i xarnang bōlōk nixinen. A ulik ne nangadi xalik mon mere God, mōxōsa, ixo marse tataunin idi, io nang, ixo kuwe idi.

<sup>6</sup> Ma nang bara ixo kuwe idi bira arixe ma inemarse re ine nang ixo isik tataunin te idi, io, i maras bara a akuwe re ine kaim pua inuan ot mōxōbo tatalien deek ke idi. Ma nang bara ixoro kuwe idi eōt mabo tatalien deek ke idi, io, a inemarse re ine i kobo xarnang a inerabaa tataun.

<sup>7</sup> Io niang, i maras bara ina laa sa niang abo Israel toxo wawara siwin, idi tokoxobo kip lo. Inexalik ewe idi nang e God ixo kuwe idi, idi toxo kip lo. Me idi abo Israel kabise, God ixo ōlōlōs abo baladi bara idi tekebeōt tua xikip lo.

<sup>8</sup> Ma i xarnang a tingenge re God nang toxo geet i tengen bara,

*"God ixo ōbaulang abo dinōdōm pe idi.*

*Ma ixo ōbō abo maradi bara takarabo wawara deek.*

*Ma ixo ōbaa abo talingine idi bara takarabo ōlōngō.*

*Ma iri pet bira rö idi ot nixinen."*

<sup>9</sup> Me Dewit i tengen bira,

*"Abo lalaa irabo öaxanan idi xarnang a nien lömö xö öra, io, e seseng bara nöngön örobo rörön minabo lalaa rua uxun idi.*

*Me e seseng bara inabo lalaa irabo ösubu idi ma bara nöngön örobo rörön arixe minabo lalaa rua babalu wuxus idi.*

<sup>10</sup> *Me e seseng bara abo maradi irabo ködö bara idi tekebeöt tua winara deek.*

*Me e seseng bölök bara idi tabo rutun ulorexe mabo sabodi."*

*Idi nang kaim bara abo Israel idi bölök tere kip lo a ineöro*

<sup>11</sup> *Io niang im, e ose bara abo Israel toxo subu saban esexere? Kaim turunon iat! Idi toxo wewet magingin saban, ma ina unine bara a ineöro ixo wan urungan te ewe idi nang kaim bara abo Israel, rua abo Israel idi tabo neek a kinis se idi.*

<sup>12</sup> *Ma nang bara a sasaban köbo Israel ixo top ödeek a öxöno lagunon, ma nang bara a sinubu re idi ixo top ödeek idi ewe nang kaim bara abo Israel, io, xö axana bung nang abo Israel tabo baling urungan te God, a warwadöan taxin irabo ot kö öxöno lagunon.*

<sup>13</sup> *Ma nang e wöwörö rö mum bira, e wöwörö rö mum iat ewe mum nang kaim bara abo Israel. Ma i maras bara e önga aposol urungan te mum ewe mum nang kaim bara abo Israel. Ma ina na a unine bara e öraxin a tinörön te e,*

<sup>14</sup> *möxösa, e mamaa bara e rabo parasiwin te önga mangana ngas sua öraru abo Israel tua neneek a mangana kinis se mum bara e rabo eöt tua öro a dauleng ke idi.*

<sup>15</sup> *Ma nang e God ixo mölök tewe abo Israel, ina na ixo lamus puxus a oleleng ne nangadi xabise mera xö öxöno lagunon urungan te God xarnang abo ais se ine. Ma nang bara i turunon bira, io, a mangana laa sa irabo ot bara e God irabo öga lo abo Israel? Abo minet tabo kip a to!*

<sup>16</sup> *Nang nöngön u pet a beret meringan kö sila ne wit, u bo isik önga beret urungan kö God. Io nang, a xönö xudun kirip mere ine bölök. Ma nang bara a buon kö önga uno iaa mere God, io, inabo axana xirip mere ine bölök.*

<sup>17</sup> *Abo Israel i xarnang önga uno iaa olip. Me God ixo pit tewe a uleng nebo axana iaa, ma ixo öwasum belek nöngön urungan kö ina uno iaa olip arixe mabo axana iaa xabise. Nöngön möxö mangana uno iaa olip meringan kö pirixö nang tekara sulo, ma lamun God ixo öwasum sik nöngön bira. Ma na im u bo to sik kö bulbulut kö ina uno iaa niang i ot meringan kö buon.*

<sup>18</sup> *Io niang, nöngön u bele pere ösu idi abo axana iaa nang God ixo pit tewe. Ma nang bara u pere ösu idi bira, örobo*

mana dödöm deek bara kaim bere nōngön u xösōng sik ina buon, inexalik a buon i xösōng sik nōngön.

<sup>19</sup> Ma nang bara i ot bira rō nōngön, örobo tengen bara, “God ixo pit tewe inabo axana iaa rua waswasum e.”

<sup>20</sup> I turunon. Ma lamun ixo pit tewe idi, möxōsa, idi tokoxobo nunu. Me nōngön u bo ruruu dik möxōsa u bo nunu. Io niang, u bele ii öraxin nōngön iat, ma lamun örobo mana bubuut,

<sup>21</sup> möxōsa, nang bara e God kaim pua öbala abo axana olip turunon tua warwarap kö uno iaa, i karabo öbala bölök nōngön.

<sup>22</sup> Io nang, örobo mana dödöm deek bere God ibo isik a inemarse ma ibo isik a ömokorot taxin bölök. Ixo ömokorot ölölös idi ewe nang toxo subu, ma lamun ixo marse nōngön. Ma irabo ot bira rō nōngön nang bara u bo kisisik kölōme xö inemarse re ine, xalik irabo pit tewe bölök nōngön.

<sup>23</sup> Ma abo Israel bölök, nang bara idi takara muu sösöxöin a magingin ne mölökus sua nunu, io, God irabo wasum idi xö uno iaa, möxōsa, i eöt tua waswasum öbaling lo idi.

<sup>24</sup> Ma ixo tee xöröp tewe nōngön kalik a uno iaa olip meringan kö pirixö nang kaim bere idi toxo sulo. Ma ixo wasum nōngön urungan kö ina uno iaa olip niang toxo sulo. Ma nang bara ixo pet ina laa nang i lölös sua wewet bira, io, irabo malus se ine rua wasum öbaling lo inabo axana iaa turunon urungan baling kö uno iaa re idi iat.

### *God irabo öro abo Israel*

<sup>25</sup> Abo töke kölōme re Kraiss, e kobo maa bere mum morobo ii öraxin e mum iat, io nang, e maaaa bere e rabo ömaras e mum ulamun inabo lalaa niang ixo mun sik mesila me God iri osen im, ma i bira, bara God ixo ölölös abo baladi a oleleng saxit mee Israel bara tokoxobo nunu, ma lamun i turunon bara a uleng ke idi toxo nunu. Ma abo baladi abo Israel tabo lölös sik biringan ot kö ina axana bung nang a xinixos kirip pe idi ewe nang kaim bara abo Israel tabo wan pösöt e God.

<sup>26</sup> Io xarna na, God irabo öro a marapun kirip mee Israel. I xarnang a tinenge re God nang toxo geet i tengen bira, “A Tene Aöro irabo wanot mee Saion, ma irabo puxus a nuan köbo untubuno e Jekop bara takarabo muu öbaling a tatalien möxö tinuu rewe xalik e God.

<sup>27</sup> *Ma a kunubus se e arixe me idi i bira: xö ina axana bung e rabo tewe rewe abo magingin saban te idi.*”

<sup>28</sup> Ma abo Israel idi abo iuo möxö tinenge deek kua wewet ödeek e mum. Inexalik God i maaaa lamun idi, möxōsa, ixo pere kos lo abo untubuno idi.

<sup>29</sup> Ma ina i maras, möxösa, God i karabo kip puxus öbaling a arabaa re ine, me ewe idi nang i kuwe lo idi, i karabo öös tewe idi.

<sup>30</sup> Önga axana bung mesila mum moxo mölök kua ölangen a tinenge re God. Ma lamun na im mum moxoro kip lo a inemarse, möxösa, abo Israel te mölök kua ölangen a tinenge re God.

<sup>31</sup> Ma i bira bölök ke idi. Na im idi te wanot abo tabuno ölangen tinenge bara idi bölök tabo kip lo a inemarse, möxösa, God ixo marse e mum.

<sup>32</sup> God iri öbala a magingin ne tabuno ölangen tinenge rua xuxut dik a nangadi xirip, bara na im irabo eöt tua marse idi xirip.

*A nanase re God i taxin köba*

<sup>33</sup> Nang! A nanase re God i taxin köba. A nanase melem pe ine i deek saxit.

Ma kaim pe öng i eöt tua marmaras bara bule God i bulus a dinödöm pe ine bira.

Kaim pe öng i eöt tua parasiwin abo ngas se ine.

<sup>34</sup> I xarnang a tinenge re God i tengen bara, "*Ewenene im pe öng nang i ösöxö a dinödöm pe Orong?*

*Ma i eöt bere re öng irabo isik a dinödöm deek kua rorop ine? Kaim."*

<sup>35</sup> *Ewe im iri tabaa e God ma lasa bere God irabo mana balu wuxus ine?*

<sup>36</sup> Ma kaim pe öng ixo pet bira rö ine, möxösa, abo lalaa xirip i wanot kalik ine, me ine ewe a öng i ölölös sik inabo lalaa xirip, me ine a xakawam möxöbo lalaa xirip.

Me ire tabo ölet ine ulorexe! Amen.

## 12

*Ire tabo muu abo tatalien deek*

<sup>1</sup> Io niang im, abo töke kölöme re Kraiss, e maa rua öxaxat e mum ewe mum moxoro pere a inemarse re God bara morobo mana isik öbaling e mum pö ine xarnang önga inerabaa rö ine iat, a inerabaa nang a lak to ma a lak madakdak nang irabo öaxanan e God. Io, mum morobo mana lotu wösöt ine bira, möxösa, mum moro maras köbo lalaa nang e God iri pet tö mum.

<sup>2</sup> Mum bele öbala lo öbaling ina mangana öxöno lagunon bara irabo pet e mum bara morobo to eöt mina tatalien te ine. Inexalik mum morobo öbala lo e God tua ömaxat abo mangana dinödöm pe mum pua abo mangana to re mum irabo xuxulas. Nang bara mum morobo pet bira mum morobo eöt tua könönöin ma rua werwere xulen abo tatalien nang i eöt ma maaaa xö God, ma i bira: abo



tatalien deek, abo tatalien i töxödös esexere, mabo tatalien i öaxanan ine.

<sup>3</sup> Ma eöt ma a tinörön te e nang e God ixo örarabaa e min meringan kö inemarse re ine, e tengen tö mum öngöng bara ganim e mum pa döxömen öraxin e mum. Mum morobo dödöm ulamun e mum eöt kö nang i töxödös sö mum. Mum morobo perexulen öbaling e mum arixe ma dinödöm maras. Ma a nunu nang God iri tabaa e mum kirip öngöng min, mum morobo mana rörön arixe min tua öt öbaling e mum.

<sup>4</sup> Me ire te pere bara a oleleng ne xönö xöbo lewene aine ire. Ma inabo xönö xirip tokobo pet önga mangana tinörön kalik mon.

<sup>5</sup> Ma i bira bölök kö ire kölöme re Kraiss. Ire a oleleng, ire kölöme xö önga lewene aine ine. Me ire xirip abo xönö, ire te eparap kaluluonin ire.

<sup>6</sup> Ma abo inerabaa re ire i xabise arixe eöt ma abalamu nang e God iri erimine ire arixe min. Io niang, nang bara öng iri kip a inerabaa möxö tinenge ne propet, irabo mana rörön min eöt turunon iat ma a nunu re ine.

<sup>7</sup> Nang bara re ine a inerabaa möxö rorop, irabo mana isik a rorop. Nang bara re ine a inerabaa möxö tene ausu, irabo mana eusu.

<sup>8</sup> Nang bara re ine a inerabaa möxö aöxaxat, irabo mana öxaxat a nangadi. Nang bara re ine a inerabaa möxö arabaa rua rorop a nangadi sasaxan, irabo mana erabaa xöba. Nang bara re ine a inerabaa möxö sisilien a nangadi, irabo mana rörön lölös sua sisilien ödeek idi. Nang bara re ine a inerabaa möxö isik a inemarse, irabo mana pet bie arixe ma axanan.

<sup>9</sup> A inebalamu re mum wösöt a uleng kabise irabo mana turunon ne inebalamu. Mum morobo mana mimixenin abo saban me mum morobo töndik sik abo dedeek.

<sup>10</sup> Mum morobo ebalamu kaluluonin e mum xarnang bara mum önga bunbunarama xalik mon. I deek bara öng irabo döxömen öraxin a dauleng kabise bara i taxin sik ke ine.

<sup>11</sup> Ganim e mum pua lönlön tua wewet abo dedeek. Mum morobo öbala lo a Töxödös ne Tanono bara irabo öraru e mum pua tinörön kö ene a Orong.

<sup>12</sup> Mum moro xixiset ma nunu ulamun abo warwadöan nang irabo wan pösöt e mum, io niang, i deek bara mum morobo axanan. Mum morobo mana tuu lölös kö ene abo eler. Ganim bere mum mo döxömen taun tua sineseng sösxö.

<sup>13</sup> Mum morobo mana top abo Kristien nang idi ma sasaxan. Me mum morobo mana lölös sik kua öga lo abo ose urungan köbo gunon te mum.

14 Mum morobo mana seng e God bara irabo wadöane idi nang te elerin e mum. A turunon, mum morobo seseseng bara irabo wadöane idi ma ganim bara irabo ögarin idi.

15 Nang bara öng i axanan, mum morobo axanan arixe me ine. Nang bara öng i gee ma tapunuk, mum morobo gee arixe me ine bölök.

16 Mum morobo mana muu önga dinödöm kalik mon kaluluonin e mum. Ganim e mum pua pere ösu a dauleng kabise, inexalik mum morobo maaaa rua kinis arixe mabo maris. Ganim e mum pa döxömen öraxin öbaling e mum.

17 Nang bara öng i pet te sasaban tö nöngön, ganim nöngön tua babalu ine mere sasaban. Mum morobo ebalaure deek bara mum morobo pet abo lalaa nang a nangadi xirip tabo perexulen bara i töxödös.

18 Mum morobo mana lölös sua kinis ma malum arixe mabo nangadi xirip, nang bara i eöt te mum.

19 A bung ais, ganim e mum pua babalu a nangadi ulamun abo sasaban urö mum. Ma lamun mum morobo mana isik a uk gölö lamun a laie re God. Mum morobo pet bira eöt ma nang idi toxo geet bara a Orong ixo tengen bira: *“E a öng nang irabo balu wuxus abo marakörö ulamunon abo sasaban te idi. E rabo ömokorot idi eöt mabo tatalien te idi.”*

20 Ma toxo geet belek bara,  
*“Nang bara a iuo re nöngön i irilöng, örö mana tabaa nienin ine.*

*Nang bara i minauu, örö tabaa ininimin ine.*

*Ma nang bara u pet bira, ine irabo menginein öbaling iat a magingin te ine.”*

21 Ganim nöngön ta öbala lo a sasaban bara irabo ögarin nöngön. Inexalik nöngön örobo mana rörön mabo tatalien deek ke nöngön tua wawas ösu abo sasaban.

## 13

### *Ire tabo ii abo tene pet warkurai*

1 A nangadi xirip öngöng tabo mana ii ölik idi xöbo duöng rataxin ewe idi nang tobo wewet warkurai, möxösa, kaim bara re öng i eöt tua kip lo ina kinis möxö pet warkurai nang bere God kaim pua uxis ine bira. Idi abo tene pet warkurai ewe idi te tuu sik, God iri uxis sik idi bira.

2 Möxö ina na, nang bara öng i onwat urungan kö öng nang ibo wewet warkurai, i xarnang a öng nang i onwat kö ina niang e God ixoro uxis sik. Me ewe idi nang abo tene onwat bira, idi tabo ii öxaa a ömokorot urungan tö idi iat.

3 Ma inabo duöng rataxin tokobo ubuut ewe idi nang tobo wewet a dedeek, ma lamun idi tabo ubuut ewe idi nang tobo wewet a sasaban. Bule, nöngön u maaaa bara

örobo langlanga xalik a binuut möxöbo tene warkurai? Go, nöngön örobo perim abo dedeek ma a tene warkurai irabo ölet nöngön.

<sup>4</sup> Inabo tene warkurai idi abo tultul te God tua wewet a dedeek kö nöngön. Ma lamun nang bara u pet a sasaban, io, nöngön örobo buut, möxösa, i turunon saxit idi te tön sik a lölös taxin möxö ömokorot. Io niang, idi abo tultul te God, ma te rörörön ulamun e God tua ömokorot idi abo tene saban.

<sup>5</sup> Io niang, nöngön örobo mana ii ölik e nöngön kö ene idi abo tene pet warkurai, xalik idi tabo ömokorot e mum. Ma kaim bara ina na xalik mon. Mum morobo mana ii ölik e mum bölök kö idi, möxösa, mum mo ösöxö bara i töxödös.

<sup>6</sup> Me mum bo kun takis, möxösa, abo tene warkurai idi abo tultul te God me idi te bönö sik kua balauere ma rua kure e mum.

<sup>7</sup> Mum morobo mana balu wuxus idi xirip eöt ma nang i töxödös sua wewet bira. Ewe idi te eöt bara tabo kun takis se idi, mum morobo mana isik abo takis se mum urungan tö idi. Me ewe idi nang i eöt tua buburin idi, mum morobo mana burin idi. Me ewe idi nang i eöt tua ii öraxin idi, morobo mana ii öraxin idi.

### *Ire tabo mana isik abalamu*

<sup>8</sup> Ma ganim bere mum mo dinau xere öng, inexalik ina mangana dinau xalik mon niang i deek bara irabo kisisik i bira, bara e mum morobo ebalamu kaluluonin e mum iat, möxösa, ine ewe a öng nang i isik a abalamu xö nangadi xabise i pet eörin a warkurai te Moses.

<sup>9</sup> A arile möxöbo warkurai te Moses i bira: “Ganim a pet a tatalien ne ilawa ma önga tödi alolo, ganim a arsexomet tataun, ganim a wuwulo, ma ganim bara u neek a lalaa xöbo duöng kabise.” Ma nang bara rebo mangana arile sa i nangen, a warkurai nang i unine idi xirip i bira, “Örobo maaaa lamun a öng kabise xarnang u maaaa lamun nöngön iat.”

<sup>10</sup> A tatalien ne abalamu i kebeöt tua wewet te sasaban urungan kere öng. Ma ina na a unine bara a tatalien möxö isik a abalamu ibo wewet eöt mabo warkurai te Moses.

<sup>11</sup> Mum morobo mana pet bira, möxösa, mum mo maras sik ulamun a mangana axana bung me nixinen. A axana bung iri saxit im bere mum morobo laran, möxösa, a bung möxö ineöro iri lörörö xöba xö ina axana bung nang ire toxo buluş a nunu re ire re Kraiss.

<sup>12</sup> Ma ködö iri lörörö rua xakawöm tewe ma i lörörö im pa marmaras. Io niang, i deek bere ire tabo kip tewe abo tatalien möxö ködö ma bara ire tabo sige lo abo lalaa möxö inarese xö maras.

<sup>13</sup> Ire tabo mana talien xarnang idi nang te kis kö maras. Ganim bara ire te inim ma te muu a tatalien ne baulang. Ganim bara ire te maru arixe me idi nang kaim bere mere ire, me ire tebele wewet abo magingin ne ilawa. Ganim bere ire te pet a tatalien ne kinis elixilik kaluluonin ire, me ire tebele muu a tatalien ne neek lalaa.

<sup>14</sup> Ma lamun mum morobo mana ösige e mum arixe me Jisas Krais a Orong, ma ganim bere mum mo döxömen bere mum morobo pet eörin im bule a mamaa möxö lölös mera xö pu kölöme re mum.

## 14

### *Örö mana talien eöt ma nang u nunu bara i deek*

<sup>1</sup> Io, me mum morobo mana ömaraxen lo a nangadi ewe kaim kö xikip a dinödöm möxö balamasa ma i nine dinödöm bang ulamun abo lalaa i eöt te öng kua wewet. Mum morobo ömaraxen lo ine bira, me mum korobo pere öbulubunin ine ulamun abo lalaa i döxömen bara i töxödös bara i saban.

<sup>2</sup> A öng i nunu bara i eöt bara irabo en abo mangana nien kirip. Öng kabise belek nang i kobo maruxo a nunu re ine i döxömen bara i kebeöt bara irabo en a gineme.

<sup>3</sup> A nangadi ewe tobo enen abo lalaa xirip, ganim bara tabo pere öbulubun ewe i kobo enen abo lalaa xirip. Me ewe nang i kobo enen abo lalaa xirip, i karabo kure a öng nang i ibo enen abo lalaa xirip xarnang bara iri lexe a warkurai, möxösa, God iri ömaraxen lo ine bölök.

<sup>4</sup> Ewe im nöngön nang u eöt tua xurxure a tultul kö öng kabise? A orong ke ine iat ewe irabo kure bara i tuu deek sik bara iri subu. Ma irabo tuu deek sik iat, möxösa, a Orong i eöt bara irabo pet ine bara irabo tuu bira.

<sup>5</sup> Ma önga tödi im i döxömen bara dauleng ne bung i madakdak köbo bung kabise. Öng kabise belek i döxömen bara abo bung kirip i eöt kalik mon. Io, a öngöng ke idu irabo mana nunu lölös sik iat bira, "I töxödös se e bara arabo pet xarna na."

<sup>6</sup> Ine ewe i perexulen bara önga bung i madakdak kö öng kabise, i döxömen bira rua gene a Orong. Me ine ewe ibo enen abo mangana nien kirip, i wewet bira rua gene Orong. Ma ina na i maras, möxösa, i tengen deek kö God ulamun a nang ibo enen. Me ine ewe i isewi abo gineme, i pet bira rua gene Orong bölök ma i tengen deek bölök kö God.

<sup>7</sup> Kaim pe öng ke ire bara i to rua gene ine xalik iat, ma kaim pe öng ke ire irabo met tua gene ine xalik iat bölök.

<sup>8</sup> Nang bara ire te to, ire tabo to rua gene a Orong. Ma bara ire tabo met, ire tabo met tua gene a Orong. Io niang im, nang bere ire tabo to, bara tabo met, ire mere Orong.

<sup>9</sup> Me Krai ixo met ma ixo to baling ulamun ina unine iat bara irabo Orong köbo minet me ewe idi nang te to sik bölök.

<sup>10</sup> Ma lamun nöngön im ewe u kara en gineme, ruasa iat bara u kure a töm kölöme re Krai bara iri lexe abo warkurai? Me nöngön ewe u bo enen abo lalaa xirip, ruasa bara u pere öbulubun a töm? Ganim nöngön u wewet bira, möxösa, ire xirip tabo tuu xö warkurai kö wawara xö God.

<sup>11</sup> Ina na i maras, möxösa, a tingenge xö God toxo geet i tengen bira,

*“A Orong i tengen bira: ‘Nang bara i turunon bara e to sik, io, i turunon bölök bara a nangadi xirip tabo subun kexe xö wawara re e,*

*me idi xirip tabo etöngösen maras bara e, e God.’ ”*

<sup>12</sup> Io niang im, ire xirip tabo tuu xö wawara xö God me ire tabo mana babalu ulamun abo unine xöbo tatalien te ire.

<sup>13</sup> Io niang, ganim ire ra ekure kaluluonin ire. Ma lamun mum morobo mana dödöm deek bere mum korobo buluş se önga laa ra tamake bara abo töm mum kölöme re Krai tabo take xönan.

<sup>14</sup> Xö tinuu re e kölöme re Krai e maras deek me e nunu iat bara abo mangana nien kirip i deek kö winara xö God bara öng irabo en. Ma lamun nang bara öng i nunu bara i kobo töxödös bara irabo en önga mangana nien, io, i turunon bara i kobo töxödös kö ina tödi bara irabo en ine.

<sup>15</sup> Ma nang bara abo mangana nien te nöngön i pet a töm pua sinubu saban, io, nöngön u kobo mumuu abo tatalien ne ebalamu im. U bele en abo lalaa nang irabo ögarin a töm ewe e Krai ixo met tua gene ine bölök.

<sup>16</sup> Nang bara abo dauleng kabise tabo tengen ögarin e mum ulamun abo lalaa nang mum mo pere bara i deek kua wewet, ganim i mum pua wewet inabo lalaa.

<sup>17</sup> Ruasa, möxösa, a unine kingdom kö God i kobo tatalien ne nien ma ra ininim. Ma lamun a unine im, abo tatalien töxödös ma a malum ma a axanan nang i wanot lo meringan kö Töxödös ne Tanono,

<sup>18</sup> möxösa, nang bara öng i tultul te Krai ma i tame bölök ine bira, i öaxanan e God ma i pet abo mangana tatalien nang a nangadi te perexulen bara i töxödös kö wawara re idi.

<sup>19</sup> Io niang im, ire tabo mana isik abo lölös kirip pe ire rua wewet a nang irabo isik ot a malum kaluluonin ire ma irabo uru ölölös ödeek a öngöng kabise.

<sup>20</sup> U bele ögarin a tinörön kö God kelen abo nien te nöngön. A turunon abo mangana nien kirip i deek bara tabo en, inexalik i saban bara öng irabo en te laa sa nang irabo ösubu a tönö kölöme re Kraiss.

<sup>21</sup> Nang bara u ösubu a töm möxösa u en a gineme bara u inim a wain bara u pet te mangana lalaa xabise, io, irabo deek bara u bele pet bie.

<sup>22</sup> Inexalik im, ulamunon abo lasanene u nunu bara i deek kö nöngön kö inabo lalaa, nöngön örobo mana ganim sik mon kaluluonin e muu me God. I deek saxit a kinis kö tödi ewe i kobo örasen bara iri pet a sasaban kö inabo lalaa iri nunu bara i deek kua wewet.

<sup>23</sup> Inexalik nang bara re öng i nine dinödöm ulamun a önga laa i en, io, God irabo kure ine bara iri pet a sasaban nang bara i en, möxösa, a tatalien te ine i kobo wanot meringan kö nunu re ine. Ma abo tatalien i kobo wanot meringan kö nunu im, ine a magingin saban.

## 15

<sup>1</sup> Me ire nang tere maras köbo dinödöm pe ire, ire tabo mana ömaraxen lo idi ewe idi nang abo dinödöm pe idi i kobo maruxo. Ganim ire ra laie xö mangana dinödöm pe idi, ma ganim ire ra öaxanan öbaling iat ire.

<sup>2</sup> Ire xirip öngöng tabo mana pet abo mangana tatalien tua öaxanan abo nangadi xabise. Me ire tabo pet bira rua rorop idi rua ölölös abo to re idi.

<sup>3</sup> Ruasa, möxösa, Kraiss iat bölök i koxobo öaxanan öbaling iat ine, inexalik ixo pet eörin ma nang toxo geet bara, *“God, abo tinenge saban nang idi toxo tengen urungan tö nöngön iri subu lömö re e.”*

<sup>4</sup> Ma i eöt bara arabo tengen bira, möxösa, abo ginigeet kirip nang idi toxo geet mesila idi toxo geet tua usu ire, rua nang ire tabo tuu lölös kö ene abo tiip me ire tabo kip a aöxaxat meringan köbo tinenge re God niang toxo geet, io niang, ire tabo xixiset ma nunu ulamun abo warwadöan nang irabo wanot tö ire.

<sup>5</sup> Me e seseng urungan te God ewe i öxaxat ire ma i pet ire bara tabo eöt tua tinuu lölös kö ene abo tiip. Me e seseng bara irabo pet e mum bara morobo muu önga mangana dödöxömen kalik mon kaluluonin e mum nang mo mumuu e Kraiss Jisas.

<sup>6</sup> Me e seseng bere God irabo pet bira bere mum morobo ii öraxin e God ma önga dinödöm ma önga inöno e mum mon, ine a God ma a Tata xö Orong ke ire, Jisas Kraiss.

<sup>7</sup> Io niang im, mum morobo mana ömaraxen lo e mum kaluluonin e mum iat xarnang e Kraiss ixoro ömaraxen lo

e mum pua nang mum morobo isik a aölelet urungan kö God.

<sup>8</sup> E tengen tö mum bere Kraiss ixo wanot xarnang a tultul tua rorop abo Judeia rua osen bere God i pet eörin abo tinenge re ine. Ma ixo wanot tua öturunon abo kunubus nang e God ixoro pet arixe mabo untubuno idi

<sup>9</sup> ma rua nang idi im ewe idi kaim bara abo Judeia bölök, idi tabo ii öraxin e God ulamunon a abalamu re ine. I xarnang abo tinenge re God toxo geet i tengen bara,  
*“Io niang, nang e kis kaluluonin idi nang kaim bara abo Judeia e rabo ölet nöngön.*

*E rabo sösö rua ölolot a esem.”*

<sup>10</sup> Ma a tinenge toxo geet ine i tengen bölök bira,

*“Ewe mum nang kaim bara abo Judeia,*

*mum morobo axanan arixe mabo nangadi iat te ine.”*

<sup>11</sup> Toxo geet bölök bira,

*“Mum kirip ewe nang mum kaim bara abo Judeia, mum morobo mana ölet a Orong.*

*Mum abo marapun kirip, mum morobo sö ma ölet wösöt ine.”*

<sup>12</sup> Me Aisaia bölök i tengen bira,

*“A tubuno raxin te Jesi irabo wanot.*

*Ine irabo wanot tua kure abo marapun ewe nang idi kaim bara abo Judeia.*

*Ine a unine bara idi nang kaim bara abo Judeia tabo xixiset ma nunu ulamunon abo warwadöan nang irabo wan urungan tö idi.”*

<sup>13</sup> E seseng urungan te God ewe i pet e mum bara morobo eöt tua xixiset ma nunu ulamunon abo warwadöan. E seng ine bara irabo öwöwö e mum ma axanan ma malum bölök nang mum bo nunu re ine. Io nang im, xö lölös möxö Töxödösine Tanono, a tatalien ne xixiset ma nunu ulamunon inabo warwadöan irabo wöwö xöba sik ke mum.

*Pol kaluluonin idi nang tekela ölangen bang a tinenge deek*

<sup>14</sup> Abo töke kölöme re Kraiss, e nunu turunon iat bere mum mo wöwö mabo dedeek arixe mabo nanase, ma bere mum mo eöt tua eöxaxat kaluluonin e mum.

<sup>15</sup> Inexalik e re balamasa rua ginigeet ulamun a dauleng ne lalaa urö mum, xarnang bara arabo ödöxömen e mum ulamunon inabo lalaa. Me e re geet bira, möxösa, God iri örarabaa e arixe ma abalamu re ine

<sup>16</sup> bara arabo önga tene tinöron te Kraiss Jisas kaluluonin e mum nang kaim bara abo Judeia. E bo wewet a tinöron ne pris nang e bo walwalas tinenge ma atöngösen deek ke God rue nang e God irabo öbala lo e mum nang kaim bara abo Judeia xarnang önga inerabaa wösöt ine, mum nang

a Töxödösine Tanono iri bulus tewe xalik abo sasaban tue God iat.

<sup>17</sup> Io niang, e re pere bara a kinis se e kölöme re Krai Jisas, ine a unine bara arabo eölolot ulamun abo tinörön te e rua gene God.

<sup>18-19</sup> E xebe buut tua eölolot ulamun abo lalaa xirip, inexalik önga laa xalik mon. E rabo eölolot ulamun abo lalaa e Krai iri pet kö tinörön te e kaluluonin idi nang kaim bara abo Judeia nang idi toxo ölangen abo tinenge re e ma toxo pere abo tatalien te e, a tatalien lölös, abo tatalien ne auwuwus, mabo auxilieng nang e xo pet arixe ma lölös möxö Töxödösine Tanono. E rabo tenge xalik mon ulamun inabo lalaa Krai iri pet nang iri silien ot idi bara tabo muu e God. Io niang, urulo meringan Jerusalem e xo wan kö boxönö xirip urungan kö xönö mee Iirikam me e xo öxawam a tinörön te e xinabo uleng ne xönö rua palas tinenge ma atöngösen deek ulamun e Krai.

<sup>20</sup> E xobo maaa bara arabo palas tinenge ma atöngösen deek kingan tö idi nang tekela ösöxö bang e Krai, rua nang e karabo rörön kö xönö nang öng kabise ixoro araun kö tinörön ee.

<sup>21</sup> Ma lamun e maaa bara arabo pet eörin a tinenge xö God nang toxo geet bara,

*“Idi nang kaim kö see lo ulamun ine, idi tabo pere, me idi nang kaim kö ölangen, idi tabo maras.”*

### *Pol ixo pingit tua nuan u Rom*

<sup>22</sup> Io niang, inabo lalaa ibo wewet pii e bara i karabo eöt bara e rabo wanot urungan tö mum.

<sup>23-24</sup> Ma lamun na im, kaim pe maup kö tinörön te e xö inabo boxönö, ma xöbo oleleng ne awat e xobo maaa rua werwere e mum. Io niang, e xo bulus a dinödöm pe e bara arabo wan urungan te mum kö inuan te e urungan Spein. E maa bara arabo pere e mum kö inuan te e, ma nang e re kis aulik kingan kaluluonin e mum, ma nang mum muru öaxanan e, e maaa bere mum morobo top e rua nuan urungan.

<sup>25</sup> Io na im, e maa rua inuan belek urungan Jerusalem pua rorop a nangadi re God tingan,

<sup>26</sup> möxö abo Kristien tingan Masedonia me Akaia toxo axanan tua bubulus arixin abo arabaa ne tuluwok kua rorop a nangadi re God ewe idi te maris singan Jerusalem.

<sup>27</sup> A turunon, idi toxo axanan tua wewet bira, inexalik idi ma dinau pe idi abo Judeia bölök. Ruasa, möxösa, nang bara meringan köbo Judeia idi tere kip a xönö re idi möxöbo warwadöan meriso xö God, io, a dinau pe idi belek



kua babalu wuxus abo Judeia ma abo mangana warwadöan mera xö pu.

<sup>28</sup> Ma nang bara e re öxöwöm im ina tinörön ne isik tuluwok, ma bara e re öturunon ina arabaa re idi urungan köbo Judeia, io, e rabo wan urungan tö mum, ma melamu im, urungan Spein.

<sup>29</sup> Me e ösöxö bara arabo wanot urungan te mum, e rabo wanot arixe ma warwadöan taxin meriso re Kraiss.

<sup>30</sup> Abo töke kölöme re Kraiss, ire ta kis kö ene Orong ke ire e Jisas Kraiss, ma a Töxödös ne Tanono iri örarabaa ire ma a tatalien ne inebalamu, io niang, e öxaxat e mum bara mum morobo seseng wösöt e God ulamun e, möxö ina na, morobo tuu arixe me e xöbo tiip.

<sup>31</sup> Mum morobo mana seseng bara God irabo ölanglangu e xalik idi abo tabuno nunu riso Judeia. Ma morobo seseng bölök bara a nangadi re God tingan Jerusalem tabo axanan tua ömaraxen lo a rorop pe e.

<sup>32</sup> Mum morobo seseng biringan bara arabo eöt tua nuan pösöt e mum arixe ma axanan nang bara a Orong i maaaa bie, ma bara arabo mamas arixe me mum ma arabo kip lo re dauleng ne lölös maxat.

<sup>33</sup> Io, me e seseng im bara God ewe ibo isik a malum irabo kis arixe me mum kirip. Amen.

## 16

### *Pol ixo öga lo idi riso Rom*

<sup>1</sup> Io, e tengen te mum bara Pibi ine a une deek. Ine a saxana ire kölöme re Kraiss ma ibo rorop abo nangadi möxö lotu ringan Senkira.

<sup>2</sup> E seng e mum bere mum morobo öbala lo ine, möxösa, ine bölök kö Orong. Mum morobo öbala ine mabo tatalien i töxödös bara abo nangadi turunon te God tabo muu bira nang idi te öbala a öng. E seng e mum bere mum morobo top ine xöbo mangana sasaxan te ine, möxösa, ine ixo top a oleleng ne nangadi, me e a öng mere idi bölök.

<sup>3-4</sup> Mum morobo mana öga lo e Pisisila me Akuila ewe idu te rörörön arixe me e rua gene Kraiss Jisas. Idu toxo isik tewe abo to re idu rua rorop e. Inexalik idu toxo maras sik bere idu tabo met gut. Me e tengen deek ulamun idu ma kaim bara re e xalik, idi bölök abo nangadi möxö lotu xinabo lagunon te idi ewe idi nang kaim bara abo Judeia.

<sup>5</sup> Me mum morobo öga bölök a nangadi möxö lotu ewe idi tobo orot etok kö gunon te idu.

Mum morobo öga lo Epainetus, a ais deek ke e, ewe ixo arun tua dinödöm puxus urungan te Kraiſ ſingan kö xönö me Eſia.

6 Mum morobo öga e Maria ewe ixo rörerön lölös ſua gene e mum.

7 Mum morobo öga lo Andaronikus me Junia, a nine Judeia xarnang e, ewe idu toxo kis arixe me e kölöme xö gunon ne aömokorot. Me re idi ewe toxo tile rua palas a atöngöſen deek, abo nangadi te ii öraxin idu, me idu toxo ot ta kinis kölöme re Kraiſ meſila re e.

8 Mum morobo öga lo e Ampiliatus, a ais deek ke e kölöme xö kinis möxö Orong.

9 Mum morobo öga lo bölök e Urbanus ewe ibo rörerön arixe me ire rua gene Kraiſ, me mum morobo mana pet bira bölök urungan kö ais deek ke e, e Sitakis.

10 Mum morobo öga lo e Apeles, ewe abo kinadik ixo kawönö ine ma i oſen ömaras bere ine i muu ödeek e Kraiſ.

Me mum morobo öga lo ewe idi möxö barama re Ariſtobulus.

11 Me mum morobo öga lo e Erodion, a töke.

Mum morobo öga lo idi möxö barama re Nariſiſus ewe idi mere Orong.

12 Mum morobo mana öga lo e Tiripina me Tiripoſa, a nini une ewe idu tobo rörerön lölös ulamun e Orong.

Mum morobo öga lo bölök a ais deek ke e, Perſiſ, ine a önga une xabiſe bölök ewe ibo rörerön lölös ſe Orong.

13 Me mum morobo öga lo e Rupaſ ewe a Orong ixo pere koſ ine. Me mum morobo pet bira bölök urungan kö nago re ine ewe nang i wawara xarnang a nago bölök ke e.

14 Me mum morobo öga lo e Aſinkirituſ me Pelegon me Ermeſ me Patrobaſ me Ermaſ ma abo Kriſtien ewe nang idi tobo kis etok arixe me idi.

15 Me mum morobo öga lo e Pilologuſ me Julia me Nereuſ ma unſaxana e bölök, me Olimpiſa ma a nangadi xiriſ pe God ewe idi te kis arixe me idi.

16 Mum morobo öga lo a öngöng kabife arixe ma töxödöſ ne amum.

Ma abo nangadi möxö lotu xiriſ pe Kraiſ möxöbo lagunon, idi te öga im e mum.

17 Abo töke kölöme re Kraiſ, e öxaxat e mum bere mum morobo tumarang ulamun ewe idi tobo palang e mum bere mum karabo tuu arixe, ma lamun bara e mum bo xixixiſ elixilik kaluluonin e mum. Idi ewe nang tobo bubuluſ abo mangana tatalien nang i xabiſe xiriſ kö inauſu mum moxo

kip lo, bara mum morobo subu xönan. Mum morobo tuwes kalik idi.

<sup>18</sup> Abo mangana nangadi bira tokobo tame e Jisas Kraiss, a Orong ke ire. Ma lamun idi te tame abo mamaa iat kö baladi. Idi tobo önamien a nangadi mabo tinenge mamaran tua silien öröxröxö abo dinödöm pe idi ewe nang tokobo tumarang deek.

<sup>19</sup> A nangadi xirip tere see lo ulamun ina tatalien ne tame tinenge re mum. Möxö ina na, e axanan ulamun e mum. Ma lamun e mamaa bere mum morobo nanase sik ulamun abo lalaa niang i deek ma bere mum morobo madakdak kalik a sasaban.

<sup>20</sup> Ma iri lörörö im bere God ewe ibo isik a malum irabo pas gigise e Satan kö ene abo xexene e mum.

A inemarse meringan te Jisas Kraiss, a Orong ke ire, irabo kis arixe me mum.

<sup>21</sup> Timoti, ewe ibo rörörön arixe me e, i öga e mum. Me Lusias me Jeson me Sosipater, idiet abo Judeia xarnang e, idiet bölök te öga e mum.

<sup>22</sup> E Tertius, e xo geet ösu ina ginigeet na rua gene Pol, ma xö kinis se e kölöme xö Orong, e öga e mum.

<sup>23</sup> Gaius i öga bölök e mum. Ine ewe nang ixo öbala lo e arixe ma marakörö möxö lotu bere mem marabo kis etok ka xö gunon te ine.

Erastus ewe ibo balaure a tuluwok möxö ina lagunon na, me Kuartus a tönö ire kölöme re Kraiss, idu te öga lo e mum.\*

<sup>25</sup> Io, e ölet ine ewe i eöt tua uru ölölös e mum eöt ma tinenge deek ke e, ina atöngösen ulamun e Jisas Kraiss. Ina atöngösen nang e God iri osen im. Ma inabo lalaa ixo mun sik kö oleleng ne awat, ma lamun na im God iri osen ömaras.

<sup>26</sup> God ewe nang i kara met iri ömaras ire ulamunon ina na kölöme xöbo ginigeet köbo propet ma eöt ma tinenge lölös se ine nang ixoro bulus sik. Me God ixo pet bira rua nang abo marapun möxö öxöno lagunon kirip tabo tame ine xö tatalien ne nunu.

<sup>27</sup> Io, ma xö kinis se e kölöme re Jisas Kraiss, e ölet e God bira, ine xalik mon ewe i nanase. A aölelet ulorexe urungan te ine. Amen.

---

\* **16:23** A ginigeet maut idi toxo öläxa a rina **24** i tengen bira, "A abalamu re Jisas Kraiss, a Orong ke ire, irabo kis arixe me mum kirip. Amen."

## **A Sisila ne Ginigeet te Pol urungan köbo KORIN**

Pol ixo sulo a lotu rusu Korin kö sese öninöng ne nuan te ine ma atöngösen deek (pere e Aposol 18:1-18). Me Korin ixo lagunon taxin kö axana bung nang e Pol ixo wan urungan ee, ma a oleleng ne nangadi ringan toxo muu abo magingin biling me idi toxo lotu wösöt abo perewuo arixe mabo magingin ne ilawa. Io, xö sese önarun ne nuan te Pol, ine ixo xisixis Epeses (Aposol 19:22) ma ixo see lo a uleng ne kinis saban kö lotu rusu Korin (1 Korin 1:11). Pol ixo ölangen ulamun idi abo Kristien maxat tuso Korin bara i lölös bara uleng tabo ulo rewe xalik abo magingin me lorexe. A turunon bara a Töxödös ne Tanono ixo isik ödeek abo arabaa oleleng köbo Kristien tuso Korin, inexalik idi tokoxobo to deek minabo arabaa. Idi toxo döxömen bara idi toxo nanase xöba (1:18-2:16) me idi toxo ii öraxin idi (4:6-21). Önga tödi ixo maru arixe ma une xö tamana (5:1-8) ma toxo lamus elixilixin idi bere idi tabo tuu xö warkurai (6:1-11). Ma a tawörök kölöme xö lotu (1:10-17; 3:1-23). Ma uleng ne duöng kabise toxo ot mero Korin, me idi toxo ose e Pol ulamun öngabo lalaa idi abo Korin tokoxobo maras ulamunon (7:1; 8:1; 12:1; 16:1). Io nang, e Pol ixo geet ina ginigeet tua ötumarang idi ulamun abo magingin saban te idi ma rua babalu ödeek abo ineose re idi. Ixo tengen tö idi ulamun a tatalien ne inalolo (7:1-40) ma bara öng i bele ösubu a saxana kölöme re Kraiss arixe ma inabo magingin i döxömen bere i deek, inexalik bara a saxana i döxömen bara i saban (8:1-11:1). Ixo tengen te idi bara idi tabo lotu bule mabo arabaa re idi meringan kö Töxödös ne Tanono (11:2-14:40) ma bara a tinaru kaa xalik a minet ine önga unine raxin möxö atöngösen deek (15:1-58).

<sup>1</sup> E, e Pol, ewe nang God ixo kuwe lo eöt ma maaa re ine bere e rabo önga aposol te Kraiss Jisas. Me maa me Sostenis, a tönö ire,

<sup>2</sup> maa me tile ina tinenge na urungan te mum a marakörö ne lotu niang ke God, ewe te kis singan Korin, e mum nang e God ixo ömadakdak kölöme re Kraiss Jisas, ewe mum nang ixo kuwe lo bere mum morobo nangadi runon te ine iat arixe me idi xirip möxöbo lagunon ewe nang tobo lolotu wösöt a Orong ke ire, e Jisas Kraiss, ine a Orong ke idi mere ire bölöök.

<sup>3</sup> A abalamu ma malum urungan te mum meringan te God a Tamana ire me Jisas Kraiss, a Orong.

*Pol ixo tengen deek kö God*

<sup>4</sup> Me e bo rengrenge deek sösöxö xö God ulamun e mum, möxösa, ixo isik tataunin a abalamu re ine urungan te mum kölöme re Kraiss Jisas.

<sup>5</sup> Me e tengen deek urungan te ine, möxösa, ine iri wadöane xöbanin e mum arixe mabo mangana arabaa xirip, xarnang abo tinenge mamaran ma nanase.

<sup>6</sup> Ma ina na iri ömaras e mum bara ina tinenge ulamun e Kraiss kaluluonin e mum i turunon.

<sup>7</sup> Möxö ina na, nang e mum mo xixiset ma maaaa raxin ulamun a inot te Jisas Kraiss, a Orong ke ire, kaim pe arabaa bara i tup meringan kaluluonin e mum.

<sup>8</sup> Me Jisas irabo ölölös e mum ot kö öxöwöm, io, idi takarabo parasiwin te tatalien sasaban meringan te mum kö ina axanan bung ke Jisas Kraiss, a Orong ke ire.

<sup>9</sup> Me God irabo pet bira, möxösa, ibo wewet eörin abo tinenge re ine. Me ine ewe nang ixo kuwe lo e mum bere mum morobo kip a kinis arixe ma Barok ke ine, e Jisas Kraiss, a Orong ke ire.

*Idi tebele palang idi kölöme xö lotu*

<sup>10</sup> Abo töke kölöme re Kraiss, e seng e mum kö esene e Jisas Kraiss, a Orong ke ire, bere mum kirip morobo sixaut arixe kaluluonin e mum, ma bara irabo kaim pe kinis elixilik kaluluonin e mum. Me e seng e mum bere mum morobo tuu arixe xö önga dinödöm mon.

<sup>11</sup> Abo töke kölöme re Kraiss, a dauleng meringan kö muxu re Kloii, idi te töngösen e bara abo inangat iang kaluluonin e mum.

<sup>12</sup> Ma i xarnang bere mum a öngöng bo rengrenge abo lalaa oleleng kabise arixe. A öng ibo rengrenge bere, "E bo mumuu e Pol." A öng kabise ibo tengen bere, "E bo mumuu e Apolos." Ma öng baling ibo tengen bere, "E bo mumuu e Pita." Ma öng kabise belek ibo tengen bere, "E bo mumuu e Kraiss."

<sup>13</sup> Mum mo döxömen bere Kraiss ine mon meringan kö dauleng kidi? Ma toxo tut e Pol kö sölöxöröp pua gene mum? Ma toxo baptais e mum kölöme xö esene Pol?

<sup>14</sup> E tengen deek kö God bere e kaim kö baptais se dauleng mere mum, nexalik e Krispus me Gaius xalik mon.

<sup>15</sup> Lamun ina na, kaim pe öng irabo tengen bara iri kip baptais kölöme xö esene e.

<sup>16</sup> Io, e dōxōmen lo bōlōk a barama re Sepanas ewe nang e xo baptais idi. Ma lamun e kebeöt ta dōxōmen lo re öng kabise bere e xo baptais.

<sup>17</sup> Me Kraiss kaim kö tile e bara arabo baptais. Kaim. Ixo tile e bara arabo etōngōsen ma tinenge deek. Ma ganim bere e rabo etōngōsen min arixe ma tinenge ne nanase möxō nangadi mon, xalik a sölōxöröp pe Kraiss ibo laa tataun mon.

*A sölōxöröp ma a nanase re God*

<sup>18</sup> Me e tengen bira, möxōsa, ewe midi nang te önan kö ngas möxō iuiuo, idi te pere bara a tinenge ulamun a sölōxöröp i baulang mon. Ma lamun ire nang e God i öro ire, ire te perexulen bara ina tinenge ulamun a sölōxöröp, ine a lölös se God.

<sup>19</sup> Idi toxo geet xarna na xarnang e God ixo tengen, *“E rabo pet ögarin abo nanase xöbo tene nanase, me e rabo tuu wi abo dinödöm pe idi ewe nang ma dinödöm deek.”*

<sup>20</sup> Ma ule im inabo nanase xöbo tene nanase? Ma ule im inabo nanase möxōbo tene ausu möxō warkurai? Ma ule bōlōk inabo winörö ne nanase re idi abo tene tinenge? E God iri osen bara abo nanase mera xö öxōno lagunon a lak baulang mon.

<sup>21</sup> Ma xö nanase re God, ine kaim kö öbala lo abo tene nanase mera xö öxōno lagunon bara idi tabo ösöxö ine. Idi toxo perexulen a tinenge deek bara a dinödöm ne baulang ine. Io niang, God ixo maaaa bara irabo rörön arixe ma ina tinenge rua öro idi nang te nunu.

<sup>22</sup> Abo Judeia idi tobo maaaa bara idi tabo pere abo auxilieng lölös sua osen bara önga laa i turunon. Ma abo Grik idi tobo wawara siwin abo nanase.

<sup>23</sup> Inexalik e mem, e mem bo etōngōsen ma Mesaia nang toxo tut ine xö sölōxöröp. Ma ina na a laa ne minenge xöbo Judeia. Ma abo Grik, idi te dōxōmen bara a dinödöm ne baulang mon ina laa na.

<sup>24</sup> Ma lamun urungan te ewe midi nang e God ixo kuwe lo idi, idi nang abo Judeia me ewe idi nang abo Grik, idi te perexulen e Kraiss bere ine iang i osen a lölös kö God ma a nanase xö God.

<sup>25</sup> Ruasa, möxōsa, abo tinörön kö God nang idi toxo pere xarnang a dinödöm ne baulang, i osen belek a nanase raxin nang i taxin köba xö nanase xö nangadi. Ma tinörön te ine nang idi toxo pere bara a lak lön, i osen belek a lölös nang i taxin kö lölös kö nangadi.

<sup>26</sup> Abo töke kölöme re Kraiss, mum morobo mana dōxōmen bara a mangana nangadi sa e mum nang e God ixo kuwe lo e mum. Kaim bara oleleng ke mum ewe nang

a nangadi toxo perexulen bara abo tene nanase, bara abo sisila raxin, ma bara a asuono orong.

<sup>27</sup> Ma lamun a lasa nang a öxöno lagunon i pere xarnang a dinödöm ne baulang, e God ixo pere kos lo rua ömenge abo tene nanase. Me ine ixo pere kos lo bölök a lasa nang a öxöno lagunon i pere bara kaim pe lölös könan, rua ömenge abo tene lölös.

<sup>28</sup> Ma abo lalaa nang a öxöno lagunon i pere ösu ma i melentexin ma i döxömen bara a laa tataun, io, e God ixo pere kos lo inabo lalaa rua wewet ögarin abo lalaa nang a öxöno lagunon i döxömen bara a lak taxin.

<sup>29</sup> God ixo pere kos lo inabo lalaa rua nang bara kaim pe öng irabo eöt tua eölolot kö wawara re ine.

<sup>30</sup> Inexalik kö tinörön te God iat, mum mo kis kölöme re Kraiss Jisas, me ine ewe nang God ixo bulus ine bara ine a unine nanase re ire, möxösa, kölöme re Kraiss e God iri kure bere ire te töxödös ma iri ömadakdak ire ma iri kun ölanglanga lo ire bölök.

<sup>31</sup> Io, xarnang a tinenge re God i tengen, "Ewenene a öng nang i maa rua ölolot, irabo mana ölolot a Orong."

## 2

<sup>1</sup> Abo töke kölöme re Kraiss, nang e xo ot pösöt e mum pua palas tinenge ma tinenge re God, e kaim kö inot xarnang önga tene nanase saxit kö winörö ma nanase.

<sup>2</sup> E xo palas tinenge bira, möxösa, nang e xo kis kaluluonin e mum, e xo bulus a dödöxömen te e bara e karabo döxömen te önga laa xabise, inexalik e Jisas Kraiss ma a minet te ine xalik mon kö öxöno sölöxöröp.

<sup>3</sup> Io, xö axana bung nang e xo ot pösöt e mum, e koxobo lölös me e xo buut me e xo dede xirip.

<sup>4</sup> Nang e xo etöngösen me e xo palas a tinenge deek, kaim bara e xo wöwörö ma nanase möxö nangadi rua sasat lo abo dinödöm pe mum. Kaim. Inexalik bara a atöngösen te e ixo osen a lölös taxin möxö Töxödös ne Tanono,

<sup>5</sup> lamun bara a nunu re mum i karabo kis kö nanase xö nangadi, ma lamun kö lölös taxin te God.

### *A nanase meringan kö Tanono*

<sup>6</sup> Inexalik mem me etöngösen belek ma nanase kaluluonin idi nang te maruxo xöbo tatalien te God. Ma lamun mem kobo etöngösen mabo nanase mee nixinen, bara möxöbo sisila mee nixinen nang idi te eka xakawöm.

<sup>7</sup> Inexalik mem bo etöngösen arixe ma nanase xö God niang ixo mun sik mesila xalik a nangadi ma lamun iri ot maras im na. Me God ixoro pere kos mesila xö urulo möxöbo lalaa xirip bara ina nanase irabo uxis ödeek ire.

<sup>8</sup> Ma kaim pe öng ke idi abo sisila möxö öxöno lagunon na ixo ösöxö ina nanase. Nang bara idi texere ösöxö, idi tekebeöt ta rutut a Orong taxin kö öxöno sölöxöröp.

<sup>9</sup> Ma i xarnang a tinenge xö God nang toxo geet, i bira:  
*“Abo lalaa niang kaim pe öng ixo pere ma ixo ölangen ma  
 ixo ösöxö,  
 io, God ixo tagure inabo lalaa iat ulamun ewe midi nang te  
 maaaa lamun ine.”*

<sup>10</sup> Ma lamun e God ixo osen inabo lalaa urungan tö ire xö Tanono ine.

A Tanono ibo wawara siwin abo lalaa xirip, ma abo lalaa bölök meriso kölöme saxit te God.

<sup>11</sup> A tanono öng, ine xalik mon i eöt bara irabo ösöxö ödeek ina duöng. A önga tödi xabise i kebeöt. Xarnang bölök, kaim pe öng i ösöxö ödeek e God, inexalik a Tanono e God kalik mon.

<sup>12</sup> Me ire kaim kö xikip lo a mangana dinödöm möxö öxöno lagunon, inexalik ire tere kip lo a Tanono meringan kö God bara ire tabo ösöxö abo lalaa xirip nang e God iri tabaa tataun ire min.

<sup>13</sup> Io niang, mem kobo wöwörö mabo mangana tinenge nang toxo eusu min kö nanase möxö nangadi mon. Kaim. Inexalik mem bo wöwörö mabo tinenge nang a Tanono ixo usu e mem min. Mem bo palas abo unine inabo lalaa möxö ina Tanono urungan te ewe midi nang ma Tanono.

<sup>14</sup> Me ewenene nang kaim ine ma Töxödös ne Tanono, i karabo öbala lo abo lalaa meringan kalik a Tanono e God, möxö i döxömen bara inabo lalaa niang a lak baulang. Ine i kobo eöt ta marmaras ulamun inabo lalaa, möxösa, idi xalik mon nang ma Tanono tabo eöt tua ösöxö xulen inabo lalaa.

<sup>15</sup> Me ewenene re öng nang ma Töxödös ne Tanono i eöt tua ösöxö xulen abo lalaa xirip. Ma lamun kaim pe öng kabise belek i eöt tua kure ine.

<sup>16</sup> Ma ina na i xarnang a tinenge xö God i tengen bira:  
*“Kaim pe öng i eöt tua ösöxö a dödöxömen kö Orong.  
 Me ewe a öng i eöt tua usu ine?”*

Inexalik, ire te uruoxe ina mangana dödöxömen te Krais.

### 3

#### *Ire xirip abo tene tinörön te God*

<sup>1</sup> Abo töke kölöme re Krais, e koxobo eöt tua winörö re mum xarnang abo nangadi ewe idi tobo mumuu a Töxödös ne Tanono. Kaim. E xo pere bara arabo wöwörö re mum xarnang a nangadi ewe idi tobo mumuu abo tatalien mera xö pu. Mum moxo xarnang a bung baroxorok lixilik kö kinis se mum kölöme re Krais.



<sup>2</sup> E xo tabaa e mum ma arine tus, kaim bara a nien lölös, möxösa, mum koxobo tagur sik ulamunon. Turunon saxit, mum kobo tagur sik na,

<sup>3</sup> möxösa, mum mo mumuu iat bang abo tatalien mera xö pu. Ma nang e mum bo eengat kaluluonin e mum, me mum bo werwere neek abo kinis kö dauleng kabise, i osen bere mum iat mera xö pu me mum mo roro xarnang a nangadi mera xö öxöno lagunon.

<sup>4</sup> Ma nang a öng i tengen bara, "E muu e Pol," ma öng kabise belek i tengen bara, "E muu e Apolos," io, i osen bere mum a nangadi mon mera xö öxöno lagunon.

<sup>5</sup> Ewenene iang e Apolos? Me ewenene iang bölök e Pol? A nine tene tinörön mon idu ewe nang e mum moxo nunu xöbo tinenge re idu. Maa xirip, maa me pet eörin a tinörön xarnang a Orong ixoro tabaa e maa bere maa marabo pet.

<sup>6</sup> E xo sulo a irine iaa, me Apolos ixo tos. Ma lamun e God ixo öxubu.

<sup>7</sup> Io, lamun ina na, ewe nang i susulo ma i roros, idu xirip te laa tataun mon. Inexalik e God kalik mon ewe nang ibo öxubu abo lalaa.

<sup>8</sup> Ma öng nang i susulo ma öng nang i roros, idu xirip te eöt. God irabo isik a xinuxun te idu öngöng, eöt mabo tinörön te idu.

<sup>9</sup> Maa bo rörörön arixe, me maa a nine tödi xö God. Mum mo xarnang a komo re God, me mum mo xarnang a gunon nang e God iri tön ine.

<sup>10</sup> E xo uru abo xösöng xarnang a tene pet gunon, eöt ma a inemarse nang e God ixo tabaa e min bara arabo pet bira. A öng kabise i wasum lo a tinörön te ine meringan kö inabo xösöng. Inexalik a öngöng ke idi a nangadi irabo balaure ödeek ine iat bara irabo wasum bulungin a tinörön te ine xöbo xösöng.

<sup>11</sup> Ruasa, möxösa, i kebeöt bara re öng irabo uru re önga xösöng kabise. Ma inabo xösöng, e Jisas Kraiss iat mon.

<sup>12</sup> Ma ewe nang ibo wasum ina tinörön te ine xöbo xösöng, irabo rörön ma gol bara siliwa bara a wat sisiek bara a iaa bara a baap ma bara a pagan mon.

<sup>13</sup> Abo mangana tinörön sa nang a öngöng iri pet irabo maras, möxösa, a bung ne warkurai te God irabo osen kö malmalan. A ia sösöt irabo osen ömaras bara a mangana tinörön sa idi tobo wewet. Ma ia irabo könönöin inabo tinörön tua osen bara i deek bara i saban.

<sup>14</sup> Nang bara a tinörön kere öng i karabo söt, ine irabo kip a xinuxun deek.

<sup>15</sup> Ma nang bara a tinörön kere öng i söt kirip, ine i karabo uruoxe re laa. Ine belek irabo kip a to, inexalik

irabo xarnang bara iri ulo rup kalik a kamene ia.

<sup>16</sup> Bara bule, mum kobo ösöxö bere mum a gunon madakdak kö God ma bara a Tanono e God ibo kisisik me mum?

<sup>17</sup> Nang bara re öng i pet ögarin a gunon madakdak kö God, e God irabo pet ögarin bölök ine, möxösa, re ine tus iat. Me mum iat ina gunon.

<sup>18</sup> Ganim bara abo dinödöm pe mum i ömamang e mum iat. Nang bara re öng ke mum i döxömen bara a tene nanase ine xarnang a öxöno lagunon i perexulen a öng bara a lak nanase, io, ine irabo mana baulang rue ine rua nanase turunon.

<sup>19</sup> Ruasa, möxösa, a nanase mera xö öxöno lagunon a lak baulang mon kö wawara xö God. Xarnang a tinenge xö God toxo geet i tengen, *"God ibo uxun abo tene nanase xöbo dinödöm ne nanase re idi iat."*

<sup>20</sup> Ma abo tinenge xö God i tengen bölök bara, *"A Orong i ösöxö abo dinödöm möxöbo tene nanase bara a laa tataun mon."*

<sup>21</sup> Io niang, ganim bara re öng irabo eölolot ulamun abo lasa a nangadi mon te eöt bara tabo pet, möxösa, abo lalaa xirip pe mum.

<sup>22</sup> E Pol me Apolos me Pita, ma a öxöno lagunon, ma a tino ma minet, ma abo lalaa na ma niang bölök melamu, inabo lalaa xirip na re mum.

<sup>23</sup> Me mum mere Kraiss, me Kraiss ine mere God.

## 4

*A Orong iat irabo pere muu abo tinörön möxöbo tene tinörön te ine*

<sup>1</sup> Io niang, a nangadi tabo mana perexulen e maa me Apolos bara a nine tene tinörön te Kraiss ewe nang God ixoro isik tabaa maa ma tinörön te ine bere maa marabo balaure ödeek abo lalaa nang ixo mun sik mesila ma na iri ot kö maras.

<sup>2</sup> Ma nang bara önga tödi orong irabo isik a tinörön köbo tene tinörön te ine, inabo tene tinörön tabo mana pet eörin a maaaa xö orong ke idi.

<sup>3</sup> A laa tataun mon tö e nang bere mum mo kure e xö tatalien te e bara i deek bara i saban, ma i kobo laa raxin tö e bara a nangadi mon tabo kure e eöt mabo mangana warkurai te idi. Me e iat, e kobo eöt tua kure öbaling e.

<sup>4</sup> E kobo döxömen bere e xoro pet te sasaban, ma lamun ina mangana dödöxömen i kobo öturunon bere e töxödös kirip sik. Kaim. A Orong iat mon ewe nang i kure sik e bere e deek bara e saban.

<sup>5</sup> Io, lamun ina na, ganim e mum pa kure re öng, möxösa, a axana bung möxö warkurai i kobola wanot bang. Mum morobo xixiset ma a inuanot möxö Orong. Ine ewe nang irabo ömaras a niang i kis mun sik kö xödxödö ma irabo öwösö abo dinödöm nang i kis kölöme xö nangadi. Ma xö ina bung im a öngöng a tödi irabo kip lo abo aölelet te ine meringan kalik e God.

<sup>6</sup> Abo töke kölöme re Kraiss, e tengen inabo lalaa xirip na ulamun e maa me Apolos sua rorop e mum bere mum morobo kip inausu xalik e maa rue mum bele lexe a tinenge re God nang toxoro geet. E maa bere mum morobo talien bira, rue mum bele ölolot te öng ma öbulubun te öng.

<sup>7</sup> Ewe i pet öraxin e mum? Bara bule, e God kaim a tabaa e mum mabo lalaa xirip niang mum mo uruoxe? Ma nang bere God ixo isik inabo lalaa rö mum, ruasa me mum bo eölolot xarnang bere mum iat mo pet inabo lalaa?

<sup>8</sup> Na im, mum moro uruoxe abo lalaa eöt mabo maaaa re mum! Me mum moro unan im abo bubulus taxin! Me mum moro king im, me mem, kaim.\* Ma i xebe deek bere mum moxoro king tunon, io nang, e mem bölök marabo king arixe me mum.

<sup>9</sup> Ma lamun e döxömen bere God ixo bulus e mem abo aposol xarnang abo iuo nang abo umri te eösesen me mem nang mem me mumuu nanin idi. Ma i xarnang bara toxo kure bere mem marabo met, ma nangadi möxö öxöno lagunon kirip ma abo angelo bölök, idi te ngökngök ke mem.

<sup>10</sup> Xö winara re mum, mem abo baulang kua gene e Kraiss, inexalik mum abo tene nanase kölöme re Kraiss! Mum mo döxömen bere mem a lak lön me mum a lak lölös! Ma te ii öraxin e mum ma nexalik te pere ösu e mem!

<sup>11</sup> Ma mesila ot nixinen, mem moxobo irilöng me mem moxobo minauu, me mem moxobo sisige abo man maut. A nangadi toxobo rutut ölölös e mem. Ma kaim e mem mere ngasiene mem.

<sup>12</sup> Mem bo rörön lölös mabo lime mem iat. Ma nang idi tobo rengrengen ögarin e mem, mem bo seseng e God bara irabo top idi. Ma nang idi tobo eler me mem, mem kara balu idi.

<sup>13</sup> Ma nang idi tobo wöwörö saban tö mem, mem bo babalu idi ma mangana tinenge deek. Ma ot nixinen, mem me xarnang a pirixö saban möxö öxöno lagunon kirip nang tobo tewe rewe, me mem me xarnang a biling nang te gis tewe.

\* 4:8 Pol ixo eösaxit mon, möxösa, abo Korin toxo döxömen bara idi te deek köba me idi toxo pere ösu e Pol.

<sup>14</sup> Me e kobo geet ina tinenge na rua ömenge e mum. Kaim. Ma lamun tua rengrengen ögele e mum xarnang a bung barok ke e nang e bo maaaa xöba ulamunon.

<sup>15</sup> A turunon bara a oleleng saxit ne tene inebalaure re mum kölöme re Kraiss. Inexalik kaim e mum ma oleleng ne tata. Ruasa, möxösa, kölöme xö kinis se mum pe Kraiss Jisas, e xarnang a tata re mum nang e xo isik a tinenge deek urungan tö mum.

<sup>16</sup> Io nang, e öxaxat e mum bara mum morobo muu a tatalien te e.

<sup>17</sup> A unine ina na nang e xo tile e Timoti urungan tö mum. Ine a barok ke e kölöme re Kraiss me e maa xöba re ine. Me ine a tödi nang ibo wewet eörin abo tinörön te ine kölöme re Kraiss. Ma irabo ödöxömen lo e mum lamun abo mangana tatalien te e kölöme re Kraiss, inabo mangana tatalien nang i eöt mabo inausu e bo isik köbo marakörö ne lotu xöbo xönö xirip.

<sup>18</sup> Io, ma dauleng ke mum, mum mo ii öraxin öbaling e mum, möxösa, mum mo döxömen bere e karabo wanot urungan tö mum.

<sup>19</sup> Inexalik nang bara xö maaaa xö Orong, e rabo wanot pasaxit urungan tö mum. Me e rabo ösöxö lo iat bara inabo tene aölolot idi ma mangana lölös, ma kaim bara ulamun abo tinenge mon te idi,

<sup>20</sup> möxösa, a kingdom kö God kaim bara möxö tinenge mon, ma lamun ine a lak lölös.

<sup>21</sup> Mum mo maa bule? Mum mo maa bara arabo ot ma buso, bara ma abalamu ma a tatalien ne ödödö?

## 5

### *Morobo tile rewe a nangadi saban kalik e mum*

<sup>1</sup> A tinenge maras i wan nana ulamun e mum bara a magingin ne ilawa i nangen nang kaluluonin e mum nang i saban köba. Abo tabuno nunu, idi tokobo wewet bira. Ma ina tinenge i tengen bara a önga tödi ibo maru arixe ma une xö tamana ine.

<sup>2</sup> Me mum abo tene aölolot! Go, i deek belek bere mum morobo tapunuk. Me mum morobo tile rewe a tödi nang i pet bira meringan kaluluonin e mum.

<sup>3</sup> A turunon bara e kobo kis arixe me mum kö lewene aike. Ma lamun a dinödöm pe e i kis arixe me mum. Ma i xarnang bere e kis turunon arixe me mum, ma xö esene Jisas, a Orong ke ire, e re kure ina tödi bara iri pet a sasaban.

<sup>4</sup> Mum morobo pet önga kinis etok. Ma a tanoke irabo kis arixe me mum ma a lölös se Jisas, a Orong, irabo kis me mum bölök.

<sup>5</sup> Me mum morobo isik tewe ina tödi urungan kö limine e Satan bara a tatalien möxö aine irabo kawam ma a tanono irabo kip a to xö bung kö Orong.

<sup>6</sup> Ma i kobo deek bere mum morobo eölolot. Bara bule, mum kobo ösöxö bara a perne is irabo öraxin önga beret kudun?

<sup>7</sup> Mum morobo kip tewe abo is maut möxö tatalien saban rue mum pa eöt ma önga beret maxat nang kaim a is könan. Turunon saxit, mum iat mo xarnang abo beret maxat. Me mum morobo pet bira, möxösa, idi toxoro sexomet e Kraiss xarnang a bak kö sipsip nang tobo isik ulamun a Nien ne Nuan Lexe.\*

<sup>8</sup> Io niang, ire tabo mana muu abo mangana tatalien nang i eöt ma Nien niang. Ma ganim ire xö mumuu ine mabo mangana tatalien saban xarnang a is maut. Ma ganim ire rua eönunu mon bara ire a lak töxödös. Kaim. Ire tabo muu abo tatalien nang i deek esexere xarnang a beret niang kaim pe is könan.

<sup>9</sup> Me e xo gegeet urungan te mum bere mum bele xisixis arixe me ewe idi nang tobo mumuu a tatalien ne ilawa.

<sup>10</sup> Turunon saxit, e koxobo wöwörö lamun a nangadi möxö ina öxöno lagunon ewe midi nang tobo ilawa, bara abo tene pere neek lalaa, bara abo tene got laa mabo tene lotu wösöt abo perewuo. Ma nang bara a unine tinge re e ixoro birina, mum morobo wan kalik ina öxöno lagunon.

<sup>11</sup> Inexalik kaim. A unine turunon möxö ginigeet te e bere mum bele xisixis arixe mere öng ewe nang i tengen bere ine a tönö e mum kölöme re Kraiss, ma lamun a tene ilawa ine, bara a tene neek laa, bara a tene lotu wösöt abo perewuo, bara a tene rengrengan ögarin a dauleng kabise, bara a tene ininim, ma bara a tene got laa. Me mum bele an bölök arixe mina mangana tödi.

<sup>12-13</sup> I kobo deek bara arabo kure a nangadi ewe idi nang kaim bara a nangadi xö Kraiss. God irabo kure idi. Inexalik i deek bere mum morobo kure a nangadi ewe idi nang te kis kaluluonin e mum a nangadi re Kraiss. Ma i xarnang a tinge re God nang toxo geet i tengen, *“Mum morobo mana tile rewe a tödi saban meringan kaluluonin e mum.”*

## 6

*Ganim abo tabuno nunu rua kure abo Kristien*

<sup>1</sup> Nang bara re öng i egot ma tönö ine kölöme re Kraiss, bara bule, ine irabo ot pösöt abo tene pet warkurai ewe

\* 5:7 Pol ixo tengen bara ina is a malalar möxöbo magingin saban nang irabo wan esexere xarnang a is kölöme xö beret. Ma lamun kö Nien ne Nuan Lexe abo Judeia toxobo enen a beret nang kaim pe is könan.

nang idi tekara ösöxö e God tua ötöxödös ina laa? Ganim tunon iat bara morobo pet biringan! Morobo wan pösöt a nangadi tus se God bere idi tabo kure.

<sup>2</sup> Bara bule, mum koxobo ösöxö bara a nangadi tus se God tabo kure a öxöno lagunon? Ma nang bara i turunon bere mum morobo kure a öxöno lagunon, bule, i kebeöt te mum pa kure abo lalaa lixilik?

<sup>3</sup> Me mum kobo ösöxö bere ire tabo kure abo angelo? Nang bara i turunon bira, ire tabo eöt iat ta kure abo lalaa möxö ina to xö öxöno lagunon.

<sup>4</sup> Nang bara nangen a mangana tiip bira kaluluonin e mum, mum bele ot pösöt abo tene warkurai ewe nang kaim idi kaluluonin a marakörö ne lotu ma a lotu i kobo perexulen idi.

<sup>5</sup> E tengen bira rua ömenge e mum. Bara bule, i turunon bara kaim pe önga tene nanase kaluluonin e mum ewe nang i eöt ta kure ötöxödös abo tiip kaluluonin e mum abo barön kölöme re Kraiss?

<sup>6</sup> Inexalik a dauleng ke mum tobo bulbulus abo Kristien kabise xö warkurai. Me mum bo ömaraxen lo abo tabuno nunu rua xurxure ötöxödös e mum.

<sup>7</sup> Ma nang e mum bo önan wösöt abo tene pet warkurai rua ötöxödös abo angat kaluluonin e mum, i osen bara mum muru subu esexere im. Ma lamun mum morobo mana öbala lo belek ke öng bara irabo pet sasaban urungan tö mum. Me mum morobo ömaraxen lo bölök ke öng bara irabo got lo abo lalaa re mum.

<sup>8</sup> Inexalik mum iat, mum bo gogot me mum bo wewet a sasaban. Me mum bo wewet ina na urungan köbo tönö e mum kölöme re Kraiss.

<sup>9</sup> Bara bule, mum kobo ösöxö bara abo tene pet sasaban idi tekarako uruoxe a kingdom pe God? A dinödöm pe mum i bele silien ölelebes e mum. Aba mangana nangadi nang ewe tekarako uruoxe a kingdom pe God, idi xarna na: abo tene ilawa, abo tene lotu wösöt abo perewuo, idi nang tobo maru arixe ma öng nang kö öng kabise, idi a körö nang tobo maru baling ma körö, mabo balixilik nang tabo wewet bölök bie,

<sup>10</sup> abo tene pinilo, abo tene pere neek laa, abo tene ininim, abo tene tengen ögarin a dauleng mabo tene got laa.

<sup>11</sup> Ma dauleng ke mum toxo talien bira mesila. Ma lamun a Tanono God te ire ixo tos tewe abo sasaban te mum ma ixo buluş elixilixin e mum rue ine iat ma ixo kure bere mum mo töxödös kö wawara re ine. Ma ixo pet bira rö mum kö esene a Orong ke ire, e Jisas Kraiss.

*Ire tebele muu a tatalien ne ilawa*

<sup>12</sup> Ma öng ixo tengen bira, “Abo lalaa xirip i töxödös se e ra wewet.” Turunon, inexalik kaim bara abo lalaa xirip irabo top nöngön. Ma i eöt bara e rabo tengen bara, “A laa sa nang e maaaa rua wewet, i töxödös bara e rabo pet.” Inexalik e karabo ömaraxen te laa bara irabo bulus e xö ene warkurai te ine.

<sup>13</sup> Ma öng belek ixo tengen, “A balana ire, ine möxö nien. Ma nien, ine möxö balana ire.” Turunon saxit, ma lamun God irabo öxöwöm idu xirip. Inexalik ire tebele tengen bira ulamun a aine ire, bara a aine ire rua gene a tatalien ne ilawa. Kaim. A aine ire rua gene a Orong. Ma Orong ibo balaure a aine ire.

<sup>14</sup> God ixo öraru e Jisas a Orong kalik a minet kö lölös se ine, me ine irabo öraru ire bölök bie.

<sup>15</sup> Bara bule, mum kobo ösöxö bara a aine e mum a xönö möxö aine Krais? Nang bara i turunon bira, mum mo döxömen bara i töxödös bere e rabo kip lo re xönö möxö aine Krais, ma arabo pet ine irabo xönö möxö aine a ilawa? Kaim turunon iat!

<sup>16</sup> Bara bule, mum kobo maras bara nang öng i wasum a aine arixe ma önga ilawa, i xarnang bere idu xirip te öng kö aine idu? Ina na i maras, möxösa, i xarnang a tinenge xö God nang toxo geet i tengen, “Idu tabo öng mon kölöme xö aine idu.”

<sup>17</sup> Inexalik bara ewenene re öng nang i wasum öbaling ine arixe ma Orong, a tanono irabo öng arixe me ine.

<sup>18</sup> Me mum morobo mana ulo rup kalik a tatalien ne ilawa. Abo magingin saban kabise nang a tödi i pet i karabo kis kö aine. Inexalik ewe nang i muu a tatalien ne ilawa i ögarin a aine iat ma ina tatalien saban.

<sup>19</sup> Bara bule, mum kobo ösöxö bara a aine e mum a gunon ne lotu xö Töxödös ne Tanono ma i kisisik kölöme re mum, me mum moxo kip lo xalik e God? Me mum kobo ösöxö bölök bere kaim bere mum mere mum iat?

<sup>20</sup> Kaim. God ixo kun puxus e mum ma xinuxun. Io niang, a laa sa mum bo wewet kö aine mum, morobo mana pet tua osen ta aölelet te God.

## 7

### *A ineose lamun a inalolo*

<sup>1</sup> Io, na im arabo balu a tinenge nang mum moxo gegeet ulamunon. Mum moxo tengen bara i kobo deek bara re öng irabo maru arixe ma önga une.

<sup>2</sup> Inexalik a dauleng ke mum, idi te mumuu abo tatalien ne ilawa, io niang, i deek bara re önga tödi irabo kis arixe ma une re ine iat, ma önga une irabo kis arixe ma tödi re ine iat.

<sup>3</sup> Ma a tōdi irabo isik a aine xō une re ine eöt ma mamaa xō une re ine, ma a une bōlök bie ulamun a tōdi re ine.

<sup>4</sup> A une i kobo kure a aine iat. Kaim. A tōdi re ine i kure sik. Ma bie bōlök ulamun a tōdi, ine i kobo kure a aine iat. Kaim. A une i kure sik.

<sup>5</sup> Ganim bara re öng i öngasin a aine xalik a usuono. Nang bere mu mo sixaut arixe i eöt bere mu morobo kis elixilik aulik kua siniseng. Ma lamun i deek bere mu morobo ot arixe baling, möxösa, nang bere mu mo köbo balaure ödeek abo mamaa re mu, i eöt bere Satan irabo könönöin e mu.

<sup>6</sup> Ma nang e tengen ina na bira, e kobo isik ke tinenge lölös se mum. Kaim. E öbala mon e mum bere mum morobo pet bie.

<sup>7</sup> Ma lamun e maa bara a nangadi xirip tabo eöt me e. Inexalik a öngöng a tōdi iat ine ma önga mangana arabaa meringan te God. A öng i uruoxe a arabaa rua inalolo, ma öng ma arabaa rua kinis ne lala.

<sup>8</sup> Ma xōbo nangadi lala ma xōbo möxösö eka rengrengen tō idi bira, i deek bara tabo kis ne lala sik iat xarnang mon e.

<sup>9</sup> Ma lamun idi ewe tekebeöt bara tabo kure ödeek abo mamaa re idi, tabo mana elolo, möxösa, i deek ka alolo xalik idi tabo bibi rua ilawa.

<sup>10</sup> Me e maa ra isik ina warkurai na urungan köbo duöng alolo. Ma kaim bere e, a Orong iat. Ma i bira: a une i karabo wan lie a tōdi re ine.

<sup>11</sup> Ma lamun nang bara i pet bie, irabo mana kis ne lala sik iat. Ma nang bara i mölök, irabo mana baling urungan kö tōdi re ine. Ma a tōdi re ine i karabo palas alolo me ine.

<sup>12</sup> Ma urö mum kabise e maa ra rengrengen ina na. Ma ina tinenge, a tinenge iat te e, ma kaim bara xō Orong. Ma i bira: nang bara re tönö ire kölöme re Krai i elolo re une nang i kobo nunu re Krai, ma bara ina une i sixaut bara idu tabo kis arixe, io, ganim ine ra palas alolo ma une re ine.

<sup>13</sup> Ma nang bara önga une nunu i elolo re tōdi nang i kobo nunu re Krai ma bara ina tōdi i sixaut bara idu tabo kis arixe, io, ganim ina une rua palas alolo ma tōdi re ine.

<sup>14</sup> Ruasa, möxösa, a tōdi ewe i kobola nunu iri kip a kinis ne madakdak kölöme xō kinis ne alolo arixe ma une re ine. Ma i xarnang bōlök kö une ewe i kobo nunu. Ine iri kip a kinis ne madakdak kölöme xō kinis ne alolo ma tōdi re ine. Ma nang bara i kexebe turunon ina na, God i kexebe eöt tua öbala lo a bung baroxorok ke mum. Ma lamun kaim. Idi te madakdak bōlök bie.

<sup>15</sup> Ma lamun nang bara a tabuno nunu i maa ra nuan lie a usuono, io, mum morobo öbala rewe ine. Ma nang bara i ot bira, io, a tōdi nunu bara a une nunu i eöt tua



langlanga xalik ina usuono. God iri kuwe lo ire bara tabo kis ma malum.

<sup>16</sup> Me nongön a une, u ösöxö bara örobo öro a tödi re nongön, bara kaim? Me nongön bölök a tödi, u ösöxö bara örobo öro a une re nongön, bara kaim?

<sup>17</sup> Ma lamun öngöng mere mum irabo mana kisisik iat kö mangana kinis ne to nang a Orong ixoro bulus sik ke ine. Mum morobo kis kö mangana kinis nang mum moxo kisisik könan kö axana bung nang God ixo kuwe lo e mum. Me e isik ina warkurai na urungan kö marakörö ne lotu xö boxönö xirip.

<sup>18</sup> Nang bere God ixoro kuwe lo re önga tödi ewe nang toxoro kuru a lewene aine, io, i bele könönöin tua talien xarnang a öng nang tekala kuru ine. Ma nang bere God ixoro kuwe lo re öng nang te kobola kuru ine, io, i bele maraxa bara tabo kuru ine.

<sup>19</sup> A tatalien ne kuru lewene aine nangadi, i laa tataun mon. Ma nang bara tekobo kuru re öng, ina nang bölök i laa tataun. Ma lamun a laa nang i taxin sik bara ire tabo mana muu abo warkurai te God.

<sup>20</sup> Me ire xirip a öngöng tabo mana kisisik iat köbo mangana kinis ne to nang ire toxo kisisik könan nang God ixo kuwe lo ire.

<sup>21</sup> Nongön u xo tene tultul kö ina bung nang God ixo kuwe lo nongön? U bele xölxölö xelen. Ma lamun nang bara u eöt ta langlanga xalik ina kinis ne tultul, io, örobo mana pet bie.

<sup>22</sup> Me e tengen bira, möxösa, nang bara re öng, ine a tene tultul nang a Orong ixo kuwe lo ine, io, kölöme xö Orong ine i xarnang a öng nang i langlanga xö kinis ne tultul. Ma xarnang bölök kö öng nang kaim bara a tene tultul ine nang God ixo kuwe lo ine. Io, na ine i xarnang a önga tene tultul te Kraiss.

<sup>23</sup> God ixo kun ölanglanga e mum ma önga xinuxun nang i taxin saxit. Ma lamun ina na, mum bele ömaraxen lo a öng bara irabo kure mum pua mumuu abo dinödöm mera xö pu.

<sup>24</sup> Abo töke kölöme re Kraiss, a öngöng irabo mana kisisik bira sik iat kö mangana kinis ne to ixo kisisik könan nang God ixo kuwe lo ine. Ma irabo kis bira iat arixe me God.

<sup>25</sup> Ma na e maa rua tinenge lamun abo une lala nang tekala elolo bang. E kobo uruoxe re önga warkurai meriso xö Orong lamun a na. Ma lamun e rabo isik a dinödöm pe e. Me Orong ixo marse e bara e a mangana tödi nang mum morobo eöt ta bulus a nunu re mum könan.

<sup>26</sup> E maras lamun a tiip nang i ot pösöt e mum. Io nang, e döxömen bara i deek bara morobo kisisik iat köbo mangana

kinis se mum a öngöng.

<sup>27</sup> Bara bule, idi te isik pi a önga une bara urö nöngön? U bele döxömen bara örobo köröp ina kunubus se mu. Idi tekobo isik pi sik bang ke öng bara urö nöngön? U bele döxömen bara örobo elolo.

<sup>28</sup> Ma lamun nang bara u elolo, u koxobo pet a saban. Ma nang bara re une lala i elolo, i koxobo pet te saban bölök. Ma lamun nang bara re öng i elolo, ine irabo kip a tiip oleleng kö to re ine. Me e re tengen inabo lalaa bira, möxösa, e maa ra tinuu wi abo tiip köbo to re mum.

<sup>29</sup> Abo töke kölöme re Krai, e maa bara mum morobo maras bara a axana bung iri wuruwut. Ma urulo na, ewe me idi nang te elolo, tabo mana kis xarnang bara idi tekobo elolo.

<sup>30</sup> Me idi ewe nang te gegee, tabo talien xarnang bara tekobo tapunuk. Me idi ewe nang te axanan, tabo talien xarnang bara tekobo magan. Me idi nang te xuxuxun, tabo xarnang bara tekobo unan sik kebo lalaa.

<sup>31</sup> Me idi nang te rörörön arixe ma laa mera xö öxöno lagunon, tabo talien xarnang bara tekobo töndik sik inabo lalaa. Ruasa, möxösa, ina öxöno lagunon nang i wawara önga mangan na, i eka xakawam.

<sup>32</sup> Ma lamun e maa bara ganim e mum kö xölxölö. A öng nang i kobo elolo i xölxölö lamun abo lalaa nang mere Orong kua öaxanan a Orong.

<sup>33</sup> Ma lamun ewe nang i elolo sik i xölxölö lamun abo lalaa möxö öxöno lagunon tua öaxanan a une re ine.

<sup>34</sup> Io nang, abo maaaa re ine i nini xönö sik. Ma abo une taluso nang te kobola elolo bang, ma abo une lala xabise bölök, idi tobo xölxölö lamun abo lalaa xö Orong bara tabo madakdak kö aine idi ma xö tanono idi bölök. Ma lamun a une nang i elolo sik i xölxölö lamun abo lalaa möxö öxöno lagunon tua öaxanan a tödi re ine.

<sup>35</sup> Me e tengen inabo lalaa na rua dedeek ke mum. Me e kobo maa bara arabo pet pi e mum. Kaim. E maa bara abo tatalien te mum irabo töxödös ma morobo muu ödeek a Orong, me mum mokorobo eöt ta nuan lelebes aulik.

<sup>36</sup> Me eka tingenge ulamun a mangana tödi nang tere isik pi re une rö ine. Ma nang bara ina tödi i döxömen bara i kobo pet a tatalien töxödös kö ina une, möxösa, i kobo maa bara irabo elolo me ine, ma lamun i maa xöba rua minaru arixe me ine, ma i döxömen bara idu tabo elolo, io, i deek bara irabo pet xarnang i maa bie. I kobo pet te sasaban. Idu tabo elolo.

<sup>37</sup> Ma lamun a önga tödi nang a dinödöm pe ine i lölös bara i karabo elolo, ma kaim pe öng kabise i gutt ine rua

döxömen bira, ma lamun i kure iat a maaaa re ine ma iri bulus ösila a dinödöm pe ine iat bara i karabo elolo ma ina une lala nang toxoro isik pi sik kö ine, io, ina tödi i pet bölök a dedeek.

<sup>38</sup> Io nang, ewe nang i elolo ma ina une lala nang toxoro isik pi sik kö ine, i pet a tatalien deek, ma lamun ewe nang i kobo elolo me ine, i pet a laa i deek saxit.

<sup>39</sup> I kebeöt bara önga une irabo wan kalik a usuono nang bara i to sik. Ma lamun nang bara a usuono iri met, a une i langlanga sik bara irabo elolo re öng nang bara i maa, ma lamun ina tödi irabo mana nunu xö Orong.

<sup>40</sup> Ma lamun kö dinödöm pe e, e döxömen bara irabo axanan köba nang bara i kis ne lala sik. Me e döxömen bölök bara e re uruoxe lo a Tanono God.

## 8

### *Öng i bele ösubu a tönö ine*

<sup>1</sup> Ma na im eka winörö ulamun abo nien ne arabaa urungan köbo perewuo. Ma i turunon bara ire xirip toxo kip nanase xarnang iat mon mum moxobo rengrengen. Ma a tene nanase i pet a öng bara irabo ii öraxin ine iat. Ma lamun bara a tatalien möxö tene abalamu i pet a öng bara irabo top idi xabise.

<sup>2</sup> Ma nang bara re öng i döxömen bara i ösöxö sik a uleng ne lalaa, a nanase re ine i kobola eöt bang.

<sup>3</sup> Ma lamun ewe nang i maa lamun e God, God i ösöxö sik ine.

<sup>4</sup> Io, me e rabo tenge ulamun a tatalien ne enen abo nien nang tere tabaa sik abo perewuo min. Ire te ösöxö bara abo perewuo abo malalar mon, ma kaim pe lalaa i turunon könän. Me ire te ösöxö bara önga God kalik mon angen.

<sup>5</sup> I turunon bara uleng ne lalaa ire tobo rengrengen bara a god meriso xö mango ma mera bölök kö öxöno lagunon. Ma lamun ganim bara a oleleng ne mangana god bira ma abo orong bölök.

<sup>6</sup> A önga God kalik mon te ire, me ine a Tamana ire ewe nang ixo uxis abo lalaa xirip, me ire te to ulamun ine. Ma a önga Orong kalik mon, me ine e Jisas Krais, ma abo lalaa xirip ixo ot kö limine me ire tere kip a to xönan.

<sup>7</sup> Ma lamun belek, a nangadi xirip tekara ösöxö ina na. Ma dauleng idi toxobo mumuu a mangana tatalien ne lotu urungan köbo perewuo, ma nang bara idi te en abo mangana nien bira na, idi te döxömen bara i xarnang abo arabaa urungan köbo god. Ma abo dinödöm pe idi i kobo maras bara i töxödös sua enen ina nien bara kaim. Io, nang

bara idi tabo en, idi tabo örasen bara idi tere pet a tatalien saban.

<sup>8</sup> Ma lamun a nien i kebeöt ta lalamus ire uruso xö God. Ma nang bara ire tekobo an bira, a niang i karabo ögarin ire. Ma nang bara ire te an, a niang i karabo pet ödeek ire.

<sup>9</sup> I turunon bara mum mo langlanga im pua nien eöt mabo maaa re mum. Ma lamun a dinödöm kö dauleng i kobo maras bara i eöt te idi rua enen inabo nien ne arabaa. Io niang, morobo tumarang, xalik ina dinödöm pe mum irabo silien idi rua sinubu xö magingin nang te döxömen bara i saban.

<sup>10</sup> E tengen bira, möxösa, nang bara re öng ewe nang a dinödöm pe ine i kobo maras köbo nien ne arabaa, ma i pere nöngön ewe nang ma ina nanase, ma u kis uruso kölöme xö gunon lotu möxöbo perewuo ma u aan ee, io, ina tatalien te nöngön irabo öxaxat ine rua enen abo nien nang tere erabaa sik min köbo perewuo.

<sup>11</sup> Io niang, ewe niang i kobo maras a dinödöm pe ine, irabo muu a nanase re nöngön, inexalik bara irabo iuo saban arixe. Me ine a töm ewe nang e Kraiss ixo met kelen ine.

<sup>12</sup> Ma nang bere mum mo pet a magingin saban bira urungan köbo töne e mum kölöme re Kraiss, me mum mo ögarin a dinödöm pe idi nang i kobo maras ulamun a dedeek ma a sasaban, io, mum mo pet a sasaban urungan te Kraiss.

<sup>13</sup> Io, nang bara abo nien i unine lo nang a töke kölöme re Kraiss i subu xönan, e kebeöt ta enen öbaling ke gineme, xalik e rabo ösubu ine.

## 9

*I töxödös bara Pol i kexebe kip a tuluwok kö tinörön te ine*

<sup>1</sup> E langlanga rua mumuu a maaa re e. Me e önga aposol. Me e xo pere e Jisas a Orong ke ire. Me mum a inone a tinörön te e kölöme xö Orong.

<sup>2</sup> Ma nang bara re dauleng te döxömen bara kaim bara e önga aposol, i turunon saxit bere mum mo perexulen bara e a önga aposol, möxösa, a kinis se mum kölöme xö Orong i öturunon bara e önga aposol.

<sup>3</sup> Ma rö idi nang te öbulubun e, e rabo balu idi bira:

<sup>4</sup> I töxödös bere mem marabo kip nien ma ininim möxö tinörön te mem.

<sup>5</sup> Ma abo aposol kabise ma abo tönö xö Orong me Pita bölök idi tobo önan arixe xöbo unan te idi mabo une re idi ewe nang te nunu. Ma i töxödös bara mem bölök, mem marabo pet bie.

<sup>6</sup> Ma i kobo töxödös bere maa me Banabas xalik mon, maa marabo mana rörön ulamun a kinis se maa.

<sup>7</sup> Me ewe nang i rörön xarnang önga umri i karabo kun abo lalaa i sasaxan ulamun. Me ewe nang i sulo önga komo, irabo kip lo re nien möxönan. Me ewe i balaure ödeek önga muxu ne me irabo inim pe arine tus möxönan.

<sup>8</sup> E kobo tengen bira, möxösa, abo mangana to xina nangadi i xarnang bira. Kaim. Abo warkurai te Moses i tengen bölök bira.

<sup>9</sup> Ma kölöme xöbo warkurai te Moses idi toxo geet bira: *"Ganim e mum pa xuxut pi a ngusuno bulmakau nang i wörwörök a irine wit."* Mum mo döxömen bere e God i dödöm köba ulamun a bulmakau mon?

<sup>10</sup> A turunon saxit, i tengen ina na ulamun ire, goo? Masa, toxo geet tua gene ire. Ewe a öng i susulo ma i xixixin, ine irabo rörörön bira, möxösa, i töxödös bara irabo nunu bara irabo an kalik inabo nien.

<sup>11</sup> Mem moxo rörörön kaluluonin e mum xarnang abo tene pet komo lamun bere mum morobo xuxubu deek köbo lalaa nang kö Tanono. Io nang, i deek bere mum morobo tabaa e mem merebo lalaa rua rorop abo aine mem.

<sup>12</sup> Ma nang bara i töxödös bara abo tödi xabise tabo kip lo ina rorop meringan te mum, turunon saxit, i töxödös bölök ke mem pua xikip lo bira.

Ma i xebe töxödös sö mem pua wewet, ma lamun mem koxobo pet. Kaim. Me mem moxo axanan tua xikip a tiip oleleng kalik e mem marabo pet pi a tinenge deek ke Krai.

<sup>13</sup> Mum mo maras sik bere ewe idi tobo rörörön kölöme xö ina gunon ne lotu raxin, idi tobo xikip lo a nien te idi meringan. Turunon saxit. Idi tobo rörörön tingan kö alta möxö arabaa me idi tobo xikip lo a nien te idi meringan.

<sup>14</sup> Ma i xarnang bölök mon a Orong ixobo rengrengen ulamun ewe idi nang tobo palas tinenge ma tinenge deek bere idi tabo kip lo a xinuxun te idi meringan kölöme xö ina tinörön ne palas tinenge.

<sup>15</sup> Ma i xebe töxödös se mum pua xukun e, ma lamun e koxobo seng e mum bara mum morobo pet bira. Me e kobo geet ina na urungan te mum bere mum morobo pet bira rö e. Kaim. Nang bara re öng irabo maa rua rorop e biringan, irabo deek kö e rua minet sila bere i kebeöt tua xukun e, xalik ke öng i pet pi e rua ölolot bara e koxobo kip pe xunuxun nang e xo palas tinenge.

<sup>16</sup> Ma i kobo töxödös se e rua ölolot bara e bo palas tinenge arixe ma tinenge deek, möxösa, a Orong ixo ösidien e bere e rabo palas tinenge bira. Maris se e. Irabo saban tö e nang bere e kobo palas tinenge arixe ma tinenge deek.

17 Nang bara e xebe palas tinenge, möxösa, e iat e maa bere e rabo pet bira, io, i xebe töxödös bara e rabo kip pebo xinuxun. Inexalik bara kaim. E bo palas tinenge, möxösa, God ixo ösidien e bara e rabo pet bira.

18 Io, a lasa im a xinuxun te e? Ma ina xinuxun i bira, bara e rabo tabaa tataunin mon idi ma tinenge deek nang e bo palas tinenge. Ma nang e pet bira, e kobo seng a rorop nang i töxödös sö e rua seseng ulamunon meringan kö tinörön möxö tinenge deek.

19 Ma i turunon bara e kobo kis kö ene warkurai xere öng. Inexalik e sixaut bara e rabo tene tultul kö nangadi xirip, bara e rabo eöt tua lamus se oleleng ura re Kraiss.

20 Ma nang e xo kis kaluluonin abo Judeia, e xobo xisixis xarnang a Judeia, bara e rabo eöt tua lalamus idi. E kobo xisixis kö ene warkurai te Moses, inexalik nang e xo kis kaluluonin idi ewe nang toxobo kisisik kö ene inabo warkurai, e xo kis xarnang a öng i kis kö ene warkurai te Moses, bara e rabo eöt tua lamus idi bölök.

21 Nang e xo kis kaluluonin idi nang kaim kö mumuu inabo warkurai te Moses, e xobo roro xarnang öng i koxobo mumuu inabo warkurai, bara arabo lamus idi urungan te Kraiss. Inexalik i koxobo turunon bere e kobo muu inabo warkurai te God. Kaim. E kis kö ene warkurai te Kraiss.

22 Nang e xo kis kaluluonin idi nang kaim kö marmaras köbo dinödöm pe idi ulamun a dedeek ma sasaban, e xobo roro xarnang a öng mere idi bere e rabo eöt tua lamus idi bölök. A mangana nangadi sa nang e xo kis kaluluonin idi, e xo talien eöt me idi. E xobo mumuu abo mangana ngas kirip bara arabo eöt tua öro re dauleng.

23 Me e bo wewet kirip inabo lalaa bira rua gene a atöngösen deek, bara e bölök e rabo kip lo re laa mamaran kö atöngösen deek.

24 Bara bule, mum kobo maras ulamun abo tene ililo nang idi tobo ululo ne exokos? Idi xirip tabo ulo, me inexalik bara öng kalik mon irabo kip lo a laa deek. Io, mum morobo mana ulo lölös sua xikip lo ina laa deek.

25 Me idi xirip ewe nang tobo laxa xina mangana agulos bira, idi tobo xurxure ölölös abo aidi bere idi tabo deek saxit kö ina mangana agulos. Me idi tobo wewet bira rua xikip a mangana bubuan nang idi tabo isik ke ewe nang i sila, a bubuan nang irabo mölös. Inexalik ire tobo wewet bira rua xikip ina niang irabo kis ulorexe.

26 Ma lamun e belek, e kara ulo nana. Me e kara erese xarnang a öng i rutut a xönö maop tataun.

27 Kaim. E bo sese ölölös a lewene aine e, bara irabo muu ödeek a maaa re e, bara xalik idi tobo kip tewe e xalik ina

agulos me e karabo sila im kö ina ililo ne exokos melamu nang bere e xoro palas tinenge urungan kö dauleng kabise.

## 10

### *Abo tumarang mee Israel*

<sup>1</sup> Abo töke kölöme re Kraiss, e maa bere mum morobo maras bara abo untubuno ire, idi xirip toxo önan kö ene kubu me idi xirip toxo lies köröp kö Rasi Dadan.

<sup>2</sup> Me idi xirip toxo kip a baptais meringan kö kubu ma xö Rasi rua ömaras bere idi abo nangadi re Moses.

<sup>3</sup> Idi xirip toxo en a önga mangana nien mon, a nien meriso re God.

<sup>4</sup> Me idi xirip toxo inim önga mangana ininim, a ininim i meriso re God. Ina na i maras, möxösa, idi toxobo ininim möxö mangana uno wat kis, a wat kis meriso re God, ina wat kis nang ixobo önan arixe me idi. Ma ina uno wat kis, ine mon e Kraiss.

<sup>5</sup> Inexalik e God kaim kö axanan ulamun a oleleng saxit mere idi. Ma ina na i maras, möxösa, abo töngön te idi toxo maru elixilik nana xö xönö tataun.

<sup>6</sup> Ma inabo lalaa na toxo ot pösöt idi xarnang a malalar tö ire rua ötumarang ire bere ire tebele maa ulamun abo lalaa saban xarnang idi toxo pet.

<sup>7</sup> Me ire tebele lotu wösöt abo perewuo xarnang a dauleng mere idi toxo pet. Xarnang idi toxo geet kö tinenge re God, "A nangadi toxo kis kö pu rua nien ma rua ininim, me idi toxo taru kaa im pua agulos saban arixe ma balixilik."

<sup>8</sup> Ire tebele mumuu a magingin ne ilawa xarnang a dauleng mere idi toxo pet. Io, kölöme xö önga bung mon a nine sangaun ma narun ne arip mere idi toxo met.

<sup>9</sup> Ire tebele könönöin a Orong xarnang a dauleng mere idi toxo pet, ma abo si toxo kat ömet idi.

<sup>10</sup> Me ire tebele ngunungun xarnang a dauleng mere idi toxo pet, ma a angelo möxö minet ixo sexomet idi.

<sup>11</sup> Ma inabo lalaa na toxo ot pösöt idi xarnang a malalar ma toxo geet ösu rua ötumarang ire. Me ire nang a xakawöm möxö axana bung iri lörörö ra inot pösöt ire.

<sup>12</sup> Io niang, bara u döxömen bara u tuu lölös sik, örobo tumarang deek bara xalik u subu.

<sup>13</sup> Inabo mangana ölelewen nang i orot pösöt e mum, i eöt mon ma niang ixo ot pösöt a nangadi xirip. God irabo pet eörin xarnang kö tinenge re ine. Ma i karabo öbala lo re önga ölelewen bara irabo ot pösöt e mum nang mum korobo eöt bara morobo tuu lölös könan. Kaim. Ma nang bara önga ölelewen irabo ot te mum, God irabo tagure a

ngas bere mum morobo wan lelebes ina ölelewen tue mum pa eöt tua tinuu lölös könan.

*A nien kö Orong*

<sup>14</sup> Io niang, abo ais deek ke e, mum morobo mana ulo wes kalik a tatalien ne lolotu wösöt abo perewuo.

<sup>15</sup> E wöwörö urungan tö mum ewe mum nang a nanase re mum a lak deek, bere mum morobo ösöxö xulen a tinenge re e bara i deek bara i saban.

<sup>16</sup> I turunon saxit, nang bere ire te inim kö ina kap nang ire tobo tengen deek uruso re God ulamunon, io, i xarnang bere ire te laxa xö tinörön möxö dee re Kraiss. I turunon bölök, nang bere ire te pidik a beret me ire te en, ire te laxa xö tinörön möxö lewene aine e Kraiss.

<sup>17</sup> Ma önga beret mon, io nang, ire a oleleng ire xö önga aine xalik mon, möxösa, ire xirip tobo aan arixe xö ina önga beret kalik mon.

<sup>18</sup> Mum morobo döxömen lo a nangadi mee Israel. I turunon saxit, ewe idi nang toxo en a pines nang toxo erabaa min, io, idi te laxa xö tinörön möxö ina alta ne arabaa.

<sup>19</sup> Nang bere e tengen bira rö mum, mum mo döxömen bere e tengen bara a arabaa urungan kö perewuo a laa raxin ine, ma bara a perewuo iat a laa lölös bölök ine?

<sup>20</sup> Kaim. Idi abo laa tataun mon. Inexalik e tengen bara ewe idi nang tekobo nunu, idi tobo tabaa abo tano saban ma kaim bara e God. Me e kobo maa bere mum morobo laxa xö tinörön köbo tano saban.

<sup>21</sup> I kobo eöt bere mum morobo inim möxö kap kö Orong ma xö kap möxöbo tano saban bölök. Ma i kobo eöt bere mum morobo an kö öra möxö nien kö Orong ma möxö öra möxöbo tano saban bölök.

<sup>22</sup> Nang bere ire tabo pet biringan, ire tabo örarik a bala saban kö Orong, möxösa, i maa bere ire tabo lotu wösöt kalik mon ine. Bara bule, a lölös se ire i taxin kö lölös kö Orong?

<sup>23</sup> Idi tobo tengen bara, "A lasanene nang ire te maa bara tabo pet, i töxödös bara ire tabo pet." Masa. Ma lamun abo lalaa xirip i kebeöt ta ödeek e mum. Idi tobo tengen bara a lasanene nang idi te maaaa bara idi tabo pet, i töxödös bara idi tabo pet, ma lamun abo lalaa xirip i kebeöt ta rorop e mum.

<sup>24</sup> Ma re öng i bele pet te lalaa nang irabo top ine iat. Ine irabo wewet abo lalaa nang irabo top idi xabise.

<sup>25</sup> I deek bere mum morobo en abo lasanene nang idi te misik min kö xönö möxö misik ma pines. Mum bele öriip a dinödöm pe mum bara i töxödös bere mum morobo en bara kaim.



<sup>26</sup> Mōxōsa “a Orong i unan a öxōno lagunon mabo lalaa xirip kōnan.”

<sup>27</sup> Nang bara re tabuno nunu i pixe e mum pa nien, ma nang bere mum mo maa bara morobo wan, io, morobo mana en abo lasanene nang te erimine e mum min, me mum bele öriip a dinödöm pe mum bere mum morobo an bara kaim.

<sup>28</sup> Inexalik nang bara re öng i tengen te mum bara, “Idi te erabaa urungan kö perewuo arixe ma ina pines,” io, mum bele enen. Mum morobo mana dödöm ulamun a öng ewe i tengen bira re mum. Me mum bele enen bölök, mōxōsa, i kobo deek bara mum morobo öriip a dinödöm kere öng.

<sup>29</sup> E kobo wōwörö ulamun abo dinödöm pe mum. Kaim. E wōwörö ulamun abo dinödöm pe idi xabise. Mōxōsa a dinödöm kere öng kabise i kebeöt tua kure e ulamun abo lalaa nang i eöt bara e rabo pet ma i kobo deek bara e rabo pet.

<sup>30</sup> Nang bara e tengen deek urungan kö God ulamun abo lalaa e en, ganim idi rua rengrengen ögarin e ulamun inabo lalaa e re tengen deek ulamunon.

<sup>31</sup> Io, nang bara mum mo an bara mo inim, ma a lasanene mum morobo pet, i deek bara mum morobo pet tua ii öraxin e God.

<sup>32</sup> Mum bele ösubu re öng kö magingin nang i dōxömen bara i saban. Mum bele pet bira xōbo Judeia, me idi bölök nang kaim bara abo Judeia, ma a marakörö ne lotu re God.

<sup>33</sup> Mum morobo kis xarnang e kis bie sik. E bo kōnönöin tua öaxanan a nangadi xirip köbo lasanene nang e bo wewet. E kobo pet abo lalaa rua rorop e iat, ma lamun bara rua rorop a marakörö xirip bara tabo eöt tua xikip a ineöro.

## 11

<sup>1</sup> Mum morobo muu abo tatalien te e xarnang e bo mumuu e Krais.

*Ire tabo lotu bule*

<sup>2</sup> Io, e ölet e mum mōxö mum mo dōxömen dik sik e xōbo lalaa xirip me mum mo tōndik sik abo ausu nang e xo tabaa sik e mum min.

<sup>3</sup> Ma lamun e maa bere mum morobo ösöxö bere Krais ine a öxōno idi abo tōdi, ma a unine mōxö ina tinenge i bira, bere ine a sisila xōbo tōdi. Ma a tōdi ine a öxōno a une re ine, ma a unine mōxö ina tinenge i bira, bere ine a sisila xō une re ine. Ma i xarnang bölök, e God ine a öxōno e Krais.

<sup>4</sup> Nang bara önga tōdi nang i seseseng bara i rengrengene ne propet ma i tawi sik a öxōno, i kobo ii a sisila re ine.

<sup>5</sup> Ma abo une nang te seseseng bara te rengreng ne propet ma a öxöno i kobo tawi, i kobo ii a sisila re ine. I xarnang bara toxo kuu a öxöno.

<sup>6</sup> Nang bara une i kobo tawi a öxöno, ine irabo mana köröp a bebene öxöno. Ma nang bara i laa ne minenge bara te köröp öwuruwut bara te kuu rewe a bebene öxöno, io, ine irabo mana tawi a öxöno.

<sup>7</sup> Tödi i bele tawi a öxöno ine, möxösa, ine a malalar ma a aösesen möxö mariris se God. Ma lamun a une a aösesen möxö mariris kö tödi,

<sup>8</sup> möxösa, a tödi i koxobo wanot kalik a une, ma lamun a une ixo wanot kalik a tödi.

<sup>9</sup> Ma i xarnang bölök, God i koxobo pet a tödi rua gene a une, ma lamun a une rua gene a tödi.

<sup>10</sup> Möxö ina na, a une irabo mana tawi a öxöno ine iat tua osen bara i xö pu sik kö sisila re ine, möxösa, abo angelo tobo werwere muu ine.

<sup>11</sup> Ma lamun kö kinis se ire kölöme xö Orong, a une i karabo eöt tua to xalik a tödi, ma a tödi bölök i karabo eöt tua to xalik a une.

<sup>12</sup> Ruasa, möxösa, abo tödi suxurno, a une ixo kip idi, ma a une bölök ixo wanot meringan kö tödi. Inexalik abo laa xirip ixo ot meringan te God.

<sup>13</sup> Mum iat moro dödöm ulamun ina na, nang bara i deek kö une bara irabo seseng urungan kö God me ine i koxobo tawi a öxöno.

<sup>14</sup> Abo tatalien kö nangadi ibo ömaras e mum bara nang a tödi a bebene a lak ömat, i laa ne minenge rö ine,

<sup>15</sup> inexalik bara nang a une a bebene a lak ömat, ina na a mariris se ine. Möxö, e God ixo tabaa ine ma bebene nang a lak ömat xarnang a xinaxain te ine.

<sup>16</sup> Nang bara re öng i maa rua agot ulamun ina na, kaim e mem mere mangana tatalien kabise, ma abo marakörö ne lotu re God köbo lagunon te idi, tekara muu bölök önga tatalien kabise.

### *A nien kö Orong*

<sup>17</sup> Kölöme xö ina tinenge eka usu e mum min, e karabo ölet e mum, möxö abo kinis etok ke mum i kobo pet tebo rorop, inexalik i ögarin a lotu.

<sup>18</sup> A sisila ne lalaa i bira. Nang e mum bo önan etok xarnang a lotu, e xo ölangen bara e mum kara tuu arixe, ma lamun bara e mum bo xixixis elixilik kaluluonin e mum. Ma öngabo lalaa xönan e döxömen bara i turunon.

<sup>19</sup> I turunon saxit, a dauleng nebo mangana dinödöm irabo mana kis kaluluonin e mum pua osen bere ewe re mum God iri perexulen bere ine i deek.

20 Nang bere mum bo ot etok, kaim bara a nien kö Orong nang mum bo enen,

21 möxösa, nang bere mum mo aan, öngöng mere mum irabo en a nien te ine iat ma i karabo xixiset mere öng bölök. Öng angen i irilöng ma öng kabise i taligogo möxö ininim.

22 Bara bule, kaim e mum ma gunon te mum pua nien ma rua ininim ee? Bara nagut mum mo döxömen bara lotu xö God i laa tataun, me mum eka ömenge a nangadi nang kaim idi ma lalaa? Arabo tengen a lasa re mum? Nagut arabö ölet e mum kina na? Xina na, e karabo ölet e mum.

23 Ma inausu e xo tabaa sik e mum min, e xo kip mere Orong me ine i bira: xina dömöni iat nang idi toxo isik tewe e Jisas a Orong kö limine nangadi, ine ixo tön lo a beret

24 ma ixo tengen deek könän, io, ixo pidik ma ixo tengen, "A na a lewene aike rua gene mum. Mum morobo pet ina na rua dödüxömen lo e."

25 Xarnang iat mon bölök, melamu xö nien, ixo kip lo a kap wain ma ixo tengen, "Ina wain na, i eöt xarnang a dee re e nang irabo öturunon a kunubus maxat meriso re God. Me mum morobo inim könän me mum morobo pet biringan tua dödüxömen lo e."

26 Möxö, abo axana bung kirip nang mum bo enen ina beret me mum bo inim ina wain, mum mo etöngösen ma minet kö Orong ot nang ine irabo wanot.

27 Io niang, ewe a öng nang i en ina beret bara i inim kö kap kö Orong ma nexalik i muu a tatalien nang i kobo töxödös ma ina nien na, i pet a magingin saban urungan kö aine Orong ma xö dee re ine.

28 Io, nang bara a tödi i kobola an kö beret ma i kobola inim kö kap bang, irabo mana dödüm deek kö mangana tatalien te ine.

29 Möxösa, ewe a öng nang i an ma i inim ma i kobo perexulen a aine a Orong bara a laa sa ine, irabo kip a ömokorot nang i aan ma i ininim.

30 Möxö ina unine, a oleleng kaluluonin e mum te meles ma te meset, ma uleng tere met.

31 Ma lamun nang bere ire texere arun iat tua dinödöm deek ulamun ire iat, God i xebe ömokorot ire.

32 Nang bara a Orong i ömokorot ire, a öwadano re ine i usu ire bara e God i karabo ömokorot köbanin ire arixe ma öxöno lagunon.

33 Io niang, abo töke kölöme re Krais, nang mum mo ot etok kua nien, mum morobo mana xixiset kaluluonin e mum.

<sup>34</sup> Inexalik nang bere ewe re öng i irilöng, ine irabo mana an kö gunon te ine iat. Io niang, mum korobo kip pe ömokorot nang mum mo ot etok.

Ma nang arabo ot, e rabo ötöxödös abo lalaa xabise kaluluonin e mum.

## 12

### *Abo arabaa möxö Tanono*

<sup>1</sup> Abo töke kölöme re Kraiss, na im e maa bara mum morobo maras ulamunon abo arabaa meringan kö Töxödös ne Tanono.

<sup>2</sup> Mum mo ösöxö bara xö axana bung nang mum kaim bang kö nunu, io, idi toxo silien ölelebes e mum köbo mangana ngas sua lotu wösöt abo perewuo nang idi tekebeöt tua winörö.

<sup>3</sup> Io nang, e ömaras e mum bara a Töxödös ne Tanono i kebeöt tua wewet te öng bara irabo tengen ögarin e Jisas. Ma kaim pe öng i eöt tua rengrengen bara, "E Jisas, ine a Orong," nang bara a Töxödös ne Tanono i kobo silien ine bara irabo tengen biringan.

<sup>4</sup> Ma uleng ne mangana arabaa angen, ma lamun a önga Tanono xalik mon.

<sup>5</sup> Ma uleng ne mangana tinörön möxö rorop, ma lamun a önga Orong kalik mon.

<sup>6</sup> Ma uleng ne mangana lölös sua wewet abo lalaa. Ma lamun a önga God kalik mon ewe nang ibo wewet abo lalaa xirip niang kaluluonin a nangadi.

<sup>7</sup> Ma a Töxödös ne Tanono ibo osen idi a öngöng bara i nangen kölöme re idi bara tabo eöt tua rorop a dauleng kabise.

<sup>8</sup> A Töxödös ne Tanono i tabaa önga tödi ma a winörö ne dinödöm deek. Ma ina Töxödös ne Tanono bölök i tabaa a öng kabise ma a winörö ne nanase.

<sup>9</sup> Ma ina Töxödös ne Tanono iat i isik a nunu xö öng kabise. Ma ina önga Töxödös ne Tanono xalik mon i tabaa a öng kabise ma mangana arabaa rua ölanglanga abo miniset.

<sup>10</sup> Ine irabo tabaa a öng kabise ma lölös sua wewet abo tatalien taxin ne auwuwus, ma öng kabise ma arabaa möxö tinenge ne propet, ma öng kabise ma arabaa möxö ölangen kulen abo tinenge rua ösöxö bara a tinenge i wanot meruso xö Töxödös ne Tanono bara kaim. Ma urungan kö öng kabise irabo isik a arabaa möxö tinenge mabo mangana tinenge xabise. Ma xö öng kabise i isik a arabaa rua öwalas a unine möxö inabo mangana tinenge.

<sup>11</sup> Inexalik önga Töxödös ne Tanono mon i wewet inabo lalaa xirip. Ma i erimine nanin idi öngöng xarnang i maa bie.

*Ire abo xönö möxö aine Kraıs*

<sup>12</sup> A lewene aine tödi ine a önga laa xalik mon. Inexalik a oleleng ne boxönö möxönan. I turunon bara ine ma boxönö oleleng, inexalik ina boxönö te pet a önga lewene aine tödi mon. Ma i xarnang bie me Kraıs.

<sup>13</sup> Möxö a önga Tanono xalik mon ixo baptais ire urungan kölöme xö önga lewene aine öng mon. Kaim pe laa bara ire abo Judeia, bara abo Grik, bara abo tultul, ma bara kaim bere ire abo tultul. God ixo örabaa ire ma önga Tanono xalik mon bara ire tabo inim mere ine.

<sup>14</sup> Kaim bara önga xönö xalik mon kö lewene aine tödi. Ma lamun a oleleng ne boxönö i kis könan.

<sup>15</sup> Ma nang bara a xexene irabo tengen, “E kaim bara xönö möxö lewene aine tödi, möxösa, e kaim bara limine,” io, e nangang i kobo önga unine bere ine kaim bara xönö möxö lewene aine.

<sup>16</sup> Ma nang bara talingine irabo tengen, “E kaim bara xönö möxö lewene aine tödi, möxösa, e kaim bara marna ine,” io, e nangang i kobo önga unine bere ine kaim bara a xönö möxö lewene aine.

<sup>17</sup> Nang bara lewene aine tödi xirip i xebe marana xalik mon, irabo ölöngö bule? Ma nang bara lewene aine tödi xirip i xebe talingine xalik mon, irabo wöwösöng bule?

<sup>18</sup> Inexalik God iri bulus ödeek abo xönö xirip kölöme xö aine tödi xarnang i maa bara irabo pet bie xönan.

<sup>19</sup> Nang bara ina boxönö texebe önga xönö xalik mon, i kebeöt bara idi tabo pet a lewene aine.

<sup>20</sup> Inexalik i turunon belek bara a oleleng saxit ne boxönö, ma lamun a önga lewene aine xalik mon.

<sup>21</sup> Ma i kebeöt bara a marana irabo tengen kö limine bara, “E kobo sasaxan ulamun nöngön.” Ma i kebeöt bara a öxöno irabo tengen bölök kö xexene bara, “E kobo sasaxan ulamun nöngön.”

<sup>22</sup> Inexalik belek ina boxönö lewene aine nang te döxömen bara i kobo lölös, a lewene aine a öng i sasaxan ulamunon.

<sup>23</sup> Ma ina boxönö nang ire tobo werwere bara i kobo mamaran, ina niang belek ire tobo ii öraxin. Ma boxönö nang a lak minenge, ire tobo ölaulawa wi ödeek kua umungen.

<sup>24</sup> Inexalik abo xönö nang i deek bara tabo pere, ire tekara dödöm köba ulamunon. Ma lamun God iri bulus arixin abo xönö möxö lewene aine ire bira: ine iri isik a kinis taxin kö ina boxönö nang ire tekara ii öraxin.

25 Ma iri pet bira bara abo xönö lewene aine i karabo kis elixilik nana, ma lamun bara abo xönö irabo pet önga mangana ebalare kaluluonin idi iat.

26 Ma nang bara re xönö i kip a kinadik, abo xönö xirip bölök irabo kip a kinadik. Ma nang idi te ii önga xönö, abo xönö xirip tabo axanan arixe me ine.

27 Me mum im a lewene aine Kraiss, me mum kirip öngöng abo xönö kölöme re ine.

28 Ma kölöme xö marakörö ne lotu God ixo bulus ömaran abo xönö. Io, a sisila ne laa, abo aposol, a mumuu lo, abo propet, ma sese önarun, abo tene ausu. Ma melamu xönan ine ixo pere kos bara uleng tabo pet abo lalaa lölös ne auwuwus ma uleng tabo kip lo abo mangana inarabaa rua ölanglanga abo miniset. Ine ixo pere kos bölök a uleng kua isik a rorop, ma uleng kua ötöxödös a tinörön kö nangadi ma nanase deek, ma uleng kua winörö mabo mangana tinenge xabise.

29 Kaim bara idi xirip abo aposol. Kaim bara idi xirip abo propet. Kaim bara idi xirip abo tene ausu. Kaim bara idi xirip tobo wewet abo lalaa lölös ne auwuwus.

30 Kaim bara idi xirip te kip abo mangana inarabaa rua ölanglanga abo miniset. Kaim bara idi xirip te rengreng mabo mangana tinenge. Kaim bara idi xirip te öwalas a unine möxö inabo mangana tinenge.

31 Inexalik mum morobo mana maa bere mum morobo kip lo inabo arabaa nang a lak taxin.

Me e rabo osen im e mum ma önga ngas nang i deek saxit.

## 13

### *A abalamu*

1 Nang bara e rengreng mabo mangana tinenge xö nangadi ma xöbo angelo bölök, inexalik e kobo ebalamu, io, e eöt ma kudut nang ibo raram tataun, bara xarnang a gamut nang ibo börbörön tataun.

2 Nang bara e kip lo a arabaa möxö tinenge ne propet me e eöt tua marmaras ulamun abo lalaa xirip nang i mun, ma nanase re e i taxin saxit, me e nunu eöt tua öxase a puot, ma lamun e kobo ebalamu, e a önga laa tataun mon.

3 Nang bara e isik tewe xirip abo bubulus se e rua abo maris, ma nang bara e öbala lo a nangadi bara idi tabo söngöt a lewene aike, ma nang bara kaim e ma abalamu, i karabo top e aulik.

4 A tatalien ne abalamu ine i karabo laie wasaxit kölöme xöbo tiip, ma ibo wewet a dedeek. Ma i kara pere neek a kinis kö öng kabise. I kara ölolot ma i kara ii öraxin öbaling ine.

<sup>5</sup> I kara muu a tatalien ne ii ölik a öng kabise, i kara dödöm ulamun abo lalaa nang irabo ödeek kalik ine, i kara laie wasaxit, ma i kara döxömen lo a sasaban idi te pet tö ine.

<sup>6</sup> A tatalien möxö abalamu i kobo axanan ma tatalien saban, ma lamun i axanan bara a turunon i ot maras.

<sup>7</sup> Ibo ebalaure, ibo nunu ma ibo xisixis ma nunu ulamun abo lalaa deek nang irabo ot, ma ibo ruruu lölös kö ene abo tiip.

<sup>8</sup> A tatalien möxö ebalamu i kebeöt arixe rua xakawöm, ma lamun nang bara a arabaa möxö tinenge ne propet nangen, irabo kawam tewe. Nang bara a arabaa möxö rengrenge mabo mangana tinenge xabise nangen, irabo kawam. Ma bara arabaa möxö rengrenge ömaras nangen, irabo kawam tewe bölök.

<sup>9</sup> A niang i maras, möxösa, ire te ösöxö a dauleng ne lalaa mon, me ire te rengrenge ne propet ulamun a dauleng ne lalaa mon.

<sup>10</sup> Inexalik nang bara a axana bung irabo wanot nang abo xönö xirip tabo kudun, abo xönö nang ire te nanase sik könan na irabo kawam tewe.

<sup>11</sup> Nang e xo bak lik sik, e xobo wöwörö xarnang a barok lik, me e xo dödöm xarnang a bak lik, me e xo ösöxö abo lalaa xarnang a bak lik. Ma nang e re tödi maruxo, e bulus tewe a tatalien ne bak lik.

<sup>12</sup> Ma na ire te pere xarnang a tanono i wawara bo. Inexalik melamu ire tabo ewerwewe. Ma na e ösöxö mon a uwuk. Ma melamu e rabo ösöxö abo lalaa xirip xarnang e God i ösöxö xirip sik ödeek e.

<sup>13</sup> Io, na a narun ne laa idiet tobo kisisik: a nunu, a tatalien ne xisixis ma nunu ulamun abo lalaa deek nang irabo ot, ma a abalamu. Ma lamun a abalamu i taxin sik ke idiet kirip.

## 14

### *A arabaa möxö tinenge ne propet*

<sup>1</sup> Mum morobo mana muu a tatalien ne abalamu. Ma i deek bara mum morobo maa ulamun a arabaa meringan kö Töxödös ne Tanono. Inexalik mum morobo maa xöba ulamun a arabaa möxö tinenge ne propet.

<sup>2</sup> E tengen biringan, möxösa, ewe a öng i rengrenge ma arabaa möxö mangana tinenge xabise, i kobo rengrenge urungan kö tödi. Kaim. I rengrenge uruso re God. Kaim pe öng i ölangen kulen. Ma lamun i tengen ina laa i mun sik ma lölös möxö Töxödös ne Tanono.

<sup>3</sup> Ma lamun a öng nang i rengrenge ne propet i wöwörö ma nangadi rua ölölös idi ma rua öxaxat idi ma rua ömanan idi.

<sup>4</sup> A öng nang i wöwörö arixe ma arabaa möxö abo mangana tinenge xabise i ölölös ine iat. Ma lamun a öng nang i rengrenge ne propet i ölölös a marakörö ne lotu.

<sup>5</sup> E maa bara irabo eöt te mum kirip pua winörö ma arabaa möxö mangana tinenge xabise. Ma lamun e maa xöba bara i eöt te mum pua tinenge ne propet. A öng nang i rengrenge ne propet ine i taxin sik ke idu ma öng nang i wöwörö mabo mangana tinenge xabise. Ma lamun nang bara a öng i wöwörö mabo mangana tinenge xabise irabo palas a tinenge re ine rua ölölös a nangadi möxö lotu, io, idu te eöt me nangang ibo rengrenge ne propet.

<sup>6</sup> Io, abo töke kölöme re Kraiss, nang bere e wan urungan te mum me e wöwörö mabo mangana tinenge xabise, e kebeöt tua rorop e mum. Inexalik nang bere e osen abo lalaa nang a lak minun, bara e isik a nanase, bara e rengrenge ne propet, ma bara e isik a inausu, ina na irabo top e mum.

<sup>7</sup> Ma i biringan bölök köbo lalaa nang kaim bara a lak to xarnang a tauu ma a tulat. I eöt bule bara re öng irabo ölangen kulen a ginee möxö tauu bara a uu-uu möxö tulat nang bara idi tokobo muu ödeek a inöno sinö?

<sup>8</sup> Ma nang bara gamut i koxobo raram maras, ewe im irabo wanot ta inarse?

<sup>9</sup> I xarnang bölök kö mum. Nang bara mum kobo wöwörö arixe ma mangana tinenge i eöt bara idi tabo ölangen kulen, i eöt bule bara re öng irabo maras ulamun a lasa nang mum mo rengrenge? I xarnang bara mum mo rengrenge sik mon kö maop.

<sup>10</sup> I wawara bara oleleng saxit ne mangana tinenge möxö öxöno lagunon. Me idi xirip te rengrenge osen a dinödöm kö tödi.

<sup>11</sup> Inexalik bara e kobo ölangen kulen a tinenge xere öng i rengrenge, e rabo xarnang a ose xö wawara re ine, me ine irabo xarnang a ose xö wawara re e.

<sup>12</sup> Ma i biringan bölök kaluluonin e mum. Mum mo maa xöba rua xikip lo abo arabaa möxö Töxödös ne Tanono. Io nang, mum morobo mana bösö sik kua xikip abo mangana arabaa nang irabo ölölös a marakörö ne lotu.

<sup>13</sup> Me ine na a unine nang bara re öng i wöwörö mabo mangana tinenge xabise, ine irabo mana seseng ulamun a arabaa re ine rö ine rua ömaras bölök a tinenge re ine.

<sup>14</sup> E tengen ina na, möxösa, nang bere e seseng arixe mabo mangana tinenge xabise, a tanoke i seseng, ma lamun a dinödöm pe e i kobo maras sua wewet te laa.

<sup>15</sup> Io, lasa arabo pet? E rabo seseng ma tanoke, ma a dinödöm pe e irabo maras bölök ulamun inabo lalaa



e seseng ulamunon. E rabo sō arixe ma tanoke, ma a dinödöm pe e irabo maras bölök ulamun a lalaa nang e sösö ulamunon.

<sup>16</sup> Inexalik nang bara nōngön u tengen deek urso re God arixe ma tanom kalik mon, i eöt bule bölök bara re öng mere idi i koxobo maras irabo tengen “Amen” kö sineseng ke nōngön? I kebeöt, möxösa, i kobo ösöxö a lasa u rengrenge.

<sup>17</sup> I turunon bara a sineseng ke nōngön i deek, inexalik i kobo ölölös önga tödi xabise.

<sup>18</sup> E tengen deek urso re God, bere rö ire xirip, e a öng nang ibo rengrenge oleleng mabo mangana tinenge xabise.

<sup>19</sup> Inexalik kaluluonin a marakörö ne lotu, e maa bara e rabo tenge ma pitnö ne öxöno tinenge ma a dinödöm maras sua usu idi xabise bölök, ma ganim bara e tenge xö sangaun ne arip ne öxöno tinenge ma mangana tinenge xabise mon.

<sup>20</sup> Abo töke kölöme re Kraiss, mum bele dödödöm xarnang abo barok lixilik. Köbo magingin saban mum morobo mana talien xarnang a bak lik, inexalik kölöme xö dinödöm pe mum, mum morobo talien xarnang a tödi raxin.

<sup>21</sup> A warkurai te God nang toxo geet i tengen ulamun ina na bira,

*“A Orong i tengen bara, ‘E rabo tenge urungan kö nangadi re e ma tinenge xabise.*

*E rabo tenge urungan te idi xö ngalna nangadi xabise möxö palaa.*

*Inexalik idi takarabo tame e.’ ”*

<sup>22</sup> Ma xarnang mon, a arabaa möxö mangana tinenge xabise ine a auxilieng urungan tö idi nang tokobo nunu ma kaim bara ine a auxilieng urungan te idi nang te nunu sik. Inexalik a arabaa möxö tinenge ne propet a auxilieng ine urungan tö idi nang te nunu, ma kaim bara ine a auxilieng urungan te idi nang tokobo nunu.

<sup>23</sup> Io niang, nang bara a marakörö ne lotu idi xirip te ot etok, me idi xirip te rengrenge ma mangana tinenge xabise, ma nang bara a dauleng ne tabuno nunu bara dauleng nang tekobo maras ulamun ina mangana tatalien tabo laxa, turunon saxit, idi tabo tengen bara mum mo rengrenge xarnang abo baulang.

<sup>24</sup> Ma lamun nang bara önga tabuno nunu, bara öng ewe nang i kobo maras köbo mangana tatalien te mum irabo laxa, ma nangadi xirip te wöwörö ne propet, io, ine irabo ölangen idi xirip, ma abo tinenge re mum kirip irabo kure ine, ma irabo maras bara ine a tödi saban,

<sup>25</sup> mabo lalaa nang i umixen sik kölöme xö balna ine irabo wanot wösö. Io nang, ine irabo tunsu xö pu ma irabo lotu

wösöt e God ma irabo tengen, “Turunon saxit, God i kis kaluluon te mum.”

<sup>26</sup> Io, ma lasanene nang ire tabo pet ulamun inabo lalaa na e xo tengen? Nang bere mum morobo ot etok, öng irabo isik a sinö ne lotu, öng kabise irabo isik a inausu, öng irabo isik a tinenge rua ömaras a lalaa nang i mun sik, öng irabo wöwörö ma mangana tinenge xabise, ma öng irabo palas a tinenge. Mum morobo mana pet abo lalaa xirip pua ölölös a nangadi möxö lotu.

<sup>27</sup> Nang bere mum mo maa ra tinenge arixe ma mangana tinenge xabise, i eöt bara ninöng bara narun tabo wöwörö. Ma lamun i bele saxit a narun. Me idiet tebele wöwörö arixe. Öng irabo silien ma öng kabise irabo muu. Ma nang bara öng i maa rua winörö, io, öng irabo mana palas ömaras a tinenge re ine.

<sup>28</sup> Ma nang bara kaim pe öng kua palas ömaras a tinenge, ewe a öng nang i maa ra tinenge irabo mana kis ödödö kaluluonin a nangadi möxö lotu ma irabo wöwörö uruso re God kölöme xö balana ine iat.

<sup>29</sup> Ma i eöt bara a ninöng bara narun tabo tenge ne propet me idi xabise tabo mana pere muu inabo tinenge bara turunon bara kaim.

<sup>30</sup> Ma bara God i tabaa re öng nang i kisisik mere tinenge ne ömaras möxö ina tinenge, io, a tödi ewe i sila xö tinenge irabo mana öxöwam a tinenge re ine.

<sup>31</sup> I deek bara morobo pet bie, möxösa, i eöt tö mum kirip pua tinenge ne propet. Me mum bele wöwörö arixe. Öng irabo silien ma öng kabise irabo muu, bara a nangadi xirip idi tabo kip a inausu mabo tinenge ne aöxaxat.

<sup>32</sup> Me idi nang te wöwörö ne propet idi te eöt tua kure ödeek ina arabaa re idi,

<sup>33</sup> möxösa, e God a mangana god nang ibo mumuu a ngas töxödös. I kara ömaraxen lo ire rua winörö oleleng tataun. Kaim. Ibo isik a bala malum.

Ma xarnang a marakörö ne lotu xöbo lagunon kirip tobo wewet,

<sup>34</sup> nang bara idi te ot etok, abo balixilik idi tabo mana kis ödödö, möxösa, i kobo töxödös bara idi tabo tenge. Inexalik idi tabo mana ii ölik öbaling idi xarnang a warkurai te Moses i tengen.

<sup>35</sup> Nang bara idi te maa rua ösöxö ulamun te laa, idi tabo ose abo usuono idi xö gunon te idi rua ömaras idi, möxösa, i laa ne minenge xö une rua winörö kaluluonin a inot etok kö marakörö ne lotu.

<sup>36</sup> Bara bule, a tinenge re God ixo wanot meringan te mum? Me mum mo döxömen bara ina tinenge iri ot urungan te mum kalik mon? Kaim.

<sup>37</sup> Nang bara re öng i döxömen bara ine a propet bara ine a tödi möxö Töxödös ne Tanono, ine irabo mana ösöxö xulen bara ina laa nang e xo gegeet urungan tö mum, ine a warkurai xö Orong.

<sup>38</sup> Lamun nang bara re öng i kobo perexulen ina na, God i karabo perexulen ine.

<sup>39</sup> Io nang, abo töke kölöme re Kraiss, i deek bara mum morobo maa xöba bere mum mo eöt tua tinenge ne propet, me mum bele tuu wi re öng kua tinenge ma tinenge xabise.

<sup>40</sup> Inexalik mum morobo mana muu a ngas töxödös möxöbo lalaa xirip mum bo wewet.

## 15

### *A tinaru xalik a minet te Kraiss*

<sup>1</sup> Io, abo töke kölöme re Kraiss, e maa bara e rabo tengen ödöxömen e mum ulamun a tinenge deek e xoro wöwörö lölös sik ke mum min. Ma ina tinenge deek ine iat nang mum moro kip sik ma moro tuu lölös sik könan.

<sup>2</sup> Ma mera xö atöngösen deek, God i öro e mum nang bere mum mo töndik sik ina tinenge e xo tengen te mum. Nang bara kawaim, a nunu re mum a laa tataun.

<sup>3</sup> Ina laa nang idi toxo isik kö e, e xo isik bölök ke mum. Ma laa nang i manga taxin saxit, bere Kraiss ixo met kelen abo magingin saban te ire xarnang a tinenge re God toxo geet i tengen bie,

<sup>4</sup> ma bara idi toxo bulus ine xö maot, ma bere God ixo öraru öbaling ine xö narun ne bung xarnang mon a tinenge re God idi toxo geet ine i tengen biringan bölök,

<sup>5</sup> ma bara ixo ot wösö re Pita ma melamu urungan kö sangaun ma ninöng ne bak ne ausu.

<sup>6</sup> Ma önga axana bung bölök melamu ine ixo wösö xöbo tönö ire kölöme re Kraiss, a xinixos se idi ixo saxit a pitnö ne mar. A oleleng mere idi, idi angen te to sik bang nixinen, ma lamun a uleng mere idi toxoro met.

<sup>7</sup> Ma melamu bölök ine ixo wösö re Jems, ma melamu baling ine ixo wösö re idi xirip abo aposol.

<sup>8</sup> Ma melamuin idi xirip, ine ixo wösö re e, e xo xarnang a barok toxo kip köbö.

<sup>9</sup> Me e eöt tua rengrengen ina na, möxösa, e lik köba kaluluonin abo aposol ma i kobo deek turunon iat bere idi tabo kuwe e ma aposol, möxösa, e xobo eler ma nangadi möxö lotu re God.

<sup>10</sup> Ma lamun e God ixo tabaa tataunin e ma abalamu re ine, io, e ot a mangana tödi bira. Ma ina abalamu kaim kö rörön tataun. Kaim. E xo rörön lölös sö idi xirip. Ma lamun

kaim bere e, a abalamu nang e God ixo tabaa tataunin e min ixo rōrōn bira.

<sup>11</sup> Io, a laa tataun nang bere e bo etōngōsen bara idi tobo etōngōsen. Mem kirip mobo wōwōrō ma ina atōngōsen na. Me ine mon nang e mum moxo nunu xōnan.

*A tinaru baling möxōbo minet*

<sup>12</sup> Ma nang bere mem bo walwalas tinenge bara e God ixo öraru e Kraiss kalik a minet, bara bule a dauleng mere mum te tengen bara kaim pe tinaru baling kalik a minet?

<sup>13</sup> Nang bara i turunon bara kaim pe tinaru baling kalik a minet, io, Kraiss bōlōk i koxobo taru kaa baling.

<sup>14</sup> Ma nang bara e God i koxobo öraru öbaling e Kraiss, abo atōngōsen te mem i laa tataun mon, ma a nunu re mum i laa tataun mon.

<sup>15</sup> Ma nang bara i turunon bara kaim pe tinaru xalik a minet, i maras bōlōk bere mem mere tōxō ulamun e God, möxōsa, mem mere tengen bere God ixoro öraru e Kraiss kalik a minet. Inexalik nang bara abo minet kaim kö tinaru baling, io, i turunon bara e God i koxobo öraru e Kraiss,

<sup>16</sup> möxōsa, nang bara abo minet takarabo taru kaa baling, io, Kraiss bōlōk i koxobo taru kaa baling.

<sup>17</sup> Ma nang bere God kaim kö öraru öbaling e Kraiss, a nunu re mum i laa tataun. Me mum angen mo kisisik kö tatalien saban te mum.

<sup>18</sup> Ma nang bara i turunon xarna nang, idi ewe nang toxoro met kölōme xō kinis se idi re Kraiss, idi tere iuo esexere im.

<sup>19</sup> Ma nang bara ire te xixiset ma nunu re Kraiss ulamun a to ra xō pu xalik mon, io, ire te maris kö nangadi xirip.

<sup>20</sup> Inexalik i turunon iat bara e God ixo öraru öbaling e Kraiss kalik a minet ma bara e Kraiss a sisila ewe nang i öturunon bara abo minet kabise bōlōk idi tabo taru kaa baling.

<sup>21</sup> Me idi tabo taru kaa baling, möxōsa, a tinaru kaa xalik a minet i wanot meringan kö önga tōdi, möxōsa, a minet ixo wanot meringan kö önga tōdi bōlōk.

<sup>22</sup> A nangadi xirip idi kölōme re Adam, me idi toxo met. Xarnang bira bōlōk, idi xirip kölōme re Kraiss, idi tabo to baling.

<sup>23</sup> Ma lamun a nangadi tabo to baling ot kö axana bung iat te idi. Kraiss a sisila re idi xirip. Ma nang bere Kraiss irabo wanot, idi nang mere ine tabo to baling.

<sup>24</sup> Melamu im, a xakawam irabo ot ma kölōme xō ina axana bung e Kraiss irabo isik tewe a kingdom urungan te God a Tamana. Me Kraiss irabo pet biringan nang bara iri

pas ösu idi xirip nang te kip a kinis ne warkurai, idi abo sisila, me idi nang a lak lölös,

<sup>25</sup> möxösa, Krai irabo mana kis xarnang a tene warkurai ot nang irabo bulus ösu a iuo re ine xö pu xö ene xexene.

<sup>26</sup> Ma nang bara iri öxöwam abo iuo xabise, irabo öxöwam bölök a minet.

<sup>27</sup> Ma i maras bara irabo ot xarna na, möxösa, a tinenge xö God idi toxo geet i tengen bira, "*Ixo bulus ösu abo lalaa xirip kö ene xexene.*" Ma nang i tengen bara abo lalaa xirip ine ixo bulus kö ene xexene, i maras bara i koxobo wöwörö ulamun e God, ine iat ewe nang ixo bulus abo lalaa xirip kö ene e Krai.

<sup>28</sup> Ma nang bara abo lalaa xirip i kis kö ene ine, io, a Barok kö God irabo kis kö ene a öng ewe nang ixo bulus abo lalaa xirip kö ene ine, bara God irabo eöt tua kure xirip abo lalaa.

<sup>29</sup> Ma nang bara i turunon bara kaim pe tinaru kaa baling, idi ewe toxo kip a baptais kelen idi abo minet, idi tabo pet a lasa im? Nang bere God i karabo öraru öbaling abo minet, ruasa a nangadi tabo kip baptais kelen abo minet?

<sup>30</sup> Me mem bölök, ruasa mem bo axanan tua asuo sösöxo ma kinadik nang i eöt bara mem marabo met ulamunon?

<sup>31</sup> Abo töke kölöme re Krai, i lörörö bara e rabo met köbo bungbung kirip. E sugurno bara ina na i turunon xarnang i turunon bölök bara e bo ölolot ulamun e mum kölöme re Krai Jisas a Orong ke ire.

<sup>32</sup> E bo xikip abo tiip kö tinörön te e. E xo erese arixe me idi ewe te xarnang abo mangana wawaguai axe mee Epeses. Nang bara e xo pet bira, möxösa, e iat e xo maa bira, io, i laa tataun nang bara e God i kobo öraru öbaling abo minet. Ma bara i karabo öraru öbaling abo minet,

*"I deek bara ire ta an ma ta inim mon,*

*möxösa, maxalik ire tabo met."*

<sup>33</sup> Ganim bara re öng i silien ölelebes e mum. I xarnang idi tobo rengrengen, "Nang bara mum bo xisixis arixe mere tene sasaban, idi tabo ögarin abo tatalien deek ke mum."

<sup>34</sup> Mum morobo kip lo öbaling a dinödöm maras nang i töxödös bere mum morobo pet bie. Mum bele wewet a magingin saban. E tengen bira, möxösa, a uleng mere mum idi tekobo ösöxo runin e God. Me e tengen bira bölök kua ömenge e mum.

*A lewene aine ire irabo taru baling bule?*

<sup>35</sup> Inexalik a öng irabo eose bara, "Bara bule abo minet idi tabo taru baling? Idi tabo taru kaa baling arixe ma mangana aidi sa?"

36 U tenge xarnang a baulang. Nang bara u pömös önga irine iaa xö pu, ma nang bara i kobola met, i karabo xuxubu kaa.

37 Ma nang bere nöngön u bo susulo, u sulo a irine iaa, xarnang a irine wit bara önga mangana iaa. Nöngön u kobo sulo a mangana aine nang irabo das melamu.

38 Ma lamun God i tabaa abo irine iaa ma mangana aidi eöt ma a maaa re ine. Me ine ibo tabaa öngöng a pasuno ma önga mangana aine iat.

39 Abo laa to xirip, idi mabo mangana aidi. Nangadi ma önga mangana aidi, wawaguai, idi ma önga mangana aidi, pun a lak önga maxan, ma en ma önga maxan.

40 Abo lalaa meruso xö watmaep idi ma aidi, ma nang mera xö pu, idi ma aidi bölök. Inexalik önga mangana mariris köbo aidi abo lalaa meruso xö watmaep ma önga mangana mariris kabise xöbo aidi abo lalaa mera xö pu.

41 A önga mariris möxö xaken, önga mariris kabise möxö texe, ma önga mariris kabise bölök möxöbo tii. Ma öngöng a tii, ine ma mangana mariris se ine iat.

42 Ma irabo ot bira bölök kö tinaru kaa baling kö minet. A aine a öng ewe idi te pömös, irabo maxus. Ma lamun nang bara irabo taru kaa baling, i kebeöt tunon bara irabo maxus.

43 Nang te pömös a aine öng, ine ibo wawara maut. Ma nang irabo taru kaa, ine irabo mariris. Nang te pömös ine, ibo meles. Ma nang bara irabo taru kaa, irabo lölös.

44 Nang te pömös a aine öng, ine ma mangana aine mera xö pu. Ma nang bara irabo taru kaa, ine ma mangana aine möxö tanono ine iat. Ma nang bara i nangen a mangana aine a öng mera xö pu, io, i nangen bölök a mangana aine a öng möxö tanono ine iat.

45 I xarnang mon toxo geet kö tinenge re God bara, "Ina sisila ne tödi, e Adam, nang e God ixo uxis ine, ixo kip a to mera xö pu." Ina Adam kabise ewe nang ixo ot melamu, ine a Tanono ewe nang ibo isik a to.

46 Ire tekobo kis bang köbo aine möxöbo tanono ire. Kaim. Ire tobo kis bang köbo aine ire mera xö pu. Me ire tabo kis köbo aine möxöbo tanono ire melamu.

47 A sisila ne tödi, e God ixo pet ine ma pu. Ine mera xö öxöno lagunon. Ma sese öninöng ne tödi meriso xö watmaep.

48 Idi nang mera xö öxöno lagunon, idi te eöt ma öng nang ine mera xö öxöno lagunon. Me idi nang meriso xö watmaep, idi te eöt ma öng nang ine meriso xö watmaep.

49 Ire te talien xarnang a öng nang mera xö öxöno lagunon, io, i deek bara ire tabo talien bölök xarnang a öng

nang meriso xö watmaep.

<sup>50</sup> Abo töke kölöme re Kraiss, a unine laa nang e tengen te mum i bira, bara ina mangana aine ire, a pines ma dee i kis könan, ma i kobo eöt ta nilaxa xö kingdom pe God. Xarna na bölök, öng nang irabo maxus i karabo eöt tua nilaxa xö lagunon nang kaim pe laa maxus könan.

<sup>51-52</sup> Mum moro ölangen bang! E rabo töngösen e mum ma önga laa ixo mun sik mesila ma na iri wanot maras im, bara ire xirip tekebeöt tua minet, ma lamun kö axana bung nang a tauu irabo tam, ire xirip tabo xuxulas saxit xarnang a öng i pili mara. A tauu irabo tam bira, me God irabo öraru abo minet me idi tekebeöt ta maxus. Me ire tabo xuxulas im.

<sup>53</sup> Irabo ot biringan, möxösa, God i kure bara a öng ewe i eöt tua mamaxus, ine irabo xuxulas ma i karabo eöt tua mamaxus. Ma a öng ewe i eöt tua minet, ine irabo xuxulas ma i karabo eöt tua minet.

<sup>54</sup> Ma xö axana bung nang idi ewe nang te eöt tua mamaxus, tabo xuxulas bara idi tekebeöt tua mamaxus, me idi ewe nang te eöt tua minet, tabo xuxulas bara idi tekebeöt tua minet, io, a tinenge xö God nang idi toxo geet, ine irabo ot turunon bira, *“God ixo pas ösu a minet ma ixo öxöwam ine.”*

<sup>55</sup> *“Nang, a minet, ule im a lölös se nöngön tua wawas ösu abo iuo re nöngön?”*

*Ma ule im a lölös se nöngön tua akara?”*

<sup>56</sup> A lölös möxö minet tua akara, ine a magingin saban. Ma abo warkurai te Moses ixobo isik lölös kö magingin saban.

<sup>57</sup> Ma lamun ire tabo tengen deek uruso xö God. Meringan kölöme re Jisas Kraiss, a Orong ke ire, io, God ixo tabaa ire ma lölös sua wawas ösu a minet.

<sup>58</sup> Io nang, abo tönö deek ke e kölöme re Kraiss, mum morobo mana tuu lölös, me mum bele öbala lo re laa rua ögigie e mum. Mum morobo mana isik kirip e mum iat urungan kö tinörön kö Orong, möxösa, mum mo ösöxö bere mum kobo rörörön tataun kö Orong.

## 16

*A tuluwok nang tabo tile urungan tö idi abo Jerusalem*

<sup>1</sup> Io, na e maa rua winörö ulamun abo tuluwok nang mum bo bulbulus etoxin ulamun a marakörö re God tingan Jerusalem. Mum morobo mana pet bie xarnang e xo tengen sik kö marakörö ne lotu meriso Galesia bere idi tabo pet bie.

<sup>2</sup> Xöbo Sade a öngöng mere mum irabo bulus tewe a dauleng ne tuluwok eöt kö usen i kip, xalik mum korobo sasaxan tua bulus etoxin kö axana bung nang e rabo wanot.

<sup>3</sup> Ma nang bara e wanot urungan te mum e rabo geet a dauleng ne tinenge maras me e rabo isik urungan kō nangadi ewe mum morobo pere kos lo. Me e rabo tile idi arixe ma ina ginigeet bere idi tabo kip abo arabaa re mum urungan Jerusalem.

<sup>4</sup> Ma nang bara i töxödös sik mon bara e rabo wan bōlök, io, idi tabo wan arixe me e.

*Pol i maa rua nuan uri Korin*

<sup>5</sup> Ma nang bere e wan saxit a lagunon taxin Masedonia, e rabo wan uri re mum. Me e tengen bira, möxösa, a turunon bere e rabo wan uri Masedonia.

<sup>6</sup> Me e döxömen bara e rabo kis lilis gut sik bang me mum pingan, bara e eöt tua kinis ösaxit a texe möxö labur arixe me mum pingan. Io nang, mum morobo eöt tua rorop e xö nuan te e nang e önan uxe.

<sup>7</sup> E kobo maa rua werwere e mum nixinen kalik e rabo kis aulik mon me mum, me e rabo wan esexere. Kaim. E maa xöba bere e rabo kis bang me mum nang bara a Orong i öbala sik e.

<sup>8</sup> Inexalik bara e rabo xisixis iat ta Epeses ot kö bung möxö Pentikos,

<sup>9</sup> möxösa, God iri sawang a ngas sö e rua xikip a oleleng ne inone xö tinörön te e, ma oleleng nangen idi te maa rua tinuu wi e.

<sup>10</sup> Ma nang bere Timoti irabo wan urungan te mum, e maa xöba bere mum morobo öga lo ine bara i karabo burin te laa nang i xisixis kaluluonin e mum. Ruasa, möxösa, ine ibo sösölök a tinörön kö Orong xarnang e bo wewet bōlök.

<sup>11</sup> Io nang, kaim pe öng irabo pere ösu ine. Mum morobo tile ine arixe ma malum pō ine rua tinawuxus baling ura rö e, möxösa, e bo xixiset me ine arixe mabo tönö ire.

<sup>12</sup> Io, me e maa rua winörö ulamun e Apolos, a tönö ire. E xo öxaxat ölölös ine bere irabo wan arixe mabo tönö ire urungan te mum. Turunon saxit, ine kaim kö maa rua nuan, ma lamun irabo wan melamu nang bara i eöt.

*A tinenge ne aöxaxat*

<sup>13</sup> Mum morobo tumarang me mum morobo tuu lölös sik kö lalaa nang mum mo nunu xönan. Mum morobo balamasa sik me mum morobo lölös.

<sup>14</sup> Me mum morobo pet abo lalaa xirip ma abalamu.

<sup>15</sup> Mum mo ösöxö bara barama re Sepanas idi abo sisila ne Kristien mee Akaia, me idi toxo isik idi iat tua rorop a nangadi re God. Abo töke kölöme re Kraisa, e öxaxat e mum

<sup>16</sup> pua ii ölik e mum urungan köbo mangana duöng bira ma urungan köbo duöng kirip nang idi te tuu arixe xö ina tinörön ma lölös.



<sup>17</sup> E axanan ulamun a inot te Sepanas me Potunatus me Akaikus. Mum kirip mo köbo eöt tua nuanot ura re e, ma lamun i wawara bara idiet tere kip a xönö maop pe mum pua werwere e.

<sup>18</sup> Idiet te ödeek a to re e ma re mum bölök. Io nang, mum morobo perexulen ina mangana tödi biringan bere i töxödös sua ii idiet.

*A tinenge ne aöga re Pol*

<sup>19</sup> A marakörö ne lotu xöbo lagunon na Esia, idi te tile a tinenge ne aöga urungan te mum. Akuila me Pirisila idu arixe ma marakörö ne lotu nang tobo orot etok arixe xögunon te idu, idi bölök te axanan köba rua tile a tinenge ne aöga urungan te mum.

<sup>20</sup> Ma abo tök ke ire kölöme re Krai na, idi te tile a tinenge ne aöga urungan te mum. Mum morobo öga lo a öngöng kabise arixe ma töxödös ne amum.

<sup>21</sup> E, e Pol, e geet ina tinenge ne aöga na, arixe ma limeke iat.

<sup>22</sup> Ewe re öng nang i kobo maa ulamun a Orong, God irabo ögarin esexerein ine. Orong, örö miang.

<sup>23</sup> A abalamu re Jisas a Orong irabo kis arixe me mum.

<sup>24</sup> E isik a mamaa re e urungan te mum kirip kölöme re Krai Jisas. Amen.

## A Sese Öninöng ne Ginigeet te Pol urungan köbo KORIN

Kö ina ginigeet na ire ta pere a balana e Pol bara ixo marse abo Kristien tingan Korin ma bara ixo dödöm köba ulamun idi. A uleng ne nangadi toxo maaaa rua xikip a kinis ne sisila möxö lotu ringan Korin, me idi toxo bulus ösu e Pol. Idi toxo tengen bere Pol kaim bara önga aposol tunon, io nang, kaim ine mere lölös sua kure ödeek a lotu ridi ringan Korin. Io, a uleng ne Kristien idi toxo muu ina mangana dinödöm. Idi toxo bulus öraxin idi ma toxo pere ösu e Pol. Io, Pol ixo xisixis singan Esia ma ixo tapunuk ma ixo maaaa bere idi tabo dödöm puxus. Io nang, ixo tile e Taitus urungan Korin ma önga ginigeet tua ötumarang idi ulamun abo magingin saban te idi. Ma lamun e Pol ixo dödöm bang ulamun abo Korin ma ixo muu a nuan te Taitus, möxösa, ixo eka asuo me Taitus nang ixo tawuxus bara irabo ösöxö bara abo Korin idi tere dödöm puxus bara kawaim. Me Pol i koxobo pere lo ine riso Toroas, io nang, ixo wan urso Masedonia (pere 2 Korin 2:12-13). Me Pol ixo wöwörö ulamunon a tinörön te ine möxö palas tinenge ma atöngösen deek ma bara ina atöngösen deek ulamun e Jisas i deek köbo warkurai te Moses (2:14-6:21), xalik idi tabo ulo wes a tinenge nang idi tere kip lo. Ma ixo eösaxit tö idi nang toxo ii öraxin idi, ma ixo osen bara ine iat ixo kip abo tiip, inexalik inabo tiip iat nang i osen bere ine a önga tödi deek ke Kraiss (4:1-18; 6:1-10). Io, Pol ixo maaaa bere idi tabo dödöm puxus (5:20-7:4). Ma nang e Pol ixo esuo me Taitus siso Masedonia (7:5-6), me Taitus ixo tengen te Pol ulamun a dinödöm puxus möxöbo Korin, ina nang ixo öaxanan e Pol (7:6-16). Io, e Pol ixo tengen te idi bara tabo tagure ödeek abo arabaa re idi ulamun abo Kristien tiso Jerusalem (8:1-9:15). Ma ixo isik önga tumarang lölös se idi nang idi toxobo bulus ösu ine bara idi tabo dödöm puxus bölök, xalik irabo ömokorot idi nang irabo wan pösöt idi ruso Korin (10:1-13:10).

<sup>1</sup> E, e Pol, önga aposol te Kraiss Jisas eöt ma a maaaa re God, me Timoti a tönö re ire kölöme re Kraiss, maa me tile ina tinenge na urungan te mum abo nangadi ne lotu re God tingan Korin me mum kirip abo nangadi re God kö boxönö xirip pingan Akaia.

<sup>2</sup> A abalamu ma a malum urungan te mum meringan te God a Tamana ire, me Jisas Kraiss, a Orong.

*God ibo isik abo aömanan.*

<sup>3</sup> Ire tabo ölet e God. Ine a God ma a Tata xö Orong ke ire, Jisas Kraiss. Ine a Tamana ire nang ibo isik a abalamu, me ine a God nang ibo ömanan ire xöbo lalaa xirip.

<sup>4</sup> Me ine nang ibo ömanan ire xalik abo tiip lölös kirip, bara ire tabo eöt bara tabo ömanan idi xabise xalik abo mangana tiip sa re idi. Me ire tabo eöt tua ömanan idi, möxösa, God ibo ömanan ire.

<sup>5</sup> I turunon bara abo kinadik kölöme re Kraiss i öwöwö abo to re ire, ma lamun God ibo ömanan köbanin ire bölök kölöme re Kraiss.

<sup>6</sup> Ma nang bara rebo tiip i uban e mem,\* i ot bira rua ömanan e mum ma rua öro e mum. Ma nang bere God i ömanan e mem, i ot bira rua ömanan e mum. Ma ina na i isik a lölös se mum bere mum morobo eöt tua tinuu lölös kö ene inabo kinadik i eöt ma nang mem me örasen bölök.

<sup>7</sup> Mem me nunu bara abo lalaa irabo wanot deek ke mum. Me mem me tuu lölös kölöme xö ina dinödöm, möxösa, mem me ösöxö bere God irabo ömanan e mum arixe me mem xarnang mum moxo örasen bölök abo kinadik nang e mem moxo örasen.

<sup>8</sup> Abo töke kölöme re Kraiss, mem me mamaa bere mum morobo maras köbo tiip lölös nang mem moxoro örasen tuso Esia. Me mem koxobo eöt tua sösölök a tiip taxin nang ixo ot sik ke mem, inexalik mem moxo döxömen bara, "Maris, ire tekebeöt tua tino im."

<sup>9</sup> Mem moxo örasen inabo kinadik xarnang bara re önga tene pet warkurai ixo bulus im a öxöno warkurai bere mem marabo met. Ma lamun ixo ot bira bere mem karabo tuu xöbo lölös se mem iat, ma lamun e mem marabo mana tuu xö lölös se God nang ibo öraru abo minet.

<sup>10</sup> Me ine ixo ölanglanga e mem nang moxo eka minet, ma irabo ölanglanga rewe e mem bölök kalik abo tiip. Me mem mere bulus sik abo dinödöm pe mem pe ine bara turunon saxit irabo ölanglanga rewe öbaling e mem melamu.

<sup>11</sup> Me God irabo pet bira nang bere mum morobo top e mem mabo siniseng ke mum. Ma nang mum morobo seseng bira, God irabo balu abo sineseng möxöbo nangadi oleleng ma irabo top tataunin e mem. Io nang, a oleleng tabo tengen deek ke ine ulamun e mem.

*Pol ixo kulas a dinödöm pe ine*

\* **1:6** Nang Pol i tengen 'mem' kö ina ginegeet na, i rengrengen lamun abo tene tinörön kö lotu ewe nang idi toxobo mumuu ödeek a inausu re ine.

<sup>12</sup> Io, a tinenge aölolot te mem i bira, bara kölöme runon te mem iat, mem me ösöxö bere mem koxobo röxröxö a ulik me mem moxo muu abo mangana tatalien meriso re God i töxödös esexere nang mem moxo to kaluluonin a nangadi xö öxöno lagunon. Ma turunon saxit mem moxo pet bira nang mem moxo to kaluluon te mum. Mem kaim kö talien eöt mabo dinödöm mera mon kö öxöno lagunon. Kaim. God ixo top e mem ma a abalamu re ine rua mumuu abo tatalien töxödös.

<sup>13-14</sup> Me mem me geet abo lalaa xalik mon urungan te mum nang i eöt tö mum pua xokos ma rua marmaras könan. Mum moxo maras auk lamun e mem. Ma lamun e mamaa xöba bere mum morobo maras kirip bere mum mo eöt tua ölolot e mem xarnang e mem bölök, mem marabo eöt tua ölolot e mum kö bung nang Jisas, a Orong, irabo ot baling.

<sup>15-16</sup> E xo maras kirip sik bara a dinödöm pe mum ura re mem i bira, io, e xo pingit bara arabo arun tua uxileng e mum kö nuan te e uruso Masedonia, ma bara e rabo uxileng öbaling e mum kö binaling ke e meriso Masedonia, rue mum pua xikip a nine axana rorop. Me e xo döxömen bere mum morobo top e xö nuan te e uri Judeia.

<sup>17</sup> Ma nang e xo pingit bara arabo wan im bira, ixo wawara bere e mabo dinödöm oleleng? Kaim. Bara bule, mum mo döxömen bara abo apingit te e i muu a tatalien te nangadi mera xö öxöno lagunon ewe nang te tengen bara, "I turunon," ma lamun te döxömen bara "I kobo turunon"? Kaim.

<sup>18</sup> Mum mo ösöxö runin bere God ibo wewet kirip eöt ma nang ixobo rengrengen. Io nang, mum morobo mana ösöxö bere mem moxo pet muu bira bölök nang moxo isik abo atöngösen te mem urungan te mum. Mem kebeöt tua rengrengen bara, "I turunon" ma "I kobo turunon."

<sup>19</sup> Ina na i maras, möxösa, Jisas Kraais, a Barok kö God, i kebeöt tua wewet te laa nang i turunon ma i kobo turunon bölök. Kaim. Abo lalaa kölöme re ine i turunon kalik mon. Me ine nang meet me Timoti me Sailas meet moxo etöngösen min kaluluonin e mum.

<sup>20</sup> Ma ina na i maras, möxösa, abo kunubus kirip pe God te ot turunon kölöme re Kraais. Io nang, kö kinis se ire kölöme re Kraais, ire te öturunon abo siniseng ke ire nang ire te tengen "Amen" uruso re God. Ma ina tatalien i ii öraxin a esene God.

<sup>21</sup> Me ine ewe a öng i uxis ölölös e mem arixe me mum kö kinis se ire kölöme re Kraais, ine e God. Me ine a öng ewe ixo bulus kabisenin ire

<sup>22</sup> ma ixo osen bara ire rö ine iat, ma ixo bulus a Töxödös ne Tanono kölöme runon kö kat te ire xarnang önga kunubus sua öturunon bere ine irabo isik abo lalaa deek kö ire melamu.

<sup>23</sup> E seng e God bara irabo öturunon a tinenge re e ma i bira: E koxobo wan baling uruso Korin, möxösa, e koxobo maaaa bara arabo ömokorot e mum.

<sup>24</sup> Ma nang e tengen bira, mem kobo eka kure abo mangana dinödöm pe mum ulamun abo lalaa mum mo nunu xönan. Kaim, möxösa, mum mo tuu lölös köbo lalaa mum mo nunu xönan. Ma lamun mem me rörörön arixe me mum bere mum morobo kip a axanan.

## 2

<sup>1</sup> Io nang, e xo bulus a dinödöm pe e bere e karabo tawuxus baling urungan tö mum pua ötapunuk e mum,

<sup>2</sup> möxösa, nang bere e xebe pet ötapunuk e mum, ewe im i xebe kis sua öaxanan e? Kaim im pe öng. Mum kalik mon nang e xo ötapunuk e mum.

<sup>3</sup> Me e xo geet a mangana tinenge urungan tö mum, möxösa, nang e xo wan urungan te mum, e koxobo maaaa bara ina nangadi ewe idi te eöt ta öaxanan e, idi tabo pet ötapunuk belek e. Me e maras kirip sik bere mum morobo axanan nang bere e axanan.

<sup>4</sup> Io, e xo gegeet urungan te mum ma kinadik ma tiip taxin kölöme xö balake. Ma oleleng ne line marake ixo susu nang e xo geet ine. E koxobo gegeet biringan bere e rabo ötapunuk e mum, ma lamun tua ömaras e mum bere e maaaa xöba rö mum.

*Idi tabo mana döxömen taun abo sasaban möxö tene saban*

<sup>5</sup> Ma nang bara re öng iri pet ot tebo tapunuk, i kobo turunon bere ine iri pet ötapunuk e. Kaim. Ine iri pet ötapunuk e mum, ma lamun i kobo taxin sik mon. E bele tengen bere ine iri pet ötapunuk köbanin e mum.

<sup>6</sup> I eöt mon ina ömokorot nang a oleleng mere mum moxoro öriip sik ine min.

<sup>7</sup> Ma lamun na im belek, mum morobo mana döxömen taun abo sasaban te ine me mum morobo ömanan ine, xalik ina tapunuk taxin i karabo ögarin ine.

<sup>8</sup> Io nang, e öxaxat e mum bere mum morobo osen öbaling bara i turunon bere mum mo maaaa rö ine.

<sup>9</sup> Ma a unine nang e xo gegeet urungan te mum, bara e rabo pere bere mum morobo tuu lölös köbo ölelewen ma bere mum morobo tame a tinenge re e xöbo lalaa xirip.

<sup>10</sup> Ma nang bere mum mo döxömen taun abo sasaban kere öng, io, e bölök e rabo döxömen taun abo sasaban te ine.

Ma nang bara rebo sasaban angen tö e rua döxömen taun, e re döxömen taun kö wawara re Kraiss sua gene mum,

<sup>11</sup> xalik e Satan irabo lamus öröxröxö lo ire, möxösa, ire te maras im kö dinödöm ma tatalien te ine.

*Pol ixo dödöm köba ulamun e Taitus*

<sup>12</sup> Io, nang e xo wan su uri Toroas sua atöngösen lamun a tinenge deek kö Kraiss, e xo pere bara Orong ixoro sawang sik a ngas sö e bara arabo rörön tingan ee.

<sup>13</sup> Ma lamun e xo dödöm oleleng köba, möxösa, e kaim kö eöt tua parasiwin a töke e Taitus singan ee. Io, e xo wan lie idi ringan ee me e xo wan lo uri Masedonia.

*A tinörön möxö kunubus maxat*

<sup>14</sup> Ma lamun mem me tengen deek kö God ewe nang ibo sisilien e mem kölöme re Kraiss sua osen bara Kraiss i xarnang önga umri raxin ewe nang ibo sisilien lo abo iuo nang iri pas bulus. Ma xarnang a xiki irabo waxwaxat elixilixin önga sisixine deek, io, God iri uguran elixilixin e mem bara a nangadi möxö boxönö xirip tabo ösöxö ine.

<sup>15</sup> Ire te xarnang a sisixine deek meringan te Kraiss uruso xö God nang ibo önan eli xö boxönö xirip kaluluonin idi ewe nang God i öro idi me idi ewe nang angen te eka minet.

<sup>16</sup> Kölöme xö winara xö dauleng, mem me xarnang a sisixine möxö minet. Ma rö idi xabise, mem a sisixine möxö to. Ma i lölös köba saxit nang bara re öng ibo sölöök a mangana tinörön biringan.

<sup>17</sup> Ma lamun mem kobo talien xarnang idi a oleleng nang tobo kulas ögarin a tinenge xö God ma tobo rörön arixe min tua xikip tuluwok. Kaim. Xö kinis se mem kölöme re Kraiss ma xö wawara xö God ma xarnang a nangadi nang e God ixoro uguran, mem bo rengrengen abo lalaa nang mem me ösöxö bara i turunon.

### 3

<sup>1</sup> Nang e tengen bira i xarnang bara mem me tengen öbaling bere mem me deek? Bara bule, xarnang a dauleng ne nangadi xabise, mem me sasaxan bere mem marabo mana kip lo rebo ginigeet möxö tinenge maras meringan kalik e mum uruso xöbo duöng kabise bere idi tabo maras bere e mem abo duöng deek? Bere e mem me sasaxan bara idi tabo isik ke önga mangana ginigeet biringan urungan tö mum lamun mum morobo ösöxö bara e mem abo duöng deek? Kaim.

<sup>2</sup> Mum iat abo ginigeet te mem nang mem mere kip lo. Ma tere geet sik kö bala mem. Ma nangadi xirip tere kos me idi tere maras ulamunon.

<sup>3</sup> Mum bo osesen bere mum iat a ginigeet meringan te Kraiss, ma a inone tinörön te mem. Kraiss kaim kö gegeet mere xako. Ine ixo gegeet ma Tanono God nang a lak to. Kaim kö gegeet kere xönö wat, inexalik ixo geet kö kat kö nangadi.

<sup>4</sup> Mem me tengen bira, möxösa, xö kinis se mem kölöme re Kraiss ma xö wawara xö God mem me maras köba bara inabo lalaa i turunon.

<sup>5</sup> Ma lamun kaim pe laa kölöme re mem i silien e mem pua döxömen bere e mem me eöt tua wewet inabo tinörön. Ma lamun mem me eöt mabo lalaa xirip kölöme xöbo rorop nang i ot meringan kö God.

<sup>6</sup> Me ine a öng ewe ixo top e mem bara e mem marabo eöt tua tinörön xarnang a tultul möxö xuxubus maxat. Ina xuxubus na, kaim idi rua wewet ine merebo mangana warkurai idi toxo geet ösu. Kaim. Ina na a laa möxö Töxödös ne Tanono, möxösa, abo warkurai nang toxo geet ösu ibo sexomet a nangadi, ma lamun a Tanono ibo isik a to.

*A mariris möxö xuxubus maxat*

<sup>7</sup> Nang e God ixo isik inabo warkurai, ixo kuru inabo ginigeet tingan lömö xö xönö wat. Ma ixo isik inabo warkurai arixe ma mariris se ine. Ma i turunon bara a mararang möxö ina mariris kö mamaran te Moses ixo eka xakawam, inexalik abo Israel kaim kö eöt tua werwere dik ine. Ma nang bara inabo warkurai nang ixo isik a nangadi xö minet ixo wanot arixe ma mariris,

<sup>8</sup> io, i turunon bara a tinörön möxö Töxödös ne Tanono ine ma a mariris taxin.

<sup>9</sup> Nang bara a mariris i kis kölöme xö warkurai te Moses nang ibo rörörön tua isik a nangadi urungan kö minet, io, a mariris taxin i kis kölöme xö atöngösen deek nang i rörörön tua ötöxödös a nangadi xö wawara re God.

<sup>10</sup> A dauleng ne mariris ixo kisisik kölöme xö inabo warkurai, ma lamun a mariris möxö kunubus na i taxin köba xö niang mesila. Io nang, bara ire tabo öt idu i xarnang bara kaim im pe mariris kö niang mesila.

<sup>11</sup> I turunon. Ma nang bara inabo warkurai nang ixo eka xakawam tewe ixo wanot arixe ma dauleng ne mariris, a mariris taxin i kisisik kö niang irabo kis ulorexe.

<sup>12</sup> Io nang, mem me balamasa xöba, möxösa, mem me nunu xö ina kunubus niang i karabo kawam.

<sup>13</sup> Me mem kobo xarnang e Moses ewe nang ixobo kain pi a mamaran te ine bara xalik abo Israel tabo pere bara a mariris i eka xakawam.

<sup>14</sup> Inexalik abo dinödöm pe idi ixo tabönöt. Ma i tabönöt bira, möxösa, ina mangana xinaxain iat ibo kain abo

dinödöm pe idi ot nixinen niang idi te kos abo tinenge möxö kunubus maut, möxösa, a Orong ibo xikip tewe re idi xalik mon niang te kis kölöme re Kraiss.

<sup>15</sup> Ma ot nixinen nang idi nangen te xokos abo warkurai te Moses, a xinaxain ibo kait pi sik a dinödöm pe idi.

<sup>16</sup> Ma lamun nang bara re öng i tawuxus urungan kö Orong, a Orong irabo kip tewe a xinaxain.

<sup>17</sup> Ma a Orong, ine a Töxödös ne Tanono, ma nang bara a Tanone Orong i kis singan, a nangadi tabo langlanga xalik abo warkurai te Moses.

<sup>18</sup> Me ire xirip nang kaim pe xinaxain köbo wawara re ire, i xarnang bara ire te werwere a mariris kö Orong kö önga galas. Me ire tobo xuxulas eöt ma ina malalar kö Orong, ma a mariris se ire ibo rataxin. Ma a mariris se ire i ot meringan kö Orong ewe nang ine iat a Tanono.

## 4

### *Ire te xarnang a bile nang i malus sua tawörök*

<sup>1</sup> Ma xö inemarse re God, iri isik ina tinörön na urungan te mem pua wewet. Io nang, mem karabo lön tua wewet ina tinörön. Kaim.

<sup>2</sup> Ma lamun mem moxoro wan talu a tatalien nang idi toxo pet suxume arixe ma minenge. Mem kaim kö lamus ölelebes se öng. Ma xarnang bölök, mem kaim kö kulas ögarin a tinenge re God. Kaim. Inexalik mem me osen a turunon. Ma xö ina tatalien na, mem me osen e mem kö dinödöm kö nangadi bere idi tabo mana perexulen e mem bere mem me deek. Me mem me pet bira xö wawara re God.

<sup>3</sup> Ma nang bara i turunon bara a mangana xinaxain i kain sik a tinenge deek ke mem, i kain sik bira xalik idi ewe nang te eka minet.

<sup>4</sup> E Satan, a god möxö öxöno lagunon, iri öxödxödö abo dinödöm köbo tabuno nunu, lamun idi tekarabo eöt tua werwere a bibio möxö atöngösen deek ulamun a mariris se Kraiss ewe nang a malalar te God.

<sup>5</sup> Mem kobo etöngösen baling ulamun e mem iat. Kaim. Mem me etöngösen ulamun e Jisas Kraiss bere ine a Orong ma bere mem abo tultul urungan te mum rua gene e Jisas.

<sup>6</sup> God ewe nang ixo tengen bara, "A bibio irabo mana mararang meringan kö xödxödö," ine mon a öng nang ixo mararang kingan kölöme xö balna ire bara tabo maras sua ösöxö a mariris kö God ewe nang i mararang kö mamaran te Kraiss.

<sup>7</sup> Ma lamun e mem ewe nang mere uruoxe ina laa na xarnang a bubulus deek, mem me xarnang abo bile ma



i malus sua tawörök lamun irabo ot maras bara ina lölös taxin nang mem mere uruoxe i ot meriso xö God ma kaim bara mera re mem iat.

<sup>8</sup> Abo mangana tiip taxin ibo uban e mem, inexalik i kobo pas ösu e mem. Mem bo dödödöm oleleng, ma lamun e mem kaim kö lönlön.

<sup>9</sup> Me idi tobo elerin e mem, ma lamun e God i koxobo wan talu e mem. Idi tobo ögat köbanin e mem, inexalik idi tekara pet ögat esexerein e mem.

<sup>10</sup> Ma nang idi tobo wewet bira rö mem i xarnang bara mem bo örasen a inarse ömet nang idi toxo pet te Jisas kölöme xö lewene aine mem. Ma i ot bira rö mem pua a to re Jisas irabo ot maras bölök kölöme xöbo lewene aine mem.

<sup>11</sup> Me idi tobo ögarin sösöxöin e mem ewe nang me to sik bang, io nang, mem me lörörö rua minet tua gene e Jisas. Ma i bira bölök ke mem lamun a to re Jisas irabo ot maras bölök kö lewene aine mem nang irabo met.

<sup>12</sup> Io nang, mem bo eka minet, ma lamun mum bo uruoxe a to.

<sup>13</sup> Inexalik mem bo xarnang sik a tinenge re God nang toxo geet ma i tengen bira, *“E xo tengen osen, möxösa, e xo nunu.”* Me mem bölök me nunu xö ina mangana nunu na, io nang, mem me tengen osen,

<sup>14</sup> möxösa, mem me ösöxö sik bere ewe nang ixo öraru e Jisas a Orong kalik a minet, ine bölök irabo öraru e mem arixe me Jisas, ma irabo bulus osen e mem arixe me mum kö mamaran te ine.

<sup>15</sup> Ma inabo lalaa xirip na rua gene mum. Ma nang a abalamu re God i wan nana xö boxönö xirip urungan kö oleleng, a oleleng ke idi tabo tengen deek uruso lömö ma tabo ii öraxin e God.

<sup>16</sup> Io, möxö ina na, mem kaim kö lönlön kalik ina tinörön. Abo aine mem iri susu, ma lamun kölöme re mem i ririsan deek köbo bungbung kirip.

<sup>17</sup> Io, abo tiip pe mem nang i uban e mem kö axana bung puruwut mon, i isik ot sik kö mem a mariris taxin nang irabo kis ulorexe. Ma i kebeöt bara tabo eörin ina mariris arixe ma inabo tiip lixilik.

<sup>18</sup> Ma i ot turunon bira nang ire tekobo werwere dik abo lalaa nang i kis maras, ma lamun ire te werwere dik abo lalaa nang i kebeöt bara re öng irabo pere. Ruasa, möxösa, abo lalaa i kis maras i kebeöt ta kinis ömat, ma lamun abo lalaa nang i kebeöt bara re öng irabo pere, irabo kis ulorexe.

## 5

*Abo lewene aine ire rusu xö watmaep*

<sup>1</sup> Io, abo lewene aine ire mera xö pu i xarnang a gunon nang ire te roro kölöme xönan, ma nang bara te öbeng ösu, ire tabo kip gunon meriso xö God, ma abo mangana gunon nang irabo kis ulorexe rusu xö watmaep, ma mangana gunon nang kaim idi xo wewet ma limine ire a nangadi.

<sup>2</sup> A turunon saxit, nang ire angen bang te roro kölöme xö inabo gunon, ire te kis ne tapunuk, möxösa, ire te maaaa bara ire tabo sige abo gunon te ire meriso xö watmaep xarnang abo man,

<sup>3</sup> möxösa, nang bara ire te sige ine ire tekarabo belbele.

<sup>4</sup> Io, nang ire angen bang te roro kölöme xö inabo gunon, ire te kis ne maris arixe ma tiip taxin, möxösa, ire tekobo maaaa rua xikip tewe abo man te ire, ma lamun ire te maaaa bara ire tabo laulawa, bara inabo lewene aine ire nang i eka minet irabo xuxulas ma irabo to.

<sup>5</sup> Me God mon ewe nang ixo tagure ire rua xikip ina to, me ine a öng nang iri isik a Töxödös ne Tanono ura re ire xarnang önga kunubus sua öturunon bara ire tabo kip ina to.

<sup>6</sup> Io nang, ire tobo balawapat sik me ire te ösöxö bara ire angen bang te to sik kölöme xö lewene aine ire xarnang abo gunon te ire, io, ire te kis tewe sik bang kalik e Orong.

<sup>7</sup> Ire te to arixe ma nunu, ma kaim bara xöbo lalaa ire te pere.

<sup>8</sup> Ire te balawapat sik kö ina na, me ire te maaaa belek kua nuan kalik inabo aine ire, me ire te maaaa rua kinis arixe me Orong kingan kö lagunon turunon te ire.

<sup>9</sup> Io nang, a maaaa raxin te ire bara ire tabo öaxanan e Orong. Kaim pe laa nang bara ire te kis sa xöbo aine ire ma bara te kis kö palaa rusu lömö.

<sup>10</sup> Ire tabo dödöm bira, möxösa, i turunon saxit bara ire xirip tabo tuu xö kinis ne warkurai te Krai, rue ire a öngöng tabo kip a babalu eöt ma abo tatalien te ire nang ire toxo to sik bang kö aine ire, nang bara abo tatalien te ire i deek bara i saban.

### *Ire tabo mana ais baling arixe me God*

<sup>11</sup> Mem bo buburin a Orong, io nang, mem bo rörön lölös sua sasat lo a dinödöm kö nangadi. I maras sik kö God bara abo mangana nangadi bule e mem, me e maaaa xöba bara i maras sik bira bölök köbo dödöxömen te mum.

<sup>12</sup> Mem kobo rengrengan öbaling kö mum bara mem me deek. Kaim. Mem me isik a unine rö mum bara morobo ölolot e mem rue mum pua eöt tua balu ödeek idi nang te ölolot ulamun abo lalaa tere pere ma kaim bara ulamun abo tatalien meringan kölöme xö öng.

<sup>13</sup> Nang bara mem abo baba, mem marabo baba rua gene e God. Ma nang bara abo dödöxömen te mem i maras, mem me maras sua gene e mum.

<sup>14</sup> A abalamu möxö Kraiss ibo sunen e mem bere mem marabo talien bira, möxösa, mem me ösöxö runon bara a öng ixo met kelen ire xirip, io nang, ire xirip toxo met.

<sup>15</sup> Ma ixo met kelen ire xirip bara ire ewe te kip a to maxat, takarabo to rua gene ire iat ma lamun tabo to rua gene a öng nang ixo met ma ixo taru kaa baling kelen ire.

<sup>16</sup> Io, na im ire takarabo perexulen a nangadi arixe ma mangana dinödöm mera xö pu. A turunon, mesila ire toxo perexulen e Kraiss bira, inexalik na im ire tekebeöt bere ire tabo pet öbaling bie.

<sup>17</sup> Io nang, nang bara öng i kis kölöme re Kraiss, ine a tödi maxat. A lalaa maüt iri kawam ma a lalaa maxat iri ot.

<sup>18</sup> Inabo lalaa xirip na meriso re God, ewe nang ixo lamus puxus ire urungan te ine xarnang abo ais se ine kölöme re Kraiss ma ixo tabaa e mem ma ina tinörön möxö lamus puxus a nangadi urungan te ine xarnang abo ais se ine.

<sup>19</sup> Ma i xarna na, bere God ixo lalamus puxus a öxöno lagunon urungan te ine xarnang abo ais se ine kölöme re Kraiss. Kaim kö xokos lo abo sasaban te idi nang toxo pet. Ma ixo isik sik kö mem a tinörön möxö rengrengen ösu bara ibo lalamus puxus a nangadi urungan te ine xarnang abo ais se ine.

<sup>20</sup> Io nang, mem abo tinuxulas se Kraiss ewe nang ixo tile e mem, ma i xarnang bara kölöme xö tinenge re mem, God i seseng e mum ma önga laa ma i bira: kölöme xö xönö maup pe Kraiss, mem me seng e mum bere mum morobo ais baling arixe me God.

<sup>21</sup> Me Kraiss i koxobo pet tebo tatalien saban, ma lamun God ixo bulus abo sasaban te ire lömö re ine rua gene ire, bara kölöme re Kraiss ire tabo töxödös kö wawara xö God.

## 6

<sup>1</sup> Ma nang e mem me rörön arixe me God, mem me öxaxat bölök e mum ewe nang mum moxoro uruoxe a abalamu xö God, bara mum bele ösek tataunin ina abalamu ma kaim pe inone.

<sup>2</sup> Xarna na, God i tengen bara,  
*“Nang axana bung ixo wanot bara e rabo ömaraxen lo  
 nöngön, e xo tame nöngön,  
 ma nang a axana bung ixo wanot bara e rabo öro nöngön, e  
 xo top nöngön.”*

Mum morobo pere bang! Na im a axana bung bara God irabo ömaraxen lo e mum, ma na im a bung bara irabo öro e mum.

*Abo tiip pe Pol*

<sup>3</sup> Mem kobo maaaa bara mem marabo pet te önga lalaa bara re öng irabo tamake xönan, ma xalik ke öng ibo pere öbulubun a tinörön te mem.

<sup>4</sup> Kaim. Xarnang abo tultul kö pu xö God mem bo osen e mem köbo tatalien kirip pe mem bere mem a lak deek. Me mem me osen e mem bira nang mem me tuu lölös kö ene abo tiip, ma kaluluonin abo purpuruan mabo kinadik, ma nang abo mangana kinis ibo uban e mem,

<sup>5</sup> ma nang idi tere paxat e mem, ma nang tere kut dik e mem kölöme xö gunon ne aömokorot, ma nang a oleleng te tuu arixe rua ögarin e mem, ma nang mem me rörön lölös, ma nang e mem kara paluso, ma nang e mem me irilöng.

<sup>6</sup> Me mem me osen e mem bira bölök köbo tatalien madakdak ke mem, ma xö dinödöm maras, ma xö tatalien möxö balawapat kö ene abo tiip, ma xö tatalien deek urungan kö dauleng kabise, ma kölöme xö Töxödös ne Tanono, ma kölöme xö abalamu turunon.

<sup>7</sup> Me mem me osen e mem bira bölök köbo tinenge re mem ulamun abo lalaa i turunon, ma xöbo tinörön te mem arixe ma lölös se God, ma nang e mem me tön abo iie möxö tatalien töxödös köbo lime tuun te mem ma abo auwiwi möxö tatalien töxödös köbo lime kes se mem.

<sup>8</sup> Idi tere ii öraxin e mem ma tere pere ösu bölök e mem. Idi tere tengen ögarin e mem ma tere ölet bölök e mem. Mem me tengen abo turunon ma lamun idi te döxömen bere mem abo tene atöxö.

<sup>9</sup> Idi te ösöxö ödeek sik e mem ma lamun te pere tataunin e mem. Mem bo eka minet, ma lamun belek mem angen me to sik. Idi toxo ömokorot e mem ma lamun kaim idi xo sese ömet e mem.

<sup>10</sup> Mem bo tapunuk, ma lamun mem bo axanan sösöxö bölök. Mem bo talien xarnang abo maris, ma lamun mem bo wewet a oleleng tobo asuono orong. I xarnang bere mem kaim kö unan te önga lalaa, ma lamun mem mabo lalaa xirip.

<sup>11</sup> Mum abo Korin, mem mere öwösö xirip pö mum ma mere isik a kat te mem urungan tö mum.

<sup>12</sup> Mem kobo kip tewe e mum möxöbo to re mem, ma lamun mum kobo ömaraxen lo e mem köbo to re mum.

<sup>13</sup> E wöwörö re mum xarnang abo barok ke e. Mum morobo mana pet a mangana tatalien i eöt ma tatalien mem bo wewet tö mum. Mum bölök morobo mana isik a bala mum urungan tö mem.

*Abo tene nunu tebele parap ma tabuno nunu*

<sup>14</sup> Ganim bere mum mo parap arixe mabo tabuno nunu. A sa, i eöt bara a tatalien töxödös ma tatalien möxö suongus

idu tabo kis arixe? Ma maras ma ködö, idu tabo tuu eöt arixe bule?

<sup>15</sup> Ma i eöt bara Kraiss me Satan, idu tabo önga dinödöm mon? Bule, abo tene nunu ma abo tabuno nunu, idi tabo önga dinödöm mon bölök?

<sup>16</sup> Ma abo petpuo ma a gunon te God, idi tabo maraxa arixe bule? Me ire iat a gunon möxö God ewe nang a lak to. I xarnang e God ixo tengen:

*“E rabo kis arixe me idi  
me e rabo to kaluluonin idi.  
Ma irabo ot bara e rabo God te idi  
me idi tabo nangadi re e.”*

<sup>17</sup> Io, lamun ina na, a Orong ixo tengen bira,

*“Moro wan su xalik idi  
ma moro kis tewe xalik idi.  
Ganim e mum pa löröröin abo lalaa e re panak e mum  
könan,  
me e rabo öbala lo e mum.*

<sup>18</sup> *Ma irabo xarnang bere e a Tama mum,  
me mum morobo bung baroxorok ma balixilik ke e.  
A Orong, a Lölösine, i tengen bira.”*

## 7

<sup>1</sup> Abo ais deek ke e, ire tere kip lo inabo xuxubus, io nang, ire tabo mana ömadakdak ire iat kalik abo lalaa i öbiling a aine ire ma tanono ire, me ire tabo mana madakdak esexere sik kalik abo sasaban, möxösa, ire tobo ii e God.

*Pol ixo axanan köba*

<sup>2</sup> Mem me maaaa bara mum morobo isik a bala mum urungan te mem. Mem koxobo pet te sasaban kere öng. Mem koxobo pet ögarin te öng. Mem koxobo töxö lo re lalaa xere öng.

<sup>3</sup> E kawaim kö rengrengen inabo tinenge na rua ögarin e mum. Kaim. E xoro tengen sik bara mum mo kis kölöme sik köbo kat te mem. Mem me tagur sik kua tino bara rua minet arixe me mum.

<sup>4</sup> E re bulus sik a dinödöm pe e ringan te mum, ma nang e rengreng ulamun e mum e bo ölölet e mum. E re örasen kulen a ömanan taxin, ma kaluluonin abo auban te mem, e wöwö xöba ma axanan.

<sup>5</sup> Ruasa, möxösa, nang mem moxo wanot ta Masedonia, mem kaim kö kip mamas, möxösa, ixo uban e mem kö oleleng ne mangana lalaa. Ma a dauleng ne agot nangen ma nangadi xabise, ma abo binuut kö bala mem.

<sup>6</sup> Ma lamun e God, ewe nang ibo ömanan idi nang te tapunuk, ixo ömanan e mem ma inot te Taitus.

<sup>7</sup> Ma kawaim bara a inuanot te ine xalik mon nang ixo ömanan e mem. Inexalik nang Taitus ixo tengen ösu bara e

mum moxo ömanan ine, ina na ixo ömanan bölök e mem. Ixo tengen te mem bara mum mo maaaa xöba bere mum morobo pere e, bara i taxin a tapunuk ke mum ulamun abo sasaban nang mum moxo pet, me mum mo dödöm köba ulamun e. Io niang, a axanan te e i taxin köba möxö niang me mesila.

<sup>8</sup> Turunon saxit bara a ginigeet te e ixo ötawunuk e mum, inexalik e kobo marmaris bere e xo geet ine. A turunon, mesila e xo marmaris bere e xo geet ine, inexalik e pere bere mum kobo örasen ömarin a tapunuk ulamun a ginigeet te e.

<sup>9</sup> Ma na im e axanan. Me e kobo axanan bere e xo ötawunuk e mum, inexalik bara a tapunuk ke mum ixo lamus e mum urungan kö dinödöm puxus. Ma a tapunuk ke mum biringan ixo eöt ma maaaa xö God, io nang, mem kobo ögarin ulik e mum.

<sup>10</sup> A mangana tapunuk nang i eöt ma maaaa xö God i isik ot a dinödöm nang i lamus a öng urungan kö ineöro. Ma re öng i karabo maris bara ina na irabo ot biringan tö ine. Inexalik a tapunuk mera xö öxöno lagunon i isik ot a minet.

<sup>11</sup> Mum moro pere bang, a lasa ina tapunuk niang i eöt ma maaaa xö God, iri isik ot kölöme xö to re mum. Anana mum kobo döxömen bara a laa ne aösaxit ina tatalien saban na, inexalik bara a laa lölös ine. Mum mo lelewi xöba rua osesen bere mum kobo tuu sik kö sasaban, mum mo lalaie ulamun abo sasaban, me mum mo bubuut im. Ma na im mum mo maaaa xöba bere mum morobo pere e ma i lelewi abo bala mum pö e. Me mum mo tagur sik köba rua ömokorot ewe nang ixo pet te sasaban. Ma xöbo tatalien te mum, mum muru osen bara mum kobo pet te sasaban kö ina laa na.

<sup>12</sup> I turunon bere e xo gegeet urungan te mum. Ma lamun e kaim kö gegeet tua gene öng nang ixo pet a sasaban, ma kaim bölök bara rua gene ina tödi xabise ewe nang ina öng kabise ixo ögarin ine. Kaim. E xo geet ina na bere mum morobo maras kö wawara re God bara i lelewi xöba a dinödöm pe mum pua tinuu arixe me mem.

<sup>13</sup> Ma inabo lalaa nang ixo öxaxat e mem.

A turunon bere mem me balawapat, ma lamun ixo taxin köba a axanan te mem nang mem moxo pere a axanan taxin te Taitus, möxösa, mum kirip mum moxo pet ömaxat a to re ine.

<sup>14</sup> Ma nang e xo wöwörö arixe me ine, e xo ölet e mum, me mum kobo mengein e. Me mem moxo rengrengen a turunon urungan te mum. Xarna niang, a tingenge re mem iri wanot turunon bölök nang mem moxo ölet e mum kölöme xö wawara re Taitus.

<sup>15</sup> A maaaa re Taitus urungan tue mum i taxin köba nang i döxömen lo abo tinam pe mum nang e mum moxo öga lo ine arixe ma binuut ma dinedee.

<sup>16</sup> E axanan im bara i eöt bara e rabo bulus a dinödöm pe e ringan te mum ulamun abo lalaa xirip.

## 8

### *A arabaa ne tuluwok köbo Judeia*

<sup>1</sup> Abo töke kölöme re Kraiss, mem me maaaa rua ömaras e mum ulamun a abalamu nang God iri isik köbo marakörö ne lotu xö boxönö na Masedonia.

<sup>2</sup> Ma i turunon bara a kinadik taxin ixo öxadik köbanin idi, ma lamun idi toxo wöwö sik arixe ma axanan, io nang, idi toxo bala taru rua inerabaa ma oleleng. Ma i laa tataun nang bara idi te kis ne maris köba.

<sup>3</sup> E tengen ömaras bara idi toxo erabaa eöt ma nang idi te eöt bara tabo pet bie, ma lamun inabo inerabaa ixo saxit belek kö nang idi toxo eöt tua isik.

<sup>4</sup> Xö maaaa re idi iat idi toxo seng e mem bere mem marabo ömaraxen lo idi bara idi bölök tabo laxa xö ina tinörön ne rorop urungan kö nangadi runon kö God kirip nang Judeia. Idi toxo perexulen lo bara a lalaa nang irabo öaxanan idi, niang bara idi te laxa xö ina tinörön.

<sup>5</sup> Me idi kaim kö wewet xarnang e mem moxo döxömen sik bie. Kaim. Idi toxo araun iat bang kua isik a to re idi urungan kö Orong ma re mem, möxösa, God ixo maa bara idi tabo pet bira.

<sup>6</sup> Io nang, mem moxo öaxat e Taitus bara irabo tuu arixe me mum rua öxawam ina tatalien ne inemarse, möxösa, ine a öng ewe ixo urulo ina na mesila.

<sup>7</sup> Ma i turunon, mum mo wöwö xöba ma abo lalaa xirip. Mum ma nunu raxin, a tatalien möxö atöngösen, ma a nanase. A bala mum i lelewi xöba rua rorop ma i taxin a maaaa re mum ura re mem. Xarnang mum mo talien sik bie, i deek bere mum morobo ölasan bölök e mum kö ina tinörön ne inemarse na.

<sup>8</sup> E kaim kö isik ke warkurai lölös sö mum nang e xo tengen bira. Kaim. E maa bara e rabo öt a inemarse re mum arixe me idi xabise ewe nang te lelewi xöba sik bie, lamun e rabo ösöxö bara a inemarse re mum i turunon bara kawaim.

<sup>9</sup> Mum mo ösöxö sik a inemarse re Jisas Kraiss, a Orong ke ire. Ine ma kinis ne asuono orong, ma lamun ixo kip lo a kinis ne tanaa rua gene e mum, lamun mum morobo kip lo a kinis ne asuono orong meringan kölöme xö kinis ne tanaa re ine.

10-11 Xö dinödöm pe e i wawara bara na im mum morobo mana öxawam ina tinörön nang mum moxoro urulo kölöme xö awat nang iri kawam. Mum moxo sisila ne lagunon tua maaaa rua inerabaa me mum bölök möxö sisila ne lagunon tua wewet bira. Xarnang abo maaaa re mum ixo lelewi xöba rua wewet bira, i deek bere mum morobo öxawam ina tinörön möxö inerabaa eöt mabo lalaa re mum nang mum mo eöt tua arabaa min.

12 Io, nang a öng i maaaa rua arabaa, God irabo ömaraxen lo a inerabaa re ine eöt ma nang a önga tödi i eöt tua isik. God i karabo döxömen lo abo lalaa a önga tödi i kebeöt tua isik.

13 E kobo maaaa bara arabo pet öwawaxan a to re idi a nangadi xabise me mum morobo kip lo a tiip. Kaim. E maaaa bara abo mangana kinis se mum kirip irabo önga mangana mon.

14 Na im abo bubulus taxin te mum irabo öwöwö a sasaxan te idi, io nang, abo bubulus se idi belek, nang bara irabo taxin, irabo öwöwö abo sasaxan te mum kö axana bung melamu. Nang bara ire te talien bira, abo kinis se ire irabo önga mangana mon

15 xarnang a tinenge xö God nang toxo geet i tengen: *“Ewe a öng nang ixo üögun a oleleng, a xinixip pe ine i kobo saxit a sasaxan te ine, me ine nang ixo üögun aulik, i koxobo sasaxan.”*

*Pol ixo tile e Taitus uruso Korin*

16 Me e tengen deek urungan kö God, ewe ine iri öraru a balna e Taitus sua gene mum xarnang i öraru a balna e bölök.

17 Ma turunon bere Taitus ixo aut kö sineseng ke mem bara irabo wan urungan te mum, ma lamun i raru bölök a balna rua gene mum. Io nang, i maa bara irabo wan urungan te mum, möxösa, ine iat i maaaa bie.

18 Me mem me maa rua ritile ine arixe ma ina tönö ire. Kölöme xö tinörön te ine möxö tinenge deek, ina tönö iri kip a ese raxin kaluluonin a nangadi ne lotu kölöme xöbo lagunon kirip.

19 Ma kaim bere nangang kalik mon. A marakörö ne lotu möxöbo lagunon idi toxo pere kos ine bara irabo wan arixe me mem nang e mem marabo xikip nanin ina arabaa ne inemarse. Mem me balaure ina arabaa rue ire tabo ölet a Orong iat ma bara ire tabo osten a lelewi kölöme xöbo bala ire rua isik a rorop,

20 bara kaim arixe re öng irabo eöt tua tengen ögarin e mem köbo mangana abalamu re mem kö ina arabaa raxin.

21 Mem me maa bara marabo pet te önga mangana ngas nang i töxödös. Ma kaim bara xö winara xö Orong kalik



mon. Mem me mamaa bara irabo töxödös bölök kö wawara xö nangadi.

<sup>22</sup> Me mem me tile a tönö ire arixe me idu. Mem moxo könönöin ine xöbo mangana lalaa xirip ma moxo perexulen a lelewi xö balana rua isik a rorop, ma lamun na im a balana i lelewi xöba rua rorop, möxösa, ine iri bulus a dinödöm pe ine kölöme re mum.

<sup>23</sup> Me Taitus, ine a ais se e nang i tuu arixe me e xöbo tinörön nang maa bo wewet kaluluonin e mum. Ina nine töde, idu a nine tene tinörön möxö marakörö ne lotu möxöbo lagunon, ma a tinörön te idu i isik a aölelet urungan te Kraiss.

<sup>24</sup> Io nang, mum morobo osen urungan te idiet bara a mamaa re mum i turunon. Me mum morobo osen urungan te idiet bölök a unine nang mem me ölet e mum. I deek bara mum morobo talien bira lamun bara a marakörö ne lotu möxöbo lagunon tabo maras ulamun e mum.

## 9

### *Abo Korin tabo lasan tua isik a arabaa raxin*

<sup>1</sup> Me e kobo sasaxan bara arabo gegeet urungan te mum lamun inabo tinörön ne rorop urungan kö nangadi runon te God ro Judeia,

<sup>2</sup> möxösa, e ösöxö sik a lelewi möxöbo bala mum rua isik kebo rorop. Xöbo tininge re e arixe ma abo Masedonia e bo ölölet e mum kö ina laa. Urulo iat kö awat nang iri saxit, e bo rengrengen te idi bara mum po Akaiia mum mo tagur sik kua arabaa. Ma a lelewi möxö to re mum bira iri öxaxat a oleleng ke idi bara tabo erabaa bölök.

<sup>3</sup> Ma lamun e mamaa ra ritile ina narun ne tönö ire rua osen bara a tatalien ne ölölet e mum lamun inabo lalaa kaim bara a tininge tataun ine. Me e tile bölök idiet bara mum morobo tagur sik xarnang e xo tengen.

<sup>4</sup> Ma nang bara dauleng me Masedonia tabo wanot arixe me e, ma nang idi tabo pere bere mum kobo tagur, mem marabo menge bere mem moxo bulus a dinödöm pe mem pingan te mum, ma lamun turunon saxit mum morobo menge saban arixe belek im.

<sup>5</sup> Io nang, e dökömen bara e rabo mana tile a narun ne töde rua uxileng ösila e mum pua tagure ösila a arabaa raxin te mum nang mum moxoro kubus sik ulamunon. Io nang, nang e rabo wanot, ina arabaa raxin te mum irabo tagur sik. I deek bara mum morobo erabaa, möxösa, mum mo maa bara mum morobo pet bira, ma kaim bara morobo isik arixe ma bala kinadik.

<sup>6</sup> Me mum morobo dödöm ulamun ina na, bere ewe a öng i sulo aulik, irabo kin aulik, me ewe a öng nang i sulo a oleleng, irabo kin a oleleng.

<sup>7</sup> Öngöng iat irabo erabaa ma lasanene i dökömen kö balna bara irabo isik. Ine i bele erabaa ma bala kadik, ma dauleng tebele sunen ine, möxösa, e God ibo maaaa xö öng nang i erabaa ma axanan.

<sup>8</sup> Me God i eöt tua tabaa e mum ma inemarse raxin te ine xö oleleng ne mangana lalaa, bara mum korobo sasaxan kö inabo lalaa xirip kö bungbung kirip. Ma irabo tabaa e mum biringan lamun mum morobo o xöbo mangana tatalien deek kirip,

<sup>9</sup> xarnang a tinenge xö God idi toxo geet i tengen bira:  
*"Ina mangana tödi ibo isik a oleleng ne arabaa urungan köbo maris.*

*A töxödösine kinis se ine irabo kis ulorexe."*

<sup>10</sup> God ewe nang ibo isik abo irine iaa urungan köbo tene susulo, ma ibo isik abo nien möxö enen, ine bölök irabo isik ma irabo öraxin abo irine iaa re mum rua susulo, me ine irabo öraxin abo pasuno möxöbo töxödös ne to re mum.

<sup>11</sup> Me ine irabo isik a kinis ne asuono orong ke mum köbo lalaa xirip, bara mum morobo tabaa sösöxöin abo duöng kabise. Ma a nangadi tabo tengen deek urungan te God ulamun abo arabaa nang idi te kip lo mera xalik e mem.

<sup>12</sup> I turunon bara ina tinörön ne rorop niang mum mo pet i öxawam abo sasaxan möxö nangadi runon te God, ma lamun kaim bara ina na xalik. I xarnang önga marna ari nang i tamalinge sik kö oleleng, io nang, idi te tengen deek urungan kö God.

<sup>13</sup> Ina tinörön ne rorop nang mum mo pet irabo osen ömaras bara a mangana nangadi sa e mum, ma a oleleng tabo ölet e God, möxösa, mum mo tame abo lalaa eöt ma tinenge deek ke Krai, ina tinenge deek nang mum bo rengreng bara mum mo mumuu ine. Me idi tabo ölet e God bölök, möxösa, mum mo lasan köba rua isik a arabaa raxin urungan te idi ma xö nangadi xabise bölök.

<sup>14</sup> Me idi tobo seseseng kua gene mum arixe ma abalamu raxin, möxösa, God ixo tabaa e mum arixe ma inemarse nang i taxin köba saxit.

<sup>15</sup> Ire te tengen deek uruso re God lamun a arabaa re ine nang a lak deek saxit me ire tekebeöt tua winörö ulamunon!

## 10

*Pol ixo balu idi ewe nang toxo bulus ösu ine*

<sup>1</sup> E, e Pol, ewe idi toxo tengen bara a malusine tödi nang e kis arixe me mum, ma lamun idi te tengen e bölök bara

a tene balawapat nang e kis kö palaa, e maaa ra osen e mum ma önga lalaa. Xarnang önga malusine tödi ewe nang i bulus ösu ine iat xarnang e Kraiss ixo talien bie,

<sup>2</sup> e maa ra osen e mum bere mum korobo nuu sik ke e rua talien xarnang a tene balawapat nang e rabo wanot. I turunon bere e ösöxö bara i eöt te e rua balawapat kaluluonin e mum ma i eöt bere e rabo balawapat bira ulamun idi a uleng ewe te döxömen bere mem bo talien xarnang a öxöno lagunon i kis bie, ma lamun e seng e mum bara mum korobo sunen e rua talien bie.

<sup>3</sup> A turunon bere mem bo to sik kölöme xö öxöno lagunon, ma lamun e mem kaim kö inarse xarnang a öxöno lagunon ibo wewet bie.

<sup>4</sup> Abo lalaa möxö inarse nang mem bo erse min i kobo eöt arixe mabo lalaa idi tobo erse arixe min ta xö öxöno lagunon. Abo lalaa re mem moxo inarse, nangen a lölös könan meriso xö God tua wöwörök ögarin a bölö nang idi toxo bebee wi sik e mem min.

<sup>5</sup> Mem bo reree ösu ögarin abo mangana dinödöm ne aölolot nang i maaa ra ruruu wi a nangadi bara idi tebele ösöxö e God. Mem bo xuxut dik abo dinödöm kirip pe mem, io nang, kö inabo dinödöm tabo tame e Kraiss.

<sup>6</sup> Mem me tagur sik kua ömokorot abo mangana tatalien ne tabuno tame tinenge xirip, ma lamun e mem marabo kis xiset e mum ot nang morobo osen bere mum mo tame abo lalaa xirip.

<sup>7</sup> Mum mo pere tataunin sik e. Mum kobo perexulen turunin e. Ma nang bara re öng i ösöxö sik bere ine mere Kraiss, i deek bara irabo dödöm baling bere e mem bölok mere Kraiss xarnang ine.

<sup>8</sup> Ma nang e xo ölolot aulik ulamun a kinis taxin nang God ixo isik ke mem pua ölölös ödeek e mum ma kaim bara rö mem pua ögarin e mum, io, e karabo menge xönan.

<sup>9</sup> Mum bele döxömen bere e maaa rua ubuut e mum arixe mabo ginigeet te e urungan tö mum.

<sup>10</sup> Me e tengen bira, möxösa, idi te tengen bara, "Abo ginigeet te ine i tiip ma i lölös, ma lamun nang mem me pere ine i kobo lölös ma abo tinenge re ine i laa tataun mon."

<sup>11</sup> I deek bara önga mangana tödi bira irabo döxömen ödeek bara a lasanene nang mem me tengen kölöme xöbo ginigeet te mem nang mem me kis kö palaa xalik e mum, io, mem marabo pet bie bölok nang mem me kis arixe me mum.

<sup>12</sup> Mem bo bubuut tua eörin e mem ma uleng nang te tengen bere idi te deek. I kebeöt bere mem marabo tengen bere mem me eöt deek arixe me idi. Nang idi te eörin idi iat

baling ma te perexulen öbaling idi xöbo to iat te idi, kaim arixe idi mere nanase.

<sup>13</sup> Ma lamun e mem, abo aölolot te mem i kobo saxit abo xönö möxö tinörön nang God iri petpuo sik kö mem. Kaim. Mem marabo ölolot kalik mon ulamun abo lalaa meringan kaluluonin abo xönö re mem, me mum bölök meringan kölöme xö ina xönö.

<sup>14</sup> A aölolot te mem i kobo saxit a wapang möxö tinörön te mem. A aölolot te mem ixere saxit ina wapang nang bara mem kaim kö nuan urungan te mum. Ma lamun kaim, möxösa, mem moxo arun tua nuan arixe ma tinenge deek ke Kraiss ot tingan kaluluonin e mum.

<sup>15</sup> Me mem kaim kö ölolot öbaling iat e mem kö tinörön nang kö dauleng kabise, io nang, mem kaim kö nuan lexe a wapang möxö tinörön te mem. Mem moxo xixiset arixe ma nunu bere mum morobo das deek köbo lalaa mum mo nunu xönan, io nang, abo tinörön te mem kaluluonin e mum irabo taxin saxit,

<sup>16</sup> bere mem marabo eöt tua palas tinenge arixe ma tinenge deek kölöme xöbo lagunon nang melamuin e mum, möxösa, mem kobo maaa bere mem marabo ölolot öbaling e mem ulamun abo tinörön nang a dauleng kabise toxo pet kölöme xö boxönö re idi.

<sup>17</sup> Ma lamun, *“Ewenene nang i maaa rua ölolot, ine irabo mana ölolot ulamun e Orong.”*

<sup>18</sup> Ire tabo pet bira, möxösa, a Orong i karabo perexulen te öng bara i deek nang bara ina tödi mon irabo tengen iat baling ke ine bere i deek. Kaim. Inexalik bara ina tödi ewe a Orong i tengen bara i deek, io, ina tödi i deek.

## 11

### *Pol mabo aposol röxröxö*

<sup>1</sup> E maaa bere mum morobo ömaraxen lo mon e nang e talien aulik xarnang a baulang,

<sup>2</sup> möxösa, mum mere God kalik mon, me e rabo bala laie nang bara mum morobo muu re öng kabise. E xo isik pi e mum pua önga usuono e mum mon, me ine e Kraiss iat, lamun e rabo eöt tua isik tewe e mum pe ine xarnang a önga une madakdak ewe nang i kela maru bang mere tödi.

<sup>3</sup> Ma lamun e buut bere mum morobo tawes kalik a talien madakdak ke mum möxö mumuu e Kraiss ma turunon. E buut bara abo dinödöm pe mum irabo tawes bira xarnang e Iwa ewe nang a si ixo lamus töxö lo ine ma tatalien melem pe ine.

<sup>4</sup> E tengen bira, möxösa, mum mo tagur sik kua ömaraxen lo a lasanene önga tödi irabo töngösen e mum. Kaim pe laa

nang bara re öng i wanot pösöt e mum ma i palas tinenge re mum ulamun önga Jisas i xabise xö Jisas nang mem moxo töngösen e mum ulamunon. Xarnang bölök, mum mo axanan tua xikip lo a mangana dinödöm nang i xabise sik kö dinödöm nang mum moxo kip lo xalik a Töxödös ne Tanono. Xarnang bölök mum mo tagur sik kua xikip lo a tinenge xabise xalik a tinenge deek mum moxo kip lo.

<sup>5</sup> Ma lamun e döxömen bara a kinis ne aposol te e i kobo xö pu aulik ke idi nang a dauleng ne nangadi te tengen bara idi abo aposol rataxin.

<sup>6</sup> I turunon gut bara e kobo deek köba rua tinenge, ma lamun e ma nanase. Ma xöbo mangana lalaa xirip e xo pet, i osen ömaras e mum bara ina na i turunon.

<sup>7</sup> E koxobo seng e mum bere mum morobo kun e mere önga laa nang e xo etöngösen ma tinenge xö God urungan tö mum. Kaim. E xo bulus ösu öbaling iat e bere mum morobo kip lo a kinis taxin. Bara bule, e xo pet te sasaban nang bara e xo pet bira?

<sup>8</sup> Nang e xo rörörön kaluluonin e mum, a marakörö ne lotu möxö dauleng ne lagunon kabise toxo kun e. I xarnang bara e xo wuwulo meringan kalik idi rua ödeek e mum.

<sup>9</sup> Ma nang e xo kis kaluluonin e mum me e xo sasaxan lamun önga laa, e koxobo öxadik ke öng mere mum, möxösa, a dauleng möxöbo töke ewe nang toxo ot me Masedonia toxo pet eörin abo sasaxan te e. E kaim kö öriip e mum mere tiip mesila me e karabo pet bölök melamu.

<sup>10</sup> Ma nang bara i turunon bara a turunon te Krai i kis kölöme re e, io, i turunon bölök bara kaim pe öng irabo eöt tua wewet tewe e xalik inabo aölolot te e ulamun ina tatalien te e ra xö xönö me Akaia.

<sup>11</sup> Rösa e tengen bira? Möxösa e kobo maa lamun e mum? Kaim. God i ösöxö sik bara e mamaa rö mum.

<sup>12</sup> A dauleng ke idi te eölolot bara te eöt arixe me mem. Me idi te maa bere mum morobo perexulen idi bara te eöt bira. Ma lamun a ngas nang e bo mumuu na, e rabo wewet xarna na lamun e karabo tabaa idi mere maop rue mum pua werwere xulen idi bere mem me eöt me idi.

<sup>13</sup> Ma ina mangana nangadi na kaim bere idi abo aposol turunon. Idi tobo etöxö xöbo tinörön te idi, me idi tobo eönunu xarnang bara idi abo aposol te Krai.

<sup>14</sup> Ma ganim pua winiwus bere idi te talien bira. Satan iat bölök ibo eönunu bere ine a önga angelo möxö maras.

<sup>15</sup> Io nang, i kobola ne auwuwus nang bara abo tultul te ine te eönunu bara idi abo tultul möxö tatalien töxödös. Melamu im idi tabo kip abo inone eöt ma abo tatalien te idi.

*Pol ixo eölolot ulamun abo tiip pe ine*

16 E tengen öbaling bara ganim pe öng i döxömen bere e a önga baulang. Ma lamun nang bere mum mo döxömen bere e a önga baulang, i deek bere mum morobo ömaraxen lo e xarnang bere mum morobo öbala lo önga baulang, io nang, arabo eölolot aulik.

17 Nang e eölolot bira ulamun abo lalaa e ösöxö sik bara i turunon, e kobo wöwörö eöt ma nang a Orong iri tile e bara arabo wöwörö bie, ma lamun e wöwörö xarnang a baulang.

18 Oleleng idi te eölolot eöt ma tatalien möxö aölolot möxö öxöno lagunon, io nang, e bölök, e rabo eölolot.

19 Ruasa, möxösa, mum mo axanan tua ömaraxen abo baulang bara idi tabo tenge rö mum, möxösa, mum mo döxömen bara mo nanase xöba!

20 Ma i eöt bara e rabo tenge bira, möxösa, mum moxobo ömaraxen ewe a öng nang i kure ölöls e mum ma i en ömene e mum ma nang bara i ömamang e mum ma nang bara i öraxin öbaling ine ma nang bara i wasa abo piniene mum.

21 Maris, e minge nang e tengen bara abo löls se mem i kobo eöt bara mem marabo pet bira rö mum!\*

Nang bara ewe re öng i kobo buut tua aölolot lamun te önga lalaa, e bölök e kobo buut tua aölolot bie. Ai! E rengrenge xarnang önga baulang nang e tengen bira.

22 Idi abo Ibru? E bölök a Ibru. Idi möxö marapun te Israel? E bölök. Ma bara idi abo tubuno e Abaram? E bölök a tubuno e Abaram.

23 Bule, idi abo tultul te Krais? (Maris, e ösöxö bara a lalaa nang e maaaa ra rengrenge irabo tam xarnang arixe a tinenge xö önga baulang), ma lamun i turunon bara xö kinis ne tene tinörön te e, e sila sik ke idi xirip. E sila sik ke idi xöbo tinörön löls. Abo axana bung nang e xo kis kölöme xö gunon ne aömokorot i oleleng sik ke idi. A oleleng ne axana bung nang idi toxobo sese e. Me e xobo lörörö rua minet.

24 A pitnö ne axana dangdangat abo Judeia toxo dangat e. Ma nang idi toxo dangat e bira, a narun ne sangaun ma pitnö ma nit ne dangdangat kö önga axan.

25 Ma narun ne axan idi toxo paxat e ma buso, ma önga axan toxo gulum e, ma narun ne axan e xo iuo arixe ma mon tö xö rasi. Önga bung kudun, xö xaken ma dömön bölök, e xo böxö ringan kö luono rasi.

\* 11:21 Pol ixo eösaxit mon, möxösa, i wawara bara abo Korin toxo maaaa bara abo tene eusu re idi tabo pet te sasaban urungan te idi. Pol ixo tengen bara i koxobo maaaa rua ögarin idi bira.

<sup>26</sup> E xobo mumuu sösöxöin abo ngas ömat. Ixobo lörörö bara arabo iuo kölöme xöbo ari, ma xöbo limine a nangadi saban, me idi bölök möxö marapun te e me Israel, me idi bölök nang kaim bara abo Israel. Ixobo lörörö bara arabo iuo ringan köbo lagunon rataxin, ma ringan bölök kö xönö tataun. E xo lörörö ra inot kö iuiuo ro xö rasi ma xöbo limine idi nang toxo röxröxö bara idi abo töke kölöme re Kraiss.

<sup>27</sup> E xo rörön köba me e xo örasen abo lölösine tiip. Ma oleleng ne axan e xobo balan, e kara kip pinaliso deek. E ösöxö sik a kinis ne irilöng ma a minauu bölök. Oleleng ne axan e xobo to tataun ma kaim a nien. E xo örasen a madot ma kaim a man.

<sup>28</sup> Ma uleng ne lalaa xabise bölök i eöt bara arabo töngösen e mum ulamunon, ma lamun önga laa xöbo bung öngöng, e xobo örasen abo tiip pe idi xirip a nangadi ne lotu möxöbo lagunon nang e xo dödöm köba ulamun idi.

<sup>29</sup> Nang bara a to xö öng i kobo lölös, i xarnang bara a to re e i kobo lölös bölök bie. Ma nang bara idi te silien a öng urungan kö sasaban, i öxadik a balake.

<sup>30</sup> Nang bara arabo mana eölolot, e rabo ölolot ulamun a kinis se e nang kaim e mere lölös ulamunon.

<sup>31</sup> A God ma a Tata re Jisas, a Orong, ewe nang tabo ölet ulorexe, i ösöxö bara e kobo röxröxö.

<sup>32</sup> Ro Damaskas a sisila raxin, ewe nang ixo xö pu sik ke king Aretas, ine ixo erile bara tabo balaure wi abo marna ngas möxö lagunon taxin tua rörön dik e.

<sup>33</sup> Ma lamun idi toxo tön ösu e xö önga kölöt taxin meriso xö mara xö bölö möxö lagunon taxin. Io nang, e xo ulo rup kalik ine.

## 12

### *A lölös meringan kö Orong*

<sup>1</sup> E rabo mana eölolot bira. Me e rabo rengrenge ulamun abo lalaa nang a Orong ixo osen sik ke e, inexalik a tinenge ne aölolot ulamun inabo winawara i karabo top ire.

<sup>2</sup> Me e ösöxö a tödi mere Kraiss ewe God ixo kip lo urungan kö narun ne xönö kubu xö sangaun ma nit ne awat nang ixo kawam. Nang bara a tödi ixo wan kaa arixe ma aine, bara a tanono ixo wan kalik a aine, e kobo ösöxö, inexalik God i ösöxö sik.

<sup>3-4</sup> Ma turunon, e ösöxö bere God ixo kip lo ina tödi urungan kö lagunon deek. Ma lamun e kobo ösöxö bara ixo wan arixe ma aine bara tanono ixo wan kalik a aine. God i ösöxö. Ma tödi ixo ölangen abo lalaa niang kaim pua eöt kere öng kua tinenge ulamunon. A tumarang bara i karabo wöwörö ulamun inabo lalaa.

<sup>5</sup> Me e rabo ölolot ina mangana tödi na, inexalik e karabo ölolot iat e, ma lamun i turunon belek bara arabu ölolot e bara kaim e mere lölös.

<sup>6</sup> Ma lamun nang bere e xebe maaaa rua ölolot, e karabo talien xarnang a baulang, möxösa, e xebe tengen a turunon. Ma lamun e mölök bara arabu eölolot, xalik a öng i döxömen öraxin köbanin e ma i karabo perexulen e eöt mabo lalaa e pet bere e tengen.

<sup>7</sup> Ma lamun God ixo tabaa e ma önga laa rua ögarin e, xarnang bere ine a önga gargaras i gogo a lewene aike, me ine a tultul mere Satan, ewe God ixo öbala sik ine re e bara irabo isik a kinadik me God ixo isik kua öxadik e bere e bele döxömen öraxin öbaling e ulamun ina laa raxin saxit God ixoro öwösö sik kö e.

<sup>8</sup> Narun ne axana bung e xo seng a Orong bara irabo kip tewe ina laa.

<sup>9</sup> Ma lamun ixo tengen te e bara, "A abalamu nang e isik tataunin, iri eöt tua wewet eörin abo sasaxan te nöngön, möxösa, a lölös se e ibo ölölös köbanin a öng nang bara kaim ine ma lölös." Io nang, e axanan köba bara arabu ölolot belek bara kaim pe lölös se e, nang a lölös se Kraiss irabo kis se e.

<sup>10</sup> Ma ina a unine bere e axanan bara kaim pe lölös se e, me e axanan bölöök nang idi te tengen ögarin e ma nang abo tiip i öriip e, ma kölöme xöbo eler ma kinis saban. Me e axanan nang arabu örasen a kinadik kua gene e Kraiss, möxösa, kölöme xöbo axana bung kaim e mere lölös, e kip a lölös.

*Pol ixo döxömen köbanin idi*

<sup>11</sup> E re talien xarnang a baulang, inexalik mum mo nuu sik e bara e rabo pet bira. Ma lamun i xebe deek nang bara mum mexebe tibeölet e, möxösa, a kinis ne aposol te e i kobo xö pu aulik kö idi nang te tengen bara abo aposol rataxin, ma kaim pe laa bara e önga tödi tataun.

<sup>12</sup> Nang bara e xo tuu lölös kö ene abo tiniip rataxin, e xo pet abo lalaa rataxin ne auwuwus mabo auxileng lölös. Ma inabo lalaa nang i öturunon önga tödi bara ine a önga aposol.

<sup>13</sup> E xo bulus ösu e mum bule rö idi a marakörö ne lotu xabise? Kaim, ma lamun i turunon belek bara e koxobo öriip e mum ma re tiip. Maris, mum morobo döxömen taun ina sasaban e xo pet tö mum.\*

<sup>14</sup> Ma na im e tagur tua uxileng e mum kö sese önarun ne axan, me e karabo öriip e mum arixe mere tiip, möxösa, e kobo maa rua xikip abo lalaa re mum. Kaim. E maa

\* 12:13 Pol ixo ösaxit mon. I wawara bara abo Korin toxo maaaa bara abo tene ausu re idi tabo öriip abo to re idi.



lamun e mum. Ina na i xebe maras sö mum, möxösa, abo baroxorok lixilik idi tekara tabaa abo tamana idi. Ma lamun abo tamana idi tobo tabaa abo baroxorok ke idi.

<sup>15</sup> E axanan tua isik tewe xirip abo lalaa re e ma to xirip pe e bölök kua gene e mum. Nang bara e maa xöba rö mum bira, bule, irabo engin ölik bölök abo maaaa re mum ura re e?

<sup>16</sup> Ma dauleng ke mum, toxo tengen ulamun e bara, “A turunon, kaim pua öriip ire arixe mere tiip. Inexalik a tödi melem ine, ma ixo uxun ire arixe ma abo atöxö!”

<sup>17</sup> Bule, a nangadi nang e xo tile urungan te mum, idi toxo talien xarnang abo duöng lön ma toxo ösek abo lalaa re mum? Kaim.

<sup>18</sup> Me e xo öxaxat e Taitus bere ine irabo wan urungan te mum, me e xo tile a töde arixe me ine. Bule, Taitus ixo talien xarnang önga tödi lön kaluluonin e mum? Kaim. Mum mo ösöxö bere maa moxo tuu mon arixe xö önga dinödöm mabo tatalien te maa ixo önga maxan mon.

<sup>19</sup> Ma nang e mum moxo kos ina tinenge, mum moxo döxömen bara mem moxo tuu ulamun a warkurai kö mamaran te mum rua tinuu wi abo tinenge saban ura rö mem? Ma lamun kaim. Ma nang mem moxo tengen bira, mem moxo tuu xö wawara xö God ma kölöme xö kinis se mem kölöme re Kraiss. Ma abo ais deek ke e, abo lalaa xirip mem me pet, mem me pet tua ölöös e mum.

<sup>20</sup> E buut bara arabo ot ma arabo pere e mum bara mum kobo eöt ma nang e maaaa bie. Me e buut bölök bere mum morobo pere e bara e kobo eöt ma nang mum mo maaaa bie. E buut bara rebo agot kaluluonin e mum, ma rebo bala kadik, ma rebo bala laie, ma kaim pe tinuu arixe kaluluonin e mum, ma a magingin möxö a tengen suxume ma ögarin a öng kabise. E buut bara re dauleng ke idi tabo wewet öraxin idi, ma kaim pe tinam deek kaluluonin e mum.

<sup>21</sup> E buut bara a God te e irabo bulus ösu e xö mamaran te mum kö axana bung nang e rabo wan urungan baling ke mum. E buut bara arabo ot ta werwere a oleleng mere mum ewe mum moxo pet a uleng ne tatalien sasaban sila me mum koxobo dödüm puxus kalik abo tatalien biling, a tatalien möxö minaru ma öng kabise, mabo tatalien ne bala ilawa. E buut bara arabo pere e mum bira me e rabo tapunuk ma arabo gee wönö e mum.

## 13

### *Abo ötumarang*

<sup>1</sup> Na im a sese önarun ne axan arabo ot tua uxileng e mum. E rabo pet bira eöt mabo tinenge re God idi toxo geet

i tengen bara, *“Ire tobo kip a ninöng bara narun ne tinenge maras sua öturunon a laa.”*

<sup>2</sup> Xö sese öninöng ne auxileng ke e, e xoro isik a aötumarang urungan te mum. Ma na e kis kö palaa xalik e mum, ma lamun e maa ra ötumarang öbaling e mum bira nang arabu baling urungan te mum. Nang arabu wanot, arabu ömokorot ewe idi toxo pet tatalien saban mesila me idi abo duöng kabise bölök,

<sup>3</sup> möxösa, mum mo maa bara arabu öturunon bere Kraismon a öng i wöwörö rö mum mera kölöme re e. Ine i kobo meles nang i rörön tingan kaluluonin e mum. Kaim. I lölös kaluluonin e mum.

<sup>4</sup> I turunon, idi toxo tut e Jisas singan kö öxöno sölöxöröp nang kaim ine mere lölös. Ma lamun i to xö lölös kö God. Xarnang bölök, kölöme re Kraiskaim e mem mere lölös. Ma lamun mem me to arixe me ine, möxösa, mem ma lölös kö God. Me mem marabu örasen ina lölös nang mem marabu pet ot a tinörön kaluluonin e mum.

<sup>5</sup> Mum morobo pere muu öbaling e mum pua ösöxö baramum mo kisisik kö inabo lalaa ire te nunu xönan. Go, mum moro könönöin e mum. Bule, mum kobo perexulen bere e Kraisi kis kölöme re mum? Ma lamun nang baramum mo könönöin e mum ma i wawara barakaim pe nunu, io, i osen bere Kraisi Jisasi kobo kis kölöme re mum.

<sup>6</sup> Me e nunu nang bere mum morobo könönöin e mem, mum morobo perexulen bere Kraiskölöme re mem.

<sup>7</sup> Mem me seseseng uruso xö God bere mum mo korobopet te sasaban. Mem kobo seseseng bira rua osen bere mem mere tuu lölös köbo ölelewen. Kaim. Mem me seseseng bira urö mum pua wewet a niang i töxödös, ma a laa tataun mon nang bara i wawara bere mem mere subu.

<sup>8</sup> Ma lamun e mem kobo eöt bara mem marabu pet te laa rua öbulubun tewe a turunon. Kaim. Mem me tuu rua gene a turunon.

<sup>9</sup> Mem me axanan nang mum ma lölös ma lamun kaim e mem mere lölös. Me mem me seseseng uruso lömö baramum morobo wanot töxödös baling.

<sup>10</sup> Ma ina na a unine bere e geet inabo lalaa nang e kis kö palaa xalik e mum, möxösa, nang e rabu wan urungan te mum e kobo maa bara arabu isik ke lölös ne ömokorot urungan tö mum eöt ma a kinis möxö pet warkurai te e. A Orong ixo isik ina kinis ne warkurai ura re e bara arabu ölölös e mum, ma kaim bara rua ögarin e mum.

<sup>11</sup> Abo töke kölöme re Kraisi, e maa rua öxöwam im aboginigeet te e. Mum morobo mana ötöxödös öbaling e mum iat ma morobo ömaraxen lo abo tinenge ne aöxaxat te e, me mum morobo tuu arixe ma önga dinödöm me mum morobo

kis ma malum. Ma a God nang ibo isik a abalamu ma malum irabo kis arixe me mum.

<sup>12</sup> Mum morobo öga egilasin e mum ma morobo emum arixe ma tatalien deek.

<sup>13</sup> Ma a nangadi runon kirip pe God te öga lo bölök e mum.

<sup>14</sup> E seseng bere Jisas Krais, a Orong, irabo balamu e mum kirip, ma bere God irabo maa rö mum kirip, ma bara a Töxödös ne Tanono irabo pet e mum bara mum kirip morobo önga bala mum mon.

## A Ginigeet te Pol urungan köbo GALESIA

Pol ixo sulo a lotu möxö xönö mee Galesia (a uleng idi te dōxömen bara xō sisila ne nuan te ine, ma uleng idi te dōxömen bara xō sese öninöng ne nuan te ine). Me ina nangadi nang Galesia idi kaim bara abo Judeia. Idi tokoxobo muu a warkurai te Moses. Kaim. Idi toxo nunu xalik mon te Jisas, me God ixo öro idi. Inexalik melamu im, nang e Pol ixoro wan lo, a uleng ne tene ausu röxröxö idi toxo wan urungan Galesia ma toxo töngösen idi bara i kobo eöt bara re öng irabo kip a to ulorexe nang bara i nunu re Jisas kalik mon. Irabo mana muu bölök abo warkurai te Moses, ma önga warkurai taxin a tatalien möxö kuru lewene aine tödi rua osen bara ine mere God. Ma nang e Pol ixo see lo ina ausu niang, ixo laie ma ixo wuwus bölök bara abo Galesia idi toxo axanan tua ölangen inabo ausu nang i xabise xirip kö atöngösen turunon nang idi toxoro kip lo meringan te Pol (pere e Galesia 1:6-9). Me Pol ixo maaa rua osen te idi bara ina atöngösen deek kalik mon i eöt tua öro idi. Ma ixo osen te idi bara ina atöngösen i turunon, möxösa, God iat ixo pere kos ine bara ine önga aposol ma ixo isik ina tinenge na urungan te ine (1:11-2:10). Ma unine möxö atöngösen deek ma unine ina ginigeet niang bölök i bira, bere **God irabo kure bara öng i töxödös kö wawara re ine nang bara i nunu xalik mon te Jisas, ma kaim bara i muu abo tatalien deek köbo warkurai te Moses (2:16-21)**. E Pol ixo osen bara kaim pe öng irabo eöt tua mumuu abo warkurai te Moses. Io niang, God i maaa bere ire tabo nunu xalik mon xarnang e Abaram ixo nunu, rua nang e God irabo kure bere ire te töxödös ma bara ire tabo langlanga rewe xalik inabo warkurai lölös (3:1-4:31). Ma inexalik i kobo deek bere ire nang tokobo kis kö ene inabo warkurai bara ire tabo pet abo sasaban (5:1-15). Kaim. Xö nunu re ire, tabo langlanga im rua mumuu abo tatalien deek xarnang a Töxödös ne Tanono irabo lamus ire rua tino bie (5:16-26).

<sup>1</sup> E, e Pol, a önga aposol. Ma a nangadi mon idi kaim kö tibe e ma kaim pe öng ka tile e xarnang a aposol, lamun e re kip a kinis ne aposol meringan kalik e Jisas Kraiss me God a Tamana ire ewe nang ixo öraru ine xalik a minet.

<sup>2</sup> Io, e arixe mabo töke kölöme re Kraiss ewe nang idi tobo xisixis arixe me e, mem me geet ina na urungan te mum abo marakörö ne lotu xö boxönö xirip Galesia.

<sup>3</sup> E seseseng bara a abalamu ma malum irabo ot tö mum meriso re God a Tamana ire ma meriso xö Orong e Jisas Kraiss,

<sup>4</sup> ewe nang ixo isik tewe a to re ine ma ixo met tua döxömen taun abo magingin saban te ire ma bara irabo öro ire xalik a magingin saban kinabo axana bung saban na. Ma ixo met bira rua wewet eörin a maaa re Tamana ire e God.

<sup>5</sup> Ire tabo ölet e God ulorexe. Amen.

### *Önga tinenge deek kalik mon angen*

<sup>6</sup> Maris! E wuwus saban bara saxit mon mum mo önan talu ewe nang ixo kuwe e mum. Ma ixo kuwe e mum bule? Ixo tabaa e mum me Kraiss. Saxit mon me mum mo mumuu a tinenge xabise nang idi te tengen bara a tinenge deek.

<sup>7</sup> Lamun kaim bara a tinenge xabise, ine a tinenge deek turunon. Me e tengen mon biringan, möxösa, a dauleng idi te wewet öngangao e mum, me idi te maaa bere idi tabo puxus ögarin a tinenge deek ke Kraiss.

<sup>8</sup> Nang bere mem iat bara önga angelo iat meriso lömö xö balana kubu irabo palas tinenge urungan te mum nang i xabise xö tinenge nang mem moxo palas urungan te mum, e seng e God bara irabo perögat turunonin ine.

<sup>9</sup> Xarnang mem moxo tengen mesila, na e tengen öbaling bira: nang bara ewe a öng i palas tinenge urungan te mum ma tinenge nang i xabise xö tinenge nang mum moxo ömaraxen lo, io, e seng e God bara irabo pet ögarin turunonin ine.

<sup>10</sup> Mum mo döxömen bule? Nang bere e tengen bira, i wawara bara e maaa bere a nangadi tabo ömaraxen lo e? Turunon saxit, kaim! Inexalik e maaa bere God irabo ömaraxen lo e. Bule, i wawara bere e maaa rua wewet öaxanan a nangadi? Kaim arixe. Nang bere e rabo könönöin bang kua wewet öaxanan a nangadi, io, i kebeöt bere e rabo önga tultul kö pu re Kraiss.

### *God iat ixo tibe e Pol*

<sup>11</sup> Abo töke kölöme re Kraiss, e maaa bara mum morobo maras bara tinenge deek nang e xo palas se mum min kaim bara ixo wanot meringan kö önga tödi.

<sup>12</sup> Kaim pe tödi ixo tengen te e, bara ixo usu e min. Inexalik, e Jisas Kraiss ixo öwösö rö e.

<sup>13</sup> Io, mum moxoro ölangen a mangana to nang e xoro kis könän köbo mangana nunu re mem abo Judeia. E xobo wewet ösaban a nangadi möxö lotu re God me e xobo taxada ra ögarin ina lotu.

<sup>14</sup> E xo nanase xöba rö idi a oleleng möxöbo töke ra mumuu ödeek abo tatalien köbo Judeia, me e xo axanan

köba me e xo mamaa xöba rua rarama abo inausu möxöbo untubuno e.

<sup>15</sup> Inexalik God ixo pere kos lo e xö ina abalamu rine mesila xö axana bung a nago ixo kip e, me God ixo kuwe lo e rö ine.

<sup>16</sup> Ma ixo mamaa bara ra öwösö a Barok ke ine kölöme re e, bere e rabo mana palas tinenge kaluluonin idi a nangadi kaim bara abo Judeia. Ma nang e God ixo pet bira e kaim kö xikip pe tinenge maras xalik ke tödi lamun ina atöngösen na.

<sup>17</sup> Me e kaim bölök ka nuan uruso Jerusalem rua werwere idi nang idi toxo kip a kinis ne aposol mesila re e. Lamun e xo saxit uri Arebia me e xo tawuxus baling uruso Damaskas.

<sup>18</sup> Io, narun ne awat ixo saxit me e xo wan kaa uruso Jerusalem rue maa me Pita ra ösöxö xulen e maa. Me e xo kis arixe me ine xö sangaun ma pitnö ne bung mon.

<sup>19</sup> Inexalik bara kaim e ra werwere re öng mere idi abo aposol kabise, xalik mon e Jems a tönö a Orong.

<sup>20</sup> E usugurno na urungan te mum kö wawara xö God bara i koxobo töxö inabo lalaa e geet urungan te mum.

<sup>21</sup> Io, melamu e xo wan lo urungan Siria me Silisia.

<sup>22</sup> Ma abo lotu re Kraiss kö xönö raxin Judeia idi kaim kö ösöxö e. Idi kaim a eöt tua werwere xulen bölök a mamaran te e.

<sup>23</sup> Ma lamun idi tobo sesee mon lamun a tinenge nang i tengen bira: "Ine ewe nang ixo wewet ösaban bang ire, na i palas tinenge lamun a tinenge deek nang ire te nunu xönan. Ma mesila ixo könönöin bara irabo ögarin ina tinenge."

<sup>24</sup> Me idi toxo ölet im e God, möxösa, rö e.

## 2

*Abo aposol kabise idi toxo ömaraxen a palas tinenge re Pol*

<sup>1</sup> Ma sangaun ma nit ne awat melamu maa me Banabas moxo tawuxus baling uruso Jerusalem. Me e xo lamus bölök e Taitus.

<sup>2</sup> Me e xo wan, möxösa, God ixo öwösö rö e bara arabo wan. Me e mabo sisila ne lotu ewe a nangadi tobo döxömen öraxin idi, mem kalik mon moxo kis etok me e xo tengen ömaras idi lamun a tinenge deek nang e xo tenge min kaluluon te idi nang kaim bara abo Judeia. Me e xo dödöm ne binuut, möxösa, e xo kaim pa mamaa bara a tinörön te e mesila ma möxö ina axana bung bölök na, irabo laa tataun.

<sup>3</sup> Me e xo wanot arixe me Taitus. Me Taitus a Grik ine, ewe nang kaim a xurxuru a lewene aine. Ma lamun kaim abo sisila ne lotu ra wewet te tinenge lölös bara tabo kuru a lewene aine rua mumuu a warkurai te Moses.

<sup>4</sup> Ma ina laa na ixo wanot, möxösa, a dauleng nang tobo eönunu bara idi abo Kristien, idi toxo sixem laxa arixe me mem pa werwere bara bule e mem me langlanga xalik inabo mangana warkurai, mem nang mem mere Krajs Jisas. Io, idi toxo maaaa bere idi tabo sidien e mem pua mumuu abo warkurai te Moses.

<sup>5</sup> Ma lamun maa kaim kö ömaraxen lo re ulik ne dinödöm pe idi, möxösa, maa moxo maaaa bara a turunon möxö tininge deek irabo kis arixe me mum.

<sup>6</sup> Ma bule xö inabo sisila ne lotu nang a nangadi tobo dökömen öraxin idi? (Ma bara a mangana kinis bule idi toxoro kip mesila, i kobo öbulubun e. God i karabo ii öraxin te öng nang bara a nangadi mon te dökömen öraxin ine. Kaim.) Io, inabo sisila nang a nangadi tobo dökömen öraxin idi, toxo ömaraxen lo a atöngösen te e. Idi kaim kö maaaa bara tabo puxus tewe re uk tininge re e.

<sup>7</sup> Lamun idi toxo perexulen bere God ixo tabaa e ma tinörön ne palas tininge deek kaluluonin idi ewe nang kaim bara abo Judeia, xarnang ixo tabaa e Pita ma tinörön ne palas tininge kaluluonin abo Judeia.

<sup>8</sup> Me e eöt tua wewet ina tinörön na, möxösa, e God ewe ixo rörörön kölöme xö tinörön te Pita xarnang a aposol urungan kaluluon köbo Judeia, ma ixo rörörön bölök kölöme xö tinörön te e xarnang a aposol urungan kö nangadi nang kaim bara abo Judeia.

<sup>9</sup> E Jems, Pita, me Jon, ewe a nangadi tobo dökömen öraxin idiet bere idiet tobo tön sik a lotu, io, idiet toxo perexulen bere God ixo wadöane e arixe mina tinörön. Io, idiet toxo tön lime arixe me maa me Banabas sua osen bere mem marabo rörörön arixe. Io, idiet toxo maraxa bere maa marabo wan urungan te idi ewe nang kaim bara abo Judeia, ma bere idiet tabo wan urungan köbo Judeia.

<sup>10</sup> Idiet toxo seng e maa bere maa marabo pet mon önga laa. Idiet toxo seseng bere maa marabo dödöm pua rorop abo maris. Ma laa iat nang ixo ot lölös pösöt e, ne niang e xobo wewet.

### *Pol ixo tenge köö e Pita*

<sup>11</sup> Ma lamun nang e Pita ixo wan uruso Entiok, e xo bala kadik me e xo esusuo mine, möxösa, ine ixo pet a laa i kobo deek.

<sup>12</sup> Ma nang a dauleng ne nangadi meringan te Jems kaim bang a inot, e Pita ixo pet a tatalien deek nang ixobo aan arixe me idi ewe idi nang kaim bara abo Judeia. Inexalik bara nang idi toxo wanot, Pita ixo pet a tatalien saban bira: ibo ruruu rewe ma ibo önan pes kalik idi nang idi kaim bara abo Judeia, möxösa, ibo buburin idi nang meringan

te Jems, ewe idi tobo tuu lölös sik kö tatalien möxö kuru lewene aine idi xarnang a warkurai te Moses i tengen.

<sup>13</sup> Mabo Kristien kabise nang idi abo Judeia, idi toxo muu e Pita ma ina tatalien na. Idi arixe me Pita, toxo ösöxö sik bara i deek ka nien arixe me idi nang kaim bara abo Judeia, inexalik idi toxo öngus sua nien arixe me idi. Ma ina sasaban ixo sat öläxa e Banabas, io, ine ixo pet bölök bie.

<sup>14</sup> Inexalik nang bere e xo pere bere idi kaim pa mumuu a ngas töxödös arixe ma turunon möxö tinenge deek, me e xo tengen te Pita xö wawara xö marakörö bere, “Nöngön a Judeia ma lamun nöngön u kobo kis eöt xarnang abo Judeia. Kaim. Nöngön u kis xarnang idi nang kaim bara abo Judeia. Mina na, i kobo töxödös bere nöngön u sidien idi nang kaim bara abo Judeia bere idi tabo kis xarnang abo Judeia.

*Ewe nang i nunu, God irabo kure ine bara i töxödös*

<sup>15</sup> “Ire abo Judeia runon, ma abo untubuno ire abo Judeia bölök. Ire kaim bara möxö bung marapun nang kaim bara abo Judeia nang ire abo Judeia ire tobo rengrengen idi bara a nangadi saban.

<sup>16</sup> Lamun ire bölök abo Judeia, ire te ösöxö bere God irabo kure bara önga tödi i töxödös kö winawara re ine niang bara i nunu mon te Krajs Jisas. I karabo kure re öng bara i töxödös niang bara ibo mumuu abo warkurai te Moses. Kaim. Möxö ina na, ire bölök te nunu re Jisas Krajs bere God irabo kure bere ire te töxödös, a unine xö nunu kölöme re Krajs, ma kaim bara xö tatalien ne muu warkurai te Moses. Io, ire te nunu im, möxösa, ire te ösöxö bere God i karabo kure re öng bara i töxödös niang bara i mumuu abo warkurai te Moses.

<sup>17</sup> Io, ire te maaaa bere God irabo kure ire bara ire te töxödös, möxösa, ire kölöme re Krajs. Nang bara ire te kölöme re Krajs bira, nexalik i ot maras bara ire angen te wewet abo sasaban, ire tabo tengen bule? I wawara bara e Krajs i lamus ire ra wewet a magingin saban? Kaim! Kaim turunon saxit!

<sup>18</sup> Nang bere e xoro bulus ösu ina mangana dinödöm bara abo warkurai te Moses te eöt tua kure bere e töxödös, ma melamu e muu öbaling inabo warkurai bara arabo töxödös, io, e rabo osen bere e a tene lexe warkurai.

<sup>19</sup> Abo warkurai te Moses ixo kure e, me e xo met. E kobo kis baling kö ene lölös möxöbo warkurai bara arabo eöt tua roro rua öaxanan e God. E xoro met arixe me Krajs lömö xö sölöxöröp.

<sup>20</sup> Ma kaim im bere e to sik. Kaim. Krajs i to sik kölöme re e. Ma a mangana to möxö aine e na, e to arixe ma nunu



xö Barok kö God ewe nang ixo mamaa lamun e ma ixo isik tewe a to re ine ma ixo met kelen e.

<sup>21</sup> Nang bere God ixoro eöt tua kure bara öng i töxödös nang bara i mumuu abo warkurai te Moses, i wawara bere Kraiss ixo met tataun mon. Ma lamun ina tinenge re e i kobo wawara bira. Möxö ina na, kaim e ra öös kalik a abalamu re God. Kaim. E tengen bara ire te sasaxan bere ine irabo tabaa tataunin ire arixe ma abalamu.”

### 3

#### *Abo warkurai ma a nunu*

<sup>1</sup> Mum abo Galesia, i xarnang bara re öng iri piörin e mum merebo tinenge, io, mum mo baulang. A atöngösen lamun a minet te Jisas Kraiss lömö xö sölöxöröp ixo ot maras kö winara re mum.

<sup>2</sup> E mamaa ra ösöxö a önga lalaa mon kalik e mum, ma i bira: Bule, mum moxoro kip lo a Töxödös ne Tanono xö mangana ngas sa? Mum moro kip lo ine, möxösa, mum moxobo mumuu abo warkurai te Moses, bara mum moxo kip lo ine nang mum moxo nunu xö ina atöngösen deek nang mum moxo ölangen?

<sup>3</sup> E wuwus bere mum moxo baulang köba bira! A to maxat te mum ixo urulo ma lölös möxö Tanono. Ma i bule belek bere mum mo wewet ödeek arixin abo to re mum ma lölös se mum iat?

<sup>4</sup> Abo laa niang mum moxo örasen, nagut ixo ot pösöt tataunin mon e mum? Kaim. Turunon saxit, a na ma inone.

<sup>5</sup> Bule, God ibo tabaa e mum ma lölös möxö Tanono ma ibo wewet abo lalaa lölös ne auwuwus kaluluonin e mum, möxösa, e mum bo mumuu abo warkurai te Moses? Kaim. Ma lamun, möxösa, mum moxo ölangen a tinenge deek me mum moxo nunu xönan.

<sup>6</sup> I eöt bölökö me Abaram xarnang abo ginigeet te God i tengen, *“Abaram ixo nunu xö God me God ixo perexulen ine bere i töxödös sik kö wawara re ine.”*

<sup>7</sup> Io mina na, i deek bere mum morobo maras bara ewe idi nang te uruoxe a nunu, idi abo tubune Abaram turunon.

<sup>8</sup> Abo tinenge re God idi toxo geet mesila i tengen bere God irabo kure idi nang kaim bara abo Judeia, bere idi te töxödös kö wawara re ine, möxösa, idi te nunu. Io nang, inabo ginigeet nang mesila toxo palas a tinenge deek urungan te Abaram bira: *“Meringan kölöme xö bung marapun te nöngön e rabo wadöane a bung marapun kirip möxö öxöno lagunon.”*

<sup>9</sup> Möxö ina na, i maras im, bere idi nang te nunu, God irabo wadöane idi arixe me Abaram, a tene nunu.

<sup>10</sup> Idi xirip nang tobo mumuu abo warkurai te Moses bere idi tabo eöt tua wanot töxödös kö wawara xö God, idi tabo

iuo saban arixe xö ene aömokorot te God, möxösa, abo tininge re ine idi toxo geet ine i tengen bira, *“Idi xirip ewe nang tekara muu abo warkurai kirip möxö ina ginigeet, idi tabo iuo saban arixe xö ene aömokorot te God.”*

<sup>11</sup> Ma i maras kirip sik bara God i kebeöt ta kure re öng bere i töxödös bara nang i mumuu abo warkurai te Moses. Ma ina na i maras, möxösa, abo tininge re God idi toxo geet i tengen bölök bira, *“Ewenene a öng nang e God i kure bere i töxödös kö wawara re ine, ine xalik mon irabo to, möxösa, i nuu.”*

<sup>12</sup> A tatalien möxö muu warkurai i kebeöt ma tatalien möxö nuu. Kaim. Möxösa abo warkurai te Moses i tengen bara, *“Ewe a öng i muu eörin inabo warkurai, irabo kip a to nang bara i muu runin kirip.”*

<sup>13</sup> Krai i xo kun ölanglanga ire bere ire tekarabo iuo saban kö ene aömokorot nang abo warkurai toxo isik kö ire. Ma i xo eöt bara irabo ölanglanga ire bira, möxösa, i xo sölok ina aömokorot taxin na re ire. Ma na i maras xarnang abo tininge re God idi toxo geet i tengen bira, *“Nang bere idi te sexe re öng lömö xö öxöno iaa, irabo iuo saban kö aömokorot taxin te God.”*

<sup>14</sup> Me Krai Jisas i xo pet bira, bara irabo tabaa idi nang kaim bara abo Judeia ma arabaa nang e God i xo isik ke Abaram, ma nang bere ire xirip te nuu, ire tabo kip lo a Töxödös ne Tanono nang e God i xo kubus sik ke ire.

### *Abo warkurai ma a kunubus*

<sup>15</sup> Abo töke kölöme re Krai, e rabo tengen te tininge ne rorop nang ibo orot köbo bungbung kirip. Ma nang bara ninöng idu te maraxa me idu te kubus tininge ra wewet te laa, kaim pe öng irabo eöt ta walwalas ina xuxubus. I xarnang bölök ina xuxubus nang ke God.

<sup>16</sup> God i xo kubus sik ke Abaram ma xö tubuno melamu. Io, abo tininge nang ke God toxo geet i kobo tengen bere God i xo kubus sik bara *“rua bo tubuno,”* bara oleleng. Kaim. I tengen bere God i xo kubus sik *“kö tubuno,”* bara öng kalik mon, me ine e Krai.

<sup>17</sup> A unine turunon möxö ina tininge re e i bira. God i xo pet mesila a kunubus arixe me Abaram. Ma nit ne mar ma narun ne sangaun ne awat melamu, God i xo isik abo warkurai urungan te Moses. Io, inabo warkurai i kebeöt bara irabo kip tewe a kunubus nang God i xoro pet sik mesila. Kaim. A xuxubus mesila i tuu lölös sik.

<sup>18</sup> Io, ire tabo tengen bule lamun abo lalaa deek nang e God i xo tengen bara irabo tabaa a nangadi re ine min? Nang bara inabo lalaa deek i wanot meringan kölöme xöbo warkurai te Moses, io, i kobo wanot meringan kölöme xö

ina kunubus mesila. Ma lamun God ixoro tabaa manin e Abaram ma inabo lalaa deek meringan kölöme xö ina xuxubus mesila.

<sup>19</sup> Io, ruasa abo warkurai te Moses idi te wanot? A sisila ne kunubus ixoro kis, ma lamun God ixo isik bölök inabo warkurai rua osen bara a mangana tatalien sa i saban. Nang bara kaim ina warkurai, ire tekebeöt ta ösöxö bara a mangana tatalien sa i lexe a warkurai ma i saban. Ma inabo warkurai idi toxo lölös ot kö nuanot möxö tubuno e Abaram, ina tubuno ewe e God ixo pet a kunubus arixe mine. Mabo angelo idi toxo isik tewe inabo warkurai nang ke God urungan kö öng kaluluon, e Moses, me ine belek ixo isik urungan kö nangadi.

<sup>20</sup> Nang bara önga tödi xalik mon i pet önga laa, ine i kobo sasaxan ulamun te tödi rua tinuu kaluluonin a nine lawa. Me God kalik mon ixo isik ina xuxubus.

### *Abo warkurai i lamus ire urungan te Kraiss*

<sup>21</sup> Io, nang bere ire te tenge bira, bule, i wawara bara a warkurai te Moses i eka ögarin abo kunubus se God? Kaim tunon iat! God i koxobo eöt tua kure idi nang toxo muu inabo warkurai bere idi te töxödös, möxösa, God kaim kö isik abo warkurai nang i eöt ta öro a nangadi.

<sup>22</sup> Ma abo tinenge re God idi toxo geet i tengen bara abo magingin saban iri kubus pi a öxöno lagunon kirip ma i kis sik bie. Ruasa? Nang e God irabo tabaa idi ewe idi te nunu arixe minabo lalaa ixoro kubus sö idi. Ma irabo tabaa idi bira, möxösa, idi te nunu iat te Jisas Kraiss.

<sup>23</sup> Mesila nang ina tatalien möxö nunu i koxobo wanot bang, abo warkurai te Moses idi toxo kubus pi ire. Ma inabo warkurai toxo kubus pi ire ot nang a tatalien möxö nunu ixo wanot maras.

<sup>24</sup> Io, abo warkurai idi toxo balaure ire rua lalamus ire urungan te Kraiss sue God bara irabo kure eörin ire bere ire te töxödös nang bere ire tabo nunu.

<sup>25</sup> Ma na abo warkurai idi tokobo balaure öbaling ire, möxösa, a nunu iri wanot.

### *Ire abo barok ke God*

<sup>26-27</sup> Io, mum kirip niang mo nunu, mum a bung barok ke God, möxösa, mum kirip ewenene niang moxo kip baptais kölöme re Kraiss Jisas, i xarnang bere mum mo sige sik e Kraiss.

<sup>28</sup> Abo Judeia arixe me idi nang kaim bara abo Judeia, abo tultul me idi ewe nang tokobo kis kö ene a lölös möxö önga orong, ma tödi bara une, idi xirip te öng kölöme re Kraiss Jisas.

29 Ma nang bere mum nang mere Kraiss, io, mum abo tubuno e Abaram me mum morobo uruoxe abo lalaa i eöt arixe ma xuxubus se God.

## 4

1 Me e rabo rerenge bölök lamun a barok ewe nang irabo kip lo abo lalaa xirip kalik a Tata re ine melamu. A turunon, nang ine i bak lik sik bang, abo lalaa xirip pe ine, ma lamun ine i eöt ma önga tultul.

2 Ma nang ine i bak lik sik, a dauleng ne nangadi idi tobo balaure ine me idi tobo kure ine ot kö axana bung nang a tata re ine ixoro bulus eöt bere idi tebele pet öbaling bira.

3 Ma i xarnang bölök ke ire. Nang ire toxo bak lik sik kö dinödöm pe ire lamun e God, abo lalaa lixilik nang ire te ösöxö lamun ina öxöno lagunon me ire te mumuu, inabo lalaa na ixo kut ölölös ire.

4 Inexalik nang a axana bung ixo kis eöt ma dinödöm pe God, io, ixo tile a Barok kine, a une ixo kip ine. Me ine ixo taxin kaa xö ene warkurai te Moses

5 bara irabo kun ölanglanga idi ewe te kis kö ene inabo warkurai. Me ine ixo pet bira bere Mama irabo kip lo ire urungan te ine xarnang a barok ke ine iat.

6 Io, i turunon bere mum a bung barok ke God. Mina na, God ixoro tile a Tanono Barok ke ine urungan kölöme xö balana ire, ma kinup i ot bira, "Mama, a Mama re e."

7 Möxö ina na, mum kaim bara abo tultul baling im. Kaim. Mum a bung barok ke ine. Me God irabo tabaa e mum mabo lalaa i eöt bere abo barok ke ine tabo kip lo, möxösa, mum a bung barok ke ine iat.

### *A balana e Pol ixo dödöm köba lamun idi abo Galesia*

8 Mesila nang e mum kaim kö ösöxö e God, abo mangana tanono nang kaim bere idi a god tunon, idi toxo kut ölölös e mum.

9 Inexalik bara na, mum mo ösöxö e God. Ma irabo deek gut nang e rabo tengen bere God i ösöxö sik e mum. Io nang, ruasa iat bere mum mo maaaa rua tawuxus baling urungan kö inabo lalaa lixilik nang kaim a lölös ma i kebeöt ta rorop? Mum mo maaaa bere idi tabo kut ölölös öbaling e mum?

10 I maras bere mum bo mumuu ödeek idi abo warkurai möxöbo mangana bung tataxin, abo texe maxat, abo awat ne nien, mabo mangana awat kabise bölök.

11 E bubuut me mum, möxösa, i wawara gut bere e re ösek tataunin abo lölös se e rue mum.

12 Abo töke kölöme re Kraiss, e maaaa xöba ra seseng e mum bara mum morobo ot xarnang e, möxösa, e xo ot

xarnang e mum mesila. Me mum kaim kö wewet te laa saban tö e.

<sup>13</sup> Me mum moro maras bara e xo sila ra palas tinenge arixe ma tinenge deek urungan te mum, möxösa, e xo meset.

<sup>14</sup> Ma i turunon bara a miniset te e i öriip e mum, ma lamun mum kaim kö melentexin e me mum kaim kö öngasin tewe e. Kaim. Mum moxo öbala lo e xarnang bara e a angelo nang ke God, bara i xarnang bere e Krajs Jisas iat.

<sup>15</sup> Mum moxo axanan köba! Inabo axanan te mum im ule? E tengen a turunon, bara mum moxoro eöt ta luluok tewe abo kalait mara mum, io, mum mo xebe isik ke e nang bara mum mo öt sik.

<sup>16</sup> Bule, i wawara bere e wanot xarnang e a iuo re mum möxö e tengen te mum lamun a turunon?

<sup>17</sup> Idi a nangadi nang tobo mumuu abo warkurai te Moses te könönöin tua lalamus e mum urungan te idi arixe ma lölös taxin. Inexalik bere idi te wewet bira, me idi te wewet ina magingin saban. Idi te maaa bere idi tabo tuu wi e mum pa mumuu e mem, io nang, e mum morobo mumuu ölölös idi.

<sup>18</sup> Irabo deek bere mum morobo isik a lölös se mum kö önga laa nang bere ina laa na a lak deek. Me mum morobo mana muu ina mangana dinödöm na xöbo mangana bungbung kirip. Mum moxo pet bira nang e xo kis me mum, ma lamun morobo mana pet bölök bie xö nang e kobo kis me mum.

<sup>19</sup> Abo baroxorok ke e, önga axana bung baling e rabo xarnang a une i maaa rua kip barok. E kip a kinadik taxin lamun e mum, ot nang a tatalien te Krajs irabo das kölöme re mum.

<sup>20</sup> E xo maaa xöba bere e xoro kis arixe me mum na, io nang e rabo eöt ta wuxwuxus a tinenge re e, me e rabo tenge malus urungan te mum bira. Inexalik e ngangao xöba lamun e mum.

### *A nine barok ke Sera ma Egar*

<sup>21</sup> Mum ewe nang mum mo maaa bere mum morobo kis kö ene lölös möxöbo warkurai te Moses, e maaa rua ose e mum ma önga laa. Mum mo maras lamun abo lalaa abo warkurai te Moses te tengen bara kaim? E döxömen bara kaim.

<sup>22</sup> E tengen bira, möxösa, abo ginigeet idi te tengen bere Abaram ine ma nine barok. Öng möxö une tultul ma öng möxö une ewe i langlanga xalik abo tiip nang möxö tultul.

<sup>23</sup> A une tultul ixo kip a barok ke ine xarnang abo une idi tobo xikip barok bie. Ma lamun a barok nang ixo bak ot

möxö une langlanga, ixo wanot, möxösa, e God ixo kubus sik bie.

<sup>24</sup> Io, i öt sik bara ire tabo kip pe önga mangana unine tinenge meriso kölöme möxönan. Ina nine une idu te eöt ma nine kunubus. Önga kunubus meriso xö puot Sinai ma abo barok ke ine abo tultul. Ma ina kunubus, ine e Egar.

<sup>25</sup> Io, Egar i öt ma ina kunubus meriso xö öxöno puot Sinai niso Arebia, ine bölök i eöt arixe ma ina lagunon Jerusalem nixinen. Ruasa? Möxösa Jerusalem arixe mabo barok ke ine, idi abo tultul kö ene warkurai te Moses.

<sup>26</sup> Lamun ina Jerusalem kabise niso i eöt me Sera, ma iri langlanga xalik a tiip möxöbo tultul. Me ine a nago re ire.

<sup>27</sup> Ma a tinenge nang ke God nang idi toxo geet i öturunon ina na nang bere e tengen bira,

*“Nöngön a une tuu,*

*nöngön örobo mana axanan!*

*Ökorobo örasen a kinadik möxö kip barok,*

*lamun örobo mana kup arixe ma axanan.*

*Bara bule, i turunon bara a tödi re nöngön ixoro wan kalik nöngön,*

*lamun abo baroxorok ke nöngön tabo oleleng baling xarna niang idi möxö ina une ewe a tödi re ine nangen i kisisik bang arixe me ine.”*

<sup>28</sup> Io, mum iat abo töke kölöme re Kraiss, mum mu xarnang e Aisak. Mum abo barok ke God, möxösa, e God ixoro kubus sik bira.

<sup>29</sup> Kölöme xina axana bung a barok ewe nang ixo bak ot xarnang abo une tobo xikip barok bie, io, ina barok ixo ögarin a öng ewe nang ixo bak ot arixe ma rorop möxö Töxödös ne Tanono. Ma i öt bölök bie nixinen. A nangadi nang tobo mumuu abo warkurai te Moses tobo ögarin ire.

<sup>30</sup> Lamun abo tinenge re God nang toxo geet i osen bara i karabo bie bölök im. Ma ixo tengen bira, *“Nöngön örobo tile rewe a une tultul arixe ma barok ke ine, möxösa, a barok möxö une tultul i karabo kip pe lalaa möxö tata re idu. Kaim. A barok mon kina une langlanga.”*

<sup>31</sup> Io na im, abo töke kölöme re Kraiss, i maras bara ire kaim bara abo barok kö une tultul. Kaim. Ire abo barok kö ina une langlanga.

## 5

*Ire te langlanga xalik abo warkurai te Moses*

<sup>1</sup> Kraiss ixo ölanglanga ire xalik abo warkurai te Moses lamun ire tabo langlanga im. Möxö ina na, mum morobo mana tuu lölös singan ma ganim e mum pa ömaraxen inabo

warkurai nang tabo kubus oxe öbaling e mum xarnang a tultul.

<sup>2</sup> Mum morobo mana ölangen bang! E, e Pol, eka tengen te mum nang bara mum mo ömaraxen lo re dauleng ka kuru a lewene aine mum eöt ma warkurai te Moses, io, Krai i kebeöt ta kure bara mum mo töxödös kö wawara re ine.

<sup>3</sup> E panak öbaling e mum a öngöng ewe nang e mum moxoro ömaraxen lo idi bara tabo kuru abo lewene aine mum. Nang bara mum morobo pet biringan, mum morobo mana muu abo warkurai kirip pe Moses.

<sup>4</sup> Mum ewe nang mum mo könönöin bara mum morobo muu abo warkurai te Moses bara God irabo kure bara mum mo töxödös kö wawara re ine, io, mum moxoro köröp lo e mum kalik e Krai. Mum moxoro subu xalik abo mangana nangadi ewe nang God i tabaa tataunin idi ma abalamu re ine.

<sup>5</sup> Inexalik kö nunu re ire, ire te xixiset kölöme xö Töxödös ne Tanono bere God irabo kure ire bere ire te töxödös kö wawara re ine. Ma a lasa nang ire te bala malum lamun, ire tabo kip.

<sup>6</sup> I wawara bara e rabo tengen bira, möxösa, nang bere ire te kis kölöme re Krai Jisas, io, irabo laa tataun mon nang bere idi tabo kuru abo lewene aine ire bara nang tokobo kuru. A önga laa mon nang i taxin, a nunu re ire re Krai i pet ire ra ebalamu kaluluonin ire.

<sup>7</sup> Abo to re mum ixo ulo deek. Ewe ixo ruruu wi e mum pa rarame abo turunon nang e God ixoro öwösö re ire?

<sup>8</sup> Ma inabo mangana dinödöm nang irabo ölewen e mum bira, i kobo wanot meriso xalik a öng nang ixo kuwe mum.

<sup>9</sup> I turunon xarnang idi te tengen, "A ulik ne is mon i eöt ta wewet öraxin ina xönö beret kudun."

<sup>10</sup> Lamun e re nunu sik ke mum, möxösa, ire te kis kölöme xö Orong. E nunu bara mum korobo kip a dinödöm kabise ma bara God irabo ömokorot ewenene me idi nang te öngangao e mum bira.

<sup>11</sup> Mum kirip abo töke kölöme re Krai, i maras sik bara e kobola etöngösen bang bara ire tabo kuru a lewene aine a dauleng ke idi, möxösa, abo tene muu warkurai te Moses idi angen te wewet ögarin e. Nang bara ixoro turunon bira, a palas tinenge re e lamun a sölöxöröp pe Krai i karabo gee saban kö ölöngö re idi.

<sup>12</sup> Ma i bule re idi ewe nang te öraru a sasaban kö nunu re mum bira? Nang bara idi te dödöm bara a tatalien möxö kuru lewene aine idi i top idi, io, ganim idi xö xurxuru rewe mon te ulaalik mere idi. Kaim. Idi tabo mana kuru ögarin kirip öbaling idi iat.

<sup>13</sup> Io, mum abo töke kölöme re Kraiss, God ixo kuwe mum bara mum morobo mana langlanga xalik abo warkurai te Moses. Mum mo ösöxö bara mum mo langlanga xö inabo warkurai, ma lamun ganim e mum pa ömaraxen lo ina dinödöm na rua silien e mum pua wewet eörin a lölös mera xö pu kölöme re mum. Kaim. Lamun mum morobo mana top idi arixe ma abalamu kaluluonin e mum iat.

<sup>14</sup> Ma i eöt bere e rabo tengen bira, möxösa, ire tabo pet eörin abo warkurai te Moses kirip nang bere ire tabo tame ina warkurai nang i tengen bira: *“Örobo maaaa lamun a öng kabise xarnang u maaaa lamun nöngön iat.”*

<sup>15</sup> Ma lamun nang bere mum mo eegot ma mo erese kaluluon iat te mum, mum morobo mana balaure ödeek e mum, xalik e mum bo pet ögarin öbaling e mum iat.

*A lölös mera xö pu ma a Tanono*

<sup>16</sup> Io, a unine möxö tinenge re e bira: mum morobo önan arixe ma Töxödös ne Tanono, ma nang bara mum morobo pet bira, io, mum kobo eöt ta wewet eörin abo maaaa möxö lölös mera xö pu kölöme re mum.

<sup>17</sup> Ma irabo ot bira, möxösa, a maaaa möxö lölös mera xö pu kölöme re mum i xabise xirip sik kö maaaa möxö Töxödös ne Tanono. Ma a Tanono irabo maaaa lamun abo lalaa nang i xabise xirip sik kö nang möxö lölös mera xö pu i maaaa. Idu tobo erese iat kaluluonin idu, io niang, mum korobo eöt bere mum morobo wewet eörin abo maaaa deek ke mum.

<sup>18</sup> Inexalik nang bara Tanono i silien e mum, a lölös möxöbo warkurai te Moses i karabo kure e mum.

<sup>19</sup> Io, i maras lamun abo tatalien möxö lölös mera xö pu kölöme re mum me i bira: a magingin saban ne minaru arixe, abo tatalien biling, mabo mangana tatalien bira bölök möxö tabun ne minenge,

<sup>20</sup> a tatalien ne lotu lamun abo perewuo, a tatalien möxö pet piöt, a tatalien ne melentek, abo agot, a bala kadik lamun a laa deek nang a öng kabise i kip, abo bala laie, tatalien ne gumut, a tatalien ne öxesxese, a kinis elixilik kaluluonin e mum,

<sup>21</sup> a tatalien ne neneek a lalaa xö nangadi xabise, tatalien ne ininim baulang, ma dauleng ne tatalien kabise bölök i xarna. E tengen ögele e mum xarnang e xo wewet mesila, bere ewe a öng ibo wewet bira, i kebeöt ta sinölöng kö kingdom kö God.

<sup>22</sup> Lamun abo inone a Töxödös ne Tanono i bira: a maaaa urungan kö nangadi xabise, a axanan, a malum, a balawapat, a abalamu, abo tatalien deek, a tatalien ne turunon,



<sup>23</sup> a tatalien möxö önga tödi i ii ölik ine, ma a tatalien möxö balaure a mamaa re ine iat. Kaim pe warkurai irabo tuu wi inabo tatalien bira.

<sup>24</sup> Idi nang ke Kraiss Jisas, ina lölös mera xö pu kölöme re idi arixe mabo mamaa re ine, idi toxoro taba ine lömö xö sölöxöröp.

<sup>25</sup> Ire tabo mana mumuu a Tanono, möxösa, a Tanono ixo öro ire.

<sup>26</sup> Ganim ire xö ii öraxin öbaling ire. Ganim ire xö angat kaluluonin ire iat. Ma ganim ire xö bala kadik kaluluonin ire iat lamun te lalaa deek kere önga tödi.

## 6

### *Ire tabo mana top ire iat*

<sup>1</sup> Abo töke kölöme re Kraiss, nang bara mum mo ösöxö lo bara re öng mere mum i pet te magingin saban, io, mum ewe nang mo mamaa xöba ra mumuu a Tanono, mum morobo mana top ine bara irabo deek baling. Ma lamun mum morobo mana pet bira xarnang a nangadi tobo ii ölik idi. Me mum morobo mana ebalaure re mum iat, xalik abo magingin saban irabo könönöin e mum ma morobo subu.

<sup>2</sup> Me mum morobo mana esölök mabo tiip kö öngöng kaluluonin e mum iat. Nang bara mum morobo pet bie, mum morobo pet eörin a warkurai te Kraiss.

<sup>3</sup> Io, nang bara öng i döxömen bere ine iat im, ma lamun kawaim, i ömamang öbaling ine iat.

<sup>4</sup> Ma öngöng irabo mana pere muu abo tatalien te ine iat bere idi te deek bara te saban. Nang bere ine irabo pet bira, irabo axanan lamun inabo tatalien deek ke ine. Ganim bara i dödom köba xöbo mangana tatalien kö dauleng kabise.

<sup>5</sup> Ruasa, möxösa, öngöng irabo mana sölök abo tiip pe ine iat.

### *Ire tabo wewet abo tatalien deek*

<sup>6</sup> Nang bara öng i kip a ausu lamun a tingenge re God, irabo mana top ödeek ewe nang i usu ine arixe mabo lalaa deek kirip.

<sup>7</sup> Ganim e mum pa röxröxö öbaling e mum. I kebeöt tö ire ra eösaxit te God. Ruasa, möxösa, a lasa nang a öng i sulo, ine iat irabo kin öxaa öbaling.

<sup>8</sup> Ewe a öng i susulo kölöme xö to re ine i eöt arixe mabo mamaa möxö lölös mera xö pu kölöme re ine, io, irabo kin öxaa öbaling abo lalaa möxö minet meringan kö ina lölös mera xö pu. Lamun ewe a öng nang i susulo kölöme xö to re ine i eöt arixe ma mamaa möxö Töxödös ne Tanono, ma irabo kin öxaa öbaling abo lalaa möxö to ulorexe meringan kö Tanono.

<sup>9</sup> Io, ganim ire ra lönlön tua wewet abo lalaa deek, möxösa, nang bara ire tekobo lönlön kö inabo tatalien deek, a axana bung kingan nang ire tabo kin öxaa a inone a malawang ke ire.

<sup>10</sup> Io na im, nixinen iat bang nang ire te öt sik ka wewet abo dedeek, ire tabo mana wewet biringan kö nangadi xirip. Lamun ire tabo mana pet inabo lalaa raxin deek bira kaluluonin idi mere ire nang te nunu.

*A sölöxöröp ine iat mon a laa raxin*

<sup>11</sup> Io, mum morobo pere abo ginigeet taxin e geet na ma limine e iat.

<sup>12</sup> Idi abo tene muu warkurai te Moses te mamaa rua engin e mum bere mum morobo muu a tatalien ne kuru a lewene aine mum bara abo Judeia tabo ölet idi möxö ina tinörön te idi kaluluon te mum, ma xalik inabo Judeia tabo ögarin idi lamun a nunu re idi xö sölöxöröp pe Kraiss kalik mon.

<sup>13</sup> Idi iat ewe idi te mumuu a warkurai möxö kuru lewene aine a dauleng, idi tekara muu eörin önga bo dauleng ne warkurai te Moses. Ma lamun idi te mamaa bere mum morobo ömaraxen lo a dauleng bere idi tabo kuru abo lewene aine mum nang kö idi ra eölolot nang bere mum morobo muu a warkurai möxö kuru lewene aine mum.

<sup>14</sup> Turunon saxit, e kobo mamaa bara arabö ölolot bira. Inexalik e mamaa bara arabö ölolot kalik mon a sölöxöröp pe Jisas Kraiss, a Orong ke ire. Ringan kö öxöno sölöxöröp e xo met talu abo tatalien möxö öxöno lagunon, ma inabo tatalien idi toxo met tewe xalik e.

<sup>15</sup> Ma nang bere idi te kuru a lewene aine ire bere idi tokobo kuru, a laa tataun mon. Inexalik a laa raxin bere ire a uxixis maxat te God.

<sup>16</sup> Me idi nang te mumuu eörin ina tinenge re e, io, e seng e God bara irabo isik a malum ma a abalamu urungan te idi ma urungan köbo Israel nang ke God.

<sup>17</sup> Io, ganim pe öng bara irabo ögarin öbaling e, möxösa, abo bolon möxö lewene aine e, idi te osen bere e mere Jisas.

<sup>18</sup> Abo töke kölöme re Kraiss, e seseng bara a abalamu re Jisas Kraiss, a Orong ke ire, irabo kis arixe mabo tanono e mum. Amen.

## A Ginigeet te Pol urungan köbo EPESES

Ina ginigeet te Pol na i etöngösen maras mabo mangana warwadöan kölöme re Kraiss ura re ire (1:3-14). Kölöme re Kraiss, God iri pere kos ire (1:4), iri ölon lo ire bara ire tabo barok ke ine (1:5), ma iri kun ölanglanga ire (1:7), iri döxömen taun tewe abo magingin saban te ire (1:7), ma iri tabaa ire ma Töxödös ne Tanono rua isik pi abo lalaa rö ire nang God ixo kubus bara irabo isik kö ire melamu (1:13-14). Me God ixo öro ire bira bara ire tabo ölet ine (1:6, 12, 14). Io nang, e Pol ixo seseng bere ire abo Kristien tabo ösöxö ödeek ina mangana ineöro xö God (1:15-23). Mesila ire toxo kis kö ene abo magingin saban te ire, ma lamun God ixo marse ire (2:1-7), me ewe a öng nang i nunu re Kraiss, God irabo tabaa tataunin ine ma to turunon, ma kaim pe öng irabo eöt tua wewet te laa rua kip lo a ineöro xalik e God (2:8-10). Mesila, ire nang kaim bara abo Judeia, ire toxo palaa xalik e God, ma inexalik kölöme re Kraiss ixo is arixin abo Judeia me idi nang kaim bara abo Judeia me ire önga tödi maxat ta (2:11-3:13). Ina niang a laa raxin saxit ma ixo kis mun sik kö oleleng ne awat (3:3-6), me Pol ixo seseseng bara ire tabo eöt tua ösöxö xulen ina abalamu re Kraiss (3:14-21). Ma bara e God iri öro ire bira, ire tabo mana talien eöt mabo to maxat te ire (4:1-6:20). Ire ta perexulen bara ire önga aine Kraiss kalik mon (4:1-16) me ire tabo mana sige abo to maxat te ire (4:17-32). Ire tabo mana to xö maras (5:1-21) me ire tabo mana pet a dedeek köbo usuono re ire, ma a bung baroxorok ke ire, ma abo nago re ire, ma abo tamana ire, ma abo orong ke ire, ma abo tultul te ire (5:22-6:9). Ma rua öxawam ina tinenge re ine, Pol ixo tengen ölölös bere ire tabo sige abo lalaa deek möxö inarse meruso xö God xarnang önga umri bere ire tabo eöt tua inarese mabo mangana tanono saban me ire tabo eöt tua tinuu lölös kalik abo sasaban (6:10-20). I wawara bara a unine ina ginigeet na i bira, bara **ire abo Kristien ire tabo mana to eöt ma ineöro deek nang e God iri tabaa ire min kölöme re Kraiss**.

<sup>1</sup> E, e Pol, önga aposol te Kraiss Jisas eöt ma maaaa re God. Me e gegeet urungan tö mum abo nangadi runon te God nang Epeses, mum abo tene nunu xö kinis se mum kölöme re Kraiss Jisas.

<sup>2</sup> A abalamu ma malum urungan te mum meriso re God a Tamana ire me Jisas Kraiss, a Orong ke ire.

*Abo lalaa deek kölöme re Krais*

<sup>3</sup> A aölelet urso xö God. Ine a God ma a Tata xö Orong ke ire, Jisas Krais, ewe nang ixo wadöane ire mabo lalaa xirip meriso xö watmaep nang i eöt tua rorop abo tanono ire xö kinis se ire kölöme re Krais.

<sup>4</sup> Me God ixo pere kos ire bölök kö kinis se ire kölöme re Krais mesila iat kö uxixis möxö öxöno lagunon bara ire tabo madakdak me ire tabo kaim pe önga sasaban kö wawara re ine.

<sup>5</sup> God ixoro dödömen mesila bara irabo ölon lo ire bara ire tabo barok ke ine kölöme re Jisas Krais, möxösa, God ixo maaaa xöba ulamun ire. Ma ixo pet bira, möxösa, ixo maaaa ma ixo axanan bölök kua wewet bira,

<sup>6</sup> bara ire tabo ölet ewe nang ixo isik tataunin a abalamu nang a lak mariris urungan te ire xö kinis se ire kölöme xö Barok nang e God ibo maaaa xöba ulamun ine.

<sup>7</sup> God ixo kun ölanglana ire ma dee xö Barok ke ine ma ixo dödömen taun abo sasaban te ire, eöt ma a abalamu re ine nang i taxin köba ma nang ixo tabaa tataunin ire min.

<sup>8</sup> Ina abalamu nang e God ixo isik köbanin tö ire arixe ma abo mangana nanase xirip.

<sup>9</sup> Ma ixo ömaras ire ulamun abo lalaa nang ixo maaaa rua wewet nang ixo mun sik mesila, inabo lalaa nang ixo axanan tua wewet, ma ixo bulus a dinödöm pua wewet kölöme re Krais.

<sup>10</sup> Ma ina dinödöm pe ine i bira: nang bara a axana bung i kis eöt, irabo lamus etok abo lalaa xirip piso xö watmaep ma ra xö pu bölök, bara idi tabo kis kö ene e Krais.

<sup>11</sup> Me God ibo wewet abo lalaa xirip eöt ma a dödömen te ine nang i wanot meringan kölöme xö maaaa re ine. Möxö ina na, xö kinis se ire kölöme re Krais, God ixo pere kos lo ire rua a nangadi runon te ine, möxösa, ixo pere kos sik iat mesila bira, eöt ma dödömen te ine.

<sup>12</sup> Ma ixo pet bira rue ire ewe ire tere xixiset ma nunu xöbo lalaa kölöme re Krais, ire tabo örarik a nangadi rua ölelet e God ulamun a mariris se ine.

<sup>13</sup> Me mum mo kis kölöme re Krais bölök, möxösa, mum moxo ölangen a atöngösen ulamun a turunon, ina atöngösen deek nang i isik ot a ineöro re mum. Ma nang e mum moxo nunu, God ixo isik ke mum a Töxödös ne Tanono rua öturunon bere ire mere ine iat, ma ina Tanono ewe e God ixo xuxubus sik kö ire ulamunon.

<sup>14</sup> Ixo tabaa ire ma Töxödös ne Tanono rua isik pi abo lalaa rö ire nang God ixo kubus bara irabo isik kö ire melamu. Kö ina ngas a Tanono i öturunon bere God irabo unan tunonin ire bere re ine tus iat, ire ewe e God ixoro kun

ölanglanga. Io, ire tabo mana ölet ine ulamun a mariris se ine.

### *A sineseng ke Pol*

<sup>15-16</sup> Ma ina na a unine bara e bo seseseng ulamun e mum. E xo see lo abo nunu re mum kölöme re Jisas a Orong ma abo inemarse ulamun a nangadi tus iat te God. Möxö ina na, ot na e kela mamas sua rengrengen deek urungan te God tua gene mum nang e bo rengrengen e mum kölöme xöbo sineseng ke e.

<sup>17</sup> E bo seseng sösöxöin a Tata raxin te ire, ine a God te Orong ke ire, e Jisas Kraiss, bara irabo tabaa e mum ma a nanase ma irabo osen abo turunon ulamun ine iat tue mum pa ösöxö ödeek ine.

<sup>18</sup> E seseseng bölök bara ine irabo ömaras abo bala mum, rue mum morobo ösöxö abo lalaa nang ixo kuwe e mum pua xikip lo, inabo lalaa nang a lak mariris taxin nang e mum mo xixiset ma nunu ulamunon, nang e mum morobo uruoxe meringan te ine, möxösa, mum a nangadi tus iat te ine.

<sup>19</sup> Me e seseng bara mum morobo örasen bölök a lölös taxin saxit te ine nang ine ibo rörörön min kölöme re ire abo tene nunu. Ina lölös i eöt ma lölös taxin

<sup>20</sup> nang e God ixo rörön min nang ixo öraru öbaling e Kraiss kalik a minet ma ixo isik a kinis se ine xö lime tuun te ine ringan kö watmaep.

<sup>21</sup> Ma kinis se ine i manga taxin köba re idi ewe idi te kip a kinis möxö warkurai me idi abo tene walbalaurai me idi abo tene sisila me idi abo asuono orang bölök. Ma esene i taxin saxit bölök köbo ese xirip na ma xö ina axana bung kabise nang irabo ot melamu.

<sup>22</sup> Me God ixo bulus ösu abo lalaa xirip kö ene xexene Kraiss. Ine a tene sisila raxin köbo lalaa xirip, me God ixo isik ine urungan kö marakörö ne lotu.

<sup>23</sup> Idi a aine Kraiss, me Kraiss ewe nang ibo wewet öxudun abo lalaa xirip, ma ibo öxudun a marakörö ne lotu.

## 2

### *God ixo öro ire arixe me Kraiss*

<sup>1</sup> Me mum moxoro met, möxösa, mum moxo pet a tatalien ne lexe warkurai me mum moxo pet abo magingin saban.

<sup>2</sup> Xö inabo axana bung mum moxo roro muu inabo magingin saban nang mum moxobo mumuu abo tatalien möxö ina öxöno lagunon, me mum moxobo rarama ewe ibo xurxure ma ibo balbalaure a maop niso lömö. Me ine ewe ibo balaure a mangana dinödöm nang i kis na kölöme xöbo tabuno ölöngö.

<sup>3</sup> Me ire xirip, ire toxo to kaluluon te idi abo tene sasaban mesila. Ire toxobo wewet eörin abo maaaa möxö lölös mera xö pu kölöme re ire. Ire toxobo mumuu inabo masixine saban ma inabo dinödöm saban. Xarnang idi xabise, idi tokobo eöt tua nuan pes a laie xö God.

<sup>4</sup> Ma lamun a inemarse xö God i taxin saxit köba wösöt ire me God ixo maaaa xöba re ire.

<sup>5</sup> Möxö ina na, God ixo öro belek ire arixe me Krai nang ire toxoro met köbo tatalien saban te ire. God ixo öro ire ma abalamu re ine niang ixo tabaa tataun ire min.

<sup>6</sup> Me God ixo öraru öbaling ire xalik a minet arixe me Krai ma ixo isik a kinis arixe mine riso xö watmaep, möxösa, ire kölöme re Krai Jisas.

<sup>7</sup> Me ine ixo pet ina na lamun bara xöbo bung melamu saxit God irabo osen bara ina abalamu niang ixo tabaa tataun ire min i taxin köba. Ma ina abalamu, ine niang i wanot maras kölöme köbo lalaa deek niang ixo pet tö ire xö kinis se ire kölöme re Krai.

<sup>8</sup> Ma ina na i maras, möxösa, God iri öro e mum nang mum moxo nunu, ma ixo pet bira xö abalamu re ine niang ixo tabaa tataun e mum min. Me mum koxobo pet ina ineöro. Kaim. Ine a arabaa re God.

<sup>9</sup> Ma ina ineöro i koxobo ot meringan köbo tatalien deek ke mum, bara xalik ke öng irabo ölolot.

<sup>10</sup> Ire abo inone a tinörön te God. Ma xö kinis se ire kölöme re Krai Jisas, God ixo uxis ire bara ire tabo pet a tatalien deek, inabo tatalien niang e God ixoro tagur bere ire tabo pet.

### *Ire xirip a öng mon*

<sup>11</sup> Io, ewe mum nang kaim bara abo Judeia, mum moro ölangen. Abo Judeia ewe idi nang te kuru abo lewene aine idi, idi te tengen e mum bara "Abo tabuno kuru lewene aine e mum." Ina magingin a nangadi mon idi tobo wewet arixe mabo limine idi.

<sup>12</sup> Me mum morobo mana döxömen lo bara xina bung mesila mum moxo kis ebasin tewe xalik e Krai. Ma kaim idi xo maaaa rua kos ölaxa lo e mum kö bung marapun mee Israel. Me mum kaim mere kinis singan köbo xuxubus se God nang ixo pet arixe me Israel. Ma nang mum moxo to ra xö öxöno lagunon, mum koxobo ösöxö arixin te xönö re God, me mum koxobo xixiset ma nunu ulamun te laa deek.

<sup>13</sup> Ma lamun na im kö kinis se mum kölöme re Krai Jisas, ewe mum nang abo mangana to re mum ixo palaa sik mesila, God iri kip örörö lo im e mum ma a dee re Krai,

<sup>14-15</sup> möxösa, Krai iat a malum pe ire. Ine iat ewe ixo bulus arixin abo Judeia me idi nang kaim bara abo Judeia, bara ina ninöng ne muxu ne nangadi tabo öng mon. Ma xö

axana bung nang a aine Jisas ixo taba lömö xö sölöxöröp, ixo irewe abo warkurai te Moses, inabo arile nang ixo isik ot a bala kadik kaluluonin abo Judeia me idi nang kaim bara abo Judeia. Nang ixo pet bira, ixo pörök ösu ina bölö nang ixo palang abo Judeia me idi nang kaim bara abo Judeia, bara irabo isik ot önga nangadi maxat kölöme re ine iat meringan kö ina ninöng ne muxu ne nangadi. Ma nang ixo pet bira, ixo isik ot a malum.

<sup>16</sup> Jisas ixo bulus a nine muxu ne nangadi xö önga lewene aine mon, ma xö öxöno sölöxöröp ixo lamus puxus ina nine muxu ne nangadi bara idi tabo ais arixe me God. Ma xö ina minet te ine ixo öxöwam a bala kadik kaluluonin idi.

<sup>17</sup> Ine ixo wanot ma ixo palas tinenge ma atöngösen deek nang i isik a malum. Ine ixo palas tinenge bira rö mum ewe moxo tuu xö palaa xalik e God ma rö idi bölök ewe toxo lörörö re ine.

<sup>18</sup> Kraiss ine ewe nang ixo sawang a ngas bara ire xirip, abo Judeia me idi nang kaim bara abo Judeia, tabo wan pösöt e Tata re ire, möxösa, ire te kis kölöme xö önga Tanono mon.

<sup>19</sup> Io nang, mum nang kaim bara abo Judeia, mum kobo a nangadi xabise baling im na. Kaim. Mum bölök a nangadi tus iat te God, me mum möxö ina barama re ine.

<sup>20</sup> Mum mo xarnang önga gunon nang e God ixo pet lömö xöbo xösöng. Ma inabo xösöng, idi abo aposol ma abo propet. Me Kraiss Jisas iat, ine ina xösöng taxin ewe nang i tön öxaa sik a gunon kirip.

<sup>21</sup> Ma ina gunon kirip i wasum deek kölöme re Kraiss, ma i ot xarnang önga madakdak ne gunon ne lotu möxö Orong.

<sup>22</sup> Ma xö kinis se mum kölöme re Kraiss, God ibo rörörön me mum bölök nang kaim bara abo Judeia, rua wewet önga gunon te God. Me God, xö Tanono, ibo xisixis kina gunon.

### 3

#### *Pol ixo rörön kaluluonin idi nang kaim bara abo Judeia*

<sup>1</sup> Io niang im, e, e Pol, nang toxo kut dik e ulamun a tinörön te Kraiss Jisas ma rua gene mum nang kaim bara abo Judeia, e seseng ulamun e mum.

<sup>2</sup> A turunon saxit bere mum moxoro ölangen bere God iri tabaa e mina tinörön bara e rabo tabaa e mum ma abalamu re ine, goo?

<sup>3</sup> God ixo osen tö e abo lalaa nang ixo mun sik mesila, bara arabo maras ulamunon, xarnang e xo geet abo dauleng ne xönö tinenge urungan tö mum.

<sup>4</sup> Ma nang mum morobo kos ina na nang e re geet, irabo eöt bere mum morobo perexulen bara e iat e maras

ulamunon abo lalaa nang ixo mun sik mesila ma iri ot maras im kölöme re Kraiss.

<sup>5</sup> God kaim kö ömaras a nangadi mesila ulamun inabo lalaa, inexalik na im a Töxödös ne Tanono iri osen inabo lalaa urungan köbo aposol mabo propet te ine.

<sup>6</sup> Ma abo lalaa nang ixo mun sik, na im iri wanot maras, me ine i bira. Idi ewe kaim bara Judeia, idi tabo kip a xönö re idi eöt arixe mabo Judeia bölök nang bere idi tabo tame a tinenge deek. Me idi tabo eöt bölök arixe mabo Judeia xö önga lewene aine ine. Me idi arixe mabo Judeia, idi xirip tabo kip abo lalaa deek nang God ixo xuxubus se idi ulamunon kölöme re Kraiss Jisas.

<sup>7</sup> Me God ixo tabaa tataunin e arixe ma inemarse re ine nang ine ixo rörön kölöme re e eöt ma lölös se ine rö e rua önga tene tinörön kö ina tinenge deek.

<sup>8</sup> E lik köba xö nangadi xirip pe God, ma lamun God ixo tabaa tataunin mon e arixe mina tinörön deek bara e rabo palas tinenge kaluluonin ewe idi nang kaim bara abo Judeia ulamun a lalaa deek ke Kraiss nang i kexebe eöt bara tabo öt.

<sup>9</sup> Ma ixo pere kos lo e bira, bara e rabo ömaras bölök a nangadi xirip bara God i pet eörin bule a apingit te ine, nang ixo kis mun sik köbo awat mesila ringan iat kölöme re ine ewe ixo uxiss abo lalaa xirip.

<sup>10</sup> Me God ixo isik ina tinörön na rö e bara abo mangana tene warkurai ne angelo ringan kö watmaep tabo pere a marakörö möxö lotu, me idi tabo maras köbo mangana nanase re God.

<sup>11</sup> Mesila xöbo lalaa xirip God ixo pingit bere idi tabo maras bira, me ine iri pet eöt arixe mina apingit te ine kölöme re Kraiss Jisas, a Orong ke ire.

<sup>12</sup> Ma a nunu re ire iri sawang a ngas urungan te God. Me ire tabo wan urungan kö wawara re God ma balawapat ma balamasa, möxösa, ire kölöme re Kraiss.

<sup>13</sup> Io nang, e seng e mum bara mum bele tapunuk ulamun abo mangana kinadik i öxadik e rua gene e mum, möxösa, inabo kinadik irabo isik ot a mariris ne kinis sö mum.

### *A abalamu re Kraiss*

<sup>14</sup> Io, inabo lalaa nang e tengen, a unine bara e subun kexe xö wawara xö Tata

<sup>15</sup> ewe ixo uxiss a bung marapun kirip pingan kö balana kubu ma ra xö öxöno lagunon.

<sup>16</sup> E seng e God bara xö mariris taxin te ine irabo ölölös e mum arixe ma lölös möxö Töxödös ne Tanono re ine kölöme runon te mum,



17 io niang, e Krai irabo kis köbo kat te mum, möxösa, mum bo nunu. E seseng bara abo abalamu re mum irabo tuu lölös sik xarnang önga une iaa i usu buon,

18 bara mum arixe mabo nangadi xirip pe God, mum morobo eöt tua ösöxö xulen a abalamu re Krai bara i taweweng ma i ömat bule, ma i lömö ma i dödöngö bule.

19 Me e seseng bara mum morobo örasen kulen a abalamu re Krai niang i taxin köba xöbo mangana abalamu xirip niang a nangadi idi tabo eöt tua ösöxö xulen. Me e seseng bira, bara mum morobo wöwö eöt mabo lalaa deek niang e God ibo wöwö sik min.

20 Ma a aölelet urungan te God ewe nang i eöt tua wewet te laa nang i taxin köba xöbo lalaa xirip nang ire te seng bara te döxömen. Ma ibo wewet inabo lalaa eöt ma lölös se ine niang ibo rörörön kölöme re ire min.

21 A aölelet ulorexe saxit urungan tö ine meringan kö marakörö ne lotu ma meringan te Krai Jisas. Amen.

## 4

### *Ire möxö lewene aine e Krai*

1 Io niang, e nang toxo kut dik e ulamun a tinörön te e rua gene a Orong, e öxaxat e mum bara mum morobo muu abo mangana tatalien i eöt mabo lalaa nang e God ixo kuwe e mum pua mumuu.

2 Mum morobo mana to xarnang a nangadi ödödö me mum morobo mana bulus ösu öbaling e mum iat. Ma nang a nangadi tobo wewet a sasaban tö mum, mum morobo bala malus, ma morobo öbala lo idi arixe ma abalamu.

3 Mum morobo mana könönöin bere mum morobo tön ölölös sik a tatalien möxö tinuu arixe nang e mum moxo kip lo meringan kalik a Töxödös ne Tanono. Me mum morobo tuu arixe bira bule? Mum morobo mana kis arixe ma malum kaluluonin e mum, ina malum nang i kut arixin e mum bara mum morobo öng mon.

4 Önga aine Krai, ma önga Tanono mon. Ma xarna na bölok, God ixo kuwe e mum bara mum morobo muu önga xixiset mon ulamun abo lalaa deek.

5 A önga Orong, a önga nunu, ma a önga baptais mon.

6 Ma önga God mon, me ine xalik mon a Tamana ire xirip. Ine i taxin saxit te ire xirip, ine ibo rörön kaluluonin ire xirip, me ine iat kölöme re ire xirip.

7 Inexalik Krai ixo tabaa tataunin ire xirip öngöng mabo arabaa eöt mabo mangana arabaa nang iat ixo erabaa min.

8 Ina na i eöt ma tinenge re God toxo geet ine i tengen bira,

*"Nang ine ixo wan kaa uruso lömö,*

*ixo lamus ot a oleleng ne iuo nang ine ixo öxös dik sik idi,*

*me ine ixo isik abo arabaa xö nangadi."*

<sup>9</sup> Ma bara a ginigeet i tengen bira, "Ine ixo wan kaa," io, a unine bara ixo wan su bölök ura xö öxöno lagunon.

<sup>10</sup> Me ine ewe nang ixo wan su, ine iat mon nang ixo wan kaa uruso lömö ma ixo saxit a balna kubu, ma ixo pet bira rua öxudun abo lalaa xirip.

<sup>11</sup> Me ine iat ewe ixo isik abo aposol, abo propet, abo tene palas tinenge, abo tene walbalaurai, ma abo tene ausu

<sup>12</sup> rua tagure a nangadi tus iat te God bara idi tabo pet abo tinörön ne rorop pua nang ire a lewene aine e Kraiss, ire tabo das lölös,

<sup>13</sup> ot bara ire xirip tabo öng mon kölöme xöbo lalaa ire te nunu xönan me ire tabo öng bölök kö nanase re ire ulamun a Barok kö God, ma bara ire tabo maruxo bölök köbo tatalien te ire, inabo tatalien nang i eöt mabo tatalien te Kraiss.

<sup>14</sup> Io, möxö ina na, ire tokobo barok mölöngön baling bara a dalun irabo söwee nanin ire. Ma xarnang bölök, abo tene atöxö tekebeöt tua silien elixilixin ire xöbo ausu re idi xarnang a xiki ibo wawaxat elixilixin abo lalaa. Idi tekebeöt tua lalamus öröxröxö ire arixe mabo nanase melem pe idi urungan köbo xuun te idi.

<sup>15</sup> Ma lamun ire tabo mana isik a abalamu rua nangadi me ire tabo mana wöwörö mabo turunon tue idi. Ma nang ire te talien biringan, ire tabo maruxo eöt me Kraiss, ewe ine a öxöno ire.

<sup>16</sup> Ma xö rorop pe Kraiss, abo wawasum möxö aine, tobo ewasum arixe. Ma abo lölös möxö wawasum tobo töndik sik arixin a lewene aine biringan bara i karabo tamalus. Ma bara abo xönö xirip möxö aine tobo wewet abo tinörön te idi a öngöng iat, io, a lewene aine xirip irabo ot lölös köbo tatalien ne abalamu.

### *Ire tabo sige a to maxat*

<sup>17</sup> Me eka tengen osen e mum. Ma kölöme xö Orong e öxaxat e mum bara mum bele talien baling im xarnang idi nang tekara nunu re God, ewe idi nang te baulang esexere xöbo dinödöm pe idi.

<sup>18</sup> Abo dinödöm pe idi i ködö me idi te taxase rewe xalik a to re God, möxösa, kaim idi mere maras. Me idi tokobo maras, möxö, abo baladi i lölös.

<sup>19</sup> Me idi tekebeöt im pua minenge xö sasaban. Möxö ina na, idi tobo isik sösöxöin idi iat urungan kö magingin ne ilawa rua wewet abo mangana tatalien biling, ma tekara ösöxö rua mamanaa rua wewet bira.

<sup>20</sup> Ma lamun mum belek, nang mum moxo eusu ulamun e Kraiss, mum koxobo eusu xöbo tatalien bira.

<sup>21</sup> A turunon saxit mum moxo ölangen ulamun e Kraiss me mum moxo kip a inausu ulamunon ine eöt mabo turunon nang i kis kölöme re Jisas.

<sup>22</sup> Mum moxo kip a inausu ulamun abo mangana to re mum niang mum moxobo xisixis bie mesila. Mum moxobo eusu bara mum morobo tewe rewe ina to maut niang i eka mamaxus, möxösa, ibo lalamus öröxröxö e mum urungan köbo mamaa saban.

<sup>23</sup> Me mum moxo eusu bölök bara abo dinödöm pe mum irabo maxat,

<sup>24</sup> ma bara mum morobo sige a to maxat niang e God ixo uxis sua talien xarnang ine iat köbo töxödösine ma xöbo tatalien madakdak eöt mabo turunon kö God.

<sup>25</sup> Io nang, mum morobo mana tewe rewe abo magingin möxö atöxö, me *mum kirip öngöng, mum morobo tengen a turunon kaluluonin* abo Kristien kabise, möxösa, ire xirip ire a boxönö möxö aine Kraiss.

<sup>26</sup> *Nang bara u laie sik, u bele pet te sasaban.* Xalik bara a xaken i wan su, ma nangen u bala laie.

<sup>27</sup> Ma ganim bara mum mo isik ke maup pe Satan tua wewet te laa.

<sup>28</sup> Me ewe a öng nang ixobo wuwulo, ganim bara i wuwulo baling. Inexalik irabo rörörön arixe mabo limine iat tua wewet a tinörön nang ine ma inone, bara irabo eöt tua tabaa ewe idi nang te sasaxan.

<sup>29</sup> Ganim bara re uk tinenge saban i wan su xalik abo ngala mum. Ma lamun mum morobo mana tengen mon ina mangana tinenge niang i eöt tua rorop a nangadi xöbo sasaxan te idi, rue mum pa eöt tua wewet ödeek ewe idi nang te ölöngö.

<sup>30</sup> Ma ganim bara mum mo ömaris a Töxödös ne Tanono re God, ina Tanono ewe nang ixo isik pi e mum bere mum mere God, ma ina auxileng niang i öturunon bara a axana bung irabo ot nang e God irabo ölanglanga e mum.

<sup>31</sup> Me mum morobo irewese abo bala kinadik kirip ma abo mangana bala laie xirip arixe ma lölös ne agot. Ganim e mum pua rengrengan ögarin te öng me mum morobo irewese inabo mangana mamaa rua ögarin a dauleng kabise.

<sup>32</sup> Me mum morobo mana pet a dedeek arixe ma abalamu kaluluonin e mum. Mum morobo mana döxömen taun abo sasaban te mum kaluluonin e mum xarnang kölöme xö tinörön te Kraiss, God ixo döxömen taun abo tatalien saban te mum.

## 5

*Ire tabo to xarnang a bung barok möxö maras*

<sup>1</sup> Io niang, mum morobo mana talien xarnang e God, möxösa, mum abo baroxorok ke ine nang ibo maaaa xöba ulamunon.

<sup>2</sup> Mum morobo mana to arixe ma tatalien ne maaaa xarnang iat mon e Krai ixo maaaa rö ire ma ixo isik tewe a to re ine xelen ire xarnang a arabaa nang ibo sixine mamaran wösöt e God.

<sup>3</sup> Mum morobo mana ebalaure deek bara kaim pe öng i karabo eöt tua tengen bere mum mo lörörö xö magingin ne ilawa bara abo magingin biling bira, ma bara mum kobo pere neek bölök abo lalaa xö dauleng kabise. Ganim bere mum mo muu inabo mangana tatalien, möxösa, a nangadi töxödös se God idi tekara talien bira.

<sup>4</sup> Ma ganim e mum pua tinenge saban. Ganim e mum pua rengrengen abo tinenge ne baulang mon bira, bara abo aösaxit saban ulamun inabo lalaa. I kebeöt bara mum abo mangana nangadi bira morobo tenge bie. Inexalik i deek belek bere mum morobo tengen deek wösöt e God.

<sup>5</sup> Mum morobo maras im bara kaim pe öng i muu a tatalien ne ilawa bara abo mangana tatalien biling i karabo laxa xö kingdom pe Krai me God. Xarna na bölök kö öng nang ibo werwere neek abo lalaa xö dauleng kabise (önga mangana tödi bira i eöt ma öng nang i lotu wösöt abo perewuo, möxösa, ibo lotu wösöt abo lalaa möxö ina öxöno lagunon.) Ine bölök i karabo laxa.

<sup>6</sup> Ganim e mum pa öbala lo öng kua lalamus öröxröxö e mum arixe mabo tinenge tataun. Inabo mangana tatalien a unine bara a laie re God irabo subu wönö idi abo tabuno ölöngö.

<sup>7</sup> Io niang, ganim e mum pua ais arixe me idi.

<sup>8</sup> Mum moxobo xisixis kö ködö, ma lamun na im kö kinis se mum kölöme re Orong, mum mo kis kö maras. Mum morobo mana talien xarnang a bung baroxorok möxö maras.

<sup>9</sup> (Ma pasuno idi nang te kis kö maras, ine i xarna na, bara abo tatalien deek kirip, ma abo tatalien töxödös, mabo tatalien eöt mabo turunon nang e God iri osen).

<sup>10</sup> Me mum morobo mana susuxun ulamun a mangana tatalien bule nang e God i axanan ulamunon.

<sup>11</sup> Mum morobo mana tuu xö palaa xalik a tatalien möxö xödxödö nang kaim ine ma pasuno. Ma lamun mum morobo mana bulus ömaras belek inabo tatalien.

<sup>12</sup> Ruasa, möxösa, inabo lalaa nang abo tabuno ölöngö tobo wewet suxume i ömenge ire nang bara ire tabo tenge mon ulamunon.

<sup>13</sup> Ma nang a bibio i mararang kö önga lalaa, i osen ömaras bara a mangana lalaa sa ine.

14 Io niang, nang bara a bibio i ömaras a laa, ina laa irabo maras. Ma niang a unine bara toxo tengen, "Nöngön ewe nang u paluso, örö laran, ma örö taru kaa xalik a minet, me e Kraiss irabo mararang lömö re nöngön."

15 Io niang, mum morobo mana ebalaure deek bere mum morobo talien bule. Mum bele talien xarnang idi ewe nang tokobo maras ulamunon a tatalien deek. Kaim. Mum morobo mana talien xarnang idi ewe te nanase sik köbo dedeek.

16 Mum morobo mana pet abo dedeek köbo axana bung kirip bara i eöt tö mum pua wewet bie, möxösa, inabo bung na idi te saban.

17 Io nang, mum bele talien xarnang abo baulang. Mum morobo mana maras kö sa niang a Orong i mamaa bere mum morobo pet.

18 Ma ganim bara mum mo inim köbanin abo ari lölös. Ina magingin irabo engin a oleleng ke mum urungan kö sasaban. Inexalik mum morobo mana wöwö ma Töxödös ne Tanono.

19 Mum morobo tenge urungan kö dauleng kabise mabo tingenge möxöbo mangana sinö ne lotu. Mum morobo sö min urungan kö Orong me mum morobo pit a sinö meringan kölöme xö bala mum.

20 Ma kölöme xö esene Jisas Kraiss, a Orong, mum morobo tengen deek sösxö urungan kö God a Tamana ire xöbo lalaa xirip.

21 Me mum morobo mana ii ölik e mum kaluluonin baling e mum, möxösa, mum mo ii xöba e Kraiss.

*Tödi alolo ma une alolo*

22 Mum abo une, mum morobo mana ii ölik e mum köbo usuono e mum, ma nang bara mum mo pet birina, mum mo pet bölok urungan kö Orong.

23 I deek bara mum morobo pet bira, möxösa, a tödi i taxin te idu ma une re ine xarnang bölok e Kraiss i taxin köbo tene lotu. Ine iat mon ewe ixo öro idi, me idi a aine ine.

24 Ma xarnang a marakörö ne lotu idi tobo ii ölik idi re Kraiss, abo une idi tabo mana ii ölik idi xöbo tödi re idi xöbo lalaa xirip.

25 Mum abo tödi, mum morobo mana mamaa ulamun abo une re mum xarnang e Kraiss ixo mamaa ulamun a marakörö ne lotu ma ixo isik öbaling ine

26 rua ömadakdak idi nang ixo tos ömaxat idi arixe ma ari ma a tingenge re ine.

27 Me Kraiss ixo pet bira bara idi tabo nangadi mariris ma kaim pe bixbixit bara re mangana biling bara re mangana

sasaban te idi, ma bara irabo lamus idi urungan te ine. I mamaa bere idi tabo madakdak me idi tabo deek saxit köbo to re idi.

<sup>28</sup> Ma bira bölök, abo tödi tabo mana mamaa ulamun abo une re idi xarnang idi te mamaa ulamun abo aine idi iat. Ma ewe nang i mamaa ulamun a une rine, i mamaa baling iat te ine.

<sup>29</sup> Kaim pe öng ibo melentexin öbaling a aine, inexalik ibo balaure ödeek ine ma i an deek. Me Kraiss ibo wewet bölök bira ulamun a marakörö ne lotu,

<sup>30</sup> möxösa, ire abo boxönö möxö ina aine.

<sup>31</sup> *“Ma lamun ina na, a tödi irabo wan kalik a tamana me nago re ine, me ine irabo kis arixe ma une, me idu tabo öng.”*

<sup>32</sup> Ina laa niang i taxin, ixo mun sik ma na im iri ot kö maras. Ma lamun nang bara e tengen bira, e wöwörö ulamun e Kraiss ma a marakörö ne lotu.

<sup>33</sup> Inexalik ina tinenge i turunon bölök kue mum. A öngöng a tödi irabo mana mamaa xöba ulamun a une re ine xarnang i mamaa lamun ine iat, ma a une irabo mana ii a tödi re ine.

## 6

### *A bung baroxorok mabo nago mabo tata*

<sup>1</sup> Mum abo bak suxurno mabo balik, mum morobo mana tame abo tata mabo nago re mum. Ina tatalien na i eöt arixe ma kinis se mum kölöme re Orong ma i töxödös bölök.

<sup>2</sup> *“Nöngön örobo ii e tata me nago re nöngön.”* Ina tinenge lölös na xö warkurai te Moses, ine a sisila ne tinenge lölös nang ixo wanot arixe ma xuxubus bere nöngön örobo kip a dedeek nang bara u muu ina tinenge lölös.

<sup>3</sup> Ma ina tinenge lölös i tengen bere nöngön örobo ii xarna na, *“rua nang irabo deek ke nöngön ma a to re nöngön irabo ömat ta xö öxöno lagunon.”*

<sup>4</sup> Me mum abo tata, ganim pua öngat a bung baroxorok ma bung balik ke mum. Inexalik nang mum mo ölon öxaa idi, mum morobo mana wöwörö lölös sö idi me mum morobo mana usu ödeek idi xarnang e Orong i mamaa bere mum morobo pet bie.

### *Abo tultul ma abo orong*

<sup>5</sup> Mum abo tultul, mum morobo mana tame abo orong ke mum mera xö pu arixe ma wariru raxin ma turunon kölöme xö bala mum xarnang mum mo mamaa rua tame e Kraiss.

<sup>6</sup> Ganim e mum pua rarama idi rua öaxanan idi xö axana bung kalik mon nang bere idi te ngökngök ke mum. Kaim. Mum morobo tame idi xarnang mum abo tultul kö pu re

Krais. Ma nang mum mo pet bie meringan kölöme xöbo bala mum, mum mo pet eöt a maaaa xö God.

<sup>7</sup> Ma a dödöxömen te mum irabo mana axanan ulamun a tinörön ne tultul te mum, xarnang bere mum mo rörörön wösöt a Orong, ma kaim bara a nangadi mon.

<sup>8</sup> Mum morobo mana rörön biringan, möxösa, mum mo ösöxö bara a Orong irabo kun puxus a öngöng a tödi eöt ma abo tatalien deek nang i pet, bara a tultul ine ma bara i kobo kis kö ene önga orong.

<sup>9</sup> Me mum abo orong, mum morobo talien bölök bira urungan köbo tultul te mum. Ganim e mum pa ömamang idi. Mum mo ösöxö bara a Orong ke idi, ine bölök a Orong ke mum, me ine ibo xisixis siso xö watmaep, ma ibo xurxure a nangadi xirip ma önga töxödösine warkurai xalik mon. I karabo top pe öng ma irabo ögarin tataunin te öng kabise.

### *Abo lalaa ne inarese*

<sup>10</sup> Io, ma rua öxöwöm abo tinenge re e, e tengen bere mum morobo mana kip lölös meringan kalik kö kinis se mum kölöme re Kraiss ma meringan kö lölös taxin te ine.

<sup>11</sup> Mum morobo mana sige abo lalaa xirip möxö inarese meringan kalik e God tua nang e mum morobo eöt tua tinuu wi abo xuun te Satan.

<sup>12</sup> Mum morobo sige inabo mangana lalaa möxö inarese bira, möxösa, ire tekara erese arixe ma nangadi mon. Kaim. Ire tobo erese mabo sisila mabo tene warkurai arixe mabo tene lölös mera xö öxöno lagunon ködö. Me ire tobo erese bira arixe mabo tano saban meriso xö watmaep.

<sup>13</sup> Möxö ina na, mum morobo sige xirip abo laa möxö inarese meringan te God, ma nang bara a axana bung saban i ot pösöt e mum, mum morobo eöt tua inarese deek. Ma nang bara mum mo tagur sik bira, mum morobo tuu lölös sik.

<sup>14</sup> Mum morobo mana tuu lölös bira. Mum morobo kut e mum ma turunon. Mum morobo sige e mum ma tatalien töxödös xarnang önga umri i sige önga sisige lölös sua balaure a böngböngöno ine.

<sup>15</sup> Me mum morobo sige abo su rua tagure abo xexe mum, a mangana tagur i ot meringan kalik a tinenge deek ulamun a malum.

<sup>16</sup> Ma kaim bara inabo lalaa xalik. Mum morobo mana kip lo bölök ina auwiwi möxö nunu niang irabo eöt bara mum morobo rörön arixe rua sese abo bibio möxö iie re Satan.

<sup>17</sup> Mum morobo sige a at kapa möxö ineöro me mum morobo kip lo abo tinenge re God xarnang a use ne inarese möxö Töxödös ne Tanono.

<sup>18</sup> Me mum morobo seseseng sösöxö xöbo mangana sineseng arixe ma rorop möxö Töxödös ne Tanono. Mum morobo döxömen inabo lalaa bara mum morobo tagur ma mo korobo mamas, inexalik mum morobo seseseng ulamun idi xirip nang a nangadi tus se God.

<sup>19</sup> Me mum morobo mana seseseng bölök kö e bara xina axana bung e rabo wöwörö, God irabo isik kebo dauleng ne tinenge rö e bara e rabo tenge arixe ma balamasa rua ömaras a nangadi ulamun abo lalaa niang ixo mun sik mesila ma na im i ot maras kö tinenge deek.

<sup>20</sup> Me idi toxoro öxös dik e arixe ma sen, möxösa, e a tinuxulas sua gene a tinenge deek. Mum morobo mana seseng bara e rabo tenge arixe ma balamasa rua palas a tinenge deek xarnang i deek bara e rabo tenge bira.

<sup>21</sup> Io, me Tikikus, a tönö deek ke ire ewe i rörörön deek kölöme xö tinörön te ine urungan kö Orong, ine mon irabo tögösen e mum ulamun inabo lalaa xirip pue mum pua marmaras bara a kinis se e i bara bule sik im.

<sup>22</sup> A unine bara e rabo tile ine urungan te mum, bara mum morobo ösöxö bara mem me xisixis bara bule, ma bara irabo öxaxat e mum.

<sup>23</sup> Me e seseng bara God a Tamana ire me Jisas Krais, a Orong, irabo isik a malum pe mum abo töke kölöme re Krais. Me e seseng bara ine irabo ölölös abo nunu re mum mabo mamaa re mum urungan kö öng kabise.

<sup>24</sup> A abalamu re God irabo kis arixe me idi ewe nang te mamaa ulamun e Jisas Krais, a Orong ke ire, arixe ma a mamaa nang i karabo kawam.



## A Ginigeet te Pol urungan köbo PILIPAI

Io, nang e Pol ixo wan urungan Masedonia rua tinenge ma a atöngösen deek, ixo wan kö lagunon taxin Pilipai (pere e Aposol 16:9-40). Io, ixo sulo a lotu ringan ma ixo wan lo baling. A uleng ne awat melamu, idi toxo tödik e Pol tiso xö lagunon kabise, me idi toxo bulus ine kölöme xö gunon ne aömokorot. A uleng nebo tene nanase idi te dökömen bara ro Rom (Aposol 28:14-31). Ma ringan kölöme xö gunon ne aömokorot Pol ixo geet ina ginigeet möxö tengen deek ke idi abo Pilipai, möxösa, idi toxo isik tar abo arabaa rua rorop ine (Pilipai 1:5; 4:10-19). Ma ixo tengen osen idi ulamun ine iat nang ixo kis kö gunon ne aömokorot. Ma dauleng ne nangadi idi toxo öriip a to re Pol, ma lamun e Pol kaim kö dökömen köbanin ina na, ma i kobo laa raxin köba rö ine ina kinis se ine kölöme xö gunon ne aömokorot bölök. Kaim. Ixo axanan mon bara a atöngösen deek i wan ebasin (1:12-26). Ma tatalien möxö axanan i laa raxin kö ina ginigeet (1:4; 1:18; 2:2; 2:17-18; 2:28-29; 3:1; 4:1; 4:4). Io, e Pol ixo öxaxat abo Kristien tiso Pilipai bere **idi tabo mana tuu lölös arixe ma önga baladi xö atöngösen deek ma bara tebele buburin idi nang te eka ögarin idi (1:27-30)**. Ina na a unine ina ginigeet kirip na. Me Pol ixo seng abo Pilipai bara idi tabo talien eöt mabo duöng ödödö xarnang e Krai. Ine e God, inexalik ixo wanot xarnang a tödi ma xarnang önga tultul tua gene ire (2:1-11). Me Pol ixo tengen te idi bölök bara irabo tile e Timoti me Epararoditus urungan te idi, ma a nine tödi deek idu (2:19-30). Ma ixo ötumarang idi ulamun abo tene ausu röxröxö nang idi toxo tengen bara i eöt bara tabo muu a tinörön deek kö nangadi mon bara tabo töxödös kö wawara xö God. Inexalik ixo tengen bara ire tabo nunu mon te Krai sua nang ire tabo töxödös (3:1-21).

<sup>1</sup> E, e Pol me Timoti, maa a nine tultul kö pu re Krai Jisas. Me maa me tile ina tinenge urungan te mum a nangadi runon te God, mum niang mo kis kölöme re Krai Jisas singan Pilipai. Me maa me tile bölök ina tinenge na urungan te mum abo sisila ne lotu me mum abo tene rorop möxö lotu.

<sup>2</sup> A abalamu ma malum urungan te mum meriso re God a Tamana ire ma meringan te Jisas Krai, a Orong.

*Pol ixo seseng lamun abo Pilipai*

<sup>3</sup> Me e tengen deek urungan te God köbo axana bung kirip niang e bo döxömen lo e mum.

<sup>4</sup> Xöbo bung kirip nang e bo seseseng kö mum, e bo seseseng ma axanan,

<sup>5</sup> möxösa, mum moxobo ruruu arixe me e kölöme xö tinörön möxö tinenge deek urulo xö sisila ne bung ot nixinen.

<sup>6</sup> Me e bo seseseng bölök bira, möxösa, e ösöxö runoin bere ewe ine niang ixo urulo a tatalien deek kölöme re mum irabo rörörön biringan ot nang irabo mana öxawam ina tinörön kölöme re mum kö bung ke Krajs Jisas.

<sup>7</sup> Inexalik i deek ke e bara e rabo örasen ina mangana aörasen bira lamun e mum, möxösa, mum mo kisisik kölöme xö kat te e. God ixoro tabaa tataunin mon e mum ma rorop bere mum morobo eöt tua tinuu arixe me e xöbo mangana lalaa i ot pösöt e. Niang bara e kisisik ka xö gunon ne aömokorot, bara e tuu wi abo apuk köbo tinenge deek, bara e öturunon inabo tinenge, io, mum morobo kip a tiip arixe me e.

<sup>8</sup> I eöt bara God irabo sixaut xarnang a balake i muu xöbanin e mum eöt ma abalamu re Krajs Jisas i ot pösöt e mum.

<sup>9</sup> Me e seseseng bara a abalamu re mum irabo mana rataxin ma bara a nanase re mum rua ösöxö xulen abo dedeek ma abo sasaban irabo kure ödeek inabo abalamu,

<sup>10</sup> io nang, mum morobo perexulen abo lalaa i deek köba saxit ma xalik mum bo subu xö abo lalaa i saban, ma bara mum morobo deek köba saxit tua tagure e mum lamun ina bung ke Krajs.

<sup>11</sup> Me e seseseng bölök bara abo to re mum irabo wöwö ma inone tatalien töxödös nang i ot meriso kölöme xö kinis se mum arixe me Jisas Krajs. Ma inabo inone irabo örarik a nangadi rua ölelet ma rua ii öraxin e God.

*A dinödöm taxin te Pol bara a tinenge deek irabo wan esexere*

<sup>12</sup> Abo töke kölöme re Krajs, e maaaa bara mum morobo maras bara abo lalaa niang ixo ot te e ixo top a tinenge deek kua nuan nana.

<sup>13</sup> Möxö ina na, abo umri möxö sisila raxin saxit na, mabo nangadi xabise bölök, idi te ösöxö bara e kisisik ka xö gunon ne aömokorot, möxösa, e mere Krajs.

<sup>14</sup> Ina kinis se e kölöme xö gunon ne aömokorot ixoro öxaxat a oleleng arixe möxö bung marapun te ire xö kinis se idi kölöme xö Orong. Io, ina na ixo bira, idi toxo balamasa sik mon ma kaim idi ra binuut tua atöngösen ma tinenge re God.

<sup>15</sup> I turunon bara dauleng te palas tinenge re Krajs, möxösa, idi te dödöm saban lamun a kinis ne sisila re e

me idi tobo bala kadik kö e. Lamun tö idi xabise, idi te etöngösen ma dinödöm deek lamun e.

<sup>16</sup> Ma ina nangadi na, idi tobo wewet bira arixe ma abalamu, möxösa, idi te ösöxö bere God ixoro pere kos lo e bere e rabo tuu wi abo apuk möxö tinenge deek.

<sup>17</sup> Ma lamun idi xabise ewe niang te etöngösen lamun e Krai, idi tobo eönunu mon. Idi te pere neek abo kinis taxin bere idi iat. Nang bang e kisisik kö ina gunon ne aömokorot, idi te döxömen bere idi te öt tua ötari a tiip pö e.

<sup>18</sup> Ma lamun kaim pe laa. Niang bara te palas tinenge ma dinödöm ne aönunu bara dinödöm turunon, i kobo laa raxin köba. Lamun a laa niang i taxin, i bira, nang bara idi te muu abo ngas kirip pua palas tinenge lamun e Krai. Möxö ina na, e axanan im.

Me e rabo mana axanan iat,

<sup>19</sup> möxösa, e ösöxö sik bara abo lalaa niang ixoro wanot sik ke e, irabo engin e bara e rabo langlanga im möxöbo sineseng ke mum ma möxö rorop taxin meringan kö Tanono e Jisas Krai.

<sup>20</sup> Me e rabo langlanga im bira eöt ma mamaa raxin te e bere e bele pet te laa niang irabo ömenge e. Me e dödöm köba bara i turunon bara e kebeöt ta pet bira. Lamun e mamaa bara e rabo wöwö ma balamasa bere na a to xirip pe e irabo öraxin e Krai xarnang e xobo wewet bie. Niang bara e to bara e met, e mamaa mon bara e rabo ii öraxin e Krai.

<sup>21</sup> Ma bira im, xö dinödöm pe e, niang bere e to, Krai ine a unine to re e. Ma nang bara e met, irabo deek köba rö e.

<sup>22</sup> Ma nang bara e kisisik iat kö ina aike, e ösöxö bara nangen a inone tinörön te e. E kobo ösöxö bara e rabo pere kos lo ewenene re idu.

<sup>23</sup> A mamaa re e i palang elixilixin idu ina nine mangana dinödöm. E mamaa bara e rabo met me e rabo wan urso re Krai, möxösa, ina niang i deek köba saxit.

<sup>24</sup> Inexalik a sasaxan taxin bara e rabo mana kis kö ina to na rua rorop e mum.

<sup>25</sup> Ma, möxösa, e maras kirip sik bara to re e irabo top e mum bira, e ösöxö bara e rabo to sik iat, me e rabo kis arixe me mum lamun abo nunu re mum irabo önan kaa, ma morobo kip a axanan köbo lalaa niang mum mo nunu önan.

<sup>26</sup> E rabo to iat nang bara morobo öt ta ölolot köbanin e Krai Jisas nang bara e ot baling urungan te mum.

*Ire tabo mana tuu lölös sik ma tinenge deek.*

<sup>27</sup> Ma laa raxin ine bira, bara mum morobo mana tatalien xarnang a tinenge deek ke Krai i tengen bie. Ma bira im,

nang bara e rabo wanot me e rabo pere e mum, bara e kebeöt ta nuan urungan te mum, ma lamun e ölangen mon te tinenge lamun e mum, io, e rabo ösöxö bara mum morobo tuu lölös kö önga dinödöm, ma bara mum morobo esek xarnang önga tödi xalik mon ibo esek kua werwere muu inabo lalaa niang ire te nunu xönan möxö tinenge deek.

<sup>28</sup> Ganim a buburin te tödi niang i maaaa rua ögarin a dinödöm pe mum. Inabo mangana tatalien na irabo osen ömaras bara God irabo ögarin köbanin idi, ma lamun irabo öro e mum.

<sup>29</sup> I eng bira, möxösa, God ixo tabaa e mum ma kinis deek lamun e Krais bara mum morobo nunu re ine. Ma lamun kaim bara na mon. Mum morobo kip bölök a tiip lamun ine,

<sup>30</sup> möxösa, mum mo laxa sik kina kinadik iat nang mum moxo pere niang e xo örasen ma nang mum mo ölangen na bara e angen könan.

## 2

*Ire tabo mana ii ölik ire iat xarnang e Krais ixo pet bie*

<sup>1</sup> Io, a kinis se mum kölöme re Jisas ibo öxaxat e mum. Ma a abalamu re ine ibo ömamaana e mum. Mum bo önan arixe ma Töxödös ne Tanono. Mum mo pet ödeek me mum mo ebalamu kaluluonin e mum iat.

<sup>2</sup> Ma lamun ina na, mum morobo mana öng mon kö dinödöm pe mum. Ma önga mangana abalamu mon mum morobo osen ebasin te mum iat. Ma önga bala mon irabo ebasin te mum iat. Ma irabo önga maaaa xalik mon kö ina tatalien nang mum mo maaaa bara mum morobo muu. E rabo axanan saban arixe nang bara mum morobo pet bie.

<sup>3</sup> Lamun ganim e mum pa wewet te lalaa rua ölolot öbaling iat e mum, ma dauleng kabise im, kaim. Ganim e mum pa ii öraxin öbaling tataunin iat e mum. Ma lamun mum kirip öngöng, mum morobo mana duöng möxö kinis malus, inexalik bara mum morobo dödöm bara a nangadi xabise idi te taxin sik ke mum.

<sup>4</sup> Mum kirip öngöng, mum bele dödödöm lamun abo lalaa iat te mum. Mum morobo dödöm bölök lamun abo lalaa xö nangadi xabise.

<sup>5</sup> Abo mangana dinödöm pe mum irabo mana eöt ma dinödöm pe Krais Jisas, ma i bira:

<sup>6</sup> Ewe runon arixe e Jisas Krais? I maras bere ine iat e God.  
I turunon,  
ma lamun niang e Krais ixo perexulen ine bara ine i eöt me God, kaim ine ra dinödöm bara irabo rörön ma kinis taxin te ine rua rorop öbaling ine.

<sup>7</sup> Kaim. Ixo gan sik a kinis taxin te ine

ma ixo kip a tatalien xarnang a tultul,  
ma ixo ot xarnang a nangadi.

<sup>8</sup> Nang idi toxo perexulen ine bara ine a tödi runon,  
ma ixo ii ölik ine iat  
ma ixo tame e God ot kö minet te ine, a mangana minet  
lömö xö sölöxöröp.

<sup>9</sup> Möxö ina na, God ixo ii öraxin köbanin ine  
ma ixo isik ese re ine niang i lömö sik köbo ese xirip.

<sup>10</sup> Ma ixo pet bira bara idi xirip meriso lömö ma lömö xö  
pu, ma xö ene pu,

idi tabo subun kexe rua ii a esene Jisas

<sup>11</sup> ma bara abo kamene nangadi xirip tabo tenge maras bere  
Jisas Kraiss ine a Orong.

Ma nang bara idi tabo pet bira, idi tabo ii öraxin e God, a  
Tamana ire.

*Ire tabo mana deek saxit*

<sup>12</sup> Ma lamun ina na, abo ais deek ke e, xarnang mum  
moxobo mumuu abo tatalien ne ölangen tinenge nang e  
xo kis arixe bang me mum, na e maaaa xöba bara mum  
morobo mana ölangen tinenge bölök nang bere e kisisik  
kö palaa xalik e mum. E maaaa bara mum morobo mana  
rörön lölös arixe ma binuut ma dedede urungan te ine rua  
tatalien eöt ma ina to runon nang mum mo kis könan.

<sup>13</sup> Mum morobo tatalien bira, möxösa, ewe nang i rörön  
arixe ma lölös kölöme re mum, ine e God. I rörön kölöme  
re mum ma ixo öraru a bala mum bara mum morobo pet  
eörin xarnang kö maaaa re ine iat.

<sup>14</sup> Xöbo tatalien kirip pe mum, ganim e mum kö esusuo  
ma ganim e mum kö wöwörö oleleng,

<sup>15</sup> io lamun mum morobo deek köba ma kaim pe öng  
irabo eöt ta wupuk e mum, me mum morobo a bung  
baroxorok ke God nang kaim ine mere sasaban tö mum  
nang mo to sik kaluluonin idi nang toxo puxus a turunon  
ma abo tatalien te idi i wan gegee xalik a töxödös. Mum mo  
bibio kaluluonin idi xarnang abo tii meriso lömö,

<sup>16</sup> möxösa, mum mo tuu lölös kö tinenge möxö to. Mum  
morobo wewet bira, io nang bara e rabo ölolot e xö ina bung  
ke Kraiss bara e kobo ulo tataun me e kobo rörön tataun tua  
rorop e mum.

<sup>17</sup> A nunu re mum i eöt arixe ma sinöngöt ne arabaa mum  
mo pet urungan te God. Ma nang bara idi te linge ösu sik  
a dee re e xarnang a arabaa ne wain lömö xöbo arabaa re  
mum, io, e rabo axanan köba arixe me mum.

<sup>18</sup> Irabo xarnang bölök kö mum. Mum morobo mana  
axanan köba arixe me e.

*Timoti me Epaparoditus*

19 Nang bara Orong i maaaa bie, e maaaa bara e rabo tile wasaxirin e Timoti urungan te mum, nexalik bara e bölök arabo örasen a axanan nang bere e rabo ölangen abo tingenge lamun e mum.

20 E rabo tile ine, möxösa, kaim bölök im pe öng lörörö re e nang maa ma önga dinödöm rue mum. Me ine xalik mon bölök nang mum bo kisisik kö kat te ine.

21 A nangadi xabise xirip idi te maaaa muu abo maaaa iat te idi, ma lamun idi tekobo maaaa lamun abo lalaa nang mere Jisas Kraiss.

22 Me mum mo ösöxö bere Timoti ixoro osen te mum bere ine a tödi deek. Ine ixoro rörön arixe me e xarnang a barok ma tata nang te rörön xarnang a nine tene tinörön möxö tingenge deek.

23 Io niang, e maaaa bara e rabo uguran ine urungan te mum niang bara na iat mon e maras lamun abo mangana laa nang irabo ot kö to re e.

24 Kölöme xö nunu re e xö Orong, e ösöxö sik bara i karabo ömat, me e iat, e rabo wanot.

25 Ma lamun e döxömen bara e rabo tile Epaparoditus a töke Kölöme re Kraiss urungan te mum. Ine ewe niang i rörön arixe me e. Me ine bölök ixo kip ina tiip arixe me e Kölöme xö ina inarse. Me ine bölök a tene tinörön te mum ewe niang mum moxo tile ine rua rorop e.

26 E rabo tile ine, möxösa, i maaaa xöba bara irabo pere e mum ma, möxösa, a to re ine ixo tiip rue mum nang ixo ösöxö lo bere mum moxo ölangen bere ine ixo meset.

27 I turunon saxit bara ine ixo meset ma ixo eka minet. Ma lamun God ixo marase ine. Ma kaim bere ine xalik. Ixo marase bölök e, bara e bele örasen öbaling ke tiip taxin.

28 Lamun ina na, a balake i raru xöba bara e rabo tile ine bara mum morobo axanan baling nang bara mum morobo pere ine, ma bara a tawunuk ke e irabo önan su.

29 Mum morobo mana öga lo ine arixe ma axanan xarnang ine a tönö re mum Kölöme xö Orong. Mum morobo mana ii abo mangana nangadi xarnang ine,

30 möxösa, ixo lörörö ra minet muu a tinörön te Kraiss. A turunon bara i kobo dödöm oleleng lamun a to re ine niang bara irabo met. Kaim. Niang bara mum mo kebeöt ta rorop e, ine i maaaa mon bara irabo tabaa e ma rorop nang e mum iat mo korobo pet eörin.

### 3

*Ire tekarabo nunu xö lölös iat te ire*

1 Io, önga laa bölök, abo töke Kölöme re Kraiss. Mum morobo mana axanan kö kinis se mum pingan kö Orong.

I karabo tiip pö e niang bara e geet öbaling inabo lalaa urungan te mum. Kaim. Ma inabo lalaa nang tabo balaure ödeek e mum.

<sup>2</sup> Mum morobo mana balaure wi e mum kalik abo duöng möxö pet laa saban. A tatalien te idi i eöt ma tatalien kö bung puluwun. Me idi tobo xurxuru ögarin abo aine nangadi rua mumuu a warkurai te Moses.

<sup>3-4</sup> E tengen bira, möxösa, mesila a tatalien möxö kuru aine nangadi ixo osen bara abo Israel a nangadi re God, nexalik na, ire iat abo tene nunu, a nangadi turunon te God. Ire iat abo duöng ewe niang tobo lotu re God kölöme xö Töxödös ne Tanono, me ire tabo ölet e Kraiss Jisas. Ma i turunon bara a unine bere e iat e xebe öt tua bulus a nunu re e xö tatalien ne muu warkurai te Moses sua rorop e, ma lamun ire tokobo bulus a nunu re ire xö ina tatalien na.

Nang bara re öng i döxömen bara i eöt tua mumuu inabo warkurai rua rorop ine, a unine bara e iat e sila sik.

<sup>5</sup> Möxösa, melamu xö pitnö ma narun ne bung nang a nago ixoro kip e, toxo kuru a lewene aike. Me e a tödi runon mee Israel kö bung marapun te Benjamin. E xobo mumuu xalik mon abo tatalien möxöbo tee mee Israel. E xobo mana mumuu ödeek iat abo warkurai te Moses, möxösa, e a Parasi.

<sup>6</sup> A balake ixo raru xöba ra mumuu ödeexin e God, ma möxö ina na, e xo döxömen bara i deek bara e rabo ögarin a marakörö ne lotu re Jisas. Ma xö winara möxöbo warkurai te Moses, e xo töxödös köba, ma kaim pe öng ixo eöt tua wupuk e mere önga sasaban.

<sup>7</sup> Mesila e xo döxömen bara inabo mangana tatalien na irabo uxis ödeek e. Ma lamun na im e perexulen bara inabo tatalien na i laa tataun mon, möxösa, e xoro kip e Kraiss.

<sup>8</sup> Ma kawaim bara inabo tatalien na xalik mon. E perexulen bara abo lalaa xirip i laa tataun mon ma i kebeöt tua rorop e. Io, ma ina laa nang i taxin saxit arixe, bara e ösöxö e Kraiss, a Orong ke e. Me e xo ömalim tewe xirip abo lalaa ulamun mon e Kraiss. E perexulen bara abo lalaa na i xarnang a pirixö busun, möxösa, e mamaa rua xikip e Kraiss,

<sup>9</sup> ma, möxösa, e mamaa rua xikip a mangana kinis kölöme re ine bölök niang bere e töxödös kö winara re God. Inexalik kaim pe kinis töxödös i ot möxö lölös iat te e meringan kö tatalien möxö mumuu abo warkurai te Moses. Kaim. E töxödös sik, möxösa, e nunu re Kraiss. Ina kinis töxödös i ot meriso re God nang bara re öng i nunu.

<sup>10</sup> E mamaa rua ösöxö e Kraiss me e mamaa rua örasen kulen a lölös möxö tinaru baling ke ine xalik a minet. E

mamaa rua xikip bölök a tiip pe ine ma bara e rabo xarnang ine xö minet te ine,

<sup>11</sup> io, xere önga mangana ngas, e rabo taru baling kalik a minet.

*Ire tabo mana ulo ot kö öxöwöm*

<sup>12</sup> E kobo tengen bara e re eöt ta pet eörin kirip inabo lalaa na, bere e re töxödös kirip sik. Kaim. Lamun e lölölös sua xikip ina kinis niang e Kraiss Jisas ixo lamus e bara e rabo kip lo.

<sup>13</sup> Abo töke kölöme re Kraiss, niang e pere öbaling iat a to re e, e kobo döxömen bara e re kip lo iat ina kinis na. Ma lamun önga laa niang e pet i bira: e kara döxömen lo abo lalaa niang ixoro saxit. Kaim. E rabo lölölös bara e rabo kip lo abo lalaa nang mesila re e.

<sup>14</sup> Xarnang ina na, e kara mamas, ma lamun e mana lölös sik iat ot kö öxöwöm möxö ina ululo, nexalik bara e rabo kip ina arabaa deek nang e God ixo kuwe lo e kölöme re Kraiss Jisas bara e rabo kip puso lömö.

<sup>15</sup> Ire xirip niang te maruxo xö kinis se ire kölöme re Jisas, ire tabo mana kip ina mangana dinödöm. Ma nang bara dinödöm pe ire i xabise lamun te laa, io, God irabo mana ömaras ine urungan te mum.

<sup>16</sup> Ma önga lalaa raxin ine bira, bara ire tabo mana to muu ina ngas nang ire te mumuu ot nixinen.

<sup>17</sup> Abo töke kölöme re Kraiss, mum morobo tuu arixe rua mumuu a mangana tatalien te e. Mum morobo mana pere ödeek lo idi ewe niang te to eöt ma mangana kinis mem moxoro osen sik ke mum.

<sup>18</sup> Ruasa? Möxösa a oleleng, abo tatalien te idi i osen bara idi te öngus kalik a sölöxöröp pe Kraiss, xarnang e xo tengen mesila ma na baling e tengen te mum ma line marake.

<sup>19</sup> Idi tabo iuo saban arixe, ma ina na a öxöwam pe idi. A mamaa möxö aine idi, i xarnang abo orong ke idi. Idi tobo ölelet abo mangana tatalien niang ixere deek niang bere idi texebe menge xönan. Me idi tobo dödöm mon kalik köbo lalaa mera xö öxöno lagunon.

<sup>20</sup> Ma lamun ire iat, a bung marapun tunon nang i kis uso xö watmaep. Me ire te xixiset ma mamaa raxin lamun a Tene Aöro, e Jisas Kraiss, a Orong, niang irabo wan su meringan.

<sup>21</sup> Ine ewe niang irabo puxus abo aine ire niang i önan su ma i eöt tua minet, bara abo aine ire tabo tawuxus eöt ma aine ine iat, a mangana aine niang i wöwö ma mariris deek. Ma irabo pet bira ma ina lölös nang ibo rörön min tua kure abo lalaa xirip.



## 4

*Abo aõxaxat*

<sup>1</sup> Ma na im, abo tõke kõlõme re Kraiss, mum morobo mana tuu lõlös bie kõlõme xõ Orong. E tengen birina urungan te mum ewe niang e bo mamaa xõba lamun. Me e maris kõba rua werwere e mum. Mum abo ais deek ke e, mum bo õaxanan e e me mum mo xarnang a laa deek niang e bo osen õsu mera xõ to re e.

<sup>2</sup> E seng ina nine une na, e Sintike me Eudia, bara idu tabo õnga dinõdõm mon kõlõme xõ Orong.

<sup>3</sup> Io, i deek saxit. Me nõngõn nang u xo tuu arixe me e ma u kobo wan lie e, e seng bõlõk nõngõn ma õnga laa. E seng nõngõn bara õrobo top idu a nine une niang. Idu toxo rõrõn lõlös arixe me e rua atõngõsen ma tinenge deek ke Jisas, xarnang bõlõk e Kelemen me idi xirip bõlõk ewe nang te rõrõn arixe me e. Abo esene idi nangen kõ buk mõxõ to.

<sup>4</sup> Xõ kinis se mum kõlõme xõ Orong, mum morobo mana axanan. Ma arabo tengen õbaling bara mum morobo mana axanan.

<sup>5</sup> Mum morobo mana osen te nangadi xirip, bara mum a duõng õdõdõ. A Orong ire lõrõrõ im.

<sup>6</sup> Ganim e mum pa xõlxõlõ xelen tebo laa. Ma lamun kõbo lalaa xirip, mum morobo mana isik abo sasaxan te mum urungan te God kõbo sineseng ke mum. Ma nang bara mum morobo seseng biringan, mum morobo mana tengen deek.

<sup>7</sup> Io, a malum pe God nang i lõmõ saxit kõbo nanase re ire, irabo pere muu õdeek im abo dinõdõm pe mum ma abo to xirip pe mum bõlõk kõlõme re Kraiss Jisas.

<sup>8</sup> Abo tõke kõlõme re Kraiss, na eka õxõwõm a tinenge re e bira: mum morobo mana dõdõm lamun abo lalaa deek nang i eõt bara tabo õlet. Mum morobo dõdõm lamun abo lalaa i turunon, abo laa ire tabo ii, abo laa i tõxõdõs, abo laa i madakdak, abo laa i deek saxit, ma abo lalaa ma mariris.

<sup>9</sup> Abo lasanene nang mum moxobo eusu min, bara moxoro kip, bara moxoro õlangen kalik e, bara moxo pere xõ to re e morobo mana talien muu. Io, e God ewe nang ixo isik a malum irabo kis im arixe me mum.

*Pol ixo tengen deek kõbo Pilipai*

<sup>10</sup> Xõ kinis se e kõlõme xõ Orong e axanan kõba, mõxõsa, mum moxo dõdõm baling ulamun e. Me e xo õsõxõ bara a dinõdõm pe mum urõ e angen. Inexalik mon bara kaim pe uk gõlõ ure mum bara mum morobo osen ina dinõdõm na.

<sup>11</sup> E kobo tengen bira, bara e ma sasaxan. Kaim. E xoro kip ausu xõnan bara e bele xõlxõlõ xelen tebo lalaa sa nang irabo ot põsõt e.

<sup>12</sup> E xoro ösöxö a kinis sasaxan me e xoro ösöxö bölök a kinis ne orong. E xoro eusu mina laa nang ixo mun sik ma i bira: e bala malum me e kobo xölxölö xelen te önga laa nang i ot pösöt e. Kaim pe laa nang bara e irilöng bara e masii. Kaim bölök ke laa nang bara i kebeöt abo lalaa e unan bara niang i eöt sik.

<sup>13</sup> Abo lölös se e i eöt mabo mangana kinis kirip, möxösa, e bo xisixis arixe me ewenene niang ibo ölölös e.

<sup>14</sup> Ma lamun ixo deek kö mum niang moxo laxa arixe me e xöbo tiip pe e.

<sup>15</sup> Mum bölök abo tee mee Pilipai, mo maras pi sik köbo rorop pe mum köbo bung sila niang moxo tuu arixe me e kölöme xö ina tinörön möxö tinenge deek. Ma moxo ösöxö sik bara mum iat kalik mon iang moxo top e xö bung niang e xo wan u Masedonia. Kawaim pe lotu xabise.

<sup>16</sup> Niang e xo xisixis so Tesalonika me e xo sasaxan, mum moxobo tile a rorop pö e xö öngöng a bung.

<sup>17</sup> Me mum bele döxömen bara e maaaa rua xikip pe arabaa mere mum. Kaim. E maaaa bara mum morobo kip öläxa ina inone xö to re mum.

<sup>18</sup> E xoro kip kirip abo xinuxun niang mum moxo tabaa e min. Me e re wöwö im, möxösa, Epararoditus ixoro kip ot abo arabaa re mum urungan tö e ma inabo lalaa niang i bönöt kirip abo sasaxan te e. Inabo arabaa niang mere mum i xarniang a arabaa nang i sixine deek uruso lömö re God, a mangana arabaa niang e God ibo öga lo ma axanan.

<sup>19</sup> Io, me God te e irabo eörin kirip abo sasaxan te mum, möxösa, ine i wöwö mabo mangana lalaa deek. Ma irabo pet bira urungan te mum kölöme xö kinis se mum pingan te Krajs Jisas.

<sup>20</sup> Io, ire tabo mana perexulen bere a kinis se God a Tamana ire i wöwö ma mariris i tuu ulorexe saxit. I turunon saxit.

<sup>21</sup> Mum morobo mana isik a tinenge ne aöga urungan kö marakörö xirip pe God kö kinis se idi kölöme re Krajs Jisas. Abo tök ke ire kölöme re Krajs ewe idi tobo arixe me e, idi te tile bölök a tinenge ne aöga urungan te mum.

<sup>22</sup> A marakörö xirip pe God na, idi te tile a tinenge ne aöga urungan te mum. Me idi bölök nang te rörörön te Kaisar, a king taxin mee Rom, idi te maaaa xöba ra öga e mum.

<sup>23</sup> A abalamu re Jisas Krajs, a Orong ke ire, irabo kis arixe me mum. Amen.

## A Ginigeet te Pol urungan köbo KOLOSI

I wawara bere Pol ixo kis kö gunon ne aömokorot tingan Rom nang ixo geet ina ginigeet urungan tö idi abo Kolosi xö xönö raxin Esia (pere Aposol 28:16-21). Ixo geet a nine ginigeet urungan te Pilimon mabo Epeses kö ina axana bung bölök. E Pol kaim kö sulo a lotu ro Kolosi. I wawara bere Epaparas ixo ölangen a atöngösen deek ke Pol to Epeses, io nang, ixo wan uruso Kolosi ma ixo palas tinenge ringan ee (Kolosi 1:7-8 me Aposol 19:10). Me Pol ixo geet ina tinenge rua ötumarang idi abo Kolosi xöbo tene ausu röxröxö. Idi toxo töxö ulamunon a oleleng ne mangana lalaa. Idi toxo bulus öraxin a dauleng nebo mangana bung (Kolosi 2:16) ma abo angelo (2:18). Idi toxo maaaa bara a nangadi idi tabo kis kö pu xö ene abo warkurai (2:21) ma a tatalien ne kuru lewene aine nangadi (2:11). Idi toxo pet öraxin abo mangana dinödöm iat te idi bara ina na a mangana nanase nang i silien ire urungan kö to (2:4, 2:8, 2:18). Ma lamun e Pol ixo bulus öraxin köbanin iat e Kraiis bara ine xalik mon i eöt bara irabo öro a nangadi. Kraiis a malalar kö God (1:15). Kraiis ixo uxis abo lalaa xirip (1:16). Kraiis i balaure abo lalaa xirip (1:17). Kraiis a sisila möxö tinaru kaa xalik a minet (1:18). Kraiis i eöt esexere me God (1:19, 2:9). Kraiis irabo kip puxus öbaling kirip abo lalaa urungan kö God (1:20-22). Io nang, **Kraiis i taxin köbo lalaa xirip ma i eöt köba rua öro ire.** Ma ina na a unine ina ginigeet.

<sup>1</sup> E, e Pol, a önga aposol te Kraiis Jisas eöt kö maaaa xö God, me Timoti, a tönö ire kölöme re Kraiis,

<sup>2</sup> maa me tile ina tinenge na urungan tö mum a nangadi runon kö God niang Kolosi, e mum abo tönö e maa nang mum mo nunu re Kraiis me mum mo kis kölöme re ine.

A abalamu ma malum meriso xö God, a Tamana ire, urungan tö mum.

### *A tinenge deek ma sineseng*

<sup>3</sup> Maa bo rengrengen deek kö God a Tamana Orong ke ire, e Jisas Kraiis, nang mem bo seseseng lamun e mum.

<sup>4</sup> Maa me tengen deek bira, möxösa, maa moxoro ölangen ulamun abo nunu re mum kölöme re Kraiis Jisas ma ulamun abo abalamu re mum urungan kö nangadi xirip nang mere God.

<sup>5-6</sup> Me mum bo ebalamu me mum bo nunu, möxösa, mum mo kis xiset abo lalaa deek i kis tagur sik kö mum puso xö watmaep. Me mum moxoro ölangen ulamun inabo lalaa

deek nang a tinenge turunon ixo ot urungan te mum, ma ina na a atöngösen deek. Ina atöngösen deek ixobo oo ma ibo önan esexere xirip kö öxöno lagunon, xarnang mon nang ixoro talien bie kaluluonin e mum meringan kö sisila ne bung nang moxo ölangen ine ma moxo maras ulamun abo turunon möxö abalamu xö God.

<sup>7</sup> Ma a ais deek ke ire, e Epararas, ewe nang i tuu arixe me mem köbo tinörön, ma a tultul deek ine xö pu re Kraissua gene e mum, ine niang ixo usu e mum ulamun a na.

<sup>8</sup> Ine ewe niang ixo töngösen e maa ulamun a tatalien ne abalamu nang a Töxödös ne Tanono iri tabaa e mum min.

<sup>9</sup> Io niang, maa mokoxobo mamas sua siniseng kua gene e mum urulo meringan kö bung maa moxo see lo a atöngösen ulamun e mum. Maa moxobo seseng e God bara irabo tabaa e mum ma nanase raxin ulamun abo to re mum kölöme xö Tanono bere mum morobo eöt ta ösöxö ödeek abo lalaa ine i maaaa bara mum morobo pet.

<sup>10</sup> Io niang, mum morobo eöt tua talien xarnang i maaaa, ma morobo eöt tua öaxanan ine xöbo lalaa xirip nang mum bo wewet. Ma xöbo tatalien deek kirip pe mum, irabo nangen a inone, ma a nanase re mum ulamun e God irabo taxin nana.

<sup>11</sup> Maa me seseng bölök bara mum morobo kip abo lölös eöt ma lölös taxin saxit te ine bara morobo tuu lölös arixe ma balawapat kölöme xöbo tiip,

<sup>12</sup> ma bara mum morobo tengen deek ma axanan urungan kö Tamana ire ewe ine iri pet eörin e mum pua kinis arixe ma nangadi runon te God ewe idi nang te kisisik kö maras.

<sup>13</sup> Me ine ewe nang ixo öro ire xalik a kinis se ire xö ene lölös möxö xödxödö ma ixo ömen lo ire urungan kölöme xö kingdom möxö Barok ke ine ewe i maaaa xöba rö ine.

<sup>14</sup> Ma a Barok ke ine iat ewe nang ixo kun ölanglanga ire nang ixo döxömen tewe abo tatalien saban te ire.

### *Krais i taxin köbo lalaa xirip*

<sup>15</sup> Me Kraiss a malalar te God ewe nang tekara pere ine. Kraiss i xarnang a sisila ne barok, möxösa, a kinis se ine i taxin saxit köbo lalaa xirip nang God ixo uxis.

<sup>16</sup> Ma kinis se ine i taxin köba bira, möxösa, God ixo uxis abo lalaa xirip kö limine e Kraiss, abo lalaa riso lömö xö watmaep ma mera xö pu, abo lalaa ire tabo pere ma nang tekarako eöt tua werwere, ma abo mangana tano xarna na: abo sisila me idi ewe idi nang a lak lölös me ewe idi nang tobo ekure. Idi xirip na, God ixo uxis idi xö limine e Kraiss ma rua ii öraxin e Kraiss.

<sup>17</sup> Me Kraiss iat ixo kis mesila xöbo lalaa xirip me idi xirip te kis deek kö ene rorop pe ine.

18 Ine a sisila raxin möxö marakörö ne lotu, me idi a lewene aine ine. Ine a unine to re idi, möxösa, ine a sinila ne tinaru kaa xalik a minet, ma ixo tuu kaa sila bara irabo taxin saxit köbo lalaa xirip.

19 Krai i xarna na, möxösa, God ixo axanan bere Krai irabo wöwö mabo lalaa deek kirip nang God ibo wöwö sik min.

20 Ma xö tinörön kö Barok ke ine, God ixo maaa bara irabo xikip puxus abo lalaa xirip baling urungan te ine. Ixo bulus a malum ma dee re Krai kö öxöno sölöxöröp. Io, ixo kip puxus öbaling abo lalaa xirip mera xö pu ma meriso xö watmaep.

21 Mesila mum moxo kis tewe xalik e God ma moxo melentexin ine me mum moxo wewet abo tatalien saban.

22 Ma lamun na im, God iri lamus puxus e mum urungan te ine xarnang abo ais se ine xö minet möxö lewene aine e Krai sua öraru e mum kö wawara re ine. Io nang, mum morobo madakdak ma kaim im pe biling ma re sasaban kölöme re mum.

23 Ma lamun mum morobo mana tuu dik sik kö nunu re mum ma ganim e mum pua taxase xalik a tatalien ne xixiset ulamun abo lalaa deek nang mum moxo ölangen ulamunon kölöme xö tinenge deek bara mum morobo kip lo. Ma ina tinenge deek na nang idi toxo palas tinenge min urungan kö nangadi mera xö öxöno lagunon. Me e, e Pol, e a önga tultul möxö ina tinenge deek na.

*Pol ixo rörön lölös sua a lotu*

24 Na im e axanan köba ulamun abo kinadik i uban e rua gene mum. Me e kip ina kinadik kö lewene aike rua öxawam abo kinadik ke Krai nangen bang i malaa sik. Me e xobo xikip inabo kinadik kua gene a lewene aine ine, ma a aine ine e mum abo marakörö ne lotu.

25 E xoro kip a tinörön ne rorop ulamun e mum a marakörö ne lotu, möxösa, God ixo isik ina tinörön tö e bara arabo pet bira rua wewet ödeek e mum. Ixo isik ina tinörön te e bara arabo öxawam ödeek a tinörön möxö palas tinenge ulamun e God.

26 Ma ina tinenge na nang ixo umixen kalik a nangadi möxöbo awat mesila. Ma lamun iri wösö im kö nangadi runon iat te ine me nixinen.

27 God ixo maaa rua ömaras idi ulamun ina laa nang ixo mun sik ma nang irabo wadöane ödeek ewe idi nang kaim bara idi abo Judeia bölök. Ma ina laa nang ixo mun sik, i bira, bere Krai i kisisik ke mum, ma möxö ina na i turunon saxit bere mum morobo laxa xö mariris taxin te God.

28 Me mem bo palas tinenge ulamun e Krai urungan köbo mangana nangadi xirip. Me mem me ötumarang me

mem me uusu idi mabo nanase xirip bara idi tabo ot deek esexere kōlōme re Krai nang mem me lamus idi urungan kō wawara xō God.

<sup>29</sup> Ma ina unine niang e rōrōrōn lōlōs. E bo lōlōlōs kōba eōt ma lōlōs taxin te ine nang ibo rorop e min bara arabo pet bie.

## 2

<sup>1</sup> Me e maaaa bere mum morobo maras bere e rōrōrōn lōlōs kōba rua gene e mum ma rue idi bōlōk mee Laudisia ma rue idi xirip bōlōk ewe idi nang kaim bang kō werwere e.

<sup>2</sup> E rōrōrōn lōlōs bira, bara arabo öxaxat abo balna idi ma bere idi tabo öng mon kōlōme xō abalamu egilas se idi bara tabo wōwō arixe ma nanase raxin kirip pua ösöxō ina laa nang God ixo umixen, me ine iat e Krai.

<sup>3</sup> Ma abo mangana nanase xirip i kis suxume sik kōlōme re Krai xarnang a önga bubulus deek.

<sup>4</sup> E tōngōsen e mum minabo lalaa na xalik ke öng ibo lamus örorōxō lo e mum ma mangana tinenge lōlōs nang i wawara bara i turunon.

<sup>5</sup> I turunon bara lewene aike i kobo kis arixe sik me mum na. Ma lamun a tanoke i kis arixe sik me mum me e axanan nang e ösöxō xulen bara i töxödös abo tatalien te mum ma bara abo nunu re mum i tuu lōlōs sik kōlōme re Krai.

*Ire te langlanga xalik abo warkurai möxō tödi mon*

<sup>6</sup> Io nang, xarnang mum moxoro kip lo e Krai Jisas bere ine a Orong ke mum, mum morobo mana talien eōt ma kinis se mum kōlōme re ine.

<sup>7</sup> Mum morobo mana tuu lōlōs sik kō kinis se mum kōlōme re Krai me mum morobo ölölös abo to re mum kōlōme re ine. Mum morobo mana tuu lōlōs sik kōbo lalaa xirip mum moxoro nunu xōnan xarnang idi toxoro usu e mum bie. Me mum morobo mana wōwō xōba ma tatalien möxō tengen deek urungan te God.

<sup>8</sup> Mum morobo mana balaure ödeek e mum kalik ke öng irabo lamus örorōxō lo e mum urungan kō dinödöm tataun tua kubus dik e mum. Inabo mangana dinödöm i das kalik abo inausu xōbo nangadi mon. I das kalik abo nanase mon mera xō pu ma kaim bara mere Krai.

<sup>9</sup> Mum morobo mana ebalaure deek xarna nang, möxōsa, abo lalaa xirip mere God i kis se Krai ewe ixo wanot kō aine tödi.

<sup>10</sup> Me God iri pet e mum bara mum korobo sasaxan ulamun tebo lalaa xabise kōlōme re Krai, ine ewe i taxin saxit kōbo mangana tano xirip nang ewe idi tobo ekure.

<sup>11</sup> Xō kinis se mum kōlōme re Krai i xarnang bara e Krai ixo muu a tatalien möxō xurxuru rewe a önga xōnō

möxö lewene aine e mum. Ma lamun kaim bara xarnang a nangadi mon idi tobo wewet arixe mabo limine idi. Kaim. Kraisi iat ixo kip tewe a lölös mera xö pu xalik a to re mum.

<sup>12</sup> Me God ixo pömös e mum arixe me ine nang idi toxo baptais e mum. Ma xö nunu re mum kölöme xö lölös se God ewe ixo öraru e Kraisi kalik a minet, God ixo öraru e mum arixe mine.

<sup>13</sup> Mesila mum moxoro met nang mum moxo pet abo tatalien saban ma nang ina lölös mera xö pu ixo malaa sik bang kölöme xöbo to re mum. Ma lamun God ixo öro e mum me Kraisi. Ixo döxömen taun abo tatalien saban te mum.

<sup>14</sup> Abo warkurai te Moses ixo puk ire mabo sasaban, ma inabo warkurai iat toxo eka ögarin ire. Ma lamun God ixo kip tewe a lölös möxö inabo warkurai nang ixo tut abo apuk lömö xö sölöxöröp.

<sup>15</sup> Ma nang God ixo kip tewe abo lölös möxöbo mangana tano ewe idi tobo ekure, ixo bulus osen bara kaim im idi mere lölös, ma xarnang a önga umri raxin, ine ixo silien idi xarnang abo iuo ewe nang ixo pas ösu idi xö tinörön möxö öxöno sölöxöröp.

<sup>16</sup> Möxö ina na, ganim e mum pa ömaraxen lo re öng bara irabo kure e mum ulamun a lasa i deek kua enen ma rua ininim. Ma ganim pa ömaraxen lo re öng bara irabo kure e mum bölök ulamun abo bung taxin möxö lotu, bara a texe maxat, bara a bung Sabat.

<sup>17</sup> Ma inabo mangana tatalien kirip i eöt mon ma malalar möxöbo lalaa nang i eka inuanot. Ma lamun abo lalaa turunon ulamunon, ire te parasiwin kölöme re Kraisi.

<sup>18</sup> Ma dauleng tobo etöxö bere te ii ölik idi iat, me idi tobo lolotu wösöt a angelo, ma tobo rengreng ulamunon abo mangana winawara möxö tanono. Ma lamun ganim e mum pua öbala lo idi rua kure e mum ulamun a lasa i deek nang mum mo maaaa bere mum morobo pet. Abo dinödöm saban mon te idi i pet öraxin öbaling idi iat ma kaim pe unine bere idi tabo pet bie.

<sup>19</sup> Abo mangana duöng bira, idi tere tawes kalik e Kraisi ewe nang a öxöno ire. Ine a öng nang ibo top ödeek sik a lewene aine xirip iat bara a lewene aine irabo kip a lölös ma irabo ewasum deek ma rorop möxöbo lölös möxö awasum, bara irabo das xarnang e God i maaaa bara irabo das bie.

<sup>20</sup> Mum moxoro met arixe me Kraisi me mum mo langlanga xalik a mangana nanase mera xö pu. Io nang, bara bule mum mo talien xarnang bere mum bang mera xö öxöno lagunon? Ruasa mum bo bulbulus öbaling e mum iat kölöme xö ene abo warkurai?

<sup>21</sup> Inabo warkurai i tengen bara, “Ganim e mum pua rōrōrōn ina na! Ganim e mum pua nanamienin ina na! Ganim e mum pua sisigi ina na!”

<sup>22</sup> Inabo lalaa na xirip tabo kawam tewe nang ire tobo rōrōrōn min bara tobo enen bara tobo wewet lasa min. Ganim e mum pua mumuu inabo mangana warkurai, möxōsa, i das kalik abo arile ma abo inausu möxō nangadi mon.

<sup>23</sup> I turunon, uleng te dōxōmen bara idi ma nanase nang bere idi tobo mumuu inabo warkurai nang i tengen bara öng irabo mana lelewi a balna rua pet lotu, bara irabo bulus ösu öbaling ine iat, bara irabo ögarin a lewene aine. Inexalik bara kaim. Inabo tatalien i karabo top ulik a öng kua tinuu wi abo maaaa saban.

### 3

#### *Ire tabo sige abo tatalien maxat*

<sup>1</sup> Möxō ina na, abo kat te mum irabo mana muu abo lalaa meruso lömō re Kraiss ewe nang i kisisik kō lime tuun te God, möxōsa, God iri öraru e mum arixe me Kraiss.

<sup>2</sup> Mum morobo mana uru a dinödöm pe mum kōbo lalaa meruso lömō, ma kaim bara xōbo lalaa mera xō öxōno lagunon.

<sup>3</sup> Ruasa, möxōsa, mum moxoro met, ma abo to im pe mum i kis sixume sik arixe me Kraiss kōlōme xō God.

<sup>4</sup> Ma nang bere Kraiss ewe ine a unine to re mum irabo wanot maras, io, mum bōlök kina axana bung morobo wanot maras me ine arixe ma mariris taxin.

<sup>5</sup> Io nang, mum morobo mana sexomet tewe abo mangana tatalien mera xō öxōno lagunon. Mum morobo sexomet tewe abo tatalien ne ilawa mabo tatalien biling bira, ma inabo mangana mamasixine bōlök. Xarna na bōlök, mum morobo mana sexomet tewe abo maaaa saban ma tatalien ne neneek a lalaa xō öng kabise. Ma ina tatalien i eöt ma tatalien ne lotu wösöt a petpuo.

<sup>6</sup> Inabo mangana tatalien i unine nang a laie re God irabo subu kaa rō idi abo mangana nangadi biringan.

<sup>7</sup> Mum bōlök, mum moxobo talien bira xōbo nuan ne to re mum nang moxo kis bira mesila.

<sup>8</sup> Ma lamun na im mum morobo mana kip tewe inabo tatalien kirip kalik e mum. Mum morobo mana kip tewe abo mangana laie ma bala kadik kō idi xabise. Me mum bele tengen ögarin te öng, me mum morobo bulus tewe abo tinge biling kalik abo ngala mum.

<sup>9</sup> Mum bele etōxō baling ke mum, möxōsa, mum moxoro kip tewe a to me lorexe arixe ma tatalien te ine,



<sup>10</sup> me mum moxoro sige a to maxat nang God ibo ömaxat xarnang a malalar kö God iat ewe ixo uxis ina to. Ma ibo ömaxat ine bira urö mum pua ösöxö ödeek ine.

<sup>11</sup> Ma xina to maxat, abo Judeia me idi nang kaim bara abo Judeia, idi te eöt mon. Idi ewe nang toxo kuru rewe abo lewene aine idi me idi ewe nang tekobo kuru rewe a lewene aine idi, idi te eöt bölök. Ma i eöt bira bölök köbo tultul me idi ewe nang tokobo kis kö ene a lölös möxö önga orong. Ma nang bere idi te pere ösu nöngön, möxösa, nöngön meringan kö palaa saxit bara nöngön u xabise, kaim pe laa. Krais kalik mon nang i taxin ma i kis kölöme re ire xirip.

<sup>12</sup> Mum abo duöng nang God ixoro pere kos lo, me mum abo duöng madakdak ewe God i maaaa rö mum. Io nang, mum morobo mana sige a tatalien ne bala maris me mum morobo pet a tatalien deek urungan tö idi xabise. Mum morobo ii ölik öbaling e mum ma morobo mana kis xarnang a nangadi ödödö. Me mum korobo laie wasaxit kölöme xöbo tiip.

<sup>13</sup> Mum morobo mana öbala lo idi xabise ewe idi te saban tö mum. Mum morobo döxömen tewe abo tiip nang mum mo örasen bara te ögarin e mum min. Mum morobo mana döxömen tewe abo sasaban te idi xabise xarnang a Orong ixo döxömen tewe abo sasaban te mum.

<sup>14</sup> Me mum morobo mana sige a tatalien ne abalamu meruso lömö xöbo tatalien kirip. A tatalien ne abalamu, ine nang i iis arixin ire xirip bara ire tabo öng turunon kölöme xö tinuu arixe re ire.

<sup>15</sup> Mum morobo mana ömaraxen lo a malum pe Krais sua sisilien abo bala mum, möxösa, God ixo kuwe lo e mum pua kinis arixe xö önga lewene aine bara morobo kis ma malum ebasin te mum. Me mum morobo mana tengen deek urungan te ine.

<sup>16</sup> A atöngösen ulamun e Krais irabo mana kis lölös sik köbo bala mum. Xarna na, mum morobo eusu ma morobo ötumarang ebasin kaluluonin e mum arixe mabo nanase xirip mabo sinö möxö Buk Tabu mabo sinö ne lotu mabo mangana sinö madakdak bölök. Ma nang bere mum mo sö bie, mum morobo mana tengen deek uruso xö God meringan kölöme xöbo bala mum.

<sup>17</sup> Ma xöbo lasa nang mum mo tengen ma xöbo lasa nang mum mo pet, mum morobo pet kö esene e Jisas a Orong, ma meringan kö kinis se mum pe Krais, mum morobo mana tengen deek urungan kö God a Tamana ire.

*A barama tabo talien bule?*

18 Mum a bung une, mum morobo ii ölik e mum köbo usuo mum, möxösa, ina na i töxödös kö kinis se mum kölöme xö Orong.

19 Mum a bung körö, mum morobo maaaa xöba ulamun abo usuo mum ma ganim e mum pa bala laie re idi.

20 Mum a bung baroxorok ma bung bangalik, mum morobo mana tame abo tama mum mabo nene mum köbo mangana lalaa xirip, möxösa, ina tatalien i öaxanan a Orong.

21 Mum abo tamana bung baroxorok ma bung bangalik, ganim e mum pa öngat a bung barok ke mum, xalik idi tobo örasen bara idi tekebeöt tua wewet eörin te önga laa.

### *Abo tultul mabo orong*

22 Mum abo maris ne tultul mum morobo mana tame abo orong taxin te mum mera xö pu xöbo lalaa xirip. Mum morobo mana öaxanan idi xöbo bungbung kirip, ma kaim bara xö bung kalik mon nang idi te ngökngök ke mum. Mum morobo tame idi ma turunon kö bala mum ma möxösa, mum mo ii a Orong.

23 Ma lasa nang mum mo pet, mum morobo mana pet ma lölös kirip pe mum xarnang bara mo wewet urungan kö Orong, ma kaim bara urungan kö nangadi mon,

24 möxösa, mum mo ösöxö bara mum morobo uruoxe ina kinis se mum meriso xö Orong xarnang a inone malawang ke mum. Io, e Kraiss im, a Orong, ewe nang e mum mo rörörön tö ine.

25 Ewe nang i pet a tatalien saban irabo kip lo a xinuxun eöt ma sasaban te ine. God irabo isik ötöxödös iat a xinuxun. Ine i karabo pet ödeek a öng ma irabo ögarin a öng kabise.

## 4

1 Me mum abo orong, mum morobo mana isik a nang i töxödös ma i deek urungan köbo tultul te mum. Möxö mum mo ösöxö bara mum ma önga Orong bölök angen nuso xö watmaep.

*Ire tabo seseseng ma tabo wöwörö bule mabo tabuno nunu*

2 Mum morobo mana bönö sik iat ma sineseng. Ma nang e mum mo seseseng, a dinödöm pe mum irabo mana maras ma morobo tengen deek kö God.

3 Me mum morobo mana seseng kö mem bölök, bere God irabo sawang a marna ngas lamun e mem marabo eöt tua rengrengen ot abo lalaa nang i mun sik kölöme re Kraiss. Me e re kisisik na xö gunon ne aömokorot, möxösa, e eötöngösen ma ina tinenge deek.

<sup>4</sup> Mum morobo mana seseng bara e rabo eöt tua rengren-gen ömaras ulamun ina tinenge deek xarnang arabo mana pet bie.

<sup>5</sup> Nang e mum mo kis arixe mabo tabuno nunu, mum morobo mana muu a dinödöm deek nang mum morobo talien kaluluonin idi, me mum morobo pet a dedeek urungan te idi xöbo axana bung kirip bara i eöt tö mum bara morobo pet bie.

<sup>6</sup> Abo winörö re mum arixe me idi irabo mana wöwö ma tinenge nang i deek ma i nanamien lamun mum morobo maras bara mum morobo balu idi a öngöng bule.

### *Abo tinenge ne aöga*

<sup>7</sup> Ma a tönö deek ke ire, e Tikikus, irabo töngösen e mum mabo lalaa xirip ulamun e. Ine i tuu arixe me e xö tinörön kö Orong ma a tultul deek ine.

<sup>8</sup> A unine runon bere eka uguran ine urungan tö mum bara irabo tengen ömaras sö mum bara a to re mem i bubule im ma bara irabo öxaxat a bala mum.

<sup>9</sup> Tikikus irabo ot arixe me Onesimus, a tönö deek ke ire. A tödi turunon ine, me ine a öng meringan te mum. Idu tabo töngösen ömaras e mum im ulamun abo mangana lalaa xirip nang i orot ta.

<sup>10</sup> Aristakus ewe i kis arixe me e ra xö gunon ne aömokorot i öga lo e mum. E Mak bölök, a tönö e Banabas. Mum moxoro ölangen a tinenge lamun e Mak, ma nang bara i wan urungan tö mum, mum morobo öga lo ine.

<sup>11</sup> Me Jisas, ewe nang tobo tengen bölök ine me Justus, ine bölök i tile a tinenge ne aöga urungan te mum. Idiet kalik mon nang ewe idiet abo Judeia kaluluonin sik idi nang te tuu arixe me e xö tinörön ulamun a kingdom kö God. Me idiet toxobo öxaxat köbanin e.

<sup>12</sup> Epaparas, ewe a öng mere mum ma a tultul te Krais Jisas, ine bölök i tile a tinenge ne aöga urungan te mum. Ine ixobo seseseng söxsöxö ulamun e mum ma lölös taxin bara e mum morobo maras ulamun abo lalaa God i mamaa bara mum morobo pet ma bara morobo maruxo xönan.

<sup>13</sup> I rörörön lölös sua gene mum ma ulamun idi bölök niang ee Laudisia me Irapolis. Me e eöt tua rengren-gen bira rö mum, möxösa, e ösöxö bara i turunon.

<sup>14</sup> E Luk a tene aule, a ais deek ke mem, idu me Demas, idu bölök te tile a tinenge ne aöga urungan te mum.

<sup>15</sup> Mum morobo isik a tinenge ne aöga re e urungan köbo tönö ire kölöme re Krais niang Laudisia. Ma uruso bölök kö une nang e Nimpa ma xö marakörö ewe nang idi tobo xisixis arixe rua lotu ringan ee xö gunon kö ina une.

<sup>16</sup> Ma nang bara tere kos kirip ina ginigeet tingan kö wawara re mum, i deek bara mum morobo döxömen lo bara tabo mana kos bölök urungan kö marakörö ne lotu niang Laudisia. Me mum morobo döxömen lo bölök kua xokos a ginigeet meringan Laudisia.

<sup>17</sup> Mum morobo tengen te Arkipus bara, “Nöngön örobo balaure ödeek nöngön bara örobo pet eörin a tinörön nang u xo uruoxe xö kinis se nöngön kölöme xö Orong.”

<sup>18</sup> E, e Pol, e geet ina ginigeet ne aöga ma limeke iat. Mum morobo mana döxömen lo e nang e kisisik kö gunon ne aömokorot. A abalamu urungan tö mum.

## A Sisila ne Ginigeet te Pol urungan köbo TESALONIKA

Pol ixo sulo a lotu ringan Tesalonika xö xönö mee Masedonia. Pol ixo maaaa xöba ulamun abo Tesalonika ma ixo muu a tatalien deek kalik mon nang ixo to kaluluonin idi (pere 1 Tesalonika 2:1-12). Ma lamun a sasaban taxin ixo ot kö lotu ringan, ma abo Kristien toxo ugut e Pol bara irabo ulo wes, xalik irabo iuo (Aposol 17:1-10). Io, Pol ixo wan uruo Beria, ma melamu im ixo wan uruo Aten. Ma ixo tile öbaling e Timoti meringan Aten urungan Tesalonika (1 Tesalonika 3:1-5), möxösa, ixo dödöm köba ulamun abo Kristien tiso Tesalonika kölöme xöbo tiip (2:13-3:10). Melamu im, Pol ixo wan uruo Korin. Ma bere Timoti ixo tawuxus ma ixo tönngösen e Pol ma nunu ma inemarse xöbo Tesalonika (3:6), Pol ixo tile önga ginigeet urungan te idi rua öxaxat idi ma rua usu idi ulamun abo tatalien deek (4:1-12; 5:12-22). Pol ixo usu idi bölök ulamun a tinawuxus se Kraiss ma ulamun a tinaru kaa xalik a minet köbo Kristien, möxösa, Pol ixoro kis aulik me idi mesila ma ixoro wan kalik idi, me idi kaim kö marmaras esexere xö ina laa na (1:9; 4:13-5:11). Inabo lalaa möxöbo axana bung möxö xakawöm a laa raxin kö ina nine ginigeet te Pol urungan köbo Tesalonika (pere bölök 2 Tesalonika 2:1-12).

<sup>1</sup> E, e Pol, arixe me Sailas me Timoti, meet me tile ina tinenge na urungan tö mum a marakörö ne lotu niang Tesalonika, ewe mum mere God, a Tamana ire, me Jisas Kraiss, a Orong ke ire.

A abalamu ma malum irabo kis arixe me mum.

*Pol ixo tengen deek ulamun a nunu xöbo Tesalonika*

<sup>2</sup> Meet mobo rengrengen deek kö God ulamun e mum kirip, nang e meet mobo rengrengen e mum kölöme xöbo sineseng ke meet.

<sup>3</sup> Me meet mobo döxömen lo xö wawara xö God, a Tamana ire, abo tinörön deek ke mum nang i wanot möxö nunu re mum, mabo tinörön lölös se mum nang i wanot meringan kölöme xöbo abalamu re mum. Me meet mobo döxömen lo bölök bara mum möxöbo tuu lölös sik iat tua xixiset ma balawapat ulamun e Jisas Kraiss, a Orong ke ire.

<sup>4</sup> Io, mum abo töke kölöme re Kraiss, ewe God ibo maaaa xöba rö mum, meet me ösöxö bere God ixo pere kos lo e mum.

<sup>5</sup> Me meet me ösöxö bira, möxösa, abo palas tinenge re meet arixe ma atönngösen deek i koxobo wan urungan te

mum ma tinenge mon. Kaim. Ixo wan pösöt e mum ma lölös arixe ma Töxödös ne Tanono. Me mum moxo pere bere meet moxo nunu bara ina tinenge na i turunon. Me mum mo ösöxö e meet, bara a mangana nangadi bule e meet nang meet moxo kis kaluluonin e mum pua gene mum.

<sup>6</sup> Me mum moxo muu ödeek abo to re meet arixe ma Orong bölök bira. Kaluluon köbo kinadik tataxin mum moxo öga lo ina atöngösen arixe ma axanan nang a Töxödös ne Tanono ixo isik.

<sup>7</sup> Ma lamun ina na, mum mo xarnang a önga malalar deek nang abo tene nunu xirip kölöme Masedonia me Akaia, idi tabo muu.

<sup>8</sup> A atöngösen maras ulamun a Orong i koxobo wanot meringan kalik e mum urungan Masedonia me Akaia xalik mon. Kaim. A atöngösen ulamun abo nunu re mum kö God, i wan kö boxönö xirip. Möxö ina na, meet koxobo mamaa ra rengrengen öbaling ke lalaa ulamunon.

<sup>9</sup> Möxö idi iat toxobo rengrengen bere mum moxo ömaraxen lo e meet bule xö axana bung nang meet moxo wan urungan te mum. Me idi te rengrengen bara bule e mum moxo tawuxus urungan kö God xalik abo petpuo rua lotu wösöt a God turunon nang i to sik,

<sup>10</sup> ma rua kinis xiset a Barok ke ine meriso xö watmaep, ewe nang God ixo öraru ine xalik a minet. Ma a Barok ke ine, e Jisas, ewe irabo ölanglanga ire xalik a laie re God nang irabo wanot melamu.

## 2

### *A mangana to re Pol kaluluonin abo Tesalonika*

<sup>1</sup> Io, mum abo töke kölöme re Kraiss, mum mo ösöxö bara a nuan te meet urungan tö mum kaim bara a laa tataun. Ine ma unine.

<sup>2</sup> Mum mo ösöxö bara mesila meet moxo kip a kinadik ma toxo ögarin e meet tingan Pilipai. Inexalik nang e meet moxo wanot pösöt e mum, God ixo öxaxat e meet tua tinenge ma atöngösen deek ke ine urungan tö mum, ma kaim e meet tua ningiang muu a laie xö nangadi nang toxo mamaa rua tinuu wi e meet.

<sup>3</sup> Ma nang meet moxo öxaxat e mum pua nunu, meet kaim kö mumu a dinödöm saban, me meet kaim kö mamaa rua ömamang e mum urungan kö laa i koxobo turunon.

<sup>4</sup> Ma lamun meet moxobo palas tinenge arixe ma atöngösen deek eöt ma mamaa re God, möxösa, God ixoro perexulen e meet bere meet me eöt tua palas tinenge ma atöngösen deek. Ma kaim bere meet me mamaa rua

öaxanan a nangadi, ma lamun tua öaxanan e God ewe nang ibo werwere muu a balana e meet.

<sup>5</sup> Io, mum mo ösöxö bere meet koxobo ölolot e mum pua gene önga laa, me meet koxobo wanot xarnang abo tene seng tuluwok nang tobo umingen a tatalien te idi. God i eöt bara irabo sixaut ina niang kö mum.

<sup>6</sup> Meet koxobo wewet te lalaa bere mum bara a nangadi xabise tabo ölet e meet.

Meet mexebe öriip abo to re mum, möxösa, meet abo aposol te Kraiss.

<sup>7</sup> Ma lamun meet moxo tatalien ödödö kaluluonin e mum, xarnang a nago ibo balbalaure ödeek a bung baroxorok ke ine.

<sup>8</sup> Me meet moxo maaaa xöba re mum, io nang, meet moxo axanan tua tabaa e mum ma atöngösen deek. Inexalik kaim bara niang kalik. Meet moxo axanan bölök kua isik kirip a to re meet tö mum, möxösa, mum kölöme xöbo kat te meet.

<sup>9</sup> Abo töke, mum mo döxömen lo abo tinörön lölös mabo malawang ke meet kaluluonin e mum. Meet moxo rörörön dömön ma xaken lamun abo sasaxan te meet iat, xalik meet bo öriip e mum nang meet moxo palas tinenge re mum ma atöngösen deek ke God.

<sup>10</sup> Mum moxo pere me mum mo ösöxö a turunon ulamun e meet nang meet moxo kis kaluluonin e mum abo tene nunu. Me God bölök i ösöxö ina na. Meet moxobo mumuu abo tatalien madakdak ma moxo töxödös, ma kaim pe öng irabo puk e meet mere sasaban.

<sup>11</sup> Me mum mo ösöxö bere meet moxobo talien urungan te mum xarnang a tata ibo wewet kö bung baroxorok ke ine iat.

<sup>12</sup> Meet moxobo öxaxat e mum ma moxobo seseng ölölös e mum bere mum morobo talien eöt kö maaaa xö God, nang ibo xukuwe lo e mum urungan kö kingdom ma kinis ne mariris se ine.

<sup>13</sup> Me meet bo rengrengen deek ke God bölök, möxösa, nang e mum moxo ömaraxen lo abo tinenge re God nang mum moxo tame xalik e meet, mum kaim kö ömaraxen lo xarnang bara abo tinenge xö nangadi mon. Inexalik mum moxo ömaraxen lo bara a tinenge xö God, ma i turunon bara a tinenge xö God iang. Ma ina tinenge nang ibo rörörön kölöme re mum nang mo nunu.

<sup>14</sup> Abo töke, ina na i maras, möxösa, mum mo eöt xarnang a nangadi möxöbo lotu re God niang Judeia nang idi mere Kraiss Jisas. Mum moxo kip abo kinadik kalik a nangadi re mum, xarnang abo lotu re Kraiss niang Judeia toxo kip kalik abo Judeia.

15-16 Ma inabo Judeia nang toxo sexomet e Jisas, a Orong, arixe mabo propet, ma toxo tile rewe bölök e meet. Idi tobo walwalar tua tinuu wi e meet bere xalik e meet bo tengen a tinenge deek urungan tö idi ewe nang kaim bara abo Judeia, xalik idi tobo kip a ineöro. Ma nang idi tobo wewet bira, idi tekara öaxanan e God. Idi tobo mimixenin a nangadi xirip. Ma nang idi te pet bira, idi te öwöwö xöbanin abo to re idi ma magingin saban. Ma na im, a laie re God iri wanot pösöt idi.

*Pol ixo dödöm köba ulamun a nunu xöbo Tesalonika*

17 Abo töke, nang idi toxo esunenin e meet tua nuan kalik e mum, me mem moxo wan talu e mum kö uleng ne texe, meet moxo lölölös iat bere meet marabo pere öbaling e mum. Turunon, meet moxo wan, ma lamun a dödöxömen te meet ixo kisisik iat te mum.

18 Meet moxo maaaa rua tinawuxus baling urungan te mum. Me e, e Pol, e xo walar a oleleng ne bung kua inuanot urungan. Inexalik e Satan ixo tuu wi e meet.

19 Io, meet moxo maaaa rua tinawuxus urungan, möxösa, bere Jisas, a Orong ke meet, irabo wanot, me meet marabo tuu xö wawara re ine, me mum iat a unine bere meet marabo balawapat, ma bere meet marabo kip a axanan, ma bere meet marabo kip a ineölolot.

20 Turunon saxit, meet mobo söwöng ke mum me mum bo öaxanan e meet.

### 3

1 Io, nang bere meet moxo tapunuk köba ulamun e mum, ma lamun i kebeöt bere meet marabo pere e mum, io, meet moxo döxömen bara i deek nang bere maa marabo kis aulik kingan Aten.

2 Me maa moxo tile e Timoti, a tönö ire, ewe nang ibo rörörön arixe me maa rua gene a tinenge deek ke Kraiss. Me maa moxo tile ine rua ölölös ma rua öxaxat e mum kö nunu re mum,

3 bara xalik ke öng ke mum i karabo tuu dik köbo eler. Mum iat mo maras bara God i maaaa bara ire tabo laxa xö inabo tiip na.

4 Turunon saxit, bere meet moxo kis arixe me mum, meet moxobo rengrengen söxö re mum bere abo eler tabo wanot te ire. Me mum mo öxöxö bara iri wanot im.

5 Möxö ina na, nang e xo maaaa xöba rua werwere e mum, ma lamun e kebeöt, io, e xo tile e Timoti urungan te mum bara rö e rua öxöxö ulamun a nunu re mum, xalik a tene ölelewen ibo muu a mangana ngas sua usubu e mum ma tinörön te meet ibo laa tataun.

*A tinenge maras se Timoti ixo öaxanan e Pol*



<sup>6</sup> Io, na mona mon e Timoti iri tawuxus pösöt e maa. Me ine ixo kip ot a tinenge deek ulamun a nunu ma a abalamu re mum. Me ine i töngösen bölök e maa bere mum bo dödöxömen lo abo lalaa deek ulamun e meet, ma bere mum mo maaaa bere mum morobo pere e meet xarnang e meet bölök mina mangana maaaa urungan tö mum.

<sup>7</sup> Io, abo töke kölöme re Krais, nang meet moxo ölangen ulamun a nunu re mum, ina tinenge ixo öxaxat e meet ulamun e mum kaluluonin abo tiip ma kinadik ke meet.

<sup>8</sup> Ma na im, abo to re meet i deek köba, möxösa, mum mobo ruruu lölös sik kö Orong.

<sup>9</sup> Meet moxo axanan köba ulamun e mum kö wawara re ine. Me meet kebeöt tua tengen deek urungan te God eöt ma ina axanan nang meet moxo örasen.

<sup>10</sup> Xöbo bungbung kirip, xö xaken ma dömön, meet moxobo lölös sik ma sineseng kua werwere öbaling e mum ma rua rorop e mum köbo sasaxan möxö nunu re mum.

#### *A sineseng ke Pol*

<sup>11</sup> Io, meet me seseng bere God, a Tata re ire, me Jisas, a Orong ke ire, irabo tagure a ngas se meet urungan tö mum.

<sup>12</sup> Me meet me seseng bara a Orong irabo öraxin köbanin a maaaa re mum kaluluonin e mum iat abo tene nunu ma a nangadi xabise xirip bölök xarnang e meet me pet tö mum.

<sup>13</sup> Me meet me seseng bere God irabo ölölös a to re mum, xalik ke öng i kebeöt tua wupuk e mum, ma inexalik bere mum morobo madakdak kö wawara re God, a Tamana ire, xö axana bung bere Jisas, a Orong ke ire, irabo wanot arixe mabo tene töxödös se ine.

## 4

#### *Ire tabo öaxanan e God*

<sup>1</sup> Abo töke kölöme re Krais, rua öxöwöm inabo tinenge na, meet me eka rengrengen ina na ma i bira: meet moxo tengen ömaras e mum bara mum morobo kis bule rua öaxanan e God. Ma i turunon, mum mobo kisisik biringan. Ma lamun meet me seng e mum me meet me öxaxat e mum kölöme re Jisas a Orong bere mum morobo taxase kaa xö ina tatalien deek na,

<sup>2</sup> möxösa, mum mo ösöxö ina tinenge lölös nang meet moxo tabaa e mum min kölöme xö esene Jisas, a Orong.

<sup>3</sup> A maaaa re God bere mum morobo kis pes abo saban urungan köbo tatalien madakdak. Möxö ina na, mum morobo mana tuu wes xalik a tatalien ne ilawa.

<sup>4</sup> Ma öngöng ke mum irabo mana ösöxö rua balbalaure ödeek a aine iat muu a nang i madakdak ma a lak deek kö wawara xö nangadi.

<sup>5</sup> Ma ganim bara i muu abo maaaa raxin möxö tatalien ne ilawa xarnang ewe midi abo tabuno nunu nang tokoxobo ösöxö e God.

<sup>6</sup> Ma ganim bara öng irabo maru arixe ma une xö tönö kölöme re Krai. Ma i bele pet a sasaban bara i ömamang a tönö ine xarna niang, möxösa, a Orong irabo ömokorot ewe midi nang te pet inabo mangana magingin kirip, xarnang meet moxoro ötumarang e mum.

<sup>7</sup> Irabo deek bere ire tabo kis xarna na, möxösa, e God kaim kö xukuwe ire rua wewet a tatalien biling, inexalik bere ire tabo kis kö to i madakdak.

<sup>8</sup> Io niang, ewe a öng nang i mölök kalik ina tinenge na, ine i kobo mölök kalik a tödi. Kaim. I mölök kalik e God, ewe nang i tabaa e mum ma a Töxödös ne Tanono.

<sup>9</sup> Me meet kaim kö sasaxan bere meet marabo gegeet urungan te mum pua inemarse eli kaluluonin e mum, möxösa, God ixoro usu e mum bere mum morobo ebalamu kaluluonin e mum.

<sup>10</sup> Ma i turunon bere mum mobo wewet ina na kaluluonin abo tönö ire kölöme re Krai kö boxönö xirip Masedonia. Ma lamun, abo tönö e meet, meet me seng e mum bere mum morobo taxase kaa bölök kö ina abalamu urungan te idi.

<sup>11</sup> Me mum morobo mana bulus a dinödöm lölös sua sisilien e mum pua kinis malus, ma ganim pua nilaxa xöbo lalaa xö öng kabise nang bara kaim bere re mum, me mum morobo mana rörön arixe ma lime mum iat xarnang meet moxo tengen te mum.

<sup>12</sup> Io, mum morobo pet bira rua abo tabuno nunu tabo ii e mum, ma bere mum bele to muu a öng kabise rua bönbönöt abo sasaxan te mum.

### *A nuanot kö Orong*

<sup>13</sup> Abo töke meet, meet me maaaa bere mum morobo maras ulamun ewe midi nang toxoro met, xalik e mum bo tapunuk xarnang idi xabise nang tokobo xixiset ma nunu xö tinaru baling.

<sup>14</sup> Ire te nunu bere Jisas ixo met ma ixo taru kaa baling. Io nang, ire te nunu bölök bara Jisas irabo wanot baling, God irabo lamus e Jisas arixe me idi ewe nang toxoro met arixe ma nunu rö ine.

<sup>15</sup> A lasa nang meet me usu e mum min na, a ausu xö Orong, ma i bira: Ewe ire nang tabo to sik kö bung nang a Orong irabo wanot, ire takarabo sila re idi nang toxoro met.

<sup>16</sup> Ma lamun ire tabo ölangen a kinup taxin arixe ma inöno a önga sisila raxin möxöbo angelo ma a ginee möxö tauu re God, ma Orong iat irabo wan su meriso xö watmaep.

Me ewe idi nang toxoro met arixe ma nunu xö Kraiss, idi tabo sila rua tinaru kaa xö minet.

<sup>17</sup> Melamu xönan, ewe ire angen nang te to sik ma toxo wan lie ire, God irabo kip lo ire uruso lömö arixe me idi kölöme xöbo kubu rua asuo ma Orong lömö xö maup. Io niang, ire tabo kis arixe ma Orong ulorexe saxit.

<sup>18</sup> Möxö ina na, mum morobo mana eöxaxat kaluluonin e mum ma ina tininge na.

## 5

<sup>1</sup> Io, abo töke meet kölöme re Kraiss, mum kobo sasaxan bere meet marabo geet te tininge urungan te mum ulamun a axana bung nang inabo lalaa na irabo wanot,

<sup>2</sup> möxösa, mum iat mo ösöxö ödeek bara ina axana bung kö Orong irabo wanot xarnang a nuanot kö tene pinilo xö dömön.

<sup>3</sup> A nangadi tabo tengen, "Ire takarabo burin te laa. Ire ma malum." Io, xö ina axana bung iat a iuiuo raxin irabo wanot pösöt idi xarnang a kinadik möxö une ibo maaaa rua kip barok. Ma kaim pe öng irabo ulo wes kalik.

<sup>4</sup> Inexalik, mum abo töke meet kölöme re Kraiss, ina bung i karabo öwuwus e mum xarnang a tene pinilo, möxösa, kaim bere mum a bung baroxorok möxö ködö.

<sup>5</sup> Kaim. Mum kirip mo to kölöme xö maras möxö xaken. Ire tekara to kölöme xö ködö möxö dömön.

<sup>6</sup> Io niang, ganim ire ra pinaluso xarnang öngabo dauleng. Ire tabo mana laran ma dinödöm pe ire irabo maras.

<sup>7</sup> Idi nang tobo paliso, idi tobo paliso xö dömön. Mabo tene ininim, idi tobo ininim kö dömön.

<sup>8</sup> Ma lamun ire tebele xarnang abo tene ininim, möxösa, ire a nangadi möxö maras. Xarnang abo umri, ire tabo mana sige a nunu ma abalamu egilas xarnang a siot kapa. Ma xö ina tatalien ne xixiset ma balawapat bara tabo kip a ineöro, xarnang a at kapa, tabo ösige abo öxöno ire min.

<sup>9</sup> Möxösa, God i kobo pingit bere ire tabo örasen a laie re ine. Kaim. Ine i maaaa bara irabo öro ire kölöme re Jisas Kraiss, a Orong ke ire.

<sup>10</sup> Me ine ixo met tua gene ire, bere ire tabo kis arixe me ine. Kaim pe laa nang bere ire te to bere ire te met. Ire tabo kis arixe me ine.

<sup>11</sup> Io niang, mum morobo eöxaxat kaluluonin e mum ma morobo top a öngöng ke mum xarnang mum bo wewet.

*Ire tabo muu abo tatalien deek*

<sup>12</sup> Io, abo töke meet kölöme re Kraiss, meet me seng e mum pua ii idi nang toxobo rörörön lölös kaluluonin e mum, idi

nang toxobo balbalaure e mum ma toxobo tengen ögele e mum pua ötöködös e mum.

<sup>13</sup> Mum morobo döxömen öraxin idi ma morobo marase idi xöbo tinörön idi toxobo wewet. Me mum morobo bala malum kaluluonin e mum.

<sup>14</sup> Abo töke meet, meet me öxaxat e mum bere mum morobo ötumarang a nangadi lön, ma morobo öxaxat abo tabuno ngarau, ma morobo top idi nang kaim idi ma lölös, ma bere mum morobo balawapat urungan kö nangadi xirip.

<sup>15</sup> Mum morobo ebalaure deek bara ganim pe öng i balu a sasaban arixe ma sasaban. Inexalik mum morobo lölölös arixe rua wewet abo dedeek kaluluonin e mum ma urungan te idi xabise bölök.

<sup>16</sup> Mum morobo mana axanan sösöxö.

<sup>17</sup> Mum morobo mana seseseng sösöxö.

<sup>18</sup> Mum morobo mana tengen deek uruso re God ulamun abo lalaa xirip nang i ot pösöt e mum, möxösa, ina na a maaa re God urungan te mum nang mo kis kölöme re Krajs Jisas.

<sup>19</sup> Ganim e mum pa tinuu wi a tinörön kö Töködös ne Tanono.

<sup>20</sup> Ganim e mum pa mölmölök kalik abo tinenge ne propet.

<sup>21</sup> Inexalik bere mum morobo walar ödeek abo lalaa xirip. Me mum morobo töndik sik abo dedeek.

<sup>22</sup> Mum morobo tuu talu abo mangana sasaban kirip.

<sup>23</sup> Meet me seseng bere God iat ewe ibo isik a malum pe ire, irabo bulus elixilixin kirip abo to re mum kalik abo sasaban urungan kö tatalien töködös. Me meet me seseng bölök bere ine irabo balaure abo tanono e mum, abo bala mum, ma abo lewene aine mum kalik ke öng i kebeöt tua wupuk e mum mere sasaban kö axana bung bere Jisas Krajs, a Orong ke ire, irabo wanot.

<sup>24</sup> God ewe nang ibo xukuwe e mum, irabo pet ina na, möxösa, ine ibo wewet eörin abo tinenge re ine.

<sup>25</sup> Abo töke meet, mum morobo mana seseng ulamun e meet.

<sup>26</sup> Mum morobo öga lo abo Kristien arixe ma abalamu.

<sup>27</sup> E tenge lölös se mum kö esene Orong bere mum morobo kos ina ginigeet na urungan köbo tönö mabo saxana ire xirip kölöme re Krajs.

<sup>28</sup> A abalamu xö Orong ke ire, e Jisas Krajs, irabo kis arixe me mum.

## A Sese Öninöng ne Ginigeet te Pol urungan köbo TESALONIKA

Pol ixo geet ina ginigeet na melamu xö sisila ne ginigeet urungan tidi abo Tesalonika (pere a öxöno tinenge xö 1 Tesalonika). Idi tokoxobo maras bang kö tinawuxus baling kö Orong. Ma uleng ke idi toxo döxömen bere Kraiss ixoro tawuxus baling. Inexalik e Pol ixo töngösen idi bara a tödi nang i onwat te God irabo ot sila re Kraiss, ma abo magingin saban irabo taxin köba xö ina axana bung (2 Tes. 2:1-12). (A oleleng ne tene nanase idi te döxömen bara ina tödi onwat ine a mawak kö Winawara 13:1-10 ma bara ine ina tödi nang i saban köba xö Matiu 24:15.) Pol ixo ömanan bölök idi kaluluonin abo auban ixo ot pösöt idi (2 Tes. 1:4-10) ma ixo öxaxat idi bara tabo muu abo tatalien töxödös (2:13-3:15).

<sup>1</sup> E, e Pol, arixe me Sailas me Timoti, meet me tile a tinenge na urungan tö mum a marakörö ne lotu niang Tesalonika, ewe e mum mere God a Tamana ire, ma mere Jisas Kraiss, a Orong.

<sup>2</sup> A abalamu ma malum irabo kis se mum meriso re God, a Tamana ire, ma a Orong, e Jisas Kraiss.

### *A bung ne warkurai xö God*

<sup>3</sup> Abo töke kölöme re Kraiss, i töxödös bara meet marabo tengen deek sösöxö urungan te God tua gene e mum, möxösa, abo nunu re mum iri lölölös nana im mabo abalamu re mum kö öngöng kabise iri dedek nana.

<sup>4</sup> Io, ina na, meet me ölolot e mum kaluluonin abo marakörö ne lotu re God köbo lagunon, möxösa, mum mo tuu lölös ma mo nunu kaluluonin abo eler mabo kinadik nang mo örasen.

<sup>5</sup> Ma niang i osen ömaras bara a warkurai xö God i töxödös. Möxö ina na, God irabo perexulen e mum bere mum mo eöt ta nilaxa xö kingdom pe ine, nang mum mo örasen a kinadik möxönan.

<sup>6</sup> Io, God i töxödös saxit me ine irabo pet ina na bira: ine irabo balu öbaling abo sasaban te idi ewe nang te ögarin e mum.

<sup>7</sup> Me ine irabo ömamanaa e mum kalik abo kinadik ke mum ma irabo ömamanaa e meet bölök. Ma irabo pet xarna na xö axana bung bara e Jisas a Orong irabo ot wösö meriso xö watmaep kaluluonin a bibio ne ia arixe mabo angelo lölös se ine.

<sup>8</sup> Ma irabo ömokorot ewe me idi nang tekara ösöxö e God ma tekara tame a atöngösen deek ke Jisas, a Orong ke ire.

<sup>9</sup> Ma xinuxun te idi bira: God irabo pet ögarin idi me idi tabo kis biringan sik ulorexe saxit. Me idi tabo kis tewe xalik a wawara xö Orong ma xalik a mariris ne lölös se ine

<sup>10</sup> xö axana bung bara a Orong irabo wanot tua xikip a ese raxin ma aölelet kaluluon köbo tene nunu, idi a nangadi töxödös se ine. Me mum bölök, mum morobo arixe me idi, möxösa, mum moxo nunu xö tinenge re God, nang meet moxo töngösen e mum ulamunon ine bara turunon.

<sup>11</sup> Io, ina na, meet me seseseng sösöxö rua gene e mum, bara God irabo perexulen e mum bara mum mo eöt ma mangana to nang e God ixoro kuwe lo e mum ulamunon. Meet me seseng bölök bara irabo top e mum ma lölös se ine bara mum morobo pet abo lalaa deek kirip nang i wanot meringan kölöme xöbo nunu re mum ma nang i eöt arixe mabo maaaa re mum.

<sup>12</sup> Meet me seseng bira, rua a nangadi tabo pere abo to re mum ma tabo ii a esene e Jisas, a Orong ke ire, ma bara idi tabo ii e mum arixe me ine, eöt ma abalamu xö God te ire me Jisas Kraiss, a Orong.

## 2

### *A tödi onwat irabo wanot*

<sup>1</sup> Ma na, eka tinenge ulamun a inot kö Orong ke ire, e Jisas Kraiss, ma ulamun a inot etok ke ire urungan te ine.

<sup>2</sup> Io, meet me seng e mum abo tönö e meet kölöme re Kraiss, bara ganim e mum pa binuut bara ra dinedee pasaxit ulamun idi nang tobo tengen bara a bung kö Orong iri wanot im. Ganim e mum pa nunu re idi nang tobo rengrengen bara idi toxo kip lo ina atöngösen kalik a tinenge ne propet, ma meringan kö winawara, ma nagut kö ginigeet idi te tengen bara meet moxo tile. Kaim. I kobo turunon.

<sup>3</sup> Mum morobo mana balaure ödeek e mum, xalik ke öng ibo ömamang e mum kere önga lalaa i kobo turunon. Mum morobo mana maras bara ina axana bung kö Orong i karabo wanot bang ot kö axana bung nang a oleleng idi tabo öngus kalik e God, me ewe nang i onwat urungan te God, irabo wanot maras. Ma nang ina tödi irabo iuo ulorexe.

<sup>4</sup> Ina tödi irabo ii öraxin öbaling ine ma irabo euli xöbo mangana lalaa xirip nang a nangadi te döxömen bara God, ma abo lalaa idi te lolotu wösöt. Lamun ina na, ine irabo laxa xö gunon lotu raxin te God ma irabo tengen bara ine iat e God.

<sup>5</sup> Mum kobo döxömen lo a lasa e xo tengen te mum? Nang e xo xisixis me mum, e xobo rengrengen inabo lalaa na rö mum.

<sup>6</sup> Me mum mo maras ulamun a lasa nang i tuu wi sik a inot kö ina tene onwat. Ma i tuu wi sik ine bara ina tödi irabo wösö xö axana bung nang e God iri pere kos bara ine irabo wanot.

<sup>7</sup> Ma a tatalien ne tabuno ölangen e God, iri önan nana nixinen ma lamun i kobola wanot maras bang. Me ewe nang na i ruruu wi ina tatalien ne tabuno ölangen e God, xalik ina tatalien i karabo ot maras, irabo wewet bira iat ot nang irabo taxase wes.

<sup>8</sup> Io, melamu im, ina tene onwat irabo wanot maras. Ma lamun kö axana bung bara e Jisas a Orong irabo wanot, ine irabo sexomet ina onwat ma a xiki möxö ngalana ine. Ma a inuan ot taxin kö Orong irabo pet ögarin ine.

<sup>9</sup> Ma ina onwat irabo wanot ma lölös taxin te Satan ma irabo pet abo mangana lalaa lölös ne auwuwus mabo mangana auxileng kua öngalabö a nangadi. Me idi tabo nunu bara ina mangana tatalien niang meriso lömö.

<sup>10</sup> Mabo tatalien saban te ine irabo ömamang idi nang te önan tua iuiuo. Me idi tabo iuo ulorexe saxit, möxösa, idi tokobo maaaa ulamun a turunon kö God ixoro wanot maras. Io, lamun ina na, God i karabo öro idi.

<sup>11</sup> God irabo pere bara idi te wewet bira, io, irabo öngangao a dinödöm pe idi bara idi tabo nunu xöbo atöxö.

<sup>12</sup> Me God irabo pet bira rue ine ra ömokorot idi ewe nang tokoxobo nunu xöbo turunon iri wanot maras ma nangen idi te maaaa rua wewet a sasaban.

### *Mum morobo mana tuu lölös*

<sup>13</sup> Io, meet marabo mana tengen deek sösöxö xö God tua gene mum abo tönö e meet kölöme re Kraiss, mum nang a Orong i maaaa re mum. Me meet marabo tengen deek saxit, möxösa, God ixoro pere kos e mum mesila xö urulo möxöbo lalaa rue mum pa xikip a to. A Tanono ixo bulus kabisein e mum bere mum mere God me mum morobo nunu xö turunon te God, io xö ina niang, mum morobo uruoxe ina to.

<sup>14</sup> God ixo kuwe e mum meringan kölöme xö palas tinenge re meet moxo atöngösen deek, bara ine irabo ömariris e mum arixe me Orong ke ire, e Jisas Kraiss.

<sup>15</sup> Lamun ina na, abo töke meet kölöme re Kraiss, mum morobo mana tuu lölös me mum morobo mana muu inabo turunon nang meet moxo usu e mum min bie kölöme xöbo palas tinenge re meet ma xö ginigeet te meet urungan tö mum.

<sup>16</sup> Meet me seseng urungan te God, a Tamana ire, ma a Orong ke ire, e Jisas Kraiss, ewe ixo maaaa ulamun ire.

Ma meringan kölöme xö abalamu re ine, ixo isik a aöxaxat urungan te ire niang i karabo kawöm. Me ire te xixiset bölök ma nunu xöbo lalaa deek, möxösa, ine ixo isik ina abalamu.

<sup>17</sup> Io, meet me seseng im bere ine irabo öxaxat e mum ma irabo ölöls a to re mum pa wewet abo tinörön deek ma rua rengrenge abo tinenge deek.

### 3

#### *Pol ixo öxaxat idi rua sineseng ke idiet*

<sup>1</sup> Abo tönö e meet kölöme re Kraiss, rua öxöwöm abo tinenge, meet ka rengrenge bara mum morobo seseng ke meet bara a tinenge xö Orong irabo wan xarnang ixo wan kaluluonin e mum. Io, mum morobo mana seseseng bara irabo wan esexere pasaxit mon ma bara a nangadi tabo ii ine.

<sup>2</sup> Me mum morobo mana seseng bölök bara irabo ölanglangu e meet kalik abo mangana duöng saban, möxösa, a oleleng ne nangadi kaim idi ma nunu.

<sup>3</sup> Ma nexalik a Orong irabo pet eörin abo tinenge re ine, io niang, irabo ölöls e mum ma irabo balaure wi e mum kalik a tene saban.

<sup>4</sup> Mum mo kis kölöme sik kö Orong, ma möxö ina na, meet me balamasa sik kö mum bara mum bo wewet eörin abo tinenge löls se meet ma bere mum morobo wewet söxöin bira xöbo bungbung kirip.

<sup>5</sup> Meet me seseng bara a Orong irabo silien ömaras a dödxömen te mum pua werwere xulen a maaaa xö God tö mum, ma bara irabo top e mum pua tinuu löls, eöt ma tinuu löls se Kraiss.

#### *Ganim ire rua lönlön*

<sup>6</sup> Abo töke meet kölöme re Kraiss, meet me isik a tinenge löls na urö mum kö esene a Orong ke ire, e Jisas Kraiss ma i bira. Mum morobo mana wan talu xalik abo tönö ire ewe a lak lönlön ma tekara muu eörin abo inausu re meet nang meet moxo isik ke mum.

<sup>7</sup> Io, me mum iat, mum mo öxö bara i deek bere mum morobo mana kis xarnang e meet moxo kis bie. Me meet moxo kaim kö lönlön nang meet moxo xixixis arixe me mum.

<sup>8</sup> Meet kaim kö enen tataunin te nien kere öng. Kaim. Meet moxo kun iat a nien tö meet, ma xöbo xaken ma dömon, meet moxobo rörorön löls ma malawang ulamunon abo sasaxan te meet, me meet moxobo örasen a kinadik kö tinörön, io niang, meet karabo isik ke tiip kere öng.



<sup>9</sup> Bule, meet moxo kis bira, möxösa, i koxobo töxödös bere meet marabo kip nien meringan te mum? Kaim. I töxödös se meet bara meet marabo kip nien bira, nexalik meet kobola pet, möxösa, meet me maaaa bara marabo osen abo lalaa deek ne malalar kölöme xö to re meet bere mum morobo muu ine.

<sup>10</sup> Io, nang meet moxo kis arixe me mum, meet moxobo wöwörö lölös se mum bira, "Nang bara re öng i kobo rörörön, ganim ine ra nien."

<sup>11</sup> Me meet me tengen bira, möxösa, meet mere ölangen bara nangen a dauleng ne nangadi lön kaluluonin e mum nang idi tokobo rörörön, nexalik idi te wöwörö nana xöbo lalaa xö nangadi xabise.

<sup>12</sup> Io, a mangana nangadi nang meet me tenge ölölös idi me meet me öxaxat idi xö esene e Jisas Kraiss, a Orong, bara idi tabo kis deek ma tabo rörön lamun a nien te idi iat.

<sup>13</sup> Inexalik, mum abo töke meet, mum bele lönlön kö wewet abo lalaa deek.

<sup>14</sup> Nang bara re öng i kobo tame inabo tinenge re meet kölöme xö ginigeet, io, mum morobo perexulen ödeek ine. Mum bele xisixis arixe me ine, bara ine irabo örasen a minenge xö lasa ine iri pet.

<sup>15</sup> Inexalik, mum bele wewet ine xarnang önga iuo re mum. Ganim. Mum morobo mana panak ine, möxösa, ine a tönö e mum kölöme re Kraiss.

#### *A öxöwam möxö tinenge*

<sup>16</sup> Io, meet me seseng bara a Orong iat, ine a unine a bala malum, bara ine irabo tabaa sösöxöin e mum min kö mangana lalaa sa nang irabo ot pösöt e mum. Me meet me seseng bara a Orong irabo kis arixe me mum kirip.

<sup>17</sup> Me e, e Pol, e gegeet ma limeke iat kö ina xönö xakawöm möxö ginigeet urungan tö mum pua öga e mum. Me e uxileng abo ginigeet kirip pe e xarna na. Ma abo mangana ginigeet te e, i wawara xarna na.

<sup>18</sup> A abalamu re Jisas Kraiss, a Orong ke ire, irabo kis arixe me mum kirip.

## **A Sisila ne Ginigeet te Pol urungan te TIMOTI**

I maras bere Pol ixo xisixis kö gunon ne aömokorot tuso Rom (pere e Aposol 28). I wawara bara melamu im toxo ölanglanga rewe e Pol ma ixo urulo a sese önit ne nuan möxö atöngösen ma tinenge deek. Ire te ösöxö bere Pol ixo eka nuan kö xönö Spein (pere e Rom 15:24, 28). Ixo wan gut uruso Spein ma ixo tawuxus uso xö muxulamin Krit nang ixo ganim sik e Taitus singan ee rua balaure a lotu (Taitus 1:5). Ma i wawara bara melamu ixo wan uruso Miletus (2 Tim 4:20) me Epeses (1 Tim 1:3) xö xönö me Esia. Ixo gan sik e Timoti ringan Epeses bara irabo balaure a lotu, ma ixo wan lo u Masedonia (1 Tim 1:3), ma meringan Masedonia Pol ixo geet a sisila ne ginigeet urungan te Timoti uruso Epeses ma a ginigeet urungan te Taitus so Krit, ma melamu im ixo wan uri Nikopolis kö rasi (Taitus 3:12). Io, ixo urulo öbaling kua nuan uruso Rom. Ma ruso Rom toxo kubus oxe öbaling e Pol ma meringan kölöme xö gunon ne aömokorot Pol ixo geet a sese öninöng ne ginigeet te ine urungan te Timoti (2 Tim 1:16; 2:9). Melamu im i wawara bara idi toxo sexomet e Pol (2 Tim 4:6-8) kö awat 67 gut.

Io, ma mesila, nang e Timoti ixo tödi maxat sik, ixo arixe me Pol kö sese öninöng ne nuan uruso Masedonia me Gris (Aposol 16:1-4; 17:14-15; 18:5) ma xö sese önarun ne nuan uruso Epeses (Aposol 19:22) me Masedonia me Gris baling (Aposol 20:1-6). Me Timoti ixoro kis arixe bölök me Pol tuso Rom kö sisila ne axana bung nang idi toxo bulus e Pol kö gunon ne aömokorot (Pilipai 1:1; Kolosi 1:1; Pilimon 1). A tene tinörön deek ine xö atöngösen deek me Pol ixo geet ina ginigeet urungan tine rua öxaxat ine xö abalaure re ine xö lotu rusu Epeses. Pol ixo ötumarang e Timoti mabo tene ausu röxröxö (1 Tim 1:3-7; 4:1-8; 6:3-5; 6:20-21). Ixo usu ine bara irabo balaure bulungin a lotu, ma bara abo marakörö ne lotu idi tabo mana talien bule (2:1-15; 5:1-16; 6:6-10; 6:17-19) ma bara a mangana sisila sa irabo kure ma irabo top a lotu (3:1-13; 5:17-25). Pol ixo öxaxat e Timoti bara irabo tuu lölös kö tinörön ne abalaure re ine (1:18-19; 4:6; 4:10-16; 6:11-14). A ausu mamaran kölöme xina ginigeet na rua gene ire nixinen, bara a lotu irabo bule ma bara abo sisila ne lotu tabo ebalare bule.

<sup>1</sup> E, e Pol, önga aposol te Krajs Jisas, i eöt kö auguran te God a Tene Aöro re ire me Krajs Jisas, ine a unine möxö

inabo lalaa na ire te xixiset ma nunu ulamun.

<sup>2</sup> Me e geet inabo lalaa na urungan te nöngön, Timoti, a barok turunon te e kölöme xö nunu re ire re Krai.

E seseng bara a abalamu ma a malum meriso re God a Tamana ire me Krai Jisas, a Orong ke ire, urungan te nöngön.

*Panak abo tene ausu töxö*

<sup>3</sup> E maaaa bara örobo xixixis bang kingan Epeses xarnang e xo öxaxat nöngön, niang bara e xo maaaa rua nuan u Masedonia. Dauleng ne nangadi ringan Epeses te eusu mabo mangana inausu xabise niang a lak töxö. E maaaa bara örobo kis singan, bere nöngön örobo panak idi.

<sup>4</sup> Me nöngön örobo tenge lölös bölök xarna na rö idi bara ganim idi rua balan arixe mabo atöngösen töxö mabo xinixos möxöbo untubuno idi. Inabo mangana lalaa bira i isik ot abo agot töxö mon. Ma i kobo top ire rua wewet eörin a maaaa re God niang ire te pet arixe ma nunu.

<sup>5</sup> E tengen ina tingenge lölös na bara ire tabo ebalamu kaluluonin ire. Ma ina tatalien möxö ebalamu ibo önan ot meriso kölöme xö madakdak ne balana ire ma xö nunu turunon. Ma ina abalamu i wanot bölök niang bara ire te muu a lasa ire te ösöxö bara i deek.

<sup>6</sup> Dauleng idi te wan talu xalik inabo tatalien me idi te tawuxus urungan köbo winörö tataun.

<sup>7</sup> Idi te maaaa bara idi tabo tene ausu möxöbo warkurai te Moses. Inexalik idi tokobo ösöxö bara a lasanene idi te rengrengan. Ma abo lalaa idi te tengen bara idi te ösöxö i turunon, kawaim, idi tokobo maras ulamun.

<sup>8</sup> Io, ire te ösöxö bara abo warkurai te Moses te deek niang bara ire te muu ödeek inabo warkurai eöt ma a mangana tinörön kö inabo warkurai.

<sup>9</sup> Ma lamun ire te ösöxö bölök bara abo warkurai i kobo kis ulamun idi abo tene töxödös. Kaim. I kis ulamun a nangadi nang takara muu eörin abo warkurai, abo tabuno ölöngö, abo tene pet magingin saban, ma re ewe idi te tuu talu xalik e God. I kis bölök lamun ewe idi te muu abo tatalien mera xö pu, ma re ewe idi te sexomet abo tata mabo nago re idi, ma lamun abo tene inarse ömet tataun.

<sup>10</sup> Ma inabo warkurai na i kis ulamun idi nang te bala ilawa, ma lamun abo tödi ewe idi te maru arixe baling mabo tödi, ma i xarna na bölök köbo une arixe ma une. Ma i kis bölök lamun abo tene röxröxö, ma abo tene wuwulo a nangadi, ewe idi te rengrengan a atöxö kölöme xö axana bung möxö warkurai, ma lamun idi ewe idi tobo wewet abo mangana lalaa xabise sa i xabise sik kö inausu i turunon.

<sup>11</sup> Ina ausu i eöt ma tingenge deek niang a lak lölös, ma i wanot meriso re God nang tabo ölet ine, me ine ixo isik ina tingenge deek na rö e ra atöngösen min.

*Pol ixo tengen deek ke Kraiss lamun a abalamu raxin te ine*

<sup>12</sup> E tengen deek urungan te Kraiss Jisas, a Orong ke ire, ewe niang ixo isik a lölös ura re e rua tinörön arixe min. E tengen deek urungan te ine, möxösa, ine ixo perexulen e bara e a tödi ewe irabo pet eöt a maaaa re ine. Io, ine ixo isik ina tinörön ne euguran tö e.

<sup>13</sup> A turunon bara mesila e xo tengen ögarin ine me e xo ögarin köbanin a nangadi re ine, nexalik e God ixo marase e, möxösa, e kaim kö maras lamun a lasa e xo wewet me e kaim bang kö nunu re Jisas.

<sup>14</sup> Ma abalamu meriso xö Orong kö ire ura rö e ixo manga taxin köba. Ma ixo wan ura rö e arixe ma tatalien ne nunu ma tatalien ne abalamu, möxösa, e re Kraiss Jisas.

<sup>15</sup> Io, e rabo tengen te önga tinenge niang i turunon saxit. Ma i eöt bara ire tabo bulus a nunu re ire xönan. Ma i bira: Kraiss Jisas ixo wan su ura xö öxöno lagunon ta öro a nangadi saban! Me e iat ewe e saban köba sik ke idi xirip.

<sup>16</sup> Ma niang ina unine iat bara ine ixo marase e. Me ine ixo marase e bere Kraiss Jisas irabo eöt ta osen bara a balawapat te ine ura rö e i karabo kawam. Me e, e saban te idi xirip, io niang, e xo wanot xarnang a perewuo lamun idi niang tabo nunu re ine rua i xikip lo a to ulorexe saxit.

<sup>17</sup> Ire tabo mana ölet sösöxöin e God, ine a öng kalik mon e God ewe niang i kebeöt ta minet me idi tekebeöt ta werwere ine. A kinis ne warkurai te ine i tuu ulorexe. Me ire tabo mana ii öraxin a esene xöbo bungbung kirip. Amen.

*A inarese deek*

<sup>18</sup> Timoti, a barok ke e, ina tinenge lölös na e isik ke nöngön bara örobo isik köbo dauleng kabise. Ma nang bara e pet bira, e pet eörin arixe mabo tinenge ne propet idi toxo tengen mesila ulamun a tinörön te nöngön bara örobo mana pet iat. Nöngön örobo mana muu abo tinenge re idi bara nöngön örobo erese ma inarese deek.

<sup>19</sup> Ma örobo erese bira: nöngön örobo mana nunu xöbo turunon te God nang ixoro osen ma örobo mana mumuu abo tatalien nang u ösöxö bara i deek. Ma dauleng idi toxo mölök bara idi tabo pet bira, io nang, abo nunu re idi xö ina turunon i saban xarniang a önga mön i tawörök lömö xö öxöno maat.

<sup>20</sup> Ma kaluluon te idi e Haimenias me Aleksenda, idu toxo pet bölök bira. Io, e xo isik tewe idu urungan kö limine Satan bara idu tabo eusu ra ganim pa rengrengen ögarin a God.

## 2

*Ire tabo seseng lamun a nangadi xirip*

<sup>1</sup> Io, a sisila ne tinenge re e i bira: e öxaxat ire bara ire tabo seseng ma tabo tengen deek urungan te God ulamun a nangadi xirip.

<sup>2</sup> Me ire tabo mana seseseng ulamun abo king ma ewe idi te sila sik kö kinis ne warkurai bara rue ire ra xikip a kinis ne malum ma i kebeöt te idi ra ögarin ire nang bara ire te to muu e God kö tatalien töxödös.

<sup>3</sup> Io, nang bara ire te seseng xarna na, irabo deek ma irabo pet öaxanan e God, a Tene Aöro re ire.

<sup>4</sup> Ma i mamaa bara irabo öro a nangadi xirip, ma bara idi xirip tabo ösöxö abo turunon ixoro osen,

<sup>5</sup> möxösa, nangen a önga God mon, ma öng kalik mon ewe i silien a nangadi urungan te God. Me ine a tödi, e Krajs Jisas,

<sup>6</sup> ewe nang ixo isik ine iat ta xukun ölanglanga a nangadi xirip. Ma xö ina axana bung ixo eöt ma mamaa xö God, Krajs ixo pet bira rua öturunon bere God i mamaa bara irabo öro a nangadi xirip.

<sup>7</sup> Ina na a unine bere God ixo pere kos lo e bara e rabo önga aposol me e rabo xarnang önga tene palas tinenge re idi nang kaim bara abo Judeia. Me e xo wan ta usu idi bara idi tabo nunu xö turunon nang e God ixoro osen. E tengen a turunon. E kobo etöxö.

<sup>8</sup> Io, e mamaa bara a nangadi xö boxönö xirip idi tabo seseng. Ma bara idi tabo ii öxaa abo limine idi nang i madakdak, ma irabo deek bara idi tabo pet ina na ma kawaim pe bala kinadik bara re inegot.

*Abo balixilik tabo to eöt ma ina kinis nang God ixo isik kö idi*

<sup>9</sup> Me e mamaa bölök bara abo une tabo sisige xarnang i deek kö wawara xö nangadi. Ma ganim idi ra ösige a bebene öxöno idi mabo mangana lalaa deek. Ma ganim idi ra onee öbaling idi ma gol bara rebo karalo ne kalang nang a lak deek ma bara ra sisige rebo man nang i taxin köba a xunuxun möxönan.

<sup>10</sup> Inexalik e mamaa bara idi tabo usige idi iat arixe mabo tatalien deek, i eöt mabo mangana balixilik ewe idi te tengen bere idi te lolotu wösöt e God.

<sup>11</sup> Ma nang bara abo balixilik idi te kip abo ausu, idi tabo mana kis ödödö me idi tabo ii ösu idi iat kö pu.

<sup>12</sup> E kobo öbala bara önga une irabo esu bara irabo kure re önga tödi. Ine irabo kis ödödö mon.

<sup>13</sup> Ruasa? Möxösa God ixo arun ta uxis e Adam, ma melamu e Iwa.

<sup>14</sup> Ma kaim bere Adam ewe e Satan ixo ömamang ine. Kawaim. Satan ixo araun ta ömamang a une, io nang, ina une ixo lexe a warkurai te God.

<sup>15</sup> Ma nexalik God irabo öro abo une xö tatalien ne kip barok nang bara idi tabo nunu sösöxö arixe ma ebalamu eli, ma tatalien madakdak arixe mabo tatalien töxödös.

### 3

#### *Abo sisila ne lotu*

<sup>1</sup> Io, e rabo tengen öbaling a önga tinenge nang i turunon saxit. Ma i öt bara ire tabo bulus abo nunu re ire xönan. Ma i bira: nang bara ewe a öng i maaaa bara irabo kip a kinis möxö sisila ne lotu, io, ine i maaaa ulamun a tinörön deek.

<sup>2</sup> Io, a sisila ne lotu irabo mana a mangana tödi bira: ine a tödi nang kaim pe öng irabo eöt ta puk ine, ine ma önga une xalik mon, a dinödöm pe ine i maras, irabo mana balaure ödeek abo maaaa re ine, a nangadi xabise tabo ii ine, a tene aöga lo a nangadi, ma irabo eöt ta usu nangadi,

<sup>3</sup> ma i karabo tene ininim, ine i karabo tene laie ma lamun ine irabo tödi möxö kinis malus, i karabo tene agot ma i karabo maaaa xöba ulamun a tuluwok.

<sup>4</sup> Ine irabo balaure ödeek a barama re ine. Ma irabo balaure abo baroxorok ke ine bara idi tabo tame ödeek ine, ma bara irabo pet xarna na, irabo pet a önga ngas bara i öt bere idi tabo ii ine.

<sup>5</sup> Ma nang bara öng i kobo ösöxö rua balaure ödeek a barama re ine, ine irabo balaure ödeek bulungin a marakörö möxö lotu nang ke God?

<sup>6</sup> Io, ganim bara ina tödi sisila nang i dödöm puxus mon na, ma xalik irabo pet öraxin öbaling ine ma a warkurai irabo kip ine xarnang ixo kip e Satan.

<sup>7</sup> Ine irabo önga mangana tödi ewe idi nang kawaim bara meringan kö lotu, idi tabo ii ine me idi tekebeöt ta puk ine ma i kebeöt ta taba xö xuun te Satan.

#### *Abo tene rorop kölöme xö lotu*

<sup>8</sup> Ma i xarna na bölok köbo tene rorop möxö lotu. A mangana nangadi idi te eöt bara ire tabo ii idi. Me idi kaim bara a nangadi möxö atöxö. Idi kaim bara abo tene ininim. Idi kaim bara abo tene gunumut ma tuluwok.

<sup>9</sup> Idi tabo mana tuu lölös sik köbo laa turunon nang e God ixoro osen bara ire te nunu. Ma nang bara idi te tuu lölös sik idi tabo muu abo tatalien nang idi te ösöxö bara i deek.

<sup>10</sup> A sisila ne laa ire tabo mana könönöin bang abo tatalien te idi, ma nang bara kaim pe laa i tuu wi idi, ire tabo

ömaraxen lo idi bara idi tabo rörön xarnang abo tene rorop möxö lotu.

<sup>11</sup> Ma i xarnang bölök köbo balixilik ke idi. Idi tabo mana abo mangana nangadi nang ire te eöt bara ire tabo ii idi. Me idi tokobo eöt ta tengen suxume re öng, lamun idi ma dinödöm maras. Me idi tabo mana rörön ma turunon köbo lalaa xirip.

<sup>12</sup> Abo tene rorop möxö lotu, idi ma önga une xalik mon. Me idi tabo mana wewet ödeek a bung baroxorok ke idi arixe mabo nangadi xirip kö gunon te idi.

<sup>13</sup> Ire tabo ii idi ewenene idi nang te pet ödeek inabo tinörön ne rorop, ma ina mangana tinörön irabo öläläs a nunu re idi kölöme re Kraisis.

### *Ire tabo muu e God bule*

<sup>14</sup> I turunon bara e geet inabo lalaa na urungan te nöngön lamun e maaa bara e rabo wan urungan te nöngön ma akarabo alilis.

<sup>15</sup> Ma lamun niang bara önga laa i ulis e, io, e karabo wanot pasaxit, io, e geet inabo lalaa bara nöngön örobo mana maras köbo mangana tatalien niang i deek bara a barama re God tabo muu. Ma ina barama na, a marakörö möxö lotu re God niang a lak to. Me idi te eöt ma xösöng niang ibo öläläs abo turunon niang God ixoro osen.

<sup>16</sup> Ma i maras bara inabo turunon i taxin saxit köba nang ixo kis mun sik mesila ma na iri ot kö malmalan. Ma i silien ire bara ire tabo muu e God. A unine möxö inabo turunon te God i bira:

Ma nang ixo wösö, a tödi ine,

ma a Tanono ixo osen bara ine i töxödös.

Abo angelo toxo pere ine,

mabo nangadi toxo palas tinenge ulamun ine xö bung marapun kirip.

A nangadi xö öxöno lagunon toxo nunu re ine,

me God ixo kip lo ine uruso lömö xö mariris ne kinis se ine.

## 4

### *Abo tene ausu töxö*

<sup>1</sup> A Tanono i tengen ömaras bara xöbo axana bung melamu, dauleng idi tabo tawuxus tewe meringan kö inabo turunon nang ire tobo nunu xönan. Me idi tabo muu abo tano röxröxö ma abo inausu möxöbo tano saban.

<sup>2</sup> Inabo inausu na irabo wanot meringan köbo tene atöxö. I xarnang bara idi toxo söngöt abo dinödöm pe idi ma lelewi, inexalik bara idi tokobo maras bara a lasa i saban ma a lasa i deek.

<sup>3</sup> Idi tobo usu a nangadi bara ganim idi ra inealolo ma bara ganim idi ra enen a dauleng ne mangana nien. Ma

lamun e God ixo uxis inabo nien na rue ire abo tene nunu ewe ire tabo ösöxö abo turunon ixoro osen, bara ire tabo arun ta tengen deek ulamun ma malamun im ire tabo en,

<sup>4</sup> möxösa, abo lalaa xirip nang God ixo uxis a lak deek idi. Ire tebele mölmölok kalik ke önga laa. Ire te eöt tua öbala lo inabo lalaa xirip niang bara ire tabo tengen deek uruso lömö ulamun,

<sup>5</sup> möxösa, a tinenge re God ma tatalien ne sineseng, idu te tengen ömaras bara inabo lalaa ire te eöt tua ömaraxen idi.

*Timoti irabo silien ödeek abo marakörö ne lotu*

<sup>6</sup> Niang bara örobo sulut osen inabo lalaa na urungan köbo töke nöngön kölöme re Kraiss, io, nöngön a önga tene tinörön deek ke Kraiss Jisas, nang bara örobo ölölös öbaling bölök nöngön ma abo tinenge turunon nang ire te nunu xönan arixe ma abo inausu deek nang nöngön u xo mumuu.

<sup>7</sup> Ma lamun nöngön u bele lörorö xöbo töxö mabo pii saban niang i kebeöt ta wewet ödeek nöngön. Inexalik örobo mana ölölös nöngön iat köbo lalaa nang ke God tua inabo lalaa na tabo top nöngön ta mumuu ödeek e God.

<sup>8</sup> Nang bara öng ibo ililo rua ölölös a aine, irabo top ine ulik mon. Inexalik a tatalien ne mumuu e God irabo top ire xöbo ngas kirip, möxösa, irabo top ire xö to nixinen ma to melamu.

<sup>9</sup> Ma inabo lalaa na e rengrengen i turunon saxit. Ma i eöt bara ire tabo mana bulus a nunu re ire xönan.

<sup>10</sup> Io, ire te lölölös köba ulamun ine nang, möxösa, ire te kis balawapat kö God nang i to. Ine a Tene Aöro xö nangadi xirip, ma lamun turunon saxit bara irabo öro abo tene nunu.

<sup>11</sup> Nöngön örobo mana tenge lölös ma örobo usu a nangadi minabo lalaa na bara idi tabo mana ölangen.

<sup>12</sup> Ganim a ömaraxen lo re öng bara ine irabo öbulubun nöngön bere nöngön a tödi maxat, lamun nöngön örobo mana osen nöngön urungan köbo tene nunu bara idi tabo maaa ra mumuu abo tatalien te nöngön nang idi tabo pere abo tinenge ma a to re nöngön, a abalamu ma a nunu re nöngön, mabo madakdak ne tatalien te nöngön.

<sup>13</sup> Nöngön örobo mana balan tua xokos abo ginigeet te God kö wawara xö nangadi, ma rua palas tinenge arixe ma inausu ot kö axana bung nang e rabo wanot.

<sup>14</sup> Ganim a döxömen taun ina arabaa meringan kö Tanono niang toxoro tabaa sik nöngön min meringan köbo tinenge ne propet nang abo sisila ne lotu toxo bulus abo limine idi lömö re nöngön. Go, öro wan, öro rörön min.



<sup>15</sup> Nöngön örobo mana isik kirip a to xudun te nöngön kinabo lalaa na rua nangadi xirip tabo mana pere bere nöngön u önan deek.

<sup>16</sup> Nöngön örobo mana balaure ödeek nöngön. Ma örobo mana balaure ödeek bölök abo inausu re nöngön. Nöngön örobo mana pet söxsöxöin inabo lalaa na. Nang bara u pet bira, nöngön örobo öro öbaling nöngön me idi bölök ewe niang tabo ölangen nöngön.

## 5

### *Timoti irabo mana tenge lölös*

<sup>1</sup> Ganim bara u tenge laie xö önga ötaxin lamun te sasaban. Inexalik örö tenge malus se ine mon xarnang bara a tata re nöngön, ma abo guama xarnang bara idi abo töm,

<sup>2</sup> ma abo une raxin xarnang abo nago re nöngön, mabo balixilik maxat xarnang abo saxam. Ma örobo mana pet bira arixe ma tatalien ne madakdak saxit.

### *Abo möxösö runon*

<sup>3</sup> Nöngön örobo mana ii abo une möxösö ewe idi te möxösö runon.

<sup>4</sup> Nang bara önga möxösö nangen ma barok, bara nangen ma tubuno, inabo tubuno ma abo barok ke ine, idi tabo mana arun ta wewet abo tatalien deek ke idi kaluluon kö kinis ne barama re idi iat. Idi tabo mana balu abo rorop köbo tata re idi mabo nago re idi bie. Me idi tabo mana pet bira, möxösa, ina mangana tatalien irabo öaxanan e God.

<sup>5</sup> Nang bara önga möxösö ine ma sasaxan taxin ma i kis kabise sik iat te ine ma kaim pe öng ka rorop ine, ina möxösö ibo xixiset ma nunu re God, möxösa, ine ibo seseseng köbo bungbung kirip kö dömön ma xö xaken bere God irabo rorop ine köbo sasaxan te ine.

<sup>6</sup> Ma lamun niang bara önga möxösö i maaaa ra öaxanan a lewene aine iat, ine i to sik ma lamun kö tanono ine ixoro met.

<sup>7</sup> Nöngön örobo tenge lölös ulamun inabo lalaa na bölök urungan kö marakörö ne lotu bere idi tabo tame, xalik a öng i kobo eöt tua puk idi mere sasaban.

<sup>8</sup> Ma nang bara öng i kobo wewet ödeek a barama iat te ine ma a bung marapun bölök ke ine, io, ine ire wan talu rewe xalik abo turunon te God ewe ire te nunu xönan. Ma i saban köba re idi ewe idi tokobo nunu.

<sup>9</sup> I deek bara ire tabo bulus ölaxa re önga möxösö kaluluon te idi abo muxu ne möxösö turunon niang bere ine i lömö saxit kö pitnö ma öng ne sangaun ne awat, ma bere ine ma önga usuono mon,

<sup>10</sup> ma bara a nangadi idi tabo ösöxö bere ine ire pet abo rorop deek, bara ixoro ölon barok, bara ixoro öga lo abo osee, bara ixoro tos abo xexene nangadi re God, bara ixoro top ewe idi mabo tiip, ma bara ixoro pet kirip abo oleleng ne mangana rorop deek.

<sup>11</sup> Inexalik u bele bulbulus öläxa abo möxösö ewe idi abo awat tidi i kobola lömö bang, möxösa, nang idi te örasen abo mangana maaa möxöbo aine idi, me idi tokobo dödöm pa mumuu e Kraiss me idi te maaa rua inalolo baling.

<sup>12</sup> Io, bere idi te pet ina nang, idi te kip lo a warkurai urungan lömö iat tidi, möxösa, idi tere lexe ina sisila ne kunubus se idi urungan te Kraiss.

<sup>13</sup> Ma kaim bara ina na xalik mon. Niang bara idi te uxileng köbo gunon kirip, idi te ösek tataun abo axana bung. Ma lalaa i saban köba xö nang bere idi tobo etengen suxume ma tobo önan nana ra tengen tinenge saban ma ra tinenge lamun a laa xö nangadi xabise.

<sup>14</sup> Io, e tengen bere idi abo möxösö maxat ewe abo awat te idi i kobo lömö, e maaa bara idi tabo elolo baling bara idi tabo kip barok, bara tabo balaure ödeek a gunon te idi ma bara idi tekebeöt ta öbala lo re iuo re ire rua rengrengen ögarin ire.

<sup>15</sup> E tengen bira, möxösa, dauleng tere tawes tuar ta mumuu e Satan.

<sup>16</sup> Niang bara önga une a tene nunu ine, ma ibo balaure abo möxösö, io, irabo mana top a bung marapun te ine. I karabo deek bara lotu irabo sölok a tiip möxö mangana möxösö biringan. A lotu irabo mana top ewe me idi abo möxösö turunon.

*Ire tabo balaure ödeek abo sisila ne lotu*

<sup>17</sup> Abo sisila ne lotu nang bara idi te rörön deek kölöme xö kinis ne lotu, tabo ii öraxin idi ma tabo isik xinuxun te idi. Ma i turunon saxit köbo sisila ewe niang tobo balan sik ka palas tinenge ma ausu.

<sup>18</sup> I maras, möxösa, abo ginigeet te God i tengen bara, *“Ganim bara u kut pi a ngalana bulmakau niang bara i wawas tewe abo lewene wit,”* me *“Ewe niang i rörön, i töxödös bara irabo kip lo a xinuxun te ine.”*

<sup>19</sup> Niang bara öng kalik mon i tengen bara önga sisila ne lotu iri pet te sasaban, ganim a ömaraxen lo a tinenge re ine. Ma niang bara ninöng bara narun te aut arixe, io, nöngön örobo mana ömaraxen lo a tinenge re idiet.

<sup>20</sup> Abo sisila ne lotu ewe niang bara te pet a sasaban, nöngön örobo mana tenge köö idi xö wawara xö nangadi, io, idi xabise tabo buut ta wewet öbaling.

<sup>21</sup> Ma xö wawara re God me Krajs Jisas arixe mabo angelo ewe niang ixoro pere kos lo idi, e isik ina tinenge lölös na urungan te nöngön bira: Nöngön örobo töndik sik inabo tinenge na ma örobo muu re önga ngas kalik mon arixe mabo mangana nangadi xirip. Ganim nöngön kö kure ögarin a dauleng ma örobo tuu arixe ma dauleng.

<sup>22</sup> Ganim nöngön ta pasaxit ta bulbulus a limem lömö xö önga tödi bara irabo ot xarnang a önga sisila. Ma xalik mon, nöngön u bo kip oxe lo a magingin saban kö nangadi xabise. Me nöngön örobo mana muu abo tatalien madakdak.

<sup>23</sup> Nöngön ökorobo inim kalik a ari, nexalik örobo mana inim bölök ke ulik ne wain tua rorop a balam ma abo miniset te nöngön.

<sup>24</sup> Abo magingin saban möxöbo dauleng ne nangadi i maras pi sik. Ma inabo magingin saban te idi irabo ot maras sila niang bara idi tabo tuu xö warkurai, lamun abo magingin saban möxö nangadi xabise irabo ot maras melamu.

<sup>25</sup> Io, i xarnang bölök köbo tatalien deek. Abo tatalien deek i ot maras. Mabo tatalien deek niang i koxobo ot maras, i kobo eöt te idi ra minun.

## 6

### *Abo tene nunu niang idi abo maris ne tödi tinörön*

<sup>1</sup> Abo tödi tinörön tabo mana perexulen bara i töxödös bara idi tabo ii ödeek abo tödi raxin te idi, xalik ke öng irabo tengen ögarin a esene God arixe mabo inausu re ire.

<sup>2</sup> Ma i xarnang bölök köbo tödi tinörön niang abo tödi raxin te idi abo tene nunu. Bara inabo tödi tinörön tabo döxömen bara abo tödi raxin te idi abo barön kölöme re Krajs, ganim bere idi tabo dödöm tataun te idi. Ma lamun idi tabo mana rörön lölös köba rö idi, möxösa, idi abo tene nunu ewe niang tabo kip lo a inone tinörön, ma, möxösa, abo tödi tinörön te balamu idi.

Nöngön örobo eusu ma örobo öxaxat a nangadi ulamun abo lalaa niang.

<sup>3</sup> Me ewenene niang i eusu ma önga mangana inausu xabise nang i kobo eöt mabo tinenge turunon deek ke Jisas Krajs, a Orong ke ire, ma bara ina inausu i kebeöt ta eöt bölök arixe mabo ausu möxöbo tatalien tua mumuu ödeek e God,

<sup>4</sup> io, ina tödi na ibo wewet öraxin öbaling ine ma i kobo ösöxö re önga laa. Inexalik ibo mamaa bara irabo tenge egot lamun abo tinenge tataun mon. Ma niang i kebeöt ta

rorop. Ma inabo mangana inagot na irabo isik ot a dinödöm saban, a bala kinadik, a tatalien möxö tengen ögarin a öng,  
<sup>5</sup> a dinödöm saban ne apuk, ma abo agot sösöxö kaluluon kö nangadi ewe idi tobo röxröxö wiwi abo turunon te God mabo dinödöm pe idi a lak baulang. Inabo mangana nangadi na idi te dōxömen bara abo tatalien ne mumuu e God irabo rorop idi rua xikip a tuluwok.

<sup>6</sup> Inexalik abo tatalien ne mumuu e God irabo top köbanin ire niang bara ire te dödöm bara a lasa niang e God ibo tabaa ire min, iri eöt im.

<sup>7</sup> Io, nang abo nago toxo kip ire, ire kawaim pa xikip ot tebo lalaa ura xö öxöno lagunon. Ma nang bere ire tabo wan tewe xalik ina öxöno lagunon na, ire tekebeöt ta xikip bölök ke önga laa.

<sup>8</sup> Inexalik bara ire ma nien ma man, me ire tabo dōxömen bara i eöt sik.

<sup>9</sup> Ma lamun bere, ewe idi te mamaa bara idi tabo tene orong kö tuluwok, idi tabo subu xöbo lalaa i könönöin idi. Idi tabo tamasexe xöbo mangana mamaa möxöbo öxö baulang niang irabo pet ögarin idi. Ma inabo mamaa na irabo pet ögat köbanin idi.

<sup>10</sup> E tengen bira, möxösa, a mamaa rua gene tuluwok, ine a önga unine möxö oleleng ne mangana sasaban. Ma dauleng idi tere wan kö palaa xalik abo turunon ire te nunu xönan me idi tere öxadik idi iat arixe ma kinadik taxin, möxösa, idi tere bulus a mamaa ridi rua xikip abo tuluwok.

*Timoti irabo mana muu abo tatalien deek*

<sup>11</sup> Lamun nöngön a tödi re God. Nöngön örobo mana ulo rup kalik inabo lalaa na, me nöngön örobo mana muu abo tatalien xarna na: örobo tene töxödös, örobo muu e God, örobo nunu, örobo ebalamu, örobo tuu lölös köbo lalaa ibo könönöin nöngön, ma örobo ii ölik nöngön.

<sup>12</sup> Nöngön örobo mana erese xö inarese deek i eöt mabo lalaa ire te nunu xönan. Nöngön örobo kip lo a to ulorexe saxit niang e God ixo kuwe nöngön ulamun. Me ine ixo kuwe nöngön kina axana bung bara nöngön u xoro tenge maras ma nunu re nöngön kö wawara xö nangadi oleleng.

<sup>13</sup> Ma xö wawara re God, ewe niang i isik a to xöbo lalaa xirip, ma xö wawara re Krajs Jisas ewe niang ixo tengen osen a tinenge niang a lak mamaran urungan te Pontias Pailat, e isik a tinenge lölös se nöngön

<sup>14</sup> bara örobo mana balaure ina tinenge niang uru kip lo. Nöngön örobo mana balaure ina tinenge, xalik ke öng ibo pet ögarin, ma xalik ke öng ibo tenge saban könan. Me nöngön örobo mana pet xarna ot bara e Jisas Krajs, a Orong ke ire, irabo wanot maras.

<sup>15</sup> Me ine irabo wanot kö axana bung iat niang God i maaaa bara ine irabo wanot könan. God ine iat mabo lalaa mamaran saxit. Ine xalik iat mon a önga Tene Warkurai. Ine a King möxöbo king kirip, me ine a Orong möxöbo orong kirip.

<sup>16</sup> Ine xalik mon i kobo eöt ta minet. Me ine i kis kö bibio raxin niang i kobo eöt te öng ka nuanot lörörö xönan. Kaim iat te öng iri pere ine ma i kobo eöt bara re öng irabo pere ine bölök. Ine, ire tabo ii ine, ma irabo kis kö warkurai ulorexe. Amen.

*Abo orong tabo top a nangadi*

<sup>17</sup> Nöngön örobo tenge lölös urungan tidi ewe idi tere kip lo a kinis ne orong ka xö öxöno lagunon, bara ganim idi ra ölelet idi iat, ma bara ganim idi ra bulbulus a nunu ridi xöbo tuluwok niang i kebeöt ta kinis ömat. Ma lamun idi tabo mana kis xiset e God arixe ma nunu, ewe ine ibo tabaa ire mabo mangana lalaa deek kirip möxö öaxanan ire.

<sup>18</sup> Örobo öxaxat idi bara idi tabo pet abo tatalien deek, ma bara idi tabo pet abo oleleng ne tinörön ne rorop, ma bara idi tabo erabaa tataun, ma bara idi tobo tagure bulus sua erabaa eli.

<sup>19</sup> Ma niang bara idi te pet xarna na, idi tabo tagure bulus abo bunulus se idi iat tua melamu. Ma ina mangana bunulus na irabo tuu lölös. Io nang, idi tabo mana pet bira rue idi ra xikip a to niang ine a to turunon.

*Timoti irabo mana tuu talu abo tinenge töxö*

<sup>20</sup> Timoti, örö balaure ödeek a lasa niang e God ixo tabaa nöngön min tua rörön dik sik ine. Örö tuu talu abo tinenge tataun möxö öxöno lagunon. Mabo tinenge nang idi te tewe rua tinuu wi abo inausu turunon, örö tuu talu bölök. Inabo mangana tinenge idi te tengen bara a tinenge xöbo tene nanase, nexalik bara i kobo turunon.

<sup>21</sup> Dauleng idi te tengen bara idi te kip lo ina mangana tinenge, io, idi te wan lelebes inabo turunon ire te nunu xönan.

A abalamu urungan te mum.

## A Sese Öninöng ne Ginigeet te Pol urungan te TIMOTI

Pol ixo kis baling kö gunon möxö ömokorot tingan Rom (pere a öxöno tinenge xö 1 Timoti). Pol ixo ösöxö sik bara iri lörörö im bara tabo sexomet ine (2 Timoti 4:6-8) ma ixo döxömen önga laa xalik mon, ma i bira, bara e Timoti mabo Kristientabo **balaure ödeek ina atöngösen deek, ma bara abo tene ausu röxröxö takarabo kulas tewé ine** (1:12-14; 2:2; 2:14-3:17). Ma ina na a unine ina ginigeet. Ma ixo öxaxat bölök e Timoti bara irabo tagur sik kua etöngösen ma a atöngösen deek (4:2) ma bara irabo tagur sik bölök kua tinuu lölös köbo tiip (1:8; 2:5; 4:5). Ina na a ausu deek köbo sisila ne lotu nixinen bara idi tabo balaure ödeek a atöngösen deek.

<sup>1</sup> E, e Pol, önga aposol te Krajs Jisas eöt ma mamaa re God. Me e a önga aposol bira, möxösa, God ixo isik a xuxubus möxö to niang i kis se Krajs Jisas.

<sup>2</sup> Me e geet ina tinenge urungan te nöngön Timoti, a barok ke e niang e mamaa xöba rö ine. A abalamu ma malum urungan te nöngön meriso re God a Tamana ire, ma meriso re Krajs Jisas, a Orong ke ire.

*Timoti irabo mana balaure ödeek a tinenge deek*

<sup>3</sup> E tengen deek ke God ewe nang e rörön te ine. Ma nang e rörön te ine biringan, e bo mumuu abo lalaa nang e ösöxö a lak deek, xarnang abo untubuno e tobo wewet bölök bie. E bo döxömen lo nöngön köbo sineseng ke e, xöbo puxu ma dömön bölök.

<sup>4</sup> E döxömen lo abo line maram me e mamaa xöba ra werwere nöngön tö e ra xikip a axanan taxin.

<sup>5</sup> E döxömen lo a nunu turunon te nöngön nang ixo kis sila re Lois nang a tubum, me Iunis a nago re nöngön. Me e maras sik bere i kis bölök ke nöngön.

<sup>6</sup> Ma lamun ina na, e ödöxömen nöngön bara örobo mana rörön ölölös arixe ma arabaa nang e God ixo tabaa nöngön min nang e xo bulus a limeke lömö re nöngön.

<sup>7</sup> Io, e mamaa bere nöngön örobo pet bira, möxösa, e God i koxobo tabaa iraa ma binuut. Kaim. Ixoro tabaa iraa ma lölös arixe ma abalamu lamun a öng kabise, arixe ma tatalien bara öng irabo balaure a mamaa re ine iat.

<sup>8</sup> Io, u bele minge rua atöngösen ma tinenge ulamun a Orong ke ire. Ma u bele minge bölök ulamun e ewe nang

idi toxo bulus e xö gunon ne aömokorot tua gene Kraiss. Ma lamun nöngön örobo tagur sik bara örobo sölök ina kinadik arixe me e ulamun a tinenge deek. Ma irabo eöt bara nöngön örobo pet bira arixe ma lölös se God.

<sup>9</sup> Ewe nang ixo öro ire ma ixo kuwe ire bara ire tabo madakdak. Ine i kobo kuwe ire eöt mabo tatalien deek nang ire toxoro pet. Kaim. Ixo maaaa mon bara irabo kuwe ire biringan meriso xö abalamu re ine. Me God ixo tabaa tataunin ire arixe ma ina abalamu xö kinis se ire kölöme re Kraiss Jisas mesila xö urulo möxöbo lalaa xirip.

<sup>10</sup> Ma na im, God iri osen ina abalamu xö nuanot te Kraiss Jisas, a Tene Aöro re ire nang ixo öxöwam a lölös möxö minet. Ma kölöme xö tinenge deek, Kraiss iri osen bölök bara ire tabo to ma tekebeöt ta minet baling.

<sup>11</sup> Me e, ine ixo pere kos lo e bara arabo palas tinenge ma ina tinenge deek, ma bara e önga aposol ma tene ausu xö ina tinenge deek.

<sup>12</sup> Ma ina unine niang e xo kip inabo kinadik na. Ma lamun e kobo munge, möxösa, e ösöxö sik ewe nang e nunu re ine. Me e maras sik iat bara irabo eöt ta balaure ödeek ina laa nang ine i bulus kö limine e ra töndik sik. Ma irabo balaure biringan ot kö ina bung melamu.

<sup>13</sup> Nöngön örobo mana töndik sik inabo tinenge deek turunon nang e xo usu nöngön min. Ganim nöngön ta kulas se uk möxönan. Me nöngön örobo kisisik iat kö nunu ma xö tatalien ne abalamu xö öng kabise nang ire te kip kölöme re Kraiss Jisas.

<sup>14</sup> Nöngön örobo mana balaure ödeek ina tinenge deek nang e God ixo bulus kö limem bara örobo töndik sik. Ma örobo mana balaure ine biringan arixe ma lölös möxö Töxödös ne Tanono nang ibo kisisik iat te ire.

<sup>15</sup> Me nöngön u ösöxö sik bara a marakörö xirip meringan kö ina provins Esia, toxo wan kalik e. Ma kaluluonin idi, e Pigelus me Ermogenes bölök toxo wan.

<sup>16</sup> E seseng bara Orong irabo marase e Onesiporus arixe ma barama re ine, möxösa, ine ixobo öaxanan e ma kaim ine xo minenge ulamun e ra xö gunon ne aömokorot.

<sup>17</sup> Inexalik nang Onesiporus ixo ot ta Rom, ixo lölös sik ka winara ulamun e, ot nang ixo peresöt lo e.

<sup>18</sup> E seseng bara Orong irabo marase e Onesiporus kö ina bung melamu! Nöngön u ösöxö ödeek sik kö nausen ne mangana rorop nang ixo tabaa e min tingan Epeses.

## 2

*Timoti irabo mana tagur ta xikip a kinadik ulamun e Kraiss*

<sup>1</sup> Me nōngön, a barok ke e, nōngön örobo mana tuu lölös kö abalamu nang ire te kip kalik e Krajs Jisas.

<sup>2</sup> Ma inabo tinenge u xo ölangen lo xalik e xö wawara xö oleleng ne nangadi, örobo mana isik kö uleng ne mangana nangadi nang tabo eöt tua töndik sik ina tinenge na, ewe idi nang te eöt tua usu bölok a uleng kabise.

<sup>3</sup> Nōngön örobo mana tagure sik ka xikip a kinadik xarnang a umri re Krajs Jisas.

<sup>4</sup> Ma kaim pe umri i karabo balan köbo mangana binilan te idi nang kaim bere idi abo umri. Kaim. I maaaa mon bara irabo öaxanan a umri raxin te ine.

<sup>5</sup> Ma nang bara öng i laxa xö ina ililo ne exokos, ma nang bara i kobo tame abo warkurai möxönan, idi tekarabo tengen bara ine irabo sila.

<sup>6</sup> Ma i töxödös bara a tene pet komo nang i rörön lölös irabo arun ta xikip ina inone.

<sup>7</sup> Nōngön örobo döxömen ödeek abo lasa nang e rengren-gen, möxösa, a Orong irabo ömaras nōngön kö inabo lalaa xirip.

<sup>8</sup> Nōngön örobo döxömen lo bere e Jisas Krajs ine a tubuno e Dewit, ma bara God ixo öraru öbaling ine xalik a minet, xarnang e bo rengren-gen köbo tinenge deek nang e bo walwalas.

<sup>9</sup> Ma ina unine bara e bo xikip a kinadik. Ma kaim bara ina na mon. Idi tobo werwere e xarnang a tödi saban me idi tere kubus pi e mabo sen. Ma lamun a tinenge re God idi tekebeöt ta kubus pi.

<sup>10</sup> Lamun ina na, e bo sösölök abo tiip kirip rue idi ewe nang God ixo pere kos lo idi, bara rö idi bölok tabo uruoxe a ineöro nang i kis se Krajs Jisas, ma bara idi tabo kip bölok a mariris ulorexe saxit.

<sup>11</sup> Me e rabo tengen te önga tinenge nang i turunon saxit ma i bira:

Nang bara ire texere met arixe me ine,  
ire tabo to bölok arixe me ine.

<sup>12</sup> Nang bara ire te tuu lölös köbo tiip kirip,  
ire tabo kip a kinis ne king bölok arixe me ine.

Nang bara ire te öös kelen ine,  
ine bölok irabo öös kelen ire.

<sup>13</sup> Nang bere ire tekobo pet eörin abo lalaa nang toxo tengen,  
ine iat irabo pet eörin abo lalaa nang ixo tengen,  
möxösa, i kobo eöt bara irabo pet nang i xabise sik kö  
tatalien te ine.

*Önga tene tinörön deek ke God irabo rörön bule?*

<sup>14</sup> Nōngön örobo mana ödöxömen idi lamun inabo lalaa na. Ma örobo mana panak idi xö wawara re God bara ganim



idi ra agot lamun abo tinenge tataun mon. Ina mangana agot i karabo top pe öng, ma lamun irabo ögarin ewe me idi nang te ölangen.

<sup>15</sup> Nöngön örobo mana rörön deek lamun e God irabo tengen bara nöngön a tene tinörön deek, a mangana tene tinörön ewe nang i karabo menge xö tinörön te ine ma irabo isik a ausu töxödös möxö tinenge runon te God urungan kö nangadi.

<sup>16</sup> Nöngön örobo tuu talu xalik abo tinenge tataun mera xö pu, möxösa, irabo öwalaa a nangadi xalik e God.

<sup>17</sup> Mabo tinenge re idi irabo ngang xarnang a ruxuruk. Ma kaluluonin idi e Imeneus me Piletus, idu te xarna na.

<sup>18</sup> Idu toxo tawes lo xalik abo tinenge runon te God nang ixoro osen. Idu tobo rengrengen bara a tinaru baling kalik a minet ixoro ot. Möxö ina na, idu te ögarin a nunu xö uleng.

<sup>19</sup> Ma lamun a xösöng lölös nang e God ixoro bulus i karabo mamagi. Ma a ginigeet könan i bira: "Orong i ösöxö idi nang mere ine." Ma öng bölök i tengen bira, "Ewe me idi nang toxo tengen bere idi mere Orong, tabo mana tuu talu xalik a magingin saban."

<sup>20</sup> Io, kölöme xö ina gunon taxin i nangen a oleleng ne mangana bile. Dauleng te pet arixe ma gol ma siliwa. Ma dauleng te pet ma iaa ma pu mon. Dauleng möxö tinörön deek ma dauleng möxö tinörön tataun nana mon.

<sup>21</sup> Io, nang bara öng irabo ömadakdak öbaling ine iat kalik inabo tatalien tataun, irabo öt ma önga bile madakdak niang i malus kö Orong möxö ina gunon tua tinörön arixe min. Me ine irabo rörön arixe mine xöbo mangana tinörön deek, möxösa, a bile i tagur sik möxö inabo mangana tinörön deek kirip.

<sup>22</sup> Nöngön örobo mana ulo xalik abo maaaa saban möxöbo guama. Me nöngön örobo muu a tatalien töxödös, a nunu, abalamu, ma malum. Mum kirip morobo mana muu inabo tatalien, nöngön arixe me idi ewe nang ma bala deek te wan pösöt a Orong.

<sup>23</sup> Nöngön örobo tuu rewe xalik abo mangana agot nang a nangadi baba tobo wewet, möxösa, nöngön u ösöxö bara inabo mangana agot ibo wewet ot a inangat.

<sup>24</sup> Ganim bara a tultul kö Orong i engat, ma lamun irabo mana pet abo tatalien deek kö nangadi xirip. Ma irabo mana eöt tua usu a nangadi, ma irabo bala malum nang bara öng i pet te sasaban tö ine.

<sup>25</sup> Ma rö idi nang tobo uli ine, ina tultul na irabo mana usu idi xarnang a tödi ödödö, ma nagut e God irabo pet idi rua dinödöm puxus bara tabo ösöxö abo turunon te God.

<sup>26</sup> Mabo dinödöm pe idi irabo maras im ma tabo eöt tua ulo xalik a xuun te Satan nang ixoro töndik idi ra wewet eörin xarnang kö mamma re ine.

### 3

*Abo tiip möxöbo bung möxö xakawam*

<sup>1</sup> Nöngön örobo mana maras bara uleng ne tiip taxin irabo ot köbo axana bung möxö xakawam.

<sup>2</sup> A nangadi tabo mamma rö idi iat ma tabo mamma ulamun a tuluwok. Me idi tabo ii öraxin iat idi ma tabo ölolot idi. Me idi tabo tenge uli a nangadi ma takarabo tame abo tata mabo nago re idi. Me idi takarabo tengen deek ulamun abo rorop kirip ma tabo tuu talu abo mamma re God.

<sup>3</sup> Me idi takarabo ebalamu eli, ma nang bara idi te laie, idi takarabo emarse baling. Me idi tabo tengen ögarin a nangadi ma tekarako eöt bara tabo tuu wi abo mamma saban te idi iat. A mamma re idi irabo ögarin a nangadi ma tabo öngus kalik a dedeek.

<sup>4</sup> Me idi tabo pet abo aösaxit saban köbo ais se idi. Me idi abo tödi baba ma tabo eönunu bara lak deek idi. Me idi tabo mamma bere idi tabo mumuu a ngas sua xikip a axanan, ma lamun idi takarabo mamma ulamun e God.

<sup>5</sup> Idi tabo rengrengen bere idi tobo mumuu e God, lamun idi tabo öngus kalik a lölös se ine ra nilaxa xö to re idi. Nöngön örobo mana tuu rewe xalik inabo mangana duöng nang.

<sup>6</sup> Dauleng ke idi, tobo wawara siwin ngas bara rö idi ra nilaxa xöbo gunon kö nangadi. Me idi tobo lalamus öroröxö lo abo mangana une ewe me idi nang tekobo maras lamun abo turunon te God nang ixoro osen. Inabo mangana une, abo tatalien saban te idi i kubus pi idi, mabo mangana mamma saban te idi i engin idi bara tabo muu.

<sup>7</sup> Inabo mangana une tobo mamma bara tabo mana eusu xö turunon te God, ma lamun idi iat tekobo eöt ta werwere xulen inabo turunon.

<sup>8</sup> Ma ina nangadi tobo uli inabo turunon xarnang e Janes me Jamberes idu toxo uli e Moses. Ma ina mangana nangadi, abo dödöxömen te idi a lak saban arixe, ma i kobo turunon abo nunu re idi.

<sup>9</sup> Ma lamun abo tinörön te idi i karabo o oleleng, möxösa, a nangadi xirip tabo perexulen abo tinörön te idi bara a tinörön baulang mon xarnang idi toxo perexulen abo tinörön te Janes me Jamberes.

*Timoti irabo mana töndik sik abo tinenge re God*

<sup>10</sup> Ma lamun nöngön, u ösöxö ödeek abo inausu re e, ma tatalien te e, a unine dinödöm pe e, a nunu re e, ma

a balawapat te e, ma a abalamu re e. Nöngön u ösöxö sik bere e xo tuu lölös köbo tiip.

<sup>11</sup> Me nöngön u maras kirip sik köbo eler mabo kinadik nang ixo ot pösöt e. Me nöngön u ösöxö sik bara toxo pet ögat e ruso Entiok ma Aikoniam ma Listra. Ma lamun a Orong ixo öro lo e xalik abo tiip kirip.

<sup>12</sup> Ma i turunon bere idi xirip nang te maaa bara tabo muu ödeek e God kölöme xö kinis se idi re Krajs Jisas, tabo eler idi.

<sup>13</sup> Ma lamun abo tene pet magingin saban mabo tene röxröxö, abo sasaban te idi irabo saban arixe im melamu. Idi tabo töxö lo a dauleng ne nangadi, ma dauleng kabise tabo töxö bölök idi bie.

<sup>14</sup> Ma lamun nöngön, örobo mana wewet iat abo lalaa nang u xoro eusu ulamun ma nang u ösöxö bara i turunon, möxösa, u maras sik ke ewe me idi nang toxo usu nöngön bie.

<sup>15</sup> Ma u maras pi sik bara urulo xö nang u xo barok lik sik, u xoro ösöxö a Buk Tabu. Ma inabo Ginigeet tabo eöt tua tabaa nöngön ma nanase i silien nöngön kö to nang örobo kip lo, möxösa, uru nunu re Krajs Jisas.

<sup>16</sup> God ine a unine möxöbo ginigeet kirip kö Buk Tabu. Ma i eöt bere ire tabo mana rörön arixe minabo Ginigeet kirip pua usu a nangadi ma rua tenge köö ewe nang i wewet a sasaban. Ma inabo Ginigeet kirip i öt bölök bara tabo ötöxödös a öng, ma bara tabo usu a nangadi rua mumuu a tatalien töxödös.

<sup>17</sup> Mabo Ginigeet te God i deek biringan bara rua a tödi mere God irabo mana tagur sik kua wewet kirip abo tinörön deek.

## 4

<sup>1</sup> Xö winara re God ma re Krajs Jisas ewe nang irabo kure idi nang te to sik ma nang toxoro met, e isik ina tinenge lölös na urungan te nöngön. Krajs Jisas irabo wanot ma irabo uxis a kingdom pe ine. Ma lamun ina na, e isik ina tinenge lölös na urungan te nöngön ma i bira:

<sup>2</sup> Nöngön örobo palas tinenge ma tinenge re God. Ma örobo tagur deek kua palas tinenge bira xöbo bungbung kirip, nang bara idi te maaa ra ölangen bara kaim. Örobo usu idi ma balawapat. Ma nang bara u usu idi bira, örobo silien abo dinödöm pe idi ulamun a turunon te God, ma örobo tenge köö idi ulamun abo sasaban te idi, ma örobo öxaxat idi.

<sup>3</sup> Ruasa, möxösa, a axana bung irabo ot nang a nangadi tekarako maaa ra ölangen a ausu runon. Kaim. Idi tabo muu abo maaa re idi iat. Ma lamun ina na, idi tabo silien

abo tene ausu rua usu idi mabo mangana lalaa nang idi tabo maaaa xöba rua ölangen.

<sup>4</sup> Idi tabo öngus sa ölangen abo turunon te God ma tabo tawuxus urungan köbo pii kaim bara i turunon.

<sup>5</sup> Ma lamun nöngön, örobo mana balaure ödeek nöngön köbo lalaa xirip. Nöngön örobo mana kip abo kinadik, örobo palas tinenge ma tinenge deek, ma örobo mana pet abo tinörön xarnang a tultul te God.

<sup>6</sup> Me e tengen bira, möxösa, iri lörörö im pe e ra minet, ma a dee re e ixoro su xarnang a arabaa möxö wain urungan te God.

<sup>7</sup> E re erse lölös kö ina inarse deek. E re öxawam ina ililo. Me e re pet eörin abo turunon ire te nunu xönan.

<sup>8</sup> Io na, a xinuxun te ewe nang i sila xö ililo i tagur xiset sik e. Ina xinuxun na irabo osen bara önga tödi i töxödös. Ma a Orong, a töxödös ne Tene Warkurai ine, irabo tabaa e min kö bung taxin melamu. Ma kaim bara e xalik mon. Ma irabo tabaa bölök idi ewe niang te maaaa xöba lamun a nuanot te ine.

*Pol ixo ömaras e Timoti ulamun abo lalaa ixoro wanot pösöt ine*

<sup>9</sup> Nöngön örobo mana lölös sa nuanot pasaxit ura re e,

<sup>10</sup> möxösa, Demas ixo maaaa lamun abo lalaa möxö öxöno lagunon nixinen ma ixoro wan kalik e uruso Tesalonika. Keresen ixoro wan u Galesia me Taitus ixoro wan u Dalmesia.

<sup>11</sup> E Luk kalik mon im arixe me e. Nöngön örobo lamus e Mak arixe me nöngön nang bara u wanot, möxösa, ine irabo top e xöbo tinörön te e.

<sup>12</sup> E re tile e Tikikus uruso Epeses.

<sup>13</sup> Nang bara u wanot ta, örobo kip ina man niang e xo wan lie sik arixe me Karpus singan Toroas. Örobo kip bölök abo buk. Ma örobo mana lölös sa xikip abo ginigeet kabise.

<sup>14</sup> Ina tene pet lalaa ma baras, e Aleksenda, ixo ögarin köbanin e. A Orong irabo balu ine eöt ma mangana tatalien niang ixo pet tö e.

<sup>15</sup> Me nöngön bölök, örobo balaure ödeek nöngön iat kalik ine, möxösa, ixo uli ögarin abo inausu re ire.

<sup>16</sup> Xö sisila ne axana bung e xo tuu xö warkurai rua tinuu wi abo aupuk ura rö e, kaim pe öng ixo tuu arixe me e. Idi xirip toxo wan kalik e. E seseng bere God irabo döxömen tewe abo tatalien niang idi toxo pet te e bie.

<sup>17</sup> Ma lamun a Orong ixo tuu arixe me e ma ixo ölölös e. Ma lamun ina na, e eöt ta palas tinenge ma tinenge deek kirip kö ölöngö re idi nang kaim bara abo Judeia. Ma Orong ixo öro e bara idi tekarabo kure e rua iuiuo xö minet.

<sup>18</sup> Io, a Orong irabo ölanglanga e xalik abo tatalien saban kirip nang a nangadi te eka wewet ura rö e, me ine irabo silien ödeek e urungan kö kingdom pe ine xö balna watmaep. Ire tabo ölet ine ulorexe saxit. Amen.

<sup>19</sup> Io, nöngön örobo isik a tinenge ne aöga re e urungan te Pirisila me Akuila arixe ma barama re Onesiporus.

<sup>20</sup> Erastas ixo xisixis iat tingan Korin. Me Toropimus ixo meset me e xo wan lie ine ringan Miletus.

<sup>21</sup> Io, nöngön örobo mana lölölös bara örobo wan ura re e sila xö axana bung möxö baraa. E Ubulus, Pudon, Linus, Kolodia, me idi xirip bölök abo Kristien te tile a tinenge ne aöga urungan te nöngön.

<sup>22</sup> Ma Orong irabo kis arixe ma tanom ma a abalamu re ine irabo kis se mum kirip.

## A Ginigeet te Pol urungan te TAITUS

Pol ixo gan sik e Taitus singan kö muxulamin Krit bara irabo balaure a lotu ringan ee (pere a öxöno tinenge xö 1 Timoti). A marakörö mee Krit toxo saban köba, io niang, e Pol ixo rengrengen abo tatalien deek nang a marakörö ne lotu mabo sisila ne lotu tabo mana muu (Taitus 2:2-13; 3:1-3). Bara tabo kos e Taitus 1:6-9 me 1 Timoti 3:1-12 tabo ösöxö bara a mangana tödi sa irabo eöt tua balaure abo marakörö ne lotu. Pol ixo ötumarang e Taitus bara irabo mana köö idi abo tene ausu röxröxö (1:5; 1:10-16; 2:1; 2:7-8; 2:15; 3:9-11). I deek bara abo sisila möxö lotu nixinen bölök tabo ösöxö ödeek 1 Timoti, me 2 Timoti, me Taitus bara idi tabo eöt tua balaure ödeek a marakörö ne lotu.

<sup>1</sup> E, e Pol, a tultul kö pu xö God ma önga aposol te Jisas Kraiss, e geet ina tinenge na. Me God ixo pere kos lo e bira, bara e rabo top abo nunu xö marakörö nang e God ixoro pere kos lo idi ma bara e rabo usu idi rua ösöxö abo turunon nang e God iri oßen. Ma inabo turunon nang irabo silien idi rua mumuu e God

<sup>2</sup> ma rua kinis xiset arixe ma nunu lamun ina to ulorexe nang e God ixo kubus sik mesila saxit bara irabo tabaa ire min. Me God i kara ösöxö ra atöxö.

<sup>3</sup> Lamun kö ina axana bung eöt ma maaaa re ine, God ixo oßen a tinenge re ine. Ma ixo isik a tinörön urungan te e möxö palas tinenge ma ina tinenge. God a Tene Aöro re ire, ewe nang ixo tenge lölös sö e bara e rabo palas tinenge bie.

<sup>4</sup> Me e geet ina tinenge na urungan te nöngön, Taitus, a barok turunon te e kölöme xö nunu niang iraa xirip te kip.

A abalamu ma malum irabo kis se mum meringan te God a Tamana ire me Kraiss Jisas a Tene Aöro re ire.

### *Taitus irabo pere kos lo abo sisila ne lotu*

<sup>5</sup> Me e xo wan lie nöngön tingan Krit bara örobo ötöxödös abo lalaa niang kaim kö töxödös bang, ma bara örobo pere kos abo sisila ne lotu xöbo lagunon xarnang e xoro tengen sik ke nöngön.

<sup>6</sup> Ma a tene sisila ne lotu irabo mana mangana tödi bira: a tatalien te ine irabo mana deek, io, kaim pe öng irabo eöt tua rengrengen ine bere i pet abo sasaban, irabo önga une mon te ine, ma a bung barok ke ine tabo mana nunu, ma nangadi takarabo eöt tua wupuk a bung barok ke ine bara idi abo laa baba ma abo tabuno ölöngö.

<sup>7</sup> Abo tene sisila ne lotu tabo mana balaure ödeek abo tinörön te God. Lamun ina na, a sisila ne lotu irabo mana mangana tödi deek bira, io nang, kaim pe öng i eöt tua rengrengen bara i pet te sasaban. Ma ganim bara a sisila ne lotu irabo mangana tödi nang ibo ii öraxin ine iat, bara ibo bala laie pasaxit, bara a önga tene ininim, bara a tene inarse, bara a tene mamaa ra tuluwok.

<sup>8</sup> Ma lamun ine irabo mana önga tödi möxö öga lo a nangadi, me ine irabo mana mamaa lamun abo dedeek, irabo mana balaure ödeek abo masixine, ine irabo töxödös, ma irabo madakdak, ma irabo kure ölölös abo mamaa re ine.

<sup>9</sup> Ma a sisila ne lotu irabo mana töndik sik inabo tinenge nang i eöt te ire ra uru a nunu re ire xönan. Ma inabo tinenge nang i eöt mabo ausu re ire. Me ine irabo mana tödik inabo tinenge bara ine irabo eöt tua öxaxat a nangadi mabo turunon ma irabo eöt tö ine rua tenge köö idi nang te öngus kalik inabo tinenge.

<sup>10</sup> Abo sisila ne lotu tabo mana tatalien bira, möxösa, oleleng ne nangadi saban nang abo tabuno tinam ma tobo rengrenge tataun ma tobo silien öroröxö lo a nangadi. Ma turunon saxit abo Judeia niang kaluluonin idi, tobo wewet bie.

<sup>11</sup> Mum morobo mana pet pi idi lamun idi tekarabo tenge, möxösa, idi te ögarin a dauleng ne barama arixe mabo ausu re idi nang kaim bara a lak deek bara tabo eusu min. Ma ulamun a tuluwok, idi te pet biringan, ma tatalien saban iang.

<sup>12</sup> Ma öng kaluluon te idi iat, a propet, ixo tengen bira, "Abo tee mee Krit, idi abo tene röxröxö. Idi te xarnang abo mawak. Idi a nangadi lön mabo kas nien."

<sup>13</sup> Ina atöngösen na i turunon. Lamun ina na, nöngön örobo rengrenge lölös sik ke idi ulamun abo sasaban te idi, lamun nang idi tabo nunu xöbo ausu runon.

<sup>14</sup> Me nöngön örobo mana tenge lölös bölok ke idi bie lamun idi tekebeöt ta tame abo pii töxö möxöbo Judeia me idi tekarabo muu abo warkurai möxö nangadi nang tobo talu abo turunon te God.

<sup>15</sup> Idi nang te madakdak, tabo perexulen abo lalaa niang i madakdak. Ma lamun idi abo bala kabus ne tabuno nunu, idi tekebeöt ta perexulen te laa bere i madakdak. Ma abo dinödöm pe idi i kobo maras, me idi tekebeöt ta werwere xulen a dedeek ma a sasaban.

<sup>16</sup> Idi te tengen bara idi te ösöxö sik e God ma lamun a tatalien te idi i osen bara idi te talu ine. Idi abo tene takmaluk mabo mangana nangadi nang ire tobo öngasin tewe. Me idi tekebeöt tua wewet te tinörön deek.

## 2

*Abo ausu runon*

<sup>1</sup> Ma lamun nōngön, örobo mana tengen abo lalaa i eöt mabo ausu deek nang i turunon.

<sup>2</sup> Abo ötaxin tabo mana muu abo dinödöm maras, bere idi tabo mangana nangadi nang ire tabo ii idi, me idi tabo balaure ödeek abo maaaa re idi. Me idi tabo mana nunu xö ausu runon, io, a maaaa re idi urungan kö öngöng irabo turunon, me idi tabo tuu lölös sik iat köbo tiip.

<sup>3</sup> Ma xarnang bölök köbo une raxin. Abo tatalien te idi irabo mana osen bara idi te ii e God. Ganim idi ra rengrengen suxume re öng ma ganim idi rua ininim köbanin a wain. Lamun idi tabo usu a nangadi xabise ulamun a tatalien deek.

<sup>4</sup> Ma nang bere idi te pet bira, io, idi tabo eöt tua öxaxat abo une maxat bara idi tabo maaaa xöba runon lamun abo tödi re idi mabo bung baroxorok ke idi.

<sup>5</sup> Io, idi tabo öxaxat abo une maxat bölök bere idi tabo balaure ödeek abo maaaa re idi ma abo tatalien te idi irabo madakdak, io, ma bere idi tabo tene tinörön deek kölöme xöbo gunon te idi, bere idi tabo marse a nangadi, ma bara tabo mana ii ölik idi xöbo usuono idi. Ma tabo pet bira lamun a dauleng kabise takarabo tenge saban kö tinenge re God.

<sup>6</sup> Ma i xarnang iat bölök mabo guama. Nōngön örobo öxaxat idi bara tabo balaure ödeek abo maaaa re idi xöbo lalaa xirip.

<sup>7</sup> Me nōngön, örobo mana osen abo tatalien deek ke nōngön urungan te idi bere idi tabo maaaa ra mumuu nōngön. Ma nang bara u usu a nangadi, örobo mana muu re mangana ngas deek bere idi tabo eöt ta ii nōngön ma tabo perexulen bere nōngön bölök u nunu xöbo tinenge re nōngön.

<sup>8</sup> Ma örobo usu idi mabo tinenge deek nang i turunon ma kaim pe öng irabo eöt ta pere lo re sasaban kölöme xö ina ausu. Me nōngön örobo eusu bira, bara idi abo iuo re nōngön, idi tabo menge, möxösa, idi tekebeöt tua rengrengen ögarin ire.

<sup>9</sup> Nōngön örobo mana öxaxat abo maris ne tultul bara idi tabo ii ölik idi mesila xöbo sisila re idi lamun abo lalaa xirip. Idi tabo öaxanan abo sisila re idi ma ganim idi ra balu tinenge.

<sup>10</sup> Ma ganim idi ra wulwulo re önga laa. Inexalik, idi tabo mana osen bere idi abo mangana tödi nang a nangadi tabo eöt tua nunu re idi rua wewet a tatalien deek. Idi tabo mana pet bira, bara a nangadi xabise tabo pere abo tatalien kirip



pe idi ma tabo perexulen bara a ausu ulamun e God a Tene Aöro re ire a lak deek.

<sup>11</sup> E tengen bira, möxösa, a abalamu re God iri ot maras. Ma kölöme xö ina abalamu a tinörön ne aöro iri ot kö nangadi xirip.

<sup>12</sup> Ma a abalamu re ine i usu ire bara tabo mana wan kalik abo tatalien nang kaim bara re God mabo mangana mamaa möxö öxöno lagunon. Ma irabo usu bölök ire bara tabo mana balaure ödeek abo mamaa re ire, bara ire tabo to töxödös, ma bara ire tabo mana muu abo tatalien te God kö inabo mangana axana bung nixinen,

<sup>13</sup> nang ire te kis xiset a inot maras se Jisas Kraiss, ine a God taxin te ire ma a Tene Aöro re ire. Ma a inot te ine irabo ot arixe ma mariris taxin ma irabo deek saxit. Ine ewe nang ire te kis xiset ma nunu.

<sup>14</sup> Me ine e Jisas Kraiss ewe nang ixo isik ine iat ulamun ire rua xukun ölanglanga ire xalik abo mangana magingin saban kirip, ma rua ömadakdak ire bere ire a nangadi re ine iat, a mangana nangadi niang idi tabo mamaa xöba rua wewet a tatalien deek.

<sup>15</sup> Io, inabo lalaa mon niang nöngön örobo mana usu a nangadi min. Nöngön örobo öxaxat idi ma örobo tenge köö idi ulamun abo sasaban. Me nöngön örobo pet bira xarnang ewe nang i kip sik a kinis ne sisila raxin. Ganim bara re öng irabo öbulubun nöngön.

### 3

#### *Ire tabo pet abo tatalien deek*

<sup>1</sup> Nöngön örobo mana ödöxömen a nangadi bara tabo kis bira: idi tabo mana ii ölik idi xöbo sisila ma xöbo tene pet warkurai, me idi tabo mana tame bölök idi, ma tabo mana tagur tua wewet a tatalien deek.

<sup>2</sup> Ganim idi ra tengen ögarin te öng, ganim idi ra agot, idi tabo mana ais deek arixe ma nangadi, me idi tabo osen a tatalien malus kö nangadi xirip.

<sup>3</sup> Ire xirip bölök bang toxo on baa biringan ma abo tabuno ölöngö. Ire bölök, abo lalaa toxo silien öroröxö öbaulang ire me ire toxo tultul köbo mamaa saban te ire ma abo axanan tataun. Me ire toxo to muu abo tatalien na: ire toxobo mamaa ra wewet ögat a uleng kabise, ma toxobo dödom saban lamun a lalaa xö öng kabise, me ire toxobo emelentexin ire.

<sup>4</sup> Inexalik, nang ixo ot maras bara e God, a Tene Aöro re ire, ixo mamaa rua wewet te dedeek kö ire ma ixo mamaa xöba lamun ire,

<sup>5</sup> io, ixo öro ire. Ma lamun i kobo öro ire ulamun abo tatalien töxödös nang ire toxoro pet. Kaim. Ixo öro ire,

möxösa, ixo marase ire. Ma ixo öro ire arixe ma lölös möxö Töxödös ne Tanono ewe nang ixo tos tewe a sasaban kalik ire, ma lamun ina na ixo isik a to maxat te ire me ire te xarnang a bak madak.

<sup>6</sup> Me God ixo linge wönö ire ma Töxödös ne Tanono meringan kölöme xö tinörön te Jisas Krais, a Tene Aöro re ire.

<sup>7</sup> Ma ixo pet biringan bara rö ire rua xikip a to ulorexe nang ire tobo xixiset ma nunu ulamun. Me ire tabo kip ina to, möxösa, kölöme xö ina abalamu nang i tabaa tataunin ire min, ixoro kure bara ire te töxödös kö wawara re ine.

<sup>8</sup> Ma inabo tinenge na a lak turunon saxit. Me e mamaa bere nöngön örobo tenge lölös lamun inabo lalaa, io, ewe me idi nang tere nunu re God tabo mana balan sik kua wewet abo tatalien mamaran nang a lak deek ma ibo rorop ödeek a nangadi xirip.

<sup>9</sup> Ma lamun nöngön örobo mana tuu rewe xalik inabo agot tataun, mabo tinenge oleleng lamun abo ese möxöbo untubuno a dauleng mee mesila saxit. Me nöngön u bele tenge lamun inabo mangana inagot ulamun a warkurai te Moses, möxösa, inabo mangana tatalien i karabo top a nangadi ma i karabo pet ödeek ke lalaa.

<sup>10</sup> Ma nang bara re öng i laxa ma i palang a nangadi, io, örobo ögele ölölös ine xö nine axan. Ma nang bara i kobo tam, örobo mana tuu rewe xalik ine,

<sup>11</sup> möxösa, u ösöxö bara a mangana tödi bira ixoro talu xalik a dedeek ma ibo wewet a sasaban. Ina tödi i ösöxö bara ibo wewet a sasaban ma lamun ine ibo wewet iat.

### *A dauleng ne sineseng urungan te Taitus*

<sup>12</sup> E rabo tile e Atemas bara e Tikikus urungan te nöngön, ma nang bara ewenene re idu irabo ot pösöt nöngön, örobo mana pasaxit tua inot ura re e ringan Nikopolis, möxösa, e döxömen bara e rabo kis singan kö ina axana bung möxö labur.

<sup>13</sup> Ma nang e Apolos me Senas, a tene nanase möxö warkurai, te ot pösöt nöngön, örobo mana walar bara örobo top idu xöbo lalaa niang idu tabo sasaxan ulamun kö nuan te idu.

<sup>14</sup> A nangadi re ire tabo mana eusu rua wewet abo tinörön deek möxö rorop pua bönbönöt abo sasaxan taxin kö nangadi xabise. I kobo deek bara a to re idi irabo kaim pe inone.

<sup>15</sup> A nangadi xirip na arixe me e te tile a tinenge ne aöga urungan te nöngön. Me idi nang te balamu e mem eöt mabo turunon nang ire te nunu ulamun, io, örobo mana isik a tinenge ne aöga re mem urungan te idi.

A abalamu re God irabo kis me mum kirip.

## A Ginigeet te Pol urungan te PILIMON

I wawara bere Pol ixo kis kö gunon ne aömokorot tuso Rom nang ixo geet ina ginigeet na urungan te Pilimon, ine önga tödi xö lagunon Kolosi. (I wawara bere Pol ixo geet ina ginigeet urungan köbo Kolosi xö ina axana bung bölök.) Ma önga tultul te Pilimon, esene e Onesimus. Ma i wawara bere Onesimus ixo pulo lo a uleng ne lalaa xö orong ke ine, Pilimon, ma ixo ulo rup esexere uruso Rom. Ma ruso Rom, Onesimus ixo ölangen a tinenge deek Pol ixo etöngösen min, ma ixo nunu re Kraiss ma ixo isik a rorop pe Pol tingan kö gunon ne aömokorot. Io, abo warkurai xöbo Rom i tengen bara nang a önga tultul i ulo rup kalik a orong ke ine, i eöt bara tabo sexomet ine. Ma lamun e Pol ixo tile wuxus e Onesimus ma ina ginigeet urungan te Pilimon, ma ixo seng e Pilimon bara irabo döxömen tewe a sasaban te Onesimus ma bara irabo ömaraxen lo ine xarnang a tönö kölöme re Kraiss. Ma i wawara bere Pilimon i koxobo eöt tua minalök tewe abo tinenge re Pol, möxösa, Pol ixoro ömaras e Pilimon ulamun e Kraiss, me Pilimon ixo kip a to (pere e Pilimon 19).

<sup>1</sup> E, e Pol, ewe nang idi toxo bulus e xö gunon ne aömokorot tua gene Kraiss Jisas. Maa me Timoti, a tönö ire kölöme re Kraiss, maa me tile ina tinenge urungan te nöngön, Pilimon. Nöngön a ais deek ke maa, ma u xobo rörörön arixe me maa.

<sup>2</sup> Me maa me tile ina tinenge urungan bölök kö nangadi möxö lotu ewe idi tobo xisixis etok kingan kö gunon te nöngön. Ma urungan bölök ke Apia, a saxana ire, me Akipus ewe ibo sösölök abo tiip me maa kölöme xö ina inarse na.

<sup>3</sup> A abalamu ma malum urungan te mum meriso re God a Tamana ire, ma meriso re Jisas Kraiss, a Orong.

### *Pol ixo seseng ulamun e Pilimon*

<sup>4</sup> Tönö Pilimon, nang e bo seseseng, e bo döxömen lo nöngön me e bo rengrengen deek kö God ulamun nöngön,

<sup>5</sup> möxösa, e see lo abo atöngösen ulamun a abalamu re nöngön urungan kö nangadi xirip pe God ma ulamun a nunu re nöngön kö Orong e Jisas.

<sup>6</sup> Nöngön u bo ruruu arixe me mem kö nunu re ire, me e seseng bara ina tinuu arixe xö nunu irabo isik a dinödöm deek köbo lalaa deek kirip nang ire min kölöme re Kraiss.

<sup>7</sup> Tönö, a abalamu re nōngön iri tabaa e ma axanan taxin, ma iri öxaxat e, möxösa, nōngön u rö ömagan kirip abo to xö marakörö runon te God.

*Pol ixo seng e Pilimon bara irabo öga lo e Onesimus*

<sup>8</sup> Xö kinis se e kölöme re Kraiss, e balamasa sik ma i eöt te e bara arabo ugut nōngön tua wewet abo lalaa sa i deek bara örobo pet.

<sup>9</sup> Ma lamun eka seseng mon nōngön ma önga laa, a unine bira, bara a abalamu re nōngön. E seng mon nōngön, möxösa, e iat e Pol, me e tuu öt e Kraiss Jisas, ma na e a öng bölök nang idi tere bulus e xö gunon ne aömokorot tua gene ine.

<sup>10</sup> E seng nōngön tua gene Onesimus. Ine ixo ot pösöt e ra xö gunon ne aömokorot. Me e xo top ine ra nunu re Kraiss. Ma na ine a barok ke e kölöme re Kraiss.

<sup>11</sup> Mesila ine kaim kö wewet te tinörön deek kua rorop nōngön. Ma lamun na ine iri rörörön deek ura rö e ma urungan bölök ke nōngön.

<sup>12</sup> Ine i xarnang a kat turunon te e, ma na e uguran öbaling ine urungan te nōngön.

<sup>13</sup> Me e xo maaaa rua ganim sik ine ra me e, io nang kö ine ra xikip lo a xönö maup pe nōngön tua rorop e ra xö kinis se e kölöme xö gunon ne aömokorot ulamun a atöngösen deek.

<sup>14</sup> Ma lamun e koxobo maaaa bere e rabo sidien nōngön tua mumuu a maaaa re e. E maaaa bara örobo isik a rorop niang u döxömen tua isik. Io niang, e kebeöt ta wewet te önga laa nang nōngön u koxobo aut ulamunon.

<sup>15</sup> I turunon bere ine ixo wan kalik bang nōngön. Inexalik ina laa na i ot nagut tue nōngön ta ilo öbaling im ine.

<sup>16</sup> Ökorobo pere öbaling im ine xarnang a önga tultul kö pu re nōngön. Kaim. Nōngön örobo pere ine xarnang a önga töm söxöt. Ma ina na i deek köba xö tultul mon. Me e maaaa iat ulamun ine, ma lamun nōngön örobo maaaa xöba lamun ine xarnang önga tultul te nōngön ma xarnang bölök a önga töm kölöme xö Orong.

<sup>17</sup> Ma nang bere nōngön u perexulen e bere iraa te narön turunon, io, e seng nōngön bara örobo öga lo ine bölök xarnang örobo öga e.

<sup>18</sup> Ma nang bere ine iri pet te sasaban urungan te nōngön, ma bara ixo dinau xalik nōngön, io, örö isik tabaa e min me e rabo balu öbaling.

<sup>19</sup> E, e Pol, e geet inabo tinenge na ma limeke iat, bere e rabo balu urungan tö nōngön. Inexalik örobo dödöm deek

bara ökorobo balu a dinau pe nöngön mera re e. Ma ina dinau, a to ulorexe re nöngön iat.

<sup>20</sup> Turunon saxit, töke, e maaaa bara örobo top e bira ulik mon kölöme xö kinis se e ma Orong. Öro ömagan a to re e kölöme re Krai.

<sup>21</sup> E gegeet urungan tö nöngön, möxösa, e ösöxö bara örobo tame e ma bara abo tatalien te nöngön irabo deek köba xö nang e seng.

<sup>22</sup> Ma önga laa bölök. Öro tagure re önga xönö xö gunon te nöngön ulamun e, rue e ra eöt tua uxileng e nöngön, möxösa, e döxömen bere God irabo ölangen abo sineseng ke mum ma irabo ölanglanga rewe e urungan te mum.

<sup>23</sup> Epaparas, ewe nang i kis arixe me e ra xö gunon ne aömokorot tua gene e Jisas Krai, i tile a tinenge ne aöga urungan te nöngön.

<sup>24</sup> Me idi nang tobo rörörön arixe me e, e Mak, e Aristakus, e Demas me Luk, idi te tile bölök abo tinenge ne aöga urungan te nöngön.

<sup>25</sup> A abalamu re Jisas Krai, a Orong, irabo kis arixe me mum.

## A Ginigeet urungan köbo Ibru

Ire tokobo ösöxö bere ewe runon ixo geet ina ginigeet na. Ulang idi te döxömen bere Pol, uleng kabise bere Banabas bere Apolos bara önga tödi xabise. Inexalik i maras bara ina ginigeet na ixo wan pösöt idi abo Judeia (nang tobo tengen bölök bara idi abo Ibru). Me idi toxoro nunu re Kraiss. Ulang ne tabuno nunu toxo eler mabo Kristien ne Ibru, io nang, a uleng ke idi toxo maa ra tawuxus baling köbo warkurai te Moses mabo tinörön möxö lotu xöbo Judeia. Io, ina ginigeet i ötumarang idi bara ganim idi ra tinawuxus kalik e Jisas bira, xalik e God irabo kure idi xarnang ixo kure abo untubuno idi abo Israel mesila saxit. Ina ginigeet i etöngösen bere Kraiss iat i eöt tua öro ire, möxösa, ine a Barok kö God, ma i taxin köbo propet mabo angelo me Moses bölök (pere e Ibru 1:1-3:6). Ma a minet tine rua lalamus a nangadi urungan kö God i deek köba xöbo tinörön ne lotu xöbo pris möxöbo Judeia. Möxösa, Kraiss iri pet a xuxubus maxat nang i kulas tewe a xuxubus maut (8:6-13) nang ixo rörön arixe ma arabaa möxöbo wawaguai. Inabo arabaa niang urungan te God i kobo eöt tua tos tewe abo magingin saban kö nangadi. Inexalik a minet te Jisas i eöt. Me Kraiss irabo kis ulorexe xarnang önga pris (7:1-10:18). Io nang, ire abo Kristien tabo mana wan urungan te God ma balamasa (10:19-22) me ire tabo mana tuu lölös köbo nunu re ire (10:22-39) xarnang idi abo tene nunu me lorexe (11:1-40). Öng i bele ulo wes e Kraiss (2:1-4; 3:7-4:13; 5:11-6:20; 10:26-31; 12:18-29), möxösa, **Kraiss kalik i eöt bara irabo öro ire**, ma ina na a unine ina ginigeet na.

### *Jisas i taxin köba xöbo angelo*

<sup>1</sup> Mesila God ixo wöwörö xöbo untubuno ire xö tinenge ne propet. Ma ixobo wewet köbo oleleng ne axana bung ma kölöme xö oleleng ne mangana ngas.

<sup>2</sup> Ma lamun na im a xakawöm möxö axana bung, me God iri wöwörö rö ire kölöme xö Barok ke ine. Ma ixo pere kos sik bere ine irabo unan abo lalaa xirip. Ma xö limine a Barok ke ine, God ixo uxis a mango ma öxöno lagunon kirip.

<sup>3</sup> Me ine a mararang möxö mariris se God. Ma i eöt turunon iat me God. Ma ibo sösölök ma ibo balaure a mango ma öxöno lagunon kirip ma lölös möxö tinenge re ine. Ma nang ixo pet a tinörön ne kip tewese abo magingin

saban, ixo kip a kinis taxin. Ma ina kinis nang i kis kö lawa tuun kö Öng Nang i Taxin Saxit Köba riso xö watmaep.

<sup>4</sup> Io, ine ixo kip lo a kinis taxin nang i taxin sik ke idi abo angelo, xarnang mon a ese nang God ixo isik ke ine, i taxin sik ke idi.

<sup>5</sup> Ma ina na i maras, möxösa, God i kara tengen kere önga angelo bara,

*“Nöngön a Barok ke e.*

*Nixinen e tengen ömaras bara nöngön a Barok ke e, me e a Tata re nöngön.”*

Kaim. I koxobo tengen bira xöbo angelo mon. Ma ixo tengen öbaling bira,

*“E rabo Tamana ine, me ine irabo Barok ke e.”*

<sup>6</sup> Ma xö axana bung bara God i isik ot a Barok ke ine ura xö öxöno lagunon, ina Barok ke ine nang i kip lo a sisila ne kinis, God i tengen öbaling bara,

*“Abo angelo re God idi xirip tabo mana lotu wösöt a Barok ke e.”*

<sup>7</sup> Ma ulamun abo angelo, God ixo tengen bira,

*“God ibo wewet abo angelo re ine xarnang a xiki.*

*Ma ibo wewet abo tene tinörön te ine xarnang a kamene ia.”*

<sup>8</sup> Ma lamun kö Barok ke ine i tengen bara,

*“God, a kinis ne warkurai te nöngön irabo kis ulorexe ma i karabo kawam.*

*Ma örobo kure a nangadi re nöngön ma tatalien töxödös.*

<sup>9</sup> *Me nöngön u bo maaaa lamun a tatalien töxödös ma u bo melmelentexin abo sasaban.*

*Io niang, God, ewe ine a God te nöngön, ixo bulus a wel ne axanan lömö re nöngön tua pere kos nöngön.*

*Möxö ina na, nöngön örobo kip lo a kinis nang i taxin te idi abo ais se nöngön.”*

<sup>10</sup> Me God ixo tengen öbaling bara,

*“Orong, mero xö urulo nöngön u xo uxis a öxöno lagunon.*

*Ma u xo pet a mango ma nine limem iat.*

<sup>11</sup> *A balana kubu ma öxöno lagunon idu tabo kawam, ma lamun nöngön örobo kisisik iat.*

*Idu tabo xarnang a man maut i tamadidi.*

<sup>12</sup> *Me nöngön örobo pulin idu xarnang a man.*

*Ma örobo kulas idu xarnang a nangadi tobo kulas man mabo man te idi.*

*Inexalik u kara xuxulas, ma abo bung ke nöngön i karabo kawam.”*

<sup>13</sup> Me God i kara tengen kö önga angelo bara,

*“Örö kip a kinis taxin ta xö lime tuun te e,*



*ot nang e rabo bulus ösu abo iuo re nöngön kö pu xarnang a laa möxö bulus xexe."*

<sup>14</sup> Io, a sa runon idi abo angelo? Idi abo tano ne tultul. Me God ibo ritile rewe idi rua rorop idi ewe nang God irabo öro idi.

## 2

*Ire tebele dödöm tataun kalik a ineöro xö God*

<sup>1</sup> Io niang, ire tabo mana dödöm deek ulamun abo tinenge ire tere ölangen, xalik ire te subu rewe talu ina tinenge.

<sup>2</sup> Ire te ösöxö bara a atöngösen meringan köbo angelo ixo tuu lölös, ma ixo kebeöt bara tabo kip tewese. Mabo axana bung kirip nang a öng ixo lexe ma i koxobo tame, ixo kip lo a ömokorot eöt mabo magingin saban te ine.

<sup>3</sup> Nang bara ina na i turunon, io, irabo bule nang bara ire te dödöm tataun kalik ina ineöro raxin kö God? Turunon saxit, i karabo eöt bara ire tabo ulo rewe xalik a ömokorot nang irabo wanot pösöt ire. E Orong ixo arun ta atöngösen maras ma ina ineöro. Melamu ewe idi nang toxo ölangen, idi im toxo öturunon ura rö ire.

<sup>4</sup> Me God bölök ixo öturunon ina na nang ixo osen abo uxileng nang ixo öngangao a nangadi, ma nang ixo pet abo mangana lölös ne auuwuwus, ma nang ixo erimine a nangadi mabo arabaa möxö Töxödös ne Tanono eöt ma mamaa iat te ine.

*Jisas ixo ot xarnang a tödi rua minet tua gene a nangadi*

<sup>5</sup> Me God kaim kö bulbulus a dinödöm pe ine bara abo angelo tabo kure a öxöno lagunon nang irabo wanot melamu. Kaim. Ina öxöno lagunon maxat nang ire te dödödöm ulamunon ine na.

<sup>6</sup> Ma kölöme xö tinenge re God toxo geet, ma öng ixo tengen bira:

*"Ruasa u dödöxömen e mem abo duöng? A laa tataun mon e mem.*

*Ruasa u balaure e mem?"*

<sup>7</sup> *U xo bulus ösu e mem a nangadi xö pu xöbo angelo bere mem marabo kis aulik bang bie.*

*U xo tabaa e mem ma mariris ma ese raxin.*

<sup>8</sup> *U xo bulus abo lalaa xirip kö pu re mem."*

A tinenge re God nang toxo geet i tengen bere God ixo bulus abo lalaa xirip kö pu xö nangadi. Na im i maras bara i bönöt kirip sik abo lalaa xirip. Kaim pe laa irabo kis tewe xalik a warkurai kö nangadi. Inexalik kö axana bung na ire tokobo perexulen bara abo lalaa xirip i kisisik kö pu xö nangadi.

<sup>9</sup> Inexalik ire te perexulen a öng, ine e Jisas. E God ixo bulus ösu aulik mon ine xöbo angelo bara irabo met tua gene a nangadi xirip. Ma ixo met biringan, möxösa, e God

ixo marase tataunin mon a nangadi. Ma lamun na im, ire te pere bere God iri bulus öxaa ine ma iri ii öraxin ine, möxösa, ixo örasen a kinadik möxö minet.

<sup>10</sup> Me God ine nang ixo uxis abo lalaa xirip, ma ixo pet idi bara rö ine iat. Ma ixo maaaa bara irabo lamus a oleleng ne barok ke ine uruso lömö bara irabo ii öraxin idi. Io nang, i töxödös bara God ixo ömaraxen e Jisas bara irabo örasen ina mangana kinadik rue ine ra eöt tunon iat tua sasawang a ngas bara idi tabo kip a ineöro.

<sup>11</sup> Io, e Jisas ewe nang ixo ömadakdak idi xalik abo sasaban urungan kö God, me idi nang te madakdak sik bira, idi te önga marapun mon me Jisas. Io nang, e Jisas i koxobo menge ra xukuwe idi bara idi abo tök ke ine.

<sup>12</sup> I tengen kö God bara,  
*"E rabo töngösen abo töke ulamun nöngön.  
 Ma nang bara e mem me kis etok e rabo ölet nöngön ma  
 sinö."*

<sup>13</sup> Ma i tengen öbaling bira,  
*"E rabo bulus a nunu re e re God."  
 Ma i tengen bölök bira,  
 "Pere bang! Mem arixe mabo baroxorok nang e God ixoro  
 tabaa e midi."*

<sup>14</sup> Ma ina nangadi nang ixo kuwe idi bara a bung baroxorok, idi a duöng mon. Idi ma aidi, me idi ma dee. Io nang, e Jisas ixo ot xarnang idi bara irabo met. Ma ixo met tua xikip tewe a lölös se Satan ewe nang ixo eöt tua sisilien a nangadi urungan kö minet.

<sup>15</sup> A nangadi toxobo bubuut tua minet. Ina binuut ixobo kubus sik idi xöbo bungbung kirip. Inexalik e Jisas ixo met tua ölanglanga rewe idi xalik a minet.

<sup>16</sup> Turunon saxit, Jisas i kara top abo angelo. Kaim. Ine ibo isik abo rorop köbo baroxorok ke Abaram.

<sup>17</sup> Io niang, a önga ngas mon i eöt bere Jisas irabo muu. Ixo ot xarnang önga mangana sisila ne pris taxin ewe i eöt tua marse abo nangadi ma rua wewet ödeek abo tinörön te ine wösöt e God, ma rua isik önga arabaa ulamun abo magingin saban te idi rua öxöwöm a laie re God. Möxö ina na, ixo ot xarnang önga tödi mon, eöt turunon iat mabo tönö.

<sup>18</sup> Ma i eöt tua rorop idi nang abo lalaa tabo könönöin idi, möxösa, meringan kölöme xö kinadik ke ine, abo lalaa toxo könönöin ine bölök.

### 3

*Jisas i taxin te idu me Moses*

<sup>1</sup> Io nang, mum abo madakdak ne töke nang e God ixo kuwe lo bölök e mum, mum morobo mana dödödöm bere e Jisas ewenene. Ine ewe nang e God ixo tile ura ma tingenge xarnang önga aposol. Me ine a pris taxin. Me ire ta nunu re ine ulamun inabo lalaa na.

<sup>2</sup> God ixo pere kos e Jisas, ma ixo pet eörin tunon iat a maaaa xö God, xarnang e Moses bölök ixo pet nang ixo balaure a bung marapun te God.

<sup>3</sup> Ma nang bara re öng i kip ot önga bung marapun, a ese raxin tabo isik ke ine, i taxin kö ese tabo isik iat kö ina bung marapun iat. Io niang, a ese raxin ire te isik ke Jisas i taxin kö ese ire te isik ke Moses.

<sup>4</sup> Turunon bara bung marapun kirip, a öngöng ibo kip ot idi. Inexalik e God ewe nang ixoro kip ot abo lalaa xirip.

<sup>5</sup> Moses önga tultul kölöme xö bung marapun nang ke God. Ma ixo rörön deek eöt tunon iat ma maaaa xö God. Ma ixo töngösen a nangadi ma niang e God irabo tengen melamu.

<sup>6</sup> Kraiss bölök bie. Ixo rörön deek eöt tunon iat ma maaaa xö God. Ma lamun Kraiss, ine a Barok kö God kölöme xö bung marapun te God. Ma ibo balaure ina marapun. Me ire abo unsaxana xö bung marapun te ine nang bara ire te tuu lölös kö nunu re ire ma nang bere ire te xixiset ma nunu raxin köbo lalaa ire te ölolot ulamunon nang e God irabo tabaa ire min melamu.

*Ire tabo mana nunu*

<sup>7</sup> Io niang, mum morobo mana ölangen a Töxödös ne Tanono nang i tengen bira,

*“Nang bara mum mo ölangen a inöno e God nixinen,*

<sup>8</sup> *mum bele ölölös abo bala mum*

*xarnang abo untubu mum idi toxo ölölös abo baladi xina axana bung idi toxo tabuno ölangen e nang idi toxo könönöin e xö xönö tataun.*

<sup>9</sup> *Idi toxo pere abo tatalien te e urungan te idi i eöt ma nit ne sangaun ne awat,*

*ma lamun idi toxobo könönöin e ringan ee.*

<sup>10</sup> *Io niang, e xo laie mina nangadi.*

*Me e xo tengen, ‘Abo baladi ibo önan tewe xalik e.*

*Idi takara maras ulamun a mangana ngas nang e maaaa bara idi tabo muu.’*

<sup>11</sup> *Io, e xo laie me e xo ösugurno bara,*

*‘Idi tekebeöt tua nilaxa xö kinis ne mamas se e.’ ”*

<sup>12</sup> Abo töke kölöme re Kraiss, mum morobo ebalaure deek bara xalik ke öng kaluluonin e mum ibo kip pe mangana dinödöm saban ma i kobo nunu. Nang bara öng i talien bira, irabo tawes lo xalik a God nang a lak to.

<sup>13</sup> Ma ixo tengen ina axana bung niang bara, “*Nixinen.*” Ma “*Nixinen*” niang i bönöt bölök ina axanan bung na. Io niang, na im mum morobo mana eöxaxat ebasin e mum kö bungbung kirip, bara abo magingin saban i bele lamus öröxröxö re öng kaluluonin e mum ma irabo tabuno ölöngö.

<sup>14</sup> Xö axana bung bere ire toxo nunu arun te Kraiss, ire toxo tuu lölös kö nunu re ire. Ma irabo ot maras bara ire mere Kraiss nang bara ire tabo tuu lölös biringan ot nang ire tabo met.

<sup>15</sup> Nang bara ire te tuu lölös sik biringan i eöt ma tinenge xö God nang i tengen bira:

*“Nang bere mum mo ölangen a inöno e God nixinen,  
mum bele ölölös abo bala mum  
xarnang abo untubu mum idi toxo ölölös abo baladi xina  
axana bung idi toxo tabuno ölangen e.”*

<sup>16</sup> Io, me ewe idi nang toxo ölangen, ma lamun idi toxo tabuno ölangen e God? Turunon saxit, bara idi iat nang e Moses ixo lamus ösu idi mero Isip.

<sup>17</sup> Me God ixo laie sik ke ewe xö nit ne sangaun ne awat? Turunon saxit, idi mon nang toxo pet a sasaban ma toxo met tingan kö xönö tataun.

<sup>18</sup> Me God ixo ösugurno ulamun ewe, bara idi tekebeöt tua nilaxa xö kinis ne mamas se ine? Idi mon nang kaim kö rarame ine.

<sup>19</sup> Io, ire te maras bara idi tokoxobo eöt tua nilaxa, möxösa, idi tokoxobo nunu.

## 4

<sup>1</sup> Io, God iri kubus sik bara irabo isik ina mamas sö ire. Ma ina kunubus i kisisik iat bie. Möxö ina na, ire tabo ebalaure deek, kalik e God irabo pere wösöt te öng kaluluonin e mum bara i kobo eöt tua nilaxa xö kinis ne mamas se ine.

<sup>2</sup> Me ire tabo ebalaure deek biringan, möxösa, idi toxo palas a tinenge deek kaluluonin ire xarnang idi toxo pet bölök köbo untubuno ire. Ma lamun ina tinenge i koxobo top idi, möxösa, idi toxo ölangen mon me idi kaim kö nunu xönan.

<sup>3</sup> Ma lamun ewe ire nang tere nunu, ire tere laxa xina kinis ne mamas xarnang e God ixo tengen sik bie,

*“Io, e xo laie me e xo ösugurno bara,  
‘Idi tekebeöt tua nilaxa xö kinis ne mamas se e.’ ”*

Ixo tengen bira, ma lamun abo tinörön te ine ixoro kawam meringan kö uxixis möxö öxöno lagunon.

<sup>4</sup> Io, ma kölöme xö önga xönö möxö tinenge re God idi toxo geet i tengen bira, “*Ma xö pitnö ma ninöng ne bung God ixo mamas kalik abo tinörön te ine.*”

<sup>5</sup> Ma i tengen bira bölök kö ina xönö xabise bara, *“Idi tekebeöt tua nilaxa xö kinis ne mamas se e.”*

<sup>6</sup> Ewe idi nang toxo arun ta ölangen ina atöngösen deek, idi tokoxobo laxa xö kinis ne mamas, möxösa, kaim idi xo rarama e God. Inexalik i maras bara a dauleng kabise tabo laxa xönan,

<sup>7</sup> möxösa, nang a oleleng ne awat ixoro saxit a axana bung kö inabo nangadi niang, God ixo kubus öbaling önga bung kua nilaxa. Ma ixo tengen ine bara, *“Nixinen”* kölöme xö ginigeet te Dewit. Xarna na iat mon ire tere kos, Dewit ixo tengen bira:

*“Nang bere mum mo ölangen a inöno e God nixinen, mum bele ölöös a bala mum.”*

<sup>8</sup> Nang bere Josua ixoro isik a mamas se idi abo untubuno ire, God i kexebe eöt tua winörö melamu baling ulamun a önga bung kabise rua nilaxa.

<sup>9</sup> Io niang, i nangen a mamas xarnang a mamas kö God kö pitnö ma ninöng ne bung bara a marakörö re God tabo kip,

<sup>10</sup> möxösa, ewenene öng i laxa xö kinis ne mamas kö God, ine irabo mamas bölök köbo tinörön te ine.

<sup>11</sup> Io nang, ire tabo mana lölös sua nilaxa xö ina kinis ne mamas, xalik ke öng ibo muu a magingin ne tabuno ölöngö, ma irabo iuo.

<sup>12</sup> Me ire tabo mana lölös bira, möxösa, a tinenge re God i to ma i rörön ma i xarnang önga use. A use möxö inarse nang i aan kö nine lawa xirip, i eöt tua kara re öng ma irabo kuru abo wawasum möxö sii ma irabo palang abo sii bölök. Inexalik abo tinenge re God i aan köba xöbo mangana use xarna na. I eöt bara irabo laxa urungan kölöme xö unine to xö öng ma urungan kölöme xö tanono bölök. Ma i eöt tua kure abo mangana dinödöm ma abo mangana maaaa möxö balna ire.

<sup>13</sup> Ma kaim pe laa xöbo lalaa e God ixo uxis i eöt tua minun kalik a wawara xö God. Abo lalaa xirip te tawalas ma te kisisik kö malmalan kö wawara re ine. Me ine ewe nang ire tabo wan pösöt, ma irabo kure ire.

### *Jisas ine mon a pris se ire*

<sup>14</sup> Io, ire ma önga pris taxin ewe nang iri wan laxa uruso xö watmaep. Me ine e Jisas, a Barok kö God. Io niang, ire tabo mana tuu lölös köbo lalaa ire tere etöngösen min nang ire te nunu xönan,

<sup>15</sup> möxösa, a pris taxin te ire i ösöxö xulen bara i malus sö ire rua sunubu, möxö inabo lalaa ixo könönöin ine nang ibo könönöin ire bölök. Inexalik ine iat i koxobo subu laxa xere önga magingin saban.

<sup>16</sup> Io niang, ire tabo mana wan pösöt e God ma balamasa. Me ine ewe nang ibo isik tataunin a abalamu rö ire. Ire tabo mana wan biringan urungan te ine, lamun irabo marse ire ma irabo top tataunin ire xö axana bung bere ire te sasaxan lamun ina rorop niang.

## 5

<sup>1</sup> Ma abo pris tataxin, God ibo pere kos lo idi öngöng kaluluonin a nangadi. Me ine ibo tulus idi rua nuan urungan te ine rua gene a nangadi. Idi tabo söngöt abo arabaa urungan te ine rua xikip tewe a tatalien saban möxö nangadi.

<sup>2</sup> Ma a pris taxin i eöt tua rorop a nangadi nang tokobo maras ulamun a dedeek ma a sasaban me idi te tawes tewe xalik a ngas töxödös. Ine i eöt tua rorop idi xarnang a tödi ödödö, möxösa, ine bölök, i malus se ine rua sunubu xö sasaban.

<sup>3</sup> Io nang, ine i karabo söngöt a arabaa urungan te God tua xikip tewe a sasaban möxö nangadi xalik mon. Kaim. Ine irabo mana söngöt a arabaa ulamun abo sasaban te ine iat bölök.

<sup>4</sup> Ma i kebeöt bara irabo kip tataunin lo mon ina tinörön taxin möxö pris. Kaim. Irabo kip lo ina mangana tinörön nang iat bere God irabo kuwe lo ine xarnang ixo kuwe bienin e Aron.

<sup>5</sup> Me Kraïs bölök i koxobo bulus a dinödöm pe ine iat bara irabo kip lo ina tinörön ne pris taxin. Kaim. God ixo tengen bira rö ine,

*“Nöngön a Barok ke e.*

*Nixinen e tengen ömaras bara nöngön a Barok ke e, me e a Tata re nöngön.”*

<sup>6</sup> Me ine i tengen bie bölök kö önga xönö xabise bira,  
*“A tinörön ne pris taxin te nöngön irabo tuu ulorexe eöt ma tinörön ne pris nang e Melkisedek ixobo wewet.”*

<sup>7</sup> Ma nang e Jisas ixo roro ra xö öxöno lagunon ixobo wewet abo sineseng ma ginee raxin urungan te God ewe nang ixo eöt bara irabo top ine bara i karabo met. Me God ixo ölangen ine, möxösa, Jisas ixo ii ölik ine xö God.

<sup>8</sup> A turunon bere ine a Barok kö God, nexalik ixo kip inausu rua rarame e God kölöme xöbo kinadik ke ine.

<sup>9</sup> Io niang, nang e God ixoro pet eörin turunon iat e Jisas xarnang a pris taxin, Jisas ixo ot xarnang ina tödi möxö isik a ineöro ulorexe urungan te idi xirip nang te tame ine.

<sup>10</sup> Me God ixo tulus ine bara irabo a sisila ne pris taxin, eöt ma tinörön ne pris nang e Melkisedek ixo pet.

*Ire tebele tawes tewe xalik e God*

<sup>11</sup> E mamaa bara arabu tengen a oleleng ne lalaa bang kö ina na. Inexalik i lölös sö e rua ömaras urungan te mum, möxösa, mum bo lönlön tua ölangen.

<sup>12</sup> Bang saxit mum moxo nunu ma a axana bung ixo eöt bere mum morobo usu a dauleng. Inexalik mum mo maa iat bang ulamun te nangadi rua usu e mum mabo tinenge re God nang mum moxoro arun tua inausu min. Mum kebeöt tua xikip abo nien lölös. Kaim. Mum nangen iat bang mo rutus.

<sup>13</sup> Ma nang bara re öng i nangen bang i rutus, ine a bak lik ma i kobo ösöxö xulen bara a tatalien i töxödös.

<sup>14</sup> Ma lamun abo nien lölös i eöt te idi abo duöng maruxo, möxösa, idi tere eusu xö axana bung ömat tua werwere xulen abo dedeek mabo sasaban.

## 6

<sup>1</sup> Io niang im, i deek bara ire tabo wan taxase urungan köbo inausu rataxin ulamun e Kraiss nang i eöt köbo duöng maruxo. Ire tabo ganim sik abo lalaa ire toxo araun ta inausu min. Inabo mangana lalaa a unine a inausu mon nang a öng irabo araun tua xikip. Inexalik ganim ire ra tawuxus baling urungan kö unine inausu re ire. Io niang, ire tebele wöwörö baling bara öng irabo mana dödöm puxus xalik abo tatalien i silien ine urungan kö minet. Me ire takarabo wöwörö baling lamun abo nunu re ire urungan te God.

<sup>2</sup> Ire takarabo eusu baling ulamun a baptais ma abo mangana sasalap pua madakdak. Me ire tebele wöwörö baling ulamun a magingin ne bulus lime lömö xö nangadi. Ma bira bölök, ire tebele wöwörö baling ulamun a tinaru xalik a minet ma ina axana bung nang God irabo pet warkurai ma ina warkurai i karabo kawam. Ina na abo sinila ne lalaa.

<sup>3</sup> Ma lamun ire tabo wan taxase nang bere God irabo ömaraxen ire.

<sup>4</sup> Io, i kobo eöt tua silien lo ewe idi nang te tawes tewe xalik e God tua dinödöm puxus. Xö önga axana bung mesila idi toxo maras. Idi toxo nanamienin a arabaa meringan kö watmaep. Me idi toxo kip a Töxödös ne Tanono.

<sup>5</sup> Me idi toxo nanamienin abo lalaa deek möxö tinenge re God. Me idi toxo örasen a dauleng nebo lölös deek möxö ina axana bung nang irabo ot melamu.

<sup>6</sup> Idi toxo xarna na, nexalik idi toxo tawes lo xalik e God! I kobo eöt tua lalamus puxus öbaling idi, möxösa, i xarnang bere idi te rutut öbaling a Barok ke God kö öxöno sölöxöröp me idi te ömenge ine xö malmalan.

<sup>7</sup> A pu nang a oleleng ne bara i subu xönan ma i öxubu a nien niang i top idi abo tene tinörön möxö pu, God ibo wadöane a pu niang.

<sup>8</sup> Inexalik a pu nang i isik ot a pirixö saban mon i kebeöt ta rorop pe önga laa. Kaim. I lörörö bere God irabo köö ine ma melamu irabo söngöt ögarin ine.

<sup>9</sup> Abo ais deek ke e, e tenge biringan te mum, inexalik a dinödöm pe e i lölös bara i karabo ot biringan tö mum. Kaim. E döxömen bere mum morobo kip lo abo lalaa deek, inabo mangana lalaa i eöt ma marakörö nang e God ixoro öro idi.

<sup>10</sup> God i kara pet abo tatalien nang kaim bara a lak töxödös. Kaim. Ine irabo döxömen lo abo tinörön deek ke mum ma abalamu re mum urungan te ine nang mum moxo osen nang mum moxo top abo duöng tus se ine ma nangen mum mo wewet bira.

<sup>11</sup> E mamaa bara mum morobo lölös sua wewet sösoxöin bira ot kö öxöwöm möxö to re mum, rue mum pua xikip tunin abo lalaa mum mo xixiset ma nunu ulamunon meriso lömö.

<sup>12</sup> Me e kobo mamaa bere mum morobo lön. Kaim. Mum morobo mana muu a mangana to re idi nang te nunu ma te balamasa. Inabo mangana nangadi tabo uruoxe abo lalaa nang e God ixo xuxubus sik ke idi ulamunon.

*A xuxubus se God irabo tuu lölös*

<sup>13</sup> Ma nang e God ixo xuxubus sik urungan te Abaram, ixo ösugurno rua ölölös a xuxubus se ine. Ixo ölölös ina xuxubus ma a esene iat baling, möxösa, kaim pe öng i taxin sik ke ine.

<sup>14</sup> Ixo tengen bara, *“Turunon saxit, e rabo wadöane nöngön ma meringan te nöngön arabo isik ot a oleleng ne bung marapun.”*

<sup>15</sup> Io, me Abaram ixo balawapat, io, ixo kip lo ina laa e God ixo kubus sik ulamun ine.

<sup>16</sup> Ma nang bara re öng i usugurno, irabo tengen a esene a öng i taxin sik ke ine. Ma abo agot irabo kawam, möxösa, ina usugurno bira irabo öturunon a tinenge re ine.

<sup>17</sup> God ixo ölölös a kunubus se ine arixe ma usugurno, möxösa, ixo mamaa bara idi ewe nang ixoro pet a xuxubus sö idi, io, tabo maras deek bara a dinödöm pe ine i karabo xuxulas.

<sup>18</sup> Io, God ixo xuxubus ma ixo usugurno bölöök. A nine laa na i kebeöt tua xuxulas, möxösa, God i kebeöt tua röxröxö. Io niang, ire ewe nang ire tere ulo wösöt ine rua xikip abo lalaa deek nang ixoro tagure bulus ma nang ire te xixiset ma nunu ulamunon, io, ire tabo balawapat bara ire tabo kip lo.



<sup>19</sup> Ma nang ire te xixiset ma nunu xarna na, i eöt ma önga aga möxö sim i töndik sik abo to re ire. Io niang, ire tekebeöt ta mamagi. Ire tabo tuu lölös. Ma ina tatalien ne xixiset ma nunu re ire, i laxa xö gunon ne lotu raxin niso xö mango xö xönö madakdak melamu xö man nang ibo bölö wi sik ine.

<sup>20</sup> Me Jisas ixo araun ta nilaxa ringan tua gene ire. Ma ixo kip a kinis ne pris taxin eöt ma tinörön ne pris nang e Melkisedek ixo pet.

## 7

### *Melkisedek i taxin köbo pris*

<sup>1</sup> Io, me Melkisedek ine a king mee Salem. Me ine a pris se God Ewe Nang i Taxin Saxit. Io, Abaram ixo ratawuxus baling möxö urube nang ixo pas ösu a nit ne king taxin. Melkisedek ixo esuo me ine ma ixo wadöane ine.

<sup>2</sup> Me Abaram ixo tabaa ine ma öng möxöbo sangaun ne lalaa xirip nang ixoro kip lo. Io, ma sinila ne unine im möxö esene Melkisedek i bira: "A Töxödösine King." Ma nexalik bara ine ixo king mee Salem, io, a unine möxö esene i bira bölök: "A King möxö Malum."

<sup>3</sup> Tokoxobo tengen te laa ulamun e tamana me nene, ma ulamun bölök abo untubuno. Kaim bölök ke atöngösen ulamun a urulo ma xakawam möxö to re ine. Io nang, ine i xarnang a Barok kö God bira. Ine iri kip lo a kinis möxö pris ulorexe.

<sup>4</sup> Mum moro pere! Ine a tödi raxin saxit. A untubuno ire im belek e Abaram nang ixo isik a öng möxöbo sangaun ne lalaa re ine nang ixo kip lo meriso xö urube.

<sup>5</sup> Io, a warkurai te Moses ixo warkurai sik kö bung marapun te Lewi ewe idi te kip a kinis ne pris, bere idi tabo kip lo a öng möxöbo sangaun ne lalaa meringan kalik abo marapun kabise mee Israel. Ma i turunon bara inabo nangadi bölök abo untubuno e Abaram xarnang a marapun te Lewi, inexalik abo pris toxo kip lo a öng möxöbo sangaun ne lalaa meringan te idi.

<sup>6</sup> Melkisedek i kobo a barok tubuno e Lewi, ma lamun ixo kip lo a öng möxöbo sangaun ne lalaa re Abaram ma ixo wadöane e Abaram. Me Abaram ina tödi ewe ixo uruoxe abo kunubus se God.

<sup>7</sup> Ma i maras bara ewe i pet a warwadöan, i taxin te idu me ewe nang i kip a warwadöan.

<sup>8</sup> Io, inabo pris, idi tobo kip a öng möxöbo sangaun ne lalaa meringan kö nangadi. Me idi abo pris tobo memet. Melkisedek bölök ixo kip lo a öng möxöbo sangaun ne lalaa. Inexalik i to ulorexe xarnang a tinenge xö God toxo geet i tengen.

<sup>9</sup> Ma a bung marapun te Lewi ewe niang idi tobo xikip lo a öng möxöbo sangaun ne lalaa meringan kalik a nangadi. Inexalik i wawara xarnang bere Lewi ixo isik tewe a öng möxöbo sangaun ne lalaa urungan te Melkisedek kö bung niang e Abaram ixo tabaa e Melkisedek bie.

<sup>10</sup> Ma i eöt bara tabo tengen bere Lewi ixo tabaa e Melkisedek xarna na, möxösa, nang e Melkisedek ixo esuo me Abaram, i xarnang bere Lewi i nangen kölöme xö aine e Abaram.

*Jisas i kip a kinis ne pris xarnang e Melkisedek*

<sup>11</sup> A tinörön ne pris nang idi möxö bung marapun te Lewi toxo pet, ina tinörön a unine warkurai te Moses nang God ixo isik köbo duöng mee Israel. Inexalik nang bara abo pris möxö marapun te Lewi toxoro eöt tua wewet ödeek a nangadi, ire tekexebe sasaxan ulamun te önga mangana pris kabise, kaim bara a öng meringan te Aron, ma lamun a öng i eöt me Melkisedek.

<sup>12</sup> Ma nang bere ire te kulas tewe a nangadi ewe idi te eöt tua xikip lo a kinis ne pris, ire tabo mana kulas a warkurai bölök.

<sup>13</sup> Nang a tinenge re God i tengen inabo lalaa, i wöwörö ulamun a Orong ke ire. Inexalik ine möxö marapun kabise. Ma kaim pe öng möxö bung marapun te ine ixo rörön kö alta xarnang a pris.

<sup>14</sup> Iri maras im bere ine a marapun te Juda. Ma nang e Moses ixo wöwörö ulamun inabo pris, ine kaim pa rengrengen te laa ulamun a bung marapun te Juda.

<sup>15</sup> Io, inabo tinenge re e i ot maras turunon, möxösa, önga pris kabise iri orim. Me ine a öng i eöt me Melkisedek.

<sup>16</sup> Ine i ixo kip ina kinis ne pris, inexalik kaim pe unine bara ine a tubuno a önga mangana marapun. Kaim. Ine ixo kip lo, möxösa, ine i to ulorexe.

<sup>17</sup> Ma na i maras, möxösa, a tinenge re God toxo geet i tengen bira:

*“A tinörön ne pris se nöngön irabo tuu ulorexe, xarnang e Melkisedek ixobo wewet.”*

<sup>18</sup> Me God ixo ganim sik abo sisila ne warkurai, möxösa, abo warkurai i koxobo lölös ma i koxobo eöt bara irabo top ire.

<sup>19</sup> Ina na i maras, möxösa, inabo warkurai i koxobo eöt tua wewet ödeek esexerein a nangadi. Io niang, God ixo isik önga xuxubus kabise rö ire nang i eöt te ire ra xixiset ma nunu ulamunon. I deek kö inabo warkurai, möxösa, i lamus ire lörörö xö God.

<sup>20</sup> Me God ixo usugurno rua öölös a tinenge re ine. Ma nang idi xabise toxo kip a kinis ne pris, e God kaim kö wewet te usugurno.

<sup>21</sup> Ma lamun e Jisas ixo kip a kinis ne pris se ine nang e God ixo usugurno ma ixo tengen tö ine bira:

*“E, a Orong, e re usugurno bara,*

*‘Nöngön a pris ulorexe saxit.’*

*Me e karabo kulas a dinödöm pe e.”*

<sup>22</sup> Io niang, Jisas ine iang i öturunon ina xuxubus nang i deek kö xuxubus möxöbo warkurai te Moses.

<sup>23</sup> Ma olelengin idi abo pris, möxösa, idi toxobo memet ma i koxobo eöt bere idi tabo pet sösöxöin a tinörön ne pris.

<sup>24</sup> Inexalik Jisas i tuu ulorexe xarnang önga pris, möxösa, ine i to ulorexe.

<sup>25</sup> Io niang, Jisas i eöt tua öro idi ulorexe nang te ot pösöt e God kölöme xö tinörön te ine, möxösa, ine i to ulorexe rua sineseng kua gene idi.

<sup>26</sup> Io, ina mangana pris taxin ibo bönöt kirip abo sasaxan te ire. A lak madakdak ine ma kaim ine mere sasaban bara re biling. God ixo bulus tewe ine xalik abo sasaban, ma ixo ii öxaa ine uruso lömö xö watmaep.

<sup>27</sup> Ma i kobo eöt mabo pris tataxin kabise. Ine i karabo mana söngöt arabaa urungan kö God köbo bungbung kirip pua gene abo sasaban te ine baling iat, ma melamu im rua gene abo sasaban te idi a nangadi. Kaim. Ixo isik a arabaa wösöt e God kö önga axana bung mon nang ixo isik öbaling ine. Ma ina arabaa i tuu ulorexe.

<sup>28</sup> Ma abo warkurai te Moses im, i tulus a nangadi ewe idi tokoxobo eöt kö ina tinörön, bara idi tabo kip a kinis ne pris taxin. Ma lamun God ixo tulus a Barok ke ine arixe ma a usugurno nang ixo wanot melamu xö warkurai te Moses. Ma a Barok ke ine ewe nang e God ixo pet eörin turunon iat ine rua ina tinörön ulorexe.

## 8

### *Jisas ine a pris möxö xuxubus maxat*

<sup>1</sup> A unine tinenge e rengrengen i bira: Ire ma önga mangana pris taxin nang ixo kisisik kö lime tuun te Öng i Taxin Saxit Köba ewe nang ibo kisisik kö kinis ne warkurai te ine riso xö watmaep.

<sup>2</sup> Io, ma ibo wewet a tinörön ne pris singan kö xönö möxö lotu riso xö watmaep. Ma ina na a gunon lotu turunon nang e God ibo kisisik könan. Ma Orong iat ixo uru ina gunon, kaim bara nangadi.

<sup>3</sup> Ma a warkurai te Moses ixo tulus abo pris kirip bere idi tabo isik arabaa urungan te God. Io, önga sasaxan ixo kisisik bara a pris se ire, ine bölök irabo isik ke mangana arabaa urungan te God.

<sup>4</sup> Nang bere ine ixoro xisixis sa xö öxöno lagunon, ine i kexebe eöt bara irabo kip a tinörön ne pris, möxösa, a dauleng iat ta nang tobo erabaa urungan te God eöt ma warkurai te Moses.

<sup>5</sup> Idi tobo wewet abo tinörön te idi kölöme xö önga xönö möxö lotu nang a malalar mon ine xö xönö runon möxö lotu lömö xö watmaep. Ma ixo xarnang bölök ke Moses. Nang e Moses ixo eka uru a gunon ne lotu nang idi toxo eka wewet arixe ma man, God ixo ötumarang ine bira, "*Örobo mana balaure ödeek nöngön tua wewet abo lalaa eöt turunon ma nang e xo osen nöngön tiso xö puot.*"

<sup>6</sup> Inexalik a tinörön ne pris nang e Jisas ixoro kip lo i deek köba xö nang idi toxo rörön min mesila, xarnang bölök mon a xuxubus nang e Jisas ixo pet kaluluonin e God ma nangadi rua lalamus idi urungan te ine, i deek kö xuxubus mesila. Ma a xuxubus se Jisas i deek kö xuxubus mesila, möxösa, abo lalaa e God ixo tengen tua wewet kölöme xö ina xuxubus se Jisas, i deek köbo lalaa niang abo warkurai te Moses ixo tengen bara tabo pet kö xuxubus mesila.

<sup>7</sup> Ma nang bara a sisila ne kunubus ixoro rörön deek, God i kexebe dödöm bara irabo kulas mere öng maxat.

<sup>8</sup> Inexalik God ixo pere bara ina nangadi toxo saban sik bang, io, ine ixo tengen bira:

*"Pere bang! E a Orong, e tengen bara a axana bung i eka inuan orim nang arabo pet a kunubus maxat arixe me idi, a nine bung marapun mee Israel me Juda.*

<sup>9</sup> *Ina xuxubus maxat i karabo eöt ma a xuxubus nang e xo pet arixe mabo untubuno idi*

*xö axana bung e xo lamus lo idi, me e xo silien ösu idi mero Isip.*

*E a Orong, e tengen bara e karabo pet ina xuxubus maxat eöt ma sinilane, möxösa, idi tokoxobo tame a sinilane xuxubus se e.*

*Io nang, e xo wan talu idi.*

<sup>10</sup> *E a Orong, e tengen bara a mangana xuxubus e rabo pet ma bung marapun mee Israel kö önga axana bung melamu, ine bira:*

*E rabo bulus abo warkurai te e xö dinödöm pe idi.*

*Ma inabo warkurai e rabo geet oxe xö baladi.*

*Xö ina axana bung melamu e rabo God te idi,*

*me idi tabo a nangadi re e.*

<sup>11</sup> *Re öng i karabo usu re ais se ine bara re tönö bira, bara, 'Örobo mana ösöxö sik a Orong.' Kaim.*

*Ruasa, möxösa, idi xirip tabo ösöxö sik e meringan köbo maris turunon, ot köbo asuono orong.*

<sup>12</sup> *Idi tabo ösöxö sik e, möxösa, e rabo döxömen taun abo sasaban te idi ma a abalamu, me e karabo döxömen lo öbaling im."*

<sup>13</sup> *Io, nang e God ixo tengen a xuxubus se Jisas bara a lak maxarine, i maras bara ixo perexulen a sinilane xuxubus bara a lak maut nang tabo ganim tewe. Ma bara önga laa i maut ma te ganim tewe, i eka xakawam esexere.*

## 9

*Idi toxo lotu bule xö mangana gunon lotu ra xö öxöno lagunon*

<sup>1</sup> *Io, xö sinilane xuxubus a dauleng ne warkurai rua xurxure bara a marakörö tabo lotu wösöt e God bule. Ma önga xönö bölök ka xö öxöno lagunon bara ire tabo lotu wösöt ine ee.*

<sup>2</sup> *Idi toxo uru a önga gunon lotu toxo pet ma man. Xö sisila ne xönö möxö ina gunon, i nangen önga kinis ne bibio arixe ma a öra möxö bulus beret ma inabo beret iat nang a lak madakdak möxö erabaa uruso xö God. Ma toxo tengen ina xönö bara a Madakdak ne Xönö.*

<sup>3</sup> *Ma melamu xö sese öninöng ne bölö toxo pet ma man, a önga xönö bölök. Ma toxo tengen ine bara a Madakdak ne Xönö Saxit.*

<sup>4</sup> *Ma kölöme xönan a alta toxo pet ma gol nang tobo söngsöngöt a kabus nang i sixine deek. Ma ringan ee bölök a boxis möxö bulbulus a xuxubus se God nang idi toxo pet ine ma gol. Ma kölöme xina boxis a önga bile idi toxo pet ma gol, ma a manna ringan ee kölöme xö bile. Ma a buxo re Aron nang ixo subun kaa ibo kisisik kingan ee kölöme bölök arixe ma nine xönö wat nang e God ixo geet abo warkurai möxö xuxubus könan.*

<sup>5</sup> *Ma meringan lömö xö ina babaxut möxö ina boxis, a nine mangana angelo niang idu toxobo kisisik arixe me God köbo bungbung kirip. Me idu toxo tuu wi sik ina babaxut nang e God ibo xikip tewese abo magingin saban ee. Io, ma lamun na i kebeöt bara arabu wöwörö oleleng ulamun inabo mangana lalaa.*

<sup>6</sup> *Idi toxo bulus ödeek inabo laa bira, ma abo pris idi toxobo laxlaxa urungan kölöme xö ina sisila ne xönö xöbo bungbung kirip pua wewet abo tinörön te idi.*

<sup>7</sup> *Inexalik a pris taxin kalik mon ixo eöt tua nilaxa xö xönö nang i kis melamu xö ina sisila ne xönö. Ma ixo eöt*

tua nilaxa ringan kö önga bung mon kö önga awat kudun. Ma i kara laxa nang bara i kobo kip pebo dee. Ma ixobo erabaa urungan te God ma dee rua gene abo sasaban te ine iat ma rua gene idi nang toxobo wewet abo sasaban nang tokoxobo maras ulamunon.

<sup>8</sup> Ma meringan kölöme xö inabo lalaa a Töxödös ne Tanono i osen bara a ngas sua inuan laxa xö Madakdak ne Xönö Saxit i kela tamasawang bang nang bara ina sisila ne gunon lotu i nangen bang i kisisik.

<sup>9</sup> Ma inabo lalaa a malalar möxö ina axana bung nixinen. Inabo lalaa i osen bara inabo arabaa idi toxo söngöt urungan te God i kobo eöt tua ödeek esexere ewe idi nang te isik ot inabo arabaa. Kaim. Idi toxo ösöxö bara i nangen iat a sasaban kölöme re idi.

<sup>10</sup> Inabo arabaa i kobo eöt tua ömadakdak turunin iat a nangadi, möxösa, ewe idi nang toxo isik ot inabo arabaa toxo mumuu abo mangana warkurai ulamun abo nien mabo ininim mon mabo mangana sasalap. Inabo warkurai i eöt köbo lewene aine ire mon. Ma ixo tuu lölös ot kö axana bung bara abo lalaa i ot maxat.

*A dee re Krai i eöt tua öturunon a kunubus maxat*

<sup>11</sup> Io, ma nang e Krai ixo wanot xarnang a pris taxin möxöbo lalaa deek nang iri wanot im, ixo wan laxa xö mangana gunon lotu nang i deek köba ma i taxin kö nang mesila. Ma ina gunon lotu a nangadi kaim kö wewet ine. Io niang, i maras bara i kobo a laa mera xö ina öxöno lagunon.

<sup>12</sup> Krai kaim kö isik a dee ne me, bara a dee ne bulmakau, rua inuan laxa xö Madakdak ne Xönö Saxit. Kaim. Ixo isik ot a dee re ine iat tua inuan laxa ringan, möxösa, ixoro kun ölanglanga rewe ire. Ixo laxa xö önga axana bung kalik mon. Ma ina inuan laxa i eöt. Ma i karabo laxa baling im.

<sup>13</sup> Idi toxobo sasawu a nangadi mabo dee ne me arixe ma dee ne bulmakau suxurno. Me idi toxobo söngsöngöt önga mangana nene bulmakau ma toxobo keulinge arixe mabo tauna möxö ia arixe ma ari ma toxobo sasawu a nangadi bölök min. Idi toxobo sasawu ewe idi nang toxo biling kö mamaran te God köbo sasaban te idi. Ma nang abo pris toxo sawu idi bira, idi toxo ömadakdak mon idi eöt mabo warkurai, ma lamun kölöme iat turunon te idi, kaim.

<sup>14</sup> Ina na i turunon, io niang, i turunon saxit bara a dee re Krai irabo ömadakdak tunin iat ire bara ire tabo eöt tua ösöxö bara inabo tatalien saban nang idi tobo silien ire urungan kö minet, idi tere tup tewe. Krai ixo eöt bara irabo ömadakdak tunin iat ire, möxösa, ixo isik a to re ine wösöt e God xarnang önga arabaa kaim pebo sasaban könan. Ma ixo rörön bira arixe ma lölös möxö Töxödös ne Tanono nang

irabo kis ulorexe. Ixo ömadakdak ire bira rue ire ra tame e God nang a lak to.

<sup>15</sup> Möxö ina na, Kraisi iat ine ewe nang ixo pet a xuxubus maxat kaluluonin e God ma a marakörö, bara idi nang e God ixoro kuwe lo idi, idi tabo uruoxe a warwadöan ulorexe nang e God ixo tengen bara irabo isik ke idi. Me Kraisi i eöt bara irabo pet ina xuxubus maxat, möxösa, a minet te ine a xinuxun tua ölanglangua rewe idi xalik abo sasaban te idi nang toxo pet kö ene sisila ne xuxubus.

<sup>16</sup> Nang bara önga tödi i pet a önga xuxubus sue ewe irabo unan abo lalaa re ine nang irabo met, io, i kobo eöt bara ina tödi xabise irabo unan nang bara i kobo ot maras bara ina tödi niang ixo pet ina xuxubus iri met,

<sup>17</sup> möxösa, a xuxubus sua unan abo lalaa i lölös nang bara a tödi ewe nang ixo pet ine iri met, inexalik ina xuxubus i laa tataun mon nang bara a tödi ewe nang ixo pet ine, i to sik bang.

<sup>18</sup> A sisila ne xuxubus ine a mangana xuxubus bölök bira, io nang, idi tokoxobo öturunon tataunin ine. Kaim. Idi toxo öturunon ine ma dee bölök bira.

<sup>19</sup> Moses ixo tengen kö nangadi ulamun abo warkurai ma ixo kip lo a dee nebo bulmakau suxurno ma a dee ne me ma ixo keulinge arixe ma ari. Io, ixo kubus a dauleng nebo bebene sipsip nang a lak dadan lömö xö ina mangana axana iaa tobo rengrenge ma isop ma ixo öburun arixe ma dee ma ixo sawu abo ginigeet möxö warkurai ma nangadi bölök.

<sup>20</sup> Me Moses ixo tengen te idi a nangadi bira, *"Ina dee i öturunon a xuxubus nang e God ixo tengen bere mum morobo tame."*

<sup>21</sup> Xarnang iat mon bölök e Moses ixo sawu a gunon ne lotu nang toxo pet ma man. Ma ixo sawu bölök abo lalaa xirip möxö pet tinörön ne lotu.

<sup>22</sup> Ma unine ina tinenge i bira: abo warkurai te Moses i tengen bara ire tabo ömadakdak a oleleng ne lalaa arixe ma dee, i xarnang bara i löörö bara abo lalaa xirip. Io, nang bara kaim a minet, God i karabo döxömen taun abo sasaban.

<sup>23</sup> Io nang, a sasaxan ixo kis bara idi tabo ömadakdak abo lalaa bira. Ma lamun inabo lalaa idi abo malalar mon möxö xönö möxö lotu riso xö watmaep. Ma dee möxö inabo wawaguai nang idi toxo söngöt urungan te God, i karabo eöt tua ömadakdak ina xönö niang kö watmaep. Kaim. Ina xönö i sasaxan ulamun a mangana arabaa nang i deek köba xö inabo arabaa.

<sup>24</sup> Ma ina i maras, möxösa, Jisas ixo laxa ringan kö watmaep iat. I koxobo laxa xö önga xönö möxö lotu niang a

nangadi toxo pet. Kaim. Ina xönö a malalar mon möxö xönö runon möxö lotu ringan kö watmaep. Io, ixo laxa urungan kö watmaep bara rua tinuu xö wawara xö God tua gene ire.

<sup>25</sup> Me ine i koxobo laxa bölök kingan kö watmaep bara irabo isik a to re ine xarnang önga arabaa urungan kö God kö oleleng ne axana bung. Krai i koxobo pet eörin xarnang a pris taxin te idi abo Judeia. Kaim. Ina pris taxin ibo laxlaxa urungan kölöme xö Madakdak ne Xönö Saxit kö önga bung mon kö önga awat kudun. Inexalik ine ibo laxlaxa ma dee ne wawaguai, ma kaim bara xö dee re ine iat.

<sup>26</sup> Nang bara e Krai ixoro pet bira, a sasaxan ixoro kis bara irabo met kö oleleng ne axana bung mero saxit kö uxixis möxö öxöno lagunon. Ma lamun i koxobo pet bira. Kaim. Iri ot na im kö xakawam möxö axana bung bara irabo isik a to re ine xarnang önga arabaa wösöt e God tua xikip tewese abo magingin saban. Ine ixo wanot kö önga axana bung mon ma i eöt. Ma kaim pe sasaxan bara irabo ot bira baling.

<sup>27</sup> Io, me God iri tulus sik bara a nangadi xirip tabo met kö önga axana bung mon. Melamu im, idi tabo tuu xö warkurai.

<sup>28</sup> Me Krai bölök ixo bie. Ixo met önga axana bung mon xarnang önga arabaa uruso xö God tua sösölök abo magingin saban te idi a oleleng. Ma lamun kö sese öninöng ne inuan ot te ine, i karabo pet önga laa ulamun abo sasaban. Kaim. Irabo wanot bara irabo öro idi nang te xixiset me ine.

## 10

### *A arabaa re Krai i tuu lölös ulorexe*

<sup>1</sup> A warkurai te Moses a malalar mon möxöbo lalaa deek nang irabo wanot. Kaim bara abo lalaa turunon. Köbo awat kirip idi tobo söngsöngöt sösöxöin abo arabaa uruso re God. Ma lamun inabo mangana arabaa möxöbo warkurai te Moses i kobo eöt tua wewet ödeek esexerein a marakörö nang idi te wan lörörö re God tua lotu wösöt ine.

<sup>2</sup> Nang bara inabo arabaa toxoro eöt tua wewet ödeek esexerein inabo marakörö xalik abo sasaban te idi, idi tekexebe örasen bara re sasaban angen bang kölöme re idi me idi texere taxumut tua erabaa.

<sup>3</sup> Inexalik inabo arabaa i ödöxömen idi xöbo öngöng awat bara abo sasaban te idi i nangen bang,

<sup>4</sup> möxösa, abo dee ne bulmakau suxurno mabo dee ne me i kobo eöt tua irewese abo sasaban.

<sup>5</sup> Io niang, nang e Krai ixo wanot ta xö öxöno lagunon, ixo tengen te God bara,



*“U koxobo mamaa bara tabo söngöt arabaa wösöt nöngön. Inexalik u xo tagure a lewene aike rue e rua inerabaa.*

<sup>6</sup> *Abo wawaguai nang tobo söngöt kudunin xarnang a arabaa, mabo mangana arabaa xabise nang tobo söngöt ulamun abo magingin saban, u koxobo axanan ulamunon.*

<sup>7</sup> *Io, me e xo tengen bira, ‘God te e, e im a, rua wewet eörin a mamaa re nöngön.*

*Idi toxo geet xarna na ulamun e ra kölöme xö ginigeet te nöngön.’ ”*

<sup>8</sup> *Ma ixo sisila ne tinenge bira, “Nöngön u koxobo mamaa bere idi tabo söngöt abo arabaa wösöt nöngön. Ma u koxobo mamaa lamun abo wawaguai nang toxo söngöt kudunin xarnang a arabaa, ma abo mangana arabaa xabise nang idi toxo söngöt ulamun abo magingin saban. Ma u koxobo axanan bölök ulamun inabo arabaa.”* A turunon bere idi toxo söngöt inabo arabaa eöt mabo warkurai te Moses, inexalik e Krai ixo tengen iat bira.

<sup>9</sup> *Io, melamu ixo tengen bira: “God te e, e im a, rua wewet eörin a mamaa re nöngön.”* Io niang, i maras bere God ixo kip tewese abo sisila ne arabaa rua bulus kulas idi ma arabaa re Krai.

<sup>10</sup> *Jisas Krai ixo pet eörin a mamaa re God, io niang, ire xirip tabo madakdak kalik abo sasaban te ire xö arabaa nang e Krai ixo pet ma lewene aine iat. Ixo isik a lewene aine xö önga axana bung mon ma i eöt. Ma i karabo isik öbaling im ine.*

<sup>11</sup> *Abo pris se idi abo Judeia, idi tobo ruruu xöbo tinörön ne lotu re idi xöbo bungbung kirip. Idi tobo söngsöngöt sösöxöin inabo mangana arabaa iat wösöt e God. Ma inabo arabaa i karabo eöt turunon iat tua xikip tewese abo sasaban.*

<sup>12</sup> *Inexalik e Krai ixo isik önga arabaa xalik mon tua xikip tewese abo sasaban, ma a arabaa re ine i tuu lölös ulorexe. Ma nang ixoro pet bira, ine ixo kis kö lime tuun te God.*

<sup>13</sup> *Me ine ibo xisixis xiset ot bere God irabo bulus ösu abo iuo re ine xö pu xarnang önga laa möxö bulus xexe.*

<sup>14</sup> *Ma ibo xisixis singan, möxösa, iri pet ödeek esexerein idi ulorexe ma ina önga arabaa xalik mon te ine, ewe idi nang ibo ömadakdak idi xalik abo sasaban te idi.*

<sup>15</sup> *Io, ma Töxödös ne Tanono bölök i ömaras sö ire bara ina na i turunon. I araun ta rengrengen bara,*

<sup>16</sup> *“E a Orong, e tengen bara a mangana xuxubus e rabo pet me idi xö önga axana bung melamu, ine bira:*

*E rabo bulus abo warkurai te e xö balana idi.*

*Ma inabo warkurai e rabo geet oxe xö dinödöm pe idi.”*

17 Melamu im i tengen bira,

*“E karabo dōxōmen lo abo magingin saban te idi arixe mabo tatalien ne suongus se idi.”*

18 Io, takarabo sasaxan baling im lamun te önga arabaa rua xikip tewe abo magingin saban, möxösa, God iri dōxōmen taun inabo sasaban.

*Ire tabo mana tuu lölös köbo nunu re ire kaluluonin abo kinadik*

19 Io nang, abo töke kölöme re Kraiss, ire te balamasa rua nuan laxa xö Madakdak ne Xönö Saxit kö dee ne Jisas.

20 A minet te ine ixo sawang a ngas maxat tua nilaxa xö ina Madakdak ne Xönö Saxit. I xarnang bere ire tere laxa esexere xö bölö ne man kölöme xö xönö möxö lotu. Ma lamun ina bölö ne man, ine a aine Jisas, a ngas möxö to.

21 Ma a pris taxin te ire bölök nang i rörörön lamun a gene a bung marapun te God.

22 Inabo lalaa iri wanot im, io nang, ire tabo mana wan lörörö re God ma turunon kö balana ire arixe ma nunu. Ganim ire ra binuut. Ganim ire ra dōxōmen bara abo sasaban te ire i nangen nang, möxösa, iri sawu abo balana ire rua gisgis tewe inabo sasaban. Ire tabo wan lörörö re ine xarnang a nangadi madakdak nang tere etos kö ari maras.

23 Ire tabo mana tuu lölös köbo lalaa ire te etöngösen bere ire te nunu ulamunon. Ganim ire ra tinuu gölgölö xöbo lalaa ire te xixiset ma nunu ulamunon, möxösa, God irabo pet eörin abo tinge re ine ixoro xuxubus sik min tö ire.

24 Me ire tabo mana dödöm deek bere ire tabo eöxaxat kaluluonin ire bara bule, rua osen a abalamu re ire ma rua wewet abo rorop deek.

25 Ganim ire ra taxumut kalik abo tatalien te ire möxö kinis arixe, xarnang a dauleng te lönlön tua kinis arixe. Ma lamun ganim ire ra wewet bira. Ire tabo mana eöxaxat kaluluonin ire. Me ire tabo mana lölös sik kua wewet bira, möxösa, ire te perexulen bara a axana bung möxö Orong iri eka inuan orim.

26 Ire tabo mana talien bira, möxösa, nang bara ire te maras köbo turunon nang God iri öwösö rö ire, ma lamun ire te bulus abo dinödöm pe ire rua wewet sösöxöin abo sasaban, kaim baling im pe önga mangana arabaa rua xikip tewese abo sasaban.

27 Inexalik ire tabo kis xiset arixe ma binuut kö bung möxö pet warkurai ma xö ia sösöt taxin nang irabo söngöt ögarin abo iuo re God.

28 Nang bara ninöng bara narun ne tödi te puk a öng bara ixo suongus kö warkurai te Moses, tabo teng ömet ine, ma takarabo marse ine.

<sup>29</sup> Ma nang bara i ot bira rö idi xö ene warkurai te Moses, a ömokorot taxin saxit irabo kip belek ewe i melentexin a Barok kö God ma i dökömen bara a laa biling mon a dee möxö kunubus nang ixo ömadakdak ine xalik a sasaban te ine, ma i tengen ögarin a Töxödös ne Tanono ewe i isik a inemarse.

<sup>30</sup> I maras bara irabo ot bira, möxösa, ire te ösöxö sik e God ewe ixo tengen bara, *“E ewe nang arabo balu wuxus abo marakörö xöbo magingin saban te idi. E rabo ömokorot idi eöt mabo tatalien te idi.”* Ma ixo tengen öbaling bara, *“E a Orong, e rabo kure a marakörö re e.”*

<sup>31</sup> Nang bara re öng i kis kö limine a God nang a lak to, bara rua xikip a ömokorot, irabo buut saban.

<sup>32</sup> Mum morobo mana dökömen lo abo bung no mesila nang e God ixoro ömaras e mum. Xö inabo bung mum moxo tuu lölös kölöme xöbo kinadik tataxin nang ixo uban e mum.

<sup>33</sup> Idi toxo tengen ögarin e mum ma toxo eler me mum kö wawara xö marakörö xö dauleng ne bung. Ma uleng ne bung kabise mum moxobo ruruu arixe me idi nang idi toxo eler me idi bie.

<sup>34</sup> Mum moxobo marse idi me mum moxobo rorop idi nang bere idi toxo öläxa idi xö gunon ne aömokorot. Ma nang bara uleng toxo sat lo abo lalaa re mum, mum moxobo gan sik idi ma axanan, möxösa, mum moxo ösöxö bara mum mo unan sik abo lalaa i deek köba xöbo lalaa nang toxo sat lo, ma bara inabo lalaa tabo kis ulorexe.

<sup>35</sup> Io niang, mum bele ömalim tewe a nunu ne balamasa re mum, möxösa, God irabo öxaaorong e mum nang e mum mo tuu sik bie.

<sup>36</sup> Mum morobo mana tuu lölös köbo tiip bere mum mo eöt tua mumuu a maaaa re God, io nang, mum morobo uruoxe a laa nang ixo xuxubus sik ke mum ulamunon.

<sup>37</sup> A turunon. A ulik im, *“Ma öng ewe i eka inuanot, irabo wanot ma i karabo alilis.*

<sup>38</sup> *Inexalik a tene töxödös se e irabo to xö nunu re ine.*

*Ma nang bara i suxo xalik e, e karabo axanan tö ine.”*

<sup>39</sup> Inexalik ire tokobo mangana nangadi biringan nang idi te suxo xalik e God ma te iuo esexere. Kaim. Ire a mangana nangadi nang te nunu, io nang, ire tabo to.

## 11

*Abo tene nunu toxo to bule*

<sup>1</sup> A tatalien ne nunu i bira. Nang bara re öng i nunu, irabo ösöxö runin sik bara irabo kip lo abo lalaa ine i xixiset

ulamunon. Ma i kobola pere inabo lalaa, ma lamun i maras sik bara inabo lalaa i kisisik.

<sup>2</sup> Ma inabo duöng mesila saxit idi toxo nunu bira, io, God ixo tengen ömaras bere idi te deek.

<sup>3</sup> Ire te nunu, io, ire te maras bere God ixo uxis abo mangana lalaa xirip kö tinenge re ine. Möxö ina na, i maras bere God ixo rörön mina nang i kobo eöt bara ire tabo pere rua uxis abo lalaa nang ire tobo werwere.

<sup>4</sup> Abel ixo nunu, io, ixo tabaa e God ma arabaa nang ixo deek kö nang ke Kaen. Me God ixo tengen ömaras bara ina arabaa i deek, io, Abel ixo kip lo a tinenge bara ine a tene töxödös, möxösa, ine ixo nunu. Ma i turunon bere Abel ixo met, ma lamun a nunu re ine i nangen i usu ire.

<sup>5</sup> Me Enok ixo nunu, io, God ixo kip tewe lo ine xalik ina to niang me ine kaim kö minet. Ma kaim pe öng ixo parasiwin ine, möxösa, God ixo kip lo ine. Mesila nang e God ixo kip öxaa lo ine, ixo tengen ömaras bere ine a tödi deek ewe nang ibo öaxanan e God. Io niang, God ixo kip öxaa lo ine.

<sup>6</sup> Io, ma nang bere re öng i kobo nunu, ine i kexebe eöt ta öaxanan e God, möxösa, ewe re öng i eka nuan urungan kö God, irabo mana nunu bara God i nangen, ma bara irabo öaxanan idi ma xinuxun ewe nang idi te susuxun ulamun ine.

<sup>7</sup> Me God ixo ötumarang e Noa ulamun abo lalaa nang idi te kobola pere bang. Noa ixo nunu, io, ixo ii e God ma ixo pet önga mön taxin tua öro a baninen te ine. A tinörön ma nunu re ine ixo osen ömaras bara a marakörö xö öxöno lagunon idi tere saban. Me God ixo aut bere Noa i töxödös, möxösa, ine ixo nunu.

<sup>8</sup> Me God ixo kuwe e Abaram bara irabo wan urungan kö xönö nang God irabo tabaa ine min melamu. Abaram ixo nunu, io, ixo tam. A turunon bara i koxobo ösöxö bara ine ixo önan taule, nexalik ine ixo wan mon.

<sup>9</sup> Ine ixo nunu, io, ixo kis singan kölöme xina xönö nang e God ixo xuxubus bara irabo tabaa ine min. Ixo xisixis singan ee xarnang a ose ibo xisixis kö xönö kaim bara re ine. Ixo kis köbo mangana walpali. I turunon bere God ixo kubus bere re Aisak me Jekop bölök, bara irabo tabaa idu ma ina xönö iat, ma lamun idu bölök toxo kis bie xinabo walpali.

<sup>10</sup> Abaram ixo kis biringan, möxösa, ine ixo xixiset ma lagunon taxin nang irabo tuu ömat ma i karabo kawam tewe. Ma ina lagunon nang e God ixo bulus a dinödöm pe ine ulamunon bara irabo pet ine bara bule, ma ixo pet iat bölök ine bie.

<sup>11</sup> Me Abaram ixo nunu, io, God ixo ömaraxen ine bara irabo tata xö önga barok ma a laa tataun mon bara ixoro

ötaxin me Sera bölök a une tuu. Me God ixo öbala sik ine bira, möxösa, Abaram ixo döxömen bara God irabo pet eöt ma nang ixo kubus sik kö ine bie.

<sup>12</sup> Möxö ina na, a oleleng ne marapun saxit toxo ot meringan kö ina tödi, ma a lölös se ine rua wewet biringan ixoro kawam im xarnang abo minet. Ma ina bung marapun te ine idi te oleleng saxit xarnang abo tii niso xö mango. Ma i kobo eöt bara re öng irabo kos idi xarnang i kobo eöt bölök bara re öng irabo kos a önö xö löxön.

<sup>13</sup> Ina nangadi xirip idi toxo nunu ot nang idi toxo met. Idi kaim kö uruoxe abo lalaa God ixo kubus sö idi. Kaim. Idi toxo perexulen bara inabo lalaa ixo palaa sik bang. Me idi toxo axanan pönö inabo lalaa bara irabo wanot im melamu. Ma toxo tengen ömaras bara abo ose mon idi ra xö xönö lagunon ma kaim bara a lagunon turunon te idi.

<sup>14</sup> Nang a nangadi te tengen tebo lalaa bira, i osen bara idi te susuxun ulamun önga lagunon tue idi iat.

<sup>15</sup> Idi tokoxobo dödöm ulamun ina lagunon idi toxo taru lo mee. Nang bara idi texebe dödödöm biringan, i xebe eöt bara idi texebe tawuxus baling.

<sup>16</sup> Inexalik bara kawaim. Idi toxo maaaa bara idi tabo wan urungan kö önga lagunon nang i deek köba xö nang idi toxo wan lie. Idi toxo maaaa lamun ina niang niso xö watmaep. Io nang, God i kobo munge bara idi tabo tengen bara ine a God te idi, möxösa, ixoro tagur sik a lagunon taxin ulamun idi.

<sup>17</sup> Me Abaram ixo nunu, io, ixo isik e Aisak xarnang önga arabaa idi tobo söngsöngöt uruso xö God kö ina bung niang e God ixo könönöin ine biringan. Abaram ine a öng ewe God ixo pet a xuxubus arixe me ine. Me Aisak a önga barok kalik mon, inexalik, ixo eka sesexomet ine.

<sup>18</sup> Ma lamun e God ixo tengen te ine bara, *“A bung marapun te nöngön idi tabo taworot ot mere Aisak iat.”*

<sup>19</sup> Abaram ixo döxömen bere God i eöt tua öraru abo minet. Ma nang e Abaram ixo kip lo öbaling e Aisak, ixo xarnang bara ixo kip lo ine xalik a minet.

<sup>20</sup> Me Aisak ixo nunu, io, ixo wadöane e Jekop me Esau ulamun abo lalaa nang irabo ot melamu.

<sup>21</sup> Me Jekop ixo eka minet. Ine ixo nunu, io, ine ixo wadöane ina nine barok ke Josep. Ine ixo masap sik kö buxo re ine ma ixo lotu wösöt e God.

<sup>22</sup> Ma ixo lörörö bere Josep irabo met. Ine ixo nunu, io, ixo tengen köbo marakörö mee Israel bara i turunon bara tabo wan kalik e Isip, ma bara idi tabo pet bule xöbo sii re ine nang irabo met.

23 Me nago me tata re Moses toxo nunu, io, idu toxo umingen ine xö narun ne texe melamu xö nang toxo kip ine, möxösa, idu toxo perexulen ine bara a barok deek, ma i kobo eöt ma dauleng kabise, me idu tokoxobo burin bölök ina warkurai möxö king nang mee Isip.

24 Me Moses ixo nunu, möxö ina na, nang ine ixo taxin im, ixo mölök bara tabo tengen bara ine a barok kö balik kö king mee Isip.

25 Ixo mamaa bara irabo örasen a kinadik arixe ma marakörö nang ke God ma i koxobo öbala lo abo magingin saban bara irabo öaxanan ine xö axana bung puruwut mon.

26 Moses ixo döxömen bara a kinadik kua gene a Mesaia i deek köba xö kinis ne asuono orong kingan Isip, möxösa, ixo mamaa bara irabo kip a xinuxun te ine nang irabo ot melamu.

27 Ixo nunu, io, ixo wan kalik e Isip. I koxobo burin te laie xö king meringan ee. Kaim. Ixo tuu lölös, möxösa, i xarnang bara ixo pere e God nang tekara pere ine.

28 Ixo nunu, io, ixo tame e God bira: ixo pet a Nien ne Nuan Lexe ma ixo tengen kö marakörö bara idi tabo sawu abo marna ngas ma dee. Ma ixo pet biringan bara a angelo nang möxö sese abo sisila ne barok i karabo ögarin abo Israel.

29 Ma abo marakörö mee Israel idi toxo nunu, io, idi toxo lies köröp kö Rasi Dadan, i xarnang bara xönö mese ine. Nang abo Isip toxo könönöin bira, idi toxo köngö met.

30 Abo marakörö toxo nunu, io, abo bölö möxö lagunon taxin Jeriko ixo tamaöbeng saban esexere melamu nang idi toxoro wan elulurwe ine xö pitnö ma ninöng ne bung.

31 Me Raap a tene ilawa ixo nunu, io, kaim idi xo sesexomet ine arixe me idi abo tene suongus, möxösa, ixo öbala ölaxa a nine tene aöman.

32 E rabo tengen öbaling im a sa? A axana bung i kobo ömat bara arabö ömaras e mum me Gidion, Barak, Samison, Jepita, Dewit, Samuel mabo propet bölök.

33 Inabo duöng toxo nunu, io, idi toxo pas ösu abo kingdom. Idi toxo pet a warkurai ma tatalien töxödös. Idi toxo uruoxe abo lalaa möxö dauleng ne kunubus se God ixo pet arixe me idi. Idi toxo baxut abo ngalna laion.

34 Idi toxo pus ömet a lölös möxö ia sösöt. Abo sele möxö inarese toxo eka reree ömet idi, ma lamun idi toxo to. Idi tokoxobo lölös ma lamun idi toxo kip a lölös. Idi toxo erese lölös ma toxo pas ösu a oleleng ne umri xöbo lagunon kabise.

35 A dauleng ne une toxo kip öbaling abo barok ke idi xalik a minet. Dauleng kabise, abo iuo toxo eler ögarin idi.

Ma lamun idi toxo öngus sua tinuu rewe xalik e God bara inabo iuo tabo ölanglanga idi. Idi toxo nunu bara nang tabo met, idi tabo taru kaa xalik a minet, ma ina to irabo deek kö to ra xö pu.

<sup>36</sup> A dauleng, a nangadi toxo eösaxit me idi ma toxo dangat bölök idi. Dauleng kabise, a nangadi toxo kubus idi ma uno lölös ma toxo ii öläxa idi xö gunon ne aömokorot.

<sup>37</sup> Idi toxo teng a dauleng ma wat, ma dauleng, a nangadi toxo tee xöröp idi. Ma dauleng kabise, a nangadi toxo tee ömet idi ma sele möxö inarese. Idi toxo maris. Idi toxo sige mon abo lewene sipsip mabo lewene me. Idi toxo öxadik idi ma toxo eler me idi.

<sup>38</sup> A marakörö möxö öxöno lagunon idi tokobo eöt ma ina nangadi na. Kaim. Ina nangadi na idi te deek köba xö marakörö möxö öxöno lagunon. Idi toxo önan eli xö xönö tataun ma xöbo maii. Idi toxo xisixis köbo marna wat ma xöbo mara.

<sup>39</sup> Idi toxo nunu, io, e God ixo tengen ömaras ulamun idi xirip bara a lak deek. Inexalik kaim pe öng ke idi ixo uruoxe a nang God ixoro kubus sik bara rö idi,

<sup>40</sup> möxösa, God ixo tagur sik a önga ngas ulamun ire nang i deek kö öng nang me lorexe. God i koxobo maaaa bara irabo ödeek esexerein idi, ma ganim ire. Io nang, ixo tagure ina ngas bara irabo ödeek esexerein idi me ire bölök.

## 12

### *God ibo ömaso abo barok ke ine rua usu idi*

<sup>1</sup> Io, ma i xarnang bara ire te ululo ne ekoskos kölöme xö to re ire. Ma ina nangadi ewe e xoro wöwörö ulamunon, idi tobo kis elulurwein ire me idi tobo ngökngök ke ire. Io niang, ire tabo mana kip tewe inabo mangana laa nang ibo töndik sik ire, me ire tabo ulo deek. Me ire tabo mana kuru rewe abo magingin saban nang ibo kut dik sik ire. Me ire tabo mana ulo ma lölös kö ina ululo ne ekoskos nang e God ixoro bulus sik mesilain ire.

<sup>2</sup> Ma nang bara ire te ulo ne ekoskos bira, ire tabo mana pere dik sik e Jisas, ewe nang ixo silien ösila ire xö tatalien ne nunu. Ine ewe nang i öturunon abo nunu bölök ke ire. I koxobo talu a minet kö öxöno sölöxöröp. Ixo ösöxö bara a laa ne minenge bara öng i met bira, ma lamun ixo dödöm tataun mon bara irabo met, möxösa, ixo maaaa bara irabo kip a axanan nang i tagur sik kö ine. Io, ixo met bira ma ixo kis kö lawa tuun kö kinis taxin ne warkurai kö God.

<sup>3</sup> Mum morobo mana dödöm deek ulamun e Jisas ewe nang abo tene saban toxo eler ögarin ine, xalik e mum bo lön tua ululo xö ina ululo ne ekoskos.

<sup>4</sup> I turunon bara abo tene saban idi te maaaa rua lalamus e mum kö ngas saban, ma i xarnang bere mum mo erese me idi rua tinuu wi idi. Inexalik kaim pe dauleng kaluluonin e mum tere met bang kölöme xö ina inarese niang.

<sup>5</sup> Ma i wawara bere mum moro döxömen taun tewe ina tinenge xö God nang ixo öxaxat e mum min xarnang a bung baroxorok ke ine. Ma ixo tengen bira:

*“Barok ke e, örobo dödöm deek nang a Orong i ömaso nöngön tua usu nöngön,  
ma u bele tapunuk köba nang i köö nöngön.”*

<sup>6</sup> *Ruasa, möxösa, a Orong ibo ömaso idi nang i maaaa rö idi,*

*ma ibo ömokerot idi xirip nang i ömaraxen lo idi xarnang abo barok ke ine.*

<sup>7</sup> Mum morobo mana tuu lölös köbo tiip, möxösa, God ibo ömaso e mum xarnang a bung baroxorok ke ine rua usu e mum. Mum morobo tuu lölös bira, möxösa, mum mo xarnang a bung barok lixilik ka xö pu. Idi xirip tobo xikip a ömokerot kalik abo tamana idi.

<sup>8</sup> God ibo ömaso a bung baroxorok kirip pe ine ma nang bara i kobo ömaso nöngön, i osen bara a bak kö ngas nöngön, ma kaim bara a bak ke ine runon nöngön.

<sup>9</sup> Io, ire tabo döxömen lo abo tamana ire mera xö pu. Ire tobo ii idi, möxösa, idi toxobo ömaso ire. Nang bara ire te ii idi bira, i deek köba bara ire tabo kis kö ene a ineömaso möxö Tamana abo tanono ire, io nang, ire tabo to.

<sup>10</sup> Ma abo tamana ire mera xö pu idi toxobo ömaso ire aulik mon. Me idi toxobo ömaso ire xarnang idi te döxömen bara i töxödös. Inexalik God i ömaso ire rua rorop ire, io nang, ire tabo madakdak tewe xalik abo magingin saban, xarnang e God ine i madakdak.

<sup>11</sup> Ma nang bara te ömaso a öng, xö ina axana bung iat ina tödi i karabo axanan. Kaim. Irabo örasen a kinadik. Ma lamun melamu im, idi ewe nang te kip a ineömokerot tua usu idi, tabo kip a malum, möxösa, abo to re idi irabo töxödös.

<sup>12</sup> Io nang, mum morobo mana ölölös abo lime lön te mum mabo busuno xexe mum nang kaim a lölös könan.

<sup>13</sup> Mum morobo muu a ngas töxödös, xalik abo xexe pengpeng ke mum tabo tamalalus esexere, nexalik bara tabo langlanga baling.

*Ire tebele mölök tewe abo tinenge re God*

<sup>14</sup> Mum morobo mana rörön lölös sua kinis ma malum arixe ma nangadi xirip. Me mum morobo rörön lölös bölök bara mum morobo madakdak kalik abo sasaban. Nang bara



öng i kobo madakdak xarna na, i kebeöt tua werwere a Orong.

<sup>15</sup> Mum morobo tumarang bara xalik ke öng i kebeöt tua xikip a abalamu nang e God ibo tabaa tataunin ire min. Me mum morobo tumarang bölök bara öng i karabo das kaluluonin e mum xarnang a önga uno mele, ma irabo isik ot a purpuruan ma irabo öbiling abo to re idi a oleleng.

<sup>16</sup> Me mum morobo tumarang bara xalik ke öng irabo pet a tatalien ne ilawa. Mum morobo tumarang bölök bara xalik ke öng ibo mölök kalik e God xarnang e Esau. Esau a sila ne barok ke tamana ewe nang ixo eka unan abo oleleng ne lalaa meringan tine, inexalik ixo misik tewe ma inabo lalaa rua önga nien mon.

<sup>17</sup> Me mum mo ösöxö bara melamu im e Esau ixo mamaa bara a tata re ine irabo wadöane ine. Ma lamun a tata re ine ixo mölök, möxösa, Esau i koxobo eöt tua werwere wösöt te önga ngas bara irabo ötöxödös a laa nang ixoro pet. Ixo seseng marmaris sua xikip pe warwadöan ma ixo gee ulamunon, inexalik i koxobo eöt.

<sup>18</sup> Me mum kobola wan urungan kö puot Sinai xarnang a duöng mee Israel toxo wan uwe. Idi toxo eöt ta sigi ina maii. Lömö xö ina maii, a kamene ia ixo aan, ma ixo bororo.

<sup>19</sup> Ma toxo mas a tauu ma toxo ölangen a inöno a öng. Ma nang a nangadi toxo ölangen a inöno, idi toxo seseng marmaris bara i bele tenge baling im pe idi,

<sup>20</sup> möxösa, i koxobo eöt te idi bara tabo kis kö ene warkurai nang ixo tengen bira: *“Ma nang bara ewe re nangadi bara a wawaguai bölök i wan urungan kö ina maii tabo teng ömet ine ma wat.”*

<sup>21</sup> Ina maii ixo öbuut köbanin idi, io nang, e Moses ixo tengen bara, *“E buut me e dede.”*

<sup>22</sup> Ma lamun e mum koxobo wanot urungan kö ina maii. Kaim. Mum moxoro ot kö maii Saion, a lagunon taxin te God nang a lak to. Ine e Jerusalem niso xö watmaep. Mum moxoro ot kö kinis etok kö oleleng saxit ne angelö nang i kobo eöt bara tabo kos idi, ma nang idi te kis ma axanan.

<sup>23</sup> Mum moxoro wanot kö kinis etok ke idi abo sisila ne barok kö God. Idi nang e God iri geet ösu abo esene idi ruso xö watmaep. Mum moxoro wan urungan te God a Tene Warkurai kö nangadi xirip. Mum moxoro wanot köbo tanono idi abo tene töxödös nang e God iri ödeek esexerein idi.

<sup>24</sup> Mum moxoro wan pösöt e Jisas ewe nang iri pet a xuxubus maxat kaluluonin e God ma marakörö. Mum moxoro wanot kö dee ne Jisas nang ixo sawu e mum min tua wewet ina xuxubus niang. Ma dee re ine i osen tö ire

abo lalaa i deek köba xöbo lalaa a dee re Abel ixo wöwörö ulamunon.

<sup>25</sup> Mum morobo mana ebalare deek. Mum bele öngus tewe a öng nang i wöwörö rö mum. Idi nang toxo mölök bara tabo ölangen ma öng ewe ixo ötumarang idi ra xö pu, idi tokoxobo eöt tua ululo rewe xalik a ömokorot te ine. Io nang, turunon saxit, ire takarabo eöt tua ululo rup kalik a ömokorot nang bara ire te tawes kalik ine ewe nang i ötumarang ire meriso xö watmaep.

<sup>26</sup> Xö ina axana bung a inöno ixo ögigie a öxöno lagunon, ma lamun nixinen iri kubus bara, *“Önga axana bung baling arabo ögigie a öxöno lagunon. Inexalik kaim bara a öxöno lagunon kalik mon. E rabo ögigie bölök a watmaep.”*

<sup>27</sup> Nang i tengen bara irabo pet bira, *“Önga axana bung baling,”* i osen bara irabo kip tewe inabo lalaa nang ixo uxis. Irabo kip tewe, möxösa, i eöt bara idi tabo gigie. Irabo kip tewe inabo lalaa nang bara inabo lalaa tekarabo eöt ta gigie, idi tabo kisisik iat.

<sup>28</sup> Ire tabo mana tengen deek kö ine, möxösa, ire te laxa xö kingdom pe ine nang i kebeöt bara irabo gigie. Ire tabo tengen deek kö God, ma xö ina ngas niang ire tabo lotu wösöt ine ma tabo ii öraxin ine xarnang i mamaa bara ire tabo lotu wösöt ine bie,

<sup>29</sup> möxösa, a God te ire, ine i xarnang önga ia sösöt nang ibo söngsöngöt kirip abo lalaa.

## 13

### *Ire tabo to bule*

<sup>1</sup> Mum morobo mana ebalamu sösöxö iat kaluluonin e mum xarnang mum abo basixinen.

<sup>2</sup> Ganim e mum pa döxömen taun tua öga lo abo ose xöbo ngasiene mum. A dauleng idi toxo öga lo a dauleng ne ose me idi tokoxobo ösöxö bere idi toxo öga lo abo angelo.

<sup>3</sup> Mum morobo mana döxömen lo idi nang te kis kö gunon ne aömokorot xarnang bere mum bölök mo kis arixe me idi. Me mum morobo döxömen lo bölök idi ewe nang a dauleng ne nangadi te eler me idi, möxösa, mum xarnang idi ma i eöt bere inabo nangadi tabo eler bölök me mum.

<sup>4</sup> A nangadi xirip tabo mana ii a tatalien ne inalolo. A öng irabo maru arixe ma usuono iat. Ganim bara i maru arixe ma öng kabise, möxösa, God irabo ömokorot abo tene ilawa ma a öng bölök ewe i maru arixe ma öng i kobo re ine iat.

<sup>5</sup> Mum morobo mana langlanga xalik ina magingin möxö mamaa tuluwok. Mum morobo mana dödöm bara abo lalaa

mum mo uruoxe i eöt mon. Ruasa, möxösa, God ixo tengen bara,

*“E karabo wan kalik nöngön,  
me e karabo ganim tewe nöngön.”*

<sup>6</sup> Io niang, ire te tengen a laa nang ire te ösöxö bara i turunon ma i bira:

*“A Orong, ine a tene Aörorop pe e.*

*E karabo buut.*

*I kebeöt iat bara re öng irabo pet te önga laa rö e.”*

*Ire tabo wan pösöt e God kölöme xö arabaa re Jisas*

<sup>7</sup> Me mum morobo mana döxömen lo abo sisila me lorexe nang toxo töngösen e mum ma tinenge re God. Me mum morobo dödom deek ulamun a mangana to re idi ot nang idi toxo met. Me mum morobo muu a mangana nunu re idi.

<sup>8</sup> Jisas Krai i kara xuxulas. A tatalien te ine i eöt sik mon mesila ma nixinen mabo bung ulorexe.

<sup>9</sup> Ma ganim e mum pa ömaraxen te dauleng kua silien ölelebes e mum köbo tinenge re idi nang i xabise xö tinenge re God. Ma i deek bara God irabo ölölös e mum kölöme xö to re mum arixe ma abalamu niang ixo tabaa tataunin e mum min. Inexalik nang bara mum mo muu a warkurai ulamun a mangana nien, i karabo top e mum. Kaim. Inabo warkurai i karabo top ewe idi nang tobo mumuu idi.

<sup>10</sup> Ire ma önga alta möxö bulbulus arabaa urungan te God. Me ewe idi nang te rörön kölöme xö ina gunon lotu möxöbo Israel, idi tekebeöt tua enen te nien möxö ina alta.

<sup>11</sup> A pris taxin te idi abo Israel, ibo xikip a dee ne wawaguai urungan kölöme xö Madakdak ne Xönö Saxit. Ma ina dee, a arabaa rua xikip tewe abo magingin saban. Inexalik idi tobo söngsöngöt inabo lewene aine inabo wawaguai ringan kö xönö i kis kö palaa rewe xalik a nangadi.

<sup>12</sup> Io, Jisas i xarnang bölök bie. Ixo met kö araman möxö lagunon taxin tua uxis tewe a nangadi xalik abo magingin saban te idi ma dee re ine iat.

<sup>13</sup> Io niang, ire tabo mana wan urungan te ine xö araman kö xönö ne Israel. Idi toxo pere ömelentexin e Jisas, ma tabo pere ömelentexin bölök ire bie.

<sup>14</sup> Inexalik ire tabo wan urungan te ine, möxösa, kaim pe önga lagunon taxin mere ire ra xö pu nang irabo tuu ulorexe. Kaim. Ire te maaa bere ire tabo laxa xö lagunon taxin nang irabo ot melamu.

<sup>15</sup> Io nang, meringan kö kinis se ire kölöme re Jisas, ire tabo mana ölet söxöin e God xarnang a arabaa re ire urungan te ine bira: ire tabo tengen ömaras bara ire mere ine.

<sup>16</sup> Me ire tebele döxömen taun ta wewet abo rorop deek urungan te idi xabise, möxösa, inabo mangana arabaa urungan kö God i öaxanan ine.

<sup>17</sup> Mum morobo mana tame abo sisila re mum me mum morobo ii ölik e mum pe idi, möxösa, idi te balaure ödeek e mum, ma melamu idi tabo tengen ömaras kö wawara xö God ulamun abo tinörön te idi kaluluonin e mum. Io, mum morobo tame idi bara inabo tinörön kaluluonin e mum irabo öaxanan idi, ma i karabo eöt ta öriip abo to re idi. Nang bara idi tabo kip abo tiip bira, i karabo top e mum.

*Abo siniseng wösöt e God*

<sup>18</sup> Mum morobo mana seseng kua gene mem, möxösa, mem me ösöxö bara mem kara pet a tatalien saban. Kaim. Mem bo maaa bara abo to re mem irabo töxödös esexere im.

<sup>19</sup> Me e öxaxat ölölös e mum bere mum morobo mana seseng bere God irabo tile öwuxus pasaxirin e wösöt e mum.

<sup>20</sup> E seseseng wösöt e God ewe ibo isik a malum. Ine ewe ixo öraru öbaling e Jisas, a Orong ke ire, xalik a minet. Me Jisas ine ewe i balaure ire xarnang a öng i balaure abo sipsip, ma ixo met xarnang önga arabaa wösöt e God. Ma a minet tine ixo pet a xuxubus nang i tuu ulorexe. Io nang, God ixo eöt bara irabo öraru ine bira.

<sup>21</sup> Me e seseseng bara ina God te ire irabo tabaa e mum mabo lalaa deek nang mum mo sasaxan ulamunon tua wewet eörin a maaa re ine. E seseng bara meringan kö kinis se ire kölöme re Jisas, God irabo rörön kölöme re ire öngöng bara ire tabo eöt tua öaxanan ine. Me Jisas Kraiss ine ewe nang ire tabo ölet ulorexe. Amen.

<sup>22</sup> Abo töke kölöme re Kraiss, e seng e mum bere mum morobo ölangen inabo tinenge ne öaxaxat na arixe ma balawapat, möxösa, ina ginigeet nang e geet tö mum i wuruwut mon.

<sup>23</sup> E töngösen ömaras e mum bere idi tere ölanglanga rewe e Timoti, a tönö ire, xalik a gunon ne aömokorot. Ma nang bere ine irabo wanot pasaxit, e rabo wan arixe me ine ra werwere e mum.

<sup>24</sup> Me mum morobo isik a tinenge ne aöga re mem urungan köbo sisila re mum arixe ma nangadi xirip pe God. Idi mee Itali te tile a tinenge ne aöga urungan te mum.

<sup>25</sup> E seseng bara a abalamu re God irabo kis se mum kirip.

## A Ginigeet te JEMS

I wawara bere Jems, ine a tönö e Jisas, ixo geet ina ginigeet. Ine a sisila möxö lotu ro Jerusalem bölöök (pere Aposol 15:13). Ma ixo geet ina na urungan köbo Judeia ewe nang toxoro nunu re Kraiss (Jems 1:1; 2:1). A unine ina ginigeet i bira, bara re **öng i kebeöt tua tinenge xalik mon bara i nunu re Kraiss. Kaim. A tatalien deek kine irabo osen a nunu re ine. Ma bara kaim pe tatalien deek kö to re nöngön, io, a nunu re nöngön i laa tataun (2:26).** Ma abo tiip ibo könönöin abo nunu re ire rua osen bara i turunon (1:2-18). Ganim ire rua ölangen tataunin mon ina atöngösen deek, ma lamun ire tabo mana pet eörin (1:19-27). Jems ixo wöwörö mabo tatalien köbo Kristien. Ire tabo mana balaure ödeek abo kamene ire (3:1-12), me ire tabo kip lo a mangana nanase meriso lömö (3:13-18), me ire tabo ii ölik ire iat kö God (4:1-17), xalik ire tabo tuu xö warkurai (5:1-11).

<sup>1</sup> E, e Jems, önga tultul te God me Jisas Kraiss, a Orong. Me e geet ina tinenge na urungan te mum a sangaun ma ninöng ne bung marapun mee Israel, ewe niang idi te xisixis kö boxönö xirip möxö öxöno lagunon.

Me e öga e mum ma tinenge na.

*Abo tiip i walar abo nunu re ire*

<sup>2-3</sup> Abo töke kölöme re Kraiss, mum morobo mana axanan nang bara abo mangana ölelewen i ot pösöt e mum, möxösa, mum mo ösöxö nang bara abo tiip na i walar abo nunu re mum irabo osen bara abo nunu re mum i kobo eöt ta sunubu, io niang, mum morobo eöt ta tinuu lölös köbo tiip.

<sup>4</sup> Me mum morobo mana balamaşa sik kua tinuu lölös, io niang, ina magingin na irabo o a inone xöbo to re mum bere mum morobo eöt tua tinuu esuo mabo tiip kirip, ma bere mum korobo mamaa ulamun te laa rua mumu e God.

*God irabo isik a nanase*

<sup>5</sup> Niang bara öng ke mum i sasaxan lamun a nanase rua to mamaran, ine irabo mana seng e God ma irabo isik ke ine, möxösa, ibo isik tataun kö nangadi xirip me ine i kobo eöt ta öngasin tewe a sineseng ke ine.

<sup>6</sup> Ma lamun niang bere ine i seseng, ine irabo mana nunu ma kaim pe nine dinödöm, möxösa, ewe niang ma nine

dinödöm i xarnang a axana dalun kö rasi a xiki ibo wawaxat elin ine.

<sup>7-8</sup> Ina tödi i bele dōxōmen bara irabo kip lo re önga laa meriso xō Orong, möxōsa, ine ma nine dinödöm. Ine irabo mamaa bara irabo pet bira, melamu irabo muu a dödōxōmen kabise.

<sup>9</sup> Niang bara önga töke kölōme re Kraiss, i kip lo a kinis ne maris, ine irabo mana ölolot ine, möxōsa, a esene i taxin köba xō wawara xō God.

<sup>10</sup> Ma i xarnang bölök kö öng nang i kip lo a kinis ne orong. Ine irabo mana ölolot ine bere God irabo ii ösu a esene, möxōsa, a kinis ne orong ke ine irabo kawam tataun xarnang a wiswisine iaa.

<sup>11</sup> A xaken ibo önan kaa ma lelewi raxin ma ibo dekdek ömet a iaa ma abo wiswisine ibo susubu su xalik, ma ibo ögarin a mariris möxōnan. Xarnang mon a tödi niang i kip lo a kinis ne orong. Niang bara i wewet iat abo binilan tine, irabo kawam kalik a kinis ne orong ke ine.

*Abo mamaa sasaban i walar ire*

<sup>12</sup> God irabo wadōane a tödi niang bara i tuu lölös köbo ölelewen, möxōsa, ine irabo tabaa ine ma to niang bara i ot maras bara ina tödi i kobo subu xōbo ölelewen. God ixo kubus sik bara re idi ewe niang te mamaa re ine bara ine irabo balu wuxus idi mina to.

<sup>13</sup> Ma niang bara inabo ölelewen i wanot pösöt te öng, i bele tengen bara, "God i sat lo a dinödöm pe e rua wewet te sasaban." I kobo eöt bara re önga laa irabo sat lo e God tua wewet te sasaban. Me ine iat i kobo eöt tua sat lo re öng kua wewet te sasaban.

<sup>14</sup> Lamun abo ölelewen irabo wanot kö önga tödi niang bara mamaa saban te ine iat i silien ine rua mamaa ra wewet a sasaban.

<sup>15</sup> Ma nang bara mamaa saban iri tienan xarnang abo une tobo tienan, irabo kiwot a sasaban xarnang a une i kip barok. Ma nang bara sasaban iri taxin, irabo kip barok bölök, ma ina barok iat a tatalien ne minet.

<sup>16</sup> Abo töke kölōme re Kraiss ewe nang e mamaa rö mum, ganim bara ina tatalien na i ömamang e mum.

<sup>17</sup> Abo lalaa deek mabo arabaa töxödös kirip i wan su meriso lömö xō watmaep kalik e God ewe nang ixo pet abo bibio xō balana kubu. God i kobo eöt ta xuxulas xarnang a sinisii nang a xaken i öxase nanin.

<sup>18</sup> Ine ixo pet ot ire xō mamaa rine iat ma tinenge turunon. Ma ixo pet ot ire bira rue ire tabo önga mangana sisila ne pasuno iaa möxōbo lalaa xirip ine ixo uxis.

*Ganim ire xō ölangen tataun a tinenge deek*

19-20 Abo töke kölöme re Krais ewe nang e maaaa rö mum, mum morobo mana döxömen ödeek ina na eka rengrengen. Mum kirip morobo mana pasaxit tua ölöngö, ma lamun mum bele pasaxit tua tinenge ma rua bala kinadik, möxösa, abo bala kinadik kö nangadi i kobo eöt ta isik ot abo tatalien töxödös nang e God i maaaa bara ire tabo pet.

21 Möxö ina na, mum morobo mana kip tewe abo magingin saban kirip nang ibo wöwöwö xöbo to re mum. Me mum moro ii ölik e mum ma moro ömaraxen lo ina tinenge nang toxo sulo kölöme re mum nang i eöt bara irabo öro e mum.

22 Ganim e mum kö ölangen tataunin a tinenge. Nang bara mum mo ölangen tataunin mon a tinenge, mum mo ömamang öbaling e mum iat. Ma lamun e mum morobo mana pet eörin abo tinenge.

23 Nang bara önga tödi i ölangen tataun a tinenge ma i kobo pet eörin, ine i xarnang a tödi i pere a mamaran te ine xö galas.

24 Ma nang bara iri pere sik ine xö galas, irabo wan. Ma saxit mon irabo döxömen taun bara a mamaran te ine i wawara bule.

25 Inexalik nang bara öng i wawara kölöme xina tinenge xö God, ine i pere a warkurai niang i töxödös saxit. Ma ina warkurai nang ibo ölanglanga ire. Ma nang bara ine ibo werwere sösöxöin ina tinenge, God irabo wadöane ina tödi xöbo lalaa i pet. Ma lamun ganim ine rua ölangen bulus ina tinenge ma i döxömen taun. Kaim. God irabo wadöane ina tödi ewe i pet eörin a tinenge re ine.

26 Ma bara öng i döxömen bere i mumuu e God, nexalik i kobo balaure ödeek a kamene ine, io, i turunon saxit, ine i kobo muu iat e God. Kaim. I ömamang öbaling ine iat.

27 Nang bara ire tabo muu e God a Tamana ire, ine i maaaa bere ire tabo muu ine bira. Ire tabo mana uxileng abo baknaa mabo möxösö xöbo tiip pe idi, ma tabo balaure ödeek ire iat kalik abo tatalien möxö ina öxöno lagunon, xalik ibo pet öbiling ire. Ma nang bere ire te pet bira, God irabo perexulen ina tatalien xarnang i töxödös saxit ma kaim pe biling könän.

## 2

### *Abo tatalien te ire urungan köbo maris mabo orang*

1 Abo töke kölöme re Krais, mum mo nunu xö Orong ke ire e Jisas Krais, niang a mariris se ine a lak taxin. Möxö ina na, ganim bere e mum mo öngus kalik a öng ma morobo

ii a öng kabise, möxösa, mum mo perexulen abo mangana kinis se idi.

<sup>2</sup> Nang bara önga tödi i wan laxa xö kinis etok ke mum ma i sige sik a gol ma a man nang a marana a lak kaa, ma i maras bere ine a orong, ma nang bara önga tödi maris i wan laxa bölök ma i sige sik a man maut, mum morobo pet bule?

<sup>3</sup> Ma nang bara mum mo osen a dinödöm taxin te mum urungan kö tödi nang i sige sik a man deek, me mum mo tengen te ine bara, "Örö kis sa xö kinis deek," ma nexalik mum morobo tengen kö tödi maris bara, "Örö tuu sik mon tingan," bara, "Örö kis kö pu xö nine xexeke,"

<sup>4</sup> io, a turunon saxit, mum moro palang e mum kaluluon. Mum moro kure idi bira, möxösa, i wanot meringan kölöme xö dinödöm saban ma möxöbo maaa saban te mum.

<sup>5</sup> Abo töke kölöme re Kraiss ewe niang e bo maaa rö mum, mum morobo ölangen ödeek. Turunon saxit bara e God ixo pere kos abo maris meringan kalik a öxöno lagunon bere idi tabo kis deek arixe xö nunu re idi, ma bere idi tabo laxa xö kinis ne kingdom pe ine i eöt ma kunubus se ine urungan tidi ewe idi te maaa re God.

<sup>6</sup> Inexalik mum moxoro ömenge abo maris. Ma nangang sa ridi ewe idi tobo wewet ögarin e mum? Me ewe idi niang tobo sasat e mum pua tinuu xö warkurai? Turunon saxit, idi mon abo tödi orong.

<sup>7</sup> Idi bölök mon nang tobo rengrengen ögarin a ese deek ke nangang ibo unan sik e mum.

<sup>8</sup> Lamun niang bere mum mo tam kö warkurai möxö kingdom, nang i kis kö Buk Tabu, io, mum mo wewet a tatalien deek. Ma ina warkurai i tengen bira, "*Örobo maaa lamun a öng kabise xarnang u maaa lamun nöngön iat.*"

<sup>9</sup> Ma lamun nang bere mum mo ii a öng ma öng kaim, mum muru pet a magingin saban. Abo tinenge möxö warkurai te God irabo kure e mum möxö mum mo lexe a warkurai.

<sup>10</sup> Niang bere ewenene ibo rarama abo warkurai kirip ma lamun i subu xö öng, i wawara bere ine i subu xöbo warkurai kirip.

<sup>11</sup> Ma ina na i maras, möxösa, ewenene nang ixo tengen bara, "*Ganim nöngön ta minaru arixe ma önga tödi bara önga une niang kaim bara re nöngön,*" ixo tengen bölök bara, "*Ganim u sexomet tataunin te tödi.*" Io, niang bara nöngön u kobo subu xö tatalien möxö minaru arixe ma öng nang bara kaim bere re nöngön, ma nexalik u sexomet tataunin a önga tödi, io, nöngön a önga tene lexe warkurai.



<sup>12</sup> Mum morobo mana balaure ödeek abo tinenge mabo tatalien te mum, möxösa, a warkurai niang ibo ölanglanga ire irabo kure e mum.

<sup>13</sup> Mum morobo balaure ödeek e mum, möxösa, mum morobo tuu xö warkurai. Ina warkurai i karabo osen a abalamu urungan kere öng ewe niang i kara ebalamu. Inexalik nang bara öng i isik a abalamu rine, irabo axanan kö bung nang irabo tuu xö warkurai.

*A nunu mabo tatalien deek*

<sup>14</sup> Abo töke kölöme re Kraiss, niang bara önga tödi i tengen bara ine ibo nunu re Kraiss ma i kobo ösöxö ra osen tebo tatalien deek, i kobo eöt ta rorop ine. Ma i eöt bara ina mangana nunu na irabo öro ine? Kaim.

<sup>15</sup> Niang bara önga töm bara önga saxam kölöme re Kraiss kaim ine ma man ma nien möxö ina bung niang,

<sup>16</sup> ma nang bara öng ke mum i tengen bara, “Örö wan ma malum, ma örö bulus se bo man ta ölelewi nöngön ma örobo an deek,” nexalik bara u kobo pet eörin a mangana sasaxan tine, mum mo döxömen bara a tinenge mon irabo top ine? Kaim.

<sup>17</sup> Ma i xarnang bölök niang bara önga tödi i tengen bere ine i nunu re Kraiss ma lamun a nunu rine i kobo kis eöt mabo tatalien deek. Ina mangana nunu niang a lak met.

<sup>18</sup> Io, a önga tödi irabo tengen bira, “A öng ibo nunu ma öng ine ma tatalien deek.” Ma lamun e rabo tengen bara, u kebeöt tua osen e ma nunu re nöngön nang bara kaim a tatalien deek könän. Inexalik abo tatalien deek iat te e irabo osen ömaras nöngön ma nunu re e.

<sup>19</sup> Nöngön u bo nunu bere God ine xalik mon a öng. U döxömen bara ina na i deek? Kaim. Abo tano saban idi bölök te nunu bie, nexalik idi tobo dedede ma binuut.

<sup>20</sup> A baulang nöngön! E rabo osen nöngön bara a laa tataun mon ina nunu re nöngön nang bara i kobo kis eöt ma tatalien deek. Io na, nöngön örobo ölangen.

<sup>21</sup> Bule lamun a untubuno ire e Abaram? Ruasa me God ixo kure bere i töxödös kö wawara rine? Möxösa e Abaram ixo bulus a barok kine e Aisak lömö xö alta, xarnang a arabaa urungan te God. Io niang, God ixo pere a tatalien deek kine ma ixo kure ine bere i töxödös.

<sup>22</sup> Io, e maaaa bere nöngön örobo ösöxö bara a mangana nunu rine arixe mabo tatalien deek kine i wan eöt. Ma a nunu rine ixo ot turunon, möxösa, i wan eöt mabo tatalien deek kine.

<sup>23</sup> Ma ina laa na ixo öturunon a tinenge re God nang toxo geet niang i tengen bira, “*Abaram ixo nunu xö God me God ixo perexulen ine bere i töxödös sik kö wawara re ine.*” Ma toxo tengen bara ine a ais se God.

<sup>24</sup> Mum mo maras im bere God irabo kure önga tödi bara i töxödös kö wawara rine, möxösa, i pere abo tatalien deek ke ine. Ma nang bara i nunu xalik mon, God i karabo kure bara ina tödi i töxödös.

<sup>25</sup> Ma i xarnang bölök ke Rahap, a ilawa. God ixo pere ine bara ixo öga lo abo duöng ineöman möxö umri mee Israel ma ixo tile rewe idi xö önga ngas kabise. Io, God ixo kure bara ine i töxödös, möxösa, ixo pere ine ma tatalien deek.

<sup>26</sup> A aine ire a lak met nang bara kaim a tanono ire xönan. I xarnang, a nunu a lak met nang bara kaim abo tatalien deek könan.

### 3

#### *Abo kamene ire*

<sup>1</sup> Abo töke kölöme re Kraiss, kaim bara oleleng ke mum tabo tene ausu, möxösa, mum mo ösöxö bere God irabo kure xöbanin ire ewe nang abo tene ausu xö nangadi xabise.

<sup>2</sup> Ire xirip tobo susubu xöbo mangana tatalien oleleng, ma niang bara önga tödi i kara ösöxö ra sinubu xö önga tinenge re ine, ina tödi a lak töxödös me ine i eöt ta werwere muu a to xirip pe ine.

<sup>3</sup> Nang bara ire te bulus ölaxa a xönö aen kölöme xöbo ngalana os bara rue idi ra ölangen ire, io, ire te eöt tua wuxwuxus kirip a aine.

<sup>4</sup> Ma i xarnang bölök abo mön taxin. Idi te taxin köba ma xiki raxin ibo waxwaxat nanin idi, ma lamun a ösö lik nangen nang i eöt bara öng irabo ulusen a mön min kö boxönö xirip niang i maaaa ra nuan uxe.

<sup>5</sup> Ma i xarnang bölök kö kamene ire. A lak lik mon kö aine ire, lamun i eöt ta ölolot öngabo lalaa raxin nang bara önga tödi i pet. Na örö dödöm deek bara a kamene ia lik i eöt tua söngsöngöt kirip a pirixö raxin.

<sup>6</sup> Ma kamene ire i eöt ma ia sösöt bölök. I xarnang abo sasaban kö öxöno lagunon kirip i rörön arixe mabo kamene ire. A kamene ire, ine a xönö möxö aine ire, niang ibo silien abo sasaban köbo aine ire. Ma ibo söngsöngöt ögarin önga tödi xarnang a ia. Ma i xarnang bara ina ia i wanot meruso iat kö el.

<sup>7</sup> A kamene ire ibo ögarin ire xarna na, möxösa, kaim pe öng i eöt tua balaure a kamene. A nangadi te eöt ta balaure xalik abo gineme axe mabo mangana pun kirip. Ma te eöt ta balaure abo inan kirip mabo lalaa xirip niang tobo xaxabo.

<sup>8</sup> Ma lamun kaim pe öng i eöt tua balaure ödeek a kamene. A kamene ibo tagur sik ka wewet abo sasaban. Ma i xarnang a laa mele möxö minet i wöwö sik kö ngalana ire.

<sup>9</sup> Ire tobo ölelet a Orong, a Tamana ire, ma kamene ire, ma tobo rengrengen ögarin bölök a nangadi arixe min, ewe idi niang e God ixo pet idi xarnang ine iat.

<sup>10</sup> Meringan kö önga ngalana tödi xalik, a tinenge ibo önan su rua wadöane önga tödi ma ra tengen ögarin a öng bölök. Abo töke kölöme re Kraiss, niang i kobo deek.

<sup>11</sup> I eöt bara a ari deek ma ari melexen idu tabo sen su xalik a önga marna ari?

<sup>12</sup> Abo töke kölöme re Kraiss, i eöt bara pasuno olip irabo o xö uno löwö? Kaim. Ma a pasuno löwö i kobo eöt ta ino xö uno wain. I xarnang mon a mexe, i kobo eöt ta isik a ari deek.

*Ewe a tene nanase turunon?*

<sup>13</sup> Dauleng kaluluon te mum abo tene nanase? Idi tabo mana osen abo nanase re idi bira: abo to re idi irabo deek, me idi tabo pet abo mangana tatalien i eöt ma önga tödi nang i ii ölik ine ma nanase.

<sup>14</sup> Inexalik nang bara mum mo dödöm saban me mum mo pere neek a laa xö öng kabise me mum mo wawara siwin tebo ngas se mum iat tua xikip a kinis ne sisila, ganim e mum kö ölolot e mum könan. Niang bara mum mo pet bira, mum mo röxröxö mon, ma abo tinenge re mum i kobo eöt ta aut lo abo lalaa nang i turunon.

<sup>15</sup> Ma ina mangana nanase na i kara wanot meriso xö watmaep. Kaim. Ine mera xö pu xö öxöno lagunon. Ma i kara ot meriso xö Töxödös ne Tanono. Kaim, ibo önan ot möxöbo tano saban.

<sup>16</sup> Nang bara a nangadi tobo dödödöm saban möxö werwere neek abo lalaa xö nangadi xabise, ma tobo wawara siwin tebo ngas se idi iat tua xikip a kinis ne sisila, tabo pere bara kaim a tinuu arixe kaluluonin idi ma tabo pere bölök abo mangana magingin saban kirip.

<sup>17</sup> Inexalik, a nanase meriso lömö, a sila ne laa möxönan bara a lak madakdak. Ma a tödi nang ine ma ina nanase ibo mumuu a tatalien ne malum ma ibo xisixis ödödö. Ibo tagur tua mumuu a dödöxömen kö öng kabise. Ma i wöwö ma abalamu ma ibo oo abo tinörön deek. I kobo muu a tatalien möxö tinuu arixe ma dauleng ma rua ögarin a dauleng kabise, ma i kobo eönunu.

<sup>18</sup> Ewe idi nang tobo wewet a malum kaluluonin a nangadi, i xarnang idi te sulo a malum me idi tabo pere lo a inone tatalien töxödös.

## 4

*Ire tabo ii ölik ire iat kö God*

<sup>1</sup> Inabo mangana inarse ma inegot na kaluluonin e mum i önan ot mole? Ibo önan ot meringan kö mamaa re mum möxö axanan tataun mon. Ma ina mangana mamaa nang ibo erese mabo dedeek kölöme xöbo to re mum.

<sup>2</sup> Mum bo mamaa ulamun tebo lalaa ma nexalik mum kobo eöt ta xikip lo. Io, mum bo sesexomet a nangadi. Mum bo neneek suxume abo lalaa xö dauleng kabise, ma lamun i kobo eöt bara mum morobo kip lo. Io niang, mum bo eengat me mum bo erese. Mum kobo eöt ta xikip lo, möxösa, mum kobo ose e God ulamun.

<sup>3</sup> Io, mum bo seseseng me mum kobo eöt ta xikip lo, möxösa, mum mo seseng ulamun abo lalaa niang irabo isik ot a axanan tataun mon te mum. Me God i karabo öbala lo abo lalaa mum mo seseng ulamunon, möxösa, a dinödöm pe mum i kobo töxödös.

<sup>4</sup> Mum bo önan kalik e God. Mum mo xarnang a une ilawa ewe ibo önan lie a tödi re ine ma ibo mamaru arixe ma önga tödi xabise. Mum kobo ösöxö bara nang u ais ma öxöno lagunon, u mölök kalik e God? Turunon saxit, ewenene a öng i mamaa bara ine irabo ais ma öxöno lagunon, ine a iuo xö God.

<sup>5</sup> Ganim bara mum mo döxömen bara abo tinenge xö God nang toxo geet bara a tinenge tataun mon. Kaim. I tengen bere God ixo uxis ire arixe ma tanono ire, io niang, ine i mamaa bara ire tabo mana muu ine xalik mon.

<sup>6</sup> A abalamu xö God tö ire i taxin saxit köba xöbo mamaa saban te ire. I xarnang a tinenge xö God toxo geet i tengen, *“God ibo ruruu talu idi nang tobo ii öraxin idi iat.*

*Ma ibo isik a abalamu re ine xö nangadi ewe niang tobo ii ölik idi iat.”*

<sup>7</sup> Io, mum morobo mana ii ölik e mum kö God. Mum morobo mana tuu wi e Satan me ine irabo ulo rup kalik e mum.

<sup>8</sup> Mum morobo mana taxase lörörö xö God me God irabo taxase lörörö urungan te mum. E mum abo duöng saban, mum morobo mana kip tewe abo tatalien saban kö to re mum, xarnang a tödi i tos tewe a biling kalik a limine. Me mum ewe niang ma nine dinödöm kö mamaa re mum, morobo ömadakdak abo balana e mum.

<sup>9</sup> Mum morobo mana tapunuk ma ginee nöngösö lömö xelen abo magingin saban te mum. Ganim a ninöngön ma axanan. Mum morobo mana kulas a ninöngön urungan kö ginee, ma a axanan urungan kö tapunuk.

<sup>10</sup> Mum morobo mana ii ölik e mum iat kö wawara xö Orong me ine irabo ii öraxin e mum.

<sup>11</sup> Abo töke kölöme re Kraiss, ganim a rengrengen ögarin te öng kaluluonin e mum. Ewenene i tengen ögarin a tönö kölöme re Kraiss bara i kure ine, i xarnang bara i tengen

ögarin ma i kure abo warkurai te God. Nang bara u kure abo warkurai xö God, i wawara bere nöngön mon a öng u kobo ösöxö ra rarama inabo warkurai. Nöngön u ii öraxin nöngön xarnang a öng i eöt bara ine irabo kure abo warkurai me ine irabo mana bulus a dinödöm pe ine iat bara abo warkurai i deek bara i saban.

<sup>12</sup> God kalik mon ewe niang ixo isik abo warkurai me ine xalik mon ewe nang i kure a nangadi. Ine xalik mon i eöt tua öro ma rua ögarin. Inexalik, ewe nöngön nang u ka kure a nangadi xabise?

<sup>13</sup> Dauleng ke mum tobo tengen bara, “Nixinen bara maxalik, ire tabo wan urungan kere lagunon taxin bara ire tabo rörön tingan kö önga awat tua wewet ot a tuluwok.” Ma ewe mum nang moro tengen bira, mum morobo mana ölangen ödeek.

<sup>14</sup> Mum mo tengen bira, ma lamun mum kobo ösöxö a lasa irabo ot kö to re mum maxalik. Mum mo xarnang a op i ot ma i kis ulik mon ma i kawam tataun baling.

<sup>15</sup> Ganim a rengrengan bira. Mum morobo mana tengen bara, “Nang bara a Orong i mamaa bara ire tabo to ma bara ire tabo pet ina na bara niang, io, ire tabo pet.

<sup>16</sup> Mum iat baling, mum bo ii öraxin öbaling e mum me mum bo ölolot e mum kö mangana lalaa mum bo wewet. Abo tatalien xarna i saban.

<sup>17</sup> Io, ewenene im i maras kö tatalien deek irabo mana pet eörin, ma nang bara i kobo pet, ine iri pet a magingin saban.

## 5

### *A aötumarang urungan köbo orong*

<sup>1</sup> Mum abo asuono orong, mum moro ölangen ödeek! Mum morobo mana kup ma ginee, möxösa, abo tiip tataxin i önan ot pösöt e mum.

<sup>2</sup> Abo bubulus tataxin te mum irabo maut, ma abo iwis tabo ngut ögarin abo man te mum.

<sup>3</sup> Abo gol mabo siliwa re mum irabo rös. Ma abo rös se idi irabo tengen ömaras bere mum mo pet abo tatalien saban, ma irabo en abo aine mum xarnang a ia sösöt. Turunon saxit bara a axana bung möxö xakawam iri önan ot, ma lamun mum moxo bulus ugun abo bubulus tataxin te mum.

<sup>4</sup> Moro ölangen! Mum kaim kö isik a xinuxun te idi ewe idi toxo rörörön köbo komo re mum. Me idi te xukup pe mum bere mum mo pet a sasaban. Me idi nang toxo kip etok a nien maruxo, idi te seseseng ma ginee urungan kö God. Ma Orong, nang ine mabo lölös kirip, iri ölangen idi ma irabo tame idi.

<sup>5</sup> Ra xö öxöno lagunon abo to re mum iri wöwö mabo lalaa deek saxit. Me mum mo öwöwö abo to re mum mabo lalaa mum mo mamaa rua öaxanan öbaling e mum min. I xarnang önga tödi irabo öraxin a önga bulmakau ulamun a bung idi tabo sexomet ine, me mum mo tabaa öraxin öbaling e mum ulamun ina bung nang tabo sexomet e mum.

<sup>6</sup> Mum moxoro kure a nangadi töxödös bara tabo kip a aömokorot. Ma moxoro sexomet idi, me idi tekebeöt ta tinuu wi e mum.

*Ire tabo tuu lölös köbo tiip*

<sup>7</sup> Abo töke kölöme re Kraiss, mum morobo mana balawapat nang bara abo tiip na irabo ot pösöt e mum, ot kö axana bung möxö nuanot kö Orong. Mum moro dödöm ulamun abo tene susulo. Önga tene susulo i mamaa ulamun abo nien maruxo xö komo rine. Io nang, i kis xiset bara irabo maruxo, ma irabo balawapat sik, ot nang a axana bung möxö baraa irabo kawam.

<sup>8</sup> I deek bara mum bölok morobo balawapat ma morobo tuu lölös sik, möxösa, a nuanot kö Orong iri lörörö.

<sup>9</sup> Abo töke kölöme re Kraiss, ganim a bala saban kaluluonin e mum iat, xalik mum bo tuu xö warkurai. Moro pere! A Tene Pet Warkurai iri lörörö ra nuanot ma i xarnang bara i tuu sik kö marame ma i ka nuan laxa.

<sup>10</sup> Abo töke kölöme re Kraiss, mum morobo mana döxömen abo propet ewe midi toxobo palas tininge, möxösa, a Orong ixo tile idi. Idi toxo balawapat ma toxo tuu lölös köbo tiip. I deek bere mum morobo muu a mangana tatalien na.

<sup>11</sup> Turunon saxit, ewe midi niang te tuu lölös, ire tabo perexulen idi bere God i wewet ödeek idi. Mum moxoro ölangen a tininge ulamun e Jop. Ine ixo tuu lölös köbo tiip. Me mum mo maras kö xakawam möxö ina pii, bara a Orong ixo top ine bule. Mum mo maras bara Orong i wöwö ma a abalamu.

<sup>12</sup> Abo töke kölöme re Kraiss, önga laa i taxin köba i bira: ganim a usugurno rua öturunon abo tininge re nöngön. Ganim a usugurno urso lömö bara ura xö pu, bara xö önga laa xabise bölok. Lamun i eöt bara nöngön örobo aut mon, bara örobo öös, xalik abo warkurai xö God ibo kure nöngön.

*Ire tabo seseseng ma nunu*

<sup>13</sup> Niang bara öng kaluluon e mum i örasen a kinadik, irabo mana seseng. Ma niang bara öng i axanan, i deek bara irabo ölet e God arixe ma sinö.

<sup>14</sup> Ma niang bara önga tödi i meset, ine irabo mana kuwe abo sisila ne lotu rua sineseng kö ine. Ma tabo urup ine ma wel kö lölös möxö esene Orong.

<sup>15</sup> Idi tabo mana seseng arixe ma nunu, ma ina mangana sineseng irabo ölanglanga ina tödi ma miniset. A Orong irabo ölanglanga ine ma ina tödi na irabo tuu kaa, ma nang bara ixo pet a magingin saban, God irabo döxömen taun abo magingin saban te ine.

<sup>16</sup> Io niang, mum morobo mana tengen ösu abo magingin saban te mum kaluluonin e mum iat me mum morobo mana seseng kaluluon te mum iat bara mum morobo langlanga xalik a miniset. A sineseng kö önga tödi töxödös i lölös köba.

<sup>17</sup> Elaija ine a tödi xarnang mon ire. Ine ixo seseng ma kat te ine bara i karabo baraa ma kaim kö baraa xö narun ne awat ma subana.

<sup>18</sup> Önga bung melamu ixo seseng ma a baraa ixo su meriso xö watmaep, mabo nien toxo das baling kö pu.

<sup>19</sup> Abo töke kölöme re Kraiss, niang bara öng kaluluon te mum i wan kalik a turunon ma önga tödi i lamus ot öbaling ine,

<sup>20</sup> mum morobo mana ösöxö bara ewe a öng i lamus ot öbaling önga tene saban kalik abo ngas saban te ine, ine irabo öro ine xalik a minet. Io, xina ngas na God irabo irewe a oleleng ne magingin saban te ine.

## A sisila ne Ginigeet te PITA

Pita ixo geet ina ginigeet mero 'Babilon' (pere 1 Pita 5:13). Ma uleng te dōxōmen bere Pita ibo xisixis so Babilon mee Mesopotemia. A uleng kabise te dōxōmen bere Pita ixo tengen 'Babilon' eöt ma önga lagunon saban ma ixo kis tunon iat Rom ma bara ringan Jerusalem. Ma ixo tile ina ginigeet urungan köbo Kristien nang toxo kis ebasin kö uleng ne boxönö (1:1). Pita ixo mamaa rua öxaxat abo Kristien ewe nang abo tene saban toxo eler me idi (1:6; 2:18-26; 3:13-17; 4:6-19). Pita ixo tengen bara inabo tiip i uban ire rua könönöin abo nunu re ire ma rua osen bara abo nunu re ire i turunon (1:6-7). Pita i öxaxat ire bara ire tabo muu a tatalien te Jisas nang ixo kip abo kinadik bölök (2:21-24; 3:18) ma ewe nang irabo tawuxus baling kua gene ire (1:3-5; 1:13; 4:7). Ire abo marakörö tus se God (2:9-10), io nang, **ire tabo mana to bie mabo tatalien deek kölöme xöbo tiip me ire tabo tuu lölös köbo nunu re ire.** Ma ina na a unine ina ginigeet na.

<sup>1</sup> E, e Pita, a önga aposol te Jisas Kraiss, e geet inabo tinenge na urungan tö mum ewe mum nang mo kis elixilik nana xö boxönö xarnang abo osee ringan Pontus, Galesia, Kapadosia, Esia me Bitinia.

<sup>2</sup> Me mum nang e God a Tamana ire ixo pere kos eöt ma dödōxōmen te ine mesila. Ma ixo pere kos e mum arixe ma tinörön möxö Tanono nang a Tanono ixo bulus tewe e mum kalik a sasaban bere mum morobo madakdak. Ma ixo pere kos e mum bira, bara mum morobo tame e Jisas Kraiss ma bere e Jisas irabo tos ömadakdak e mum ma dee re ine.

Me e seseng bere mum morobo wöwö runon arixe ma a abalamu ma malum.

### *Ire tabo unan a ineöro*

<sup>3</sup> Ire tabo mana ölet e God, ine a God ma a Tata xö Orong ke ire, Jisas Kraiss. Meringan kölöme xö abalamu raxin te ine, ine ixo isik a to maxat te ire bere ire tabo xixiset ma nunu lamun abo lalaa deek nang ine irabo tabaa ire min ma kaim pe xakawam möxönan. Ma i eöt tua wewet bira, möxösa, Jisas Kraiss ixo taru baling kalik a minet.

<sup>4</sup> God ixo balamu ire bira bere ire tabo unan inabo lalaa deek kue ire iat. Inabo lalaa na i karabo mösö ma i karabo maxus ma i karabo maut tewe. Me God ixoro bulus ödeek inabo lalaa na rusu xö watmaep pua gene mum



<sup>5</sup> nang e God i ruruu wi e mum ma lölös se ine, möxösa, mum bo nunu. Me God i ruruu wi e mum bira rue mum pa xikip a ineöro nang iri tagur sik kua nuanot maras kö axana bung möxö xakawöm.

<sup>6</sup> Mum bo axanan ulamun inabo lalaa nang, nexalik bara na ma melamu aulik, nagut e mum morobo mana esek ma tapunuk, möxösa, a oleleng ne mangana ölelewen ibo uban e mum.

<sup>7</sup> Inabo ölelewen na i ot pösöt e mum rua osen bara abo nunu re mum a lak turunon. Me idi tobo könönöin a gol xarna niang bölök. Idi tobo bulbulus ine kölöme xö ia sösöt tua osen bara ine a gol turunon. Ma a gol ibo rutup tewe, nexalik a nunu re mum a marana a lak taxin kö gol. Io niang, bere Jisas Kraiss irabo ot wösö, ine irabo ölet e mum ma irabo ömariris e mum ma irabo ii öraxin e mum, möxösa, irabo pere ina nunu runon te mum.

<sup>8</sup> Mum koxobo pere ine, nexalik e mum bo maaaa rö ine. Ma na mum kobola pere ine ma lamun mum mo nunu rine. Io nang, mum mo wöwö ma mangana axanan deek nang i kebeöt te mum pua rengrengen osen,

<sup>9</sup> möxösa, mum mo xikip lo a ineöro, nang ine a inone nunu re mum.

<sup>10</sup> Mabo propet ewe nang toxobo wöwörö ulamun a abalamu nang irabo ot pösöt e mum, idi toxobo lölölös nana iat tua winara ulamun ina ineöro.

<sup>11</sup> A Tanono e Kraiss kölöme re idi ixobo rengrengen osen abo lalaa lamun e Kraiss. Ibo rengrengen ösila bere Kraiss irabo kip a kinadik ma bara melamu irabo kip lo a mariris se ine. Idi toxobo susuxun tua ösöxö ina axana bung ma bara inabo lalaa na irabo ot bule.

<sup>12</sup> God ixo osen tö idi bara kaim idi xo tinenge xarnang abo propet ulamun ina na rua gene idi iat. Kaim. Idi toxo rengrengen ina na rua gene e mum. Me idi nang toxo wöwörö lölös se mum ma atöngösen deek ma xö lölös möxö Töxödös ne Tanono meriso xö watmaep, idi toxo töngösen e mum ulamun inabo lalaa iat. Ma inabo lalaa nang abo angelo te maaaa bere idi tabo ösöxö.

### *Ire tabo madakdak*

<sup>13</sup> Möxö ina na, mum morobo tagure abo dinödöm pe mum pua tinörön te mum, ma a dinödöm pe mum irabo mana maras sik. Mum morobo xixiset ma nunu ulamun a abalamu xalik mon nang e Jisas Kraiss irabo isik tabaa e mum min nang ine irabo ot wösö.

<sup>14</sup> Mesila mum abo tabuno nanase me mum moxobo mu-muu abo maaaa saban. Inexalik na, mum abo baroxorok tinam kö tinenge, io niang, ganim e mum pa öbala lo inabo maaaa saban bara irabo kure e mum bie.

<sup>15</sup> Kaim. God ewe nang ixo kuwe e mum, a lak madakdak ine. Io, xö tatalien te mum, mum iat bölök morobo madakdak xarnang ine,

<sup>16</sup> möxösa, a tinenge re God toxo geet ine i tengen bira, *“Mum morobo mana madakdak kö tatalien te mum, möxösa, e a lak madakdak.”*

<sup>17</sup> Ma nang e mum bo seseseng uruso re God, mum bo rengrengene ine me Mama. Ine ewe i kure sik a marakörö. Ma a warkurai te ine i töxödös kirip. I kebeöt bara irabo kure ögarin te öng ma irabo top tataunin te öng kabise. Kaim. Ine irabo kure a nangadi muu abo tatalien te idi. Io nang, mum morobo mana kis ma binuut taxin pösöt ine, nang mum mo kis aulik xarnang a osee ra xö öxöno lagunon,

<sup>18</sup> möxösa, mum mo ösöxö sik a xinuxun nang e God ixo isik tataunin tua xukun ölanglanga e mum kalik a mangana to me lorexe nang i kebeöt ta rorop e mum nang mum moxo kip ausu xönan kalik abo untubuno e mum. Me God kaim ine xo xukun ölanglanga e mum arixe mabo lalaa xarnang a gol ma siliwa nang irabo kawöm tewe. Kaim.

<sup>19</sup> Ine ixo kun ölanglanga e mum ma a dee re Krai, ma a marna ina dee i taxin saxit. Ma ixo xarnang a bak kö sipsip, kaim ine mere sasaban.

<sup>20</sup> God ixo pere kos lo ine mesila xö uxixis möxö öxöno lagunon. Ma lamun ixoro wanot maras im kö xakawöm möxö inabo bung na rua gene e mum.

<sup>21</sup> Me mum mo nunu re God, möxösa, mum mo wan pösöt ine kölöme re Krai. Me God, ine iat ewe ixo öraru e Krai kalik a minet ma ixo isik a mariris se ine. Io nang, abo nunu re mum i kis se God, mabo lalaa deek mum mo xixiset lamun ma nunu i wanot meriso re God.

<sup>22</sup> Me mum moxoro tame abo turunon nang e God ixoro oseen, io nang, mum moxoro tos tewe abo sasaban te mum, me mum bo isik a abalamu runon urungan te mum barön kölöme re Krai. Inexalik i deek bere mum morobo isik a abalamu raxin kaluluonin e mum meringan kölöme xöbo kat te mum,

<sup>23</sup> möxösa, mum moro kip lo a to maxat. Me mum koxobo kip ina to maxat möxö irine iaa nang irabo mösö. Kaim. Inexalik mum moro kip lo ine xalik a laa nang i karabo mösö. Me ine ina tinenge re God nang a lak to ma kaim pe xakawöm möxönan.

<sup>24</sup> Ina na i xarnang abo ginigeet te God i tengen bara, *“A nangadi xirip te xarnang abo pirixö, ma mariris möxö nangadi te xarnang a wuswusuno pirixö. A pirixö irabo mölös, ma wuswusuno irabo sama su.*

<sup>25</sup> *Inexalik a tinenge re God irabo kis ulorexe.”*

Ma ina tinenge na nang toxo etöngösen min tö mum.

## 2

<sup>1</sup> Möxö ina na, mum morobo mana kip tewe a dinödöm möxö ögarin a öng kabise, ma a tatalien ne lamus öröxröxö lo a nangadi. Ma ganim e mum pua nine kamene e mum. Me mum morobo kip tewe a tatalien ne bala saban kö tödi nang ine ma oleleng ne lalaa, mabo mangana tatalien möxö rengrengen ögarin a nangadi.

<sup>2</sup> Xarnang abo bak madak tobo mamaa xöba lamun a arine tus, io, mum bölök morobo mamaa xöba lamun a arine tus i eöt tua rorop e mum kölöme xöbo tanono e mum, rue mum pa maruxo kölöme xö ineöro re mum,

<sup>3</sup> möxösa, mum muru namienin bara a Orong a lak deek.

*God ixo pere tus ire rue ine iat*

<sup>4</sup> Krai a wat nang a lak to, me mum mo orot pösöt ine. Nangadi toxo öngus kalik ine, ma lamun e God ixo perexulen ine bara a marna i kakaa ma ixo pere tus ine.

<sup>5</sup> Mum mo xarnang bölök abo wat nang a lak to. Me God ibo rörön köbo tanono e mum pua wewet a gunon. Ma ringan ee mum morobo rörön xarnang a pris madakdak, ma morobo isik abo arabaa meringan kölöme xöbo tanono e mum urungan te God. Me God irabo ömaraxen inabo arabaa, möxösa, mum mere Jisas Krai.

<sup>6</sup> Ma i maras bara ina na i turunon, möxösa, a tinenge re God toxo geet i tengen bira,

*“Moro pere! E pere kos lo önga wat nang a marna i kakaa. Me e bulus ine ruso Saion, me ine a unine a urulo möxö gunon.*

*Me ewe nang i nunu re ine i karabo minge.”*

<sup>7</sup> Krai i xarnang a wat nang a marna a lak kakaa rue mum nang mo nunu. Ma lamun rue ewe idi nang tekobo nunu,

*“Ina wat nang abo tene pet gunon toxo öngus kalik xarnang a laa tataun ine,*

*iri ot xarnang a unine a urulo möxö gunon.”*

<sup>8</sup> Ma i tengen bölök bira,

*“Ma ina wat nang i maru wi sik a ngas, a nangadi tabo salilinge xönan*

*ma tabo subu.”*

Idi tobo salilinge, möxösa, idi tekobo tame a tinenge re God, me God ixo pingit bara irabo wanot bira rö idi.

<sup>9</sup> Ma lamun e *God ixoro pere tus e mum rua nangadi rine. Me mum abo pris se King ke mum. Mum a nangadi madakdak nang e God ixoro bulus tewe bara rö ine iat* bere mum

morobo tenge maras ulamun abo tinörön deek kö Öng nang ixo kuwe lo e mum kalik a ködö urungan kö maras deek.

<sup>10</sup> Mesila mum kaim bere mum a nangadi re God. Ma lamun na im mum a nangadi re God. Mesila mum kaim a kinis kö inemarse re ine. Ma lamun na im mum moro kis kö inemarse re ine.

*Ire tabo ii ölik ire*

<sup>11</sup> Abo ais deek ke e, e öxaxat e mum, ewe mum nang mo kis ne osee ra xö öxöno lagunon, bere mum morobo tuu wes kalik abo maaaa saban nang ibo erese arixe me mum köbo to re mum.

<sup>12</sup> I turunon bara abo tabuno nunu tobo wupuk e mum bara abo tene saban e mum. Inexalik mum morobo mana pet abo tatalien deek kaluluonin idi rue idi ra werwere abo tatalien deek ke mum ma tabo ölet e God kö bung nang ine irabo wanot könan.

<sup>13</sup> Mum morobo mana ii ölik e mum köbo sisila xirip mera xö pu, möxösa, a Orong i maaaa bere mum morobo to bira. Mum morobo ii ölik e mum kö sisila raxin mera xö pu ewe nang i taxin köbo sisila xabise.

<sup>14</sup> Me mum morobo pet bira bölök köbo mangana sisila nang ine ixo tile idi rua ömaso ewe idi nang te pet magingin saban ma rua ölelet idi nang te pet a tatalien deek.

<sup>15</sup> Mum morobo pet bira, möxösa, God i maaaa bere mum morobo pet a tatalien deek kalik. Io niang, mum morobo tuu wi abo tinenge tataun kö nangadi baulang.

<sup>16</sup> Mum morobo mana kis xarnang abo nangadi ewe idi nang te langlanga xalik abo warkurai, nexalik ganim bere mum mo tengen bere mum mo langlanga bira, io niang, a laa tataun mon nang bara u pet a sasaban. Kaim. Mum morobo kis xarnang abo tultul kö pu xö God.

<sup>17</sup> Mum morobo mana ii a nangadi xirip. Mum morobo isik a abalamu re mum urungan köbo tönö e mum kölöme re Kraiss. Mum morobo mana ii öraxin e God, me mum morobo ii a sisila raxin.

<sup>18</sup> Me mum abo tultul, mum morobo mana ii ölik e mum urungan köbo orong ke mum arixe ma wariru raxin. Ma ganim bara u pet bira rö idi xalik ewe idi tobo isik a abalamu ma tobo dedeek urungan te mum. Inexalik mum morobo mana pet bölök bira rö idi nang tobo ögarin e mum.

<sup>19</sup> Nang bara öng i kobo pet te önga sasaban, nexalik ine i maras bara God i maaaa bara ine irabo ömaraxen lo mon bara irabo sölök inabo kinadik na, io, ina mangana tatalien i öaxanan e God.

<sup>20</sup> Nang bere idi te dangat a öng, möxösa, ine i pet abo sasaban, mum mo döxömen bara tabo ölet ine? Kaim. Inexalik nang bere idi te ögarin e mum ulamun a tatalien

deek ke mum, me mum mo ömaraxen lo rua sösölök lo ina kinadik na, io, ina tatalien i öaxanan e God.

<sup>21</sup> Me God ixo kuwe e mum pua talien bira, möxösa, e Kraiss ixo kip a kinadik kua gene mum, ma ixo osten a to rine xarnang a önga malalar rue mum pa wawas muu abo ngasiene xexene.

<sup>22</sup> *Me ine kaim kö wewet te önga sasaban, ma kaim pe tinenge töxö ixo su xalik a ngalna.*

<sup>23</sup> Ma nang idi toxo rengrengen ögarin ine, ine belek kaim kö tengen ögarin idi. Ma nang ine ixo sölök ina kinadik, kaim ine xo tengen bara irabo ögarin idi. Kaim. Ine ixo isik öbaling ine iat kö limine e God ewe nang ibo wewet abo töxödös ne warkurai.

<sup>24</sup> Ine iat ixo sölök abo magingin saban te ire xö aine lömö xö öxöno sölöxöröp, io nang, ire tabo eöt tua nuan talu abo sasaban me ire tabo to muu a tatalien töxödös. Me ire tabo langlanga xöbo xexen möxö minet te ine.

<sup>25</sup> Mum moxobo önan lelebes xarnang abo sipsip, nexalik na im mum muru tawuxus baling pösöt ewe ibo werwere muu abo tano mum xarnang önga tene balaure sipsip.

### 3

#### *Abo une alolo ma tödi alolo*

<sup>1</sup> Ma biringan bölök ke mum abo une alolo, mum morobo mana ii ölik e mum iat köbo tödi re mum. Ma nang bara rebo dauleng ke idi tokobo nunu xö tinenge re God, ganim e mum pa pet tinenge rö idi. Abo tatalien te mum kalik mon irabo silien idi rua nunu,

<sup>2</sup> möxösa, idi tabo pere abo to mamaran ma tatalien ne ii ölik e mum urungan tö idi.

<sup>3</sup> Ma ganim bere mum mo usige abo aimum pua winara mamaran. Ganim bere mum mo ömar köbanin abo bebene öxöm mum, ma bere mum mo usige mabo lalaa toxo pet ma gol, ma bere mum mo usige mabo mangana man deek.

<sup>4</sup> Inexalik, mum morobo mana ömar öbaling e mum kölöme xöbo to re mum. Mum morobo ii ölik e mum iat me mum morobo abo une ödödö. Ina mangana mariris i karabo wan pes, me God irabo perexulen bara a marana i kaa xöba.

<sup>5</sup> Abo une mamaran mee mesila saxit ewe idi toxo nunu re God, idi toxobo usige idi bölök iat bie. Idi toxobo ii ölik idi iat köbo usuono idi.

<sup>6</sup> Me Sera ixo bie bölök. Ine ixo muu eörin a tinenge re Abaram ma ixo tengen ine bara a orong ke ine. Me mum abo balixilik ke Sera nang bere mum mo pet abo dedeek ma nang bere mum kobo burin te laa.

<sup>7</sup> Ma i xarnang bölök bie re mum abo tödi alolo. Nang bara mum mo xisixis arixe mabo une re mum, mum morobo mana ösöxö ödeek bara a lölös se idi i kobo eöt ma re mum, möxösa, idi a balixilik. Mum morobo mana ii abo une re mum, möxösa, God ixo balamu idi xarnang e mum me idi tabo unan a to ulorexe eöt me mum. Mum morobo mana pet bira, xalik kebo lalaa irabo tuu wi abo siniseng ke mum.

*A kinadik möxöbo tatalien deek*

<sup>8</sup> Io, rua öxöwöm a tinenge re e, mum kirip morobo mana kis arixe ma önga mangana dinödöm kalik mon, mum morobo örasen abo tiip pe idi nang kabise, morobo mamaa ulamun abo tök ma saxak ke mum kölöme re Krai, morobo marse a öng kabise, ma morobo ii ölik e mum kö öng kabise.

<sup>9</sup> Ganim e mum pa babalu öbaling a saban arixe ma sasaban. Ma ganim a rengrengan ögarin idi ewe te tengen ögarin e mum. Ma lamun mum morobo seseng bara God irabo tabaa idi ma dedeek, möxösa, nang e God ixo kuwe e mum, ine ixo kubus se mum bere ine irabo tabaa e mum ma dedeek.

<sup>10</sup> Ma möxösa a tinenge re God i tengen bira,  
*“Ewenene re öng i mamaa rua axanan ma to re ine,  
 ma i mamaa rua werwere abo bung deek,  
 io, ine irabo mana balaure ödeek a kamene xalik abo tinenge  
 saban  
 ma ngalana xalik abo tinenge atöxö.”*

<sup>11</sup> *Ine irabo mana tawuxus xalik a sasaban ma irabo mana  
 pet kalik mon abo dedeek.  
 Ine irabo mana kis ma bala malum ma irabo lölös sik kua  
 kinis xarna niang.*

<sup>12</sup> *Ruasa, möxösa, a Orong ibo werwere muu idi nang a lak  
 töxödös  
 ma ibo ölangen abo sineseng ke idi,  
 nexalik bara a Orong ibo ruruu talu ewe nang i pet sasaban.”*

<sup>13</sup> Io, me ewenene re öng irabo ögarin e mum nang bere mum mo lölölös sa wewet a dedeek?

<sup>14</sup> Inexalik nang bere mum mo örasen a kinadik möxöbo tatalien töxödös, irabo deek kö mum. “Mum bele buburin idi nang te ubuut e mum. Me mum bele dödödöm oleleng.”

<sup>15</sup> Ma lamun mum morobo mana bulus ösila iat e Krai köbo to re mum bere ine a Orong ke mum. Ma xöbo bungbung kirip, mum morobo mana tagure bulus sik abo tinenge rua babalu idi nang tabo ose e mum bara a unine a sa mum mo xixiset ma nunu ulamun abo lalaa deek meringan te God.

<sup>16</sup> Inexalik, nang mum morobo balu idi, mum morobo mana ii ölik e mum kö idi xarnang abo nangadi ödödö. Mum morobo wewet mon abo lalaa nang mum mo ösöxö

bara lak deek. Mum morobo mana to biringan rue idi ra minenge nang idi te tengen ögarin e mum köbo tatalien deek nang mum mo pet tua mumuu e Kraiss.

<sup>17</sup> Nang bara mum morobo örasen a kinadik möxöbo tatalien saban nang mum moxo pet, ina na i deek aulik. Ma lamun nang bara e God i maaa bere mum morobo örasen a kinadik möxöbo tatalien deek mum mo pet, ina na i deek köba.

<sup>18</sup> Ruasa, möxösa, e Kraiss ine a tene töxödös, ma ixo met kö önga axana bung kalik mon, lamun e mum nang kaim bara abo tene töxödös, rua silien e mum urungan te God. Ine a tödi mon nang toxo sexomet ine. Ma lamun ixo to baling kö tanono.

<sup>19</sup> Möxö ina na, ixo wan ma ixo palas tinenge urungan köbo tano nang te kis kö gunon ne aömokorot.

<sup>20</sup> Ma inabo tano niang, idi tokoxobo tame e God nang e God ixo kis xiset idi ma balawapat kinabo bung niang nang e Noa ixo pet a mön taxin tine. A ulik ne nangadi mon toxo kis kina mon. A pitnö ma narun idi, me God ixo öro idi xö ari.

<sup>21</sup> Ma ina ari, ine a malalar möxö tatalien ne baptais nang i öro e mum na. I kara gis tewe a biling möxö aim mum. Kaim. Ine a atöngösen maras bara mum mo ösöxö bara mum a lak töxödös kö wawara xö God. Ma ina tinaru kaa re Jisas Kraiss ewe nang i ölölös a tatalien ne baptais sa öro e mum.

<sup>22</sup> Me Kraiss ine ewe nang ixoro wan kaa uruso xö watmaep ma i kisisik kö kinis taxin möxö lime tuun te God. Mabo angelo mabo mangana tene warkurai kirip, mabo sisila idi te kis kö pu xö ene lölös sine.

## 4

### *Ire tabo döxömen taun abo tatalien me lorexe*

<sup>1</sup> Kraiss ixo örasen a kinadik kö aine ine. Lamun ina na, mum bölok morobo mana tagur sik e mum arixe mina mangana dinödöm pe Kraiss, möxösa, ewe nang iri örasen a kinadik kö aine, ine irabo wan talu a maaa rua wewet a tatalien saban.

<sup>2</sup> A tödi xarna na i karabo muu abo maaa möxö nangadi mon ewe nang te xisixis sa xö pu. Kaim. Irabo kis muu a maaa re God.

<sup>3</sup> Iri ömat im a axana bung nang mum moxobo mumuu a maaa xöbo tabuno nunu. I kobo deek bere mum morobo pet öbaling bira. Mum moxobo mumuu a tatalien ne ilawa mabo mangana maaa saban. Mum moxobo ininim. Me mum moxobo önan etok bölok kua ininim ma rua ilawa

ma rua xukup nana. Me mum moxobo wewet lotu xöbo petpuo, ma ina tatalien nang ire te mimixenin na.

<sup>4</sup> Ma na im, abo tabuno nunu idi te wuwus bere mum kaim kö tinuu arixe midi kölöme xina tatalien axe ridi. Io nang, idi te tengen ögarin e mum.

<sup>5</sup> Ma lamun idi tabo tuu xö warkurai xö wawara xö Tene Pet Warkurai ewe nang irabo kure a nangadi to ma a nangadi minet. Ma irabo ugut idi bara tabo tengen ösu a tatalien saban te idi.

<sup>6</sup> Ma i turunon bara a nangadi tabo met, möxösa, God i bulus warkurai bara a nangadi xirip tabo met. Ma lamun a unine bara ewe idi nang toxoro met idi toxo ölangen a tinenge maras ulamun a tinenge deek, bara idi tabo to xöbo tanono idi xarnang e God ibo roro bie.

*Ire tabo rörön deek arixe mabo arabaa meriso re God*

<sup>7</sup> Io, a öxöwöm möxöbo lalaa xirip iri lörörö im, io, abo dinödöm pe mum irabo mana maras, me mum morobo balaure ödeek e mum, rue mum pa sineseng.

<sup>8</sup> Ma a laa raxin bara mum morobo mana ebalamu kaluluonin e mum iat ma turunon, möxösa, nang bere nöngön u balamu a öng, nöngön ökorobo döxömen lo abo tatalien saban ine ixo pet.

<sup>9</sup> Mum morobo ömaraxen ölaxa a nangadi xabise urungan kölöme xöbo gunon te mum, ma morobo balaure ödeek idi, me mum mo korobo ngunungun bere mum mo pet bira.

<sup>10</sup> Mum morobo rörön arixe mabo arabaa nang mum öngöng moxo kip pua rorop a dauleng kabise. Me mum morobo rörön deek arixe ma inabo mangana arabaa möxö abalamu nang e God ixo isik.

<sup>11</sup> Nang bara öng i kip lo a arabaa möxö tinenge, ine irabo mana wöwörö xarnang bere e God i wöwörö. Ma nang bara öng i kip lo a arabaa möxöbo rorop, ine irabo mana rorop arixe ma lölös nang e God ixo tabaa ine min. Mum morobo mana rörön bira rue idi ra ölelet e God lamun abo lalaa xirip nang mum bo wewet kö kinis se mum kölöme re Jisas Kraïs. Ine a öng nang i uruoxe a mariris ma a lölös ulorexe saxit. Amen.

*Abo kinadik möxöbo Kristien*

<sup>12</sup> Io, abo ais deek ke e, ganim e mum pa wuwuwus lamun abo kinadik lölös nang i könönöin e mum. Kaim pe önga mangana laa maxat iri wan pösöt e mum.

<sup>13</sup> Ma lamun mum morobo mana axanan bere mum muru laxa kölöme xöbo kinadik ke Jisas, rue mum pa axanan köba nang a mariris se ine irabo ot maras.



<sup>14</sup> Nang bere idi te tengen ögarin e mum, möxö mum mere Kraiss, irabo deek kö mum, möxösa, a Tanono e God ma mariris se ine i kis lömö re mum.

<sup>15</sup> Ma lamun kalik e mum bo kip a kinadik möxö tatalien ne inarsexomet, bara wuwulo, bara a tatalien ne lexe warkurai, bara a magingin ne öxadik a to xö dauleng kabise.

<sup>16</sup> Nang bere mum mo kip belek a kinadik, möxösa, mum abo Kristien, ganim e mum pa minenge. Kaim. Mum morobo ölet e God bara mum mo kip a esene Kraiss.

<sup>17</sup> Ruasa, möxösa, a axana bung iri wanot im bara a marapun te God tabo tuu xö warkurai. Ma nang bara i araun ta inot pösöt ire xarna na, mum mo döxömen bara irabo bule rue idi nang idi tokoxobo tame a tingenge deek ke God?

<sup>18</sup> I xarnang a tingenge re God toxo geet i tengen,  
*“Nang bara i lölös köba xöbo tene töxödös bere idi tabo kip a ineöro,  
 irabo bule xöbo tene sasaban ewe idi te tuu talu e God?”*

<sup>19</sup> Io nang im, ewe idi nang te kip a kinadik eöt ma mamaa re God, idi tabo mana isik öbaling idi iat kö limine ewe nang ixo uxis idi ma ibo wewet eörin abo xuxubus se ine, me idi tabo mana wewet iat a tatalien deek.

## 5

### *Ire tabo nangadi ödödö kaluluonin abo kinadik*

<sup>1</sup> Mum abo sisila ne lotu, e bölök önga sisila ne lotu xarnang e mum. E xo pere abo kinadik ke Kraiss me e bo rengrengen ösu ulamunon. Me e a öng nang arabo kip lo bölök ina mariris nang irabo wösö.

<sup>2</sup> Io niang, e seng e mum pua werwere muu a nangadi re God kaluluonin e mum xarnang abo tene balaure sipsip nang tobo balbalaure abo sipsip pe idi. Mum morobo mana mamaa rua balbalaure idi xarnang e God i mamaa bere mum morobo pet bira. Ganim e mum pa balaure idi xarnang bara öng mon i ugut e mum. Ma ganim e mum pua balaure idi rua gene tuluwok mon. Inexalik mum morobo balaure idi xarna na, möxösa, mum mo axanan köba bere mum morobo pet bie.

<sup>3</sup> Ganim bere mum mo döxömen öraxin e mum pua kure ölölös a nangadi nang e God ixoro isik ke mum pa balbalaure idi. Inexalik bara abo tatalien te mum irabo xarnang a malalar deek ke idi abo sipsip pua mumuu xarnang abo sipsip tobo wewet bie.

<sup>4</sup> Ma xö axana bung nang a Sisila ne Tene Balbalaure Sipsip irabo ot wösö, mum morobo kip lo a mariris, xarnang a bubuan deek nang i karabo wan tup tewe a mariris möxönan.

<sup>5</sup> Ma i xarnang bōlōk ke mum abo baroxorok guama. Mum morobo mana ii ölik e mum iat köbo sisila ne lotu. Me mum kirip morobo ii ölik iat e mum kaluluonin e mum, möxōsa, a tinenge re God i tengen bira,  
*“God irabo tuu wi idi nang tobo ölolot idi iat, inexalik ine irabo top tataunin ewe idi nang tobo ii ölik idi.”*

<sup>6</sup> Möxō ina na, mum morobo mana ii ölik e mum iat kö ene lölös möxō limine e God, bara irabo ii öraxin e mum kö axana bung eöt ma a maaaa re ine.

<sup>7</sup> Ma abo lalaa nang mum bo dödöm köba ulamunon, io, mum morobo mana isik tewe inabo tapunuk kirip pe mum urungan te ine, möxōsa, ine ibo dödödöm köba rua balaure e mum.

<sup>8</sup> A dinödöm pe mum irabo mana maras, ma morobo tagur sik! A iuō re mum, nang e Satan, i xarnang önga laion i rörö nana ma i wawara siwin te öng kua xönxönöm kudunin ine.

<sup>9</sup> Inexalik mum morobo tuu lölös sik kö nunu re mum ma morobo tuu wi sik ine bira, möxōsa, mum mo ösöxö bara ra xö öxöno lagunon abo töm mum kölöme re Kraiss te örasen inabo mangana kinadik na bōlōk.

<sup>10</sup> Ma lamun a kinadik i karabo kis ömat me mum, ma melamu God, ewe nang ine a unine möxō inabo abalamu xirip, irabo top e mum. Ine ewe nang ixo kuwe e mum pua nilaxa xö mariris se ine nang i kis ulorexe saxit kölöme re Kraiss. Me ine irabo ömaxat öbaling e mum, ma irabo ölölös e mum bere mum morobo tuu dik sik.

<sup>11</sup> Ine xalik mon nang i uruoxe a lölös ulorexe saxit. Amen.

*Pita ixo öxaxat idi ma ixo öga idi*

<sup>12</sup> E geet ina uk ginigeet na arixe ma rorop pe Sailas, a tönö ire kölöme re Kraiss, nang e perexulen bara ibo mumuu abo tatalien turunon. E maaaa ra öxaxat e mum me e maaaa ra rengrengen ömaras bara ina tinenge na a abalamu turunon te God. Mum morobo mana tuu lölös sik könan.

<sup>13</sup> A nangadi ne lotu na kölöme Babilon ewe nang e God ixoro pere kos idi arixin me mum, idi te tile a tinenge ne aöga urungan te mum. Me Mak, a barok ke e, i tile bōlōk a tinenge ne aöga urungan te mum.

<sup>14</sup> Mum moro eöga kaluluonin e mum iat arixe ma abalamu raxin.

A malum urungan te mum kirip ewe mum nang mo kis kölöme re Kraiss.

## A Sese Öninöng ne Ginigeet te PITA

A oleleng nebo tene ausu röxröxö idi toxo mamaa rua ögarin a lotu arixe ma a tatalien saban te idi ma abo atöxö re idi. Pita ixo ötumarang abo Kristien bara idi tabo ebalaure ödeek kalik inabo nangadi saban tabo lamus ölelebes idi (pere 2 Pita 2:1-22). Pita ixo öxaxat idi bere idi tabo muu abo tatalien deek kalik mon (1:3-11). Ma ixo ösöxö sik bara lörörö im irabo met (1:12-15) ma ixo ödöxömen lo öbaling idi bara a tinenge deek nang idi toxo kip lo i turunon ma bara Kraiss irabo tawuxus baling. A inöno e God tiso xö maii (Mak 9:2-8) ma abo tinenge möxöbo propet i öturunon bere Jisas irabo tawuxus (2 Pita 1:16-21). Io, kaim pe laa bara dauleng te tengen bere Kraiss i karabo tawuxus (3:3-6). **Ire tabo mana kis xiset a inuan ot te ine (3:8-15) ma tatalien deek, me ire tabo ebalaure xöbo tene ausu röxröxö (3:14-18).** Ma ina na a unine ina ginigeet na.

<sup>1</sup> E, e Saimon Pita, önga aposol ma önga tene tinam kö tinörön te Jisas Kraiss nang i isik ke e. Me e geet ina tinenge na urungan te mum ewe mum moxo kip lo a nunu nang a marana i kaa xarnang a nunu re mem, möxösa, a Tene Aöro re ire, e Jisas Kraiss, a God te ire, i töxödös sua wewet bira.

<sup>2</sup> Io, e seseng bara a abalamu raxin ma malum irabo kis arixe me mum meringan kölöme xö nanase re mum ulamun e God me Jisas, a Orong ke ire.

### *Ire tabo mana ngarau rua wewet abo tatalien deek*

<sup>3</sup> Ine iat e God, ma meringan kölöme xö lölös se ine, iri tabaa ire ma abo lalaa nang ire te sasaxan ulamunon tua roro muu ödeek ine mabo tatalien deek, möxösa, ire te ösöxö sik ine ewe nang ixo kuwe ire. Ma meringan kölöme xö mariris ma xö tatalien deek ke ine, ixo kuwe ire

<sup>4</sup> ma ixo tabaa ire mabo lalaa nang i taxin saxit ma a lak mamaran niang ixoro kubus sik bara irabo tabaa ire min, bara mum morobo talien ma morobo to xarnang e God, me mum morobo ulo xalik a mangana kinis möxö ina öxöno lagunon nang ibo maxus ma i irabo kawam, a kinis nang ibo önan ot meringan kölöme xö tatalien ne mamaa saban.

<sup>5</sup> Möxö ina na, mum morobo mana lölös köba rua bulbulus arixin abo tatalien deek ma nunu re mum. Ma

ganim bere mum mo pet abo tatalien deek kalik mon. Mum morobo muu bölök abo dinödöm deek.

<sup>6</sup> Ma i kobo deek bere mum morobo muu abo dinödöm deek kalik mon. Mum morobo balaure ödeek bölök abo maaa re mum. Ma nang bara mum bo balbalaure abo maaa re mum, i deek bere mum morobo tuu lölös bölök kölöme xöbo tiip. Ma ganim bere mum mo tuu lölös kalik mon köbo tiip. Mum morobo laxa bölök kö tatalien möxö mumuu ödeek e God.

<sup>7</sup> Ma xö tatalien möxö mumuu e God, mum morobo kip ölaxa bölök a tatalien möxö narön tunon tua isik exulasin abo dedeek ke mum. Ma xö tatalien möxö narön tunon, mum morobo mana bulus arixin ine ma abalamu.

<sup>8</sup> Mum mo ösöxö e Jisas Krais, a Orong ke ire. Ma nang bara inabo mangana tatalien tobo önan kaa kölöme xöbo to re mum, mum morobo eöt tua ino ma rua tinörön deek, möxösa, mum mo ösöxö sik ine.

<sup>9</sup> Ma lamun nang bara inabo mangana tatalien na i kobo kis kölöme xö to xö öng, ine i xarnang a önga pulo nang i kara wawara deek. Iri döxömen taun bere Krais ixo gis tewe abo tatalien saban nang ixo pet mesila.

<sup>10</sup> Io nang, abo töke kölöme re Krais, mum morobo mana rörön lölös sua osen bara i turunon bere God ixo kuwe e mum ma ixo pere kos lo e mum. Nang bere mum morobo muu inabo tatalien, mum korobo iuo,

<sup>11</sup> me God irabo öaxanan lo e mum rua sinöLöng kö kingdom nang i karabo kawam, ina kinis niang möxö Orong ke ire ma a Tene Aöro re ire, e Jisas Krais.

### *A tinenge möxöbo propet*

<sup>12</sup> Io niang, e maaa bara e rabo ödöxömen sösöxöin e mum lamun inabo lalaa na. I turunon bere mum mo ösöxö sik ina niang me mum bo tuu lölös sik kölöme xö tinenge runon nang i kisisik ke mum. Ma lamun e rabo ödöxömen iat e mum.

<sup>13</sup> Nang e xisixis iat bang ma lewene aike, e döxömen bara i töxödös bara e rabo öraru abo dinödöm pe mum pua dödöxömen inabo lalaa,

<sup>14</sup> möxösa, e ösöxö sik bara iri lörörö im bara e rabo gan sik ina lewene aike xö minet, xarnang e Jisas Krais, a Orong ke ire, iri ömaras sik biringan ura rö e.

<sup>15</sup> Me e rabo rörön lölös bara mum morobo eöt tua döxömen sösöxöin lo inabo lalaa melamu nang e rabo wan tewe xalik e mum.

<sup>16</sup> Nang e mem moxo tengen te mum bara Jisas Krais, a Orong ke ire, irabo wanot baling arixe ma lölös, mem kaim kö mumuu abo pii töxö nang a nangadi mon toxo paraa

arixe mabo dinödöm nanase re idi. Kaim. Mem moxo pere a mariris taxin te ine ma mara mem.

<sup>17</sup> Me God a Tamana ixo ii öraxin ine xö ina axana bung nang God ewe nang i lölös saxit, ixo tengen bara, "Ine ano Barok ke e. E mamaa lamun ine ma ibo isik a axanan taxin te e."

<sup>18</sup> Meet iat moxo ölangen a inöno öng meriso xö watmaep nang meet moxo kis arixe me ine ruso xö ina maii re God.

<sup>19</sup> Möxö ina na, ire te eöt turunon tua susulo a nunu re ire bölök kölöme xöbo tinenge möxöbo propet. I deek bara mum morobo tame ödeek abo tinenge re idi. Abo tinenge re idi i eöt ma önga bibio i mararang kö xönö ködö. Mum morobo mana tame abo tinenge bira, ot nang a körörö irabo tawalang ma bara a tii möxö puxu i maras ot kölöme xöbo to re mum.

<sup>20</sup> E mamaa xöba bara mum morobo maras ulamun abo tinenge möxöbo propet niang i kis kölöme xöbo tinenge re God nang toxo geet. Inabo propet tokoxobo palas abo unine möxöbo tinenge meringan kölöme xöbo dinödöm iat te idi.

<sup>21</sup> Kaim pe tinenge ne propet i kara wanot tataun lo mon köbo dinödöm kö nangadi, inexalik a nangadi toxo rengrenge meriso re God nang a Töxödös ne Tanono iat ixobo sisilien abo dinödöm pe idi.

## 2

### *Abo tene ausu röxröxö tabo iuo*

<sup>1</sup> Ma lamun abo propet töxö toxo wöwörö kaluluonin a marakörö mee Israel mesila xarnang abo tene ausu töxö tabo ot bölök kaluluonin e mum. Idi tabo bulus ölaxa suxume abo inausu töxö nang irabo ögarin esexerein a nangadi. Me idi takarabo pet ina na xalik mon. Idi tabo öös tewe bölök a Orong taxin ewe nang ixo kun ölanglanga idi. Io, tabo muu re mangana ngas bara saxit mon idi tabo iuo esexere xönan.

<sup>2</sup> Ma oleleng ne nangadi tabo mumuu abo tatalien ne ilawa mabo mangana tatalien saban kabise möxö inabo tene ausu töxö. Ma a dauleng ne nangadi tabo tengen ögarin a ngas möxöbo tatalien turunon, möxösa, tabo pere abo magingin möxö inabo tene ausu töxö.

<sup>3</sup> Idi tabo neek a tuluwok ma tabo paraa pii töxö rua xikip a tuluwok ke mum. Ma lamun a ömokorot te idi iri tagur sik mee mesila saxit ma i karabo alilis.

<sup>4</sup> Me God i koxobo öbala abo angelo nang idi toxo pet a sasaban tua ululo rup kalik a ömokorot te idi. Kaim. Ixo tile rewe idi urungan kö xönö möxö ömokorot, ma ixo bulus idi kölöme xöbo mara xödxödö ot nang bere idi tabo tuu xö warkurai.

<sup>5</sup> Ma kaim ine rua öbala bölök abo marakörö mee mesila saxit. Inexalik ixo öro e Noa, ine ewe ixo etöngösen lölös ulamun abo tatalien töxödös. Me God ixo öro ine arixe ma pitnö ma ninöng kabise xina axana bung nang ixo isik ot a xönö ari raxin kö öxöno lagunon, idi ewe nang toxo talu ine.

<sup>6</sup> Ma ixo ömokorot a nine lagunon taxin e Sodom me Gomora, me idu toxo söt kirip. Ma nang ixo pet bira, ixo ötumarang a marakörö ewe nang tobo tuu talu ine.

<sup>7</sup> Ma ixo ölanglanga rewe e Lot, a tene töxödös, ewe nang abo tene takmaluk idi toxo öriip a to re ine arixe mabo tatalien biling ke idi.

<sup>8</sup> (Ina tene töxödös ixo to kaluluonin idi, ma abo bungbung kirip ixo pere ma ixo ölangen abo tatalien ne takmaluk ke idi, ma ina na ixo öriip köbanin a balna.)

<sup>9</sup> Nang bere God ixo pet xarna na, io, nang bara abo ölelewen i wanot urungan kö nangadi ewe nang te mumuu e God, ine i ösöxö bölök kua ölanglanga rewe idi xalik inabo ölelewen. Ma i ösöxö bölök kua balbalaure wi sik abo tene sasaban kölöme xö xönö ne ömokorot ot kö bung möxö warkurai.

<sup>10</sup> Ma turunon saxit bere ine irabo pet bira urungan köbo tene tabuno ölöngö ewe idi tobo ululo muu abo mamaa biling möxö lölös mera xö pu kölöme re idi, ma tobo werwere öbulubun a kinis ne warkurai te God.

Idi abo tene ausu töxö tobo balamasa xöba ma tobo ölolot idi iat, me idi tekara buut tua rengrengen ögarin abo mangana tano.

<sup>11</sup> Inexalik abo angelo nang te taxin köba sik ke idi, tokobo puk idi niang abo tano ma tinge lölös saban tingan kö mamaran kö Orong.

<sup>12</sup> Ma lamun inabo mangana duöng idi te eöt mabo wawaguai nang kaim idi mere dinödöm. Idi te xarnang abo mawak baulang nang te to mon, bara ire tabo eöt tua uxun ma rua sesexomet tewe. Idi tobo tengen ögarin abo lalaa nang idi tokobo ösöxö sik ulamunon. Idi bölök tabo iuo xarnang abo mawak tobo iuiuo.

<sup>13</sup> Idi tere öxadik a nangadi, io nang, idi tabo kip lo a xinuxun ne kinadik. Idi toxo kip lo a axanan bira, bara idi tabo isik kirip a to re idi urungan köbo oleleng ne mangana sasaban te idi nang i xaken sik bang. Idi abo duöng biling te ömenge e mum nang idi te aan arixe me mum ma nang idi te axanan mabo magingin saban te idi möxö lamus öroröxö lo a dauleng.

<sup>14</sup> Idi tobo neneek a balixilik kabise, bara tabo maru arixe min, me idi tekara mamas sua wewet a sasaban. Idi te töxö ögarin tewe a duöng nang te tuu gölgölö sik. Idi te nanase

xöba xö tatalien ne gumut, ma a ngas se idi i önan urungan kö iuiuo.

<sup>15</sup> Idi tere tawes kalik a ngas töxödös ma tere wan tewe nana xö palaa, me idi te mumuu a ngas se Balam, a bak ke Beor, ewe ixo neek a xinuxun möxö tatalien saban.

<sup>16</sup> Ma lamun önga dongki ixo tenge köö ine lamun abo tatalien saban te ine. A dongki baulang ixo tenge arixe ma inöno tödi ma ixo tuu wi a dinödöm baulang kö ina propet.

<sup>17</sup> Ina duöng tobo xarnang a mara möxö ari wuwut nang kaim pe ari xönan. Me idi te eöt ma kubu bölök nang a xiki raxin irabo paxat tewe. God iri tagur sik a kinis se idi ringan ee xö xödxödö raxin.

<sup>18</sup> Xarna niang e re tengen sik bie, idi tobo ölolot tataun mon, ma tobo bulus ot abo mamaa re idi xö tatalien ne ilawa ma xöbo mamaa saban kabise. Me idi te pet bira rua sisilien ömamang abo nangadi ewe idi na mon te urulo rua ililo rewe xalik idi ewe nang te mumuu a ngas möxö saşaban.

<sup>19</sup> Idi toxo kubus urungan kö nangadi bara a nangadi tabo eöt tua langlanga xalik a warkurai, ma lamun idi abo tene ausu töxö iat idi te kis kö ene abo tatalien maxus. Ma i turunon, nang bara a öng i kis kö ene lölös möxö önga laa, irabo tame ine.

<sup>20</sup> I turunon bere idi toxo eöt tua ulo xalik abo tatalien biling möxö öxöno lagunon, möxösa, idi toxo ösöxö sik a Orong ke ire ma a Tene Aöro re ire, e Jisas Krais. Ma lamun melamu im nang bara abo tatalien biling i kubus pi öbaling idi ma te kis kö ene lölös möxö inabo tatalien biling, io, irabo saban köba saxit tö idi. Möxö ina na, a iuiuo re idi melamu irabo saban köba.

<sup>21</sup> Nang bara idi tekexere ösöxö a ngas möxö tatalien töxödös, idi tekexebe iuo xöba. Ma lamun idi tabo iuo saban arixe, möxösa, idi toxo ösöxö sik ine, inexalik bara toxo tawuxus kalik a madakdak ne arile nang toxo kip lo.

<sup>22</sup> Ma inabo tingenge ne rorop i turunon ulamun idi. I tengen bira: "A wuluwun i tawuxus baling urungan kö muro re ine," ma i tengen bölök bara, "A bo nang iri etos sik kö ari, irabo tawuxus baling ma irabo ese ine xö pixak."

### 3

#### *A Orong irabo tawuxus*

<sup>1</sup> Abo ais deek ke e, ina na a sese öninöng ne ginigeet te e urungan te mum. Me e xo geet idu xirip bara arabo ödöxömen e mum, ma irabo öraru lo abo dinödöm pe mum pua dinödöm lamun a dedeek.

<sup>2</sup> E mamaa bara mum morobo döxömen lo abo tingenge möxöbo madakdak ne propet mesila ma ina arile möxö

Orong ke ire, a Tene Aöro, nang abo aposol toxo töngösen e mum min.

<sup>3</sup> Ma a laa raxin e maaaa bara mum morobo mana maras könan, ma i bira: kölöme xöbo axana bung möxö xakawöm, abo tene aösaxit tabo wanot ma tabo muu abo maaaa saban te idi iat.

<sup>4</sup> Idi tabo tengen bara, "Ixo kubus bara irabo wanot baling, goo? Me ine ule im? Abo tamana ire tere met ma lamun abo lalaa xirip i ot iat mon xarnang bira meringan kö urulo möxö öxöno lagunon."

<sup>5</sup> Ma lamun nang idi te tengen bira, idi te mölök kua dödöxömen lo a nang e God ixoro pet. Me lorexe saxit ixo uxis a balna kubu ma öxöno lagunon arixe ma tinenge re ine. Ixo kip lo a ari ma ixo uxis a öxöno lagunon min.

<sup>6</sup> Ma ixo rörön arixe ma ari bölök nang ixo isik a xönö ari raxin tua ögarin a öxöno lagunon kina axana bung.

<sup>7</sup> Ma xö tinenge iat te ine ixo tagure bulus sik a balna kubu ma öxöno lagunon tua ia sösöt, bara idu tabo kis tagur sik kua bung ne warkurai nang a duöng ewe idi te tuu rewe xalik e God idi tabo iuo xönan.

<sup>8</sup> Abo ais deek ke e, mum bele döxömen taun ina laa, bara xö wawara xö Orong, önga bung i eöt ma önga arip ne awat ma önga arip ne awat i eöt ma önga bung mon.

<sup>9</sup> A dauleng idi te döxömen bara a Orong ibo alilis sua öturunon abo xuxubus se ine, inexalik bara kawaim. Ibo balawapat sik ulamun e mum, möxösa, i kobo maa bara re öng irabo iuo. I maaaa bara a nangadi xirip idi tabo dödöm puxus.

<sup>10</sup> Ma lamun a bung nang kö Orong irabo wanot im xarnang önga tene pinilo. A balna kubu irabo kawam tewe ma börbörön taxin. A lölösine lelewi irabo ögarin abo tii nuso lömö. Ma a öxöno lagunon ma abo lalaa xirip möxönan tabo kawam esexere.

<sup>11</sup> Nang bere e God irabo ögarin esexerein inabo lalaa xirip biringan, mum morobo talien bule? Mum morobo mana ömadakdak tewe abo sasaban me mum morobo to muu e God

<sup>12</sup> nang mum mo xixiset ma bung kö God me mum mo öparara a inuanot te ine. Ma nang bara ina bung niang irabo wanot, a ia sösöt irabo ögarin a balana kubu ma a lelewi raxin irabo dek abo tii.

<sup>13</sup> Ma lamun ire te xixiset mabo lalaa ixo kubus sik ulamunon, ma i bira: a balna kubu maxat ma öxöno lagunon maxat, ma tatalien töxödös irabo kis im ee.

<sup>14</sup> Io nang, abo ais deek ke e, mum morobo mana ngarau bara God i karabo parasiwin te sasaban bara biling kölöme re mum, ma morobo kis ma malum arixe mine, möxösa, mum bo xixiset a bung nang inabo lalaa irabo wanot.



<sup>15</sup> Mum morobo perexulen a balawapat kö Orong xarnang bara i sawang a ngas sua isik a ineöro. A ais deek ke mem, e Pol, ixo tengen bölök bira nang ixo gegeet urungan te mum eöt ma nanase nang e God ixo tabaa ine min.

<sup>16</sup> Ma ixo tengen bölök bira xöbo ginigeet kirip pe ine. Ma ixo wöwörö ulamun inabo lalaa na. Ma dauleng nebo lalaa xö ginigeet te ine i lölös se ire rua marmaras ulamunon. Ma a nangadi gölgölö ewe nang kaim idi ma nanase, idi te puxus ögarin abo tinenge re ine xarnang idi tobo wewet bölök köbo tinenge xabise re God. Ma nang idi toxo pet bira, toxo tagure a ngas se idi urungan kö iuiuo re idi.

<sup>17</sup> Abo ais deek ke e, mum morobo mana balaure ödeek e mum, möxösa, mum moro ösöxö inabo lalaa. Mum morobo balaure ödeek, xalik abo tabuno ölöngö tabo silien ögarin e mum me mum morobo subu rewe xalik a tinuu lölös se mum.

<sup>18</sup> Ma lamun mum morobo mana das kölöme xö abalamu xö Orong ke ire ma a Tene Aöro re ire, e Jisas Krais. Me mum morobo mana das kö nanase ulamun ine. Me ire tabo ölet ine na ma xöbo bungbung kirip. Amen.

## A Sisila ne Ginigeet te JON

Jon a aposol ixo geet ina ginigeet. A oleleng ne tene nanase te dōxōmen bere Jon ixo kis so Esia nang ixo geet ina ginigeet ma ixo gegeet urungan kōbo lotu ruso iat Esia. Jon ixo maaaa rua otumarang idi abo tene nunu ulamun abo tene ausu tōxō (pere 1 Jon 2.26) ewe nang toxobo rengrengen bara abo lalaa tabo pere ra xō öxōno lagunon i saban, ma abo lewene aine ire i saban bōlök, ma abo tanono ire i deek. Io nang, idi toxobo rengrengen bara kaim pe laa bara ire tabo pet tebo sasaban kōbo lewene aine ire nang i saban. Me idi toxobo rengrengen bōlök bara Jisas a tōdi mon ine, ma nang ixo met, kaim bara e Kraiss a Barok kō God nang ixo met. Inexalik e Jon i öös tewe abo mangana dinödöm pe idi biringan. I tengen bara nang ire te pet te sasaban, ire te lexe abo warkurai te God (3:4). Ma i tengen bōlök bara a bung barok ke God tekara pet te sasaban (2:28; 3:12). Jon i maaaa bara ire tabo önga balade arixe me God kōlōme xō tatalien maras. Ina na a unine ina ginigeet, bara **abo tene nunu idi tabo mumuu a tatalien möxō maras** (1:5-7). I kobo eöt te öng bara irabo tengen bara iri nunu re Kraiss ma inexalik ibo mumuu abo magingin saban möxō kōdō. Ma lamun ewe a öng i rarama abo warkurai kō God i kisisik kōlōme re God (3:24). Ma a unine ina warkurai te God i bira, bara ire tabo mana maaaa ulamun ire iat ma tabo nunu re Jisas Kraiss a Barok kō God (3:23). Jon ixo maaaa bara ire tabo maras bara ina tōdi niang ine e Jisas (1:1; 4:2-3), ine a Barok kō God bōlök (2:23; 3:23; 4:9-10; 4:14-15; 5:5-13; 5:20), me ine a Mesaia (nang toxo tengen ine bere 'Kraiss'; 2:22; 5:1), ma bere ine iat ixo met tua gene ire bara irabo öro ire (5:4-8). Jon ixo maaaa bara ire tabo maras bere ire tere kip lo ina to ulorexe saxit nang bere ire tere nunu xō Barok kō God (5:13).

### *A Tinenge ne To*

<sup>1</sup> Mem me tōngōsen e mum ma a lasa nang ixo kis sik mesila xō urulo, a lasa nang mem moxo ölangen ma moxo pere ma mara mem. Me mem moxo pere ma moxo sigi ine mabo lime mem. Me ine iat mon ina tinenge möxō to na nang mem me tōngōsen e mum ulamunon.

<sup>2</sup> Ma ina to ixoro wösō me mem me tōngōsen e mum ulamun ina to ulorexe saxit. Mem moxo pere ine me mem

me öturunon ine rö mum. Ine niang nang ixo kis arixe me Mama ma ixoro wösö re mem.

<sup>3</sup> Me mem me töngösen bölök e mum ulamun a lasa nang mem moxo pere ma moxo ölangen, rue mum bölök ka önga balade arixe me mem. Me mem pua önga balade arixe me Mama ma a Barok ke ine, e Jisas Kraiss.

<sup>4</sup> Mem me geet inabo lalaa na urö mum, rue ire ra wöwöwö ma axanan.

*Ire tabo mana önan kö maras*

<sup>5</sup> Io, ina na a tinenge mem moxoro ölangen lo xalik e Jisas Kraiss me mem me töngösen e mum ulamunon, bara God i eöt ma bibio ma kaim arixe re ködö kölöme re ine.

<sup>6</sup> Nang bara ire te tengen bere ire te önga balade arixe me ine, ma lamun ire te önan kö ködö, io, ire te etöxö ma abo tatalien te ire i karabo eöt mabo turunon kö God nang ixoro wösö.

<sup>7</sup> Inexalik nang bara ire te önan kö maras xarnang ine iat i kis kö maras, io, ire te önga balade arixe ma uleng kabise ma a dee re Jisas, a Barok ke ine, i ömadakdak ire xalik abo magingin saban kirip.

<sup>8</sup> Nang bara ire te tengen bara kaim ire mere magingin saban, ire te ösaxit baling iat te ire me ire te döxömen bara ina atöxö i turunon. Inexalik abo turunon kö God i karabo kis kölöme re ire.

<sup>9</sup> Ma lamun nang bere ire te etöngösen maras mabo magingin saban te ire, io, God irabo pet eörin abo kunubus se ine ma irabo pet a tatalien töxödös sua döxömen taun abo sasaban te ire ma rua ömadakdak ire xalik abo magingin kirip nang i kobo töxödös.

<sup>10</sup> God i tengen bara ire tere pet a sasaban. Ma nang bara ire te tengen bara ire tekobo pet te sasaban, io, ire te tengen e God bara a tene atöxö ine ma a tinenge re ine i kobo kis kölöme re ire.

## 2

<sup>1</sup> E geet abo lalaa na urungan tö mum, abo bung barok lixilik ke e kölöme re Kraiss, rue mum pa ganim a wewet tebo magingin saban. Ma lamun nang bara re öng i pet te sasaban, ire ma önga tödi nangen nang ibo wöwörö rua gene ire xö wawara xö God. Me ine e Jisas Kraiss, a tene töxödös.

<sup>2</sup> Me ine iat a arabaa nang ibo ruruu wi a bala laie xö God tua xikip tewe abo magingin saban te ire. Ma kaim bara ine a arabaa rua xikip tewe a magingin sasaban te ire xalik mon. Kaim. Ine a arabaa rua gene magingin saban möxö öxöno lagunon kirip.

*Ire tabo ösöxö bule bara ire te ösöxö sik e God*

<sup>3</sup> Ire te maras bara ire te ösöxö sik e God nang bara ire te tame abo warkurai te ine.

<sup>4</sup> Me ewenene i tengen bara i ösöxö e God, ma lamun i kara muu eörin a warkurai te ine, ine a tene röxröxö ma a turunon kö God i kobo kis kölöme re ine.

<sup>5</sup> Ma lamun turunon saxit, nang bara re öng i tame abo tinenge re ine, i osen bara a mamaa raxin te ine urungan kö God iri wöwö. Me ire tabo ösöxö bule bara ire te kis kölöme re ine? Ma i bira:

<sup>6</sup> Ewenene re öng nang i rengrengen bara ine i kis kölöme re God, ine irabo mana wan xarnang e Jisas ixo pet bie.

<sup>7</sup> Abo ais deek ke e, e kobo geet te warkurai maxat urungan tö mum, ma lamun a warkurai maut mon nang mum moxo kip lo mesila saxit. Ma ina warkurai maut, ine a tinenge nang mum moxoro ölangen.\*

<sup>8</sup> Ma lamun i turunon bere e gegeet bölök a warkurai maxat urungan tö mum. Me ire te maras bara turunon ina warkurai maxat, möxösa, ire te pere xöbo to re Jisas me mum. Ma i maras bira, möxösa, a xödxödö iri eka xaköwöm ma a bibio runon iri marmaras.

<sup>9</sup> Me ewenene nang i tengen bara i kis kölöme xö maras, nexalik bara i mimixenin a tönö ine kölöme re Kraiss, ine nangen nang kö xödxödö.

<sup>10</sup> Me ewenene nang i mamaa lamun a tönö ine kölöme re Kraiss, ine ibo xisixis kölöme xö maras ma kaim pe sasaban kölöme re ine nang bara irabo ösubu ine.

<sup>11</sup> Ma lamun ewenene re öng i mimixenin a tönö, ine i kisisik kö xödxödö ma i önan eli nana xö ködö. Ma i kobo ösöxö a xönö nang i önan ne, möxösa, a xödxödö ixoro öwulo a nine marna.

<sup>12</sup> Abo baroxorok ke e, xö esene e Kraiss, God ixoro döxömen taun abo magingin saban te mum, io niang, e gegeet ina tinenge na urungan tö mum.

<sup>13</sup> E gegeet urungan tö mum, abo duöng tataxin möxö lotu, möxösa, mum mo ösöxö ine ewe nang ixoro kis sila xö urulo möxö öxöno lagunon.

E gegeet urungan tö mum, abo guama, möxösa, mum moxo erese me Satan a tene saban, ma moxoro kawönö ine.

<sup>14</sup> E gegeet urungan tö mum abo baroxorok lixilik möxösa, mum mo ösöxö e Mama. Me e gegeet urungan tö mum abo ötaxin, möxösa, mum mo ösöxö ine ewe nang ixoro kis sila xö urulo möxö öxöno lagunon.

Me e gegeet urungan tö mum abo guama,

\* **2:7** Ina warkurai bira: "Ire tabo mana mamaa ulamun ire iat." Pere 3:11; Jon 13:34-35.

möxösa, mum mo lölös sik bira:  
 a tininge re God ibo xisixis kölöme re mum,  
 me mum moxo erese me Satan ma moxoro kawönö ine.

*Ire tebele maaaa ulamun abo tatalien möxö öxöno lagunon*

<sup>15</sup> Mum bele maaaa ulamun abo tatalien mabo lalaa möxö öxöno lagunon. Ma nang bara re öng i maaaa ulamun abo tatalien mera xö öxöno lagunon, io, ine i kobo maaaa ulamun e Mama,

<sup>16</sup> möxösa, abo lalaa xirip möxö öxöno lagunon, abo maaaa saban, abo a neek saban, ma abo tatalien ne aölolot, idi tokobo wanot meriso re Mama. Kaim. Idi te wanot mera xö öxöno lagunon.

<sup>17</sup> Ma öxöno lagunon i ka xakawöm, arixe mabo lalaa nang a nangadi tobo maaaa ulamunon. Ma lamun ewenene nang i pet eörin a nang e Mama i maaaa ulamun, ine irabo kis kö to ulorexe saxit.

*Abo iuo re Kraïs*

<sup>18</sup> Abo baroxorok ke e kölöme re Kraïs, a na a axana bung möxö xakawöm. Ma xarnang mum moxoro ölangen sik bara abo iuo re Kraïs tabo wanot, ma na iat a oleleng ke idi toxoro baa wanot. Io, lamun ina na ire tere ösöxö xulen bara na a xaköwöm.

<sup>19</sup> Idi toxo wan tewe xalik ire, ma lamun kaim bere idi mere ire runon. Inexalik nang bara idi runon mere ire, idi tekexebe eöt tua nuan tewe xalik ire. Ma lamun a inuan tewe re idi, i osen bara idi xirip tokoxobo mere ire.

<sup>20</sup> Inexalik, a Öng Nang a lak Madakdak ixoro tabaa e mum ma Töxödös ne Tanono, rue mum kirip pa ösöxö a sa i turunon.

<sup>21</sup> Rösa me e gegeet urungan te mum? Möxösa kaim bara mum kobo ösöxö inabo turunon, nexalik bara mum mo ösöxö sik, ma, möxösa, mum mo ösöxö tuar abo turunon me mum mo ösöxö bara kaim pe atöxö irabo wanot meringan kölöme xöbo turunon.

<sup>22</sup> Ewe ine ina tene atöxö? Ine a öng nang ibo öös ulamun e Jisas bere ine a Mesaia. A önga mangana tödi xarna na, ine a iuo re Kraïs, möxösa, ibo öös ulamun e Mama ma a Barok ke ine bölök.

<sup>23</sup> Ewenene re öng i öös lamun a Barok ke ine, i karabo uruoxe e Mama. Me ewenene nang i aut lo bara e Jisas a Barok kö God, io, ine iri uruoxe e Mama bölök.

<sup>24</sup> Me mum, mum morobo mana öbala lo ina tininge nang mum moxoro ölangen lo xö urulo bara irabo mana kis kölöme re mum. Nang bara ina tininge nang mum moxoro ölangen kö urulo ibo xisixis kölöme re mum, io, mum bölök morobo kis kölöme re Mama ma Barok ke ine.

<sup>25</sup> Ma a kunubus nang ine iat ixoro isik kö ire, a to ulorexe saxit.

<sup>26</sup> E geet inabo lalaa urungan tö mum ulamun idi nang ewe te maaaa rua silien ölelebes e mum.

<sup>27</sup> Me mum kobo sasaxan bara re öng irabo usu e mum mere laa, möxösa, e Krai ixoro tabaa e mum ma Töxödös ne Tanono me ine ibo xisixis kölöme re mum ma ibo usu e mum mabo ausu re ine ulamun abo lalaa xirip, ma ina ausu i turunon ma i kobo töxö. Lamun ina na, mum morobo mana kis kölöme re Krai xarnang a Tanono ibo usu e mum bie.

*Abo baroxorok ke God takarabo pet a magingin saban*

<sup>28</sup> Io, abo baroxorok ke e kölöme re Krai, mum morobo mana kis kölöme re Krai, rue ire ra balamasa nang bara ine irabo wösö, me ire tekebeöt ta minenge xö wawara re ine xö ina bung nang ine irabo wanot.

<sup>29</sup> Nang bere mum mo ösöxö bara Krai, ine a tene töxödös, mum mo ösöxö bölök bara ewenene re öng nang ibo wewet tatalien töxödös, ine a önga bak kö God.

### 3

<sup>1</sup> Pere bang! A maaaa raxin nang e Mama ixoro tabaa ire min! Io, lamun ina na, i tengen bara ire a bung baroxorok kö God. Ma ina na i turunon. A öxöno lagunon i koxobo ösöxö xulen ire, möxösa, i koxobo ösöxö xulen bölök e God.

<sup>2</sup> Abo ais deek ke e, ire na im abo baroxorok kö God. Ma lamun i kela osen ire bang bara ire abo mangana nangadi bule nang Krai irabo wösö. Inexalik ire te ösöxö bara ire tabo kis xarnang ine, möxösa, irabo wanot maras urö ire bara a mangana tödi bule runon ine.

<sup>3</sup> Me ewe re öng ibo xixiset arixe ma nunu bara irabo kis iat xarnang e Krai ixo bie, io, ina tödi ibo ömadakdak a to re ine xarnang e Krai bölök i madakdak.

<sup>4</sup> Ewenene re öng i pet sasaban, i uli abo warkurai te God. Ma abo magingin saban, i eöt xarnang a magingin möxö uli warkurai.

<sup>5</sup> Me mum mo ösöxö bere Krai ixo wanot tua xikip tewe abo magingin saban. Ma kaim pe sasaban i kis kölöme re ine.

<sup>6</sup> Kaim pe öng nang ibo xisixis kölöme re ine, ibo wewet sasaban. Ma kaim pe öng nang ibo wewet sasaban ixoro pere ine bara i ösöxö ine.

<sup>7</sup> Abo baroxorok ke e kölöme re Krai, mum moro ebalare deek, xalik ke öng irabo silien ölelebes e mum. Ewenene nang ibo wewet a töxödös, ine a lak töxödös, xarnang e Krai ine a tene töxödös.

<sup>8</sup> Me ewe re öng nang ibo wewet sasaban, ine mere Satan, möxösa, Satan ixo wewet sasaban meringan kö urulo. A unine inot kö Barok kö God, bara irabo ögarin esexerein abo tinörön te Satan.

<sup>9</sup> Kaim pe bak kö God ibo wewet sasaban, möxösa, ine iri kip lo a mangana tatalien kö God kölöme re ine. Me ine i kebeöt tua wewet te sasaban, möxösa, ine a bak kö God.

<sup>10</sup> Ire tabo maras bira, bara ewenene idi abo baroxorok kö God me ewenene idi abo baroxorok ke Satan. Me ewe me idi nang tekobo wewet a tatalien töxödös, bara tekobo maaaa ulamun abo tönö idi kölöme re Krai, idi kaim bara mere God.

*Ire tabo maaaa ulamun ire iat*

<sup>11</sup> Io, ina na a atöngösen nang mum moxoro ölangen lo meringan kö urulo, bara ire tabo mana maaaa ulamun ire iat.

<sup>12</sup> Ganim e mum pa talien xarnang e Kaen. Ine mere ina Tene Saban ma ewe nang ixo sexomet a tönö ine. Ma rösa ixo sexomet ine? Möxösa abo tatalien te ine iat a lak saban ma nang kö tönö ine a lak töxödös.

<sup>13</sup> Abo töke kölöme re Krai, mum bele wuwuwus nang bara a öxöno lagunon i mimixenin e mum.

<sup>14</sup> Ire te ösöxö bara ire tere wan lie a minet ma tere laxa xö to, möxösa, ire te maaaa ulamun abo tönö ire kölöme re Krai. Me ewenene re öng i kobo uruoxe a tatalien ne maaaa, ine irabo kisisik iat kö minet.

<sup>15</sup> Ewenene re öng i mimixenin abo tönö kölöme re Krai, ine a tene inarese ömet. Me mum mo ösöxö bara önga tene inarese ömet i karabo uruoxe a to ulorexe kölöme re ine.

<sup>16</sup> Ire te ösöxö bara a mangana tatalien sa ina tatalien ne maaaa nang te pere bara Jisas ixo isik tewe a to re ine ma ixo met tua gene ire. Io, ire tabo mana tagur sik kua minet tua gene abo tönö ire bölök kölöme re Krai.

<sup>17</sup> Ma lamun ewe nang i unan sik kebo lalaa mera xö öxöno lagunon, ma i werwere a tönö ine kölöme re Krai i sasaxan, nexalik ine i kobo balamu ine, io, turunon saxit a mangana maaaa nang kö God i kobo kis kölöme re ine.

<sup>18</sup> Abo baroxorok ke e kölöme re Krai, ire tebele maaaa ulamun a öng ma tinenge tataun mon te ire. Inexalik ire tabo mana osen kö tatalien te ire urungan te idi bara a maaaa re ire a lak turunon.

<sup>19-20</sup> Nang bara ire ma tatalien ne maaaa bira, ire tabo ösöxö bara ire te xisixis kölöme xö turunon kö God. Ma nang bara ire te tuu xö wawara re ine, a öngöng iat irabo örasen kulen kölöme xö balana ine bara nangen a sasaban. Ma lamun, ire nang te maaaa, ire tabo kis ne balamasa. Rösa, möxösa, God i ösöxö abo lalaa xirip ulamun ire, ma

a nanase re ire ulamun ire iat i kobo eöt ma a nanase re ine ulamun ire.

<sup>21</sup> Abo ais deek ke e, nang bara ire tokobo örasen bara ire ma sasaban, io, ire tabo kis ne balamasa xö wawara xö God.

<sup>22</sup> Me God irabo tabaa ire ma a lasa ire te ose ulamun, möxösa, ire te tame abo warkurai te ine me ire te pet abo lalaa nang i öaxanan ine.

<sup>23</sup> Ma a warkurai te ine ina na, bara ire tabo mana nunu xö esene a Barok ke ine, e Jisas Kraiss, ma bara ire tabo mana maaaa ulamun ire iat xarnang a warkurai te ine nang ixoro isik ke ire.

<sup>24</sup> Me ewenene i tame abo warkurai te ine, ine i kis kölöme xö God me God bölök irabo kis kölöme re ine. Me ire te ösöxö bule bara God i kisisik kölöme re ire? A Tanono nang e God ixoro isik ine urö ire, ibo ömaras ire ulamun ina na.

## 4

### *Ire tabo mana walar abo propet*

<sup>1</sup> Abo ais deek ke e, a oleleng nebo propet atöxö idi toxoro wan nana ra xö öxöno lagunon. Lamun ina na, ganim e mum pa nunu xö nangadi xirip nang idi te tengen bara a Tanono God i töngösen idi ma lalaa. Inexalik mum morobo mana könönöin idi rua ösöxö bara e God ixo isik abo tinenge re idi bara kaim.

<sup>2</sup> Ma i eöt te mum pa werwere xulen a Tanono God kölöme xö önga tödi xöbo tinenge re ine. Ewe re öng i nunu bara e Jisas Kraiss ixo wanot xarnang a tödi ine, ma i etöngösen maras bira, io, mum morobo ösöxö bara a Tanono meriso re God i kis se ine.

<sup>3</sup> Ma lamun ewe re öng i öös tewe e Jisas bira, io, a Tanono meriso re God i kobo kis se ine. Kaim. I uruoxe a tanono möxö iuo re Kraiss. Me mum moxoro ölangen bara abo iuo re Kraiss tabo wanot. Ma turunon, idi ia tere wanot ta xö öxöno lagunon.

<sup>4</sup> Abo baroxorok ke e kölöme re Kraiss, mum mere God me mum moxoro bulus ösu inabo mangana nangadi arixe ma inausu re idi, möxösa, ewe nang i kis kölöme re mum i taxin saxit te Satan, ewe nang i kis kö öxöno lagunon.

<sup>5</sup> Idi mera xö öxöno lagunon. Möxö ina na, idi tobo wöwörö mera xö öxöno lagunon ma öxöno lagunon ibo ölangen idi.

<sup>6</sup> Ire mere God. Me ewenene nang i ösöxö e God, irabo ölangen ire. Ma lamun ewenene nang i kobo mere God, ine i karabo ölangen ire. Xö ina na mon, ire tabo perexulen a Tanono möxö turunon kö God, ma a tanono möxö röxröxö.

*A abalamu re God ma a abalamu re ire*



<sup>7</sup> Abo ais deek ke e, ire tabo mana mamaa kaluluonin ire iat, möxösa, a tatalien ne mamaa, ine meriso lömö xö God. Me ewenene nang ibo mamaa ulamun a öng, ine a bak kö God ma i ösöxö e God.

<sup>8</sup> Me ewenene nang i kobo mamaa ulamun a öng, ine i kobo ösöxö e God, möxösa, abo tatalien kirip pe God, a tatalien ne mamaa.

<sup>9</sup> Me God ixo osen bara i mamaa ulamun ire bira: God ine ma önga Barok kalik mon. Me God ixo tile ösu ine ura xö öxöno lagunon, bara ire tabo kip a to mere ine.

<sup>10</sup> A lasa ina tatalien ne mamaa turunon? Kaim bara ina tatalien na nang ire toxo mamaa ulamun e God. Kaim. Inexalik bara ina tatalien na nang ine ixo mamaa ulamun ire, ma ixo tile ösu a Barok ke ine, ine a arabaa nang ibo ruruu wi a bala laie xö God tua kip tewe abo magingin saban te ire.

<sup>11</sup> Abo ais deek ke e, nang bere God ixoro mamaa ulamun ire xarna na, io, i töxödös bara ire tabo mana mamaa kaluluonin ire iat.

<sup>12</sup> Ma kaim pe öng ixoro pere e God. Inexalik nang bara ire te mamaa kaluluonin ire iat, God irabo kis kölöme re ire ma ina mangana mamaa iat nang ke God irabo kis kölöme xö to re ire.

<sup>13</sup> Ire te ösöxö bara ire te kis kölöme re ine me ine i kis kölöme re ire, möxösa, ine ixoro isik tabaa ire ma Tanono ine.

<sup>14</sup> Me ire toxoro pere me ire toxoro öturunon köbo atöngösen te ire, bara a Mama ixo tile a Barok ke ine bara irabo a Tene Aöro möxö öxöno lagunon.

<sup>15</sup> Ewenene re öng niang i aut bara e Jisas, ine a Barok kö God, God i kis kölöme re ine me ine i kis kölöme re God.

<sup>16</sup> Me ire toxoro örasen me ire te nunu xö ina tatalien ne mamaa re God ulamun ire.

Abo tatalien kirip pe God, a tatalien ne mamaa. Me ewenene re öng ibo mumuu ina tatalien ne mamaa, ine i kis kölöme re God me God i kis kölöme re ine.

<sup>17</sup> Ma nang bere ire te kis bira, a tatalien ne mamaa irabo taxin köba kölöme re ire. Möxö ina na, ire tabo kis ne balamasa kölöme xö bung möxö warkurai, möxösa, ire te xarnang e Kraisa sa xö öxöno lagunon.

<sup>18</sup> Ma nang bere ire te mamaa re ine bira, me ine bölök i mamaa ulamun ire, i kebeöt bara ire tabo buut. Kaim. Ma nang bara ire te mamaa runon te ine, me ine i mamaa runon tö ire, ina tatalien irabo kip tewe ina binuut, möxösa, a binuut i kis arixe ma ömokorot mon. Ewenene re öng i bubuut, ina tatalien ne mamaa i karabo wöwö re ine.

<sup>19</sup> Io, ire te mamaa ulamun ine, möxösa, ine ixo araun ta mamaa ulamun ire. Me ire te mamaa ulamun idi xabise, möxösa, ine ixo araun ta mamaa lamun ire.

<sup>20</sup> Ma nang bara re öng i tengen bara, “E maaaa lamun e God,” ma lamun ine i mimixenin abo tönö ine kölöme re Krai, io, ine a tene röxröxö. Ma i turunon, möxösa, ewe re öng nang i kobo maaaa ulamun a nangadi xabise nang ine ixoro pere idi, i kebeöt bara irabo maaaa ulamun e God, nang kaim ine xo werwere.

<sup>21</sup> Me ire toxoro kip lo a warkurai meringan te ine bira, bara ewe re öng i maaaa ulamun e God irabo mana maaaa bölök ulamun a tönö ine kölöme re Krai.

## 5

<sup>1</sup> Ewenene re öng i nunu bere e Jisas ine a Mesaia, io, ine a barok kö God. Me ewenene re öng i maaaa ulamun a tata irabo maaaa ulamun a barok ke ine bölök.

<sup>2</sup> Nang bere ire te maaaa ulamun e God me ire te pet eörin abo warkurai te ine, ire tabo ösöxö bere ire te maaaa ulamun a bung baroxorok kö God.

<sup>3</sup> Ma nang bere ire te tame abo warkurai te God, i osen bara ire te maaaa ulamun ine. Mabo warkurai te ine i kobo tiip,

<sup>4</sup> möxösa, a bung baroxorok kö God te eöt tua wawas bulus abo magingin saban möxö öxöno lagunon. Ma a nunu re ire iri pas bulus abo magingin saban möxö öxöno lagunon.

<sup>5</sup> Me ewenene re öng i eöt tua wawas bulus abo magingin saban möxö öxöno lagunon? Ewe mon nang i nunu bere e Jisas ine a Barok kö God.

<sup>6</sup> E Jisas Krai ine iat mon nang ixo wanot ta ma ixo kip baptais ma ixo met. Ma nang ixo wanot ta, kaim ine ra kip baptais kalik mon. Kaim. Ine ixo kip baptais ma ixo met bölök. Ma a Töxödös ne Tanono ine ewe nang ibo öturunon ina na ma abo atöngösen te ine, möxösa, ibo rengrenge abo turunon.

<sup>7</sup> Io, a narun idiet ewe nang tobo öturunon e Jisas bara a Barok kö God:

<sup>8</sup> a Tanono, a baptais se ine ma a minet te ine. Me idiet kirip tobo aut arixe.

<sup>9</sup> Ire tobo ömaraxen lo a atöngösen maras kö önga tödi bara i öturunon te laa. Inexalik nang bere e God i öturunon a na ma atöngösen te ine, io, a atöngösen te ine i turunon saxit kö atöngösen kö nangadi, möxösa, ina atöngösen, ine mere God ulamun a Barok ke ine.

<sup>10</sup> Me ewenene i nunu xö Barok kö God, i kip a atöngösen na xö kat te ine. Me ewenene nang i koxobo nunu xö God, i rengrenge e God bara a tene atöxö ine, möxösa, ine i koxobo nunu xö atöngösen kö God, xarnang ixoro öturunon ulamun a Barok ke ine.

<sup>11</sup> Ma ina atöngösen nang e God ixo öturunon tö ine, ine bira; God ixoro isik tabaa ire ma to ulorexe ma ina to i meringan kö Barok ke ine.

<sup>12</sup> Me ewenene nang i kip a Barok ke ine i kip sik a to ulorexe. Me ewenene nang i kobo kip lo a Barok kö God, ine i kobo kip sik a to ulorexe.

*Ire te eöt tua ösöxö bara ire te uruoxe a to ulorexe*

<sup>13</sup> E geet inabo lalaa na urungan tö mum ewe mum mo nunu xö esene a Barok kö God, rue mum pa ösöxö bere mum mo uruoxe a to ulorexe.

<sup>14</sup> Me ire tabo balamasa xö wawara xö God, möxösa, ire te ösöxö bere e God ibo ölangen ire nang bara ire te seseseng eöt ma mamaa re ine.

<sup>15</sup> Ma nang bara ire te ösöxö bara ibo ölangen abo sineseng kirip pe ire, io, ire tabo ösöxö bere ire tabo uruoxe abo lalaa möxöbo sineseng ke ire xalik ine.

<sup>16</sup> Nang bara re öng i pere re tönö ine kölöme re Krais, i pet te sasaban nang i koxobo eöt ta silien ine xö minet, io, ine irabo seseng, me God irabo tabaa a tönö ine ma to. E wöwörö ulamun abo magingin saban nang i koxobo eöt ta silien te öng ka minet. Inexalik a mangana sasaban nangen nang i eöt ta sisilien te öng kua minet. E kobo tengen bara irabo seseng ulamunon.

<sup>17</sup> Abo tatalien kirip nang i kobo töxödös, a magingin saban. Inexalik, nangen a dauleng ne mangana sasaban nang i kobo eöt tua sisilien te öng ka minet.

<sup>18</sup> Ire te ösöxö bara ewe nang ine a barok kö God, ine i kara pet magingin saban. Ma lamun a Barok kö God ibo balaure ödeek sik ine ma a Tene Saban i kebeöt tua ögarin ine.

<sup>19</sup> Me ire te ösöxö bara ire a bung baroxorok kö God, ma bara a öxöno lagunon kirip i kisisik kö warkurai möxö Tene Saban.

<sup>20</sup> Me ire te ösöxö bölök bara a Barok kö God ixoro wanot ura ma ixoro ömaras ire, rue ire ra ösöxö ewe nang a lak turunon. Me ire te kis kölöme re ine ewe nang i turunon, ma kölöme bölök kö Barok ke ine, e Jisas Krais. Me ine a God turunon me ine a to ulorexe saxit.

<sup>21</sup> A bung baroxorok ke e kölöme re Krais, mum morobo mana kis pes kalik abo god töxö.

## A Sese Öninöng ne Ginigeet te JON

Jon a aposol ixo geet ina ginigeet na. Xö ina axana bung niang, abo tene atöngösen idi toxobo önan ebasin tua atöngösen ma ina tinenge deek. Me Jon ixo maaaa bara abo Kristien idi tabo emarse kaluluonin idi iat, me idi tabo öbala lo inabo tene atöngösen. Ma lamun ixo ötumarang bölök idi ulamun abo tene ausu röxröxö nang idi tokoxobo döxömen bere ina tödi nang e Jisas ine a Mesaia runon ma Barok kö God. Jon kaim kö maaaa bara abo Kristien tabo öbala lo idi urungan köbo gunon te idi, xalik idi tabo top abo ausu röxröxö re idi.

### *Ire tabo ebalamu kaluluonin ire*

<sup>1</sup> E a sisila möxö lotu, e geet ina tinenge na urungan kö lotu re mum nang e God ixoro pere kos xarnang önga une deek ma urungan te mum abo nangadi möxö lotu xarnang a bung baroxorok. Me e bo marse e mum, eöt mabo turunon te God ixoro osen te ire. Ma kawaim bere e xalik mon. Kaim. Idi xirip bölök ewe idi te ösöxö abo turunon te God, idi te marse e mum,

<sup>2</sup> möxösa, inabo turunon nang ibo xisixis se ire, i karabo wan tup kalik ire.

<sup>3</sup> A abalamu ma malum meriso re God, a Tamana ire, me Jisas Kraiss a Barok ke Mama, irabo kis me ire, möxösa, ire te kis arixe ma turunon ma te ebalamu kaluluon te ire.

<sup>4</sup> Me e xo axanan köba nang e xo ösöxö lo bara a dauleng ke mum, mum bo mumuu abo turunon, xarnang a Tamana ire ixo kure rö ire.

<sup>5</sup> Ma na, e seng a marakörö ne lotu re mum bara ire tabo mana ebalamu kaluluonin ire iat. Ina warkurai na e geet urungan te mum, i koxobo a warkurai maxat tö mum. Kaim, ine mon a öng nang ire toxoro kip lo mesila xö urulo.

<sup>6</sup> Ma a mangana lasa ina tatalien ne abalamu? Ine bira. Ire tabo mana muu abo warkurai te God. Ma ina warkurai nang mum moxoro ölangen mesila xö urulo i bira, bara ire tabo mana önan nana ma abalamu kaluluonin ire.

### *Abö tene ausu röxröxö*

<sup>7</sup> E seng e mum bira, möxösa, a oleleng idi tere wanot kö öxöno lagunon ma te silien ölelebes a nangadi, me idi bölök ewe nang te öös bere Jisas Kraiss kaim ine xo inot ura xarnang a önga tödi. Ma nang bara re öng i öös tewe e Kraiss

bira, ine a iuo re Krais me ine ewe ibo sisilien ölelebes a nangadi.

<sup>8</sup> Mum morobo tumarang lamun abo lalaa ire toxoro rörön ulamun, xalik ibo tup tewe. Inexalik bara mum morobo kip lo xirip a inone malawang ke mum.

<sup>9</sup> Me ewenene a öng i kobo kis arixe ma inausu re Krais ma i wan talu rewe xalik, io, ine i koxobo kip e God kö to re ine. Inexalik bara ewenene nang ibo xisixis arixe ma inausu re Krais, ine i uruoxe e Mama arixe ma Barok ke ine.

<sup>10</sup> Ma nang bara re öng i wanot pösöt e mum ma i koxobo wanot arixe ma inabo inausu, io, mum bele öbala lo ine xö gunon te mum me mum bele öga lo ine.

<sup>11</sup> Me ewenene re öng i öga lo ine, ine i top ine kölöme xöbo tinörön saban te ine.

<sup>12</sup> Me e maaaa bara arabo töngösen e mum mabo oleleng ne lalaa, inexalik e kumamaa bara arabo geet ösu inabo tinenge xö önga ginigeet mon. Me e döxömen bara irabo eöt te e bara arabo wan pösöt e mum ma arabo tuu mesilain e mum me ire tabo wöwörö, rue ire ra wöwöwö ma axanan.

<sup>13</sup> Ma a nangadi möxö ina lotu nang God ixoro pere kos idi, idi iat nang te ais me mum, idi te tile a tinenge ne aöga re idi urungan tö mum.

## A Sese Önarun ne Ginigeet te JON

Jon a aposol ixo geet ina ginigeet na. Ma ixo axanan te Gaius, möxösa, ixo öbala lo ma ixo top abo tene atöngösen nang toxo wan pösöt ine (pere a öxöno tinenge xö 2 Jon). Me Jon ixo köö a tödi saban nang e Dioterpes ewe nang i koxobo öbala lo inabo tene atöngösen, ma ixo tuu wi a nangadi bara idi takarabo isik kebo rorop bölök ke idi, ma ixo tile rewe idi meringan kö lotu ewe nang idi toxo top inabo tene atöngösen.

<sup>1</sup> E a sisila möxö lotu, e geet ina tinenge urungan tö nöngön e Gaius, a ais deek ke e. E isik a abalamu re e urungan tö nöngön eöt mabo turunon te God ixoro tengen ömaras sö ire.

<sup>2</sup> A ais deek ke e, e seseng bara a aine nöngön irabo deek sik ma bara abo lalaa xabise möxö to re nöngön irabo deek sik kirip bölök, eöt ma kinis möxö tanom nang i to deek sik.

<sup>3</sup> Me e xo axanan köba, möxösa, a dauleng ne tönö ire kölöme re Kraiss te orot ma te rengrengen bere nöngön u bo mumuu abo turunon te God, eöt ma nang e xo ösöxö bere nöngön nangen u bo roro muu abo turunon.

<sup>4</sup> Ma kaim pe laa i karabo öaxanan e xarnang kö ölöngö re e ulamun abo baroxorok ke e kölöme re Kraiss bere idi tobo mumuu abo turunon te God.

*Ire tabo mana top abo tene palas tinenge*

<sup>5</sup> A ais deek ke e, inabo tönö ire kölöme re Kraiss, nöngön u kobo ösöxö idi, ma lamun u bo mumuu a mamaa niang ke God nang u wewet abo mangana rorop urungan tö idi.

<sup>6</sup> Me idi tere töngösen a nangadi möxö lotu ulamun a abalamu re nöngön urungan te idi. Irabo deek bara örobo top abo sasaxan te idi xö inuan te idi, ma bara abo mangana rorop pe nöngön irabo eöt ma mamaa re God,

<sup>7</sup> möxösa, idi toxo wan su xarnang abo tultul bere idi tabo rörörön kelen e Jisas, me idi takarabo kip lo re rorop meringan kalik idi abo tabuno nunu.

<sup>8</sup> Ma lamun ina na, i deek bere ire tabo top a mangana nangadi bira rue ire ra tinörön arixe me idi ulamun abo turunon te God.

*Daiotepes me Demitirius*

<sup>9</sup> E xo gegeet urungan kö lotu, ma lamun e Daiotepes ewe ibo mamaa rua sinila re mum, kaim ine ra rarama e mem.

<sup>10</sup> Möxö ina na, nang bara arabo wanot, e rabo tenge maras lamun abo tatalien te ine. I rengrengen ögarin e mem mabo tinenge saban möxö atöxö. Ma lamun i kobola axanan lamun ina niang. Io, ine ibo mölmölök bölök kua öga lo abo Kristien nang idi tobo wanot. Me ine ibo wanwanak idi nang tobo maaaa rua rorop inabo tultul, ma ibo ritile rewe idi xalik a gunon ne lotu.

<sup>11</sup> A ais deek ke e, ganim bara u pet muu abo sasaban, inexalik örobo pet muu a lasa i deek. Ewenene nang ibo wewet abo dedeek, ine mere God. Me ewenene nang ibo wewet sasaban, ine i karabo ösöxö e God.

<sup>12</sup> Idi xirip te rengrengen bara a tödi deek e Demitirius. Ma abo tatalien te ine i eöt mabo turunon nang i osen bölök bara a tödi deek ine. Me mem bölök me rengrengen bara a tödi deek ine, me nöngön u ösöxö bara abo tinenge re mem i turunon.

<sup>13</sup> E xo eka rengrengen te nöngön ulamun a oleleng ne lalaa, inexalik e kumamaa bara arabo geet ösu inabo tinenge xö önga ginigeet mon.

<sup>14</sup> Ma lamun e döxömen bara, melamu aulik, irabo eöt te e ra nuanot pösöt nöngön ma arabo tuu mesilain nöngön me iraa tabo wöwörö.

<sup>15</sup> A malum urungan te nöngön. Abo ais se ire na, idi te tile a tinenge ne aöga re idi urungan te nöngön. Me e seng nöngön bara örobo tile a tinenge ne aöga re e urungan tö idi öngöng kingan.

## A Ginigeet te JUT

I wawara bara Jut a tönö e Jisas (pere e Matiu 13:55 me Mak 6:3) ma tönö Jems bölök (Jut 1; ma pere a öxöno tinenge xö ginigeet te Jems). Ma oleleng ne tinenge re Jut i eöt ma dauleng ke 2 Pita 2:1-22. Kö inabo axana bung a nangadi toxo saban tunon iat, idi toxo laxa xöbo lotu, idi toxo kulas a atöngösen deek, ma toxo tengen bara i deek bara abo Kristien tabo pet a sasaban (Jut 4). Inexalik e Jut ixo ödöxömen abo Kristien bara i kobo eöt bara a atöngösen deek irabo xuxulas (Jut 3) ma ixo etöngösen ma uleng ne pii xöbo ginigeet me lorexe rua osen bere God i ösöxö rua ömokorot abo tene sasaban bira (Jut 5-16).

<sup>1</sup> E, e Jut, a tultul kö pu re Jisas Krais, me e a tönö e Jems. Me e geet ina tinenge na urungan te mum ewe nang e God a Tamana ire ixoro kuwe e mum ma ibo balamu e mum, mum bölök ewe nang e Jisas Krais ibo balbalaure.

<sup>2</sup> Io, e seseng bara God irabo tabaa olelengin e mum ma a inemarse, a malum, ma a abalamu.

### *Tumarang lamun abo tene ausu röxröxö*

<sup>3</sup> Abo ais deek ke e, e mamaa xöba bara e rabo gegeet urungan tö mum ulamun a ineöro nang ire xirip tere kip lo. Inexalik e örasen bara i deek bara e rabo gegeet urungan te mum rua öxaxat e mum bere mum morobo erse lölös sua balbalaure ina tinenge nang mum moxoro nunu xönan. Önga axan kalik mon e God ixo isik ina tinenge na xöbo nangadi tus se ine bara ina tinenge irabo kis bie sik ulorexe.

<sup>4</sup> Ma i deek bere mum morobo pet biringan, möxösa, dauleng ne nangadi tere wanot suxume kaluluonin e mum. Idi nang tobo ruruu rewe xalik e God. Me idi te kulas a inemarse re God nang i tabaa tataunin ire min, ma te tengen bara ina inemarse i ömaraxen idi rua mumuu a tatalien ne ilawa ma abo mangana tatalien saban bölök. Idi te öös tewe e Jisas Krais, me ine xalik mon a Tene Sisila ma a Orong ke ire. Ma me lorexe saxit abo ginigeet ixo tengen bara a ömokorot irabo wan im urungan te idi.

<sup>5</sup> I turunon bere mum mo maras sik ulamun inabo lalaa xirip, inexalik e mamaa bara e rabo ödöxömen sik e mum ma lasa a Orong ixo pet. Ixo öro ösu a nangadi re ine mero Isip, ma lamun melamu im ixo ögarin esexerein idi nang tokoxobo nunu.



<sup>6</sup> Ma abo angelo toxoro kip lo a mangana kinis bara idi tabo balaure öngabo lalaa. Inexalik öngabo angelo idi toxo wan talu abo kinis se idi nang i xebe deek bara idi texebe kisisik iat tingan ee. Inabo angelo God ixoro kubus dik idi ringan kö xödxödö. Me idi tabo mana kisisik kingan ee ulorexe ot kö bung taxin möxö warkurai melamu.

<sup>7</sup> Ma a nangadi mee Sodom me Gomora ma abo lagunon nang te kis löröröin idu, idi toxo talien xarnang inabo angelo. Idi toxo to muu xöbanin a tatalien ne ilawa ma a mangana minaru arixe nang i xabise sik kö nang e God ixo uxis bara a nangadi tabo muu. Ma ömokorot te idi bere idi tabo kis kö ia sösöt nang i karabo kawam. Ma ina na rua ötumarang a nangadi.

<sup>8</sup> Ma ina nangadi na kaluluonin e mum, idi te saban bölök bira. Abo wöpönöbö re idi i lamus idi rua öbiling abo lewene aidi arixe ma tatalien saban, ma rua mölmölök kua kinis kö ene a warkurai te God, ma rua rengrengen ögarin abo mangana angelo meruso lömö.

<sup>9</sup> Ma lamun e Maikel nang a sisila möxöbo angelo, ine iat i koxobo pet biringan. Nang ixo egot me Satan ulamun a lewene aine e Moses ma ixo maaaa ra wupuk ina tödi saban, ine iat i koxobo ii öraxin ine iat tua rengrengen ögarin e Satan. Ixo tengen mon bara, "Orong irabo tenge köö nöngön ulamun a sasaban te nöngön."

<sup>10</sup> Inexalik ina nangadi na kaluluonin e mum, idi tobo rengrengen ögarin abo lalaa nang idi tokobo maras ulamunon. Idi te eöt mabo gineme axe nang kaim idi ma dinödöm. Idi tobo mumu mon abo mangana maaaa möxö lewene aine idi iat. Ma inabo maaaa irabo ögarin esexerein im idi.

<sup>11</sup> Maris sö idi, irabo saban tö idi! Idi tere muu a ngas nang e Kaen ixo wan könan. Idi toxo maaaa xöba bara idi tabo muu a tatalien saban te Balaam pua xikip tuluwok. Idi toxo suongus se God eöt mon me Kora me idi te iuo esexere xarnang ine.

<sup>12</sup> Ina nangadi kaluluonin e mum idi te eöt tua ögarin e mum xarnang a öxöno maat gargaras i eöt tua ögarin abo mön nang tobo ulo kaa xönan. Idi tobo aan arixe me mum köbo pet nien te mum nang mum mobo wewet tua osen abo inemarse egilas se mum, ma kaim pe minenge re idi. Idi tobo önunu bara idi abo tene ebalaure deek, ma lamun idi tobo balaure öbaling iat mon idi. Idi te xarnang a kubu möxö baraa ma xiki irabo kip tewe ma i karabo bara im. Idi tekebeöt tua rorop e mum, xarnang a iaa i kobo o xö axana bung möxö ino möxö inabo iaa. Idi te xarnang a iaa iri tamaxaxat ma iri manga esexere.

13 Ina nangadi te osen abo magingin ne minenge re idi xarnang a axana dalun ibo tewe öxaa a bisbise. Idi te xarnang abo tii nang i taxase wes xalik a kinis se idi riso lömö xö mango, ma inexalik e God iri tagur sik a kinis se idi ulorexe ringan kö xödxödö raxin köba.

14-15 Enok, ine a sese öpitnö ma ninöng ke idi nang toxo wanot köbo untubu ne Adam, ma ixo tenge ne propet ulamun ina nangadi na bölök ma ixo tengen, "Pere bang! A Orong irabo wanot arixe ma oleleng ne arip möxöbo tene madakdak ke ine bara a nangadi xirip tabo tuu xö warkurai te ine. Irabo wanot tua rengrengen osen bara idi te saban nang toxo tuu talu ine mabo mangana magingin nang kaim bere re God. Ma irabo pet bira bölök urungan te idi niang abo tene sasaban ulamun abo tinenge lölös se idi nang idi toxo tengen ögarin e God min."

16 Ina nangadi niang, idi abo tene ngunungun mabo tene auwupuk. Idi tobo mumuu abo maaa saban te idi, idi tobo ii öraxin idi iat, ma tobo önanamien a nangadi bara tabo isik a rorop urungan te idi.

17 Inexalik, abo ais deek ke e, mum morobo mana döxömen lo abo tinenge nang abo aposol te Jisas Krais, a Orong ke ire, idi toxo töngösen e mum mesila.

18 Idi toxo tengen te mum bara, "Xö xakawam möxö inabo axana bung a dauleng ne tene tabuno piri tabo wanot me idi tabo muu abo maaa re idi nang kaim bere re God."

19 Idi abo tödi nang tobo walwalang e mum, me idi tobo mumuu abo mangana dinödöm mera xö pu. Kaim idi ma Töxödös ne Tanono.

*Ire tabo uru ölölös ire kölöme xö tinenge deek*

20 Inexalik, abo ais deek ke e, mum morobo mana uru ölölös e mum kölöme xö tinenge madakdak nang mum mo nunu xönan. Mum morobo öbala lo a Töxödös ne Tanono bara irabo silien abo siniseng ke mum.

21 God i maaa xöba lamun e mum. Ma i deek bere mum morobo kisisik iat kölöme xö maaa re ine nang bang mum mo xixiset me Jisas Krais, a Orong ke ire, bara irabo isik a to ulorexe re mum meriso kölöme xö inemarse re ine.

22 Me idi ewe nang te nine dinödöm, e mum morobo mana marse idi.

23 Ma dauleng kabise, mum morobo mana sat lo idi xalik a xönö ia sösöt, me mum morobo öro idi bira. Ma dauleng kabise, mum morobo marse idi, ma lamun mum morobo balaure ödeek e mum ma binuut tö idi. Mum morobo marse idi ma lamun mum morobo mana melentexin abo tatalien te idi xarnang a biling köbo sisige re idi.

*Ire tabo ölet e God*

<sup>24</sup> E ölet ine ewe nang i eöt bara irabo balaure ödeek e mum bere mum korobo subu. Me ine bölök a öng i eöt tua uru e mum kö mariris ne mamaran te ine, ma kaim pe sasaban te mum pingan ee, ma a axanan taxin te mum.

<sup>25</sup> Io, e ölet ine, ine nang a önga God kalik mon, nang a Tene Aöro re ire. A mariris ma a kinis taxin ma a lölös ma a kinis möxö warkurai mere ine. E ölet ine kölöme xö tinörön te Jisas Krajs, a Orong ke ire, möxösa, God ixo kisisik biringan mero xöbo laa xirip ma i kisisik biringan nixinen ma irabo kisisik biringan bölök ulorexe. Amen.

## A Winawara re Jon

Ire tokobo ösöxö ina axana bung nang e Jon ixo geet oxe inabo lalaa nang e Kraiss ixo osen te ine, inexalik a oleleng ne tene nanase idi te döxömen bere Jon ixo geet ina na lörörö xö awat 95. Kö ina axana bung e Domitian ixo warkurai sik kiso Rom ma ixo tengen bara ine a Orong, önga god, ma oleleng ne nangadi xö xönö nang Rom ixo kure, idi toxo lotu wösöt ine. Inexalik abo Kristien belek idi tokoxobo lotu wösöt ina king mee Rom, möxösa, idi toxo nunu bara önga Orong kalik mon, e Jisas Kraiss a Barok kö God. Io nang, abo Rom idi toxo urulo rua eler mabo Kristien, ma abo tiip tataxin ixo uban a dauleng ne Kristien (pere Winawara 2:10; 2:13; 3:10; 6:9). A aposol nang e Jon, toxoro bulus ine xö gunon ne aömokorot kö muxulamin Patimos.

A unine ina ginigeet na i bira, bara **ire tabo mana tuu lölös köbo nunu re ire me ire tabo pas ösu abo ölelewen, möxösa, xö xakawam möxö öxöno lagunon, e Jisas Kraiss a Orong irabo sila esexere ma irabo pas ösu e Satan mabo tultul te ine.** A ginigeet i wöwö mabo aömokorot lölös se God nang irabo ömaso abo tene saban. Inexalik e Kraiss i öxaxat abo Kristien bere idi tabo mana tuu lölös köbo nunu re idi mabo tatalien deek ke idi ot kö xakawam pua nang e God irabo wadöane idi. Ma ina ginigeet i wöwö ma oleleng ne malalar (ma oleleng ne malalar i lörörö xarnang abo malalar kö ginigeet te Daniel). Inabo malalar a mangana tinenge eöt ma a mon unine idi. A dauleng a unine idi i lölös, inexalik a unine i maras, ma i bira, bere God irabo sila esexere. Io nang, abo Kristien tabo mana tuu lölös köbo nunu re idi.

Xö sisila ne xönö Jon ixo pere e Jisas Kraiss nang ixo ömaras inabo lalaa re ine. Xö Winawara 2-3 Kraiss ixo isik a tinenge lölös kö pitnö ma ninöng ne lotu ro Esia bere idi tabo mana tuu lölös kaluluonin abo ölelewen. Winawara 4-5 i osen bara e God i deek köba ma i taxin saxit, ma bie bölök ke Jisas a Barok ke ine, ine a Bak kö Sipsip nang ixo liling tewe a pitnö ma ninöng ne bubulut nang i osen abo ömokorot lölös. A sese öpitnö ma ninöng ne bubulut (6:1-8:1) i osen a pitnö ma ninöng ne tauu nang ma ömokorot lölös köba (8:2-11:19). Ma melamu xö ina na, a pitnö ma ninöng ne bile nang i wöwö ma laie re God (15:1-16:21). Satan, a mawak, a propet töxö, ma ina tene ilawa idi takarabo eöt tua ululo wes a laie xö God (12:1-14:20; 17:1-19:5). Kraiss irabo baling ma irabo kure xirip abo tene saban (19:11-20:15), inexalik bara abo Kristien tabo laxa xö

watmaep maxat ma a öxöno lagunon maxat, me idi tabo to ulorexe saxit (21:1-22:17).

*Jon ixo etöngösen maras mabo lalaa nang e Jisas ixo osen te ine*

<sup>1</sup> Ina ginigeet na i etöngösen ulamun abo lalaa nang e Jisas Kraiss ixo osen, nang e God ixo tabaa ine min bara irabo osen köbo tultul te ine ma inabo lalaa na nang i karabo alilis ma irabo wanot. Me Kraiss ixo tile a angelo re ine ura re Jon, a tultul kö pu re ine, bara irabo osen inabo lalaa urungan te ine.

<sup>2</sup> Me Jon iri etöngösen maras mabo lalaa xirip nang ixo pere. Ma iri etöngösen mabo tinenge re God, arixe mabo turunon nang Jisas Kraiss ixo öwösö.

<sup>3</sup> Irabo deek ke ewe a öng nang i kos inabo tinenge ne propet na. Ma irabo deek bölök ke ewe idi nang te ölangen ma te muu inabo tinenge möxö ina ginigeet na, möxösa, axana bung iri lörörö im bara inabo lalaa irabo wanot.

*Jisas a sisila raxin saxit nang i eka inuanot*

<sup>4</sup> Me e, e Jon, e geet ina tinenge na urungan te mum abo marakörö ne lotu möxö pitnö ma ninöng ne xönö mee Esia.

A abalamu ma malum urungan te mum. Irabo wanot meringan te God, ewe nang i to na, ma ixo to mesila, ma irabo to bölök melamu. Ma irabo wanot bölök meringan kalik abo pitnö ma ninöng ne tanono, ewe idi te tuu mesila xö kinis ne king kö God.

<sup>5</sup> Ma irabo wanot meringan iat te Jisas Kraiss bölök, ewe nang ibo etöngösen maras mabo tinenge turunon. Me ine a sila möxö tinaru kaa xalik a minet, me ine i kis ne warkurai sik köbo king möxö öxöno lagunon.

Io, ine ibo mamaa rö ire ma ixo ölanglanga rewe ire xalik abo magingin saban te ire xö dee re ine.

<sup>6</sup> Me ine iri kos öläxa ire xö kingdom pe ine, bere ire tabo pet abo tinörön möxöbo pris urungan te Tamana, a God te ine. Io nang, ire tabo ölet ine ma tabo sixaut bara irabo kure abo lalaa ulorexe. Amen.

<sup>7</sup> Pere bang! Ina na i eka inuanot arixe mabo kubu.

Mabo nangadi xirip idi tabo pere ine,

me idi iat bölök ewe idi toxo buso ine.

Ma nangadi xirip möxö öxöno lagunon tabo gee ne tapunuk pönö ine.

Turunon saxit, irabo bie xarna na.

<sup>8</sup> Me God, a Orong, nang ine mabo lölös kirip, ewe nang i to na ma ixo to mesila ma irabo to melamu, ine i tengen bira, "E a araun ma a xakawöm."

### *A winawara ulamun e Jisas*

<sup>9</sup> Me e, e Jon, a tönö e mum. E a öng mere mum kölöme re Kraiss, me e bölök e tuu lölös köbo tiip nang i ot pösöt ire nang ire möxö kingdom pe ine. Me idi toxo kip tewe e urungan kö muxulamin Patimos, möxösa, e xo wöwörö ma tinenge re God me e xo etöngösen mabo turunon ulamun e Jisas.

<sup>10</sup> Ma xö Bung ke Orong e xo kis kölöme xö lölös möxö Töxödös ne Tanono. Me e xo ölangen a inöno öng melamu re e, ixo gee xarnang a tauu.

<sup>11</sup> Ma ixo tengen bira, "Nöngön örobo geet abo lalaa nang nöngön u pere ma örobo tile urungan köbo pitnö ma ninöng ne lotu mee Epeses, Semerna, Pergamam, Taiataira, Sadis, Piladelpia me Laudisia."

<sup>12</sup> Io, e xo talingen tua werwere bere ewenene i wöwörö rö e. Ma nang e xo tawuxus e xo pere a pitnö ma ninöng ne kinis ne laam ne gol.

<sup>13</sup> Ma kaluluonin inabo kinis ne laam, e xo pere a öng xarnang a Barok kö Tödi, ma ixo sige sik önga man ömat. Ma a kie toxo pet ma gol ixo iis a böngböngöno ine.

<sup>14</sup> Ma bebene öxöno ixo pidien xarnang a bebene sipsip ma xarnang a op. Ma nine marna ixo xarnang a kamene ia.

<sup>15</sup> A nine xexene ixo sisiek xarnang a baras te söngöt kö ia söst. Ma inöno ixo xarnang a ginee möxö ari lölös.

<sup>16</sup> Ma xö lime tuun te ine, ine ixo tön sik a pitnö ma ninöng ne tii ma önga sele aan, ixo aan kö nine lawa xirip. Ma ixo wan su xalik a ngalna. Ma a mamaran te ine ixo mararang köba xarnang a luono xaken.

<sup>17</sup> Ma nang e xo pere ine, e xo subu xö xexene xarnang a öng i met. Io, ixo bulus a lime tuun te ine lömö re e ma ixo tengen, "Ganim a binuut. E a sila, me e a xakawöm.

<sup>18</sup> E ina öng na nang ine ma to. E xo met ma lamun na e kis ulorexe. Me e tön sik a ki möxö marame möxö minet ma möxö lagunon ne minet bölök."

<sup>19</sup> Io nang, nöngön örobo geet inabo lalaa nang u rö pere, ma lalaa nang i önan ot na, ma abo lalaa nang irabo ot melamu xina na.

<sup>20</sup> Me e rabo öwösö a unine nang ixo mun sik möxö ina pitnö ma ninöng ne tii nang u xo pere xö lime tuun te e, arixe ma pitnö ma ninöng ne kinis ne laam bölök. A pitnö ma ninöng ne tii, idi abo angelo möxö pitnö ma ninöng ne lotu. Ma pitnö ma ninöng ne kinis ne laam, idi a pitnö ma ninöng ne lotu iat.

## 2

*A tinenge uruso xö lotu mee Epeses*

<sup>1</sup> Ma ixo tengen bira, "Nöngön örobo geet ina tinenge na urungan kö angelo möxö lotu mee Epeses.

Ina na abo tinenge re ewe nang i tön sik inabo pitnö ma ninöng ne tii xö lime tuun te ine. Ma i önan kaluluonin a pitnö ma ninöng ne kinis ne laam ne gol.

<sup>2</sup> E ösöxö abo tatalien te mum mabo tinörön lölös bölök ke mum. Me e ösöxö bere mum mo tuu lölös kölöme xöbo tiip. E ösöxö bere mum mo korobo ömaraxen lo abo duöng saban, me mum moxo könönöin idi ewe nang toxo tengen bere idi abo aposol, ma lamun kaim. Me mum moxo pere bere idi toxo etöxö mon.

<sup>3</sup> E ösöxö bere mum moxo tuu lölös kölöme xöbo tiip me mum moxo örasen abo kinadik kua gene e. Me mum bele lönlön tua wewet bira.

<sup>4</sup> Ma lamun e puk e mum ma önga laa ma i bira. Mum kobo mamaa rö e xarnang mesila.

<sup>5</sup> Mum morobo döxömen lo abo tatalien deek nang mum moxo subu rewe xalik. Mum moro mana dödöm puxus me mum moro pet xarnang mesila. Ma nang bere mum korobo dödöm puxus, e rabo wan urungan te mum me e rabo kip tewe a kinis ne laam kalik e mum meringan kö xönö möxönan.

<sup>6</sup> Inexalik önga laa i deek ulamun e mum i bira, bara mum bo melentexin abo tatalien köbo Nikolaitan xarnang e bölök e bo melentexin.

<sup>7</sup> Ewe a öng i eöt ta ölangen kulen ina na, irabo mana tame a tinenge a Töxödös ne Tanono i rengrengan urungan köbo lotu. Ewe re öng i erese deek ma i pas ösu abo ölelewen, e rabo öbala ine bara irabo en a pasuno iaa möxö to nang kölöme xö komo mamaran saxit te God.

*A tinenge uruso xö lotu mee Semerna*

<sup>8</sup> "Me nöngön örobo geet bölök ina tinenge na urungan kö angelo möxö lotu mee Semerna.

Ina na abo tinenge re e ewe nang a sila ma xakawöm. E xo met me e xo to baling.

<sup>9</sup> E ösöxö abo kinadik ke mum. Me e ösöxö bere mum mo maris köbo lalaa mera xö pu. Ma lamun mum mere kip a kinis ne asuono orong turunon. Me e ösöxö bere idi nang tobo rengrengan bere idi abo Judeia, idi te tengen ögarin e mum. Inexalik idi kaim bara abo Judeia turunon. Kaim. Idi tobo lolotu wösöt e Satan.

<sup>10</sup> Ganim e mum pua buburin abo kinadik nang i eka inuanot pösöt e mum. E tengen te mum, Satan i eka ölaxa a uleng ke mum kö gunon ne aömokorot tua könönöin e mum. Me mum morobo örasen a kinadik kö sangaun ne bung. E maaa bere mum morobo tuu lölös köbo nunu re mum ot nang mum morobo met. Me ewe a öng irabo pet bie, e rabo tabaa ine ma bubuan möxö to.

<sup>11</sup> Ewe a öng i eöt ta ölangen kulen ina na, irabo mana tame a tinenge a Töxödös ne Tanono i rengrengen urungan köbo lotu. Ewe re öng i erese deek ma i pas ösu abo ölelewen, i karabo iuo xö sese öninöng ne minet.

*A tinenge uruso xö lotu mee Pergamam*

<sup>12</sup> “Me nöngön örobo geet ina tinenge na urungan kö angelo möxö lotu me Pergamam.

Ina na abo tinenge re ewe nang i tön sik ina sele i aan kö nine lawa xirip.

<sup>13</sup> E ösöxö a xönö nang mum kobo xisixis ee. Mum bo xisixis kö lagunon nang e Satan i kip a kinis ne king ee. Ma lamun mum belek, mum bo kip sik a eseke. Mesila toxo sexomet e Antipas meringan kaluluonin e mum kina lagunon nang e Satan ibo xisixis könan. Me Antipas a öng nang ixobo etöngösen maras mabo turunon ulamun e ma i koxobo wan kalik ina tinörön te ine. Ma xö ina axana bung mum kobo wan talu xalik abo nunu re mum ulamun e.

<sup>14</sup> Ma lamun e rabo puk e mum ma uleng ne lalaa. A uleng ne nangadi kaluluonin e mum ewe idi te mumuu a inausu re Balam, ewe nang ixo usu e Balak kua lalamus ölelebes abo Israel tua enen a nien nang toxoro erabaa min urungan köbo petpuo, ma rua wewet a tatalien ne ilawa.

<sup>15</sup> Bira iat mon bölök, a uleng kabise kaluluonin e mum ewe idi tobo mumuu abo ausu xöbo Nikolaitan.

<sup>16</sup> Io nang, mum morobo mana dödom puxus. Ma nang bara kaim, e rabo wanot pasaxit me e rabo erese midi abo mangana nangadi bira arixe ma sele nang i wan su mera xö ngalake.

<sup>17</sup> Ewe a öng i eöt ta ölangen kulen ina na, irabo mana tame a tinenge a Töxödös ne Tanono i rengrengen urungan köbo lotu. Ewe re öng i erese deek ma i pas ösu abo ölelewen, e rabo tabaa ine merebo manna nang i mun sik. Me e rabo tabaa bölök ine ma önga wat pidien. Ma önga ese maxat toxo geet sik kina wat. Me ine xalik mon nang irabo kip lo, irabo ösöxö sik ina ese.

*A tinenge uruso xö lotu mee Taiataira*



18 “Me nöngön örobo geet bölök ina tinenge urungan kö angelo möxö lotu mee Taiataira.

Ina na abo tinenge xö Barok kö God, ewe a nine marake i wawara xarnang a kamene iaa. Ma nine xexene e, idu te xarnang a baras i söt laxiren.

19 Me e re maras im ulamun abo tatalien ma abalamu, mabo nunu re mum, mabo tinam ura rö e. Me e ösöxö bere mum moxo tuu lölös köbo tiip ma na im mum mo wewet abo lalaa i deek köba xö nang mesila.

20 Inexalik arabo puk e mum ma önga laa ma i bira. Mum bo ömaraxen lo e Jesebel, ewe nang ixo tengen bere ine iang a propet. Ma ibo usu abo tultul te e, ma ibo lalamus ölelebes idi rua mumuu a tatalien ne ilawa, ma rua enen a nien nang toxoro erabaa min urungan köbo petpuo.

21 Me e xo tabaa ine ma axana bung kua dinödöm puxus, ma lamun kaim ine rua tame.

22 Io nang, arabo tewe ine xö öra möxö kinadik ma irabo örasen a kinadik taxin ringan arixe me ewe idi nang toxo maru arixe mine nang bara idi takarabo dödöm puxus.

23 Ma arabo sexomet ewe idi nang tobo mumuu ine. Io, abo lotu xirip tabo ösöxö bere e a öng ewe nang e bo wawara siwin abo lalaa kölöme xöbo dinödöm mabo baladi öngöng. Me e rabo balu wuxus a öngöng ke mum eöt mabo tatalien te mum.

24 Ma lamun a dauleng mere mum meringan Taiataira, mum kobo mumuu ina ausu saban. Mum koxobo kip lo a inausu re Satan, inabo lalaa a dauleng kabise tobo rengrengen bara i lölös sua ösöxö. Me e karabo öriip e mum ma önga tiip kabise.

25 Ma lamun mum morobo mana töndik sik inabo turunon nang mum moxoro kip lo ot kö axana bung arabo wanot.

26-27 Ewe nang i erese deek ma i pas ösu abo ölelewen ma i pet eörin xarnang kö maaaa re e ot kö xakawam, io, arabo tabaa ine ma önga kinis ne warkurai xarnang e xoro kip lo xalik e Mama. E rabo tabaa ine ma ina kinis ne warkurai rua kure abo kantri möxö öxöno lagunon.

‘Ine irabo kure ölölös idi ma irabo pörök ölixilik idi xarnang a sosopen nang toxo pet ma pu.’

28 Ma arabo isik bölök a tiinan te ine.

29 Ewe a öng i eöt ta ölangen kulen ina na, irabo mana tame a tinenge a Töxödös ne Tanono i rengrengen urungan köbo lotu.

### 3

#### *A tinenge uruso xö lotu mee Sadis*

<sup>1</sup> “Me nöngön örobo geet ina tinenge na urungan kö angelo möxö lotu mee Sadis.

Ina na abo tinenge re ewe nang i tön sik a pitnö ma ninöng ne tanono e God ma pitnö ma ninöng ne tii. E maras ulamun abo tatalien te mum. Ma nangadi tobo rengrengen bere mum mo to sik, inexalik mum moxoro met.

<sup>2</sup> Laran! Mum moro mana ölöös a lasa nang i nangen bang ma i eka minet, möxösa, e perexulen abo tatalien te mum bara i kala das eöt bang ma maaaa re God.

<sup>3</sup> Io nang, mum morobo döxömen lo a lasa nang mum moxo ölangen ma moxo kip lo. Mum moro mana dööm puxus ma moro tame ine. Ma nang bere mum kobo laran, arabo wan urungan te mum xarnang önga tene pinilo. Me mum korobo ösöxö a axana bung arabo wanot pösöt e mum.

<sup>4</sup> Ma lamun a dauleng mere mum meringan Sadis ewe idi nang kaim kö öbiling abo man te idi, tabo wan arixe me e. Me idi tabo sige a man pidien, möxösa, a tatalien te idi a lak töxödös.

<sup>5</sup> Ewe a öng nang i erese deek ma i pas ösu abo ölelewen, irabo sige bölok ina man pidien xarnang idi. Me e karabo bin tewe a esene ine xalik a buk möxö to, inexalik kö wawara re Mama re e mabo angelo re ine, arabo tengen osen bere ine mere e.

<sup>6</sup> Ewe a öng i eöt ta ölangen kulen ina na, irabo mana tame a tinenge a Töxödös ne Tanono i rengrengen urungan köbo lotu.

#### *A tinenge uruso xö lotu mee Piladelpia*

<sup>7</sup> “Me nöngön örobo geet bölok ina tinenge na urungan kö angelo möxö lotu mee Piladelpia.

Ina na abo tinenge re ewe nang i madakdak köba me i pet eörin xarnang i rengrengen. Me e tön sik a ki re Dewit. Ma lasa nang e sawang, kaim pe öng irabo baxut. Ma lasa nang e baxut, kaim pe öng irabo sawang.

<sup>8</sup> E maras sik köbo tatalien te mum. Me e ösöxö bere mum ma ulik ne lölös mon. Mum moxo mumuu abo tinenge re e, me mum kaim kö öös tewe a eseke. Io, e re sawang önga marame xö wawara re mum nang kaim pe öng i eöt tua babaxut.

<sup>9</sup> Pere bang! E rabo pet bule rö idi nang te mumuu re Satan? Idi te tengen bere idi abo Judeia, inexalik kaim bere

idi abo Judeia turunon. Kaim. Io, idi te etöxö mon. Arabo ösidien idi bara tabo wanot ma tabo subun kexe xö xexe mum, me idi tabo ösöxö bere e maaaa rö mum.

<sup>10</sup> Me mum moxo tame abo tinenge re e, io nang, e rabo tuu wi e mum kalik a axana bung möxö ölelewen nang irabo wanot kö öxöno lagunon tua könönöin ewe idi nang te xisixis kö öxöno lagunon kirip.

<sup>11</sup> E re lörörö ra nuanot. Me mum morobo mana töndik sik a lasa nang mum moxoro kip lo, io nang, kaim pe öng irabo kip lo a bubuan ne kinis deek ke mum.

<sup>12</sup> Ewe nang i erese deek ma i pas ösu abo ölelewen, io, e rabo uru ine xarnang a xösöng möxö gunon ne lotu raxin te God te e. Me ine i karabo wan su baling kalik ina gunon te God. Me e rabo geet a esene e God te e lömö rine. Me e rabo geet bölök a Jerusalem maxat, ina a esene a lagunon taxin te God te e, nang irabo wan su xalik a watmaep meriso re God te e. Ma arabu geet a ese maxat te e bölök lömö rine.

<sup>13</sup> Ewe a öng i eöt ta ölangen kulen ina na, irabo mana tame a tinenge a Töxödös ne Tanono i rengrengen urungan köbo lotu.

*A tinenge uruso xö lotu mee Laudisia*

<sup>14</sup> “Me nöngön örobo geet ina tinenge na urungan kö angelo möxö lotu mee Laudisia.

Ina na abo tinenge re ewe nang i pet eörin xarnang ibo rengrengen. E a tene rengrengen a turunon. I eöt bara öngöng irabo nunu kölöme xö atöngösen te e. Me e a unine abo lalaa xirip nang God ixo uxis.

<sup>15</sup> Me e re ösöxö abo tatalien te mum. Mum kobo madot me mum kobo lelewi. E maaaa bere mum morobo madot bara morobo lelewi.

<sup>16</sup> Io nang, e rabo gigisip tewe me mum kalik a ngalna e, möxösa, mum kobo lelewi xöba me mum kobo madot köba.

<sup>17</sup> Öngöng ke mum i tengen bara, ‘E a asuono orong. E xo kip lo a oleleng ne tuluwok. Me e kobo sasaxan lamun te önga laa.’ Ma lamun mum kobo perexulen abo to re mum bara i wöwö ma tiip ma kinadik. Mum kobo maras bara mum abo maris me mum abo pulo. Me mum kobo ösöxö bere mum mo tabuno laplawa.

<sup>18</sup> E öxaxat e mum bere mum moro kun te uleng ne gol deek mera xalik e, a mangana gol nang e xo söngöt kö ia söstöt tua irewese a biling. Me mum moro kun bira rue mum pa asuono orong turunon. Me e öxaxat bölök e mum bere mum moro kun te uleng ne man pidien mera xalik e rue mum pa sisige. Io nang, mum korobo menge xö tabuno

laplawa re mum. Me mum morobo mana kun bölök a wel deek möxö bulbulus kö mara mum rue mum pa winara.

<sup>19</sup> E bo tenge köö me e bo ömokorot ewe idi nang e bo maaa xöba ulamun idi. Io nang, abo bala mum irabo mana lelewi rue mum pua dinödöm puxus.

<sup>20</sup> Pere bang! E tuu sik kö marama me e wiwidin. Ma nang bara re öng i ölangen a inöke ma i sawang a marama, e rabo laxa ma arabo an arixe mine.

<sup>21</sup> E xo erese deek me e xo pas ösu abo ölelewen. Io nang, e xo kis arixe me Tata re e xö kinis ne king ke ine. Me ewe a öng i erese deek bölök ma i pas ösu abo ölelewen, io, e rabo ömaraxen lo ine bara irabo kis arixe me e xö kinis ne king ke e.

<sup>22</sup> Ewe a öng i eöt ta ölangen kulen ina na, irabo mana tame a tinenge a Töxödös ne Tanono i rengrengen urungan köbo lotu."

## 4

### *A kinis ne king kiso xö watmaep*

<sup>1</sup> Io, melamu im, e xo wawara me e xo pere önga marama ixo tamasawang sik kiso xö watmaep. Ma a inöno öng nang sila e xoro ölangen, ixoro wöwörö rö e, ma ixo xarnang a önga tauu, ixo tengen bira, "Nöngön örö miang kaa ura, ma arabo osen nöngön ma lasa nang irabo ot melamu xina na."

<sup>2</sup> Ma saxit mon, a lölös möxö Töxödös ne Tanono ixo kawönö e. Ma mesila re e, e xo pere önga kinis ne king kingan kö watmaep ma önga tödi ixo kisisik könan.

<sup>3</sup> Ma öng nang ixo kisisik kingan ixo talien xarnang a nini mangana wat deek nang a lak sisiek köba. Ma a tulamu ixo elulurwein sik a kinis ne king ma ixo xarnang a önga wat maxa nang i deek saxit.

<sup>4</sup> Ma nine sangaun ma nit ne mangana kinis ne pet warkurai toxo tuu elulurwe sik ina kinis ne king. Ma nine sangaun ma nit ne duöng tataxin toxo kisisik kö inabo kinis möxö pet warkurai. Ma abo man te idi a lak pidien. Ma abo bubuan ne sisila toxo pet ma gol toxo kisisik iat köbo öxödi.

<sup>5</sup> Ma siek arixe ma barawagas ixo ot meringan kö kinis ne king. Ma pitnö ma ninöng ne laam bibio toxo kisisik mesila xö kinis ne king. Me idi abo pitnö ma ninöng ne tanono xö God.

<sup>6</sup> Ma mesila bölök kö kinis ne king, a önga xönö ixo xarnang a rasi ma ixo wawara bara toxo pet ma galas, ma ixo maras kirip.

Ma lörörö xina kinis ne king, a nit ne laa to toxo elulurwein ine. Ma abo marana idi toxo bönöt kirip sik abo aidi mesila ma melamu.

<sup>7</sup> Io, a sisila ne laa to ixo xarnang önga laion. Ma a sese öninöngin ixo xarnang önga bulmakau, ma a sese önarunin a mamaran te ine ixo xarnang a tödi. Ma a sese önit ixo xarnang önga malaba i wawaa nana.

<sup>8</sup> A öngöng ke idi a nit ne laa to, ine ma pitnö ma öng ne wawono. Ma abo marna idi öngöng toxo bönöt kirip sik abo aidi, ma xö ene wawono idi bölök. Ma dömön ma xaken idi tekara mamas sua rengrengen bara,

“God, a Orong, nang ine mabo lölös kirip,  
ine i madakdak, i madakdak, i madakdak.

Ine ixo to mesila, ma i to na, ma irabo to bölök melamu.”

<sup>9</sup> Io, abo laa to idi tobo ölelet ma tobo ii öraxin ma tobo rengrengen deek ke ewe nang i kis kö kinis ne king, ine ewe nang irabo roro ulorexe.

<sup>10</sup> Ma nang idi tobo wewet bira, ina nine sangaun ma nit ne duöng tataxin, idi tobo susubu mesilain a öng nang i kisisik kö kinis ne king. Me idi tobo lolotu wösöt ine ewe nang i to ulorexe. Me idi tobo bulbulus abo bubuan ne sisila xö pu mesila xö kinis ne king me idi tobo rengrengen bira,

<sup>11</sup> “God, a Orong ke mem,

i töxödös bara tabo ii öraxin nöngön.

Ma i töxödös bere nöngön örobo uruoxe a lölös, ruasa, möxösa, nöngön u xo uxis abo lalaa xirip.

Ma u xo uxis idi eöt ma mamaa re nöngön.

Me idi te to xarnang nöngön u mamaa bie.”

## 5

### *A Bak kö Sipsip ixo sawang a buk*

<sup>1</sup> Io, me e xo pere a öng ewe ixo kisisik kö kinis ne king ma ixo tön sik önga buk kö lime tuun te ine. Ma abo buk kö nine lawa xirip. Me idi toxo bulut dik ine ma pitnö ma ninöng ne bubulut.

<sup>2</sup> Me e xo pere önga angelo lölös ixo xukup taxin bira, “I töxödös se ewe a öng bara irabo liling tewe a bubulut ma irabo palang a buk?”

<sup>3</sup> Ma lamun kaim pe öng meriso lömö xö watmaep, ma mera xö öxöno lagunon, ma meri xö ene öxöno lagunon bölök bara irabo eöt tua walwalang a buk kua winara laxa xönan.

<sup>4</sup> Io, e xo gee xöba, möxösa, kaim pe öng ixo töxödös köba bara irabo eöt tua sawang a buk ma bara irabo wawara laxa xönan.

<sup>5</sup> Ma öng möxöbo duöng tataxin ixo tengen tö e, “Ganim nöngön ta ginee. Pere bang! Ina laion möxö marapun te Juda, ine a Barok Subun kö marapun te Dewit. Ma ixo erse

deek ma ixo pas ösu abo ölelewen. Ine i eöt tua xikip tewe a pitnö ma ninöng ne bubulut ma rua sasawang a buk.”

<sup>6</sup> Me e xo pere önga Bak kö Sipsip ixo tuu sik kaluluon kö kinis ne king, ma a nit ne laa to mabo duöng tataxin bölök idi toxo tuu elulurwein sik ine. Ma ixo wawara xarnang bara toxoro sexomet ine. Me ine ma pitnö ma ninöng ne köm ma pitnö ma ninöng ne marna. Me idi a pitnö ma ninöng ne tanono xö God, ewe ixo tile idi xö öxöno lagunon kirip.

<sup>7</sup> Ma Bak kö Sipsip ixo wanot ma ixo kip lo a buk kalik a lime tuun te ine nang ixo kisisik kö kinis ne king.

<sup>8</sup> Ma nang ine ixo kip lo, a nit ne laa to arixe ma nine sangaun ma nit ne duöng tataxin idi toxo subu xö pu mesilain a Bak kö Sipsip. Me idi xirip öngöng toxo tön a önga ap arixe mabo bile nang toxo pet ma gol, ma toxo wöwö sik ma kabus i sixine mamaran. Ma ina kabus i xarnang abo siniseng möxöbo nangadi turunon te God.

<sup>9</sup> Me idi toxo sö ma önga sinö maxat. Ma i bira:  
 “I töxödös se nöngön bara örobo kip lo a buk  
 ma örobo liling tewe a bubulut möxönan,  
 möxösa, idi toxo tut ömet nöngön,  
 ma u xo kun tewe a nangadi bara rue God ma dee re  
 nöngön.

Me idi meringan kö bung marapun kirip, mabo mangana tinenge xirip, mabo mangana lewene aine idi, mabo kantri xirip.

<sup>10</sup> Ma u xo kos öläxa idi xö önga kingdom bere idi tabo pet a tinörön ne pris uruso xö God te ire.

Me idi tabo kip a kinis ne king kö öxöno lagunon.”

<sup>11</sup> Io, e xo wawara, me e xo ölangen a inöno idi a oleleng ne angelo. Ma xinoxos se idi ixo oleleng ne arip saxit. Ma abo angelo toxo tuu elulurwein a kinis ne king, ma abo nit ne laa to, ma abo duöng tataxin bölök.

<sup>12</sup> Me idi toxo sö raxin arixe bira:  
 “I töxödös bara a Bak kö Sipsip ewe idi toxo tut ömet ine,  
 irabo uruoxe a ese raxin ma a kinis ne orong ma  
 nanase ma lölös!

Ma i töxödös bara tabo ii öraxin ine ma bara tabo ölet ine!”

<sup>13</sup> Io, e xo ölangen a sinö re idi abo lalaa xirip nang God ixo uxis. Idi meriso xö balna kubu, mera xö pu, meri xö ene öxöno lagunon, ma kölöme xö balna rasi. Me idi xirip, idi toxo sö bira:

“Tabo ii öraxin ulorexe ma tabo ölet ulorexe ewe nang i kis kö kinis ne king, ma bie bölök kö Bak kö Sipsip!

Ma i töxödös bara idu tabo warkurai ulorexe.”

<sup>14</sup> Ma abo nit ne laa to toxo tengen, “Amen.” Ma abo duöng tataxin toxo subu xö pu, ma toxo lotu wösöt idu.

## 6

*Abo bubulut*

<sup>1</sup> Me e xo pere a Bak kö Sipsip ixo liling tewe a sisila möxö pitnö ma ninöng ne bubulut. Me e xo ölangen a öng mere idi abo nit ne laa to, ma inöno ixo xarnang a barawagas ma ixo tengen, “Örö miang.”

<sup>2</sup> Me e xo pere önga os pidien ma öng ixo kisisik könan ixo tön sik önga bunara, me idi toxo tabaa ine arixe ma önga bubuan ne sisila. Ma i xarnang a umri i ösöxö rua inarsexomet, ma ixo wan tewe rua ögarin a lagunon.

<sup>3</sup> Io, a Bak kö Sipsip ixo liling tewe a sese öninöng ne bubulut me e xo ölangen a sese öninöng ne laa to ixo tengen, “Örö miang.”

<sup>4</sup> A önga os kabise ixo wanot bölök, ine a lak dadan. Me God ixo isik a warkurai xö öng nang i kisisik könan, bere ine irabo kip tewe a malum kalik a öxöno lagunon bara a marakörö tabo erese ömet kaluluonin idi iat. Ma toxo tabaa ine ma önga sele raxin tua inarse.

<sup>5</sup> Ma a Bak kö Sipsip ixo liling tewe a sese önarun ne bubulut. Io, e xo ölangen a sese önarun ne laa to ixo tengen, “Örö miang.” Io, e xo pere önga os kong. Ma öng nang ixo kisisik könan ixo tön sik a sikel.

<sup>6</sup> Io, e xo ölangen a inöno öng ixo wanot meringan kaluluonin a nit ne laa to ma ixo tengen bira, “A sam irilöng i eka inot. Ma önga bile möxö wit i eöt ma xinixun ne tinörön möxö önga bung kudun. Ma narun ne bile möxö bali irabo eöt mabo xinixun ne tinörön möxö önga bung bölök. Ma lamun ganim bara mo ögarin abo olip ma wain.”

<sup>7</sup> Ma nang a Bak kö Sipsip ixo liling tewe a sese önit ne bubulut, e xo ölangen a sese önit ne laa to ixo tengen, “Örö miang.”

<sup>8</sup> Me e xo wawara me e xo pere önga os mimisök. Ma esene öng nang ixo kisisik könan bara, Minet i Orot. Ma a Lagunon Möxöbo Minet ixo muu lörörö rine. God ixo isik a warkurai te idu ulamun önga subana möxö nit ne subana nangadi xö öxöno lagunon kirip, bere idu tabo sexomet idi arixe ma sele möxö inarse, ma bere idu tabo isik ot a irilöng ma miniset, io nang, idi tabo met, ma bara idu tabo tile ot abo gineme axe rua xaxat ömet idi.

<sup>9</sup> Io, ma nang ina Bak kö Sipsip ixo liling tewe a sese öpitnö ne bubulut, e xo pere abo tanono idi nang toxoro met tua gene a tinenge re God ma, möxösa, idi toxo tuu lölös kö tinenge turunon. Me idi toxo kisisik kö ene alta.

<sup>10</sup> Idi toxo kup taxin bira, “Orong lölös, nöngön a lak madakdak me nöngön a lak turunon. Ma lause im örobo

kure abo marakörö möxö öxöno lagunon ma örobo balu wuxus idi ewe nang toxo sexomet e mem?"

<sup>11</sup> Ma toxo tabaa idi öngöng ma man pidien ma toxo tengen te idi bara, "Mum morobo mamas ulik bang, möxösa, God ixoro tulus sik bara re dauleng tabo met meringan kölöme xöbo unsaxa mum ma meringan te idi ewe nang tobo rörön pösöt a Orong xarnang e mum. Me mum morobo mamas ot nang idi xirip tabo met."

<sup>12</sup> Me e xo pere a Bak kö Sipsip ixo liling tewe a sese öpitnö ma öng ne bubulut. Io, a gie raxin ixo wanot ma marna xaken ixo bo xöba xarnang a maurine man kong. Ma texe xirip ixo dadan xarnang a dee.

<sup>13</sup> Ma abo tii toxo subu ura xö pu xö öxöno lagunon xarnang a löwö masie ibo susubu su nang a xiki raxin ibo ömagi idi.

<sup>14</sup> Ma mango ixo kawam xarnang tobo pulin a man ne ginigeet. Ma abo maii xirip ma abo muxulamin toxo taxase rewe xalik a ngasiene idi.

<sup>15</sup> Io, abo king, mabo tene pet warkurai, mabo umri, mabo asuono orong, mabo tene lölös, mabo tultul arixe me idi ewe nang tokoxobo kis kö ene a lölös möxö önga orong, toxo mun kölöme xöbo lieng ma kaluluonin abo wat möxöbo maii.

<sup>16</sup> Idi toxo kuwe abo maii mabo wat bira, "Moro subu lömö re mem ma moro umixen e mem kalik a mamaran kö öng nang ibo xisixis kö kinis ne king ma xalik a laie xö Bak kö Sipsip,

<sup>17</sup> möxösa, a bung taxin ne laie re idu iri wanot. Ma kaim pe öng irabo eöt tua tinuu lölös könan."

## 7

### *A auxileng ke God kö 144,000*

<sup>1</sup> Ma melamu xinabo lalaa, e xo pere a nit ne angelo, idi toxo tuu sik kö nit ne ngusuno öxöno lagunon. Idi toxo tön sik abo nit ne marna xiki rua wewet pi a xiki, bara i bele wawaxat kö öxöno lagunon bara xö rasi ma abo uno iaa.

<sup>2</sup> Me e xo pere önga angelo xabise ixo önan ot meringan kö xönö nang a xaken ibo önan kaa mee. Ma ixo tön sik a uxileng möxö God nang a lak to. Ma ixo kup taxin arixe urungan kö nit ne angelo ewe nang e God ixo isik a lölös urungan te idiet nit tua ögarin a öxöno lagunon ma rasi bölök.

<sup>3</sup> Ma ina angelo ixo tengen, "Ganim e muot ta ögarin a öxöno lagunon ma rasi mabo uno iaa, ot nang mem marabo bulus a uxileng ke God lömö xöbo piniene abo tultul kö pu xö God te ire."



<sup>4</sup> Io, e xo ölangen a xinoxos se idi ewe nang toxo bulus a auxilieng ke God kö piniene idi, bara a 144,000 idi. Me idi meringan kaluluonin abo sangaun ma ninöng ne marapun mee Israel.

<sup>5-8</sup> Idi toxo bulus a auxilieng lömö xöbo sangaun ma ninöng ne arip ne nangadi xöbo öngöng ne marapun: Juda, Ruben, Gat, Aser, Naptali, Manase, Simion, Lewi, Isakar, Sebulon, Josep me Benjamin.

*A aölelet uruso xö God ma Bak kö Sipsip*

<sup>9</sup> Melamu xina na, e xo pere a önga marakörö raxin! Kaim pe öng ixo eöt tua xokos kirip idi. Idi meringan köbo kantri xirip mabo marapun kirip mabo mangana lewene aine idi xirip mabo mangana tinenge xirip. Me idi toxo tuu sik mesila xö kinis ne king ke God ma ringan kö wawara xö Bak kö Sipsip. Me idi toxo sige a man pidien me idi toxo tön sik a labana beebie.

<sup>10</sup> Me idi toxo kup taxin bira,

“A ineöro ibo önan ot meriso re God te ire,  
ewe ibo kisisik kö kinis ne king,  
ma meringan bölök kö Bak kö Sipsip.”

<sup>11</sup> Io, abo angelo xirip idi toxo tuu elulurwein sik a kinis ne king arixe mabo duöng tataxin mabo nit ne laa to bölök. Me idi abo angelo toxo subu ma wawara ridi uri xö pu mesila xö kinis ne king me idi toxo lotu wösöt e God,

<sup>12</sup> ma toxo tengen bira:

“Mem me aut arixe mabo tinenge re mum!  
Ire tabo ölet a God te ire! A mariris i kis se ine ma a tene  
nanase ine!  
Ire tabo tengen deek ke ine ma tabo ii ine!  
Abo lölös taxin kirip mere God te ire ulorexe saxit! Amen.”

<sup>13</sup> Io, öng möxöbo duöng tataxin ixo ose e, “Ewe ina nangadi na te sige sik a man pidien? Me idi te wanot mole?”

<sup>14</sup> E xo balu ine, “Tödi raxin, e kobo ösöxö. Nöngön u ösöxö sik.”

Io, ixo tengen tö e, “Ina nangadi nang te wanot meringan kaluluonin abo tiip tataxin. Me idi toxo gis öpidien abo man te idi arixe ma dee ne Bak kö Sipsip.

<sup>15</sup> Ina na a unine nang idi toxo tuu mesilain a kinis ne king ke God, me idi tobo rörörön kö dömön ma xaken kölöme xö gunon ne lotu raxin te ine. Me ewe nang ibo kisisik kö kinis ne king, irabo kis arixe me idi ma irabo werwere muu idi.

<sup>16</sup> Idi tekarabo irilöng ma tekarabo minauu baling. A marna xaken bara re mangana lelewi bölök i karabo lewi idi,

<sup>17</sup> möxösa, a Bak kö Sipsip ewe ibo kisisik kaluluonin a kinis ne king irabo balaure idi ma irabo lamus idi urungan kö ari wuwut nang ibo isik a to. Me God irabo us tewe abo line marana idi.”

## 8

### *A sese öpitnö ma ninöng ne bubulut*

<sup>1</sup> Ma nang a Bak kö Sipsip ixo liling tewe a sese öpitnö ma ninöng ne bubulut, ringan kö watmaep ixo madödö xö subana axana bung.

<sup>2</sup> Io, e xo pere inabo pitnö ma ninöng ne angelo nang idi tobo tuu sik kö wawara xö God. Ma toxo isik a pitnö ma ninöng ne tauu re idi.

<sup>3</sup> Ma önga angelo xabise ixo wanot. Ma ixo tön sik önga bile toxo pet ma gol möxö söngsöngöt a kabus i sixine mamaran. Ine ixo wanot ma ixo tuu lörörö xö alta. Ma toxo tabaa ine ma oleleng ne kabus sua bulbulus arixin ma siniseng köbo marakörö re God tua söngsöngöt lömö xö alta nang toxo pet ma gol ma nang i tuu sik mesila xö kinis ne king.

<sup>4</sup> Ma taba möxö inabo kabus i sixine mamaran arixe mabo siniseng köbo marakörö re God ixo wan kaa xalik a limine a angelo uruso xö wawara re God.

<sup>5</sup> Ma ina angelo ixo kip lo ina bile ma ixo linge öläxa a laxit möxö alta xönan. Ma ixo tewe ösu xö öxöno lagunon. Io, a börbörön möxö barawagas, a siek, ma a gie toxo wanot.

### *Abo pitnö ma ninöng ne tauu*

<sup>6</sup> Io, abo pitnö ma ninöng ne angelo nang toxo tön sik abo tauu, toxo tagure bulus sua mamas abo pitnö ma ninöng ne tauu.

<sup>7</sup> A sinila ne angelo ixo mas a tauu re ine. Io, abo tibine ais ma a ia sösöt arixe ma dee ixo tamalinge su xö öxöno lagunon. Ma önga subana möxö narun ne subana öxöno lagunon ixo söt kirip. Ma ixo bie bölök köbo uno iaa xö öxöno lagunon. Öng möxö narun ne uno iaa ixo söt kirip. Mabo pirixö maxa xirip ixo söt bölök.

<sup>8</sup> Ma sese öninöng ne angelo ixo mas a tauu re ine. Ma önga laa xarnang a maii raxin nang i sösöt toxo tewe ösu xö rasi. Ma önga subana möxö narun ne subana rasi ixo xuxulas xarnang a dee.

<sup>9</sup> Ma önga muxu möxöbo narun ne muxu ne laa to möxö rasi toxo met. Ma önga muxu möxöbo narun ne muxu ne mön bölök toxo saban esexere.

<sup>10</sup> Ma sese önarun ne angelo ixo mas a tauu re ine. Ma önga tii raxin nang ibo bibio xarnang a wöxö dexe ixo subu su meriso xö balna kubu xö önga subana möxö narun ne subana ari mabo wuwut.

<sup>11</sup> Ma esene ina tii bara e Mele. Ma önga subana möxö narun ne subana ari ixo emele. Ma oleleng ne nangadi toxo met, möxösa, idi toxo inim inabo ari mele.

<sup>12</sup> Ma sese önit ne angelo ixo mas a tauu re ine. Ma önga subana möxö narun ne subana xaken ixo bo, ma önga subana möxö narun ne subana texe ixo bo, ma önga subana möxö narun ne subana tii toxo bo. Io nang, kaim kö bibio xö önga subana möxö narun ne subana axana bung kö xaken, ma xö dömön bölök bie.

<sup>13</sup> Io, nang e xo wawara, e xo ölangen a malaba ixo wawaa kaa uruso xö mango. Ma ixo kup taxin bira: "Irabo saban, irabo saban, irabo saban tö idi xirip ewe idi te kisisik kö öxöno lagunon, möxösa, iri lörörö bara a narun ne angelo xabise, idiet tabo mas abo tauu re idiet."

## 9

<sup>1</sup> Ma sese öpitnö ne angelo ixo mas a tauu re ine, me e xo pere a tii nang ixo subu su meriso xö balna kubu ura xö öxöno lagunon. Ma toxo isik a ki re ine rua sasawang a mara lamin kaim pe xakawam möxönan.

<sup>2</sup> Io, ine ixo sawang a marna mara lamin ma taba ixo taru kaa xarnang a taba möxö ia sösöt taxin saxit. Ma a taba meri xö pu xö mara lamin ixo öködö a xaken ma balna kubu.

<sup>3</sup> Ma abo kö toxo wan su xalik a taba ura xö öxöno lagunon. Me idi toxo kip a lölös xarnang a lölös köbo kalamasang möxö öxöno lagunon.

<sup>4</sup> Me idi toxo kip a tingenge bara ganim idi ra ögarin tebo mangana pirixö, bara abo uno iaa möxö öxöno lagunon. Ma lamun ixo eöt te idi rua ögarin kalik mon a nangadi nang kaim pe uxileng ke God kö piniene idi.

<sup>5</sup> Abo kö kaim kö xikip a lölös sua xaxat ömet a nangadi. Kaim. Ixo eöt te idi bara tabo öxadik köbanin mon a nangadi xö pitnö ne texe. Ma nang idi toxo öxadik köbanin a nangadi, inabo kinadik i eöt mabo kinadik möxö inekara möxö kalamasang.

<sup>6</sup> Ma kölöme xöbo balna idi xina pitnö ne texe, a nangadi tabo wawara siwin te ngas sua minet, ma lamun idi takarabo eöt tua parasiwin. Idi tabo maaa bere idi tabo met ma lamun a minet irabo wan kalik idi.

<sup>7</sup> Abo kö toxo xarnang a os i tagur sik kua nuan laxa xö inarse. Ma xö öxöno idi, toxo sige sik a mangana laa xarnang abo bubuan ne gol. Ma abo mamaran te idi ixo xarnang a mamaran kö nangadi.

<sup>8</sup> A bebene öxöno idi ixo xarnang a bebene öxöno une. Ma abo ngisine idi ixo xarnang a ngisine laion.

<sup>9</sup> Ma abo böngböngöno idi toxo kait pi arixe ma xönö aen xarnang a auwiwi. Ma inöno wawono idi ixo tam xarnang a oleleng ne os idi tobo sasat saxirin abo karis sua inarse.

<sup>10</sup> Ma abo kuno idi ibo ekara xarnang abo kalamasang. Ma abo lölös sua öxadik a nangadi xö pitnö ne texe i kis köbo kuno idi.

<sup>11</sup> Idi ma önga king ewe ixo kure sik idi. Ine ina angelo meringan kö mara lamin kaim pe xakawam möxönan. Ma esene ine xö tingenge mee Israel bara Abadon, ma xö tingenge mee Grik bara Apolion, a unine bara a Tene Ineögarin.

<sup>12</sup> A sisila ne sasaban iri kawam. Ma lamun a nine sasaban nangen bang irabo wanot.

<sup>13</sup> Ma sese öpitnö ma öng ne angelo ixo mas a tauu re ine, me e xo ölangen a inöno öng ixo wanot meringan kaluluonin a nit ne ngusuno alta nang toxo pet ma gol ibo tuu sik kö wawara xö God.

<sup>14</sup> Ma a inöno ixo tengen kö sese öpitnö ma öng ne angelo nang ixo tön sik a tauu bira, "Örö palas a nit ne angelo ewe te kut dik kö ari raxin Iuperetis."

<sup>15</sup> Ma nit ne angelo idi toxoro tagure sik idiet nit tua ulamun ina axana bung nang iat ma ina bung ma ina texe xö ina awat. Io, a angelo ixo palas tewe idiet nit tua sesexomet öng möxö narun ne subana marakörö möxö öxöno lagunon.

<sup>16</sup> Me e xo ölangen a xinoxos möxöbo umri ewe idi toxo xisin abo os, bara a nine mar ne milion idi.

<sup>17</sup> Abo os arixe me ewe idi nang toxo kisisik lömö xönan, e xo pere idi kölöme xö winawara re e. Me idi toxo wawara bira: Abo auwiwi möxö böngböngöno idi ixo dadan xarnang a ia sösöt, ma ixo wawara ne mango, ma ixo mimisök xarnang a solam. Mabo öxöno os ixo xarnang abo öxöno laion. Ma ia sösöt ma taba arixe ma solam ixo wan su xalik abo ngalna idi.

<sup>18</sup> Ma önga subana möxö narun ne subana marakörö möxö öxöno lagunon, idi toxo iuo ma toxo met meringan köbo narun ne kinadik, ma i bira: a ia sösöt, a taba, ma a solam nang ixo wan su möxö ngalna idi abo os.

<sup>19</sup> Ma a lölös möxöbo os ixo nangen kö ngalna idi ma xöbo kuno idi, möxösa, abo kuno idi ixo xarnang abo si. Idi ma öxödi, ewe nang tobo ögarin a nangadi min.

<sup>20</sup> Me ewe idi nang kaim kö minet meringan kö ina narun ne kinadik, kaim idi xo dinödöm puxus xalik abo petpuo re idi. Me idi kaim kö mamas sua lolotu wösöt abo tano saban mabo petpuo nang idi toxo pet ma gol, siliwa, baras, wat ma iaa. Inabo petpuo idi tekebeöt tua winara, bara rua ölöngö ma bara rua nuan.

<sup>21</sup> Me idi kaim kö dinödöm puxus bölok köbo tatalien ne sexomet tataunin a nangadi, ma abo piöt te idi, ma a tatalien ne ilawa, mabo tatalien ne pinilo re idi.

## 10

### *A angelo ma a buk lik*

<sup>1</sup> Io, e xo pere önga angelo lölös kabise ixo önan su meriso xö watmaep. Ine ixo xaxain ma kubu, ma önga tulamu ixo kis lömö sik kö öxöno ine, a mamaran tine ixo wawara xarnang a xaken, ma nine xexene ixo xarnang a kamene ia sösöt.

<sup>2</sup> Me ine ixo tön sik a önga buk lik kö limine ma ixo tamasawang sik. Ine ixo bulus a xexe tuun te ine xö rasi ma xexe kes lömö xö pu.

<sup>3</sup> Ma ixo kup taxin arixe, ma inöno ixo eöt ma kinup möxö laion. Ma nang ine ixo kup, abo pitnö ma ninöng ne barawagas toxo börön ma toxo tenge.

<sup>4</sup> Ma nang abo pitnö ma ninöng ne barawagas toxo tenge, e xo eka ginigeet. Inexalik bara a inöno öng meriso lömö xö watmaep ixo tenge lölös bira, "Umingen abo tinenge xöbo pitnö ma ninöng ne barawagas ma u bele geet ösu."

<sup>5</sup> Ma ina angelo nang e xo pere ine nang ixo tuu sik kö rasi ma lömö xö pu, ixo sasanga kaa sik ma lime tuun te ine uruso xö watmaep.

<sup>6</sup> Ma ixo sugurno xö esene e God, nang i to ulorexe saxit, ewe nang ixo uxis a watmaep ma öxöno lagunon ma rasi mabo lalaa xirip kölöme re idiet. Ma a angelo ixo tengen, "God i karabo alilis!

<sup>7</sup> Ma nang bara sese öpitnö ma ninöng ne angelo irabo mas a tauu re ine, io, God irabo pet eörin a apingit te ine nang i umixen sik, xarnang ine ixoro tengen ösu xöbo tultul te ine nang idi abo propet."

<sup>8</sup> Ma a inöno öng nang e xo ölangen meriso xö watmaep ixo wöwörö baling ura re e bara, "Örö wan ma örö kip lo a buk nang i tamasawang sik kö limine a angelo, ewe i tuu sik kö rasi ma lömö xö pu."

<sup>9</sup> Io, e xo wan urungan kö angelo, me e xo seng ine bara irabo tabaa e ma ina buk lik. Ma ixo tengen tö e bira, "Örö kip lo ma örö en. Ma irabo maru saban kö balam, ma lamun irabo namien xarnang a musien kö ngalam."

<sup>10</sup> Io, e xo kip lo a buk lik kalik a limine ina angelo me e xo en, ma ixo namien xarnang a musien kö ngalake. Ma nang e xo en, a balake ixo maru saban.

<sup>11</sup> Me idi toxo tengen tö e bira, “Örö tenge xarnang a propet ulamun abo oleleng ne marapun, mabo kantri, mabo mangana tinenge xöbo lagunon, mabo king.”

## 11

### *A nine tene palas tinenge*

<sup>1</sup> Io, idi toxo tabaa e ma a xönö iaa i xarnang a laa möxö öt abo lalaa, ma toxo tengen te e bara, “Örö wan ma örö öt a gunon ne lotu raxin kö God arixe ma alta. Ma örö kos bölök ewe idi nang tobo lolotu ringan.

<sup>2</sup> Ma lamun u bele öt a xönö nang kö araman möxö gunon ne lotu raxin, möxösa, toxoro tabaa a nangadi nang kaim bara abo Judeia min. Me idi tabo pas ösu a lagunon madakdak kö nit ne sangauon ma ninöng ne texe.

<sup>3</sup> Me e rabo tile a nine tene palas tinenge re e. Me idu tabo sige abo man ne tapunuk. Me idu tabo etöngösen ma tinenge re God kö 1,260 ne bung.”

<sup>4</sup> Me idu a nine uno iaa olip, ma nine kinis ne laam. Me idu tobo ruruu xö wawara xö Orong möxö öxöno lagunon.

<sup>5</sup> Ma bara re öng i eka könönöin tua ögarin idu, a ia sösöt irabo wan su xalik abo ngalna idu ma irabo ögarin turunin ewe idi abo iuo re idu. Lamun ina na, nang bara re öng i maaa bara irabo ögarin idu, irabo mana met iat bira.

<sup>6</sup> Me idu te uruoxe a lölös sua wewet pi a balna kubu bara i karabo bara xö axana bung idu te etöngösen ma tinenge re God. Me idu te uruoxe bölök a lölös sua wuxwuxus abo ari irabo xarnang a dee ma rua isik ot söxsöxöin abo mangana sasaban taxin kirip urungan kö öxöno lagunon nang bere idu te maaa bie.

<sup>7</sup> Ma nang bere idu tere öxawam a palas tinenge re idu, a mawak irabo kaa meri xö pu xö mara lamin kaim pe xakawam möxönan ma irabo erese me idu. Ma lölös se ine irabo pas ösu idu ma irabo sexomet idu.

<sup>8</sup> Mabo aidu irabo maru kaluluon kö ngas möxö lagunon taxin, nang toxo tut ömet a Orong ke idu xönan. Me idi tobo rengrengen ma tinenge öwuo xö ina xönö raxin, bere e Sodom me Isip.

<sup>9</sup> Ma nangadi möxöbo mangana lewene aine idi xirip, mabo mangana marapun, mabo mangana tinenge mabo kantri, tabo ngökngök kina aidu xö narun ne bung ma subana. Me idi tekarabo ömaraxen bara tabo pömös abo aidu.

<sup>10</sup> Ma abo marakörö möxö öxöno lagunon idi tabo axanan ulamun abo aidu, me idi tabo söwöng ma tabo exulas arabaa kaluluonin idi, möxösa, ina nine propet idu toxoro isik ot a sasaban taxin te idi nang tobo xisixis kö öxöno lagunon.

<sup>11</sup> Ma melamu xö narun ne bung ma subana, a mamas ne to meringan te God ixo tup pe idu. Me idu toxo tuu kaa, me ewe idi nang toxo pere idu toxo buut saban arixe.

<sup>12</sup> Io, a nine propet töxö ölangen a kinup taxin meriso xö watmaep ixo tengen te idu bira, "Muu moro miang kaa ura!" Ma nang abo iuo re idu toxo ngökgök, idu toxo wan kaa xö önga kubu uruso xö watmaep.

<sup>13</sup> Ma saxit mon, önga gie raxin ixo ögarin a önga subana xönö möxö sangaun ne subana möxö lagunon taxin ma ixo subu su. Ma a pitnö ma öng ne arip toxo met kö ina gie raxin. Ma nangadi nang toxo to sik toxo buut köba ma toxo ölet e God ewe nang ibo xisixis siso xö watmaep.

<sup>14</sup> A sese öninöng ne sasaban iri kawam. Ma lamun a sese önarun ne sasaban iri lörrö im pua nuanot.

*A sese öpitnö ma ninöng ne tauu*

<sup>15</sup> Io, a sese öpitnö ma ninöng ne angelo ixo mas a tauu re ine. Ma abo inöno a dauleng toxo tenge raxin tiso xö watmaep bira,

"Ina kingdom möxö öxöno lagunon iri ot xarnang a kingdom möxö Orong ke ire ma möxö Mesaia re ine, me ine irabo kis ne king ulorexe saxit."

<sup>16</sup> Ma nine sangaun ma nit ne duöng tataxin ewe nang toxo kisisik köbo kinis ne warkurai te idi mesila re God, idi toxo subu ma wawara ridi uri xö pu ma toxo lotu re God.

<sup>17</sup> Me idi toxo tengen,

"Mem me tengen deek ke nöngön, God, a Orong, nang nöngön mabo lölös kirip,  
ewe nang u xo to mesila ma u to na bölök,  
moxösa, u xoro kip lo a lölös taxin te nöngön  
ma uru urulo ra kis ne king.

<sup>18</sup> Abo tabuno nunu xöbo kantri toxo bala laie. Inexalik a axana bung möxö bala laie re nöngön iri orim. Ma axana bung iri wanot bölök bara örobo kure abo minet, ma bara örobo isik a xinixun deek köbo propet, idi nang abo tultul te nöngön,

ma bara örobo isik a xinixun deek kö idi bölök a nangadi madakdak ke nöngön ewe nang te ii a esem, idi nang te asuono orong me idi nang te maris.

Ma a axana bung iri ot tua ögarin esexerein ewe idi nang tobo ögarin a öxöno lagunon."

<sup>19</sup> Io, a gunon ne lotu raxin te God tiso xö watmaep ixo tamasawang. Ma kölöme xö gunon ne lotu raxin te ine a laa möxö bubulus a kunubus se God ixo wösö. Ma ixo siek ma a börbörön ne barawagas ma önga gie ixo ot. Ma a tibine ais taxin ixo subu.

## 12

### *A une ma a si raxin*

<sup>1</sup> Io, önga uxileng taxin ixo wösö riso xö watmaep. Önga une ixo sige sik a xaken, ma a texe ixo kis kö ene nini xexene, ma bubuan möxö sangaun ma ninöng ne tii ixo kis lömö xö öxöno ine.

<sup>2</sup> Me ine ixo tienen ma ixo lörörö im bara irabo kip barok, ma a barok ixo wawas ine ma ixo xukup ma kinadik.

<sup>3</sup> Io, önga uxileng kabise ixo wösö riso xö watmaep. A önga si dadan taxin ine ma pitnö ma ninöng ne öxöno, ma sangaun ne köm pine mabo bubuan ne king lömö xöbo öxöno idi öngöng.

<sup>4</sup> Ma kuno ixo se ösu a önga subana möxö narun ne subana tii meriso xö watmaep ma ixo tewe ösu idi uri xö pu. Ma ixo tuu mesila xö une nang ixo lörörö ra kip barok, ma bara nang iat mon ina une irabo kip barok, ine irabo könöm ine.

<sup>5</sup> Io, ina une ixo kip önga a bak suxurno ewe nang irabo kis ne king kö öxöno lagunon arixe ma lölös taxin. Inexalik bara idi toxo sat lo ina barok urso lömö re God kö kinis ne king ke ine.

<sup>6</sup> Ma ina une ixo ulo rup uruso xö xönö tataun kö önga xönö nang e God ixo tagur sik bara rö ine. Ma ringan ee, e God irabo balaure wi ine xö 1,260 ne bung.

<sup>7</sup> Io, a urube ixo raru rusu xö watmaep. E Maikel arixe mabo angelo re ine toxo erese arixe mina si raxin, mabo angelo re ine.

<sup>8</sup> Inexalik bara a lölös möxö ina si raxin kaim pua eöt, io niang, ine arixe mabo angelo re ine kaim idi mere xönö baling kiso xö watmaep.

<sup>9</sup> Me idi toxo tewe ösu ina si raxin, me ine iat mon ina si raxin mee mesila saxit, ma te tengen ine bara a tene aupuk bara e Satan ewe nang ibo lalamus ölelebes a öxöno



lagunon kirip. Ma toxo tewe ösu ine ura xö öxöno lagunon, arixe mabo angelo re ine.

<sup>10</sup> Io, e xo ölangen a inöno öng meriso xö watmaep ixo tenge raxin bara:

“Na im a ineöro ma a lölös ma a kingdom pe God iri wösö  
ot,  
ma a Mesaia re ine iri osen a kinis ne warkurai te ine,  
möxösa, a tene aupuk ewe nang ibo wupuk abo tök ke ire  
kölöme re Krai kö wawara re God köbo axana bung  
kö xaken ma dömön,  
idi tere tewe ösu ine meriso xö watmaep.

<sup>11</sup> Abo tök ke ire toxo kaa bulus a lölös se ine ma dee xö Bak  
kö Sipsip  
ma, möxösa, idi toxo etöngösen ma a turunon möxö  
tinenge re ine.

Me idi kaim kö dödöxömen köbanin abo to re idi.

Kaim. Idi toxo maraxa sik bere idi tabo met.

<sup>12</sup> Io nang, mum kirip ewe mum mo kis siso xö watmaep  
mum morobo axanan.

Inexalik bara irabo saban te idi ra xö öxöno lagunon ma  
rasi,

möxösa, Satan iri wan su wösöt e mum!

Ine i wöwö ma bala laie,

möxösa, i ösöxö bara axana bung ke ine iri wuruwut.”

<sup>13</sup> Ma nang a si raxin ixo ösöxö bara toxoro tewe ösu ine  
ura xö öxöno lagunon, ine ixo urulo ra waswasak a une  
nang ixoro kip a barok suxurno.

<sup>14</sup> Ma toxo tabaa ina une ma nine wawono malaba raxin,  
tue ine ra winawaa urungan kö xönö nang toxoro tagur sik  
kö ine xö xönö tataun, ma ringan ee e God irabo balaure wi  
ine xalik a si raxin kö narun ne awat ma subana.

<sup>15</sup> Io, a si raxin ixo muro ösu a ari xalik a ngalna xarnang  
a ari i sesen, bara ina ririn taxin irabo osen tewe ina une.

<sup>16</sup> Ma lamun a pu ixo top ina une. Ma ixo sawang a  
ngalna ma ixo könöm tewe a ari nang ixo wanot meringan  
kö ngalna a si raxin.

<sup>17</sup> Io, a si raxin ixo bala laie xöba xö une ma ixo wan lo  
rua inarse arixe mabo baroxorok kabise xö ina une. Idi ewe  
nang tobo rarama abo warkurai kö God ma tobo mumuu  
eörin abo turunon te Jisas nang ixo öwösö.

<sup>18</sup> Ma ina si raxin ixo tuu sik im löxön.

## 13

### *A ninöng ne mawak*

<sup>1</sup> Io, e xo pere a önga mawak ixo önan ot mero xalik a rasi.  
Ine ma sangaun ne köm ma pitnö ma ninöng ne öxöno. Ma

sangaun ne bubuan ne king lömö xöbo kôm pe ine. Ma toxo geet abo ese xöbo öxöno rua rengrengen ögarin e God.

<sup>2</sup> Ma a mawak nang e xo pere ixo talien xarnang a önga mangana laion töktök. Ma abo xexene ixo xarnang a xexene bea, a ngalna xarnang a laion. Ma ina si raxin ixo isik a lölös se ine ma a kinis ne king ke ine urungan kö ina mawak.

<sup>3</sup> Me e xo pere a öng möxöbo öxöno ma ixo wawara bara toxo kara ömet ine. Ma lamun a xexen nang önga öxöno ixo met min, ixoro manga. Io, lamun ina na, a öxöno lagunon kirip toxo wuwus kö ina mawak ma toxo muu ine.

<sup>4</sup> Ma toxo lotu wösöt a si raxin, möxösa, ixoro isik a kinis ne warkurai urungan kö ina mawak. Me idi toxo lotu wösöt bölök a mawak, ma toxo tengen bara, "Kaim pe öng i eöt ma ina mawak na. Ma kaim pe öng bara i eöt tua inarse me ine."

<sup>5</sup> Io, God ixo öbala urungan kö mawak bara irabo tenge ölolot ma bara irabo tengen ögarin e God. Ma ixo öbala lo bölök ine bara irabo kis ne warkurai sik kö nit ne sangaun ma ninöng ne texe.

<sup>6</sup> Ma a mawak ixo urulo ra rengrengen ögarin e God ma esene bölök. Ma ixo tengen ögarin bölök a ngasiene God nang ibo xisixis ee, me idi xirip bölök nang tobo xisixis ee riso xö watmaep.

<sup>7</sup> Me God ixo öbala lo ine bara irabo erse arixe ma abo madakdak ne nangadi tus nang ke God ma bara irabo kaa bulus idi. Ma ixo öbala lo bölök ine bara irabo kure abo marapun kirip, ma a nangadi möxöbo mangana lewene aine idi, ma möxöbo mangana tinenge, mabo kantri.

<sup>8</sup> Ma lörörö bara a nangadi xirip möxö öxöno lagunon tabo lotu wösöt a mawak, idi xirip ewe nang kaim kö gegeet abo esene idi mesila xö uxixis möxö öxöno lagunon kölöme xö buk ne to möxö Bak kö Sipsip nang toxo sexomet.

<sup>9</sup> Ewe a öng i eöt tua ölangen kulen ina na, irabo ölangen ine.

<sup>10</sup> Ma nang bere God iri tibe sik bara re öng irabo wan kö gunon ne aömokorot,  
io, irabo mana wan urungan ee.  
Me ewe a öng nang God iri sixaut bara tabo tee ömet ine,  
io, tabo mana tee ömet ine.

Io nang, i maras bara abo madakdak ne nangadi runon te God tabo mana tuu lölös köbo eler ma tabo nunu.

<sup>11</sup> Ma melamu e xo pere a önga mawak kabise ixo önan ot meringan kö pu. Ine ma nine kôm xarnang a bak kö sipsip ma inexalik bara ixo wöwörö xarnang a si raxin.

<sup>12</sup> Ma ixo rōrōn ma lōlōs taxin kō sisila ne mawak kingan kō wawara re ine. Ma ixo öparara a marakörö möxö öxōno lagunon bara tabo mana lotu wösöt ina sisila ne mawak nang ixoro langlanga xalik a xexen nang ixo met min.

<sup>13</sup> Ma ixo pet abo auxileng tataxin ne winiwus. Ma önga auxileng nang ixo pet, bara a ia sösöt irabo wan su meriso xö watmaep ura xö pu xö winara xö nangadi xirip.

<sup>14</sup> Me God ixo öbala lo ine bara irabo wewet inabo auxileng ne winiwus singan kō winara xö sisila ne mawak. Io nang, ina nine mawak toxo öt tua lamlamus öröxröxö lo a marakörö möxö öxōno lagunon. Io, ixo tengen ölölös bara idi tabo mana pet a önga petpuo möxö ina mawak ewe nang toxo tee ömet ine ma ixo to baling.

<sup>15</sup> Me God ixo öbala lo bölök ina sese öninöng ne mawak bara irabo isik a mamas ne to xö petpuo möxö sisila ne mawak nang bara a petpuo irabo tenge ma irabo erile bara tabo sexomet idi xirip nang tekara lotu wösöt ine.

<sup>16</sup> Ma ixo erile bölök bara idi tabo bulus önga auxileng kō lime tuun te idi bara xö piniene idi a nangadi xirip. Me idi toxo pet bira urungan kō nangadi rataxin, ma nangadi tataun, abo asuono orong, abo maris, abo tultul me idi ewe nang tokoxobo kis kō ene a lōlōs möxö önga orong.

<sup>17</sup> Ma nang bara a öng kaim ine ma ina auxileng, i koxobo eöt bara irabo kun te laa ma bara irabo misik mere laa. Ma ina mangana auxileng na, a esene ina mawak bara a xinixos möxö esene.

<sup>18</sup> Io nang, i deek bara ire tabo mana dödöm deek ulamun ina na. Ewe re öng a tene nanase ine i eöt bara irabo parasiwin lo a unine ina xinixos möxö ina mawak, möxösa, a xinixos se ine i eöt ma xinixos nang möxö nangadi. Ma a xinixos se ine i bira: 666.

## 14

### *A Bak kō Sipsip ma a 144,000*

<sup>1</sup> Io, e xo wawara me e xo pere a Bak kō Sipsip ixo tuu sik kō maii Saion. Ma önga mar ma nit ne sangaun ma nit ne arip ne nangadi toxo tuu arixe sik me ine. Ma toxo geet a esene ma a esene Tamana ine xöbo piniene idi.

<sup>2</sup> Me e xo ölangen a tinam meriso xö watmaep ma ixo börbörön xarnang a ari lölöös arixe ma barawagas. Ma ixo tam xarnang a mariris ne ginee xöbo ap nang idi tobo sese.

<sup>3</sup> Me idi toxo sö ma önga sinö maxat mesilain a kinis ne king ma mesila xö nit ne laa nang te to sik ma xöbo duöng tataxin. Ma kaim pe öng ixo eöt ta kubus lo ina sinö. Kaim. Idi xalik mon ina 144,000 ewe nang God ixoro kun ölanglanga lo idi mera xö öxōno lagunon.

<sup>4</sup> Me idi ewe nang tekala maru bang arixe ma balixilik, me idi ewe tekobo pet öbiling abo to re idi. Me idi nang te mumuu xö Bak kö Sipsip kö boxönö xirip nang i önan uxe. God ixo kun ölanglanga lo idi meringan kaluluonin a marakörö. Me idi abo sisila ne arabaa urungan te God ma xö Bak kö Sipsip.

<sup>5</sup> Me idi tekara ösöxö ra röxröxö. Ma i kebeöt bara re öng irabo tengen sik ke önga sasaban tö idi.

### *A narun ne angelo*

<sup>6</sup> Io, e xo pere a önga angelo xabise ixo wawawaa uruso lömö xö mango. Ma ixo kip a atöngösen deek nang i kis ulorexe rua atöngösen min köbo marakörö möxö öxöno lagunon, idi nang möxöbo kantri xirip, ma a bung marapun, mabo mangana tinenge, mabo mangana lewene aine idi.

<sup>7</sup> Ma a angelo ixo kup taxin bira, "Mum morobo mana ii e God ma morobo mana tibeölet ine, möxösa, a axana bung möxö warkurai te ine iri wanot. Mum morobo mana lotu wösöt ine ewe nang ixo uxis a watmaep ma öxöno pu, a rasi mabo ari wuwut."

<sup>8</sup> Io, a sese öninöng ne angelo ixo muu xö sinila ne angelo ma ixo tengen, "Idi tere ögarin im e Babilon nang i taxin. Babilon iat ewe ixo öparara sik abo kantri xirip bere idi tabo inim a wain lölös se ine bara re idi ra wewet abo tatalien ne ilawa re ine."

<sup>9</sup> Io, a sese önarun ne angelo ixo muu re idu ma ixo kup lömö saxit bara, "Nang bara re öng irabo lotu wösöt a mawak ma petpuo re ine, ma bara i kip ina mangana uxileng kö piniene bara xö limine,

<sup>10</sup> io, ine bölok irabo inim kö ina wain ne laie xö God. Me God i karabo arixin a wain ne laie re ine ma re ari. Kaim. Ina wain i lölös köba sik iat. Ma tödi nang ewe a laie re God i wanot pösöt ine, irabo örasen a kinadik taxin möxö ia sösöt ma xö solam kö wawara xö Bak kö Sipsip arixe ma abo angelo madakdak.

<sup>11</sup> Ma taba möxö ia sösöt nang i öxadik idi irabo ratabaa kaa sik ulorexe saxit. Me idi ewe nang idi te lotu wösöt a mawak ma a petpuo re ine, me idi ewe nang toxo kip ina auxileng möxö esene ine, kaim turunon arixe bara tabo mamas aulik kö xaken ma bara xö dömön."

<sup>12</sup> Io, ina na i osen bara a nangadi re God ewe nang idi tobo mumuu abo warkurai te ine ma tobo nunu sik ke Jisas, idi tabo mana tuu lölös kölöme xöbo eler.

<sup>13</sup> Io, e xo ölangen a inöno a öng meriso xö watmaep ixo tengen, "Örobo geet bira: I deek ke idi nang te met na ma melamu kölöme xö kinis se idi me Orong."

Ma a Töxödös ne Tanono ixo tengen, “Masa! I turunon bere idi tabo mamas xalik abo tinörön lölös se idi, möxösa, a tatalien te idi irabo wan arixe me idi.”

*A axana bung möxö kip laa maruxo xö öxöno lagunon*

<sup>14</sup> Io, e xo wawara ma önga kubu pidien angen mesilain e. Ma öng ixo kisisik könan ixo eöt xarnang a önga tödi. Ma bubuan ne sisilien toxo pet ma gol ixo kisisik lömö xö öxöno. Ma ixo tön sik a use aan.

<sup>15</sup> Ma önga angelo xabise ixo wanot meriso kölöme xö gunon lotu raxin. Ma ixo kup taxin urungan kö öng nang ixo kisisik kö kubu bira, “A axana bung kua reere rewe lo a nang iri maruxo iri wanot, möxösa, a öxöno lagunon iri maruxo. Io nang, örobo tee rewe lo abo lalaa maruxo ma use re nöngön.”

<sup>16</sup> Io, a öng nang ixo kisisik kö kubu ixo reere su urungan kö öxöno lagunon ma use re ine, ma ixo kip lo abo lalaa maruxo meringan ee.

<sup>17</sup> Io, önga angelo xabise bölök ixo wan su xalik a gunon lotu raxin tiso xö watmaep. Me ine bölök ixo tön sik a use aan.

<sup>18</sup> Ma önga angelo xabise bölök ewe nang ibo balaure sik a ia sösöt, ixo wanot meringan kö alta. Ma ixo kup taxin arixe urungan te ewe nang ixo tön sik a use aan, ma ixo tengen bira, “Örobo tön lo a use re nöngön ma örobo tee lo abo pasuno wain möxö öxöno lagunon, möxösa, abo pasuno iri madaa.”

<sup>19</sup> Io, a angelo ixo reere su xö öxöno lagunon ma use re ine, ma ixo tee lo abo pasuno wain. Ma ixo tewe ölaxa idi urungan kö ina xönö bara God irabo pas ösu idi ma laie re ine.

<sup>20</sup> Me God ixo pas ösu abo pasuno möxö öxöno lagunon ringan kö araman möxö ina lagunon taxin. Ma a dee ixo sen lo eöt ma narun ne mar ne kilomita meringan nang e God ixo pas ösu abo pasuno wain ringan ee. Ma ixo wöwö kaa eöt ma ngalna abo os.

## 15

*A pitnö ma ninöng ne eler*

<sup>1</sup> Io, e xo pere önga uxileng ne winiwus kabise riso xö watmaep ma lak taxin saxit. Ma inabo pitnö ma ninöng ne angelo idi ma pitnö ma ninöng ne eler. Me idi abo xakawam ne eler, möxösa, a laie re God irabo kawam nang bara idi tabo kawam.

<sup>2</sup> Me e xo pere önga laa ixo wawara xarnang a rasi toxo pet ma galas. Ma ixo wawara bölök bara a ia sösöt könan. Me e xo pere bölök a nangadi toxo tuu sik lörörö xö rasi.

Me idi ewe nang toxoro pas ösu a mawak ma petpuo re ine ma xinixos möxö esene ine. Me idi toxo tön sik abo ap meringan te God.

<sup>3</sup> Me idi toxo sö ma önga sinö re Moses, ina tultul te God, ma ina na a sinö möxö Bak kö Sipsip bölök. Ma i bira:

“God, a Orong, nang nöngön mabo lölös kirip, abo tinörön te nöngön i taxin saxit.

Nöngön ewe nang a king möxöbo kantri, abo tatalien te nöngön i töxödös ma i turunon.

<sup>4</sup> Orong, a nangadi xirip tabo burin nöngön ma tabo ii öraxin a esem, möxösa, nöngön kalik mon u madakdak.

Ma abo kantri xirip tabo wanot ma tabo lotu wösöt nöngön, möxösa, abo tatalien töxödös se nöngön iri ot maras.”

<sup>5</sup> Ma melamu xö inabo laa na e xo wawara uruso lömö xö watmaep, me e xo pere a gunon lotu raxin. Ma ina gunon lotu toxo pet ine ma man, ma ixo tamasawang sik.

<sup>6</sup> Ma a pitnö ma ninöng ne angelo ewe nang idi ma abo pitnö ma ninöng ne eler; idi toxo wan su meringan kölöme xalik ina gunon lotu. Ma abo sisige re idi ixo madakdak ma ixo sisiek. Ma abo kie re idi toxo pet ma gol, ma toxoro öxie abo böngböngöno idi min.

<sup>7</sup> Ma öng möxö ina nit ne laa to ixo isik a pitnö ma ninöng ne bile toxo pet ma gol urungan köbo pitnö ma ninöng ne angelo. Ma abo bile ixo wöwö sik arixe ma laie re God ewe nang i to ulorexe saxit.

<sup>8</sup> Ma a gunon lotu raxin ixo wöwö ma taba meringan kö mariris se God ma meringan kö lölös se ine. Ma kaim pe öng bara ixo eöt tua nilaxa xö gunon lotu raxin eöt nang bara a pitnö ma ninöng ne eler möxöbo pitnö ma ninöng ne angelo tabo kawam.

## 16

### *Abo pitnö ma ninöng ne bile möxö laie re God*

<sup>1</sup> Io, e xo ölangen önga inö raxin meriso xö gunon ne lotu raxin ixo tengen kö pitnö ma ninöng ne angelo bara, “Mum moro wan, ma moro linge ösu abo pitnö ma ninöng ne bile möxö laie re God kö öxöno lagunon.”

<sup>2</sup> Ma sisila ne angelo ixo wan ma ixo linge ösu a bile re ine ringan kö pu. Ma abo ruxuruk taxin ixo banga ot kö nangadi ewe nang a uxileng möxö mawak ixo kis se idi me idi ewe nang toxobo lotu wösöt a petpuo re ine.

<sup>3</sup> Io, a sese öninöng ne angelo ixo linge ösu a bile re ine ringan kö rasi. Ma a rasi ixo xuxulas xarnang a dee ne minet. Ma abo laa to xirip möxö rasi toxo met.

<sup>4</sup> Io, a sese önarun ne angelo ixo linge ösu a bile re ine ringan kö ari ma xöbo ari wuwut. Me idi toxo ot xarnang a dee.

<sup>5</sup> Io, e xo ölangen a angelo nang ixo kure abo ari ixo tengen,

“Nöngön ewe nang u xo to mesila ma u to nixinen bölök,  
ma a Tene Madakdak nöngön,

nang u xo pet inabo lalaa, a warkurai te nöngön i töxödös,  
<sup>6</sup> möxösa, toxo sexomet abo nangadi mabo propet te  
nöngön, ma abo dee re idi ixo su.

Io nang, u xoro tabaa idi ma dee rua ininim. Ma ina  
warkurai i töxödös esexere eöt ma abo lalaa idi toxo  
pet.”

<sup>7</sup> Me e xo ölangen a inöno öng meriso xö alta ma ixo tengen,

“Masa! God, a Orong, nang nöngön mabo lölös kirip,  
nang u xo pet inabo lalaa, abo warkurai te nöngön i töxödös  
ma i turunon.”

<sup>8</sup> Io, a sese önit ne angelo ixo linge a bile re ine xö xaken. Me God ixo öbala sik a sösöt möxö xaken bara irabo lewi ina nangadi.

<sup>9</sup> Ma a lelewi raxin ixo dek idi ma toxo tengen ögarin a esene God ewe nang ixo kure inabo lalaa saban tö idi. Ma lamun idi kaim kö dinödöm puxus bara idi tabo ölet ine.

<sup>10</sup> Io, a sese öpitnö ne angelo ixo linge a bile re ine urungan kö kinis ne king möxö mawak. Ma a xödxödö ixo kawönö ina xönö möxö mawak nang ixo kure sik. Ina marakörö idi toxo örasen a kinadik ma toxo kat abo kamene idi.

<sup>11</sup> Me idi toxo tengen ögarin e God meriso xö watmaep, möxösa, toxo örasen a kinadik me idi ma abo ruxuruk. Ma lamun kaim idi xo dinödöm puxus xalik abo tatalien te idi.

<sup>12</sup> Io, a sese öpitnö ma öng ne angelo ixo linge a bile re ine xö ari raxin Iuperetis. Ma a ari ixo mese rua tagure a ngas sö idi abo sisila raxin mero nang a xaken ibo önan ot mee.

<sup>13</sup> Io, e xo pere a narun ne tano saban, idiet toxo wawara xarnang a rokrok. Idiet toxo wan su möxö ngalana si raxin ma möxö ngalana mawak ma möxö ngalana a propet töxö.

<sup>14</sup> Ma ina narun ne tano saban idiet tabo wewet abo auxileng ne auwuwus, me idi tabo wan nana urso xö sisila

raxin möxö öxöno lagunon kirip pua xikip etok idi rua arse xö axana bung taxin te God nang ine mabo lölös kirip.

15 “Ölangen bang! E rabo wanot xarnang a önga tene pinilo! Ma ewe nang i kobo paluso ma iri tagure abo man lörörö re ine, irabo axanan, kalik ibo önan tabuno laplawa xö winara xö marakörö ma tobo pere ömenge ine.”

16 Io, idi toxo lamus etoxin abo tene sisila raxin urungan kö önga xönö nang tobo rengrengen kö tinenge me Judeia bara “Armagedon.”

17 Io, a sese öpitnö ma ninöng ne angelo ixo linge ösu a bile re ine riso xö mango. Ma önga inö raxin ixo wanot meriso xö kinis ne king kölöme xö gunon lotu raxin, ma ixo tengen, “Iri kawam im!”

18 Io, a siek ixo sisiek ma a barawagas ixo börbörön köba. Ma önga gie raxin ixo wanot. Ma kaim pe gie ixo ot bira mesila bang nang e God ixo uxis a nangadi xö öxöno lagunon. Ina gie na ixo taxin köba saxit

19 Ma a lagunon taxin ixo tawalang kö narun ne xönö. Ma abo lagunon taxin möxö boxönö xabise möxö öxöno lagunon toxo tamaöbeng esexere. Io, God ixo döxömen lo e Babilon nang i taxin, ma ixo inim ine ma wain möxö laie raxin te ine.

20 Ma abo muxulamin toxo kawam tataun, ma kaim im idi bara tabo pere öbaling kebo maii.

21 Ma boxönö kewene ais tataxin ixo subu meriso xö watmaep lömö xö nangadi. Abo tiip pe idi a öngöng ixo eöt ma pitnö ne sangaun ne kilo. Ma nangadi toxo rengrengen ögarin e God, möxösa, ixo isik ina eler saban nang ixo ömaso ögarin idi.

## 17

### *A tene ilawa i xisin sik a mawak*

1 Io, a öng möxö ina pitnö ma ninöng ne angelo ewe nang idi toxo tön sik ina pitnö ma ninöng ne bile ixo ot ma ixo tengen tö e, “Miang, e rabo osen nöngön ma ömokorot nang a une ilawa raxin ewe nang i kisisik lömö xöbo ari irabo kip.

2 Ma abo sisila raxin möxö öxöno lagunon toxo ilawa me ine. Ma nangadi möxö öxöno lagunon toxo muu abo tatalien ne ilawa re ine xarnang a öng i inim köba. Me idi toxo saban xarnang a oleleng ne ari lölös irabo öbaba ögarin te öng.”

3 Io, ma lölös möxö Töxödös ne Tanono ixo kawönö e ma a angelo ixo kip lo e urungan kö xönö tataun. Me e xo pere a önga une ixo kisisik lömö xö önga mawak dadan. Me idi toxoro geet sik abo ese xö mawak. Ma inabo ese



rua rengrengen ögarin e God. Ma ina mawak, a pitnö ma ninöng ne öxöno ma a sangaun ne köm pe ine.

<sup>4</sup> A une ixo sige sik a mangana dadan ne sisige nang a marna a lak kakaa. Me idi toxoro ömar sik ine ma abo mariris ne warawat ma karalo ne kalang. Ma ixo tön sik a bile toxo pet ma gol. Ma ina bile ixo wöwö sik ma abo magingin biling ne ilawa re ine ma abo lalaa ire tobo mimixenin.

<sup>5</sup> Me idi toxoro geet sik a ese xö piniene ma ina unine toxo umungen. Ma a esene i bira:

“Babilon taxin,  
a nago re idi abo ilawa  
ma a unine abo tatalien ne mimixen möxö öxöno  
lagunon.”

<sup>6</sup> Me e xo perexulen a une bara ixoro inim köbanin a oleleng ne dee re idi abo madakdak ne nangadi runon te God, idi ewe nang te etöngösen ulamun e Jisas. Ma inabo dee ixo öbawlang ine xarnang bara ixo inim a oleleng ne ari lölös.

Ma nang e xo pere ine e xo wuwus me e xo dödöm oleleng köba.

<sup>7</sup> Ma ina angelo ixo tengen te e bira, “U wuwus köba rösa? E rabo palas ömaras sik ke nöngön a unine ina une ma a mawak nang a une ibo xisxisin, ina mawak ma pitnö ma ninöng ne öxöno ma sangaun ne köm pe ine.

<sup>8</sup> A mawak nang u pere, ixo to bang mesila. Ma na, kaim im. Ma melamu irabo wan kaa ot meri xö pu xö mara lamin kaim pe xakawam möxönan, ma irabo wan lo rua xakawam esexere. Me idi nang te xisxis kö öxöno lagunon idi tabo wuwus. Me idi nang toxo kaim pua gegeet abo esene idi xö buk ne to mesila xö uxixis möxö öxöno lagunon. Idi tabo wuwus nang bara idi te pere a mawak, möxösa, ixo to mesila, ma na, kaim im, ma irabo wanot melamu.

<sup>9</sup> “Me ewenene i maaaa bara irabo maras kö na, irabo dödöm deek arixe ma nanase. A pitnö ma ninöng ne öxöno, idi abo pitnö ma ninöng ne maii nang a une ibo xisxis se.

<sup>10</sup> Me idi abo pitnö ma ninöng ne tene sisila raxin bölök. A pitnö idi toxoro subu. A öng angen na im, ma öng kabise i kala wanot bang. Ma lamun nang bara i wanot irabo mana to aulik mon.

<sup>11</sup> A mawak ewe ixo to mesila, ma na, kaim im, ina mawak a sese öpitnö ma narun ne tene sisila raxin. Ma kinis se ine i eöt arixe me idi a pitnö ma ninöng, me ine i eka önan tua xakawam esexere.

<sup>12</sup> “Ma ina sangaun ne köm uru pere, idi abo sangaun ne sisila raxin. Idi te kobola kip lo bang a kingdom. Ma lamun

idi tabo kis ne warkurai arixe ma mawak, inexalik a kinis ne warkurai te idi irabo kawam pasaxit baling.

<sup>13</sup> Me idi tabo önga dinödöm mon. Me idi tabo isik a lölös se idi ma a kinis ne warkurai te idi urungan kö mawak.

<sup>14</sup> Me idi tabo tuu rua inarse ma Bak kö Sipsip. Inexalik a Bak kö Sipsip irabo kaa bulus idi, möxösa, ine a Orong taxin möxöbo orong kirip me ine a Sisila raxin möxöbo sisila xirip. Me ine arixe ma nangadi ewe nang ixoro kuwe idi ma ixoro pere kos idi. Me idi nang toxobo muu ödeek ine."

<sup>15</sup> Io, ina angelo ixo tengen te e, "A unine inabo ari nang nöngön u pere a ilawa ibo kisisik lömö re idi i bira: abo ari idi abo marapun möxö öxöno lagunon, abo mangana marakörö, abo kantri, ma a nangadi möxöbo mangana tinenge.

<sup>16</sup> A mawak arixe ma inabo sangaun ne köm nang nöngön u pere, idi tabo melentexin a une ne ilawa. Idi tabo pet ögarin köbanin ine, me idi tabo wan lie sik ine ringan ma tabuno laplawa. Idi tabo en abo pines se ine ma tabo söngöt ökabobo ine xö ia sösöt.

<sup>17</sup> Idi tabo pet bira, möxösa, God iri bulus a dinödöm kölöme re idi bara tabo mana pet eörin a mamaa re ine bira: tabo aut arixe rua isik a lölös se idi urungan kö mawak bara irabo kure idi ot nang abo tinenge re God irabo ot turunon.

<sup>18</sup> Ma ina une nang u xo pere, ine a lagunon taxin nang i kure sik abo sisila raxin möxö öxöno lagunon."

## 18

### *Babilon i subu saban arixe*

<sup>1</sup> Io, melamu xö ina na, e xo pere a önga angelo xabise ixo önan su meriso xö watmaep. Ma ixo kip a kinis ne warkurai taxin. Ma a sisiek möxö mariris se ine ixo ömaras a öxöno lagunon.

<sup>2</sup> Ma ixo kup lömö saxit bira,

"Iri subu. Iri subu, ina Babilon taxin.

Abo tano saban ma abo tadak saban te kisisik im pingan. Mabo mangana pun saban nang tobo mimixenin, idi tobo xisixis bölök ee.

<sup>3</sup> Iri subu bira, möxösa, abo kantri xirip tere inim a wain lölös se ine bara rue idi ra wewet abo tatalien ne ilawa re ine.

Ma abo sisila raxin möxö öxöno lagunon toxo pet a tatalien ne ilawa me ine.

Me idi ewe nang tobo misik mabo lalaa, toxo kip abo kinis ne orong meringan te ine, möxösa, ixobo xukun abo lalaa deek saxit."

4 Io, e xo ölangen öbaling önga kinup kabise meriso xö watmaep ma ixo tengen,

“Mum moro wan kalik ine, abo nangadi re e! Moro miang! Mum bele laxa xöbo magingin saban te ine.

Me mum bele oxo lo abo kinadik ke ine.

5 Abo magingin saban te ine iri wöwö kaa im uruso lömö xö watmaep.

Me God iri döxömen lo öbaling abo sasaban te ine.

6 Mum morobo pet tö ine xarnang ine ixo pet tö mum.

Mum morobo balu wuxus öraxin urungan te ine a lasa ixo pet tö mum.

Ixo tabaa e mum ma önga tubon ne kinadik.

Io nang, mum morobo tabaa ine ma ninöng ne tubon ne kinadik.

7 Mum morobo balu wuxus sö ine mabo kinadik ma a tapunuk eöt mabo mangana lalaa deek saxit nang ixo tabaa öbaling iat ine min.

Ma ixo tengen öbaling ke ine iat bara,

‘E a önga kwin.

Ma kaim bara e a möxösö.

Me e kebeöt ta tapunuk.’

8 Io nang, inabo mangana eler irabo wanot pösöt pasaxirin ine.

Irabo meset, irabo tapunuk, ma irabo örasen a irilöng taxin. Ma irabo söt kabobo xö ia sösöt, möxösa, God, a Orong, ewe i kure sik ine bie, a lak lölös ine.

9 “Abo tene sisila raxin möxö öxöno lagunon toxobo ilawa me ine. Ma toxobo arixe me ine rua xikip lo abo lalaa deek saxit. Ma nang bara idi tabo pere a taba möxö ia sösöt i söngöt ökabobo ine, idi tabo gee, ma tabo tapunuk lamun ine.

10 Idi tabo tuu rewe xalik ine me idi tabo gee, möxösa, idi te burin abo kinadik ke ine. Io nang, tabo tengen bira:

‘Maris, maris sö nöngön, Babilon,

nöngön ina lagunon taxin

ma ina lagunon lölös!

A ömokorot te nöngön iri wanot pasaxit iat mon!’

11 “Inabo tene misik möxö öxöno lagunon tabo gee ma tabo tapunuk kö Babilon, möxösa, kaim im pe öng kua xukun öbaling abo lalaa re idi möxö misik.

12 Kaim pe öng kua xukun abo gol te idi, abo siliwa re idi, abo wat mamaran te idi, ma abo karalo ne kalang ke idi. Ma re öng i karabo kun bölök abo mangana sisige deek, abo sisige nang a marana i kakaa, abo sisige nang a lak dadan,

abo mangana lalaa deek te pet ma ngisine wawaguai, bara a iaa nang a marana i kakaa, bara a baras, bara xönö aen, bara wat deek.

<sup>13</sup> Ma kaim pe öng bölök kua xukun abo mangana laie ibo önamnamienin a nien, abo mangana lalaa i sixine deek, abo wain, abo wel ne olip, abo irine wit, abo bulmakau, abo sipsip, abo os, abo karis, ma abo nangadi rua tultul.

<sup>14</sup> “Me idi tabo tengen te ine, ‘Abo lalaa deek u xo maaaa bara örobo kip lo, idi tere kawam kalik nöngön. Abo tuluwok ke nöngön ma abo maririsine lalaa idi tere kawam esexere bölök. Nöngön ökorobo pere lo öbaling inabo lalaa.’

<sup>15</sup> Ma abo tene misik möxö inabo lalaa ewe nang toxo kip a oleleng ne tuluwok kalik ina lagunon taxin, idi tabo tuu rewe, möxösa, idi te burin abo kinadik ke ine. Me idi tabo gee ma tabo tapunuk.

<sup>16</sup> Me idi tabo xukup bara,

‘Maris, maris se nöngön, nöngön a lagunon taxin.

Nöngön u xobo sige abo mangana sisige deek nang a marna a lak kakaa.

U xobo usige öbaling nöngön ma gol ma abo wat mariris ma abo karalo ne kalang.

<sup>17</sup> A kinis taxin ne orong ke nöngön biringan iri kawam esexere pasaxit iat mon!’

“Ma abo sisila möxö mön, ma abo nangadi ewe nang tobo önan kö rasi, ma abo tene tinörön möxöbo mön, me idi xirip ewe nang idi tobo misik mabo lalaa möxö rasi, tabo tuu rewe.

<sup>18</sup> Ma nang idi tabo pere a taba kong möxö ia sösöt nang i söngsöngöt ine, idi tabo tengen, ‘Kaim im pe lagunon taxin kabise i eöt ma ina lagunon taxin na.’

<sup>19</sup> Idi tabo tewe öxaa a kabus köbo öxöno idi rua osen a tapunuk ke idi, ma tabo gee ne tapunuk, ma tabo kup lömö saxit bira,

‘Maris, maris sö nöngön, a lagunon taxin!

Idi xirip nang toxobo önan eli xöbo mön te idi xö rasi, toxo kip abo kinis ne orong ke idi meringan kö kinis ne orong ke ine.

Iri kawam esexere pasaxit iat mon!

<sup>20</sup> Mum puso lömö xö watmaep, morobo mana axanan ulamun ina nang i wan pösöt ine.

Mum abo madakdak ne nangadi runon te God ma abo aposol, ma abo propet, morobo axanan bölök.

God iri kure ine eöt ma abo tatalien saban te ine nang ixo pet tö mum.' "

<sup>21</sup> Io, a önga angelo lölös ixo rarik öxaa önga wat taxin saxit ma ixo tewe ösu uruo xö rasi. Ma ixo tengen,

"Idi tabo tewe ögarin ösu ina lagunon taxin Babilon bira. Ma tekarabo pere öbaling ine.

<sup>22</sup> Idi toxobo ölangen abo sinö mariris köbo tene sinö ma abo tene se ap ma abo tene mas tulat ma abo tene mas tauu.

Ma lamun idi tekarabo ölangen öbaling idi meringan kaluluonin nöngön.

Ma tekarabo pere öbaling abo tene tinörön köbo mangana tinörön kirip pingan kaluluonin nöngön.

Me idi tekarabo ölangen öbaling bölök idi nang tobo gigise abo irine wit tingan kaluluonin nöngön.

<sup>23</sup> A bibio möxö laam i karabo mararang baling kingan kaluluonin nöngön.

Ma a inöno abo alolo maxat, takarabo ölangen öbaling idi ringan kaluluonin nöngön.

Abo tene misik ke nöngön toxo abo duöng taxin saxit möxö öxöno lagunon.

Nöngön u xo lamus öröxröxö lo abo kantri xö axana bung u xo piörin idi.

<sup>24</sup> God ixo ömokorot e Babilon, möxösa, toxo pere lo abo dee möxöbo propet ma möxöbo madakdak ne nangadi runon te God tingan kölöme xö ina lagunon.

Masa! Idi toxo pere lo abo dee re idi xirip pingan nang toxo sexomet kö öxöno lagunon."

## 19

### *A Orong i ömokorot e Babilon*

<sup>1</sup> Io, melamu xö ina na, e xo ölangen a ginee eöt ma börbörön möxö marakörö raxin tuso xö watmaep. Me idi toxo xukup bira,

"Ire ta ölet a Orong!

I maras bere God te ire a tene Aöro ine, ma i uruoxe a mariris ma a lölös,

<sup>2</sup> möxösa, nang irabo kure a öng, a warkurai te ine i turunon ma i töxödös.

Ta ölet ine bira, möxösa, iri ömokorot a tene ilawa raxin nang ixo silien ögarin a öxöno lagunon ma a tatalien ne ilawa re ine.

God iri balu wuxus ina ilawa, möxösa, ixo tee ömet abo tultul te ine.”

<sup>3</sup> Me idi toxo kup baling bira:  
“Ire ta ölet a Orong!

Iri söngöt ökabobo a ilawa ma a taba möxö ia sösöt i önan kaa ma i karabo kawam.”

<sup>4</sup> Io, a nine sangaun ma nit ne duöng taxin ma nit ne laa to toxo subu su ma toxo lotu wösöt e God ewe i kisisik kö kinis ne king. Me idi toxo tengen bira,

“I turunon! Ta ölet a Orong.”

<sup>5</sup> Io, a inöno a öng ixo wanot meriso xö kinis ne king ma ixo tengen,

“Mum abo tultul kö God,  
ewe nang mo ii ine,  
mum kirip abo maris mabo orong,  
mum morobo mana ölet ine.”

<sup>6</sup> Io, e xo ölangen a ginee xarnang a marakörö raxin, ixo börön xarnang a tawirne dalun taxin ma barawagas taxin, me idi toxo xukup bira:

“Ta ölet a Orong,  
möxösa, e God, a Orong ke ire, nang ine mabo lölös kirip,  
iri kip a kinis ne king.

<sup>7</sup> Ire tabo mana axanan ma tabo söwöng,  
ma tabo ii öraxin ine,  
möxösa, a bung ne inalolo möxö Bak kö Sipsip iri wanot im,  
ma a une re ine iri tagure öbaling ine iat tua inalolo.

<sup>8</sup> Me idi tere isik abo sisige deek kö une.  
Inabo sisige i madakdak ma i sisiek.”

(Ma i osen a töxödösine tatalien möxöbo madakdak ne nangadi runon te God.)

<sup>9</sup> Io, a angelo ixo tengen te e bara, “Örö geet bira, ‘Irabo deek kö idi ewe nang te pixe idi rua nuanot kö nien möxö inalolo xö Bak kö Sipsip.’ ” Ma ixo tengen bölök bara, “Ina na abo tingen runon te God.”

<sup>10</sup> Io, e xo subu su xö pu xö nine xexene bara arabo lotu wösöt ine. Inexalik ixo tengen tö e, “U bele pet biringan! Iraa xirip mon a nine tultul te God arixe ma abo töm mabo saxam ewe nang tobo mumuu a turunon nang Jisas ixo osen.

Örö lotu wösöt e God, möxösa, a turunon nang e Jisas ixo osen a unine möxöbo tinenge ne propet."

*Jisas irabo wanot baling*

<sup>11</sup> Io, e xo pere a watmaep ixo tamasawang sik ma ringan ee a önga os pidien, ma önga tödi ixo xisin sik ine. Me idi toxo tengen ina tödi bara, "A Öng ibo Wewet Eörin abo Tinenge re Ine" ma "Öng i Turunon." Ma ina tödi ibo mumuu a tatalien töxödös nang i erese ma i pet warkurai.

<sup>12</sup> A nine marna i eöt ma kamene ia sösöt, ma oleleng ne bubuan ne king kö öxöno. Ma öng a ese toxoro geet lömö re ine ma kaim pe öng i ösöxö sik ina ese, ma lamun ine xalik mon.

<sup>13</sup> Ixo sige sik a sisige ma i wöwö ma dee. Ma esene bara, Tinenge xö God.

<sup>14</sup> Abo umri meriso xö watmaep toxo mumuu ine, me idi toxo xisin sik abo os pidien me idi toxo sige sik abo sisige pidien i madakdak.

<sup>15</sup> Ma önga sele aan ixo wan su möxö ngalna ma ina sele rua ögarin abo kantri. Ma öng nang ixo xisin ina os irabo kis ne king ma irabo kure ölölös idi. Irabo pas gigise idi ma laie raxin te God nang ine ma lölös kirip, xarnang a öng i pas gigise abo pasuno wain.

<sup>16</sup> Ma toxoro geet a esene xö sisige re ine ma xö lawana xexene ma i bira,

A King Taxin möxöbo king kirip  
ma a Orong Taxin möxöbo orong kirip.

<sup>17</sup> Io, e xo pere önga angelo ixo tuu sik kö marana xaken, ma ixo kup lömö saxit urungan köbo pun kirip nang idi tobo wawawaa ruso lömö xö mango ma i tengen bira, "Moro miang, moro kis etok kö pet nien taxin te God,

<sup>18</sup> rue mum pa enen abo pinesine idi abo king, abo umri raxin, abo duöng lölös, abo os me idi nang tobo xisxisin idi, ma abo pinesine nangadi xirip, idi abo tultul me idi ewe nang tokobo kis kö ene a lölös möxö önga orong, ma abo orong ma abo maris."

<sup>19</sup> Io, e xo pere a mawak ma abo king möxö öxöno lagunon arixe ma abo umri re idi toxo wanot etok arixe rua inarse ma öng ewe nang ixo xisin sik a os arixe ma abo umri re ine.

<sup>20</sup> Ma öng ewe ixo xisin a os ixo töndik a mawak, arixe ma propet töxö ewe nang ixobo wewet abo uxileng ne auuwus sua gene a mawak. Ina propet töxö ixoro rörörön arixe minabo uxileng kua ömamang lo abo nangadi nang idi toxo

kip lo a uxileng kö mawak ma toxo lotu wösöt a petpuo re ine. Ma öng ewe ixo xisin a os ixo tewe toin idu urungan kö mara möxö ia sösöt, a solam ma kamene ia angen könan.

<sup>21</sup> Ma öng ewe ixo xisin sik a os ixo sexomet idi xabise arixe ma sele re ine nang ixo wan su möxö ngalna. Ma abo pun idi toxo an masii xöbo pinesine idi a nangadi.

## 20

### *Ina arip ne awat*

<sup>1</sup> Io, e xo pere önga angelo ixo önan su meriso xö watmaep, me ine ma ina ki möxö ina mara lamin kaim pe xakawam möxönan. Ma ixo tön sik önga sen taxin.

<sup>2</sup> Io, ixo tön lo ina si raxin, me ine a si me lorexe saxit, ma tobo rengrengen bara ine a tene apuk, bere Satan, ma a angelo ixo kut dik sik ine ot kö önga arip ne awat.

<sup>3</sup> Ma ina angelo ixo tewe ösu ine xö mara lamin, ma ixo baxut ölöös ine, bara xalik ibo ömamang lo öbaling abo kantri, me Satan irabo kisisik ee ot kö önga arip ne awat irabo kawam. Melamu im, öng irabo ölanglanga rewe ine, me Satan irabo langlanga xö u axana bung puruwut mon.

<sup>4</sup> Io, e xo pere a uleng toxo kisisik köbo kinis möxö pet warkurai, me God ixoro tabaa idi ma lölös sua pet warkurai. Me e xo pere bölok abo tanono idi nang toxo döxö idi, möxösa, toxo rengrengen ösu a tinenge re God ma a turunon nang Jisas ixo osen. Idi tokoxobo lotu wösöt a mawak bara ina petpuo re ine, me idi tokoxobo kip ina uxileng möxö mawak köbo piniene idi bara xöbo limine idi. Me idi toxo to baling ma toxo kip a kinis ne king arixe me Krai kö önga arip ne awat.

<sup>5</sup> (Io, abo minet kabise takarabo to baling ot kö ina önga arip ne awat irabo kawam.) Ma ina na a sisila ne tinaru baling kalik a minet.

<sup>6</sup> Irabo deek kö idi me idi tabo madakdak saxit nang tabo taru xö ina sisila ne tinaru xalik a minet. Kaim pe lölös möxö sese öninöng ne minet tua kure idi. Kaim. Idi tabo ot xarnang abo pris mere God ma mere Krai me idi tabo kis ne king arixe me ine xö önga arip ne awat.

### *A xakawam pe Satan*

<sup>7</sup> Io, nang a önga arip ne awat irabo saxit, idi tabo ölanglanga rewe e Satan meringan kö xönö nang toxo baxut pi ine ee.

<sup>8</sup> Ma irabo wan urungan kö nit ne ngusuno öxöno lagunon tua ömamang tewe abo kantri nang tobo rengrengen idi ma Gok ma Magok, ma irabo lamus etok idi rua inarse. Ma xinixos se idi i oleleng köba saxit, eöt ma önö mee löxön.



<sup>9</sup> Idi toxo wan nana xö öxöno lagunon ma ixo wöwö arixe me idi, ma toxo elurwein a lagunon taxin nang e God ibo maaaa ulamun nang abo duöng madakdak turunon te ine, idi toxobo xisixis könan. Ma lamun a ia sösöt ixo wan su meriso xö watmaep ma ixo en esexerein idi.

<sup>10</sup> Me God ixo tewe rewe e Satan urungan kö mara möxö ia sösöt, ringan könan a solam ma kamene ia. Ine ewe nang ixo ömamang tewe a nangadi. Ma a mawak ma a propet töxö idu angen nang ee im na. Me idiet tabo örasen a kinadik ulorexe xö xaken ma dömön ma i karabo kawam.

*Abo minet tabo tuu xö warkurai*

<sup>11</sup> Io, e xo pere a önga kinis pidien taxin saxit möxö pet warkurai ma öng ixo kisisik könan. A öxöno lagunon ma watmaep idu toxo ulo rewe xalik a wawara re ine, me idu toxo kawam tataun esexere.

<sup>12</sup> E xo pere abo minet, ma kaluluonin idi, abo maris ma abo asuono orong, me idi toxo tuu mesilain sik a kinis ne pet warkurai. Ma abo buk ixo tamasawang sik. Ma önga buk kabise ixo tamasawang sik bölök. Ine a buk möxö to. Ma öng ewe ixo kisisik kö kinis ne pet warkurai ixo kure idi eöt ma abo tatalien nang toxoro geet sik köbo buk.

<sup>13</sup> Io, a rasi ixo isik puxus abo minet nang idi toxo xisixis könan, ma a Tatalien möxö Minet ma a Xönö ne Minet idu toxo isik puxus bölök abo minet nang toxo xisixis ee, me ewe nang ixo kisisik kö kinis ne pet warkurai ixo kure idi öngöng eöt ma abo tatalien te idi.

<sup>14</sup> Ma ixo tewe rewe a Tatalien möxö Minet ma a Xönö möxö Minet bölök urungan kö mara möxö ia sösöt. Ma ina mara möxö ia sösöt ine a sese öninöng ne minet.

<sup>15</sup> Ma nang bara a esene öng i koxobo kis kö buk ne to, toxo tewe ösu ine xö mara möxö ia sösöt.

## 21

*A watmaep maxat ma a öxöno lagunon maxat*

<sup>1</sup> Io, e xo pere a watmaep maxat ma a öxöno lagunon maxat, möxösa, a sisila ne watmaep ma a sisila ne öxöno lagunon idu toxoro kawam tewe ma kaim baling im pe rasi.

<sup>2</sup> E xo pere a madakdak ne lagunon taxin, ma ina na a Jerusalem maxat, ma ixo önan su meringan te God meriso xö watmaep, ma ixo tagur sik xarnang a une i eka inalolo me idi toxo ömar ödeek ine bara a tödi re ine irabo pere ine xarnang a önga une deek.

<sup>3</sup> Me e xo ölangen a inö raxin ixo wanot meriso xö kinis ne king ma ixo tengen, "Pere na, a kinis se God ine na kaluluonin a nangadi, me God iat irabo kis arixe me idi. Me idi tabo nangadi re ine me ine irabo God te idi.

<sup>4</sup> Irabo us abo line marna idi. Ma kaim baling im pe minet bara re tapunuk, ma kaim bölök ke ginee bara re kinadik, möxösa, abo lalaa nang me lorexe iri kawam.”

<sup>5</sup> Io, a öng nang ixo kisisik kö kinis ne king ixo tengen bara, “E wewet ömaxat abo lalaa xirip!” Ma ixo tengen bara, “Geet ösu ina na, möxösa, inabo tinenge na i turunon ma i eöt bara re öng irabo sulo a nunu re ine xönan.”

<sup>6</sup> Ma ixo tengen te e, “Iri kawam im! E a araun ma a xakawöm. E a sila ma mumune. Ewe nang i minauu, e rabo inim tataun ine mere ari wuwut möxö to ma i karabo kun.

<sup>7</sup> Ewe re öng nang i erese deek ma i pas ösu abo ölelewen, e rabo tabaa ine ma inabo lalaa xirip, me e im a God te ine, me ine irabo barok im pe e.

<sup>8</sup> Ma lamun i karabo bira rö idi abo mangana nangadi bira: abo tene binuut, abo tabuno nunu, abo tene sasaban, abo tene inarse ömet, abo tene ilawa, abo tene pet piöt, abo tene lotu wösöt a petpuo, ma abo tene atöxö. Idi tabo wan urungan kö mara möxö ia sösöt, nang a solam ma kamene ia xönan. Ma ina na a sese öninöng ne minet.”

### *A Jerusalem maxat*

<sup>9</sup> Io, a öng mere idi abo pitnö ma ninöng ne angelo nang idi toxo tön sik a pitnö ma ninöng ne bile niang toxo wöwö sik ma pitnö ma ninöng ne eler ne xakawam, ixo wanot urungan te e, ma ixo tengen te e bira, “Miang, e rabo osen a une urungan te nöngön, nang i elolo a Bak kö Sipsip.”

<sup>10</sup> Io, a lölös kö Töxödös ne Tanono ixo kawönö e ma ina angelo ixo kip öxaa e urso lömö xö önga maii raxin saxit, ma ixo osen e ma lagunon madakdak taxin, me ine e Jerusalem. Ma ina lagunon ixo önan su meriso xö watmaep kalik e God.

<sup>11</sup> Ma ina lagunon taxin ixo mararang ma maririsine God, ma ixo sisiek xarnang önga wat mariris, nang a marna a lak kakaa, ma ixo maras xarnang a galas.

<sup>12</sup> Ma a bölö lengleng taxin ixo tuu elulurwein ine, arixe ma a sangaun ma ninöng ne marana ngas kö ina bölö, ma a sangaun ma ninöng ne angelo tobo kisisik kö inabo marana ngas. Ma xö inabo marana ngas idi toxoro geet sik abo sangaun ma ninöng ne esene idi abo sangaun ma ninöng ne bung marapun mee Israel.

<sup>13</sup> Ma a narun ne marana ngas kö lawana bölö tunamat, ma narun kö lawana bölö me maramangin, ma narun kö lawana bölö möxö marana en, ma narun kö lawana bölö me labur.

<sup>14</sup> Ma sangaun ma ninöng ne unine wat tua uru ölölös a bölö möxö ina lagunon taxin, me idi toxoro geet sik ina

sangaun ma ninöng ne esene idi abo aposol kö Bak kö Sipsip pingan kö inabo unine wat.

<sup>15</sup> Ina angelo nang ixo wöwörö me e ixo tön sik önga laa toxo pet ine ma gol, xarnang önga xönö iaa möxö öt lalaa, ma ixo tön sik ine rua öwuo a lagunon taxin, ma a bölö ma a marana ngas möxönan.

<sup>16</sup> Ina nit ne bölö möxö ina lagunon taxin idi toxo ömat eöt. Io, ixo öwuo ina nit ne bölö me idi öngöng i lörörö ra 12,000 ne stadia\*. Ma a lengleng uruso lömö möxö bölö i lörörö ra 12,000 ne stadia bölök.

<sup>17</sup> Ma wewera möxö bölö ixo eöt ma 144 ne subana sinangae. Ina angelo ixo öwuo a bölö, ma lamun ina sinangae ixo eöt mon ma ina sinangae ina nangadi tobo öwuwo min.

<sup>18</sup> Idi toxo pet a bölö ma önga mangana maririsine wat, nang a marana i kakaa, ma a lagunon taxin toxo pet ine ma gol madakdak, ma ixo maras xarnang a galas.

<sup>19</sup> Ma inabo unine wat nang toxo uru ölölös ina bölö min, idi toxo ömar idi ma abo mangana wat mariris. A sisila ne wat i wawara xarnang a wuswusuno maire, a sese öninöng i wawara xarnang a mango, a sese önarun i gigilien, a sese önit i sisiek xarnang a labana ia,

<sup>20</sup> a sese öpitnö i dadan ma i pidien, a sese öpitnö ma öng i wawara xarnang a wuswusuno babon, a sese öpitnö ma ninöng i mimisök, a sese öpitnö ma narun i wawara xarnang a rasi, a sese öpitnö ma nit i mimingön, a sangaun i maxa, a sese ösangaun ma öng i eöt ma wuswusuno lomlom ködölö, ma a sese ösangaun ma ninöng i xarnang a wuswusuno gamat.

<sup>21</sup> Me idi toxo pet ina sangaun ma ninöng ne marana ngas ma sangaun ma ninöng ne karalo ne kalang. Idi toxo pet ina ngas möxö lagunon taxin ma gol madakdak, ma ixo maras xarnang a galas.

<sup>22</sup> Io, e kaim kö werwere re gunon lotu raxin kölöme xö lagunon taxin, möxösa, God a Orong, nang ine mabo lölös kirip, ma Bak kö Sipsip, idu toxo eöt ma önga gunon lotu raxin kölöme xö ina lagunon taxin.

<sup>23</sup> Ina lagunon taxin kaim kö sasaxan lamun te maras möxö xaken bara texe. Kaim. A mariris se God i ömaras sik ine, ma a Bak kö Sipsip ine i eöt ma bibio möxö lagunon taxin.

<sup>24</sup> Abo marapun möxö öxöno lagunon idi tabo önan nana ringan ee xö maras möxö lagunon taxin, ma abo sisila rataxin möxö öxöno lagunon tabo laxa ringan ee arixe ma mariris taxin te idi.

\* 21:16 I eöt ma 2,200 kilomita.

<sup>25</sup> Ma takarabo baxut abo marana ngas, möxösa, kaim pe xödxödö ringan ee.

<sup>26</sup> Abo marapun möxö öxöno lagunon tabo laxa ringan ee ma abo mariris se idi ma abo kinis ne asuono orong ke idi.

<sup>27</sup> Kaim pe laa biling irabo laxa ringan ee, ma abo tene röxröxö me idi nang tobo wewet magingin saban ne minenge, idi takarabo laxa bölök kingan ee. Idi xalik mon nang toxoro geet sik abo esedi xö buk ne to möxö Bak kö Sipsip, tabo laxa ringan ee.

## 22

<sup>1</sup> Io, ina angelo ixo osen e ma ari ne to, ma ina ari ixo maras xarnang a galas, ma ixo sesesen su möxö ene kinis ne king ke God ma a Bak kö Sipsip.

<sup>2</sup> Ma ixo sesesen kaluluon kö ngas möxö lagunon taxin. Ma a uno iaa möxö to ibo tuu sik kingan kö nine gegene möxö ina ari. Ma ibo oo sangaun ma ninöng ne axan kö önga awat, ma ibo oo baling kö öngöng a texe. Ma abo labana ina iaa rua ölanglanga a nangadi möxöbo marapun möxö öxöno lagunon.

<sup>3</sup> Abo lalaa xirip i karabo kis im kö ene ömokorot te God. Ina kinis ne king ke God ma a Bak kö Sipsip irabo kis singan kölöme xö ina lagunon, ma abo tultul te God tabo lotu wösöt ine ringan.

<sup>4</sup> Idi tabo pere a wawara re ine, ma esene irabo kis köbo piniene idi.

<sup>5</sup> Ma irabo kaim baling im pe xödxödö ringan. Me idi tekarako saşaxan lamun te maras möxö laam bara möxö xaken, möxösa, God, a Orong, irabo mararang lömö re idi. Me idi tabo kip a kinis ne king ulorexe saxit.

<sup>6</sup> Io, ina angelo ixo tengen te e, "Inabo tinenge i turunon. Ma i eöt bara a nangadi tabo sulo a nunu re idi xönan. God, a Orong, ine nang ibo sisilien abo propet tua tinenge, ine ixo tile a angelo re ine urungan köbo tultul te ine rua osen abo lalaa nang irabo mana wanot pasaxit."

### *Jisas irabo wanot baling*

<sup>7</sup> Me Jisas ixo tengen, "Ölangen bang, lörörö im e rabo wanot! Ewe nang i tame abo tinenge ne propet kö ina buk na, irabo deek kö ine."

<sup>8</sup> E mon, e Jon, e xo pere me e xo ölangen inabo lalaa. Ma bara e xoro ölangen me e xoro pere, e xo subu xö pu xöbo xexene angelo ewe nang ixoro osen inabo lalaa rö e, rua lotu wösöt ine.

<sup>9</sup> Ma lamun ixo tengen te e, "U bele pet biringan! Iraa xirip mon a nine tultul kö God arixe mabo propet nang abo

töm, arixe me idi bölök nang te tame abo tinenge xö ina buk. Nöngön örobo lotu wösöt e God!”

<sup>10</sup> Ma ixo tengen te e, “U bele baxut pi abo tinenge ne propet kö ina buk na, möxösa, a axana bung i lörörö nang abo lalaa irabo wanot.

<sup>11</sup> Ewe re öng ibo wewet a sasaban, gan sik ine irabo wewet abo sasaban biringan. Ma ewe nang ibo wewet abo tatalien biling, gan sik ine irabo wewet abo tatalien biling. Ma ewe re öng ibo wewet abo tatalien töxödös, gan sik ine irabo wewet abo tatalien töxödös. Ma ewe re öng ibo wewet a tatalien madakdak, gan sik ine irabo wewet abo tatalien madakdak.”

<sup>12</sup> Jisas ixo tengen bara, “Ölangen bang, lörörö im e rabo wanot! E rabo kip ot abo xinixun te mum, me e rabo balu wuxus e mum a öngöng eöt ma abo tinörön te mum.

<sup>13</sup> E a araun ma a xakawöm. E a urulo ma öxawam. E a sila ma mumune.

<sup>14</sup> “Irabo deek kö idi nang te gis abo sisige re idi. Nang bara idi tabo pet bira, irabo töxödös bara idi tabo laxa esexere xöbo marana ngas möxö lagunon taxin ma tabo an kö iaa ne to.

<sup>15</sup> Ma xö araman möxö lagunon taxin idi nang a tatalien te idi xarnang a bung puluwun, me idi abo tene pet piöt, abo tene ilawa, abo tene inarse ömet, abo tene lotu wösöt a petpuo, me idi ewe nang tobo maaaa xöba ra atöxö.

<sup>16</sup> “E mon, e Jisas, e re tile a angelo re e urungan te mum bara irabo töngösen ömaras minabo lalaa rua gene mum a nangadi ne lotu möxöbo lagunon. E a Barok Subun kö marapun te Dewit, me e a tiinan nang i mararang köba.”

<sup>17</sup> A Töxödös ne Tanono ma a une nang i eka elolo a Bak kö Sipsip, idu te tengen, “Miang!” Ma ewenene a öng nang i ölangen inabo tinenge, irabo mana tengen bölök bira, “Miang!” Me ewenene nang i minauu, irabo mana wanot. Me ewenene nang i maaaa bara irabo kuluwo, irabo mana kuluwo tataun mon meringan kö ari ne to ma kaim pe xinixun.

<sup>18</sup> E ögele e mum kirip nang moxo ölangen abo tinenge ne propet möxö ina buk. Nang bara re öng nang irabo wasum pebo tinenge ringan kö ina buk, God irabo wasum urungan te ine abo eler i kis kölöme xö ina buk.

<sup>19</sup> Ma nang bara re öng irabo kip tewe rebo tinenge möxö ina buk ne propet, God irabo kip tewe re uk ke ine möxö ina uno iaa möxö to nang ina buk i rengrenge ulamunon. Ma irabo kip tewe re uk ke ine bölök kö madakdak ne lagunon taxin nang i kis kölöme xö ina buk.

<sup>20</sup> Ewe nang i etöngösen maras ulamun inabo lalaa na i tengen bira, “Masa, lörörö im e rabo wanot.”

Turunon. Jisas, a Orong, örö miang.

<sup>21</sup> E seseng bara a abalamu mere Jisas, a Orong, irabo kis  
arixe ma nangadi re God.